

清實錄

仁宗睿皇帝實錄(五)

卷三〇二至卷三七四
嘉慶二十年至二十五年

清實錄

第三冊

中華書局影印

清 實 錄

(第 三二 冊)

仁 宗 實 錄 (五)

*

中 華 書 局 出 版

(北京王府井大街 36 號)

北京市中國書店發行

中國建築工業出版社印刷廠印刷

*

787×1092 毫米 1/16·59 1/2 印張

1986 年 8 月第 1 版 1986 年 8 月北京第 1 次印刷

印數 0.001—1.500 冊

統一書號: 11018·1355—32 定價: 44.00 元

清實錄第三二冊目錄

仁宗睿皇帝實錄(五)

卷三〇二	嘉慶二十年正月	一
卷三〇三	嘉慶二十年二月	一七
卷三〇四	嘉慶二十年三月	二九
卷三〇五	嘉慶二十年四月	四二
卷三〇六	嘉慶二十年五月	六〇
卷三〇七	嘉慶二十年六月	七三
卷三〇八	嘉慶二十年七月	八七
卷三〇九	嘉慶二十年八月	一〇〇
卷三一〇	嘉慶二十年九月	一一三
卷三一一	嘉慶二十年十月	一二五
卷三一二	嘉慶二十年十一月	一三九
卷三二三	嘉慶二十年十二月上	一五八
卷三二四	嘉慶二十年十二月下	一六六
卷三二五	嘉慶二十一年正月	一八〇
卷三二六	嘉慶二十一年二月	一九二
卷三二七	嘉慶二十一年三月	二〇一
卷三二八	嘉慶二十一年四月至五月	二二二
卷三二九	嘉慶二十一年六月至閏六月	二三六
卷三三〇	嘉慶二十一年七月	二三八
卷三三一	嘉慶二十一年八月	二四八
卷三三二	嘉慶二十一年九月	二五六
卷三三三	嘉慶二十一年十月	二六四
卷三三四	嘉慶二十一年十一月	二七三
卷三三五	嘉慶二十一年十二月	二八五
卷三三六	嘉慶二十二年正月	二九四
卷三三七	嘉慶二十二年二月	三〇八
卷三三八	嘉慶二十二年三月	三二〇
卷三三九	嘉慶二十二年四月	三三一
卷三三〇	嘉慶二十二年五月	三四三
卷三三一	嘉慶二十二年六月	三六〇
卷三三二	嘉慶二十二年七月	三七七
卷三三三	嘉慶二十二年八月	三九一
卷三三四	嘉慶二十二年九月	四〇一
卷三三五	嘉慶二十二年十月	四一四

仁宗實錄

卷三三六	嘉慶二十二年十一月	四三八	卷三五五	嘉慶二十四年三月	六八二
卷三三七	嘉慶二十二年十二月	四四三	卷二五六	嘉慶二十四年四月	六九四
卷三三八	嘉慶二十三年正月	四六〇	卷二五七	嘉慶二十四年閏四月	七〇四
卷三三九	嘉慶二十三年二月	四七二	卷二五八	嘉慶二十四年五月	七一九
卷三四〇	嘉慶二十三年三月	四八六	卷二五九	嘉慶二十四年六月	七三四
卷三四一	嘉慶二十三年四月	四九七	卷二六〇	嘉慶二十四年七月	七四三
卷三四二	嘉慶二十三年五月	五一五	卷二六一	嘉慶二十四年八月	七五七
卷三四三	嘉慶二十三年六月	五三二	卷二六二	嘉慶二十四年九月	七七二
卷三四四	嘉慶二十三年七月	五四九	卷二六三	嘉慶二十四年十月	七八五
卷三四五	嘉慶二十三年八月	五五九	卷二六四	嘉慶二十四年十一月	八〇四
卷三四六	嘉慶二十三年九月上	五七一	卷二六五	嘉慶二十四年十二月	八二〇
卷三四七	嘉慶二十三年九月下	五八三	卷二六六	嘉慶二十五年正月	八三九
卷三四八	嘉慶二十三年十月	五九三	卷二六七	嘉慶二十五年二月	八四九
卷三四九	嘉慶二十三年十一月上	六〇八	卷二六八	嘉慶二十五年三月	八六〇
卷二五〇	嘉慶二十三年十一月下	六一八	卷二六九	嘉慶二十五年四月	八七〇
卷二五一	嘉慶二十三年十二月上	六三一	卷二七〇	嘉慶二十五年五月上	八八八
卷二五二	嘉慶二十三年十二月下	六四一	卷二七一	嘉慶二十五年五月下	八九八
卷二五三	嘉慶二十四年正月	六五二	卷二七二	嘉慶二十五年六月	九〇九
卷二五四	嘉慶二十四年二月	六六五	卷二七三	嘉慶二十五年七月上	九二五

大清仁宗受天興運敷化綏猷崇文經武孝恭勤儉端敏英哲睿皇帝實錄卷之三百二

嘉慶二十年乙亥春正月丁亥朔
上詣
奉先殿行禮○詣
堂子行禮○遣官祭
太廟後殿○御太和殿受朝作樂宣表如儀○
詣
大高殿
壽皇殿行禮○御乾清宮賜皇子皇孫親藩等
宴○展賑奉天遼陽牛莊廣寧承德鐵嶺開
原蓋平七處上年被水旗民○緩徵直隸豐

嘉慶二十年乙亥春正月丁亥朔

上詣

奉先殿行禮○詣

堂子行禮○遣官祭

太廟後殿○御太和殿受朝作樂宣表如儀○

詣

大高殿

壽皇殿行禮○御乾清宮賜皇子皇孫親藩等

宴○展賑奉天遼陽牛莊廣寧承德鐵嶺開

原蓋平七處上年被水旗民○緩徵直隸豐

潤寶坻龍門定東安青靜海滄鹽山新河冀

肥鄉東鹿文安景清苑滿城安肅唐博野望

都完祁南皮正定新樂易大城新安二十九

州縣上年水災旱災本年額賦旗租○展賑

江蘇句容縣上年被旱被水災民○貸兩浙

下砂頭場下砂二三場青村袁浦橫浦浦東

六場上年被旱寬戶口糧○貸江西星子都

昌建昌安義德安瑞昌彭澤德化南昌新建

豐城十一縣上年被水被旱災民籽種並平

糶倉穀○貸浙江仁和錢塘海寧餘杭臨安

於潛嘉興秀水海鹽石門桐鄉歸安烏程長

興德清武康安吉孝豐十八州縣及杭嚴嘉

湖二衛上年被旱災民籽種○賑安徽蒙城

懷遠鳳陽盱眙天長五河銅陵合肥廬江巢

壽定遠鳳臺霍邱泗桐城全椒來安宿靈璧

亳寧國建德東流貴池懷寧望江宣城涇南

陵三十州縣上年被水被旱災民並貸籽種

○貸兩淮富安安豐梁垛東臺河垛丁溪草

堰七場上年被旱被水竈戶一月口糧並劉莊伍佑新興三場草木○貸陝西寶雞寧陵孝義藍田雒南膚施鳳襃城大荔蒲城朝邑華陰華潼關十四廳州縣上年被水被雹災民口糧展賑榆林懷遠葭神木府谷綏德米脂七州縣災民○貸甘肅皋蘭靖遠鹽茶靈中衛平羅寧朔七廳州縣及紅水縣丞所屬上年被旱被霜被水災民籽種口糧○貸山西保德岢嵐嵐興靜樂臨河曲五寨偏關托克托城十廳州縣上年被旱被霜災民籽種並緩徵托克托城舊欠米石○給河南睢寧陵商邱鹿邑柘城五州縣上年被水災民一月口糧貸光固始商城光山四州縣上年被旱災民倉穀○戊子

上以上辛祈穀於

上帝自是日始齋戒三日○己丑

高宗純皇帝忌辰遣官祭

裕陵○諭內閣富俊奏吉林煤斤仍請試採一

摺吉林旗民生齒日繁木山採伐漸遠取薪不易自係實在情形著准其於缸窰胡家屯營盤溝田家屯即平拉山丁家溝波泥河六處開採煤斤以裕旗民生計仍責成該將軍妥立章程約束稽察如辦理不善以致滋生事端惟該將軍是問○庚寅

上諭

南郊齋宮齋宿○諭軍機大臣等章煦奏查辦東省倉庫及現在緝匪情形一摺東省倉庫

虧缺其在十四年以前者據稱已將實數查明條分縷析約開印前後即可議定章程開單具奏其十五年起至上年九月止屬冊尚未提齊且州縣與司書通同捏混挪東掩西一時不能得其底裏懇求展限一二年詳細勾稽以免事後轉輾等語查辦虧空全在章程周密果能斟酌盡善實力奉行自有成效東省十四年以前虧空既經查有實數此時按銀數之多寡定追繳之遲速應如何分別

辦理使帑項胥歸有著之處著章煦悉心覈定奏准後交陳預督率所屬實力遵辦其十四年以後虧缺之數一時雖未能查明此時亦當議定章程將來陸續查清以次覈辦此事尚須展限一二年章煦斷無在彼久待之理伊總須將章程酌擬周密無舛無漏設所議不能妥善將來行之無效彼時必仍派章煦再往覆查不能置身事外也至緝匪之法據稱東省編查保甲尚為認真遲早總可就獲等語保甲原屬緝匪良法然編之既須周詳查之尤當嚴密即如京城上年緝獲逆犯多名皆非單內緝拏之犯該犯等因見各處張貼緝匪名單並無伊等姓名在內是以心無顧忌並不更改名姓自外回歸旋被踹獲其最要次要各犯必係因沿途賞格顯列姓名悉皆更名改姓湣迹潛蹤此時多已編入排甲之內東省保甲章煦雖督率認真究恐不足深恃仍當通飭府縣詳加查察勿得於

一編之後即視為具文以致有名無實章煦回京之後此事責成陳預時時留心以期逆犯早獲普臻寧謐也將此諭令知之 辛卯祈穀於上帝 上親詣行禮 壬辰上詣雍和宮行禮 火神廟拈香 癸巳 以祖章皇帝忌辰遣官祭孝陵 諭內閣朕自本年二月初九日起閱看前鋒護軍營暨圓明園官兵步箭著各挑選二百名以一百名豫備朕閱看一百名豫阿哥王大臣等閱看其在朕前射箭者每日豫備二十五名仍照例進緣頭牌每名射箭二枝如遇朔望及朕臨幸各處之期毋庸豫備其閱看之阿哥王大臣著領侍衛內大臣等奏請簡派 甲午享

太廟命

皇次子智親王 恭代行禮。

上御重華宮茶宴廷臣及內廷翰林以穀日聯

句遣官祭

太歲之神。

上御紫光閣賜蒙古王貝勒貝子公額駙台吉

及回部伯克外藩使臣等宴並賞賚有差。

諭內閣廣厚奏籌辦動碾倉穀漕船灑帶米數一摺。湖南省漕船共一百七十八隻。向來

搭運通米祇能帶米五萬石。該省現有搭運

十八年各丁緩交餘米及截存臨清倉米共

一萬五千七百餘石。覈計祇可灑帶動碾倉

米三萬六千石。著照該撫所請。先儘附近水

次各州縣動碾倉穀七萬二千石。計米三萬

六千石。運赴岳州漕船受兌處所。與新漕一

併交丁兌運。其餘應碾穀十二萬八千石。計

米六萬四千石。俟下次漕船灑帶運通。無庸

雇覓民船。以省運費。

禧恩為總管內務府大臣。

上詣

大高殿行禮。

安佑宮行禮。

初彭齡原奏百齡張師誠一案據實查明分

別奏奏一摺。此案前據初彭齡奏。奏百齡於

兼署巡撫時。管關道員鍾琦曾經幫貼捐差

盤費銀一千二百兩。張師誠告假在籍時。差

弁奏事及到任後遣人回家一切盤費。俱在

稅項內動支。又張師誠向管關道員劉澧查

問關稅。劉澧因此送銀二千兩。並風聞百齡

尚有收受永豐壩泰壩委員餽送銀二萬餘

兩之事。特派托津等馳往清江東公查辦。茲

據托津等查明此項巡撫衙門提取兩關銀

兩。係相沿陋規。由來已久。此次百齡署巡撫

時。曾因蘇屬出差兵丁口食不敷。由藩司議

詳在海關提銀一千二百兩。揚關提銀八百

兩。發縣生息。以資津貼。至張師誠未到任時。

摺差等項委係自發盤費。即到任後亦實未動用稅銀。其劉澐解送公費銀二千兩。張師誠亦駁斥未收。至兩壩解送總督衙門銀兩。係奏明批解公費。此外百齡並無收受餽送情事。是初彭齡原奏均係不確。初彭齡原奏摺內。據稱百齡張師誠節次需索提用銀數。係由藩司常格告知。經朕派令軍機大臣傳到常格兩次詰訊。常格堅稱並無此語。昨初彭齡覆奏摺內。亦自稱輕率入告。陳奏失當。

不能舉出證據。無可置辯等語。初彭齡奏事不實。咎無可辭。著交部嚴加議處。伊現在承審銅山縣監生崔雨辰控案。審結後即行來京聽候部議。百齡提取兩關稅項銀兩。發縣生息。以資兵丁差費。雖係以公濟公。惟率據司詳。並不奏明辦理。究屬不合。著交部議處。張師誠於摺差等項盤費。並未支用關項。其在籍居住時。江蘇標弁就近迎至其家。張師誠即應以尚未到任飭令回蘇。乃留供差遣。

亦有不合。其過尚輕。著改為交部察議。至陳桂生前因督催上忙不力。經初彭齡奏。續又劾其於所屬虧短庫項。掩蓋彌縫。職職速問。今據托津等查明。陳桂生先後詳稟各案。並無含混隱匿情弊。其所催上忙。亦已完報七分。有餘。陳桂生著來京。以從四品京堂補用。尋議上。得旨吏部具奏議處。初彭齡等一摺。初彭齡秉性褊急。素以糾彈為能。經朕屢加訓誡。以嫉惡過嚴。本屬為公然輕於舉發。

不察虛實。久之為人窺測。即有造為萑匪之詞。賺令排擊者。在己方以為持正。而不知道為人所用。藉以快其私忿。此次所參百齡張師誠各款。如果屬實。試思伊等當得何罪。豈僅褫革所能蔽辜。乃率以無據游詞。飛章入奏。殊屬輕躁。部議降二級調用。實為咎所應得。因伊任內有革職留任之案。議以革任。初彭齡尚不至廢棄。著加恩照所降之級。以內閣學士來京候補。餘依議。○戊戌諭內閣。此

案袁昌一犯前經王以銜奏按試通州時於海門廳文童內查出該犯有習西洋教傳徒斂錢情事已飭該州查拏並移咨督撫等語當經降旨交百齡張師誠飭查究辦茲據該督等奏稱該州知州俞穎達稟報袁昌習教念經一案與考試無涉作為自行訪獲通稟並將學政原札繳銷該州於所屬境內習教人犯平時不能訪緝經學政查出發審乃捏詞稟報冀圖卸過邀功膽大無恥甚屬可惡

俞穎達著即革職交該督等提同兵役案犯人等嚴審定擬具奏○諭軍機大臣等百齡等奏接據藩司楊夔詳參嘉定寶山奉賢三縣未完下忙錢糧有二萬數千兩一萬數千兩不等請將知縣吳桓姚鳳楷張敏求三員革職並聲稱該三縣均係有漕之處難以驟易生手俱請暫留本任其督催不力之松江府宋如林太倉州朱景昌先行革去頂帶予限督催經該督等查與新定章程不符業經

批駁等語官虧民欠情事判然州縣未完之項如係官員虧缺即當查明嚴參離任著追分別覈辦如係官員虧缺而詭言民欠更應加重治罪以儆貪墨若果係民欠則當於奏銷時按照分數將經徵督催各員分別參處必須區別分明不容淆混江蘇省查辦虧空甫經議定章程期於法在必行今嘉定等三縣未完銀兩究竟係屬官虧抑係民欠並未查明籠統參辦如民欠屬實則此時奏銷尚早何遽將三縣先予革職處分若竟係以完作欠侵蝕官帑則此時立法之初既已參奏革職又復藉辦漕為詞聲請暫留本任是又為不肖劣員開懸缺之門似嚴實寬通省州縣更復何所儆懼新定章程豈不竟成虛設耶所有嘉定等三縣未完下忙錢糧著該督撫確實查明分別覈辦嗣後惟當恪遵新例實力奉行如有應行參劾之員均不得藉經手要事為名復請留任以杜掩飾將此諭令

知之。○貸江寧八旗官兵米折銀。○己亥。貸陝西定遠軍差暑陽襄城四廳州縣上年歉收貧民倉糧。吳堡清澗。延長。保安。延川。安定。定邊。靖邊。八縣貧民口糧。○庚子。

上御奉三無私殿。賜皇子皇孫親藩等宴。○御山高水長。賜王公大臣蒙古王貝勒貝子。公額駙。台吉及回部伯克外藩使臣等食。至壬寅皆如之。○諭內閣吳璥等奏工用不敷。酌撥本省藩庫銀兩以濟急需一摺。雖工需用

銀兩。前經約估三百八十萬兩之數。茲據稱十八十九兩年未開工以前。已動用銀二十餘萬兩。開工以後。築壩挑河等工。實止用撥餉銀三百五十餘萬兩。現在物料昂貴。車船運送維艱。其雜料夫土等項。不能悉照原估。經費實屬不敷等語。大工即日告竣。一應支發急需接濟。著准其將藩庫收存浙江鹽務及廣東捐銀協濟。雖工銀十一萬兩一款。及捐復捐監雜款等項。提撥銀三十餘萬兩。並

借用例扣平飯等銀。俟工竣後。分別應銷。應賠及應行攤徵。詳晰奏明。覈實辦理。○辛丑。上詣

安佑宮行禮。○御正大光明殿。賜朝正外藩等宴。作樂賜酒。如除夕儀。○諭內閣。張映漢奏。動碾倉穀搭運赴通。並籌借南米。湊運一摺。湖北省額貯倉穀。除碾動撥補兵食及平糶外。實存倉穀四十五萬五千餘石。著照該撫所請。就近省臨江瀕河之州縣內酌量分派。

共動倉穀十萬石。碾米五萬石。並將該省本年應解荊州兵米之各州縣徵存南漕兩項。餘剩耗米。及淤田案內新升科徵存正耗南米。及十九年應徵正耗南米。內撥出二萬石。與動碾倉穀共米七萬石。統交漕船運通交納。所有運兌籌給津貼一應事宜。均著照該撫所奏辦理。其荊州南米借撥二萬石。著該撫即責成荊州府按照每月月報時價。隨時採買供支兵食。以補借額。買米價值由該省

藩庫內收存各項工程二成平餘並正案留防軍需報撥及逆產變價等款銀內陸續給發採辦事竣據實造冊報部覈銷○諭軍機大臣等那彥成自上年到直隸總督任後一年之間於奉旨飭緝要犯並未拏獲一名京城步軍統領衙門順天府五城除上年拏獲逸犯多名不論外今年自元旦至今半月已據連獲馬文通馬文明馬文亮張玉龍甘牛子曹黑子六名俱經軍機大臣會同刑部訊

平定本

十一

明該犯等皆曾攜帶刀布或至東華門或至花兒市先後錄供具奏因尚係年節俟開印後再行奏辦其餘各逆犯戚屬宋才等解部質訊者尚有數名京師每逢年節舉行祭祀朝賀筵宴諸典禮儀節繁多然仍照常辦事各該衙門俱不敢稍形懈弛那彥成在保定度歲閒暇無事除初二日奏過得雪情形盤查藩庫及五世同堂三摺外旬日來並未陳奏事件亦未將緝捕情形遵旨具奏不知伊

是何意見現在京城所獲各賊多係於前歲潛逃後在京外謀食近始回村即被拏獲其在直境時各該州縣均未訪拏可見地方官全不以事為事所謂明查暗訪者皆係空言欺君玩法似此因循各逆犯當於何時捕獲淨盡耶那彥成務當激發天良知愧知奮飭屬認真緝捕俾要犯迅就弋獲毋得仍前玩泄也上元節日殊論汝知者看汝造化耳禍福惟汝自造慎之將此諭令知之○壬寅

平定本

十一

上御正大光明殿賜大學士尚書等宴○諭內閣前年逆案内自京逸出者有祝現等五犯自滑城逸出者有劉成章一犯均係逆首林清李文成同謀糾串渠魁其餘開單飭緝次要犯五十餘名亦係從逆匪徒所以屢經降旨必欲緝拏者將令罪人斯得亟正刑誅以彰國憲其事猶小實以此等梟獍之徒若稍留餘孽在此時不過匿跡偷生苟延喘息日久查拏漸弛又必煽誘愚民復生萌孽天下

氓庶皆朕赤子。欲使長享太平。必當淨除餘
慝。以保善良。本年自立春以後。瑞雪優霑。各
省普徧仰見。

上蒼垂鑒。亦因除莠安良。事非獲已。是以

天心允協。錫福降康。凡我臣民。皆當同深欽感。
著通諭直隸河南山東山西四省督撫提鎮
藩臬。以及道府州縣佐貳等官。大小同心。將
飭緝最要次要各犯。嚴密查緝。不可稍有擾
累良民。現在京城節次所獲餘犯。於前年滋

事後。無不更改姓名。混跡覓食。所有飭緝各
要犯。俱曾見有賞格。開寫姓名年貌。自必更
改姓名。在同教之家。隱秘窩藏。總須密訪真
確。一捕即獲。則地方毫無驚擾。而該逆犯等
次第弋獲。一無漏網。從此震寓永慶教寧。將
來逆犯就獲時。即訊明自前年九月以後。在
境內藏匿。其該管地方官。縱失察年餘。不惟
免其處分。仍必加以升賞。將此剴切曉諭。各
官吏當共釋疑慮。咸圖自奮。勉副朕意。○癸

卯。諭軍機大臣等。伯麟等奏。勦辦騰越邊界
野匪完竣。一摺。幫中野夷屢次滋擾。經內地
兵練隨時捕逐。仍不知斂跡。自當示以兵威。
以寧邊境。惟該夷首惡四貫。糾結多至二千
餘人。並有聲言欲搶內地之事。該省大員。即
應親自帶兵前往督辦。伯麟因策攝撫篆。不
便遠離省會。尚屬有辭。提督雙林。自應親赴
該處。不獨藉資調度。其於該弁兵等。孰為出
力。見聞亦確。勸懲方能公允。現在幫中野匪。

業已勦辦完竣。姑置無論。嗣後邊徼之間。如
有似此派兵勦捕之事。必須大員親往。以專
責成。此次首惡四貫。是否實係鎗斃。著伯麟
等再行確查。其在事出力文武員弁。及帶練
土司。該督等切實查明。擇其實在出力者。據
實保奏。不可徇情濫舉。稍涉虛冒。其陣傷亡
故弁兵目練。亦著查明咨部。照例議卹。應需
糧餉。即照所請。准其捐辦。無庸開銷。將此諭
令知之。○又諭。據常明奏。向來川省地方。偶

過歉收皆由地方官詳請借穀平糶至冬春之際貧民乏食酌撥借糶贏餘銀兩買米煮賑設有不敷官為捐補從未辦過災賑上年保寧一府收成僅止五分今春青黃不接之時必須接濟等語朕軫念民艱無時或釋直省地方偶有偏災不惜發帑賑卹俾無一夫失所其辦理災區分數俱有定例可循該督職任封圻如地方年歲歉收民食實形拮据亦豈得因該省向未辦災不恤民困上年保

平糶本

上

寧各屬收成僅止五分現屆青黃不接之時或應平糶或應煮賑迅即查明分別籌辦常明務督飭該地方官認真經理勿令貧民乏食別滋事端以河東河道總督吳璥為兵部尚書河東副總河李鴻賓為河道總督以甘肅中衛協副將何占鼇為江南徐州鎮總兵官乙巳

上御山高水長賜王公大臣蒙古王貝勒貝子公額駙台吉及外藩使臣等食丙午

平糶本

上

上幸萬壽山諭內閣朱勳奏查辦孝義廳滋事匪徒並究出傳教首犯均即拏獲地方寧謐一摺據稱上年十二月二十七日接據江口文武官稟報孝義廳菩薩殿地方於二十一夜間有匪徒十餘人持械搶奪燒燬民房戕害鄉約人等沿途裹脅四五十人於二十二日竄至鎮安縣屬楊泗廟地方經該處鄉約項三泰等率同民人二百餘人堵住山口該匪用矛抵拒立時打斃賊匪張老四季志花二名維時江口營千總彭太禮帶兵追至即將為首之李志廣擒獲餘匪逃散嗣經鎮安孝義文武各官將賊目華貴李志遠等拏獲並訊出傳教之王三楚王四海楊勝文等三名均經按名捕獲現在解省審辦等語所辦甚為妥速地方間有一二莠民倡亂滋事惟在文武官併力同心及其初起之時迅即撲滅不任蔓延致煩軍旅則所保全者不可勝計此次賊首李志廣等素習白蓮邪教私

結徒黨十餘人焚掠村莊甫經起事即被地方官弁兵民協力擒拏。不過一二日間。辦理淨盡。殊為可嘉。千總彭太禮帶兵迅往擒獲首犯。著加恩以守備升用。先換頂帶。過缺即補。其鄉約項三泰。范明祥。韓興棟。徐郭治等四人。率集鄉民。悉力堵截。均著加恩。賞給八品頂帶。以示獎勵。所有捕獲各犯。現在該撫提省審辦。著於審明後。按律問擬。一面奏明。一面分別正法。仍將各要犯傳首滋事地方。

平定縣志

卷十

臬示。以昭炯戒。其未獲餘犯。高大有等三名。並著飭令上緊捕獲。審明辦理。毋任漏網。諭軍機大臣等。御史葉申萬奏。訪聞昨工情形。一摺。據稱該處引河挑溝工程。早經呈報完竣。臘月二十九日。經溫承惠查出高仰處所。自三四尺至六七尺不等。約計段落共有三千餘丈。吳璥等始改派唐仁埴。陳啟文。張裕慶三人分投趕挑。其原承辦引河各員。草率延誤。於前此時轉脫身事外。無以昭舉劾。

之。公且恐河員相率效尤等語。前降諭旨。令那彥寶等於冰融後。督率工員趕緊進占。於十七日開放引河。二十日當可合龍。朕連日盼望開放引河之報。乃據該御史所奏。則引河尚多高仰。現在加挑此事。何以未據那彥寶等奏聞。著即查明原挑引河工程。因何尚覺高仰。如果係承挑之員草率貽誤。惟當據實奏。勿稍諱飾。此次加挑引河工程。究於何日報竣。約計何日可以開放。何日可以合

平定縣志

卷十

龍。一併迅速具奏。將此諭令知之。○丁未。甘肅提督清尚佐。湖南提督魁保。俱以疾解任。以陝西漢中鎮總兵官楊芳為甘肅提督。陝西陝安鎮總兵官祝廷彪為湖南提督。調江南徐州鎮總兵官何占鼇為漢中鎮總兵官。以江西南昌城守協副將楊長棟為徐州鎮總兵官。甘肅永固協副將劉管城為陝安鎮總兵官。○戊申。諭軍機大臣等。先福奏嚴查甘肅各州縣倉穀。並刪減採買兵糧一摺。甘

肅各州縣額貯京斗倉糧六百一十餘萬石折倉斗糧四百三十餘萬石茲據查明截至十九年估撥時止除清查案內奏明虧短各色糧一百七十餘萬石及已估支二十年兵馬糧料二十四萬二千餘石外實在應存各色糧二百三十餘萬石現在應需兵糧僅二十萬餘石何以不能撥運必需採買即所稱河西糧多州縣距河東較遠恐多糜運腳豈河東駐兵之處各州縣倉貯竟全無存者其

中虧缺情弊已屬顯然且據稱從前該省採買尚係閒年一請迨嘉慶十年以後則每歲均奏請撥銀買供可見近年虧短愈甚邊陲要地似此積貯空虛所關匪細不可不徹底查明認真覈辦先福甫經到任該省從前虧缺弊竇與伊無涉此事著責成該督確查究竟通省倉穀虧短若干係何州縣其虧缺始自何年秉公奏辦毋稍瞻顧若所查稍有不實不盡將來別經發覺即係先福任內之事

惟先福是問至此次甘省二十年不敷兵糧據該督奏稱於原請採買二十八萬餘石數內量加刪減仍採買兵糧二十萬一千餘石請撥銀三十八萬九千兩解甘歸款姑照所請交該部在於鄰近省分照數撥給其所請河西撥運倉糧每石每百里給腳價銀一錢三分之處亦著照所請行又據另片議駁御史周宗泰奏該省採買兵糧請由藩庫徑發各該營領放一節從前州縣領銀採買因例

價不敷將原銀發給兵丁兵丁等艱於買食致有爭論今若由藩庫徑發各營設遇糧貴之年更難辦理著仍照舊例交州縣領辦周宗泰所奏無庸議將此諭令知之戶部議准四川總督常明奏清溪縣松坪土司馬駱氏並所轄楠木園等處二十八堡夷衆請改土歸流以其地之深溪溝為界東北牛心山楠木園一帶夷民八百四十三戶歸義邊廳管轄西南松坪上堡下堡一帶夷民九百九

十戶歸清溪縣管轄照例納糧該土司仍世給土千戶職銜從之（己酉）

孝聖憲皇后忌辰遣官祭

泰東陵

上詩

恩慕寺

恩佑寺行禮（諭內閣初彭齡奏茅豫自上年入冬後忽染耳聾病證請回籍調理等語茅豫前在山西河東道任內因叅奏陳桂生虛

年表本五十一

三十一

妄降用京職上年隨初彭齡出差嗣初彭齡署江蘇巡撫奏留伊在署辦事當經降旨將茅豫留於江蘇以知府候補此次初彭齡叅奏陳桂生失實必係茅豫挾隙從中慙憑現在初彭齡差竣回京茅豫係江省候補人員即因病乞假亦應由該督撫驗明題奏乃稟請初彭齡為之具奏顯係規避茅豫著革職永不敘用初彭齡以非其所屬之人代為陳請侵占事權殊屬專擅初彭齡再著交部嚴

加議處尋議上得旨上年初彭齡奉使廣西

茅豫由刑部司員隨往初彭齡差旋復命若茅豫仍係司員尚可隨同回京由部請假茅豫前已奉旨留於江蘇以知府候補即係外省官員非初彭齡所屬伊稟請給假初彭齡自應移咨該督撫驗明患病屬實由該督撫照例題奏設有捏病規避情事由該督撫據實劾叅方為正辦乃初彭齡率行入奏並稱一面分咨該督撫辦理實屬專擅初彭齡前

年表本五十一

三十一

經部議革任經朕施恩以內閣學士補用此次復蹈愆尤本應即予褫革姑念伊由翰林出身尚堪以文學自効著加恩以翰林院侍讀侍講降補（庚戌諭軍機大臣等給事中辛從益奏嚴禁重利盤剝以避丁困一摺據稱浙江漕船二十一幫運丁債累至五六十萬兩有紹興各酒商藉裝帶土宜為名坐放幫帳有南帳北帳之號其利皆在四分以上如孫汝堅鍾師山阮紹豐鍾仲鯁等酒號各

坐放幫銀近來各丁疲乏不能清還該酒商等即令幫丁稟請應領公款銀兩並串通糧道書吏周履泰將銀扣抵私帳。如台州前幫於十三年欠孫汝堅尾利銀兩將十三四五等年津租銀扣抵利上加利在八分以上。一幫如此他幫可知。孫汝堅等並在杭州省城設立官帳房又在通設立堆房扣除幫帳等語。漕運轉輸最須顧惜丁力今奸商等巧為盤剝有南帳北帳之號並串通書吏勒將公

款扣抵自應嚴行查禁著李奕疇顏檢即查明孫汝堅等重利盤算幫船並糧道書吏周履泰串抵公款各情。如果屬實即按律分別懲辦。至該給事中復稱運丁等挪借無自亦恐不敷辦分更形竭蹶奸商仍得居奇不如受貸於官設法通融酌借官項仍於該幫丁每年應領銀內扣還或量加一分之息等語。此事是否可行著交李奕疇會同有漕省分督撫各酌量該省幫丁情形。如此官借官扣

有無閒款銀兩可以動用於疲乏幫丁有無裨益行之日久有無弊端熟籌妥議具奏。將此傳諭李奕疇顏檢並諭兩江湖廣總督江蘇安徽江西湖北湖南各巡撫知之。朝鮮國王李瑈遣使表賀

萬壽冬至元旦三大節及歲貢方物賞賚筵宴如例。琉球國中山王尚灝遣使表貢方物賞賚筵宴如例。辛亥諭內閣各省督撫慶賀元旦本章例應於封印前由通政司送閣

進呈上年那彥成賀本齋遞遲延不能按期呈進從前漕運總督鐵保等賀本遲延曾經交部議處。漕督衙門距京較遠途間或有阻滯保定密邇京畿何致遲逾例限可見那彥成於一應公事漫不經心該督莅任以來緝捕疏懈逆案要犯並未報獲一名昨復因朕駐蹕南苑妄行陳奏添設燈城干與分外而於本任應辦之事種種廢弛無庸交部議處著革去花翎以示薄懲該督當知奮勉

圖後效○又諭李鴻賓等奏研訊通判竹騰霄臚控藩司諸以謙各款均無實據仍多方狡飾並審明藩司失察管庫家人兌發工銀間有短絀又違例捐官等情請將諸以謙竹騰霄一併革職一摺此案竹騰霄所控諸以謙剋扣工需賑卹銀兩及前在糧道任內得受漕規各款據李鴻賓琦善會同查明俱屬虛誣竹騰霄仍強詞狡辯又不服管押並自認曾經得受漕規銀兩竹騰霄著即革職交李鴻賓等嚴審定擬具奏諸以謙失察家人私扣平餘又違例捐官咎有應得尚不至於革職此時若將該藩司與竹騰霄一體褫革適足以長誣訐刁風諸以謙無庸革職著李鴻賓等於定案時照例叅處其琦善失察家人得受銀兩之處著交部議處○以候補四品京堂陳桂生為甘肅布政使○壬子諭內閣御史熊埤奏餽送陋規之道員及不行叅奏之巡撫請旨交部議處一摺此案揚海兩

關提解公費銀兩經托津等查明係該關耗銀平餘飯食等項除批解內閣戶部戶科飯銀庶吉士公費及吏役薪工外歷任管關巡撫俱有提解銀兩以充公費相沿已久張師誠到任時劉澧循照舊規解送銀二千兩張師誠以未查明案據駁回未收並非劉澧私以多金餽送上司張師誠既不舉發是以托津等定案時未經叅劾其張師誠在籍私用差弁一節已經托津等查出叅處該御史所

奏著無庸議○癸丑

上詣

大高殿行禮○還宮○諭內閣那彥寶等奏查明引河溝工草率偷減請分別懲治一摺豫省此次興舉大工所有挑挖引河抽溝等事必須一律深通合龍始易為力乃承挑各員並不實心經理驗收之員又不認真稽查以致一百二十餘段內有十餘段草率高仰之處實屬藐玩所有督催抽溝工段之道員熊

方受。總催引河之知府林嵐。徐日簪。分催引河抽溝工程之通判錢樹蕃。龔志岸。分催引河之通判榮慶。驗收工段之同知張鼎俱著革去頂帶。仍交部嚴加議處。責令該員等戴罪在工効力。將來開放引河時。果能暢順不滯。尚可酌量施恩。如稍有貽誤。定行從重治罪。所需補挑銀三萬餘兩。即罰令熊方受等七員。照各該工所發數目。賠繳報部查覈。其承挑草率偷減各員。著查明情節較重者。分別斥革。枷號工次。以示懲儆。○甲寅。戶部議准。署陝甘總督高杞。疏報奇臺縣開墾地三十頃。照例升科從之。○乙卯。

孝儀純皇后忌辰。遣官祭。

裕陵。○諭內閣。潤祥等奏。查明經紀長借腳價等項銀兩。分別追賠一摺。此項新欠未經扣繳之腳價布價銀三萬九千六百四十九兩零。及舊欠銀十一萬八千四百六十三兩零。俱著照所請。著落該歷任坐糧廳分賠四成。

再於後任坐糧廳養廉內。按年減半坐扣三成外。其餘新舊欠三成銀共四萬七千四百三十四兩零。即在該經紀等名下分作十年。於年終給發。先漕銀兩時。扣追歸款。嗣後如有動借銀兩。俱著奏明辦理。以重帑項。○緩徵江蘇溧水縣旱災上年額賦。

上以祭。

社稷壇。自是日始齋戒三日。○是月江蘇巡撫張師誠奏。謝得旨。此一番舉動。皆由茅豫播弄所致。總欲陷害陳桂生。波及於百齡。及汝初。彭齡。剛愎性成。為所驅使。汝不必結怨。惟返躬自責。勉為良臣。朕未嘗。豈能任小人肆其伎倆乎。○浙江巡撫顏檢奏。謝得旨。汝操守好。才幹優。所欠者。愛積小陰功。心慈面軟。不能振作。是以屬員祇知懷德而不畏威。吏治弊壞。皆由此起。猛以濟寬。汝其勉之。

大清仁宗受天興運敷化綏猷崇文經武孝恭
勤儉端敏英哲睿皇帝實錄卷之三百二

實錄卷之三百二

三十一

清 實 錄 嘉慶二十年二月

大清仁宗受天興運敷化綏猷崇文經武孝恭
勤儉端敏英哲睿皇帝實錄卷之三百三

監修 臣等謹將嘉慶二十年二月丁巳朔祭先師孔子遣皇三子綿愷行禮○諭內閣本日章煦等奏山東通省州縣虧缺銀兩新舊共積有六百餘萬兩該省敝壞一至於此實堪痛恨此項虧缺皆起於嘉慶元年以後此十餘年來朕並未舉行東巡致勞供頓其該省大吏亦從無貢獻珍玩等物此中外所共知將復何所藉口皆由歷任巡撫藩司曠職玩公縱任不肖州縣將國帑付諸漏卮此內若謂一無賄索其誰信之姑念事屬已往不加

校

嘉慶二十年乙亥二月丁巳朔祭

實錄卷之三百三

三十二

一七

深究著軍機大臣查明該省自嘉慶元年起至十九年止巡撫藩司在任年月久暫其業經身故者查明伊子弟有無職官開單具奏候朕酌量分別罰賠以示懲儆尋議請將該省無著銀十七萬八千三百六十餘兩罰令嘉慶元年以後歷任巡撫藩司按照在任月日分賠從之○戊午祭

大社
大稷

上親詣行禮○己未以舉行仲春經筵遣官告

祭

奉先殿

傳心殿

上御文華殿經筵直講官英和劉鏞之進講孟子仁民而愛物講畢

上宣御論曰民吾同胞物吾與為人君者皆宜盡仁盡愛也民宜仁而物宜愛有等差之分焉理本一而分則殊雖存一視同仁之心亦

不可漫無區別流弊滋甚矣生長收藏天地之至仁也君臨天下體天地之至仁德禮政刑及於兆庶人君之大用也治功勤修無敢暇豫使天下蒼生人人親其親而長其長毫無干名背義之事一人之仁及於萬姓各養仁心咸得其所厚生正德之效大矣愛以及物咸若其性各適其用而已心存姑息是見牛未見羊耳暴殄廢棄大夫愛物之道矣取之以時用之以禮盡愛物之真誠即仁民之

極則也民物相為表裏仁民愛物一而二二而一也治理之大端為君之要道孟子法言萬世無弊豈可忽乎直講官果齊斯歡黃鉞進講易經聖人感人心而天下和平講畢

上宣御論曰天地萬物交相感也上體天心下孚民志中立人極其惟聖人乎聖人者旋乾轉坤之樞機兆庶性命所寄託皆本於一心所感也四時調而風雨時是天心所感也九宇安而政令順是民心所感也總在於人君

一誠所召也。兆民同有是心。人性本善。而流於邪僻。不自覺者。在上位不能感化。奚能消其乖戾之氣乎。感非空言也。必先正心誠意。表正形端。勤政愛民。誠求保赤。不期感而自感。不期化而自化。上以正感。下以正應。天下和平。胥順則矣。感通之理。徹上下達古今。主於一誠。誠者真實无妄之謂。斯能感也。君臣兆庶一德同心。泰交咸感。化洽教敷。烏有犯上作亂之舉哉。上以誠求治道。盡心保民。雖

草木亦能化悟。况胞與同類乎。人心和平。則天下安樂。和氣致祥。必能感召豐登臻於熙皞之世矣。位育之實。感應之速。理不爽也。禮成。

上幸文淵閣。賜講官及聽講諸臣茶。復賜宴於本仁殿。○遣官祭

文昌帝君廟。○調甘肅布政使陳桂生。為江寧布政使。陝西布政使楊懋恬。為甘肅布政使。山東布政使慶炆。為陝西布政使。以廣東

按察使和舜武。為山東布政使。調直隸按察使李鑒宣。為廣東按察使。以直隸通永道盛泰。為按察使。○庚申。

上幸圓明園。○辛酉。諭軍機大臣等。喜明等奏復接廓爾喀王來稟。遵旨嚴行駁飭。緣由一摺。廓爾喀與披楞互相爭鬪。自取敗衄。天朝豈能過問。乃屢次瀆求賞助金銀。並向達賴喇嘛。班禪額爾德尼等。求為幫給口糧。殊為貪詐。喜明等遵照諭旨。嚴行駁斥。所辦甚是。

其達賴喇嘛。班禪額爾德尼。於接到廓爾喀來信。亦俱能正詞駁斥。絕其覬覦之心。朕披閱進呈各信。底均甚妥協。著喜明等傳旨嘉獎。此時廓爾喀王。如不再瀆稟。則已。儻再來瀆稟。著喜明等。檄知以爾國與披楞打仗一事。據爾來稟所言。爾國兵丁被披楞損傷固多。但爾國殺害披楞之人。前後計有八千餘名。亦屬不少。可見爾國兵勢尚足。以抵禦披楞。若謂披楞廣有金銀。爾國既能殺敗披楞。

所得財物分給爾國兵丁亦可不致窮苦何得飾詞求助况天朝撫馭外藩從無賞給餉銀令與鄰國構兵之理即如緬甸與暹羅國為天朝屬國伊兩國從前累有爭戰之事彼時大皇帝從未偏助今爾等彼此相爭事同一律若此時幫助爾等豈披楞前來求助亦幫助披楞乎如此明白曉諭該國王自不能再行瀆請至陽布地方關繫緊要不可不密為備禦固守藩籬喜明等當督率邊界營汛

加意訓練留心防範並派明幹將弁在彼時常偵探如披楞與廓爾喀祇在邊外構釁總當置之不問儻或披楞之兵竟敢闖入邊界侵擾陽布地方必當示以兵威痛加剿殺立時驅逐出境勿稍疏懈○壬戌命刑部查明歷次發遣各省駐防為奴緣坐女犯內有學習邪教者改發烏魯木齊給兵丁為奴即由該處發往○癸亥

孝淑皇后忌辰命

皇次子智親王曼祭

陵寢○甲子遣官祭

先醫之神○陝西布政使慶炆緣事降調調山西布政使陳觀為陝西布政使以內閣侍讀學士吳邦慶為山西布政使○乙丑

上御勤政殿聽政○遣官祭

關帝廟○諭內閣御史陶澍奏請立鄉保獎勸之法一摺直省各州縣編排保甲原應慎選保長俾司稽查並嚴禁胥役訛索不得視

為賤役令無賴之人承充滋弊至於城鄉地方雖遠近不齊其分里分甲設立門牌甄別良莠規制則一亦非鄉保之責獨重若照書吏役滿考送吏員之例給予獎勸不特人數眾多礙難辦理且此等鄉曲小民亦豈能明習吏事濫登仕籍該御史所奏迂闊不可行○以太常寺卿多山為通政使司通政使詹事府少詹事毛謨為詹事仍留四川學政任○旌表守正捐軀山西陽曲縣民閻振貴妻

弓氏○丙寅

上幸靜明園詣

龍神廟拈香○以安徽按察使海慶為河南布政使陝西延榆綏道敦良為安徽按察使

○丁卯春分朝

日於東郊遣禮親王昭槤行禮○

孝康章皇后忌辰遣官祭

孝陵○戊辰遣官祭黑龍潭

昭靈沛澤龍王之神玉泉山

惠濟慈佑靈渡龍王之神昆明湖

安佑普濟沛澤廣生龍王之神密雲縣白龍潭

昭靈廣濟龍王之神○諭內閣乾隆年間會纂輯祕殿珠林石渠寶笈正續二編所有

列聖宸翰暨古今臣工書畫業經繕寫成書尊

藏祕閣茲查續編成於乾隆癸丑迄今二十

三年

皇考聖學淵深無美不備染翰揮毫收藏內府

者又積至千有餘件之多朕自丙辰授璽以

來幾暇怡情惟以翰墨為事閱時既久卷帙

亦繁應一併詮次用志歲月至內外臣工祝

嘏抒誠所進古今書畫亦復不少允宜遵照

前書定例重為遴選昭示來茲著內廷翰林

英和黃鉞姚文田分班至懋勤殿悉心檢閱

並添派翰林院侍讀學士吳其彥庶子張麟

侍讀顧皋洗馬朱方增修撰吳信中龍汝言

編修沈維鐫胡敬八人暫停其在館差使逐

日隨同繕寫俟辦理完竣後仍回本衙門供

職即於本月二十九日入直朕在宮時翰林

等著由乾清門出入遇朕駐園巡幸之日著

由內右門出入其一切事宜均查照前例辦

理○步軍統領奏東直門遺失鐵釘並請定

看守章程得旨此案昨據慶溥等將城門領

慶福叅處賠修茲英和等奏行竊日期尚未

訊明著將步甲四兒寶得長勇礮手徐國祥

門甲強謙等俱交刑部審訊究明行竊次數

日期查係何人該班再將失察之員叅奏議處嗣後各城門樓存貯礮位等件著交各該旗礮營自行封鎖派委本旗官兵看守其步軍統領衙門應管之旗幟號燈信礮等件著存貯城門領官廳自行看守以專責成○以頭等侍衛阿勒罕保為鑲藍旗蒙古副都統○己巳遣官祭昭忠祠○庚午

上詣

安佑宮行禮○諭內閣先福奏審明勒休知縣

廖祚暉挾忿誣稟叅奏治罪一摺上年陝省岐山縣三才峽匪徒滋事係因山內包穀歉收木廂停工該處傭工之人乏食糾搶而起並非地方官諱災不辦激生事端經朕節次詢問軍營帶兵之人所言皆同是朱勲原奏並無不實廖祚暉身係縣令於地方匪徒滋事疏於防範臨時又告病規避乃轉挾巡撫勒休之嫌具稟挾制情殊可惡近來屬吏挾嫌誣控上官之案頗多似此恣意逞為將令

長吏何以御下廖祚暉著革職發往伊犁充當苦差以示懲儆○又諭百齡奏查明已革知府姚鳴庭控訴情節改擬罪名一摺姚鳴庭承審桐城縣民汪儉萬命案遺漏革率本有應得之罪嗣初彭齡覆審此案將該員問擬革職發遣姚鳴庭心懷不甘具呈遣人控訴圖脫罪名茲據百齡查明改擬杖徒近來外省民人往往於爰書既定之後雖理曲罪當仍復飾詞翻控刁風甚熾該革員曾任知

府非無知小民可比尤不應如此妄訴姚鳴庭不准議減著仍照原擬發往新疆効力贖罪○辛未諭內閣吳璥等奏請酌加歲料津貼銀兩彙入大工業內攤徵歸款一摺據稱豫省黃河南北兩岸各廳需備歲料例價係每斤九毫緣上年新料登場之後值民間車運缺乏腳價較昂又值睢汎大工需用過多增價採購現在遠近存料無多購買支絀請查照衡工合龍後增價購料之例酌量距工

遠近區別多寡先由司庫墊發加價銀兩照例攤徵歸款等語豫省值興辦大工之後存料較少例價不敷若責令照舊購買恐廳員等藉詞賠墊貽誤工需加恩著照所請將附近睢工購料最難之儀睢曹考下北三廳每斤加銀五毫距工稍遠之蘭儀下南商虞祥河四廳每斤加銀四毫距工較遠之中河上南歸河衛糧黃沁五廳每斤加銀三毫並收買柳枝雜草搭配稽料所有乙亥年歲料四

千五百垛共加價銀八萬七千餘兩著由司庫墊發即照例統入大工案內攤徵歸款又據奏山東曹河糧河兩廳亦係睢工附近之區購料維艱事同一例並著照所請將該兩廳歲料銀兩每斤於例價之外加銀三毫所需銀九千兩著於充沂道庫現存徭夫工食銀項下動撥應用以重修防○又諭御史德莊奏請實力疏修街道溝渠一摺京城河道溝渠每年動用歲修銀兩開挖疏通管理之

員自應實心督辦不使稍有阻塞近來淤積日甚溝水不能暢流每遇大雨時行多有積潦難行之處御史等疊次奏言自係該管官因循疏懈不能如法疏濬所致嗣後著管理河道溝渠大臣及該管各衙門督飭所屬實力挑挖認真查驗飭令水道宣通毋得草率從事○旌表守正捐軀山東陵縣民喬尚義女喬氏○壬申諭內閣特依順保等奏李亨特到配留於衙門充當苦差一摺李亨特係

河道總督緣事發往黑龍江該將軍大臣等應將派伊充當何項差使奏聞今特依順保等奏派李亨特充當衙門苦差并未言及何項實屬含混自係將伊留署安居特依順保等俱著傳旨申飭李亨特於河工事務尚為熟習即交特依順保等派令在該處河工等項事務上効力當差嗣後緣事發遣大員等到配將派充何項苦差之處據實奏聞毋得含混○旌表守正捐軀河南內黃縣民白照

亮妻王氏 癸酉諭內閣晉昌等奏盛京居住宗室福清泰外出未回一摺福清泰係閒散宗室由京城移駐盛京雖無眷屬同住其所住營房內亦必有同居之人今外出未回或被入謀害抑或自有行止不端之處著該將軍等傳到與福清泰同居之人詳悉查詢上緊訪拏或福清泰私行回京並著宗人府王公等查詢具奏尋奏上得旨此案移住盛京宗室福清泰因接家信知伊母年老多病

屢醫未痊若呈明給假原可准令回京省視乃私自潛行實有應得之咎今該堂官等擬以罰養贍銀一年仍令奕紹帶往盛京福清泰之母患病未痊伊到盛京後繫念情切必又思回歸福清泰著罰養贍銀一年交宗人府堂官責處二十板以懲其私回之罪即令在京侍奉伊母俟養親事畢再行押往盛京居住原情勅法固並行不悖也○又諭御史孫汶奏查有虧空州縣應飭離任以杜弊端

一摺州縣虧空屢經明降諭旨嗣後該管上司一經察出即據實叅辦照侵盜挪移定例革職拏問按限監追治罪豈僅止飭令離任現在江蘇山東查辦虧空因其積弊已久輾轉接受此時新任官員大率非原虧之人是以另立章程分別責令完繳其中有係新虧之員亦仍照定例叅辦未嘗稍從末減致啟玩視至追捕舊虧責成該撫藩臬酌調劑各大吏果存心公正自能獎廉黜貪勸懲兼施

吏治肅清倉庫亦均收實效不在多立科條動輒窒礙難行毫無裨於實政也○河東河道總督李鴻賓奏報河南睢工合龍欽差侍郎那彥寶下部優叙尚書吳璥巡撫方受疇及出力文武員弁等加銜升敘有差○甲戌上幸萬壽山○諭內閣顏檢奏運丁積困情形懇復恩借本銀舊例以紓丁力一摺浙江省各幫糧船向有恩借銀兩之例嗣因積欠數多停止借給近年該丁等舊欠公項業已接

限扣清而運道淺阻起剝費繁丁力不無竭
慶加恩著照所請准其照乾隆年間之例在
於道庫報撥項下提銀十萬兩分別借給於
下年運費內扣還按出借六箇月計算一分
輸息年借年還俟收足息銀十萬兩即將原
本歸還仍以息銀作本出借以資調劑而紓
丁力○諭軍機大臣等阮元奏密陳倉庫情
形一摺江西省於嘉慶五年清查各屬共虧
缺銀八十三萬餘兩節年彌補至十八年十

一月據先福奏停止彌補摺內查明已完補
銀七十五萬餘兩尚未完銀七萬餘兩茲據
阮元奏參辦之奉新靖安新昌三縣虧缺銀
三萬餘兩即不在未完舊虧七萬餘兩之內
可見該省彌補完欠數目仍多不實該撫摺
內擬立二法其以交代為盤查一節於州縣
交代之時不稍存諱飾之心務令和盤托出
據實參辦俾各州縣知所懲懼其為杜絕新
虧之法必應如此辦理至以比較驗彌補一

節於錢糧完欠分數之外另立比較分數未
免軀轉各屬新徵現年錢糧總當儘數提解
司庫不令絲毫挪移一有欠解立即參辦其
舊有虧缺該管上司亦不難洞悉底裏即從
此根究據實查辦則未屆交代之州縣其虧
缺亦不能掩飾此事祇在該撫督率藩司一
秉大公實力查察自能漸收實效非可以空
言塞責也將此諭令知之○調成都副都統
福謙為西安右翼副都統西安右翼副都統

額勒金泰為成都副都統○乙亥諭內閣給
事中黃中傑奏請復禁銅收銅舊例以裕錢
法一摺所奏甚屬不知政體國家因時立政
期於便民自乾隆初年停止銅禁以來已八
十年民間無不稱便而京省各局銅斤亦並
無缺額之虞昨歲朕曾降旨停止外省呈進
銅爐火盆以節糜費而裕鼓鑄酌盈劑虛道
貴適中至民間日用所需安能以數十年弛
禁之物一旦設為苛令察及錙銖從前永祚

楊惲曾節次奏請禁用銅器。皆經戶部議駁。今該給事中復請申嚴銅禁。並請勅令官民家內所存黃銅器皿。概以三年為限。悉數繳官。如逾限不繳者。查出以違制論罪。此令一出。必至紛紛擾累胥役。訛索鄰里。控訴訟案。煩滋。究與錢法奚裨。耶所奏不可行。著無庸議。○丙子。諭內閣。試用指揮李沆。經因伊母生辰延客。喚優伶演唱。次日。至伊寓所索賁。其掌責生員張廷剛。因查對門牌不符。其時

張廷剛並未戴頂。此二事並無不合。惟因出具印結。與指揮汪象仁爭喧。咎有應得。都察院原叅革職之處。未免過重。李沆經著徹退北城試用。交部照例議處。○以故喀爾喀賽因諾顏扎薩克輔國公格木丕勒端多布弟達什德勒克襲爵。○丁丑。遣官祭歷代帝王廟。○諭內閣。朕自本年二月初九日。閱看左右兩翼前鋒營官兵射靶。官兵二百名。內竟無一人中五箭者。弓力亦覺甚軟。

皆由該前鋒統領等平日不善訓練。前鋒統領奕額瑪呢巴達喇。俱著傳旨申飭。嗣後務各將該管官兵留心訓練。以期精銳。○戊寅。諭內閣。盛京尊藏。

皇考高宗純皇帝實錄內有應行修改篇頁。著奕紹果齊斯歡於到盛京後恭詣

崇謨閣敬謹請領。將應行修改之處。悉心校明。修改完善。其應用檔冊及工匠人等。著一併帶往。○又諭乾清宮尊藏。

實錄

玉牒。舊例每年春秋二季。由批本處官員奏明日期。會同總管太監等敬謹抖晾。後或閒歲舉行。自嘉慶二年重修乾清宮安設以來。至今總未抖晾。舊例太數。今閱十餘年之久。亦覺太疏。嗣後著閒歲抖晾一次。每次由軍機大臣奏派滿漢文職大臣各二員。於四月內率同批本處各員暨乾清宮總管首領太監等敬謹抖晾。即自今歲為始。著為令。○己卯。

諭內閣朕近日御出入賢良門看射布靶正門外人聲甚衆並聞嬉笑之音此皆該管王大臣平時並未實心管理所有管理圓明園八旗王大臣俱著傳旨申飭至正門外檔木內向例不准閒人走入嗣後著該管王大臣不時留心稽察令該管官兵嚴行管束其西南門藻園門福園門尤為緊要亦著一體留心嚴行管束不得始勤終惰○庚辰上幸靜明園詣

龍神廟拈香○辛巳以

孝昭仁皇后忌辰與清明節大祭相值先期遣官祭

景陵○

上御勤政殿聽政○成都將軍賽冲阿奏查辦果羅克賊番出力土目賞土目旦借土百戶世職○以通政使司副使伊湯奏為太常寺卿○旌表守正捐軀浙江鎮海縣民馮盛剛妻張氏○壬午清明節

上詣安佑宮行禮○遣官祭

永陵

福陵

昭陵

昭西陵

孝陵

孝東陵

景陵

泰陵

泰東陵

裕陵○遣官祭

孝淑皇后陵寢○遣官祭

端慧皇太子園寢○以左春坊左中允何凌漢右春坊右中允楊惠元翰林院編修陶樞充日講起居注官○癸未諭內閣汪志伊等奏請升署永春直隸州知州一摺閩縣知縣言尚焜現據該督等以才優守潔幹練勤能

註考請升但閱該員叅罰單內現有降級留任及降職降俸者共計四十餘級罰俸之案共計一百九十餘件該員如果幹練勤能何至處分如此之多該督等濫行保奏著傳旨申飭先行交部議處所有永春直隸州知州一缺著另行揀員奏補不准漬陳○緩徵山西保德奇嵐興嵐臨靜樂河曲五寨偏關九州縣上年歉收地方額賦○甲申調貴州巡撫慶保為廣西巡撫以廣東布政使曾燠為貴州巡撫廣西按察使趙慎吟為廣東布政使直隸口北道康敬為廣西按察使調浙江按察使廣慶為貴州按察使貴州按察使張暉吉為浙江按察使○乙酉

上詣

大高殿行禮○還宮○諭內閣烏爾登前在協尉任內聽受步軍統領家人囑託庇護輪夫聚賭且於兵丁得賄故縱均各知情實屬卑鄙今到配甫經三年不准釋回著再留三年

五福因承審竊案非刑斃命發遣該革員到配時先經枷號一年迨期滿後在彼充當苦差又閱三年著准其釋回○又諭慶長等奏回部哈密郡王銜貝勒博錫爾額請本年來京瞻覲祝嘏一摺博錫爾來京祝嘏十月自可到京惟念伊尚未出痘博錫爾著由烏里雅蘇台草地行走於本年八月初旬在熱河瞻覲○丙戌遣官祭賢良祠○諭內閣王紹蘭奏酌撥閩屬倉穀接濟浙西民食一摺浙西杭嘉湖等府上年歉收米價昂貴福建係屬鄰省海運較便著照王紹蘭所請於福興泉寧四府近海各廳縣存倉穀石內抽撥穀十萬石咨明顏檢迅速招商按所定價腳備銀給照領運以資接濟其撥運事宜並著王紹蘭督同該藩司等妥為經理於浙商到閩時隨到隨給勿使停留守候如浙省米價平減由顏檢奏明停止其浙省價腳解閩後即發交臺灣府如數買足委員運交原撥各廳

縣歸款。均照所議辦理。○是月兩江總督百齡奏謝得旨。此事係初彭齡受小人播弄所致。然自今以後。汝亦當知力行節儉。盡心報主。不可再被人指摘。勉之慎之。

青錄卷三

嘉慶二十年

大清仁宗受天興運敷化綏猷崇文經武孝恭勤儉端敏英哲睿皇帝實錄卷之三百三

大清仁宗受天興運敷化綏猷崇文經武孝恭勤儉端敏英哲睿皇帝實錄卷之三百四

秋

嘉慶二十年乙亥三月丁亥朔

上耕藉詣

先農壇行禮更服至耜田所

躬耕三推復加一推

御觀耕臺命睿親王瑞恩克勤郡王尚格慶郡王永璘各五推吏部右侍郎佛住戶部右侍郎成格禮部尚書穆克登額兵部右侍郎恩寧刑部右侍郎熙昌工部右侍郎普恭都察院左副都御史李宗瀚通政使司通政使張鳴展大理寺卿慶明各九推畢順天府府尹

率農夫終畝。○諭內閣本日朕躬耕耤田。順天府所備牛隻甚不馴習。更換副用之牛。仍不服馱。御前侍衛十餘人勉強驅駕。始克四推禮成。迨登臺觀耕。其三王九卿所用耕牛。亦俱不馴擾。不能終畝。甚至有奔逸者。殊不足以肅觀瞻。耕耤為勸農大典。順天府供備牛隻。平時不勤加演習。玩忽從事。著將專司供辦之大興縣知縣沈守恒。宛平縣知縣張洽。俱先行革去頂帶。交部嚴加議處。順天府府尹費錫章。係專轄之員。著交部嚴加議處。劉鏐。係兼管之員。著交部議處。所有此次一切例賞。概行停給。嗣後該府尹等當督率所屬。先期認真教演。敬謹將事。以重典章。○以廣東香山協副將羅鳳山。為南澳鎮總兵官。○戊子。

上幸圓明園。○以古城領隊大臣福昂。為阿克蘇辦事大臣。阿克蘇辦事大臣楊樹增。為古城領隊大臣。○己丑。諭內閣。理藩院奏。玉努

斯所遺吐魯番回部郡王爵。或仍承襲。或即裁汰。並將家譜進呈請旨等語。該郡王爵。係因額敏和卓軍功所封。乾隆四十八年奉旨作為世襲罔替。前據松筠保奏。額敏和卓之孫諾什咱特。穩妥有識。通曉清文。茲閱伊等家譜。若令諾什咱特承襲。於例不符。從前額敏和卓出缺。將伊子蘇賚滿承襲。蘇賚滿緣事褫革。復奉

恩旨。將額敏和卓之子伊斯堪達爾承襲。今伊

斯堪達爾之子玉努斯。獲罪所遺之缺。念額敏和卓功績。著加恩仍准其承襲。長齡現在烏魯木齊。即交長齡高杞。將額敏和卓之子丕爾敦。拜喇木。二人揀擬。正陪具奏。再降諭旨。尋奏。上命以丕爾敦襲爵。○庚寅。

上啟鑒恭謁

東陵。○命肅親王永錫。大學士曹振鏞。尚書英和。景安。蘇楞額。留京辦事。○旌表守正捐軀直隸成安縣民楊言媳李氏。○免蹕路經過

地方本年額賦十分之三。○是日駐蹕湯山行宮。○辛卯榮郡王綿億薨。遣正黃旗蒙古副都統載銓往奠茶酒。賞銀五千兩治喪。謚曰恪。○以肅親王永錫為正黃旗領侍衛內大臣。禮部尚書穆克登額兼鑲黃旗漢軍都統。○是日駐蹕三家店行宮。○壬辰諭內閣。晉昌等奏審明已革佐領烏爾圖夥同賊犯謀害防禦海寧阿。從嚴定擬一摺。此案於上年十一月內。據晉昌等奏坐卡章京捏稟舞

弊等情。朕即以賊犯黃幘有偷砍木植。烏爾圖既係知情。其所報海寧阿患病外出。不知去向。焉知非卡員等夥同作弊。海寧阿一人獨不肯染指。致遭謀害。與從前王仲漢謀死李毓昌情事相類。當飭該將軍等務查海寧阿實在下落。勿任稍有枉縱。續據該將軍等訊出海寧阿於烏爾圖私帶賊犯。曾有欲行梟搗之事。烏爾圖到案。供詞猶復狡展。復經朕降旨將晉昌等審辦此案失之寬緩。嚴行

申飭。茲據該將軍等訊明。烏爾圖於上年派充坐卡總巡行至黠陽邊門。即商同黃幘有私帶賊犯樊十等出邊打牲。並私挖人邊。出邊後坐卡防禦海寧阿屢向不依。嗣又將烏爾圖縱令出邊之黃幘有張得占等拏獲。不允贖放。烏爾圖遂與樊十商同誘令海寧阿同赴江邊釣魚。乘其不備。樊十點鎗將海寧阿立時打斃。卓青阿黃幘有幫同擡屍拋棄江中滅跡。其與王仲漢謀害李毓昌一案。情

節相似。骸骨漂流。更為慘酷。果不出朕所料。可見聽訟必須細心。設竟如晉昌等初奏。顛預率結。使正兇漏網。奇冤莫雪。成何事體。烏爾圖身係職官。夥同賊犯越邊偷竊。已行同盜賊。因海寧阿持正不依。遂商同致斃。樊十本係賊犯。手戕職官。該二犯情罪重大。俱著即行處斬。於行刑時先重責四十板。樊十並著梟首。江干示衆。烏爾圖之子不論幾人。俱著發往伊犁。以示重懲。黃幘有先有劃破海

寧阿脚心之語。已有謀害之心。卓青阿雖曾將人命事大之言。向烏爾圖勸阻。然仍持竿賺海寧阿至江邊釣魚。後復幫同棄屍。該二犯均屬同謀加功。著即照謀殺人從而加功律。問擬絞監候。趕入本年秋審情實。其餘罪名。著軍機大臣會同行在刑部再行覈議具奏。海寧阿以防禦微員。於佐領烏爾圖縱賊出邊。屢加阻斥。其拏獲黃帽有等之後。不肯徇情贖放。烏爾圖分給馬匹。又拒不受。並

備呈欲行控揭。守正不阿。以致被害。實堪嘉憫。海寧阿著加恩。照三品叅領陣亡例。給予卹典。並著該將軍查明伊現有幾子。或無子嗣。並查明兄弟幾人。是否有子。堪以立繼。覆奏到日。再行降旨施恩。尋奏上。得旨。海寧阿長子雙英。賞給驍騎校。○是日。駐蹕大新莊行宮。○癸巳。祭

先蠶之神。

皇后親詣行禮。○遣貝勒奕綸。往奠故貝勒銜

貝子弘謙茶酒。○是日。駐蹕髻髻山行宮。○甲午。諭內閣。常明奏。訪獲妄布邪言。與教惑衆。騙錢匪犯。分別審擬一摺。此案黃子賢。膽敢借治病為名。倡立鴻鈞教名目。惑衆斂錢。情罪重大。該督於審明後。業經恭請王命。將該犯按律處斬。餘犯徐占林子等。俱著照所擬分別辦理。毋庸再交部議。署邛州事茂州直隸州知州戴三錫。於稽查保甲之時。能將邪言惑衆匪犯。立時訪獲。究辦尚屬能事。戴

三錫著送部引見。再降恩旨。○又諭。旨齡等奏。查覆茅豫劣蹟。並初彭齡各款一摺。初彭齡經朕擢用有年。內任卿貳。外歷封疆。宜何如勵精圖報。乃於署江蘇巡撫任內。沈湎于酒。以致辦理稿案。親自書題者五十三件。畫行者五十二件。其委茅豫代為書題者五十七件。畫行者二千五百二十一件。巡撫衙門稿案。皆係地方刑名錢穀要務。何得假手於人。朕日理萬幾。於臣工奏牘。無不親加批答。

初彭齡敢自耽逸豫。倩人畫諾。然則署理撫篆。所署何事。上年初彭齡參劾陳桂生。續報收銀文冊先後互異一摺。係於十月初九日拜發。其摺內稱陳桂生並不聲明何員挪解。含混具報。其時陳桂生實已將署溧水縣知縣劉翰周另詳揭參。係與續報收銀文冊同於十月初八日到院。業經初彭齡於文面標明日期。乃有心隱匿原稟。摺內漏不聲敘。現據茅豫供稱。此件另詳並未給看。則初彭

齡於此事竟係有意文致陳桂生之罪。是誠何心。各處欽差督撫奏摺。奉有硃批發回。應各自祇領拆閱。現據茅豫供稱。初彭齡與百齡等兩議查辦虧欠章程。奉到批回時。將百齡等原摺私自拆閱。見有不敢昧良辜恩之語。遂謂百齡等有心將伊參斥。發怒臚款。將百齡等劾奏。至茅豫並未耳聾。現據自行供認係屬捏報。並稱初彭齡先許代為告病。以上各款實屬改弦易轍。任性妄為。初彭齡兩

經部議革職。初次朕念其平日尚稱敢言。且歷官資格較深。加恩降為內閣學士。嗣又從寬宥過。降為侍讀侍講。茲復查出種種謬妄。本應革職發往伊犁。以示懲創。姑念伊母年已九旬。朕所稔知。原欲於今歲伊母生辰。加以恩養。今初彭齡自罹愆咎。不能仰承恩眷。實為不孝。若其母因子遠戍。晨夕思念。或有意外之虞。初彭齡雖咎由自取。朕心殊為不忍。初彭齡著革職。施恩免其發遣。令在家閉

門思過。不准出門。若再妄為。定不輕恕。著將此旨及百齡等摺。與茅豫供詞。交曹振鏞英和景安傳到初彭齡。令其閱看。俾自知罪愆。並可知茅豫之為人。初彭齡有何登答。著曹振鏞等據實覆奏。○吏部議准。湖南巡撫廣厚奏。永州府屬江華縣屬之上五堡嶺東二處地方。綿亘百餘里。距縣城遠。兼之界連兩粵。民強難處。最易藏奸。請將與江華縣同城駐劄之永州府理強同知。移駐濤虛。就近

督率錦岡巡檢撫綏緝捕從之。○緩徵四川閬中。蒼溪。南部。廣元。昭化。巴通。江。南。江。劍。九州縣本年春季額賦。○是日。駐蹕白澗行宮。○乙未。駐蹕隆福寺行宮。○壬申。

上恭謁

昭西陵

孝陵

孝東陵

景陵

裕陵俱未至碑亭。即降輿慟哭。步入

隆恩門。詣

寶城前行禮。躬奠哀慟。王以下文武大臣官員

均隨行禮。○是日。迴鑾。駐蹕桃花寺行宮。○

丁酉。

孝賢純皇后忌辰。遣官祭

裕陵。○賞直隸扈衛弁兵等銀幣有差。○是日。

駐蹕盤山行宮。至辛丑皆如之。○戊戌。賜扈

從王公大臣等食。並賞賚有差。○諭內閣。富

俊等奏請將辦理淺務不力之局員及查拏私淺各員弁。分別議處。勒賠一摺。吉林抽收淺餘銀兩。該創夫攬頭等。自節次接濟之後。十八年按則抽收。有盈無絀。業已著有成效。乃十九年抽收淺餘不敷。官用銀至五千二百餘兩之多。自係局員辦理不善。或巡查疏懈。又有偷漏情弊。自應分別懲創。著照所議。將查拏私淺各員弁。開具職名。交部議處。其不敷銀五千二百九十九兩零。即著落局員

協領巴善等四人。勒限分賠。至該創夫攬頭等。既經官為調劑。仍不急公交課。亦應酌量示罰。著於常例每兩淺抽收銀二十兩之外。加抽二三兩以補官用。○己亥。諭內閣。祥保等奏軍臺續添口分羊隻。請由口北道庫餘存利銀內撥給一摺。著照所請。阿爾泰軍站續添口分羊隻。每年應撥價銀五百兩。准其照數支給。俟太僕寺扣還牛羊羣息銀足數一萬兩後。仍交口北道發商生息。以備撥用。

○庚子諭內閣。那彥成奏。運庫存貯鹽斤。加價銀兩。懇請交商生息一摺。著照所請。准其將長蘆運庫現存加價銀六十餘萬兩內。撥出五十萬兩。交長蘆鹽政發商承領。按月一分生息。每年息銀六萬兩。即由鹽政委員解交藩庫兌收。以五萬兩辦理水利。以一萬兩作為每年恩賞官兵及整理各兵衣履鞍馬之用。水利銀兩。照例報部覈銷。其獎賞官兵一款。由藩司造冊報總督衙門查覈。○又諭。

有齡等奏。請於徐城以上因山改建減水滾壩一摺。治黃之法。隄防與減洩二者不可偏廢。近年南河減水各閘。日漸淤廢。遇大汛水長之時。驟難消減。南北隄岸。在在可虞。該督等議請將十八里屯兩閘中間。剷平山頂。留口門三十餘丈。作為天然滾壩。以虎山腰作為重門擎托。並於引河兩岸加培隄堰。以資宣洩。異漲尚為因地制宜。工歸節省。著照該督等所請辦理。即行按估興工。務於五月內

一律完竣。其估需銀四十餘萬兩。即於此次請撥銀一百五十萬兩內動用。事竣覈實造冊報部。作正開銷。其改隄作堰。有占廢民地之處。查明照例題豁。○辛丑賞故達賴喇嘛呼畢勒罕銀幣。以第穆呼圖克圖領辦達賴喇嘛事務。○壬寅駐蹕白澗行宮。○癸卯諭內閣。文貴。久祥。熊如澍。左元鎮。李曉林。楊賢敬。王鎡。劉載銘。趙璐。俱著准其捐復。秦錫嘯。雷長春。劉種桃。田體清。姚榮琳。傳承綢。湯曰

漢。衛賢書。諸載陽。趙紀昌。俱不准捐復。其秦錫嘯一員。先經部議降調。奉旨送部引見。如於未經引見時呈請捐復。該部覈其事出因公。原可照例擬准。今秦錫嘯業經引見。奉旨以縣丞補用。該員補官後。俟合例應升。自可循敘遷擢。乃此時甫經奉旨降補。旋即捐復原官。成何政體。所有率行擬准之吏部堂官。著交都察院察議。嗣後有似此引見奉旨降用人員。俱不准捐復原官。著為令。○賞蹕路

經過看守各行宮弁兵半月錢糧。○是日駐蹕烟郊行宮。○甲辰。

上詣

元靈宮

永慕寺行禮。○諭內閣蔣攸銘等奏請設法清釐民間積欠錢糧一摺。國家任土納賦。錢糧為維正之供。豈容小民抗欠。粵東額徵地丁。現尚有未完銀一十三萬七千餘兩。此內南雄仁化共有五萬餘兩。潮陽揭陽劣矜大戶。

包納抗拒。甚至差役不敢下鄉催徵。自應設法清釐。除潮陽揭陽兩縣責成該府督縣嚴徵分別覈辦外。其南雄仁化兩州縣著照該督撫所請。即派委妥員協同該州縣勒限兩年。各將所屬田畝糧戶逐一覈實查勘造冊。將應徵新舊銀米務於限內徵齊。其糧戶未清者。令執業之人將積欠銀米完納。衝壓荒蕪者。照例豁免。該二州縣經徵十四年以前錢糧處分。暫免覈計開叅。至沿海居民有爭。

控匿稅沙坦地畝。本應照例入官。姑念該業戶已費工本。未便令其失業。著每畝上則追花息銀八兩。下則追銀四兩。給照升科。其追出花息。即作為委員經費。並以撥補虛糧之用。○以鑲藍旗滿洲副都統福勒洪阿為正白旗護軍統領。直隸馬蘭鎮總兵官福長安為正黃旗漢軍副都統。以山海關副都統文孚為馬蘭鎮總兵官。兼總管內務府大臣。正白旗護軍統領富蘭為山海關副都統。○是

日駐蹕舊衙門行宮。○乙巳。

上行圍。○諭內閣百齡等奏海口北岸葉家社原隄日漸塌寬。僅恃圍築越隄。慮難抵禦。請將道廳營弁撤任。責令在汛協防一摺。海口兩岸築隄束水。為全河尾閘要工。葉家社北岸坐灣。皆因南岸生灘逼溜北趨之故。該管道廳營弁自應於水勢未及隄根之前設法保護。乃意存退守。惟知趕築大小越隄。以致原隄日益塌寬。大溜裹臥。漸成頂險。實屬玩

誤該督等僅請將從前承辦各員撤任不足以示懲創前護淮海道宿北同知孫茂承調任海安同知黃炳海安營守備王統業千總張松年俱著即行革職留於工所協同修守俟過三汛後如平穩無虞由該督等奏請開復設有疏虞從重治罪所有前此創築大小越隄及埽壩裹頭等項銀兩即照所請著孫茂承賠繳四成黃炳賠繳六成不准開銷現在該工溜勢應如何相機抵禦著該河督迅

速妥籌務期修防穩固保守安瀾○又諭賽爾烏蘇章京所屬自十六臺站起至安達拉哈畢爾罕臺站一帶地方上年曾被旱災而冬間又遭風雪該站馬駝傷損者多現在青草未生著加恩於本年應得錢糧內每站買辦米三石茶一匣分給被災十一臺站貧苦蒙古等以資接濟其應補上年倒斃牲畜俟草生時再行補足今該十一站應差馬駝不敷應用除奏摺等項緊要事件仍由驛遞外

其餘經過出差人等俱著暫由烏爾罕烏拉行走烏里雅蘇台等三處之解部人犯均著由各扎薩克旗下照料遞送其察克達哈布蘇爾噶應用烏拉馬匹著暫行停止由各該扎薩克旗下選擇好駝備用俟草長後牲畜蕃庶之時仍照舊例辦理○賞南苑各行宮苑戶一月錢糧海戶銀一千三百兩○是日駐蹕南衙門行宮○丙午

上行圍○是日駐蹕圓河行宮○丁未

上行圍○是日駐蹕新衙門行宮○戊申

上還圓明園○旌表守正捐軀直隸唐縣民張清亮妻張氏○己酉諭內閣貴慶奏請以候補員外郎鳳德降補主事一摺鳳德前在盛京刑部員外郎任內緣事降調嗣經奏准捐復自應先在額外行走遇有員外郎缺出照例坐補上年貴慶奏請將該員借補主事經部議駁茲復以題缺主事堪勝乏人曉曉瀆請自係為該員先得俸銀起見將來遇有員

外郎缺出。仍可升補。顯違定例。實屬非是。鳳德不准降補主事。仍著在該部額外行走。俟有員外郎缺出。方准照例補用。貴慶著交部察議。○又諭蔣攸銘等奏酌定查禁鴉片烟章程。請於西洋貨船到澳門時。先行查驗。並明立賞罰。使地方官知所懲勸等語。鴉片烟一項。流毒甚熾。多由夷船夾帶而來。嗣後西洋貨船至澳門時。自應按船查驗。杜絕來源。至粵省行銷鴉片烟積弊已久。地方官皆有失察處分。恐伊等瞻顧因循。查拏不力。嗣後有拏獲鴉片烟之案。除查明地方委員等有得規故縱情事。應嚴叅辦理外。其僅止失察者。竟當概行寬免處分。至所請拏獲興販烟斤。自二百斤至五千斤以上。分別紀錄加級及送部引見。並軍民人等拏獲獎賞。以及誣良治罪之處。俱著照該督等所請行。○諭軍機大臣等。將攸銘等奏。暹羅國副貢使顯請在粵守候正貢船到。一同領賞暫緩回國等

語。上年暹羅國遣使呈進補貢。其正貢船在洋遭風漂失。曾經降旨令蔣攸銘等將副貢船齎到方物存貯藩庫。並照例賞給該副貢使筵宴。令其先行回國。以示體恤。茲據奏該正貢使寄副貢使書信稱。現在正貢船收泊越南洋面。俟南風當令方能開行。六七月間可以到廣。該副貢使情願守候暫緩回國等情。該國王前因正貢失火。復備補貢。遣使遠涉重洋。敬紓忱悃。自應准其來京。如正貢船於七月間到廣。著該督撫派員護送該正副使起程。於九月底到京。萬壽即令其隨班祝嘏宴餐。如九月方能到廣。即令於十二月到京。與年班各外藩一體瞻覲可也。將此諭令知之。○庚戌。諭內閣。刑部具題四川民人李潮敦比照因事威逼人致死一家二命例。擬發近邊充軍一本。朕詳加酌覈。章有富之妻章王氏。向李潮敦地內尋割豬草。彼此爭鬧。李潮敦以穢言向辱。章王氏哭泣回家。氣忿

自縊伊夫章有富痛妻憂忿旋亦投繯此案李潮敦穢語村辱致章王氏氣忿輕生按例罪止滿流惟章有富自盡亦由痛妻所致是因該犯一言使伊夫婦二人先後殞命其情罪較重該部比照威逼人致死一家二命例問擬充軍所擬尚輕李潮敦著照手足勾引例改為絞監候歸入秋審緩決嗣後遇有情節相同之案俱照此辦理著刑部載入則例遵行○辛亥

上幸萬壽山詣

廣潤祠拈香○旌表守正捐軀四川渠縣民章有富妻王氏○壬子

上御勤政殿聽政○諭內閣御史夏國培奏宗室移駐盛京應請飭交宗人府秉公詳查不得混行派往一摺盛京為我朝根本重地宗室移駐盛京即與漢人同居祖籍無異到彼後授宅分田觀摩善俗實屬教養兼備良法善政所有應行移駐各戶皆係於嘉慶十八

年早經派定分三撥行走前兩撥已於是年秋間移駐此次係第三撥其續行添派二人因該宗室有獲咎之案特旨添入現在即日起程該御史忽以挑派不公妄行陳奏干與多事殊屬冒昧夏國培不勝御史之任著仍以翰林院編修用○又諭御史魯垂紳奏請嚴查各省游民一摺所奏太不曉事各直省地方遼闊無籍游民不可億計安能徧行查察即以京城而論五方雜處若必人人究所

從來辦理已日不暇給況此等游民出外營生亦不盡皆為匪前此林清一案首夥各犯即係土著又豈外來游民若如該御史所奏京外流寓之人多立科條按名稽覈殊屬紛擾其事斷不可行○又諭常明奏拏獲傳習天主教人犯審明分別定擬一摺此等傳教民人煽惑鄉愚執迷不悟甚至以身罹王法為得昇天堂陷溺人心皆不畏死實屬可惡此案傳教為首之朱榮童鼐均著即處絞其

抗不悔教之唐正江等三十八犯均應發新疆給額魯特為奴。內張萬效一犯雖年已八十。但曾因傳教案內發遣收贖。茲復怙惡不悛。著與犯婦楊曾氏夏周氏均不准收贖。此三十八犯若概行遠戍。其原犯事地方轉無以示懲儆。著該督於各遣犯內擇其情節較重者數名。即與張萬效一犯在於各該處永遠枷號示衆。以昭炯戒。其到案後始行改悔之唐光林等三十二名均著杖一百徒三年。

至周廣盛等七百四十一名既經聞拏改悔均著即予省釋。○內閣學士賡泰以讀本錯誤降為主事候補。○癸丑諭內閣吳璥等奏已革臨清直隸州知州楊嗣曾在東有年前曾拏獲偷竊御馬要犯於地方河工事宜均極幹練。可否捐復原官。留於東省委用等語。楊嗣曾前此拏獲行竊御馬要犯業經施恩鼓勵嗣因審理白居敬一案刑求傷重致令解京瘞斃降旨革職。白居敬畫符斂錢固有

應得之罪。但其罪不至死。楊嗣曾一味刑求以致拖累斃命情節較重。著不准捐復。既據吳璥等奏稱該革員於催漕宣洩機宜尚為熟悉。著留於東省河工交該河督差委効力贖罪。如果始終奮勉。屆滿三年該河督據實奏聞請旨。朕自酌量施恩。毋庸伊出貲捐復也。○甲寅

上臨榮恪郡王綿億園居賜奠。○諭內閣銜齡奏重修解州常平村

關帝廟請頒御書扁額一摺。向來各省廟宇凡蹕路巡行親詣拈香處所特頒廟額用昭敬禮。此外如江蘇福建等省

河神

天后各廟因靈佑顯著經該督撫奏報到時朕親書扁額發往懸掛以申虔報至各省地方叢祠林立

關帝廟建造尤多豈能徧行題額即該省解州城西廟內恭懸康熙年間

御書扁額自係彼時恭值

聖祖仁皇帝臨幸該處特行

頒給何得援以為請此次該州常平村廟宇落成既係地方官捐廉倡募重修該撫即應自行撰寫扁額敬謹懸掛豈可任意漬請轉形褻越衡齡著傳旨申飭○諭軍機大臣等本日王紹蘭奏審明結會首從各犯分別定擬一摺已降旨將為首之歐狼即行正法餘俱依議行矣此案歐狼創立父母會名目糾眾

實錄卷五

五

斂錢傳授口訣暗號誑惑鄉愚實為可惡現在案內從犯有三十餘名之多可見小民貿貿無知受愚罔覺著該督撫會同學政汪潤之即儆照御製邪教說酌擬簡明告示將現在辦理此案緣由廣為示諭以爾等聽信邪言甘心入教以為一經拜會即可傳授秘訣殊不知所謂口號者問以從那裏來那裏去則答以從東邊來西邊去問從那裏過則答以橋下過此等胡言亂道毫無情理雖三尺

童子不至受其欺哄而爾等出錢傳授信之不疑實屬愚蠢已極迨至破案發覺身犯重罪不能倖逃追悔業已無及嗣後爾等務當各知警省自保身家勿為奸徒誘惑被其陷害似此徧加曉諭庶鄉曲愚民共知覺悟不致陷於邪僻觸犯刑網將此諭令知之○貸山西陽曲臨汾屯留孝義霍陽豐鎮七廳州縣貧民倉穀

實錄卷五

五

大清仁宗受天興運敷化綏猷崇文經武孝恭勤儉端敏英哲睿皇帝實錄卷之三百四

大清仁宗受天興運敷化綏猷崇文經武孝恭勤儉端敏英哲睿皇帝實錄卷之三百五

臣等謹將本年內各處奏報刑名案件恭摺具奏
一、刑部奏為據山東巡撫奏稱：據兗州府知府詳稱：兗州府屬鄆城縣民人王德勝，因與同鄉人王德勝爭地，將王德勝毆傷，經該縣訊明，擬斬立決。臣等查該犯王德勝，係屬兇惡，應請旨將該犯斬立決，以儆效尤。欽此。
一、刑部奏為據山東巡撫奏稱：據兗州府知府詳稱：兗州府屬鄆城縣民人王德勝，因與同鄉人王德勝爭地，將王德勝毆傷，經該縣訊明，擬斬立決。臣等查該犯王德勝，係屬兇惡，應請旨將該犯斬立決，以儆效尤。欽此。
一、刑部奏為據山東巡撫奏稱：據兗州府知府詳稱：兗州府屬鄆城縣民人王德勝，因與同鄉人王德勝爭地，將王德勝毆傷，經該縣訊明，擬斬立決。臣等查該犯王德勝，係屬兇惡，應請旨將該犯斬立決，以儆效尤。欽此。

秋

嘉慶二十年乙亥夏四月丙辰朔享

太廟遣成親王永理恭代行禮○諭內閣昨據都察院奏直隸寧津縣民婦遲孫氏控告伊女遲二姐、坤姐被賈克行及其姪賈九兒強姦該縣驗明強姦已成因姑息二命不肯按律究辦等情已降旨將該令革職鎖拿交那彥成提案審辦矣此案遲二姐被賈克行強姦已成伊妹坤姐年僅十歲復被賈克行誘令伊姪賈九兒強姦如果屬實此等淫兇棍徒將良民幼女橫加姦污若不加以懲創何

以彰法紀而安良懦地方官積習相沿於承審命盜重案往往自顧考成存化大為小之見此案即按律剖斷於該令並無處分尚復如此遷就則但有干涉處分之案其延擱消化置民間是非曲直於不顧者不知其幾矣無怪奸宄肆行不畏官長干犯法令者實繁有徒此皆地方州縣因循不職之所致著各直省督撫飭知所屬州縣等官嗣後遇有大小案件務須按律擬斷隨時速結如心存規避曲法苟安必致訟獄滋多一經叅劾或被告訐朕惟有執法懲治不稍寬貸是冀免處分轉致身蹈重咎毋謂誥誡之不早也將此通諭知之○以故雲南大理府蒲咤崆土巡檢楊賜孫壽培襲職○旌表守正捐軀雲南陸涼州民駱繩妻伏氏○丁巳諭內閣御史焦景新奏長蘆鹽務宜設法整頓一摺長蘆商力疲乏朕所稔知節經施恩展緩正課加價借帑隨時調劑俾裕商力茲據該御史奏

稱鹽務廢弛其匱乏受獎之由不能指出請
勅下直隸督臣會同鹽政將近年積弊設法
整頓不過為該商乞恩調劑起見該御史籍
隸天津顯係受人囑託妄行陳奏復自稱與
該處商人素無往來捏詞掩飾其誰信之至
鹽政之設例係一年更替屆任滿之期朕每
酌予留任即如廣惠簡任長蘆鹽政已閱兩
年該御史寧未知耶所奏俱無庸議原摺著
擲還○又諭那彥成奏請派員驗收旱河工

程一摺熱河挑修旱河工程前經派令和寧
查勘興辦茲據該督奏稱挑辦完竣著派禧
恩前往查驗收工再本年哨內擇定營盤內
有二處尚未妥協自應另行選擇和寧前在
朕前奏稱年老不能騎馬伊本擬親赴哨門
外暫駐遣人進哨查看現有文辦案件和寧
俟辦理秋審事畢即應前往巴林翁牛特等
處審辦著遣派官兵留於熱河俟禧恩到時
隨帶進哨會同喀喇沁王滿珠巴咱爾圍場

總管安福相度地勢另擇營盤二處豫備行
圍○又諭前年逆案内飭緝最要次要各犯
高稽弋獲步軍統領衙門順天府五城職司
緝捕自應上緊督拏以淨根株而全良善孰
意又墮因循疲玩惡習日漸懈弛本年正月
以前尚各報有獲犯自二月至今於單開著
名逆犯竟未拏獲一名該衙門堂官每於召
見時輒奏稱現方購有眼線不難踴躍然實
在蹤跡皆以該眼目等不肯洩露為詞不能

確指及待至經時則又杳無影響是所稱竭
力購訪者仍屬虛詞全無實際該堂官等既
敢在朕前巧為支飾無怪各受所屬欺罔陽
奉陰違於緝捕一無成效諸臣殊屬員國孤
恩矣前茹荼於召見時奏稱近日五城拏獲
各犯送交刑部皆經審釋是以司坊官咸懷
慚愧各無奮志尤不成話各該衙門拏獲逆
犯經朕派軍機大臣會同刑部審訊期於各
得實情無枉無縱原因案情萬變前此各該

處承緝要犯貪功妄拏教誘逼供之案不一而足。若每獲一犯承審衙門即扶同鍛鍊。冥諸重辟。豈不竟成冤濫。朕於逆案供詞奏上時必詳加披覽。是否從逆。皆求有實據。軍機大臣及刑部堂官若謬存陰功之見。稍有寬縱。朕豈不能覺察。即如本日遞上祝秋兒等供詞。內祝秋兒一名係入教從逆之犯。即經訊實。亦何嘗似茹荼所稱盡皆審釋耶。且五城所獲之犯如確有從逆實據。率經問官審釋。茹荼即當據實奏。又安得於召見時僅以空言搪塞。嗣後步軍統領順天府五城各衙門。惟當飭屬各矢天良。將單開最要次要各犯認真緝捕。毋再仍前懈弛。致干遠戍重戾。慎之。○戊午。

上詣

時應宮

昭顯廟拈香。○還宮。○諭內閣。昨日山西蒲州府知府一缺。已將福蔭補授。該員身像旗

人其原名福蔭長三字竟似漢人姓名殊屬不合。著令改名福蔭。嗣後旗人命名如用滿洲蒙古成語自可不拘字數。若有取漢文字義者祇准用兩字。不准連用三字。○以常雩祀。

天於

圓丘。自是日始齋戒三日。○己未。諭內閣。長齡等奏籌議烏魯木齊經費各款一摺。綠營糧折銀兩改支一半本色。於兵丁生計無益。呼

圖斯一帶開採金廠稽察難周。蘆灘荒地給營開墾轉滋糜費。均著無庸辦理。其查出迪化州等處尚可耕種地二十四萬七千四百餘畝。著照所請招戶試種。三年減半起科。每年徵收糧石存倉備用。濟木薩馬廠地難播種亦著無庸裁撤。該廠孳生馬匹以三年出羣。三年挑變。除頭二等馬匹留廠撥營外三等馬每匹定價銀五兩。交地方官承變。四等馬每匹定價銀四兩。交營廠酌量賠補。分別

交貯道庫報撥充餉其抽收山場木植稽查 遁逃一款著依照伊犁章程辦理○又諭據 長齡等奏試採都蘭哈拉鉛廠約計每年可 得銀四五萬兩應交課銀一萬餘兩於經費 未能多為節省應即遵旨封閉等語新疆地 方總以鎮靜為本不宜輕易更張都蘭哈拉 開採鉛廠所得課銀不過一萬餘兩於經費 實屬無裨該處與土爾扈特等處接壤恐聚 集多人或致越境偷挖金砂滋生事端著將 存廠鉛砂趕緊鑄盡即將該廠永遠封閉嗣 後不准再請開採其廠地給還扎哈沁公托 克托巴圖設卡稽查仍按季派員會哨嚴密 巡察○予出洋淹斃廣東參將會榮浙江外 委林志文陝西陣亡千總馬魁傷亡千總韓 應祥祭葬世職馬兵許正英馬魁卹廕如外 委例陣亡傷亡兵刃元等六十八名卹賞如 例○庚申	上詣
--	----

清 實 錄 嘉慶二十年四月

南郊齋宮齋宿○辛酉常雩祀 天於 園丘 上親詣行禮○辛酉明園○壬戌諭內閣那彥 成奏寧津縣民賈克行等強姦逆二姐等一 案本年二月初內遞孫氏曾在總督衙門呈控 該督當批臬司轉飭河間府委員迅速審辦 等語此案遲孫氏因本縣不為究辦於二月 內在該督衙門呈控該督既知強姦幼女重 案事閱八月之久該縣延不詳報即應一面 將該縣嚴叅一面親提審訊彼時該督即因 危蹕須赴差次亦應專委臬司迅速提訊乃 僅批飭河間府委員辦理輾轉稽延以致遲 孫氏負冤莫訴赴京呈控實屬因循疲玩犯 此四字朕必不恕著那彥成遵照前旨迅即 提集犯證審擬具奏再直省緝拏逆犯一事 昨經降旨令該督行知各提鎮不必按月奏 報並非諭令該督亦無庸隨摺陳奏乃那彥	
---	--

成此次奏到各摺。又不將近日緝匪情形附摺奏聞。一味因循疲玩。那彥成著交部議處。○又諭吏部奏主事缺出。懇恩將歷俸未滿之捐復筆帖式平慶擬陪等語。吏部綜理銓政。凡內外升補人員。遇有不合例者。俱應秉公駁斥。乃此次率請將例不應升之筆帖式擬陪主事。是先自亂其例。其何以平銓政而肅官方。若謂現無一等人員。豈該部二等人員中竟無一可以擬陪者。若均不堪入選。何以京察時又不早行黜退耶。該堂官等。不過因平慶曾任本部郎中。代為乞恩。准予擬陪。即可豫為該員擬正。欲升地步。殊乖守法之義。除平慶不准擬陪。交該衙門另行揀員外。吏部堂官俱著交都察院察議。○又諭鄂勒哲依圖奏散秩大臣瑞齡於初六日圓明園接班遲誤。瑞齡亦自請交部議處。當交軍機大臣等查詢。茲據查明富勒琿疑珠於初五初六日在健銳營進班。初六日係瑞齡班。

期遣入至侍衛處代為報明。而未給瑞齡送信。本日瑞齡有分獻差使。於未刻接侍衛處傳牌始趕至接班。各等語。富勒琿疑珠。祇可報健銳營進班。又何必代瑞齡報班。殊屬好事。瑞齡雖有分獻差使。禮成後儘可趕來接班。藉此推諉。未來接班。迨見傳牌始行趕來。均屬非是。富勒琿疑珠。瑞齡俱著交兵部議處。○癸亥。

上幸萬壽山。○甲子。諭內閣。胡克家奏部民告

官受財被告門丁。屢提不剴。請旨革審一摺。前署東流縣事改教知縣王步衢著革職。交該撫飭拏在逃之家人錢三到案。提同犯證。審明定擬具奏。此案門丁錢三。既經被控過贓。即應拘拏審訊。乃飭令該員自行交出。以致縱令潛逃。案懸莫結。事後始行奏。已屬遲緩。嗣後各省上司衙門。非有公事。固不可拘喚屬員家人。致滋擾累。若所屬州縣家人役。有被控應行質審案件。該上司立即差

挈提訊不得責令本員交出。致有徇縱。○又諭先福奏。審明已革守備單懷義規避屯防。毀罵總兵一案。請將該革員先在省城枷號一箇月。滿日發往伊犁等語。此案已革守備單懷義。因派往新疆屯防。輒敢捏病規避。又不赴省驗看。復因向總兵常祿借貸不遂。肆行謗詈。種種刁狡情節。甚為可惡。單懷義著先在省城枷號兩箇月。滿日責打四十板。再行發往伊犁効力贖罪。至該省營員。遇派往

新疆屯防。往往捏病規避。著照該督所議。嗣後派定換防人員。如有告病者。查驗明確。准其改派。仍將該員存記。下屆補派換防。若託病規避。即照此案參辦。其在屯防處所。當差勤慎。班滿之日。由該管將軍。都統。大臣。咨明總督。撤回本營。准其挨次酌量升用。分別勸懲。以肅軍紀。○諭軍機大臣等。祥保奏察哈爾達哩岡愛牧羣馬駝被災情形一摺。察哈爾右翼駝駝十六羣。倒斃官駝二千六百餘

匹。看來管羣官員。以今歲係清查各羣之年。難保不將平時缺短馬駝。報入被災數內。著寄諭祥保等。於查馬大臣未到之前。務須徹底詳查。如有此等情弊。即行據實奏。○轉理藩院右侍郎蘇沖阿。為左侍郎。以喀什噶爾參贊大臣成寧。為理藩院右侍郎。○調正白旗漢軍副都統敬徵。為正紅旗滿洲副都統。以署正紅旗漢軍副都統東林。為正白旗漢軍副都統。○乙丑。諭內閣。甘家斌奏。敬陳

管見一摺。其所稱編查保甲。嚴禁邪教。及整飭吏治。確查犯據各條。內如保甲之法。宜令十家互相覺察。各州縣編查保甲。十家為牌。果能責成。牌頭甲長等。挨門編列。鱗次相接。耳目既近。偵伺易周。遇有來歷不明之人。立即呈報。則逆犯自不能潛匿。至邪教節經查辦。多已改悔自新。但地方官。若於一查之後。即不再加體察。恐故智復萌。仍不免有私相傳習者。而在逃逆犯。氣類相通。易於窩藏。尤

不可不嚴行查訪。再近日直省州縣等官。縱令胥役擾害閭閻。遇有強姦強搶。輿販婦女等案。規避處分。或多方延擱。不為究辦。尤非戢暴安良之道。惟在各督撫留心考察。隨時叅辦。以肅紀綱。至查拏逆犯一事。最要次要。各犯數十名。單開年貌住址。甚明。著直省大吏於獲犯時。務先確實審訊。於既認復翻者。尤當留心辨別。庶真偽分明。地方官亦不致干妄拏無辜之議矣。○丙寅。

上幸靜明園詣

龍神廟拈香。○幸靜宜園。○遣乾清門侍衛阿蘭保往奠。故喀爾喀土謝圖汗車登多爾濟茶酒。賞銀五百兩治喪。○是日。駐蹕靜宜園。至庚午。皆如之。○丁卯。以太常寺卿伊湯。署為內閣學士。兼禮部侍郎銜。尋因年老。命以三品卿銜休致。○賞福建臺灣緝獲逸盜貢生蔡啟賢。六品頂帶。○旌表守正捐軀雲南昆陽州民朱珣妻李氏。守正被戕。廣東電

白縣民梁洪儒女梁氏。○己巳。上御演武廳。閱健銳營操。○庚午。以故雲南楚雄府鎮南關從九品土官楊文輝子富襲職。○貸湖北德安營兵丁倉穀。○辛未。

上幸靜明園。○還圓明園。○壬申。

孝端文皇后忌辰。遣官祭。

昭陵。○貴州黎平府新化正土司歐陽謝緣事革退。以其子本光襲職。○戶部議准。河南巡撫方受疇疏報。內鄉縣開墾田一項三十六

畝。有奇。照例升科。從之。○給河南睢寧陵商邱鹿邑柘城五州縣被淹民房修費。並貸籽種。○癸酉。諭內閣。御史石承藻奏。江湖水災。設法巡緝一摺。據稱兩湖地方。從前各督臣認真緝盜。水次肅清。近來劫案甚多。皆由緝捕不密之故。請定水面緝捕章程等語。兩湖及三江地方。長江延亘數千里。帆檣雲集。其間奸宄潛伏。較之陸地稽察尤難。現在直省城市鄉村。嚴行保甲。匪徒無所棲止。或遁入

水鄉亦事之所有。著傳諭湖北湖南江南安徽江西督撫各於所屬江湖水面認真稽查。或船隻編列號次。責成地方營汛文武員弁。慎密巡防。以期摘奸發伏。有犯必懲。用補保甲所不逮。務各實力整頓。勿令吏胥擾累。以副朕戢暴安良至意。○又諭衡齡奏審明實大有赴京誣控劉士榮等各款。將實大有擬軍一摺。所擬殊未允協。實大有挾嫌捏控多款。甚至將劉士榮等編造平西王等名號列入呈內。試思劉士榮等若果有此等名號。即係悖逆。厥罪甚重。今既訊明誣捏。自當律以反坐。若謂呈詞為張型賢所遺。張型賢先經身故。現係實大有出名赴控。即當以伊當其罪名。該撫僅將實大有照舊越赴京告重事不實。例問擬充軍。未免失之輕縱。實大有一犯應照誣告叛逆未決例問擬。所有全案罪名。著刑部另行覈議具奏。○又諭本年朕閱看官兵射靶。錄紅旗護軍營官兵並無一人

中五箭者。即中三四箭者亦少。十三日該旗護軍參領景泰射箭二枝均未到靶。業經降一級調用。本日該旗護軍佛保射箭二枝內一枝亦未到靶。佛保著革退護軍。作為馬甲。此皆該管護軍統領平日不能妥為訓練所致。護軍統領秀寧著交部議處。○以大常寺少卿舒寧為卿。○旌表守正捐軀安徽太和縣民答迎春妻張氏。○甲戌。上還宮。○乙亥。上御太和殿視朝。王以下文武升轉各官謝恩。○辛圓明園。○旌表守正捐軀山東鄒城縣民樊普環妻劉氏。○丙子。上御勤政殿聽政。○諭內閣。御史果良額奏敬陳管見一摺。據稱近日外省府廳州縣等官有降調捐復及丁憂離任者。該督撫往往奏留本省。各部指名奏留司員。並有將應推升郎中之員外郎於未出選缺之先奏留本部者。請嗣後毋得率行奏留。以杜奔競等語。所

奏是。近來降調捐復人員。率多奏留本部本省。幾似相沿成例。至丁憂推升人員。奏留尤屬非宜。此中實難保無徇庇。若人地實在相需。亦難一概禁止。嗣後各部及外省奏留人員。必該員緣事本案。係屬公過。且平日辦事實有勞績可據者。均於摺內詳細聲敘。候旨酌定。其餘不得紛紛濫請。以杜夤緣。而肅吏治。○諭軍機大臣等。喜明等奏。駁飭廓爾喀王來稟一摺。廓爾喀與披楞彼此爭鬪。既在

邊境之外。總當置之不問。廓爾喀王來稟所稱。懇求轉奏。勅諭披楞各守邊界。並稱披楞之人。偷探唐古忒路徑。在尼增達拉等十五處屯紮。其意總欲求天朝幫助伊國。加兵披楞。故為此虛詞聳聽。喜明等即遵照前旨。嚴加駁飭。自為正辦。該國王如仍遣人齎表來藏。當諭以爾國與披楞尚未釋爭。所進表文。不便轉奏。大皇帝撫有萬國。一視同仁。從無偏助一國之事。設此時披楞造作言詞。來天

朝赴訴。豈肯即助披楞加兵爾國乎。如此絕其覬覦。該國王自不敢懷詐飾詞。再來濫請。至藏地一帶邊界。喜明等當督飭營員。密為備禦。如披楞人等。果有闖入邊界之事。則當示以兵威。俾知震懾。以固邊圉。將此諭令知之。○以宗人府府丞蔣祥墀為都察院左副都御史。○丁丑。諭內閣。據百齡等奏。常格於蘇州藩司任內。濫行借動羨餘銀一萬四千餘兩。內多竟未詳明。私行借放者。除追還二

千七百餘兩外。尚有未歸銀一萬一千二百九十一兩零。常格著即革職。限一年內將前項銀兩照數賠出。就近呈繳戶部。如限內交足。奏明酌量賞給差使。若逾限不完。交刑部從重治罪。餘著照該督等所奏辦理。○諭軍機大臣等。百齡等奏。原任常熟縣知縣黃鶴一摺。已降旨將該員革職。等因。交百齡審辦矣。江省州縣虧缺。累案現在痛加整頓。其尤甚者。自當重辦一二員。俾通省咸知儆惕。

黃鶴前於江陰常熟兩任內。共虧銀至八萬餘兩之多。其丁憂回籍時。已在十八年該省清查之後。乃於缺交之項。全無措繳。或坐擁厚貲。在原籍置買房地。或為子弟捐納職官。皆當以侵蝕入己論罪。著百齡等於黃鶴解到時。嚴加夾訊。如訊出以上各情。即將該革員擬以重辟。請旨即行正法。以為閩省侵貪官吏之戒。將此諭令知之。○戊寅。命於黑龍潭及

覺生寺設壇祈雨

皇次子智親王。皇三子綿愷分詣拈香。○諭內閣御史福漳阿奏。留京王大臣。每遇赴閣請案及驗放職官日期。離恭設合符之處較遠。請令不直宿之王大臣前往。專責直宿者看守合符。並隨圍護寶。添派內務府郎中員外一二員。護寶請寶官員。每次加領馬一匹。以備更換等語。所奏糊塗已極。太不曉事。從前留京王大臣。並不日夜在內直宿。嗣派

令輪班內直。稽察一切。並看守合符。已足以昭慎重。若如該御史所奏。由文華門至內閣。跬步之地。已不可離。豈必將合符刻刻護持。方為慎重乎。至隨圍護寶。內閣例派官員。已不為少。兼有兵丁隨護。該御史忽請派內務府司員協同照料。更屬毫無干涉。護寶請寶官員。定例每員領馬二匹。從無遲誤。茲遽請加增。若他項緊要差使。俱援以為請。又安得如許官馬增給耶。所奏俱不可行。著無庸議。

○又諭。先福奏。查出藩庫濫借銀兩。分別追賠一摺。藩司為閩省錢糧總匯。庫貯出納。例皆詳院報部。其各屬應起解應寄貯各款錢糧。惟恐州縣或有侵挪。必令趕解司庫。既存貯司庫之後。則責在藩司。絲毫不容濫支濫借。若藩庫先不出納維謹。其何以慎帑項而杜弊端。此案原任臬蘭縣知縣丁閩洲。借支藩庫寄貯穀價未完銀九千六百餘兩。即著於該家屬名下。勒限一年追繳。逾限不完。照

例監追並將未完之項於已故藩司陳祁家屬名下追繳一半其餘一半在接任正署各藩司名下各按在任年月攤賠先還原款以示懲儆仍恐該藩庫私行挪借者尚不止此款並著先福徹底詳查據實具奏○又諭晉昌等奏審明移駐宗室喀勒明阿強姦良人婦女已成照例定擬一摺宗室移駐盛京原令其安靜守法漸清淳風乃喀勒明阿在彼恣意遊蕩先經調姦羅洪氏未成茲復將民婦閻汪氏踢打多傷強行姦污實屬橫肆不法該將軍等擬以絞候此等兇淫之徒若不立即懲辦無以儆衆著晉昌即帶同管理宗室之文弼傑信祿康三人將喀勒明阿押赴本營監視勒令自縊以昭炯戒德克金泰隨同喀勒明阿硬進閭汪氏院內見其毆打行強並不阻止亦屬不法著即移駐吉林交富俊等嚴加管束儻再滋事端奏明從重治罪張七即張義係宗室逐出跟役仍敢引誘喀

勒明阿屢次遊蕩且據該犯供認曾向羅洪氏等威嚇實屬兇惡不必發往伊犁即將該犯在於宗室營房前永遠枷號示儆管理宗室之文弼等平日漫無約束致有此不法之案均屬無能郎中文弼傑信俱著降為員外郎主事祿康著降為筆帖式仍責令認真管束以贖前愆此旨通諭宗室覺羅知之○軍機大臣等議覆直隸提督徐銳奏請將赤峯建昌朝陽三營十汛守兵減改步兵一摺查該處蒙古民人雜處彈壓緝捕關繫緊要所有額設之兵自嘉慶十六年定議後馬兵步兵均已足額守兵尚未募齊緣守兵月支錢糧不敷養贍勢難強之入伍既據該提督援照多倫諾爾改守為步之案應准其將守兵六百六十二名改為步兵三百三十一名按照兵數分隸三營十汛責令該提督速為募足一體認真操練以成勁旅從之○命禮部右侍郎王宗誠在上書房行走○以吏部左

侍郎吳煥。署工部右侍郎。○以內閣學士姚文田為兵部右侍郎。○以鑲黃旗漢軍副都統阿蘭保為鑲紅旗護軍統領。○己卯。諭內閣御史胡承珙奏。請詳定保甲法制。以昭覈實一摺。保甲之設。除莠安良。最為善政。然行之覈實與否。仍視乎官吏之賢愚。地方官果能經理合宜。則四境之內。如燭照數計。何奸不察。何弊不除。若視為具文。恣譏之奸胥蠹役。則雖逆犯兇渠。潛匿境內。亦復懵然不知。

於事奚益乎。著各直省督撫。留心訪察。如州縣中能於保甲事宜盡心整頓者。即當明示獎勵。登之薦牘。其草率廢弛者。立即糾參。以懲庸劣。至各州縣於所屬之牌頭甲長。當令本牌本甲公同結保。擇誠實可信之人。專責以稽查匪徒。輯安閭黨。其一切供應拘遣雜差。不得概令承充。以致良民懼干賠累。視為畏途。該州縣仍不時查察。其能舉發奸宄。秉公奉法者。加以獎賞。如有窩藏匪類。誣詐善

良者。嚴行究辦。庶勸懲公而人思自勵。良法美意。行之久而其效益彰矣。將此通諭知之。○又諭御史胡承珙條陳釐整風俗一摺。所奏多不可行。如所稱賣藥之徒。刊方牟利。應由該坊官自行查禁。不值降旨嚴辦。其小民拜認義父義子。習俗相沿。亦難明示厲禁。至婦女入廟燒香。牙儈把持行市。久已載在禁例。若如該御史所稱市口停車。井邊担水。皆須一一查禁。科條煩瑣。實以病民。殊於政治

無裨也。所奏均毋庸議。○總理行營王大臣綿課等議奏。巡幸木蘭安設大營規制。添派扈從各項官兵。並進哨翊衛事宜十三條。繪圖呈覽。從之。○庚辰。

上幸萬壽山詣

廣潤祠拈香。○舉行嘉慶十九年大計。直隸卓異官十五員。不謹官一員。浮躁官三員。才力不及官二員。年老官三員。有疾官三員。奉天卓異官二員。有疾官一員。福建卓異官九

員。罷軟官一員。才力不及官四員。年老官五員。有疾官三員。湖北卓異官十員。罷軟官二員。才力不及官二員。年老官三員。有疾官一員。湖南卓異官十員。不謹官一員。浮躁官一員。才力不及官一員。年老官六員。河南卓異官十二員。不謹官一員。浮躁官一員。才力不及官五員。年老官六員。山西卓異官十二員。不謹官一員。浮躁官二員。罷軟官一員。才力不及官一員。年老官四員。有疾官五員。四川卓異官十五員。不謹官一員。才力不及官四員。年老官八員。有疾官三員。廣東卓異官十二員。不謹官一員。浮躁官二員。罷軟官二員。才力不及官三員。年老官三員。有疾官三員。廣西卓異官七員。不謹官三員。浮躁官二員。罷軟官一員。才力不及官一員。年老官三員。雲南卓異官九員。不謹官一員。浮躁官一員。罷軟官一員。才力不及官二員。年老官四員。有疾官一員。貴州卓異官六員。才力不及官

二員。年老官四員。有疾官四員。南河卓異官三員。年老官二員。東河卓異官一員。才力不及官一員。有疾官一員。吉林卓異官一員。分別議敘處分如例。○辛巳諭內閣先福奏征兵借支銀兩額懇緩期扣還一摺。據稱前此甘肅派往河南陝西征兵先後借支整裝銀兩計馬兵每名在二十兩以上。步守兵每名在十二兩以上。為數較多。若照例分八季扣還。養贍竭廩。請緩作四年扣還等語。綠營征兵借支整裝銀兩。定例馬兵准借十兩。步守兵准借六兩。今所借之數多逾一倍。以致不能依限扣還。係由當日辦理浮濫。著該督查明此次征兵各按其定例應借十兩六兩之數。仍分八季扣還。其於例外多借之項。著落各該省經手濫支之員。如數賠補。以清帑項。○又諭此次閱看正藍旗護軍營射靶官兵一百人內並無一人中五箭者。中三四箭者亦少。弓力亦軟。此皆該管護軍統領平日並

不認真操演。護軍統領長慶著申飭。嗣後務將該管兵丁。留心妥為訓練。以期精銳。○兩廣總督蔣攸銛奏。徇縱營兵備弁。請分別革審一摺。得旨。此案營兵吳武升。於黑夜頭纏紅布。口吹牛角。挨家貼符。本自駭人耳目。該典史戴振查拏訊究。因其出言頂撞。掌責押候解縣審辦。並非多事。乃營兵馮日升等。輒敢扶嫌。將該典史扭辱。並將弓役毆傷。實屬目無法紀。不可不嚴辦示懲。著該督等即

飭將滋事兵丁五名。鎖拏解省。審明定擬具奏。其有心徇庇之守備余君升。千總沈文明。著革職。漫無約束之叅將德興。著解任。一併歸案質訊。○壬午。頒

御製官箴二十六章。宗人府箴曰。朱果源長。本支百世。蕃翰羽儀。邦家屏衛。慶衍天潢。祥綿帝系。宗正設官。永彰法制。教孝教忠。孚誠孚惠。追思舊風。時懷勉勵。作求不愆。凜承紹繼。爾王爾公。同舟共濟。內閣箴曰。綸扉重任。東

國之鈞。調元補袞。寅亮忠淳。統攝百辟。光輔一人。宣猷贊化。致君澤民。萬邦為憲。庶績咸循。濟川作楫。正直清純。素餐備位。政治難伸。予違汝弼。毋忽諄諄。翰林院箴曰。金馬玉堂。深嚴清密。立本儲才。黜浮務實。薛史枕經。身度聲律。勿耽詞章。藻采飄逸。研鍊典謨。精勤作述。于度于咨。不言溫室。虛飾屏除。彬彬文質。誕告儒臣。正心正筆。吏部箴曰。職司邦治。夙夜心殫。首冠六部。統理百官。銓衡黜陟。其

慎其難。藻鏡朗燭。表正形端。科條恪守。典藉勤觀。考課賢否。真偽詳看。選舉平允。計要不刊。佐朕用舍。社稷永安。戶部箴曰。宇宙財賦。養天下人。會計衆寡。度支平均。經費有則。節儉常循。財貨非寶。邦本惟民。上損下益。上聚下貧。盈虛消息。出陳易新。安危所繫。察理最真。懋修厥職。時繹絲綸。禮部箴曰。立極建邦。天經地義。格神和民。宣化圖治。五倫五常。三德三事。幽明崇卑。秩宗定位。軌度率由。昇平

可致先務俗成允資咸備直亮寅清本根培植莫大於禮容臺廟志兵部箴曰九伐掌握任重夏卿舉優黜劣克詰戎兵八旗子弟簡練俊英直省將士選擇詳明考牧蕃庶垌野充盈城戍郵驛毋紊期程敬修職業七德用宏昭宣我武永綏大清刑部箴曰輔治以刑必慎律令哀矜常存萬民之命聽斷允詳宅心公正死不復生豈忍陷穽宜保善良力除梟獍姑息縱凶益滋強橫獄訟繁多敝俗日

盛咨爾皋陶咸中有慶工部箴曰居民時利董率司空五材調濟職思考工備物致用謹度程功去華就實樸素是崇繕修營造吉叶棟隆河隄鞏固水利疏通節所當節慮周始終予惟尚儉常念卑宮理藩院箴曰東國開基蒙古勲舊久締絲蘿世臣華胄四十九旗新疆營壘大漠極邊撫綏在宥禁令錄功黜陟封授院事實繁承政敬懋公正廉明懷柔包覆中外一家車數福佑都察院箴曰明目

達聰責在御史彰善瘴邪整綱飭紀鐵面霜威糾遏繩詭私惠勿酬私讐勿毀敢諫不阿忠貞常矢言出如山心清似水勉盡丹忱非圖譽美民隱敷陳治隆患弭通政司箴曰通政立朝九卿行列職有攸司官非虛設直省本章按日校閱程限詳稽遲速甄別違式劾叅勿先漏洩登聞鼓廳事期明徹覆盆莫伸立予昭雪上達下情治功最切大理寺箴曰明刑大理古廷尉卿民命至重罪疑惟輕期于予治務得其平刻則近酷縱惡傷生折衷求實讞獄詳精存心寬恕執法原情會議必慎救誤扶傾切忌絀嘿思義顧名步軍統領衙門箴曰昔執金吾今名統領城郭郊圻八旗萬井生齒日繁頗有頑梗首善之鄉豈容不逞豪霸必除奸宄知警要任惕承國鈞是秉心主忠誠政濟寬猛汝和欽哉慎修思承順天府尹箴曰三輔帝都京兆要職撫綏鄉閭翦剔盜賊獎拔才能劾除貪墨去莠安良

洗蕩邪慝有守有為以引以翼遐邁觀摩四方表則五日存心尸位素食民具爾瞻抒城竭力八旗都統箴曰天造草昧神武開基股肱心膂辨色建旗滿洲蒙古肇定鴻規歸附既衆漢軍次之分二十四典則昭垂百七十載戶口蕃滋漸忘舊俗日就恬嬉力圖復業念茲訓辭總督箴曰總督軍兵自前明始我朝因之各省分理專司綠營申令法紀簡閱宜勤精練將士稟命九重受鉞萬里設兵衛

民驅除姦宄有勇知方辨別臧否安不忘危昇平可企巡撫箴曰竄區庶民委托巡撫激濁揚清知其甘苦遇歉亟拯盡心救補格彼愚癡籌思生聚常存公忠毋任喜怒穆如清風化若時雨可望小康德澤澤普咸矢敬勤教寧疆土總河箴曰千里黃流自西北至扶沙而行今益難治齊豫淮揚總河設二官吏分司共籌一事土性不同制宜因地固守隄工修防散墜救弊補偏克勤勵志永保安瀾

勲隆福積總漕箴曰食先八政邦本為農歲稔穀獲千箱萬鍾七省轉運天庾正供河路虞滯帆檣相從停泊宜順風信恐逢抵通迅速回棹接蹤日不暇給行春克冬勿憚跋涉長勛寅恭學政箴曰士冠四民儲才卓犖成俗化人允賴講學正道昌明非心澣濯考選菁莪公平拔擢有德斯純浮華終駁為國養賢愚頑漸覺經正意端趨向遠濁本立道生惠澤霑渥鹽政箴曰鹽法講求因民所利國

課攸關設官分治徵收督催酌中定議豐歉不齊審時度地貴賤均勻疏通壅積淡食既除銷引免累緝私必嚴謹防作偽征權公平閭里恩被布政司箴曰直省政治惟汝承宣旌別淑慝黜劣興賢水旱賑卹力救顛連出納錢穀職守毋愆清忠敬慎剛直貞堅愛民節用持正戒偏祛邪獎善化美俗遷凜思勿懈史冊永傳按察司箴曰臬事汝司民命國脈念切祥刑懲一警百振挈紀綱剔除惡逆

聽訟勤明。洗冤立釋。獄不稽留。平反保赤。法律聿修。憲度日闢。封章勿遲。慎理郵驛。盡職殫誠。九有沐澤。將軍歲曰。將軍之職。與古迥殊。八旗禁旅。生聚帝都。日增月盛。分駐寰區。星羅密布。奕祺良模。舊習常守。漢俗勿趨。國語熟練。步射馳驅。先養後教。心洽誠孚。訓爾營隊。萃我皇圖。提督歲曰。天下屯營。難以數計。提督總兵。官階次第。副參遊都。統歸節制。選拔必公。勿貪貨幣。練士必勤。獎勵力藝。老弱汰除。采擇精銳。備足患消。金甌永衛。為國干城。欽承勿替。○諭內閣。常明奏。特參辦理輕縱之總兵。及現在籌辦進剿。瞻對緣由一摺。據稱該督因籌剿中瞻對一事。行次鑪城。接據羅聲皋稟報。中瞻對番酋洛布七力畏懼兵威。縛獻克夷朗結七力等十一名。該酋央懇上瞻對及噶嚕阿色各土司等。保伊出見。願以土司印信號紙給伊子阿更承襲。該酋徙居於五百里外之噶嚕土司地方。以當

發遣該鎮已允其所請。遣令回巢。一面徹退官兵。現在兩路官兵均已撤出數程。以外土兵亦皆散而歸巢。該督與總兵羅思舉另行酌籌進兵道路。相機辦理等語。中瞻對番酋洛布七力。連歲侵擾各部。落並敢拒傷官兵。情罪重大。必須勦辦。示懲。官兵已攻克宗木多山梁。進擊河東碉寨。正當乘勝直前。揚兵威而寒賊膽。乃羅聲皋率聽洛布七力畏懼兵威之詞。遽准其所請。遣令回巢。即一面徹退官兵。專擅糊塗。辦理錯謬。常明請將羅聲皋革職。作為兵丁。未足示儆。羅聲皋著革職。拏問。交該督嚴審定擬。奏明請旨。又據奏。阜和協都司圖索阿。前因查辦西寧賊番搶劫之案。稟稱行至德爾格忒土司地界。該土司帶領頭人在阿隆溝住紮。阻止不令前進。現在常明親抵該處。查知德爾格忒土司調派土兵協同官軍進剿。中瞻對備辦牛馬糧食甚多。極為恭順出力。訪查前此並無阻攔圖

崇阿之事。該都司因入境後。該土司未經遠接。伺應。捏詞妄稟等語。撫馭土司番部。全在秉公勸懲。以服其心。若圖崇阿之妄。稟洩。忽只圖快其私意。罔顧國事。甚屬可惡。圖崇阿著革職。拏問。交該督嚴行審訊。恐尚有需索不遂。騷擾。恐嚇情事。如訊得實情。著即從重定擬具奏。毋稍徇縱。○兩廣總督。將攸銛奏。拏獲廣東積年逸盜多名。出力員弁。署遊擊張仁等。升敘有差。○以四川懋功協副將盧廷璋。為松潘鎮總兵官。○甲申。雲貴總督伯麟奏報。勦捕野夷出力人員。賞都司方振奎花翎。都司趙琦等藍翎。餘升賞有差。○添設雲南騰越鎮馬鹿塘大壩二汛。駐千總一員。外委二員。兵一百七十名。從總督伯麟請也。○鑄給湖南保靖營中營中軍守備右營守備關防。從署湖廣總督張映漢請也。○以先賢孟子後裔。繼煥襲五經博士。

大清仁宗受天興運敷化綏猷崇文經武孝恭勤儉端敏英哲睿皇帝實錄卷之三百五

大清仁宗受天興運敷化綏猷崇文經武孝恭勤儉端敏英哲睿皇帝實錄卷之三百六

藍翎總教習經日講起居注官李鴻武英殿學士文淵閣領閣事稽察欽奉
上諭事務管理工部事務翰林院掌院學士隨帶

知縣尋常四縣曹振鐸饒官太子太保文淵閣大學士掌理刑部事務加五級戴均經蔣廷黻居注官太子少保內大臣文淵閣提舉

閣下稽察欽奉
上諭事件處協辦大學士戶部尚書翰林院掌院學士教習處右三總管內務府大臣鑲黃旗滿洲都統兼領管

部三庫奉宸苑清湖園等處繕墾工程處御茶膳房御藥房太醫院西澤堂事務掌功加二級隨帶加二級尋常加三級紀錄三次日爲轉

從議官之子太保禮部尚書上書房行走武英殿總管管理圖書監事務加六級隨帶加三級紀錄四次臣汪廷珍等奏

救修

嘉慶二十年乙亥五月乙酉朔丙戌諭內

平

閣御史孫世昌奏畿民燒香之習復萌請飭

查禁一捐婦女入廟燒香本干例禁各廟宇

如有男女混雜喧闐擁擠者地方官自當隨

時查禁至鄉民燒香拜廟久成習俗若概行

禁止恐轉啟訛索之弊惟聚衆作會皆係不

安本分之徒從中倡率業經降旨飭禁著步

軍統領順天府五城留心查察如人衆聚集

有匪徒混跡其中即密加訪拏亦可藉以收

詔奸之效其尋常入廟瞻禮者不得藉端禁

阻以杜紛擾
丁亥

孝誠仁皇后忌辰遣官祭

景陵、刑部奏審訊知府王樹勲係僧人朦捐

已據供認屬實得旨刑部連日研訊王樹勳

一犯據供前在廣慧寺為僧時開堂說法曾

有官員及舉人生員等數人皈依受戒現任

倉場侍郎蔣予蒲亦在受戒之列等語該犯

假託佛法聳惑聽聞從前破案時辦理輕縱

茲經供指確鑿不可不加以懲處蔣予蒲爾

正長全書下

時已滿內閣侍讀學士係四品京堂官不憲

於異說受彼五刑實屬有五官篇無彥出仁

蔣子蒲著即華膳此外被惑之人除已故無

庸置議外其餘俱應斥革著刑部查明參劾

其王極勲供証審訊明確著即按律定擬具

奏尋奏擬發往黑龍江充當苦差得旨先在

刑部枷號兩箇月再行發遣
戊子諭內閣

本日奕紹等奏到管帶移居宗室到藩日期

寧等奏到安置移居宗室情形一摺摺內首列晉昌之名二摺均係四月二十一日自盛京拜發晉昌公出未回奕紹等行抵盛京自係與文寧誠安貴慶華連布四人會同辦理伊四人連名具奏應將晉昌未及會銜之處於摺內聲明乃首列晉昌之名合詞入奏非作偽而何文寧誠安貴慶華連布均著交部察議諭軍機大臣等逆案內最要次要五十餘犯指名飭拏總未報獲京城本年春夏以來會緝獲數名經刑部審訊確係分過刀布曾至禁城門外者業已按律辦理各該衙門訪拏此數犯之時係從地窖內搜獲試思該犯等並非指拏之人尚且畏懼潛伏何況指名嚴拏之犯其蹤跡詭秘必更牢固深藏在於耳目不及之地直隸南三府河南滑濬一帶以及山東曹定等處民間地窖本多且該一帶婦女紡線織機多於窖內聚處在官弁人等以為婦女所在不疑有逆犯潛處其

內不知習教之家其婦女本無區別伊等本係同教此時情急投往或竟混雜其中彼此固結多方掩蓋使官弁等無從查察著那彥成等密飭地方委員確加踴訪得有端倪即密帶兵役掩捕或可弋獲務各上緊督緝不可因循怠玩己丑諭內閣朕親製文武官箴二十六章頒示中外本日據王大臣等具摺謝恩此仍不過循照向來會謝恩賜成例所謂具文非朕所望於諸王大臣也朕勤求

治理惟日孜孜近見內外各衙門奉行故事漸就因循是以各按諸臣職業所司數言申儆原欲爾諸臣觸目警心躬行實踐若徒為頌言不思勤修職事仍於政治奚裨天下之事上不外一誠爾諸臣惟在實心實力無欺無隱則以誠事君自能視國事如家事不敢稍自暇逸近有各衙門延擱公事者一經詰問輒以事小不敢煩勞聖心為詞朕日理萬幾從無憚煩之意諸臣藉圖自便乃託為仰

體之說豈知林木成於芽蘖江河始於細流若慎之於初則防維甚易惟因循日久寢益難治迨至叢勝已成起衰振積其煩勞乃益甚國家熙績亮工天下之大萬民之衆非一人所能獨理諸臣膺股肱心膂之寄其各早作夜思靖共爾位以期綱紀整飭府事修和豐登屢兆寰宇教寧朕與諸臣共享承平之福實所厚望焉○調刑部右侍郎朱理為倉場侍郎庚寅以內閣學士彭希濂為刑部

右侍郎○旌表守正捐軀直隸衡水縣民杜黑妻王氏○緩徵陝西榆林府谷懷遠葭神木綏德米脂七州縣上年霜災新舊額賦並民欠籽種牛具銀○辛卯

上幸靜明園詣

龍神廟拈香○諭內閣嘉慶十四年

方澤大祀因乘輿由外西門轉至北門外降輿路稍紆遠改於內西門外降輿並降旨交軍機處存記俟逾五年後提奏再於內西門內

酌量降輿處所現屆

方澤大祀相距已逾五年恭查乾隆三十五年以後

皇考高宗純皇帝聖壽六旬恭祀

方澤係於內西門內齋宮前甬道北降輿朕此時春秋五十有六不敢遽行倣照著太常寺敬謹相度自內西門外至齋宮前甬道北酌定適中之地鋪設梭薦以備降輿繪圖貼說先行具奏至

南郊大祀禮宜從同自本年冬至為始所有降輿處所亦著太常寺敬謹相度適中處所繪圖貼說具奏○又諭本月十六日恭值

方澤大祀行禮之時已在月食復圓之後陪祀救護均闕典禮不可闕畧其救護官員不及詣

壇陪祀著各該衙門將應行陪祀救護之員酌量分派俾各敬謹將事並著稽查科道分別嚴查儻有藉詞推諉兩處不到者指名叅奏

癸巳以兵部右侍郎恩寧署刑部左侍郎
以直隸永定河道李逢亨為河東河道總
督予河東河道總督李鴻賓故母劉氏祭
一次並賞銀三百兩治喪 甲午諭軍機大
臣等御史王維鈺奏荒田涸復准令居民墾
種納糧一摺直隸瀕臨河淀各州縣自修築
千里長隄之後河流順軌淀水消除被淹地
畝涸出者甚多著那彥成飭令該管道廳州
縣等將所築長隄隨時保護勿令衝塌損壞

以資捍衛所有涸出地畝除原有業戶者仍
令照舊管業其歷年久遠失迷業戶者即准
令附近居民報墾承種按畝納糧此項地畝
收歛無常若遇水占之年仍准其報明停徵
該督務飭州縣等實心經理毋得任聽親友
胥吏等從中舞弊如有包戶影射招租者即
行懲辦以裕民食而息訟端將此諭令知之
撥貴州威寧鎮右營外委一員兵六十名
分駐牛欄江從總督伯麟請也 以湖北按

察使嚴烺為甘肅布政使陝西督糧道周光
裕為湖北按察使 乙未

上幸萬壽山 丙申湖廣總督馬慧裕奏審明
呂紹輜逆倫一案得旨此案呂紹輜之妻李
氏因伊翁呂文順令其做飯該犯婦因家中
止有碎麥煮成稀粥呂文順氣忿用刀擲打
呂紹輜偏護其妻致將伊父呂文順棍毆殞
命是呂文順之死及呂紹輜干犯極刑全由
該犯婦違忤起釁除呂紹輜業經正法外李

氏著即處絞 丁酉

上詣

大高殿行禮

時應宮拈香 還宮 遣官祭

闕帝廟 諭內閣前據永鑒具奏信牌殘缺

並裕興自請議處當派英和和世泰會同永

珠查驗據奏信牌上一角微有剝痕並無缺

損本日朕進宮後復飭取信牌親加閱看所

有剝痕不及梯粒牌內起花處所亦有似此

者何得謂之缺損紫禁城內派王大臣值班原為稽察進班官兵有無曠誤彈壓在內當差人役勿許喧爭滋事嚴查姦宄謹覈出入如有曠班違禁者自當據實奏乃永鑒等不知大體專以看守信牌為要務索垢求瘢率行瀆奏所謂疑其所不當疑慎其所不必慎實屬昧於事理重輕永鑒裕興著再傳旨申飭並將此旨通諭直班王大臣知之○軍機大臣等遵旨議奏出征大臣官員跟役名

數請各按品級等差分別覈減纂入則例從之○廣西思恩府興隆司土巡檢韋可法緣事革退以其子桂襲職以夏至祭

地於

方澤自是日始齋戒三日○戊戌諭軍機大臣等富俊等奏詣勘分荒試墾事竣一摺拉林西北雙城子一帶地土沃衍經富俊親往查勘派員履丈現擬每旗設立五屯共屯丁一千名一切農具耕牛等項已分別採買於本

年備齊明春一律開墾並據繪圖進呈朕詳加披覽所擬闢屯試墾章程尚為周妥著照所奏辦理該將軍等惟當隨時督察以期漸有成效至前奏稱自試墾之第四年交糧起七年交穀十四萬石每石約價銀五錢可得銀七萬兩除十年用項外餘銀二萬九千餘兩十餘年後即可移駐京旗閒散等語著於試墾收糧辦有成效後察看可以移駐京旗之時酌定起數如移駐一千戶分為數年陸續前往庶辦理較有次第資遣亦易為力也將此諭令知之○以詹事府詹事毛謨為內閣學士兼禮部侍郎銜○庚子月食夏至

祭

地於

方澤

上親詣行禮○辛酉明園○諭軍機大臣等常明奏請將降調道員瞿曾輯捐復原官留川補用一摺近來外省降調人員該督撫等往

往奏請捐復原官仍留本省補用其京員降調由該堂官奏請捐復者其屬冢家可見外官養廉優厚因恃有捐復之資雖里吏議不日仍復原官則其在官之日已不免心無顧忌若不肖之員更復巧取私侵豫積銀兩以為捐復地步尤於吏治有妨況黜陟乃賞罰攸關方因誤公而黜之旋以捐資而復之亦非所以崇政體也瞿曾輯不准捐復原官該員既在川年久熟悉夷情著以現降之級自

備資斧在軍營協辦糧餉事務俟勦辦瞻首事竣如果出力該督再行據實具奏候朕酌量施恩將此諭令知之以鴻臚寺卿姚祖同為河南布政使○壬寅上御勤政殿聽政○以正白旗漢軍副都統博啟圖為內閣學士兼禮部侍郎銜仍留伊犁領隊大臣任翰林院侍講學士陳嵩慶為內閣學士兼禮部侍郎銜仍留山西學政任以通政使司副使賈允升為宗人府府丞○癸

卯旌表守正被戕直隸河間縣民何繼城女芝姐、甲辰諭軍機大臣等常明等奏官兵攻克藏多山梁及多隆武馳抵鑪城一摺此次勦辦中瞻對叅將曹興邦帶領嚶嚶及下瞻對土司頭人等擒占藏多山梁先後殲斃賊番二百餘名生擒阿甲降錯折力等三十餘名番夷投降者二百餘人又續報投出者三百餘戶擒獲刀械牛羊馬匹甚多洛布七力率領餘黨逃入熱籠地方竄匿該督等現

已飛飭總兵羅思舉由下瞻對如郎橋過河進抵墨口從熱籠後面與曹興邦合力夾攻多隆武已由鑪城起身前往督辦看來洛布七力勢已窮蹙該督等督飭將弁務將洛布七力擒獲凡抗拒官兵者即分別凌遲斬決其脅從投出者免死發落並傳集番眾將洛布七力等對眾行刑俾番眾觸目警心咸知震懾此旨到日計已可剋期肅事常明自應將善後事宜籌辦妥協再回省城將此諭令

知之乙巳

上幸靜明園詣

龍神廟拈香以江南河標中軍副將馬濟

勝為河南河北鎮總兵官予故提督銜河

北鎮總兵官薛大烈祭葬如例○丙午諭內

閣晉昌等奏請於移居宗室內遴選正副族

長學長以資約束一摺盛京移居宗室人數

不少自應設立專員在營內居住彈壓前次

派往之文弼傑信二員將屆三年期滿著晉

昌等即於移居宗室內公同揀選正族長一

員副族長一員正學長一員副學長一員先

行奏明令其學習辦事俟文弼等期滿回京

所有一切事宜即責成該族長等接辦晉昌

本係宗室簡任將軍非他人可比著於公事

閒暇之時常赴該營內留心稽察將各宗室

人等剴切訓誨伊等自無不聽受約束如有

不遵法度者即隨時懲誡以期遷善改過漸

返淳風○又諭昨據高杞奏廢員奇玖派管

鐵廠捐資鼓勵多獲鐵斤刑部奏定派管鐵

廠廢員兩年期滿如果妥協准於定例內酌

減三年奇玖在戍已經四年辦理出力不敢

壅於上聞等語摺內未將廢員在戍若干年

方准奏請之例先行敘明朕閱之即覺其朦

混當交刑部查例具奏發往新疆廢員原犯

軍流從重改發者定限十年期滿遵例奏聞

奇玖犯事原案係由流罪改發烏魯木齊到

戍甫屆四年即援管理鐵廠酌減三年之例

亦尚不應釋回高杞朦混具奏殊屬取巧邀

譽著交部議處奇玖准其於十年內酌減三

年除已滿四年外再過三年由該都統具奏

請旨其多獲鐵斤之該管文武員弁照例交

部議敘○又諭刑部議駁那彥成審擬遲孫

氏一摺此案前經那彥成奏到時朕披閱摺

內有遲孫氏與其夫遲象臣不和早已被其

逐出無蹤之語遲孫氏淫蕩悍潑刃傷夫翁

伊夫遲象臣難保非被其謀害罪關倫紀自

應確切嚴究那彥成率以被逐無蹤一語具奏實屬草率那彥成及臬司盛泰俱交部察議著將此案再行詳悉研鞫具奏丁未

孝恭仁皇后忌辰遣官祭

景陵○諭內閣劉鏞之等奏請於縣屬村莊移駐文員以資稽察一摺據稱順天府南路廳所屬大興宛平二縣村莊地界延長盜竊案件較多大興縣屬尚有舊設巡檢三員分管南路地面宛平縣之六十九村莊祇有營弁

分緝並無文員彈壓等語著照所請將宛平縣縣丞移駐龐各莊適中地方所有附近六十九村併歸該縣丞稽察遇有盜劫案件作為協緝開叅歸於南路同知管轄仍照原品升轉其大興縣屬舊設巡檢三員並著一體歸南路同知考覈以專責成而資整飭○追封九公主為慧慈固倫公主戊申

上臨西花園慧慈固倫公主殯所賜奠己酉諭內閣御史蘇緝奏請飭吏治而清庶獄一

摺所奏是民間詞訟全在州縣官勤於聽斷隨時速結藉以旌別淑慝俾良姦知所勸懲實乃為政之要是以向例於州縣自理詞訟設有循環印簿申送上司考覈以杜積壓乃

近日視為具文不過按月申送一次全無稽察不獨戶婚田土之件經年累月案牘塵積即命盜重案亦往往逾限不結此訟獄所以日滋也朕日誠內外臣工痛改因循疲玩積習而沈溺此習實未有若州縣之甚者可恨

極矣我國家之大獎實在州縣之因循州縣之因循實在大吏之急玩而用此急玩之大吏其咎在予不明總而言之予不知人咎將誰委惟自恨耳州縣受國家牧民之責所治之地數十萬生民所仰賴此雖早夜孜孜講求教養之法猶恐不逮乃下劣者縱飲博以自佚疏慵者託詩酒以鳴高其於民生之休戚地方之利弊漠然不以關心遇有訟案任意遷延使待訊公庭者坐廢四民之業而姦

胥蠹役利於多延時日得就兩造干證揣量
肥瘠恣意需索種種流弊不可勝言於是良
懦者因屈抑以求伸姦黠者更矯誣以思逞
及赴訴上司衙門該上司復不為申理仍發
交原問官審斷以致來京控案日益增多朕
每於步軍統領都察院等衙門奏上時閱其
事情稍輕者發交該督撫親提審辦其案關
重大者特派部院大臣前往按訊每訊一案
往返旬時而該大臣本部院衙門事務派人

兼攝或亦不能如本任者之專志竭誠推原
其始總因各州縣玩視民瘼各上司漠不相
關所致如此而望吏治民風日有起色其可
得乎督撫職任封圻務各整綱飭紀警惰起
積於所屬州縣必以政平訟理為考成綜覈
名實大彰黜陟勿徇私以廢公毋舍本而求
末行之以實持之以久而民不被正德厚生
之化者未之有也其州縣申送詞訟循環簿
該督撫責成司道府州詳細稽考隨時舉報

分別勸懲毋得互相容隱以崇法制予同軍
機大臣威暑揮汗書此肺腑之言及至督撫
衙門一覽了事束之高閣予可欺

天可欺乎慎之將此通諭直省各督撫知之

諭軍機大臣等本年春夏以來近京各省甘
膏普被偶值望澤之期一經點額無不立需
時霖直省所報麥收俱在八分左右

上天降康

恩施至為優厚我君臣欽感之餘宜如何克盡

人事以冀仰答

天心夫應

天以實不以文惟有勤思職業自能常承

昊貺自前年九月逆匪滋事後在逃遺孽尚稽

弋獲所謂除莠安良者在

天恩屢沐朕益懷慙雖

天意亟將誅殛梟獍要必官吏克盡緝捕之責

方能適合事機朕意最要次要各犯逃逸雖
久然皆係北人仍不過潛匿於北五省境內

在那彥成方受囑陳預衡齡朱勲五人屢承嚴旨自不敢心存玩視惟伊等所屬各州縣賢愚不一該逆等鬼蜮潛蹤亦必探聽緝捕懈弛之處在彼伏匿以致日久稽誅那彥成等當各飭所屬激發天良嚴查密訪務期必獲仍留心察看各該地方如遇有疲庸之員或更換勤明俾資整頓將前年鉅案全行完結常與天下臣民共享昇平之福朕之願也肺腑之言苦衷申告該督撫等其善體毋忽

將此各諭令知之 改河南荆子關協副將歸南陽鎮總兵官兼轄歸德營參將為撫標裁光州汛千總設光州營都司一員撥鄧新營把總一員隨營協防撥荆子關協鄧新營馬守兵一百二十名並舊額兵二百八十名分防州城及商城息縣等汛從巡撫方受疇請也 貴州鎮遠府偏橋左土官楊廷瑄因病休致以其子玉麟襲職 庚戌諭內閣此案秦賊肆竊之回民發遣到配後若復潛逃

回籍必故智復萌仍為地方之害著交配所該管官嚴加管束如在配脫逃應如何加重定罪其失察之該管官應如何從重議處之處著該部酌議條例具奏此案人犯即照新例辦理尋議嗣後回民在配脫逃被獲初次遞回配所枷號六箇月二次枷號九箇月三次以外枷號一年如脫逃後行兇為匪及拒捕情事除犯該斬絞監候改為立決犯該軍流發遣改為絞候仍照原例辦理外如犯該

徒罪遞回配所枷號一年犯該笞杖枷號九箇月其在配行竊初犯枷號二年再犯枷號三年三犯永遠枷號若在逃行竊亦照此例辦理再請嗣後回民窩竊罪應發極邊烟瘴者悉改發黑龍江為奴似此嚴定科條庶匪徒知所儆畏至失察之該管官應照尋常遣犯脫逃之例加等議處吏兵二部畫一辦理請分別纂入則例由刑部通行各直省駐防一體遵照從之 都察院奏指揮謝天樛緝

捕認真茲部選得缺請留任一年得旨部選得缺之員定例原不准奏留惟謝天樛屢次拏獲逆犯緝捕認真此等具有天良之員不可多得前曾賞戴花翎現在逆犯未獲者尚多謝天樛著以直隸州知州頂帶仍留東城指揮任一年飭令上緊緝捕俟一年期滿再以直隸州知州補用其和州一缺該部另行銓選 辛亥旌表守正被戕山東館陶縣民宋自由妻梁氏 癸丑諭內閣御史張鑒奏

嚴禁封疆大員家人需索站規一摺據稱雲貴總督伯麟居官廉平練達惟家人跟隨該督於經過州縣地方有需索站規滋擾多取之事請旨飭令嚴行禁止等語伯麟如果縱容家人勒索滋事致被屬員控訴自當按款究治今該御史所奏毫無指實豈能以一紙空言訓飭該督令其約束僕隸著該御史將伯麟家人於何年需索站規某州縣被其擾累其家人係何姓名訪明具奏再行覈辦○

又諭昨因閱射布勒三等侍衛巴彥布列入漢侍衛內當交托津查詢據稱巴彥布係正黃旗滿洲人該管領侍衛內大臣肅親王永錫索特納木多布齋以巴彥布係武進士是以於綠頭牌內誤繕漢三等侍衛等語永錫等自請交部分別察議是何言耶滿洲考中武進士挑取侍衛一切俱應照滿洲侍衛升轉豈有列入漢侍衛之例即如滿洲考中文進士或用翰林或用部屬皆同滿洲官員一

律升轉今以巴彥布係武進士輒行列入漢侍衛缺內殊屬錯謬糊塗之至正黃旗領侍衛內大臣肅親王永錫署領侍衛內大臣索特納木多布齋及承辦章京國祥俱著一併交部議處嗣後遇有此等滿洲蒙古考中武進士挑取侍衛者一切升轉得項差使俱照滿洲侍衛辦理 刑部奏違例改題為奏之總督先福請交部議處得旨王劉氏著即凌遲處死王相著即處斬餘依議此案先福於

二十七日奏到時朕閱其案情係不應專摺具奏之件當即降旨交刑部查例具奏是日午刻朕披閱部本有山東寧海州民人高小商同姦婦倪許氏謀死本夫倪連榮一案由姦夫起意姦婦加功適與此案情節脗合陳預即係遵例具題當發交軍機處存記茲據刑部查明頒發條款妻妾與有服親屬通姦謀死親夫者專摺具奏註云若與平人通姦仍專本具題例文分析甚明王相與王劉氏之夫同姓不宗自應照平人姦殺之案具題先福率意改題為奏實屬違例著交部議處

甲寅諭內閣朕孜孜圖治日以因循怠玩誠飭臣工合朝王公文武大員竟無一人能體苦衷視同陌路近日自二十六日以來各衙門並無帶領引見人員本日各部院竟無一奏事之摺殊不可解或因前日九公主薨逝後朕親往賜奠一次外廷諸臣私心揣度遂以此為仰體朕懷不知似此仰體非以愛

朕乃彰朕溺愛之過也是誠何心朕辦理庶政宵旰不遑豈肯以宮庭細事稍縈懷抱況五歲幼女何足呈念致涉倦勤數日來外省奏到摺報充積案前無不應手批答隨時示諭辦事後仍照常閱射布靶豈部院各衙門多奏一二事朕即生厭倦乎諸臣太不知苦衷矣此在內廷行走諸臣常川入直本無偷安之處其外廷諸臣則多耽習安逸有一倡為仰體之論者即相率從風以遂其憚於間夜之私因循疲玩實屬萬分所有外廷行走管理部院旗營各衙門王公文武大臣堂官等俱著傳旨嚴行申飭此次各衙門有無應奏事件及應行引見人員姑從寬免其查究令伊等清夜捫心自知愧恥嗣後務痛改前非各思振奮精神勤修職業有應奏事件引見人員剋期上達勿稍延擱儻經此次訓飭之後仍蹈玩泄積習定當執法懲治不貸將此通諭知之又諭張師誠奏遵旨傳詢宋

銘據稱前在京候補道員時曾至廣慧寺與僧人明心相識並無受戒情事後在蕪湖道任內伊來募化給過銀五十兩嘉慶十七年有知府王樹勳進京來謁詢知即係明心還俗捐官等語宋銘前與僧人明心往來並無受戒情事尚不至干吏議迨後王樹勳來謁時伊身任卿貳且刑部職司法紀知係僧人朦捐職官即應參奏況曾經犯案枷杖尤為有玷名器乃匿不舉發實屬有心徇隱宋銘著交部嚴加議處尋議革職得旨宋銘於王樹勳為僧時僅與往來未經受戒與蔣予蒲有間著降三級調用補官日仍帶革職留任旌表守正被戕河南伊陽縣民張書令妻杜氏守正捐軀內黃縣民王奇峯女王氏

實錄卷三〇七

七

大清仁宗受天興運敷化綏猷崇文經武孝恭勤儉端敏英哲睿皇帝實錄卷之三百六

實錄卷三〇七

七

[illegible]

嘉慶二十年乙亥六月乙卯朔日食○丙辰

調吏部右侍郎顧德慶為兵部左侍郎以服闋侍郎帥承瀛為吏部右侍郎○命翰林院侍讀學士杜堦提督順天學政○旌表守正被戕湖北鄖縣民戴之有妻鮑氏○丁巳諭內閣前據綿志奏恒敬郡王永皓福晉呈請以本支王祀現無世職承祭當經降旨交宗人府議奏茲據詳查例案奏上並將恒溫親王襲爵家譜進呈恒親王之爵以次遞降現有奕奎襲封鎮國公惟恒敬郡王永皓福晉

著那彥成傳提遲象臣到案訊明即將全案人犯照律辦理先將遲象臣提到法場令遲孫氏眼看重責四十板再令遲象臣看視將遲孫氏斬決以為懼內庸夫之戒仍將遲象臣解回原籍令其奉養伊父遲子禮勿許外出將此諭令知之○展緩直隸大名南樂清豐三縣被水村莊積年額賦○戊午上幸靜明園○諭內閣馬慧裕等遵旨明白回奏並自請處分一摺王樹勳以犯案僧人改

名勝捐官職。海升知府在楚省多年。馬慧裕等既風聞該犯從前有為僧之說。並聞人呼為妖道。且察其才具不勝方面之任。早應據實叅奏。乃因循遷就。殊乖實心任事之義。馬慧裕張映漢俱著交部議處。○又諭。西拉布奏。從前賞給回子耕種。烏什所屬沙圖卡倫附近地畝。回子等並未耕種。現已就荒。請撥給兵丁耕種。其兵丁所種地畝。照數賞給回子一摺。此項地畝。乃從前撤兵後空閒之地。賞給回子耕種。不令納糧。今已多年。回子並未耕種。自係田地瘠薄。難以挑濬溝渠。若改給兵丁耕種。於該兵丁有何裨益。西拉布並不籌畫。及此而欲將兵丁熟地改給回子耕種。實屬冒昧不曉事體。所有賞給回子地畝。既已就荒。祇可聽其自便。若如西拉布所奏。因回子等無力。將兵丁等熟地改給回子。令兵丁等轉墾荒地。種種更張。斷不可行。西拉布甫經辦事。不循舊章。率聽屬員之言。實屬

冒昧好事。所奏不准行。並著嚴行申飭。○以直隸通永道祝慶承為廣西按察使。○己未鑄給陝西漢鳳營遊擊分駐鐵爐川汛守備關防。從陝甘總督先福請也。庚申。上御勤政殿聽政。○以詹事府少詹事吳其彥為詹事。○辛酉。諭內閣。蔣攸銘等奏管駕師船不慎。致被革兵勾匪搶失一摺。此案革兵林勇等膽敢糾約賊匪。搶奪師船。藐法已極。護陽江鎮總兵龍門協副將杜茂達追捕林勇等犯。至放難外洋。自應出其不意。潛師截擊。乃先行放礮。致賊船聞聲遠竄。其咎實無可辭。杜茂達著即摘去頂帶。責令戴罪協緝。如能拏獲正犯。奏請開復。僕復行退縮。奏明從重治罪。外委黃登著斥革。交該督等提同兵丁林茂清等審明分別辦理。○諭軍機大臣等。蔣攸銘等奏革兵林勇鄭高扶斥革名糧之嫌。糾約賊匪五六十人。在三洲外洋將升任南澳鎮總兵香山協副將羅鳳山坐船

搶去。二賊注意搶劫。本官坐船。原欲戕害羅鳳山。非為貨財也。其時羅鳳山因巡查內河。換坐小船。倖免於難。至謂該總兵僅派外委。微員管駕坐船。失於防範。不知林勇等既挾恨糾搶。即羅鳳山親身在船。亦必將該總兵挾讐戕害。若將羅鳳山革去。則林勇等轉得快其私忿。刁風斷不可長。嗣後管兵將領。遇有桀驁兵丁。或致相率姑息。殊於軍紀有關。該督等不知政體。辦理過當。將攸銘董教增

均著傳旨申飭。○癸亥。諭內閣。朕惟正人心。厚風俗。治世之本也。上之御民。不外乎德禮政刑。然刑法制於已然之後。德禮導於未然之先。則移風易俗。必自教化始。前年逆匪構亂。假邪說以煽惑愚民。以秉彝之赤子。陷溺其良心。至罹於刑辟而不悟。朕甚憫焉。歷次所頒詔旨。如遇變罪已。詔盡心竭力仰報

天恩。諭報

天恩。肅吏治。修武備。諭致變之源。說原教行實

政論。甄別賢愚。以澄吏治。諭化民成俗。諭除莠安良。詔實心行政。說皆朕深為世道人心。計出肺腑之誠。以布告中外。冀以挽回汙俗。漸返淳風。其批示臣工。章奏及面授軍機大臣書。寫宣諭者。更不啻幾千萬言。乃誨之諄諄。而化不下究者。承流之疆吏。親民之牧令。不能實心體會。所以奉行不力。阻遏於其間也。夫惟民生厚。因物有遷。綱常名教。盡人同具。古今豈有不可化之民哉。歷究邪教惑眾

之由。總不外乎斂錢謀利。利之所趨。惟義可以止之。乃今之服官者。赴任之初。不問民俗之淳澆。先詢缺分之肥瘠。及乎莅官臨民。則多方朘削。以與民爭利。彼民也。以為衣冠爵祿之儔。尚尊尊焉。惟利是圖。尤而效之。殆有甚焉。官吏減一分求利之心。民生受一分利益。上行下效。風行草偃。理不爽也。姦民乘其嗜利之隙。以邪說中之。遂蔓延不可數計矣。今欲正民風。必先肅吏治。督撫藩臬為一方

之表率不特潔己奉公幸免無過當為國家
培養民風計久安長治之策於所屬牧令以
民事之廢興民俗之邪正課其殿最其有能
興賢勸學化民善俗循績彰著者獎之擢之
無論貪酷不法者去之惟恐不速即謬託清
流賦詩飲酒不卹民生化導無術者亦不可
令其素餐尸位貽誤地方果能上下同心行
之以誠要之以久則日計不足月計有餘士
大夫以廉恥相尚百姓亦以禮義相高父詔
兄誡相與遷善遠惡以勉為良民即有一二
奸慝如投虺蜥於江海豈有能存者乎朕宵
旰勤勞日以厚生正德企望寰區諸臣受牧
民之責者當深思正本實力實心弼予以治
吏治肅而人心正人心正而風俗厚其理固
相因而致者也此次訓誡仍不動心朕之大
不幸無如之何也已矣將此通諭知之○甲
子命協辦大學士吏部尚書章煦刑部右侍
郎熙昌馳往湖北查辦事件○以禮部尚書

戴均元署吏部尚書禮部右侍郎穆彰阿署
刑部右侍郎○以翰林院侍讀史致儼署日
講起居注官○戶部議准江西巡撫阮元疏
報南昌新建高安三縣開墾田一項三畝有
奇照例升科從之○乙丑
上幸萬壽山詣
廣潤祠拈香○丙寅勅賜江南
河神黃大王廟為靈佑觀頒給
御書扁額曰功宏康濟○丁卯諭內閣御史胡
承珙奏請飭禁州縣供應公好惡以示勸懲
一摺所奏是牧令為親民之官政治得失繫
民生之休戚惟在大吏為之表率慎愛憎以
端其趨若不尚實心愛民之吏而但以逢迎
供應為能此吏治之所以日偷也督撫大吏
養廉優厚原以勵其清白之心若房舍器具
日用薪水之需皆取給於屬員或授意攤派
吹噓或苛責廚傳夫馬所屬州縣將焉取之
仍不過賸削民膏是又與大吏自取於民何

異乎。近日直省督撫奉公守法者固不乏人。矜誇服食不知檢束者。恐亦不免有則改之。無則加勉。各思無愧於心而已。至轉移風氣之法。不過舉劾兩端。各督撫於盡心民事。悃悃無華之員。相與扶持愛護。獎之擢之。其虐取於下以獻媚於上者。嚴劾而痛繩。以法舉錯既公。斯勸懲立效。循良登進。貪墨屏除。而中材之士亦感發而勉為良吏。大吏整綱飭紀。始於吏治。達於民生。實有捷於影響者。其

各砥礪廉隅。正己率屬。無負朕諄諄訓誡。至再至三之意。將此通諭知之。○又諭朱勳奏。盤屋縣知縣羅以豐。拏獲圖財謀殺多命兇犯國正元等。審明正法。並請將羅以豐及前署縣張廷桂。均革職留任。勒限緝拏逸犯一摺。知縣羅以豐。因編查保甲。窮歷深山。能將圖財謀害十三命重案訪獲究辦。乃知縣中出色能事之員。實屬盡心良牧。可嘉之至。朱勳仍請將該員革職留任。勒緝逸犯殊不足

以示鼓勵。羅以豐不但免其革職留任加恩。賞給知州銜。以為牧令實心任事者勸。朱勳即傳諭羅以豐。該縣地界南山。林深徑僻。既有此等兇惡兇徒。恐此外尚有不法莠民。仍責令盡心訪緝。其南山以內各州縣。並著一體嚴密稽查。以收除莠安良之效。羅以豐能訪獲謀財命案。尚寬其失察之咎。加銜獎勵。州縣官如能將逆案内要犯祝現等緝獲。無論在該境潛匿多日。豈惟免究。既往必當立

沛重恩。斷不可心存迴護也。署盤屋縣知縣張廷桂。失察於前。咎無可辭。著革職留任。勒限一年。緝拏逸犯國添祿。如限內無獲。照例叅處。國添祿隨同伊父國正元謀殺多命。獲日審明。著即凌遲梟示。○緩徵陝西乾州被雹村莊本年額賦。並貸籽種。○戊辰御製勤政愛民論曰。勤政為愛民之本。君臨兆庶。奚能獨理。內外公卿百官。總為治民而設也。德禮政刑。春露秋霜。皆愛民之實心也。唯

勤斯實有實心而後有實政有實政則實惠及於庶民可稱實愛矣君民一體休戚相關若疏而實親似遠而實近記曰身以體全亦以體傷君以民存亦以民亡民情大可畏也三代治世君臣交泰咸有一德民情質樸故易為治然猶兢業為懷克勤克儉不敢逸樂世道人心日流日下豈可不亟圖挽回乎今之大弊在因循大病在怠玩因循則庶政不勤怠玩則視民如草為政全無實心愛民並

無實惠慢易居心悠忽度日此等具臣即堯舜湯武遇之亦難圖治況中才之主乎予既受大寶曷敢不勤政既撫區夏曷忍不愛民雖日勤政事多有不能及於庶民者是則內外臣工勤者鮮而怠者多故不能以實心行實政視為奉行故事耳勤有二義不可不知一曰身勤日効奔走夙興夜寐直宿不誤風霜不憚身實勤矣若詢事考言茫然不解政治民生全不繫念雖勤何益外勤而內怠也

一曰心勤坐而論道事必三思好謀而成言必有中鞠躬盡瘁國爾忘家為朝廷之良佐保天下之蒸黎斯為勤之全體大用勝於身勤遠矣心勤者不待勉強出於良知殫思盡智竭力輸忱必欲致吾君於堯舜之列登斯民於衽席之上心勤之極則也身勤者迫於不得已意實不願特被入直心仍戀家所談論者非朝廷要務皆無謂之言身勤不如心勤遠矣蓋心身皆勤者誠也身勤而心怠者

偽也臣工以誠事上政事聿修實惠及民則民仰之如父母烏有作奸犯科之變哉即聞有不逞之徒亦以誠心化之實力治之則遷善改過經正民興自歸正道矣天下無不可行之政所憂者無能邪治之臣無不可化之民所慮者大半皆因循怠玩之吏所以作偽日甚也吾君臣日勤政治常存愛養之誠時戒疲庸痛改悠游之習庶幾化莠安良保民綏國孰謂三代之隆軌不能見於今世哉○

更定文職輪班直日。諭內閣、朕閱內務府則例內載雍正四年欽奉

諭旨。圓明園奏事八旗及六部都察院內務府等衙門。分為九日。每日一旗一部輪流奏事。遇直班之日。若該旗該部無應奏之事。亦著隨班伺候。僅有緊要之事。許其不論班次。啟奏。欽此。我

皇祖世宗憲皇帝勤求治理。整飭官聯。自是以後。圓明園奏事文職衙門。輪為九班。武職衙

門。輪為十班。我

皇考高宗純皇帝遵行六十餘年。朕嗣統二十一年以來。亦恪遵罔懈。誠以我朝

家法。勤政為先。駐蹕御園。與宮內辦事。從無一日少閒。部院臣僚書思對命。既應在園。曝直而衙署有應行坐辦之事。亦不可僕僕往來。致有曠誤。分班輪直法至善也。惟文職九班內。六部各衙門直班之日。俱多陳奏事件。其鑒儀衛、光祿寺直班之日。無事可奏。殊覺閒

曠。除武職十班仍照舊例外。所有文職九班著減去一班。以都察院歸入刑部大理寺。合三法司為第五班。以內務府國子監為第七班。理藩院與鑾儀衛、光祿寺為第八班。如此酌量變通。則繁簡適均。庶無一日曠閒。其事繁之部院衙門。仍不論班次。隨時來園奏事。即自本月十九日吏部直班之日為始。各照新例按班輪直。朕孜孜圖治。宵旰不遑。惟以克勤自勗。本日御製勤政愛民論宣示臣工。

諸臣務仰體朕意。各盡乃心。無忝厥職。以亮天功。以熙庶績。朕實有厚望焉。○又諭昨日朕披閱內務府進呈則例。恭載乾隆三十年皇考高宗純皇帝諭旨。內外各衙門題奏事件。遇有地名字面。理應遵照全寫。乃向來章疏祇圖省便。每將地名節稱一字。其謬不可枚舉。如熱河之但稱為熱。多倫諾爾之但稱為諾。則其尤甚者。嗣後凡有地名字面。一概全寫。不得競趨簡易。致乖體制。欽此。嗣於嘉慶

八年明亮奏烏魯木齊地方事件將下三字節去祇稱其地為烏。又經朕降旨訓飭內外各衙門自應一體凜遵。乃本日劉鑑之等奏懇留投効委員摺內將順天府節稱為留順字樣。實屬簡率。著通諭各衙門凡有陳奏事件於應載地名字面務遵照定例全行書寫。不得任聽幕胥率用省文致乖敬謹。入告之體。諭軍機大臣等御史孫世昌奏紅鬍匪徒滋害日甚。請稍寬州縣失察處分俾得從

實嚴辦一摺。安徽河南湖北等省紅鬍匪徒久為地方之害。聞近日勾結夥黨千百成羣蔓延數省。劫掠橫行。若不及早懲創。必致日久釀成巨案。百齡為慧裕胡克家方受疇張映漢當不分畛域督飭所屬文武員弁各於本境內嚴密偵緝設法擒拏訪有窩藏地棍及私通胥吏盡法懲治不得以驅逐出境即為了事。如州縣力不能制該管上司當助以威力勿使畏首畏尾動多掣肘至地方官失

察匪徒例有應得處分該督撫當明白曉諭令其認真緝捕毋稍存迴護之見。即如昨日朱勲奏盤屋縣知縣羅以豐因編查保甲將圖財謀害十三命重犯訪獲究辦該撫請將該員革職留任勒緝逸犯經朕特加恩寬免仍賞加知州銜羅以豐訪獲命案重犯尚加優擢若果該州縣等能將紅鬍要犯實力翦除豈復咎其既往而不加以恩施乎。如有能拏獲著名渠魁及餘黨多名者該督撫據實

保奏其任意廢弛縱惡殃民委曲彌縫不顧後患者查明嚴叅重懲將此各諭令知之。○已巳准文武大臣令司官筆帖式代遞奏摺膳牌諭內閣朕御製勤政愛民論宣示廷臣以心勤身勤區別誠偽蓋國家簡用大臣或以德舉或以才選原責以贊襄庶政經國治民非若侍衛羽林庶司小臣但以奔走為勞也因思朕駐蹕御園諸臣來園奏事每詢及時刻多於子初興起自城內趨直究其問夜

過早之故。則因奏摺膳牌。皆須親詣宮門呈遞。因而不致稍遲。夫人之精神。祇有此數。當亥子之交。正安神休息之時。乃已顛倒衣裳。亟亟就道。雖身勤於外。未免心怨於內。因怨生急。轉致因循庶政矣。况散直回城。已屆午刻。再至衙署辦事。以疲憊之心神。欲其遇事尋源竟委。昭晰靡遺。蓋亦難矣。部院各衙門事務。動聞朝廷之得失。民生之利害。若不悉心考究。草草畫諾。此雖終夜不寢。待漏禁門。

閒談尋常無謂之事。於國事奚裨乎。嗣後部院旗營文武各衙門奏摺。俱准令司官代遞。應遞膳牌大臣。准令筆帖式代遞。朕每日召見廷臣。本在卯正以後。諸臣俱於卯初到園。不致遲誤。屏虛文。崇實政。寬其筋骸之勞。瘁正以養其心志之敬誠。朕恕以待下。推君臣一體之懷。恐諸大臣蒙犯霜露。宵寐不遑。俾得休養心神。任重致遠。諸大臣亦當念朕未明求衣。宵旰勤劬。孜孜求治。務各竭忠殫智。

為國為民。能使庶事不虞叢脞。海宇共砥乂安。是即諸臣愛君之實效。若上以誠感下。不以誠應。但懷圖逸之心。不畏素餐之誚。則威克厥愛。愛克厥威。朕固並行不悖也。○又諭御史孫升長奏嚴拏訟師。以儆刁風一摺。所奏是獄訟之繁多。由訟師從中搆釁播弄。愚民拖累良善。並或勾通胥吏。把持官府。種種鬼蜮伎倆。為害滋甚。如該御史所奏來京上控各呈詞。字跡語句。如出一手。是其明證。朕

聞都察院衙門附近。即有山東棍窩留其閒色。攬詞訟。城外各會館廟宇中。亦有藏匿者。著步軍統領衙門。順天府五城。一體密訪嚴拏。獲犯即交刑部嚴審重懲。外省地方官亦著嚴行查禁。以清訟源。而正民俗。○庚午上幸萬壽山。○命翰林院侍講朱方增提督廣西學政。○癸酉諭內閣。吏部奏查催各省逾限未覆事件。開單呈覽。朕詳加披閱。直隸省

逾限未覆者共二十八件。該省距京最近。而積案轉較他省最多。吏部一衙門之案如此。其餘各部院咨查之件。亦多類是。實屬因循疲玩。那彥成錢臻盛泰俱著傳旨申飭。其各省未覆事件。著該部一併行文查催。均即迅速查明。送部覈辦。毋再玩延。○又諭王樹勳前以僧人犯案枷杖。遞籍後赴山東巡撫衙門干謁。其時伊江阿明知王樹勳即係僧人。明心非但不行驅逐。乃延入署內幫辦幕務。並助以厚貲。代為斂湊銀兩。朦捐官職。實屬有心玩法。如伊江阿尚在。必當重治其罪。今業已身故。姑免追究。陳廷杰彼時署理濟南府知府。即不知王樹勳係犯案僧人。以本管巡撫幕友餽送多金。亦屬有意逢迎。陳廷杰著交部議處。○甲戌諭軍機大臣等。本日據玉麟奏卡倫侍衛抵葉爾羌。並回子等所種田禾俱已成熟等情。二摺由驛遞到新彊將軍大臣等奏摺。雖應由驛遞奏。然亦不可徒

勞驛站。著交松筠。成寧通諭西北二路大臣。有奏事之責者。嗣後凡遇無關緊要之件。著積至五摺。再行由驛具奏。如緊要事件。仍不計摺數。隨時奏聞。○贈故閩浙總督方維甸太子少保銜。命江寧將軍穆克登布往奠茶酒。予祭葬。諡勤襄。賞其子舉人候補中書傳穆進士一體殿試。並免歷任應賠銀。○貸江蘇上元江寧桃源華亭奉賢婁金山川沙八廳縣上年歉收貧民籽種口糧。○乙亥

上幸靜明園詔

龍神廟拈香。○旌卹遇賊被戕山東曹縣知縣姚國梅。兄國林千總楊雲漢妻高氏。幕友監生吳星萃家人王升等二十五名。口如例。○丙子諭軍機大臣等。百齡等奏洪湖水勢盛漲。現在折展禦黃束清兩壩。並啟放山時各壩。亟籌宣洩。一摺。洪澤湖因淮河上游大雨連旬。湖水增長。高堰誌椿存水已至一大七尺。該督等將禦黃束清兩壩同時折展。以

洩湖漲並將山盱引河滾壩全行啟放以資分洩其歸江歸海各閘壩亦皆飭令啟放以暢河流亦只可如此辦理本年洪湖異漲為近年所罕有現在清水暢出會黃東注將河底愈刷愈深原屬極好形勢但伏秋大汛為日方長此後黃河亦值漲盛之時恐清黃並漲一切宣洩修防在在均關緊要該督等督率巡防晝夜勿懈務令各工穩固河流順軌安瀾其各閘壩啟放後察看情形屆應堵閉之時即迅速堵閉勿令宣洩過多下游各州縣低窪田畝被淹之處即委員確實查明奏請撫卹將此諭令知之○以故員勒銜貝子弘謙子永康降襲鎮國公○丁丑遣官祭火神廟○刑部議駁浙江巡撫顏檢審明燒棺竊物一案得旨部駁甚是此案俞瑞祥等燒棺竊取財物據驗所燒之洞自二寸至三寸有餘不等何能遽將朝珠抽取自有撬開棺蓋移動屍身情事該撫所稱並未損及骨

殖一語殊難憑信明係將賊犯罪名從輕問擬豫為地方官開脫處分類檢向來辦事疲軟經朕棄瑕錄用乃於地方盜竊案件仍縱惡養姦因循怠玩不能實力整頓又欲為部曹乎著傳旨申飭該撫即親提案犯覆加研究如有開棺見屍情節即行按律定擬具奏毋再徇庇含混自干咎戾○戊寅嚴生員好訟多事斥革例諭內閣陳預奏審擬民人李其言控案一摺此案李其言之父李應昌原控縣書李振甲等偷盜倉米等情係因生員傅煒先聲言李振甲等如非偷米何必連夜搬運次日又向生員朱芹昌告述李應昌朱芹昌遂先後具呈赴控而李應昌旋即在押病故其子李其言復控訴不休是傅煒多言肇釁朱芹昌輕聽妄控均屬不安本分有玷學校該撫將傅煒朱芹昌擬以杖責仍請照例納贖未免輕縱傅煒朱芹昌俱著斥革按律發落嗣後生員不守學規好訟多事者均

照此案辦理。○己卯諭軍機大臣等。常明等奏官兵進抵河西。力攻賊寨一摺。逆酋洛布七力自奔竄河西之後。與大頭人已耳甲結在卻至賊寨。率衆固守。抗拒官兵。總兵羅思舉等督率弁兵擒殲賊番達那太等二百數十名。上瞻對頭人格格絨太帶領中瞻對夷人郎卡次力等數人來軍前投誠。該提督等准其投誠。並傳令各旁寨頭人出見。扣留在營。飭令呈繳刀槍器械。所辦是此時番衆投誠。無不准彼之理。但夷情多詐。山路嶮巇。四處皆賊番碉寨。我兵深入夷地。該夷目等未必不心懷觀望。若我兵連得勝仗。彼自畏威助順。如大兵稍不得力。彼或仍附賊首。阻我後路。則所關匪細。該督等當檄諭各鎮將等加意隄防。切不可稍存大意。多隆武等應曉諭投降番目。令其作為前敵。而以我兵繼其後。一則以賊攻賊。可資其力。再則該番目已經與賊接仗。則一離不可復合。並可絕其反

覆。該督等務相機妥辦。將洛布七力迅速擒殲。以靖邊圉。將此諭令知之。○辛巳上詣大高殿行禮。○還宮。○以孟秋時享太廟。自是日始齋戒三日。○壬午諭內閣。潤祥等奏調劑運役懇請承買豆石一摺。坐糧廳經紀等承領腳價。除應扣款項外。辦運不無拮据。加恩著照所請。准其照大通橋車戶之例。承買黑豆二萬石。先由倉派領一萬石。俟秋閒奉天黑豆運通。再給領一萬石。所賣價銀存貯通濟庫。將例價按數扣繳。餘項酌發該經紀俾資津貼。嗣後不得援以為例。○又諭吏部具題據熱河都統咨議處前任建昌縣知縣廣慶於所屬地方賊人拒捕搶去馬匹等物一案。本內因賊犯係屬回民。書寫回賊字樣。太不成話。各省辦理搶劫之案。如賊犯係屬回民。祇須於案供內敘明賊犯某人。係某處回子。何得捏寫回賊二字。致乖文義。

著通行飭禁吏部據咨具題未經更正著傳
旨申飭其原文率行書寫職名著查明交部
察議○又諭御史孫升長奏順天府考試童
生聞有不肖廩保串通學書門斗設立私局
包攬頂替槍代等弊請查拏嚴辦等語著交
順天學政飭屬嚴查如有前項情弊立即嚴
拏究明實據將廩保從重懲處以肅考試○
又諭張師誠奏伊弟張師端因訟案釀命平
日未能約束自請交部嚴議等語張師端遷

實錄卷一百一十五

十五

居震澤有年張師誠前任江蘇藩司即不應
令其在彼居住迨上年調任江蘇巡撫仍不
飭令速行回籍以致釀成命案張師誠失於
約束咎有應得著交部議處○以右春坊右
中允查訥勤署日講起居注官○戶部議准
兩廣總督蔣攸銘疏報東莞場鹽田七十一
畝有奇改為稻田照例升科從之○癸未諭
內閣那彥成奏永定河工漫水一摺永定河
北岸七工二十四號因六月二十二日以後

雨大水長漫口塌寬六十餘丈該督現已飭
令該管河道趕緊購買料物並親赴該工查
勘此次永定河漫工距下口甚近過口門後
仍循隄外減河歸入正河尾閘現在盤做裏
頭著那彥成確實勘明俟料物購齊即行相
機堵築復歸故道其失於防護之專管通判
鄭以簡主簿邱鳳梧協防同知王履泰通判
單應魁縣丞汪兆鵬俱著摘去頂帶仍留工
効力如堵築迅速再行奏請開復永定河道

實錄卷一百一十五

十五

李于培到任甫逾一月於河務情形尚未閱
歷著加恩免其議處那彥成自請議處之處
亦著寬免俟漫口堵合將用過工料銀兩著
落該督分賠十分之三其被淹村莊並著迅
速查明奏請撫卹○又諭御史胡承珙奏請
查禁胥吏積弊一摺各衙門設立胥吏以備
使令其中良善者少姦猾者多舞文翫法不
一而足全在該管官隨時查察剔弊除姦方
足以整飭吏治近來直省大小衙門奉行不

加多有額外濫設。役滿更充等弊。如該御史所稱。撫藩衙門書吏。多索飯銀。州縣坐省家人。勾通院司書吏。表裏為姦。甚至吏役與幕友家人串通包庇。竟有習教之人。冒充吏役者。又於正役之外。濫用白役。詐贓匿盜。百弊叢生。不可不嚴行禁革。著通諭各直省督撫。實力整頓。嚴飭司道府州縣衙門。勤於職事。一切稿案。准駁俱親加判斷。不得諉任吏胥。致令上下其手。藉勢招搖。並留心察訪衙蠹。

實錄卷三〇八

三

從嚴懲辦。以除積弊。毋得因循玩縱。視同具文。○緩徵直隸通武清文安大城永清東安良鄉涿清苑滿城安肅定興新城博野望都容城蠡雄祁安新安河間獻阜城肅寧任邱交河景正定獲鹿元氏贊皇晉無極藁城新樂武邑衡水深武強四十州縣。二麥歉收。新舊額賦。旗租。並借欠倉穀口糧。

大清仁宗受天興運數化綏猷崇文經武孝恭勤儉端敏英哲睿皇帝實錄卷之三百七

實錄卷三〇八

三

大清仁宗受天興運敷化綏猷崇文經武孝恭勤儉端敏英哲睿皇帝實錄卷之三百八

監修總裁官內閣學士兼禮部侍郎等事臣等奉 上諭纂修實錄事臣等謹將纂修實錄事

臣等謹將纂修實錄事臣等謹將纂修實錄事臣等謹將纂修實錄事臣等謹將纂修實錄事

臣等謹將纂修實錄事臣等謹將纂修實錄事臣等謹將纂修實錄事臣等謹將纂修實錄事

臣等謹將纂修實錄事臣等謹將纂修實錄事臣等謹將纂修實錄事臣等謹將纂修實錄事

臣等謹將纂修實錄事臣等謹將纂修實錄事臣等謹將纂修實錄事臣等謹將纂修實錄事

校修

嘉慶二十年乙亥秋七月甲申朔享

太廟

上親詣行禮○幸圓明園○戶部議准廣東巡撫董教增疏報香山縣開墾水田二頃照例升科從之○乙酉諭軍機大臣等慶溥等奏原任廣東雷州府經歷李崇遣家人蔡福呈控蔣攸銛專擅徇私各款一案已明降諭旨交章煦等查辦矣此案李崇因大計叅劾浮踪臚列款目呈控總督遣人到京投遞章煦等於襄陽審案事竣即馳赴廣東秉公確查

如蔣攸銛實有專擅徇私情弊即據實叅奏

治蔣攸銛以應得之咎若所控各款係任意

摭拾全無實據則李崇本以貪劣被劾又計

圖反噬此等刁風斷不可長著章煦等即將

李崇從重定擬仍在廣東地方量加枷號以

儆官邪即所控事非全虛該革員以被劾訐

訴其本罪亦難末減將此諭令知之○以大

理寺少卿韓鼎晉為太常寺卿仍留陝甘學

政任○戶部議准廣東巡撫董教增疏報高

要高明開平三縣開墾荒地二頃三畝有奇

照例升科從之○除福建臺灣縣沙壓地畝

一百七十甲有奇額賦○丙戌諭內閣御史

王嘉棟奏嚴禁書吏包攬錢糧一摺直省州

縣徵收錢糧例應令民自封投匭官給印票

若書役包徵或訛索糧戶或侵虧國帑弊實

叢滋本律有明禁但欲令地方官於銀糧俱

親自經手不用吏胥亦勢有不能各督撫惟

當飭令州縣官嚴行約束如有包攬把持等

獎立即查拏按律嚴辦以除奸蠹又諭興肇等參奏參領甘運潔濫刑請交部議處一摺甘運潔奉派押旗赴倉支領甲米因馬甲佟澤濤脫去衣帽與倉內人等匪言嬉謔加以鞭責並無不合若以時當盛夏議其苛刻則有約束兵丁之責者皆心存畏忌何以馭衆興肇策撈桑吉斯塔爾因循疲軟不曉事體俱著傳旨嚴飭參領甘運潔毋庸交部議處如該馬甲因鞭責受傷殞命該都統等再將參領參奏刑部議奏浙江巡撫顏檢審擬結會匪徒一摺得旨此案劉奎養聽從在逃之謝幘勳糾入添弟會給與祕書一本書內語句悖逆處甚多顏檢既經起獲即應向該犯等追究係何人編造作何行用即該犯等供係康熙年間洪二和尚即萬提喜舊事亦應向輾轉抄傳之人嚴切根究顏檢僅將該犯等照復興添弟會名目加重問擬斬決並未嚴究該犯等有無謀為不軌情事實屬

革率本日刑部又查參顏檢將強盜輪姦婦女應專本具題之案違例改奏顏檢因循疲玩總不能改姑著交部議處其承審劉奎養一案之布政使額特布署按察使景臨知府涂以輅同知瑞齡知縣陸玉書均屬疲玩無能俱著交部議處著顏檢即親提該犯等照刑部簽出書內各情節逐一嚴訊確情定擬具奏並向該犯等嚴究此書抄寫計若干本傳布何人盡數起獲與現獲之書一併咨送軍機處覈明銷燬以絕根株逃犯謝幘勳並著嚴緝務獲毋令漏網丁亥上幸萬壽山諭內閣本年十月皇后四十壽辰一應禮儀俱照常年舊例王公大臣官員仍穿蟒袍一日不准呈遞如意貢品其內務府大臣官員著於初九初十一穿蟒袍三日內務府大臣准其呈遞如意食品至例應行禮之福晉格格命婦等屆期由內務府大臣開單具奏經朕圈出者准其

進內行禮其出聘外藩之格格等俱不准籲請來京行禮亦不准呈進貢品○戊子諭軍機大臣等昨據武隆阿等奏拏獲假藉太監名色捏造部照之劉碧玉等當經降旨飭令該督撫將劉碧玉等五犯派委妥員迅速押解來京將太監林表等交軍機大臣會同刑部審訊復於林表行李內起獲福建都司陳龍光信一件開寫現奉制軍奏補邵武右營都司煩為查經事之當該先生託其應成於

到京之日自當言謝等語訊據林表供稱陳龍光係福建千總五六年前進荔枝貢與之認識寄來書信託向兵部打點伊不認識兵部之人未經應許等語陳龍光以現任職官乃因差便與內監交結往來實屬大膽又於奏升一事囑託打點兵部書吏均干法紀著該督撫即傳旨將陳龍光革職拏問先行研訊錄供具奏一面派員將該革員押解與前旨飭解之劉碧玉周光遠吳光喬劉桂楊八

老五犯一併迅速解交刑部歸案審辦將此諭令知之○又諭馬慧裕等奏拏獲習教斂錢傳咒各犯審訊大概情形一摺此案孫家望聽從戴添幅等倡言青蓮紅蓮白蓮教名目並有朱元係彌勒佛臨凡李朱為教頭之語膽敢拜師念咒習教斂錢並輾轉傳授楊添玉等不法已極除朱元李朱二犯現已另降諭旨交胡克家嚴緝務獲外所有現獲各犯著馬慧裕等即嚴行審訊按律定擬具奏

麻城縣知縣翟中倫巡檢孫紹棠緝獲匪犯尚屬能事著於定案時將該二員保奏以孫家望等罪名之輕重錄其功績之大小俟奏到時再行量予施恩將此諭令知之○又諭御史高翔麟奏嚴禁私米出洋一摺各省濱海地方私販米石出口例禁綦嚴而射利奸民往往託販賣海鮮為名潛裝米石夾帶偷運地方官不加查察或營弁差役知情故縱牙僧囤積私齎盜糧以致內地米價日增著

通諭沿海各督撫嚴飭地方文武員弁實力稽查有犯必懲不特海洋無米接濟可杜盜源而內地米穀無處偷漏糧價自見平減於民食大有裨益也將此諭令知之○乙丑舉行嘉慶十九年大計安徽卓異官八員才力不及官二員年老官二員浙江卓異官十二員浮躁官一員才力不及官一員年老官五員有疾官二員山東卓異官十二員罷軟官一員才力不及官一員有疾官二員年老官七員江西卓異官十一員罷軟官一員浮躁官一員才力不及官一員不謹官一員年老官三員有疾官三員分別議敘處分如例○旌表守正被戕四川太平廳無名女子○蠲緩直隸東安武清二縣被水村莊本年額賦有差○庚寅諭內閣昨查抄太監林表什物內有都司高明德名條當交刑部提訊林表據供向來圓明園營汛都司到任俱用名條來拜總管及花洞首領係相沿舊規等語我

朝綱紀肅清太監人等從不准與外廷官員結交來往高明德身係營員與內監毫無交涉事件乃持帖往拜實屬多事本應交部治罪念係歷任相沿不自高明德始姑從寬免究著步軍統領左右翼總兵通飭各營員概不准與內監投刺往來自飭禁之後如再有違犯者必當從重治罪並將失察之步軍統領總兵等懲處不貸○辛卯

上御勤政殿聽政 諭內閣御史孫世昌奏查

禁漏米出城以杜回漕一摺其所請於各門出米時按照保甲冊檔稽查之處是否可行著步軍統領衙門議奏至運河口岸運米上船之處及附近寺觀空房囤積米石著直隸總督順天府分飭地方官嚴密稽查如有奸商在彼私囤裝運即行嚴拏究辦○又諭那彥寶等奏查明商都達布遜諾爾併達里岡愛馬駝各羣數目一摺此時達里岡愛倒斃馬駝為數過多實屬經理不善所有左翼翼

領棍布達什右翼翼領都拉木扎布等均著交部嚴加議處仍照例扣餉賠補其存貯皮張損壞裁改之牧長阿雅拉希里楚圖木奇蘇倫達什呢瑪多爾濟等著革去牧長各鞭責八十以示懲儆惟左翼駝羣牧長阿扎拉所管駝羣孳生駝駒數逾均齊定額著加恩賞給六品頂帶仍食原餉至該官兵等扣留賠補銀兩俱應自嘉慶二十一年起限但此次倒斃騾馬四羣之官兵等尚有十六年案

內應扣之項此時若將二款同時並扣恐該官兵等無以資生著加恩俟二十六年扣完前項後再接扣此次應賠之項按限歸款餘俱照所議辦理○以通政使司副使甘家斌為光祿寺卿○旌表守正捐軀山西寧鄉縣民劉氣口妻張氏靈石縣民馬中耀妻張氏

○壬辰

上幸靜明園詣龍神廟拈香○諭軍機大臣等昨因太監林

表林顯緣事犯案查抄伊等房內什物字跡在林顯處抄出信稿一件訊據供稱十七年二月間兩淮鹽政阿克當阿次子關敏前往揚州時伊令劉姓寫此信稿面交帶往後來總未接阿克當阿復信並稱伊弟林媽定回福建時伊又寫信給阿克當阿囑於伊弟路過揚州幫助盤費阿克當阿門上不肯接信林媽定即將信帶回福建又稱阿克當阿十四年來京時伊往送食物阿克當阿曾令次

子關敏給伊銀二十兩等語阿克當阿係現任鹽政不應收受太監食物亦不應給太監銀兩關敏赴揚州時林顯囑帶書信及米二袋曾否帶至揚州將此事告知阿克當阿又林顯之弟林媽定往揚州投信時所見該鹽政管門家人係何姓名伊曾與林媽定見面記得林媽定係何年貌該家人將書信駁回後曾否告知阿克當阿以上各情節著阿克當阿詳細明白回奏將此諭令知之○癸巳

孝懿仁皇后忌辰遣官祭

景陵諭內閣御史蔡炯奏翦除城上自生樹株以固城垣一摺所奏是京師內外城垣如有自生樹株例應翦除以資鞏固著步軍統領衙門派員將京師內外城垣堆堞逐加查勘所有自生樹株一律翦伐淨盡不得惑於形家之說私自留遺嗣後即責成步軍統領等督率周查如有根荄復生隨時剔除儻日久視為具文定行懲處不貸又諭御史蔡

炯奏請令州縣刊示律條曉諭編氓一摺所奏不可行國家明罰勅法頒行律例歲定爰書如奸盜叛逆各條雖至愚之人豈不知犯之者必罹重典乃作姦犯科之莠民仍不絕於世此乃明知故蹈非盡陷於不知也刑書之鑄自昔所譏惟在地方官實心化導使民遷善遠惡則犯法者少若欲將法律科條責令家喻戶曉則民可使由不可使知豈非徒勞罔益乎該御史所奏著毋庸議甲午以

勦辦四川逆番事竣提督多隆武總兵官羅思舉下部議敘賞屯守備郎爾結屯千總阿思甲巴圖魯名號道員李堯棟同知王世燾遊擊造喜黃玉堂守備許文通千總楊忠花翎知縣葉懋勳等藍翎及德爾格武宣慰土司策旺多爾濟二品頂帶花翎餘升敘有差旌表守正捐軀浙江海寧州民平振南妻許氏丁酉諭內閣御史巴齡阿奏請嚴禁私放官債一摺候補候選官員在京借用重

利私帳及放債之徒勒捐盤剝本干例禁著步軍統領順天府五城各衙門嚴行查禁如有違例私設帳局者即行拏究其潛赴外省官員任所索欠者該督撫訪聞一併查叅究治刑部奏審擬革兵齊太等挖竊河隄鐵扣拒傷河兵一案得旨此案已革兵丁齊太與伊弟齊榮挖竊河隄鐵扣被河兵王泳青查見追捕齊太拾石拒捕擲傷王泳青右肱肘王泳青仍行追捕是齊太所擲一傷本不

甚重追齊榮復用石擲傷王泳青左太陽始
行側跌倒地齊太遂獨自轉回將王泳青推
落河灘用鎌刀割落左耳頂傷胷左乳立
時殞命王泳青之死雖係齊太下手實由齊
榮加功刑部將齊太照拒捕殺人律擬斬監
候因該犯漏網多年改擬斬立決係屬按律
辦理將齊榮僅照拒捕為從律擬以杖流殊
屬輕縱齊太著即處斬齊榮一犯著刑部另
行定擬具奏○戊戌中元節

上詣

安佑官行禮○遣官祭

永陵

福陵

昭陵

昭西陵

孝陵

孝東陵

景陵

泰陵

泰東陵

裕陵 遣官祭

孝淑皇后陵寢○遣官祭

端慧皇太子園寢 諭內閣本月十五日恭

祭

裕陵經朕特派儀親王永璘前往行禮因本年
係儀親王七十壽辰承祭後並可藉展私忱
在

皇考高宗純皇帝及附葬之

淑嘉皇貴妃前虔申叩謁儀親王備悉朕意

深為感激懇請先期於初十日起程儀親王

自乾隆年間在內廷時屢充祭

陵差使豈不知起程均在寅卯之間至遲不逾

辰刻昨據儀親王奏稱初十日午初始行起

身已失誠敬之義况雨勢漸大必應及早渡

河趕至烟郊乃住宿通州次日至通州北門

外河水業已漲發其同時派出之鄭親王烏

爾恭阿等俱因初十日早間陰雨趕緊行走於河水未發之前已經過渡儀親王起行遲緩之咎無可辯矣迨十一日不能過渡即應於十二日差人齎摺據實奏明其應另行派員行禮之處候旨飭遵仍一面在彼守候俟河水消落立即進行方合敬事之義乃儀親王並不差人具奏請旨率行回京並自向明亮告知行文貝勒永錫代為行禮實屬愒耄本應革去親王降為郡王念係朕長兄年已七旬朕心實不忍加以重譴著將伊子綿志前賞加郡王銜及賞加歲俸銀一千兩俱行革去仍照貝勒品級支領原俸其議罰親王俸十年之處加恩改為五年用示薄懲至景綸甫經襲爵當差經朕派令致祭端慧皇太子園寢其到通州已在儀親王之後旋即隨同回京甚屬懶惰不堪雖復行轉回無論趕到致祭與否均難寬恕景綸毋庸罰俸著革去公爵降為四品閒散宗室其應

襲公爵著宗人府照例辦理諭軍機大臣等朕聞豫省汝光一帶紅鬍匪徒頗為猖獗本年三月間光息交界五福橋地方捻子手百餘人手執長槍前往互鬪並挾有一丈餘長之擡鎗經過市場人皆分道讓路不敢聲言仇殺多人亦不報官州縣官下鄉必以民壯數百人執械隨護即衙門差役中亦有匪徒在內地方官慮激成事端不敢十分窮詰方受疇到任後亦曾飭拏巨惡十餘名但其風尚未斂戢方受疇由浙江調任河南前年滑縣逆匪滋擾非該撫任內之事現在戢暴安良綏靖地方則係方受疇專責伊伯及伊弟兩任總督伊又身任巡撫俱受兩朝厚恩今地方有此巨慙不可不嚴拏重懲竭力整頓以圖報稱如畏激成事端則該匪徒恐不畏法斷難望其改悔此時不過無賴惡少糾集成羣計圖劫奪一經查拏即駭走星散縱或恃衆抗拒地方文武協力帶兵勦

捕亦屬易事若因循不辦則該匪徒醜類益衆氣餒益張養癰貽患其害更大方受疇不可存畏難之見務與藩司姚祖同臬司琦善同心努力設法妥辦免戢洩風為要朕又聞前任息縣知縣李仲白官聲素好最能緝拏紅鬚該匪徒銜恨既深串人誣控罷職著方受疇確查李仲白居官果否賢能緝捕果否勤幹如實係得力之員其被控之案或係因公並無真實劣蹟即奏明量予寬宥責令嚴

緝匪徒以收實效將此諭令知之○己亥諭內閣昨儀親王遲誤祭期率行回京書寫字帖交明亮令其由兵部知照永鎬代祭明亮自應即時奏明請旨乃徑將儀親王所交字帖由部遞發明亮何不曉事乃爾若王公大臣等率將事件交兵部轉行兵部即代為郵遞成何事體明亮著交部議處刑部奏審擬林表等一案得旨此案林表林顯林媽定均係臺灣逆匪林達之子例應緣坐林表林

顯因年未及歲解京閹割充當內監本屬免死之犯理宜安靜守法乃喚令伊弟林媽定來京又擅留伊戚劉碧玉在花洞居住將大內膳單戲單聽其攜至臺灣借勢招搖林媽定漏網倖免緣坐林表等輒為娶妻冀圖生子延後林媽定復將劉碧玉留給噶瑪蘭田簿託人打點種種不法林表林顯林媽定均著照律斬監候歸入本年朝審情實辦理已革侍衛林寅登身係職官與林表等往還並

將林媽定所交噶瑪蘭田簿攜回寓所不行送官究辦僅擬杖流尚覺輕縱林寅登著改發伊犁俟劉碧玉等解到質訊後再行發遣已故織造和明之子內務府員外郎慶琛曾給林顯紗料候補主事普琳於林媽定過蘇州時付給銀三十兩均屬不合慶琛著降為主事普琳著降為筆帖式餘依議旌表守正被戕廣西容縣民車惠文妻祝氏江蘇通州民陳寶光女陳氏庚子

上幸萬壽山詣

廣潤祠拈香○諭內閣景綸奉派於七月十五日祭

端慧皇太子園寢乃於十三日自通州回京又復轉回計其必誤祭期降旨將伊革去公爵示懲茲據永弼奏稱景綸於十五日卯刻以前趕至朱華山承祭未誤是其過止於起程遲緩及率行回京尚可量從寬議景綸著加恩復還公爵○罰公俸二年○又諭御史王

維鈺奏變通衛用員弁以重營伍而疏銓選一摺所奏是各省額設守備營缺多而衛缺少近年衛千總俸滿引見遇朕駐蹕熱河留京王大臣驗放概以衛缺請旨錄用從無用一營缺者以致營守備選補乏人衛守備又形壅滯殊屬兩無裨益嗣後王大臣驗放俸滿衛千總除弓馬平常者仍以衛缺用外其年力精壯弓馬可觀者即於摺內聲明請旨以營缺錄用俾武弁得以及時自効於銓法

亦可疏通○又諭御史吳廣枚奏謹蓋藏實倉廩一摺本年直省地方年穀順成多登上稔所有常平社倉缺額穀石自應及時完補著各該督撫督飭州縣官酌量地方情形將動缺穀石妥為買補以歸實貯仍隨時嚴查毋令吏胥滋弊至販米出洋本干例禁屢經降旨江浙閩廣督撫嚴密稽察務各實力奉行毋稍疏懈○以故喀爾喀扎薩克貝勒納木薩賴扎布子沙克都爾扎布青海扎薩克

貝子車爾登多爾濟子喇特納錫第各襲爵○辛丑諭內閣御史葉申萬奏各省藩庫借款易滋弊混請旨嚴飭清釐一摺所奏是直省藩庫錢糧國帑攸關絲毫不容擅動乃向來各藩司因州縣有急須支給之項本款銀兩未到另將別款借給迨日久未歸又輟轉挪抵以致借款繁多奸胥猾吏影射朦混弊端百出不可不嚴行查禁著各督撫查明從前已經借出各款督令現任藩司上緊清釐

催追還款毋許遷延時日希圖升調後諉之
後任嗣後概不許擅行挪借如有藩司私准
州縣借動挪移者該督撫一經查出即將該
藩司及該州縣一體嚴參毋稍徇縱○旌卹
遇賊被戕山東金鄉縣監生李玉龍女李氏
如例○旌表守正被戕直隸新樂縣民梁自
貞女梁氏○壬寅

上詣

安佑宮行禮○緩徵河南睢寧陵二州縣舊欠

額賦○癸卯

上以秋獮木蘭自圓明園啟鑾命

皇次子智親王○皇三子綿愷於八月初旬

赴熱河隨駕進哨○命肅親王永錫大學士

曹振鏞協辦大學士尚書明亮尚書英和景

安蘇楞額留京辦事○以故貴州定番州屬

程番長官司程仁澍子連級湖南石門縣添

平所龍谿隘土把總鄭武鉅子平略各襲職

○旌表守正捐軀山東泰安縣民孫言稽妻

張氏免蹕路經過地方本年額賦十分之
三○是日駐蹕南石槽行宮翼日如之○甲
辰除江蘇寶山縣築塘占廢地畝額賦○乙
巳以橋道平固賞還直隸總督那彥成雙眼
花翎○旌表守正捐軀河南信陽州民李金
良妻羅氏○賞密雲縣接駕兵丁半月錢糧
搭橋兵丁一月錢糧○是日駐蹕密雲縣行
宮○丙午駐蹕要亭行宮○丁未賞南天門
等處搭橋弁兵銀緞有差○是日駐蹕兩閒

房行宮翼日如之

乙酉賞熱河接駕兵丁

及看守避暑山莊弁兵一月錢糧看守口內

口外各行宮弁兵半月錢糧○是日駐蹕常

山峪行宮○庚戌諭內閣刑部郎中程祖洛

在部年久於刑名尚稱熟悉朕所素知是以

於該員記名道府後未經簡放茲吏部將該

員擬選甘肅平涼府知府刑部以程祖洛總

辦秋審並承審逆案未便遽易生手奏請留

部扣選並聲明現在業經裁缺例不准見缺

保留等語。吏部銓選定例，不准見缺保留。其意原恐應選人員一經截缺，如選授美缺，即徑行赴任。若遇缺分清苦，遂藉詞奏留，巧為趨避。刑部如因程祖洛在部得力，何不早行奏明扣選，乃於該員既選平涼府之後，始行保留。顯係因甘肅地瘠缺苦，始為此奏。若係美缺，未必保留矣。刑部堂官俱著交部議處。所有程祖洛京察截取記名以道府用之處，俱著註銷。平涼府一缺，吏部另行銓選。程祖洛仍著留刑部郎中之任，辦理部務，永不外用。如果始終奮勉，酌量施恩而已。○步軍統領奏傳審匿名控告俞姓重利放帳一案，得旨：此案匿名揭帖所控俞姓圖典旗人錢糧重利放帳等款，經英和等派委員役搜查俞琇米鋪，並無借約帳簿。研訊俞琇委無典買旗人錢糧重利放帳之事。訊以平日與何人有嫌，供出覺羅松安德吉曾經借錢，不遂情有可疑。據稱傳到松安德吉磨對筆跡，松安

所書筆跡不相符合。德吉筆意間有彷彿，而用筆輕重迥不相同。等語。德吉筆意既間有彷彿，正當從此根究。若謂用筆輕重不同，則作字儘可時輕時重。奸宄之人，豈肯一律書成，自取敗露。英和豈不知作書者乃率令保回寶屬，錯誤著傳旨申飭至步甲正興將德吉帶回交伊兄德紳收管。德吉至都統衙門前口稱進內知會本旗，不過頃刻，閒一言可了。何至自己至申四時之久。該步甲不見德吉，出署始行查看。德吉已由都統衙門後門逃走。此言斷難憑信。顯係該步甲有心故縱。著一面嚴拏德吉務獲，先將步甲正興及德吉之兄德紳並伊家人李二提案審訊。如究出故縱情弊，先行按律治罪。○旌表守正被戕廣西荔浦縣民潘士成妻潘氏。○是日駐蹕喀喇河屯行宮。○辛亥，上至熱河，詣文廟瞻禮。

關帝廟

城隍廟拈香○詣

永佑寺行禮○賞熱河綠營兵丁一月錢糧○

是日駐蹕避暑山莊至八月丁卯皆如之○

壬子舉行嘉慶十九年大計江蘇卓異官九

員才力不及官三員年老官三員有疾官二

員浮躁官一員陝西卓異官七員才力不及

官一員不謹官一員浮躁官一員年老官四

員甘肅卓異官八員罷軟官一員才力不及

平糶卷十八

主

官一員有疾官二員年老官四員分別議敘

處分如例○旌表守正捐軀四川新津縣民

岳金應妻王氏

大清仁宗受天興運敷化綏猷崇文經武孝恭
勤儉端敏英哲睿皇帝實錄卷之三百八

實錄卷三百八

末

大清仁宗受天興運敷化綏猷崇文經武孝恭勤儉端敏英哲睿皇帝實錄卷之三百九

欽定四庫全書

臣等謹將該部奏請將該犯等處分各案分別開列謹錄於後

一、前據該部奏請將該犯等處分各案分別開列謹錄於後

一、前據該部奏請將該犯等處分各案分別開列謹錄於後

一、前據該部奏請將該犯等處分各案分別開列謹錄於後

欽修

嘉慶二十年乙亥八月癸丑朔諭軍機大臣

等李奕疇奏江西九江後幫旗丁徐甲魁剝船於六月二十七日夜在萬年閘地方有眾賊強搶木植丁船知覺趕逐被賊率眾拒捕將該丁親屬黎昌厚股其才趕打下河淹斃並毆傷譚紀廣腦後該幫弁帶領壯丁追緝該匪等逃竄無蹤旋經嶧縣會營緝獲孫狗徐成王二撐王青狗四名現在訊供餘犯仍飭緝拏等語各幫剝船隨同正船行走即與糧艘無異該匪等膽敢糾眾強劫聞拏拒捕

致有二死一傷實屬目無法紀著陳預一面先提現獲各犯訊究盜首一面嚴飭地方文武上緊將逸犯偵緝木植一項非比尋常賊物難以暗運潛藏一經得有賊據即可從此根究盜蹤按名緝獲獲犯後該撫審訊明確即從重定擬以靖盜風而安行旅將此諭令知之○甲寅諭內閣阿克當阿奏請交部嚴加治罪並自行議罰一摺阿克當阿前在內務府當差與太監等閒有認識迨蘭放鹽政即當引嫌不應仍與太監交接乃收受林顯饋送食物給與銀兩以致林顯敢於致書通問其所稱管門家人將林姓所投書信駁回未曾告知一節亦屬虛詞不可為信林媽定路過揚州前往投書封函未啟該門丁何以豫知係太監書信先行駁斥若謂阿克當阿於親友往來信札概不接收尤無是理姑免深究阿克當阿無庸交部治罪著即降為內務府郎中頂帶其自請罰銀一萬兩不過仍

係派累商人亦無庸呈繳兩淮現有應解內務府銀七十餘萬兩屢經飭催延不交納著即上緊批解勿再遲玩干咎○又諭近來河南安徽湖北三省交界地方不法匪徒糾眾肆劫擾害良民有紅鬍子白撞手拽刀手等名目不可不嚴加懲創以儆兇頑著刑部做照四川省囑匪之例從重定擬罪名另立專條奏明頒示該三省一體遵行尋議嗣後三省地方紅鬍子白撞手拽刀手等如糾夥五

人以上在場市肆行搶劫者不論曾否得財照光棍例為首擬斬立決為從擬絞監候若拒捕傷人首犯即行正法梟示在場加功者俱擬絞立決同謀搶奪並未在場者擬絞監候其在野攔搶未經傷人之案除實犯死罪外數在三人以下不分首從俱發極邊烟瘴充軍如四人以上至九人者不分首從俱發伊犁分給官兵為奴若十人以上無論傷人與否為首擬斬立決為從擬絞監候被脅同

行者發烏魯木齊給官兵為奴僕有殺人奪犯傷差等事即將首夥各犯分別斬梟絞決監候從之○又諭廣厚奏遵旨將邵陽縣知縣徐維麟解任候提到刑禁書吏人等隔別嚴訊如有刑逼教供別情即行據實奏等語前據廣厚奏邵陽縣盤獲形跡可疑之李和即劉呈一犯覈其年貌與單開劉呈祥相似該撫因其病斃剖取首級委員解京查驗經刑部堂官監提董懋太等詳加辨認實非

劉呈祥即林清逆黨內亦無似此面貌之人此案如果董懋太等指認為劉呈祥首級恐其開脫逸犯其言或未可深信今堅稱非是義無可疑廣厚接據稟報並不詳覈供詞亦未查驗屍傷有無刑逼教供情弊輒將疑似之人戮屍傳首實屬冒昧糊塗廣厚著交部議處解任知縣徐維麟及刑禁書吏人等俟該撫訊明奏到時再行覈辦○旌卹遇賊被戕山東定陶縣知縣賀德瀚幕友朱樹堂典

史孫世緝子述祖如例○乙卯

上御如意洲賜扈從王公大臣蒙古王貝勒貝子公額駙台吉等食並賞賚有差○諭內閣向來秋獵啟鑒後京城得有雨澤留京辦事王大臣皆具摺附報奏聞本日佛住恩寧前來熱河經朕召見詢問京城晴雨情形據稱京城於七月二十四日傍晚大雨竟夜滂沱至二十五日早開始行開霽伊等經過蘭溝懷柔密雲等處積潦在途橋座多已衝損乃

連次本報留京辦事王大臣均未奏及又七月十九日圓明園有太監自戕受傷一案在京之內務府大臣自二十日即行審訊遲至本月初二日始行具奏朕召見和世泰禧恩據稱此案久已訊結因事非吉祥是以途次及到熱河第一次報便均未附奏是何居心又形怠惰矣朕每日批閱外省章奏其中刑名案件甚多何所用其避忌況此次啟蹕後將發報日期改為口內一日一報口外二日

一報原以京城之事隨報具奏可以及早聞知乃留京辦事王大臣總管內務府大臣等仍不改因循疲玩之習大屬非是所有留京辦事之肅親王永錫大學士曹振鏞協辦大學士尚書明亮尚書英和景安蘇楞額及總管內務府大臣那彥寶常福俱著傳旨申飭○諭軍機大臣等首齡奏審訊混寫妖言之問至倫一案查訪齊全悉屬空捏並應覆詰明確按律嚴辦一摺此案問至倫素患瘋證編造訛言希圖得賞所供謀逆各情毫無實據業經該督逐處查明委係妄捏該犯亦供認虛誣不諱前經降旨令百齡覆加審訊按律問擬斬梟奏明請旨正法不必令張師誠赴江寧會審此次該督拜摺時尚未接到前旨現在既已查訪齊全案無疑義該督即遵照前旨按律定擬具奏請旨正法以息妖言其黏貼逆詞正犯該督務督飭所屬上緊訪拏不可以偽亂真致令狂悖逆犯久稽顯戮

也將此諭令知之○丙辰遣官祭

文昌帝君廟○緩徵陝西鄜州被雹村莊本年額賦○丁巳祭

先師孔子遣大學士曹振鏞行禮○戊午祭

大社

大稷遣成親王永理恭代行禮○諭內閣前據那彥成奏拏獲逆犯劉第五之妻閻氏訊據該犯婦供稱伊於十八年九月逃走後十一月捏稱崔姓嫁與姜得富為妻曾告知係劉

第五之婦姜得富畏懼將伊送入都中雇與李鐵拐斜街姚姓家傭工至十九年四月回家等語十八年冬至十九年春夏間正飭拏逆犯緊要之時乃劉第五之婦以律應緣坐之犯近在京城藏匿該管地方官毫無覺察實屬疏縱該犯婦現已解京著刑部堂官覆訊該犯婦於何日到李鐵拐斜街姚姓家傭工何日辭工出京知照都察院堂官將彼時該管巡城御史及司坊官查明參奏候旨交

部分別議處以示懲儆前曾降旨以緝獲逆

犯之後其從前失察在境藏匿之咎概行寬

免原指本境該管官自行拏獲者而言若經

他處緝獲則從前漫無查察者其咎實無可

逭近日京城緝捕各衙門及外省地方官詢

及查拏逆犯一事總以編查保甲甚為嚴密

實無逆犯蹤跡為詞不知各逆犯自問罪大

惡極法所不宥必皆更名改姓輾轉掩藏如

閻氏一犯在都城市闌輻輳之區隱匿多日

以此類推則謂輦轂之下奸宄淨盡豈復可

信著通飭步軍統領順天府五城各就所轄

地面設法嚴查遇有外來之人務詳究來歷

毋令不法之徒涸跡市廛致有求之千里失

之目前者經此次飭諭之後若仍復玩泄將

來逆案正犯由別處緝獲究出經由藏匿之

處必將該管官嚴懲不貸○乙未遣官祭

關帝廟○賞熱河及額魯特兵丁一月錢糧

○庚申遣官祭昭忠祠○諭內閣喜明等奏

請將管理前藏糧務同知貢布賞給知府職銜一摺。管理前藏糧務成都理事同知貢布前經瑚圖禮等奏留。俟三年後送部引見。原降諭旨甚明。該員引見時。朕察其才具。或以知府升用。或仍以同知用。自有權衡。非臣下所能豫定。即該員在藏編查保甲。稽查認真。亦係分內應辦之事。喜明等率行保奏。請賞給知府職銜。是豫擬以知府升用。實屬冒昧。喜明。珂什克。俱著交部議處。貢布不准加知

府銜。俟期滿後。仍遵照前旨送部引見。候旨定奪。○又諭。刑部奏覆訊廣西誤行拏解之劉錦堂。據供伊因署平南縣。知縣張泰交係其同鄉。到縣署遞稟求幫。經該縣押令跪鎖上椿熬審兩日。伊受刑不過。遂照縣官所問供認等語。劉第五係逆案内要犯。如果地方官能將正犯緝獲。質訊明確。不拘何省何官。朕必立霽恩施。乃知縣張泰交於劉錦堂至署求助。輒用刑訊逼供。令其誣認。試思劉錦

堂若果係真實逆犯。方將避匿之不遑。焉敢徑往縣署。面見縣官。自投法網。該縣原報由太平里山洞捉獲。尤屬捏飾。該縣令似此屈陷平民。詐偽貪功。豈可復留民社之任。署平南縣事賀縣知縣張泰交。著即革職。劉錦堂俟廣東省查明覆奏到日。果與原供相符。再行釋放。○辛酉。

太宗文皇帝忌辰。遣官祭

昭陵。○壬戌。諭內閣。給事中傅棠奏請禁民間

佩帶小刀。以省命案。一摺。小刀為隨身佩帶之物。貴賤皆同。並非兇器。各省關畝命案。間有順拔身帶小刀。適傷致斃者。豈得因此設為厲禁。況傷人器具。非獨金刀為然。如瓦礫之時。拾取甄石。俱可斃命。安能將各處甄石概事屏除。至手足傷人者。又將何法以禁之。耶。該給事中書生之見。所奏迂繆。不可行。原摺著擲還。○諭軍機大臣等。方受疇奏設法嚴拏紅鬚匪徒一摺。豫省汝光一帶。紅鬚捻

子手等擾害地方。必應嚴拏懲辦。惟用兵力剿捕。則斷無此辦法。該匪徒等當販私肆掠。時自必聚集多人。肆行不法。至其平時仍散處村落。自附齊民。非如邪匪之勾結夥黨。聚而倡亂者可比。此時若徵兵掩捕。伊等必聞風逃逸。及至徵伍後。仍復出而為匪。是調兵一節。不特事涉張皇。亦於捕務實無裨益。此事全在地方官時刻密訪嚴拏。遇案即辦。重法嚴懲。日久不懈。匪徒自漸就斂。或遠派

文武幹員。自帶兵役。於要隘處所專駐巡防。事尚可行。至署息縣知縣朱邦達。署新蔡縣知縣楊廷際。既能認真緝捕。著照所請。該二員遇有汝光所屬知縣。不論繁簡缺出。准其儘先揀補。其紅鬍匪犯劫掠姦淫情罪本重。昨已降旨。令刑部做照川省辦理囑匪之例。加重另立專條奏明。頒發遵行。該省嗣後審擬紅鬍等項匪犯。即照新例審擬。並准專摺具奏。將此諭令知之。○以故奉恩將軍喀勒

沖依子奎朗襲職。戶部議准。署廣西巡撫葉紹桂疏。報天保縣開墾水田三十三埧。有奇。照例升科。從之。○癸亥。

太祖高皇帝忌辰。遣官祭。

福陵。○展緩山東曹定陶二縣帶徵漕糧。○甲子。諭內閣。給事中傅棠條奏。慎重漕務。剔除積弊一摺。其寬地方官處分。嚴辦匪棍。以安運丁一條。匪徒私結黨與。隨幫行走。勾串舵工水手。勒詐滋事。原應嚴拏懲辦。沿河地方

官果能實力查拏。自不至干吏議。若將失察處分先行寬免。伊等視為事不干己。概不過問。必致匪棍等益無忌憚。又漕船行走。宜派沿河營汛弁兵遞站護送一條。各幫船設有押運官弁。經過地方。並有文武官催趲照料。如有盜賣搶劫等事。隨時即可查辦。若令沿河營汛撥派兵丁護送。無論營制兵額不敷。差委。且因糧艘北來。紛紛調遣官兵。亦無此政體。又重空漕船行抵稅關。毋許任意停泊。

一條糧船行抵稅關原不准其藉詞停留其應納稅課由各關監督即時稽查抽收沿途並有官為趨催亦安能任意耽延又各幫運弁宜給銅質關防一條設官分職頒發印信關防各有等差漕弁向用鈐記由來已久其總押漕運文員自有隨帶印信以昭慎重若將運弁紛紛鑄給關防輕改舊章殊於體制不協該給事中所奏均窒礙不可行著毋庸議○予廣東捕盜傷斃防禦海寧阿祭葬世

職如叅領例外委林振輝祭葬世職兵丁郭葉茂等一百二十一名賞卹如例○乙丑

上詣

永佑寺行禮○以故喀爾喀賽因諾顏扎薩克郡王達瑪琳扎布子楚克蘇木扎布襲爵○盛京刑部侍郎貴慶以病乞解任允之以都察院左副都御史永祚為盛京刑部侍郎○免直隸寧晉新河二縣積水地畝上年額賦○丙寅諭內閣給事中孫汝奏山東省之充

州沂州曹州三府江蘇省之淮安徐州海三府州搜刀手匪徒甚多請與河南安徽湖北之紅鬍等匪徒一律嚴辦等語著交刑部將此二省搜刀手搶劫案犯與河南安徽湖北三省紅鬍子白撞手搜刀手等匪徒一併從重定擬罪名奏准頒行○丁卯

上御卷阿勝境賜扈從王公大臣蒙古王貝勒貝子公額駙台吉等食○戊辰

上自避暑山莊啟鑾幸木蘭○遣官祭黑龍潭

昭靈沛澤龍王之神玉泉山

惠濟慈佑靈瀧龍王之神昆明湖

安佑普濟沛澤廣生龍王之神密雲縣白龍潭

昭靈廣濟龍王之神○是日駐蹕中關行宮

○己巳駐蹕波羅河屯行宮○庚午賞看守

黃土坎等五處行宮弁兵半月錢糧○是日

駐蹕張三營行宮○辛未

上行圓○是日駐蹕阿圭圖御營○壬申

上行圖○遣官祭賢良祠○陝甘總督先福奏
長隨朦捐官職並將失察之按察使請旨交
議一摺得旨此案劉焜身充長隨膽敢朦捐
官職並主使伊姪在甘省冒考實屬藐法該
督僅比例擬以軍罪殊屬輕縱著刑部叵議
加重定擬具奏德克精阿收留劉焜服役已
閱四年之久於朦捐冒考種種情弊豈得諉
為不知著交部嚴加議處○是日駐蹕海拉
蘇台御營○癸酉

上行圖○諭內閣宗室圖克坦在空房圍禁尚
敢私令伊家人閭三之妻張氏改扮男裝潛
入住宿實屬無恥著宗人府堂官至伊圍禁
處所看視將圖克坦重責三十板即行上鎖
永遠圍禁毋庸發往盛京並曉示圍禁之宗
室人等共知儆戒至閭張氏既經私入空房
住宿恐不止一次亦難保非徑由空房院門
出入閭三閭張氏著交刑部再行審訊照例
治罪其看守空房兵丁及該管官員宗人府

堂官並未聲請懲處亦屬疏漏著查明分別
懲處○是日駐蹕呼魯蘇台御營甲戌秋
分夕

月於西郊遣禮親王昭槤行禮○

上行圖○是日駐蹕那爾蘇台梁西山根御營

○乙亥

世宗憲皇帝忌辰遣官祭

泰陵○諭內閣御史德莊奏請令候補候選及
原任前任等官員自將親丁婦女註明並雇

工婦女查明來歷一體編入保甲等語煩瑣
苛細之至若照所請則慶桂勒保等家均應
編入保甲成何政體耶前月查出劉閭氏在
南城候選知州姚姓家傭工今該御史即為
此奏劉閭氏在候選官員家內服役即將候
選官員家屬一體編查若係現任官員家內
服役勢必又將現任官員家屬一體編查近
來科道每遇辦理一案即事後生風奏請增
改條例甚屬可笑凡事總當防於未然查拏

逆犯官民人等志切同仇著通諭王公及文武大小官員各將第宅家人及雇工婦女留心查詰如有形跡可疑來歷不明者不可以驅逐了事即行送官究辦若審明實係逆犯或係逆犯家屬必加恩免其從前失察之咎德莊所奏著毋庸議○是日駐蹕都木達烏拉岱御營翼日如之○丙子

上行圓蒙古盟長王公等於行幄西門外設大櫨廬侍

上膳畢

上閱詐馬等技賞賚有差○諭內閣莫爾根布以口角細故輒敢於大營內將海佛保用刀扎斃實屬兇橫不法已極著即行處斬無庸解至哨外即派該營長隆保高喀乃帶至大營四五里外東山溝監視行刑並傳虎槍營官兵數人前往看視其隨營兵民人等俱准看視俾知儆惕著徐銳帶領弁兵前往彈壓○又諭丹巴多爾濟所進黑紫黃馬已另降

旨賞名號矣此馬乃丹巴多爾濟留心乘試伊從前差使奮勉歿後曾降旨准令墳前立碑旋緣事不准建立今乘伊所進之馬射鹿頗有所獲憶及丹巴多爾濟朕心深為憫惻著加恩仍准立碑以示軫恤舊僕之意○丁丑

上行圓○諭內閣御史高翔麟奏請禁私設班館一摺內外問刑衙門私設班房羈押人犯本干例禁第恐日久禁弛仍有私自設立者

著直省督撫通飭所屬州縣務遵照定例嚴行禁止如有聽訟遲延將無辜平民任意拘押者一經查出即行叅辦照例懲處○以湖北布政使巴哈布為湖南巡撫山西按察使訥福為湖北布政使調福建按察使習振翎為山西按察使以福建汀漳龍道李賡芳為按察使○是日駐蹕巴彥布爾哈蘇台御營○戊寅

上行圓○諭內閣巴彥山谷園場內牲獸向來

繁庶本日行圍許多獸畜俱從看城兩旁副
蘇尾蘇聞脫出此皆管理蒙古圍場副蘇尾
蘇各員並不留心嚴管所致所有管理左翼
蒙古圍場之富勒琿凝珠孝順岱喇特納濟
爾迪達瑪琳扎布管理右翼蒙古圍場之哈
隆阿舒倫保錫哩達瓦烏呢濟爾噶勒管理
蒙古圍場左翼副蘇尾蘇之甘珠爾扎布烏
永阿管理蒙古圍場右翼副蘇尾蘇琳沁多
爾濟花沙布俱著罰俸半年以示懲儆嗣後

執事人等務當實力嚴管儻仍似此怠玩定
行治罪○諭軍機大臣等阮元奏逆犯朱毛
俚未獲請將伊及藩臬兩司交部治罪一摺
朱毛俚係江西餘干縣逆案內首犯屢經降
旨飭緝日久未獲該撫請將伊與藩臬兩司
一併交部治罪此時若將該撫等加以咎譴
則伊等轉得置身事外卸督捕之責阮元等
俱毋庸治罪仍責令上緊緝捕但緝捕之方
日久當思變通阮元等務竭盡心力另籌端

訪之法方可冀有弋獲不可膠柱鼓瑟聽屬
員虛文塞責嗣後無論藩臬兩司該撫不必
代為奏請治罪即阮元亦不許遷延數月又
請處分總在激發天良刻期緝獲正法毋庸
瑣瑣引咎虛詞瀆奏於事無益也將此諭令
知之○是日駐蹕巴彥溝御營○己卯

上行圍○諭軍機大臣等向來京城發遣之犯
皆奉旨後即日起解出都雖大員獲罪擬遣
者亦從不敢耽延乃近日外省發遣人犯竟

有藉詞遷延遲至一年半載尚未起解者殊
屬怠玩著兵部刑部堂官會同查明舊例如
原定例限本寬即酌改加緊押令迅速起程
不許藉詞逗遛以杜捏飾將此諭令知之○
是日駐蹕達彥梁北口御營○庚辰

上行圍○諭內閣本年春夏間據湖北江西安
徽江蘇等省各督撫先後奏報拾獲匪名揭
帖字體怪異語句悖逆上印九龍木戳共有
十餘紙此等不法之徒敢於先天化日之下

編造逆詞散播數省煽惑人心實屬罪大惡極節經飭令各督撫一體嚴緝速獲逆犯以正刑誅茲據百齡奏派文武員弁先於和州地方緝獲散布逆帖人犯嚴士隴究出編造逆詞首犯方榮升即於巢縣拏獲並於窩藏方榮升之朱上信家起獲九龍木戳及偽造時憲書違悖經卷字蹟四箱所辦甚好百齡督緝認真能將逆犯訪明蹤跡嚴密捕獲實屬可嘉著加恩賞復太子少保銜並給還雙眼花翎仍交部議敘其首先訪出逆情之已革知縣萬承紀著加恩以知州補用拏獲首逆方榮升之副將鮑友智並拏獲逆黨嚴士隴及描刻木戳匠人王泳興之副將慶慶俱著賞加總兵銜並賞戴花翎仍交軍機處記名其餘拏獲逆犯各員弁經朕圈出者著百齡查明分別保奏再降恩旨○又諭本日

上圓時左邊尾纛落後而中纛亦迷路錯誤朕每年進哨行圓皆係熟習之事何致如此

茫無頭緒此皆領纛大臣等因循怠玩並不認真嚴管所致審親王端恩人本庸碌無能著拔去花翎逐出乾清門並著革退領纛大臣都統署理總理行營事務大臣仍罰職任俸一年即隨阿哥回京照例上朝領纛大臣索特納木多爾濟滿珠巴咱爾巴勒楚克長瑪哈巴拉端岳特多爾濟著各罰職任俸一年管理左翼副纛尾纛乾清門三等侍衛烏永阿著降一級作為藍翎侍衛其管理左翼蒙古圓場乾清門二等侍衛孝順岱管理左翼中纛副纛乾清門三等侍衛額爾克保俱係初次著各罰職任俸一年孝順岱額爾克保烏永阿俱著逐出乾清門在大門上行走管理左翼中纛副纛公福克津係屬初次著罰職任俸一年管理左翼蒙古圓場公富勒琿凝珠著革去散秩大臣作為頭等侍衛在大門上行走管理左翼尾纛三等侍衛福英額慶福藍翎侍衛德克木亦係初次著各

罰俸一年。管理副肅之喇特納濟爾達瑪琳扎布。管理左翼中肅副肅之伊什喇克巴。管理左翼副肅尾肅之甘珠爾扎布。均著罰職任俸一年。左翼蒙古嚮導參領等。亦著降一級調用。○諭軍機大臣等。此案方榮升共造逆詞六百餘張。令夥黨赴河南歸德府先後布散者。即有二百餘張。未據該省拾獲奏報。自係該省士民人等。於拾獲後。即行銷燬。未經呈報到官。著方受疇於接奉諭旨後。即

實錄卷三百九

五

繕簡明告示。於開封歸德界連安徽各府縣徧行張貼。以此項逆詞。係安徽逆犯方榮升所造。該犯業已拏獲。審明寸磔。全家緣坐。其助逆各犯。亦俱按律治罪。所有該逆散布逆詞士民人等。拾獲即行焚燬。皆係知法良民。不為邪說煽惑。甚屬可嘉。如尚有未經焚燬者。此時亦毋庸呈送到官。著即自行銷燬。儻經此次出示之後。仍有將逆帖留藏在家者。即與該逆同黨無異。將來別經發覺。即照逆

黨例治罪。斷不寬貸。務令家喻戶曉。除淨盡。以熄浮言。將此諭令知之。○調鑲黃旗蒙古都統蘇楞額。為鑲紅旗漢軍都統。以正黃旗滿洲副都統福會。為鑲黃旗蒙古都統。調正黃旗漢軍副都統寶興。為正黃旗滿洲副都統。以散秩大臣裕全。為正黃旗漢軍副都統。○戶部議准。兩浙鹽政廣泰疏報。仁和石堰穿長。長亭鳴鶴。五場開墾地七千六百六十九畝。有奇。照例升科。從之。○是日。駐蹕伊

實錄卷三百九

五

綿溝御營。○辛巳。

上行圓。○諭內閣。本日報到。各衙門俱有題本。惟刑部無具題之件。詢因本月二十七日。係至聖先師誕辰。二十八日。係值庚辰干支。是以發報時。未將刑名本章遞進等語。各衙門隨報題奏事件。自應以朕批閱之日。為準。乃該部援照向例。不理刑名日期。即於是日。不將具題之本送閣。甚屬非是。在京刑部堂官。俱著交部察議。嗣後凡值巡幸之時。在京間

刑衙門如遇不理刑名之日應題應奏事件
總以遞至行在進呈日期為準毋得拘泥在
京發遞之日致有舛誤○以翰林院侍讀學
士玉輅為甘肅按察使○予河南輝縣陣亡
外委岳貴祭葬世職如例○是日駐蹕薩勒
巴爾口御營○壬午

上行圍○是日駐蹕案巴究溝口御營○是月
閩浙總督汪志伊奏查明海洋土盜出沒請
飭勤捕得旨嚴諭王得祿即日帶兵出洋迅

實錄卷三二〇

壬午

速辦理近海各口岸嚴斷接濟文武同心合
力共辦一事勉之毋忽如有因循疲玩遲疑
觀望者即行叅劾重懲不恕將此硃諭通諭
知之

大清仁宗受天興運敷化綏猷崇文經武孝恭
勤儉端敏英哲睿皇帝實錄卷之三百九

實錄卷三二〇

壬午

[illegible]

嘉慶二十年乙亥九月癸未朔

俱著值年旗查明飭令釋放回籍為民。是日駐蹕伊遜河東御營。乙酉。

日駐蹕伊遜河東御營乙酉

入園禁空房姦宿一案復訊出圖克坦先於本年三月二十及二十二日走出空房潛至閤三家內與伊妻張氏通姦二次圖克坦係園禁之犯任令私自走出恣行無恥似此漫無約束或竟由此潛逃有何防範所有此二日失察圖克坦私出空房之該班官員兵丁著管理宗人府王公等查明分別叅奏懲治莊親王綿課等均著交部議處○是日駐蹕六道河御營○丙戌賜蒙古王貝勒貝子公

額駙台吉等食。是日駐蹕張三營行宮。丁亥諭軍機大臣等玉麟等奏接准成寧等來咨有塔什密里克回莊阿渾糾衆滋擾之事調取葉爾羌官兵前赴英吉沙爾即先在彼防守聽候調遣當經揀選綠營兵三百名派令將弁等管帶前往駐守聲勢足資聯絡等語現已有旨令松筠帶兵會同成寧辦理葉爾羌地方距喀什噶爾不遠本處回民聞該處有用兵勦辦回衆之事恐不悉原委未免有驚惶之意玉麟景行皆未歷行陣不可輕往惟當督率存城官兵在本城鎮靜彈壓並於各卡倫密為防範如喀什噶爾有勦散賊衆潛行竄至者即行拏獲解交松筠成寧審辦其本處回衆並著玉麟等飭知該阿奇木伯克等廣行曉諭喀什噶爾阿渾孜牙墩滋事與爾等全無干涉務各安心樂業毋得稍有疑懼將此諭令知之。又諭據給事中申啟賢奏山西文水永寧交界之壺盧峪山

峯環抱藏盜甚衆地方官以其地勢險要不行查辦前年河南滑縣滋事賊匪即聞有漏網竄入其中者視現等犯亦難保不在彼藏匿等語著衡齡即選派員弁令其改裝易服前往壺盧峪地方密行查訪如該處實有不法奸民據為巢穴即帶領兵役乘其不備密為掩捕獲犯後解至省城該撫一面奏聞一面即會同那彥寶帥承瀛審辦事由言官訪聞該撫不得以所屬地方有匪徒聚集存迴護之見若果能將壺盧峪匪徒訪明拏獲不惟免其從前失察之咎仍當加以恩獎也將此諭令知之。命刑部左侍郎那彥寶吏部右侍郎帥承瀛馳往山西審案。是日駐蹕波羅河屯行宮。戊子。上御行殿勾到新疆雲南貴州廣西情實罪犯停決新疆斬犯五人絞犯三人雲南絞犯七人貴州斬犯八人絞犯九人廣西斬犯五人絞犯八人餘七十二人予勾。以兵部右侍

郎恩寧署刑部左侍郎○是日駐蹕中關行宮○己丑

上詣

永佑寺行禮○是日駐蹕避暑山莊至辛卯皆如之○庚寅諭軍機大臣等曾燠奏黔省民人苗猥雜處不知禮義法律謹於

聖諭廣訓各條後附以解說刊印多本飭發各府州縣散給城鄉民戶廣為化導又將名例內十惡大罪及黔俗易犯條款摘錄刊印黏

貼告示俾令家喻戶曉等語

聖諭廣訓定例每月朔望地方官於城市宣講其窮鄉僻壤不能周知該撫因黔省民人不知禮義者多恭刊

聖諭廣訓並於各條後附以解說徧示鄉民共知感化其事尚屬可行至將名例條款一併刊刻出示則於化民之道殊為無益名例內十惡大罪雖販夫豎子孰不知其為斷不可犯在小民醇良愿謹者即未嘗讀律自不敢

作奸犯科其兇橫不逞之徒以身試法亦非盡陷於不知古者刑書之鑄識者譏之該撫惟當督飭所屬實心化導有犯必懲庶幾澆風積俗默化潛移其摘錄科條多張告示一節殊屬多事著即停止將此諭令知之○旌表守正被戕江蘇江都縣民李松亭妻胡氏○緩徵山東長清鄒平禹城平原汶上陽穀壽張鄒莊平等館陶恩范朝城鉅野城武樂安博興濟寧魚臺三十州縣及臨清濟寧二

衛被水被雹村莊新舊額賦○辛卯

上詣

永佑寺行禮○諭軍機大臣等據成寧秦塔什密里克回匪孜牙墩勾引布魯特等焚燒馬廠戕害官兵永芹帶領官兵及回兵追捕賊衆奔竄出卡逃往偽塔克地方固守永芹在附近回莊山僻等處搜拏餘匪令侍衛副護軍叅領永明等帶兵與回兵協剿現拏到逆匪訊據供稱孜牙墩於十九年二三月間即

說要奪南八城作王子等語。成寧現已年老亦未經歷戎行。此事專交松筠辦理。即迅速馳往喀什噶爾。兼署叅贊大臣。事務到彼後。如孜牙墩尚未就獲。即先檄催圖爾第邁莫特上緊追勦。如兵力不敷。即飛催富永等連帶伊犁精銳五百名前來合勦。孜牙墩就擒後。即在喀什噶爾審訊。凌遲處死。梟示其隨同謀逆者。皆按律斬決。俾邊圉回衆共知儆畏。再此案孜牙墩潛蓄逆謀已久。所有十九

年二三月以後喀什噶爾之叅贊大臣等均。有失察之咎。著松筠查明一併嚴叅。成寧於事竣後。即令自備資斧來京聽候部議。永芹身係宗室。曾充乾清門侍衛。且年力方壯。伊既親身帶兵追賊。乃並未出卡藉搜拏。為名在中途駐劄。實屬畏葸無能。著即革職。自備資斧回京。無庸留彼効力。將此諭令知之。○又諭據韓鼎晉奏。按試甘肅鞏昌府時。伏羌縣回民監生馬繩祖呈控。回民文生馬化龍

等素不安靜。有復招外回之事。而馬化龍亦以誣人為逆。屢從念起等詞。具訴當將兩造呈詞咨交督臣查辦等語。從前伏羌回民屢經滋事。此案馬繩祖呈控馬化龍等招集外回。恐又有新舊爭教等情。該督既據該學政移咨。何以未經具奏。著即派委妥員密為查辦。如馬化龍等實有不法情事。即嚴拏懲辦。儻訊係虛誣。亦應治馬繩祖誣告之罪。該督務詳慎妥辦。以靖地方。將此諭令知之。○調

塔爾巴哈台叅贊大臣松福為喀什噶爾叅贊大臣。以西安副都統富僧德為塔爾巴哈台叅贊大臣。前任寧古塔副都統富登阿為西安副都統。調和闡幫辦大臣貢楚克扎布為喀什噶爾幫辦大臣。以副都統銜西林布為和闡幫辦大臣。○調喀喇沙爾辦事大臣烏爾卿額為英吉沙爾領隊大臣。英吉沙爾領隊大臣額勒金布為喀喇沙爾辦事大臣。○壬辰

上自避暑山莊迴鑾○詣

城隍廟拈香○諭內閣給事中申啟賢奏請將民間因荒契賣子女照直隸河南等省因荒賤賣地畝奏准照原價回贖之例飭下各督撫廣出示諭許依契賣原價贖還等語民間年歲荒歉將子女契賣因一時口食不能兼顧原非獲已但人口與地畝不同地畝確有故址可據子女則或帶往他鄉存亡不一其聽贖與否祇可從民之便若一概官為出示准令回贖恐因此藉詞索詐轉滋訟端該給事中所奏不可行原摺著發還○是日駐蹕喀喇河屯行宮○癸巳

上御行殿勾到廣東福建情實罪犯停決廣東官犯二人斬犯六人絞犯十二人福建斬犯八人絞犯六人餘九十五人予勾○遣官祭都城隍之神○黑龍江將軍特依順保奏查明安省邪教餘黨潛赴黑龍江寄送銀兩訊明分別定擬得旨嘉獎下部議欽○以擎獲

清 實 錄 嘉慶二十年九月

首逆方榮升賞兩江總督百齡三等男其子六品廕生扎拉芬為五品廕生知府邱樹棠等升敘有差○是日駐蹕常山峪行宮○甲午諭內閣蔣攸銛等奏暹羅國王聞上年貢船被風損壞復備副貢船遣使補備方物到粵一摺暹羅國所進嘉慶十八年正貢船在洋焚燒其副貢船所齎貢品業經進呈十九年該國王敬補方物分裝正副船入貢適遇颶風漂散現在正副船已先後收泊其表文

方物由該貢使齎送赴京該國王因聞貢船遭風之信復備補貢方物來粵其恭順實屬可嘉該國向係三年一貢明年又屆入貢之期著加恩即將此次齎到方物作為嘉慶二十一年例貢交粵省藩庫存貯俟明年委員解京其使臣巧鑒紋是通留於粵省俟本年進京各貢使旋粵時一體筵宴俾令回國並傳知該國王明年無庸另備表文方物航海遠來以示懷柔至意○又諭先福奏甘肅向

有省友名目每於州縣官初到時賣緣推薦或為借貸盤費賒取什物州縣藉其通挪延訂為友常駐省垣探聽信息勾通書吏狼狽為奸甚至以解領公項扣還私欠大為地方之害已嚴禁查拏該省現有蘇生蘭私求空白印文承充典吏一案請加等定擬等語所辦甚是外省游手匪徒濫充幕友盤踞省城交通胥吏因緣為奸最為吏治之蠹甘省遠在邊隅尚有此弊其繁富省分似此者更不可勝言著通諭直省督撫查明各省城如有此等劣幕概行驅逐並嚴飭所屬州縣毋許延請儻有陽奉陰違私自容留者一經犯案照書役犯罪例各按所犯科條加一等治罪並將延請之州縣官一併叅辦以懲奸猾而肅官方○旌表守正捐軀四川巴縣民陳遠名妻王氏○是日駐蹕兩間房行宮○乙未改鑄甘肅蘭州府循化廳撫番同知關防從總督先福請也○是日駐蹕要亭行宮○丙

申命五城於冬春二季設廠煮賑○緩徵河南安陽湯陰內黃濬河內溫六縣被水村莊本年額賦漕糧並河工加價倉穀是日駐蹕密雲縣行宮○丁酉命戶部右侍郎成格刑部左侍郎陳希曾馳往浙江查辦事件○以兵部左侍郎禧恩署戶部右侍郎戶部左侍郎盧蔭溥署刑部左侍郎吏部左侍郎秀寧署京營左翼總兵○是日駐蹕南石槽行宮○戊戌諭軍機大臣等馬慧裕等奏東湖

縣民人劉大瑤呈繳匿名書信一封書內語句悖逆已有旨交常明方受疇等分飭訪查那彥成現在隨扈亦令速回保定密緝矣惟此項書信既係謀逆自應慎密乃並未緘封插於縣城街市巷口柵欄縫內有意令人拾獲傳播難保非挾讐傾陷其書內將慎密之密字俱寫作迷字讀密為迷係屬何處土音著該督等從此根究或可得有端倪一經訪明迅速由驛覆奏又另摺所奏江得明一犯

縣民人劉大瑤呈繳匿名書信一封書內語句悖逆已有旨交常明方受疇等分飭訪查那彥成現在隨扈亦令速回保定密緝矣惟此項書信既係謀逆自應慎密乃並未緘封插於縣城街市巷口柵欄縫內有意令人拾獲傳播難保非挾讐傾陷其書內將慎密之密字俱寫作迷字讀密為迷係屬何處土音著該督等從此根究或可得有端倪一經訪明迅速由驛覆奏又另摺所奏江得明一犯

既自認得受朱毛俚偽封其所供羅松即喜仁又係朱毛俚案內有人犯自係此案逸犯無疑除朱毛俚及羅松羅明標潘米貴吳容等已分飭汪志伊常明阮元查拏外所有江得明供出各犯或仍在漢口一帶潛匿該處五方雜處最易藏奸該督撫務即遴派妥幹員弁會同地方官嚴密查拏務獲究辦勿任遠颺漏網至江夏縣拏獲拜師持齋之樊萬興等男婦五名口起出鈔寫經卷三本內

十卷

上

有悖逆語句訊據供於乾隆年間有住居江南儀徵縣之直隸灤州王姓來楚勸令喫齋名清淨門其經文三本皆本省僧道所給現惟會源尚存等語直隸灤州前有傳習金丹八卦教清茶門匪徒破案後業經分別治罪今樊萬興等所供王姓自即係其教之人已飭令那彥成查明王姓是否尚存再行覈辦僧會源解到時該督等即親提嚴訊將此項悖逆經卷從何處得來向其嚴切根究務令

據實供吐審明後各按律治罪可也將此諭令知之○賞看守湯山行宮弁兵半月錢糧○是日駐蹕湯山行宮 己亥

上還圓明園○詣

安佑宮行禮○諭內閣本年八月十五日密雨半日次早雨止朕啟蹕巡幸木蘭於將啟行時莊親王綿課忽令奏事太監奏稱二道河副橋座已被衝塌正橋座現已過水一尺有餘蒙古王公等聞有此言遂籲懇暫停進哨

十卷

上

明係嘗試朕降旨嚴飭即乘馬度橋河水尚低於橋面尺餘橋座亦甚穩固策馬直抵中關因命軍機大臣詢問綿課據稱係由熱河道明山報知及傳詢明山僅向綿課告知便橋欹斜並未報有正橋過水情形秋獮肆武綏藩為我朝

家法朕恪謹遵循今綿課因河水微長輒造浮言妄希阻止若係滿洲蒙古大臣必立予罷黜加以板責念伊爵係親王姑從寬議前僅

罰俸以示薄懲但綿課如此畏葸豈可表率
內廷且一應差使亦俱生疏實不勝御前大
臣之任著革去御前大臣並領侍衛內大臣
管圍大臣總理行營毋庸在裏邊行走其餘
所管事務仍著留任以觀後效綿課所出御
前大臣領侍衛內大臣二缺仍著定親王綿
恩補授其總理行營管圍大臣著奕紹補授
明歲春巡秋獮俱令奕紹隨扈前往

祖

實錄卷三

上

考成憲朕不敢違亂政莠言朕不能聽將此旨
通諭皇子皇孫各衙門各旗敬承毋忽前
任喀什噶爾參贊大臣成寧等奏逆回孜牙
墩就擒回莊照常安業得旨嘉獎擢守備武
光琳為都司並賞花翎賞民人高建洛六品
頂帶回子邁哈索特通事推列克五品頂帶
擢六品伯克斯底克為五品伯克並賞花翎
餘賞賚有差庚子以翰林院侍講學士奎
昌充日講起居注官貨賽爾烏蘇穆和爾

噶順三處被災驛丁張家口布魯圖官兵一
年錢糧察罕托羅海弁兵半年錢糧辛丑
諭內閣常明奏拏獲潛入川境傳教之西洋
人審明辦理一摺西洋人徐鑒牧即李多林
前在內地傳教獲案定罪後釋回出洋膽敢
仍來內地潛至四川變易姓名輾轉傳教復
創造不經之言煽誘愚氓以致川省習染西
洋邪教者日多常明能督飭所屬將該犯訪
獲訊明即恭請王命正法俾習教者羣知警

實錄卷三

上

戒所辦甚好常明著交部議敘新津縣知縣
王衡因稽查保甲於鄰境訪獲傳教首犯洵
屬能事著送部引見唐伯猴等十四名抗不
改悔著與朱榮等案內柳懷德等十名一併
永遠枷號此次枷號之唐伯猴等二十四名
及先經枷號之張萬效一名俱飭該地方官
隨時稽查如再有傳教等事審明即行正法
其本案內唐伯惠以下各犯罪名仍交刑部
覈議壬寅

上幸萬壽山。○癸卯。

上御勤政殿聽政。○命

皇次子智親王吳。祭

歷代帝王廟。○諭軍機大臣等。各省關稅正額盈餘。皆係久經酌定數目。相沿徵解。各關每屆期滿。奏報徵收銀兩。大約不甚相懸。閒有缺額。次年得有羨餘。仍可補足原額。即江南之西新海關。揚關。鳳陽。蕪湖等關。亦莫不然。惟淮關。許墅兩關。十餘年以來。歷報短缺。

為數甚多。竟有積重難返之勢。歲豐歲歉。皆不足額。殊不可解。該兩關監督。已非一任。或因缺額降革。或因賠項不能完繳。呈報家產盡絕。欠項纍纍。年復一年。殊屬不成事體。淮揚蘇州。為著名繁富之區。從前司權稅者。皆有盈無絀。若謂米船客貨。近年皆裹足不前。揆之情理。必無此事。如謂兩關歷任監督。悉皆昧良侵蝕。亦未必盡然。聞稅為國用攸關。該兩關如此疲敝。不可不設法整頓。著百齡

張師誠就近確查。淮關許墅兩關近年短缺情形。其受病之由。實在何處。應如何量為調劑。會同悉心妥議具奏。若有侵蝕弊端。由驛嚴叅具奏。勿稍欺飾。將此諭令知之。○以通政使司通政使多山。為都察院左副都御史。

甲辰

上御洞明堂。勾到四川情實罪犯。停決斬犯三十七人。絞犯三十三人。餘一百三十八人。予勾。○調甘肅按察使王輅。為江西按察使。以

直隸大名道屠之申。為甘肅按察使。○乙巳。上御洞明堂。勾到奉天。陝甘。浙江情實罪犯。停決奉天斬犯五人。絞犯八人。陝甘斬犯十三人。絞犯十二人。浙江斬犯七人。絞犯五人。餘九十七人。予勾。○定朝審覆奏例。諭內閣。秋審朝審情實人犯。舊例凡三覆奏。本沿古者三刺三宥遺意。我朝欽恤民命。凡案犯供情原委。備載招冊。每年黃冊進呈。早經反覆推求。慎之又慎。實不止於三覆。其科臣循例題

本僅屬具文。是以乾隆十四年將直省秋審改為一覆奏。朝審與秋審事同一例。嗣後朝審亦著改為一覆奏。已足以存舊制。至向來覆奏之本。皆於黃冊呈進。後隨即奏上。距勾到之時甚遠。嗣後黃冊仍於八月中旬呈進。其秋審朝審覆奏之本。皆於本省勾到前五日覆奏一次。朕披閱時。再同黃冊詳加酌覈。以昭慎重。著為令。○又諭御史林鍾岱奏山東之滕縣嶧縣蘭山縣郯城縣毗連江南之邳州。宿遷海州贛榆各州縣。向多拽刀手匪徒。或數十人。或數百人。不等。聚眾械鬪。白晝搶奪地方官。以業重難辦。往往從輕了結。又聞拽刀手多在府縣充當衙役。或遇犯案拘拏。而所差之役。即其同黨之人。緣此恃以無恐等語。此等拽刀手匪徒。擾累善良。大為地方之害。節經降旨飭拏。第該匪等人數眾多。當其糾黨逞兇之時。自可就地查拏。及其散處鄉間。又自附於良民。輾轉匿跡。惟在該督撫等督飭地方文武員弁。不分畛域。隨時留心稽察。有犯必懲。如查有充當衙役者。嚴拏懲辦。勿存畏難之見。久而弗懈。自可期奸宄消除也。將此諭令知之。○賑江蘇高郵寶應二州縣。衛被水災。民並蠲緩。本年額賦漕糧有差。緩徵上元江寧江浦六合阜寧清河安東銅山蕭陽山宿遷睢寧山陽桃源鹽城泰東臺江都甘泉興化二十州縣。並准奏大河徐州三衛額賦漕糧。○丙午諭軍機大臣等。

方受疇奏緝拏紅鬍捻匪情形一摺。紅鬍匪徒糾夥行兇。姦淫劫掠。在河南安徽湖北三省地方。為害閭閻。有紅鬍子白撞手拽刀手捻子頭等名目。實為巨惡。及兵役往緝。又於三省交界處。所此拏。則彼竄。彼拏。則此竄。必須三省知會。併力嚴緝。方可按名弋獲。此次方受疇所奏。豫省自八月以後。已拏獲五十九名。朕聞三省緝匪情形。豫省尚為認真。安省次之。湖北最為懈弛。馬慧裕張映漢實屬

怠玩再不奮勉嚴譴立降矣慎之該匪等聞知多向楚境竄匿是豫皖以鄰國為壑而楚地竟為逋逃淵藪匪徒總難期淨盡著通諭該三省督撫各飭所屬毗連州縣文武員弁務當同心協力不分畛域遇有匪犯彼此互相知會追擒堵截以期必獲馬慧裕張映漢尤當力振因循積習俾屬員知所畏懼庶奮勉緝捕奸宄無所逃遁可收戡暴安良之效其代為打造鎗刀械之鋪匠並著一體嚴

查懲辦以淨根株將此諭令知之○又諭慶溥等奏察哈爾正黃旗喀喇沁捕盜官忠祿呈控豐鎮廳同知嵩音等徇情賣法一案已有旨交祥保親提審辦矣此案據忠祿所報常氏服毒斃命因萬福與王加興等在春哥哥子家賭錢鬧事將春哥哥子養媳常氏毒斃春哥哥子家引入聚賭或因爭競鬪毆尚係事所常有何以將其養媳毒斃究竟因何啟釁所控情節甚不明晰豐鎮廳同知嵩音於正月

十九日接准忠祿來文知照即應前往驗訊何以延至四月二十三日始行會驗致屍身毒飯全行拋棄無存該同知又何以揭出忠祿贓弊經都統將忠祿斥革著祥保即親提案內應訊人證秉公查審審明後分別定擬用漢字摺具奏將此諭令知之○賑直隸永清霸東安武清雄安高陽七州縣被水災民

○丁未
上幸靜明園詣

龍神廟拈香○浙江按察使張暉吉年老命留京以四品京堂用以直隸熱河道明山為浙江按察使○戊申河東河道總督李逢亨等奏報秋汛安瀾出力員弁下部議敘○予故副都統職銜花聘祭葬如例○己酉孝慈高皇后忌辰遣官祭

福陵

上詣

恩慕寺

恩佑寺行禮○詣

大高殿行禮○還宮○暹羅國使臣丕雅拔訖粒巡吞押撥蘇昭突等四人於西安門內瞻覲○以孟冬時享

太廟自是日始齋戒三日○庚戌諭內閣御史孫升長奏嚴禁會匪以靖地方一摺奸民聚衆作會其意總為招集匪類凌虐善良其始人數尚少易於解散地方官不行查辦遂致日聚日多寔益強橫該御史所奏廣東省三

實錄卷三十一

七

合會匪徒擾害鄉里著該督撫飭屬嚴拏究辦此外各省如有私立會名斂錢聚衆者該管之督撫務各飭所屬地方官留心查訪將為首者嚴拏懲辦以期詰奸禁暴綏靖閭閻○又諭向來蒙古人從無叩關之事此案七薩本係違犯在配脫逃已應加罪膽敢在圍場道旁叩關列款翻控前案經和寧審係全虛實屬刁詐可惡七薩著在本旗地方枷號三箇月滿日發往伊犁交該將軍嚴加管束

奈曼王巴勒楚克將銀物餽送理事司員雖非營私行賄亦屬不合著交理藩院議處司員岳祥於巴勒楚克致送銀兩即用公文駁回體面可嘉賞加一級餘依議○浙江黃巖鎮總兵官謝恩詔因病休致以福建澎湖水師副將陳夢熊為黃巖鎮總兵官○辛亥孝敬憲皇后忌辰遣官祭泰陵

實錄卷三十一

七

大清仁宗受天興運敷化綏猷崇文經武孝恭勤儉端敏英哲睿皇帝實錄卷之三百十

上以萬壽節御同樂園賜皇子皇孫及王以下文武大臣蒙古王公外藩使臣等食至戊午皆如之○兩江總督百齡江南河道總督黎世序奏報秋汛安瀾得旨嘉獎下部議敘並賞黎世序花翎出力員弁升賞有差○暹羅國王鄭佛遣使表貢方物賞賚筵宴如例○

萬壽節遣官祭

太廟後殿○遣官祭

福陵。

昭陵。

昭西陵。

孝陵。

孝東陵。

景陵。

泰陵

泰東陵。

裕陵○遣官祭

孝淑皇后陵寢○遣官祭

顯佑宮。

東嶽廟

城隍廟○

上詣

安佑宮行禮。○御正大光明殿。皇子皇孫及王

以下文武大臣官員蒙古王公外藩使臣等

行慶賀禮○庚申命大學士御前大臣伊犁

將軍松筠回京以伊犁叅贊大臣長齡為將

軍○辛酉○

皇后千秋節宮內行禮如儀在外公主福晉命婦進內行禮停止筵宴○壬戌諭內閣恒寧奏調劑駐防兵丁一摺荊州駐防八旗除現有甲糧及幼丁外尚有閒散大丁二千一百餘名額定名糧不敷挑補加恩著照所請准其於發商生息馬價現經徵存息銀四萬一千四百餘兩內提出銀四萬兩再行發商仍以一分生息同原經發商生息銀五萬六千

兩共九萬六千兩。將每月所得息銀九百六十兩。隨餉撥解滿營。交該將軍等在於駐防八旗間散大丁內挑選材堪造就者。九百六十名。作為餘兵。每名每月各賞支銀一兩。以資養贍。其餘存息銀。著該督撫查明實在數目。造冊報部查覈。仍貯該省藩庫備用。○又諭御史胡承珙奏請查辦糧船水手丁舵人等販私積弊一摺。回空漕船。向有夾帶私鹽之弊。著漕運總督嚴飭所屬實力查禁。並著

各該督撫於幫船經過關津處所。督飭地方員弁實力稽查。如有胥役兵丁得錢包庇。查明嚴懲。其天津產鹽處所。及安徽樅陽大通等鎮。有積慣匪徒。開設鹽店窩囤私銷者。並著該管官嚴拏究辦。○癸亥。

上諭

安佑官行禮。○命直省督撫提鎮慎覈衰老屬員。以飭吏治。諭內閣直省設立文武官員分寄職司。有一官即有一官應辦之事。若其人

不能稱職。或精力衰憊。不足以副之。則文官必致貽誤地方。武官必致貽誤營伍。朕勤求治理。屢經飭諭文武各官。力除因循怠玩之習。若統率之大吏。不加整頓。一任衰老無能之員。素餐尸位。將安望其起積振惰乎。此次黃巖鎮總兵謝恩。詔年力衰邁。步履維艱。經朕召見。立予休致。日前新任浙江按察使張暉吉。亦以年力就衰。降旨改授京職。總兵臬司。皆例得陞見之員。該管上司尚隱忍姑容。

不慮召對時。經朕察看。加以譴責。則此外文職道府以下。武職副叅以下。其衰病戀棧。不加叅劾者。不知凡幾矣。此在督撫提鎮等。或藉口於憫恤貧老。恐一官罷斥。即全家失養。此皆婦寺之仁。政治疲怠。實由於此。大半皆曠職瘵官。所繫於國事民生者甚大。古人一家一路之說。誠為深識遠慮。豈國家設官分職。但為養養衰老地耶。此次汪志伊。邱良功。姑從寬免。其降調著通諭直省督撫提鎮務

各激發天良。於所屬大小員弁實力察覈。慎加甄別。痛改沽名邀譽惡習。為國培養良才。整飭吏治。如有將衰病之員。溫留充職者。經朕察出。或別經發覺。必將該督撫提鎮。實予降調。決不寬恕。○又諭衡齡奏。河東運城並蒲州府解州及所屬各縣。同時地震。壓斃人口。飭藩司督同委員分投查勘。撫卹一摺。本年九月二十一等日。山西省運城等處。同時地震。文武廟宇衙署倉庫城垣監獄並居民

實錄卷三十一

七

房間均有坍塌。壓斃人口。至數千名之多。實堪憫惻。即應極力撫卹。著衡齡即飭吳邦慶督率各委員等。迅速查明。分別被災輕重。比照向例。應蠲免錢糧者。即奏請蠲免。應緩徵賑卹者。即奏請緩徵賑卹。務令實惠及民。勿致一夫失所。查明後。迅即由驛速奏。毋稍諱飾。其掩埋人口。修理房間。並受傷人口。酌給醫藥。因傷致斃者。仍給掩埋銀兩。露處貧民。煮粥接濟等情。俱著妥速辦理。應給撫卹銀

兩。即於河東道庫間款銀內。就近動撥。至城垣廟宇衙署倉獄等項工程。分別緩急。另行估修。○賞廣寧門外普濟堂煮賑小米三百石。○戶部議准。直隸長蘆鹽政廣惠疏報蘆臺場開墾地一頃一十三畝。有奇。山西巡撫衡齡疏報寧遠廳開墾地七十三頃三十六畝。有奇。照例升科。從之。○甲子。

上詣

大高殿

實錄卷三十一

八

壽皇殿行禮。○還宮。○諭內閣。明年挑選八旗及歲秀女。著將在京滿洲蒙古二品以上文武大臣十二歲十三歲之女。作為一日。豫備挑選。將來及歲時。毋庸再行挑選。○命欽差刑部侍郎那彥寶查賑蒲州。解二府州地震災民。○雲貴總督伯麟奏。勦緝川省竄匪出力人員。知縣項邦枚等。升用有差。○旌表守正捐軀廣東連平州民謝南英妻張氏。○乙丑。飭刑部加等定擬發遣遞籍人犯潛逃滋

事罪。諭內閣。近日發遣及遞籍人犯。往往潛逃滋事。或控訴原案屈抑。或越分呈遞封章。即如已革吏目魏秀。以職官遞籍。乃敢私行來京。在步軍統領衙門呈遞封口奏章。冀圖翻控原案。茲審明該革員所控各情。全屬虛誣。並無絲毫屈抑。似此逞刁妄為。非從重問擬。不足以示懲儆。除魏秀照擬枷責發邊遠充軍外。嗣後軍流以下。以及遞籍各犯。如有年限未滿。未經釋放。私自逃回者。應如何加等治罪。其妄行控訴者。再加一等。呈遞封章者。再從重加等。著刑部分別詳議具奏。其該管地方官。及鄉保等。漫無約束。任令私自逃回。或知情縱容。亦應加重懲處。並著該部分別議奏。○命兵部尚書吳璥。鑲白旗蒙古都統孟住。宗人府左宗人晉隆。在紫禁城內騎馬。○丁卯。諭軍機大臣等。方受疇奏。陝州暨所屬靈寶閭鄉二縣地震情形。飭令查勘撫卹一摺。前據銜齡奏。山西省河東運城

重纂全書

九

並蒲州解州及所屬州縣。於九月二十一日。同時地震。壓斃人口至七千名之多。今豫省陝州暨所屬之靈寶閭鄉二縣。亦於九月二十日夜間地震。城垣廟工。考棚倉廩監獄。及民間房屋。皆有坍塌。並有壓斃壓傷之人。豫省與晉省接壤。此次河東運城等處地震。被災較重。而陝州等三州縣毗連處所。亦有地震之異。自應亟為撫卹。藩司姚祖同前往查辦。著該撫即飭知該藩司查明該三州縣壓斃之人。究有若干。將已斃者妥為收殮。受傷者酌給醫藥。其乏食無依者。應如何搭蓋棚廠。俾有棲止。並煮粥賑濟。俾資餬口之處。務令實心經理。毋使一夫失所。為要。將此諭令知之。○以內閣學士敬徵。為鑾儀衛鑾儀使。京營右翼總兵西拉布。兼正藍旗護軍統領。○賞已革察哈爾副都統來靈頭等侍衛。為西寧辦事大臣。以正白旗漢軍副都統東林。為哈密辦事大臣。賞已革泰寧鎮總兵官多

重纂全書

十

慶藍翎侍衛為烏魯木齊領隊大臣。以正藍旗護軍統領長慶為庫倫辦事大臣。頭等侍衛巴彥巴圖為伊犁領隊大臣。鑄給直隸大名協開州營都司關防。從總督那彥成請也。○己巳。

上詣

時應宮

昭顯廟拈香。○庚午。諭內閣御史盧浙奏廣教化杜虧欠一摺。仰惟

聖祖仁皇帝欽頒

聖諭

世宗憲皇帝繹為

廣訓。本天理人情之極。則為牖民淑世之

敷言。實為大經大法。從前布之學宮。並責成地

方官朔望宣讀。著於令甲。立法已為周備。今

若令府州縣衛徧行刊印。於編查保甲之時。

逐保散給。未免近於褻越。且

聖諭

廣訓之旨。皆係四書五經之精義。今海內十室之聚。必有四子之書。然而斯民淑慝。不一其類。非盡目不覩聖賢之書。知而不由。雖家置一冊。無益也。夫欲使民興起於善。不外教養二端。今各府州縣衛皆設有學官。其省會及府州縣之大者。復各建有書院。士為四民之秀。各該教官山長。誠能盡心化導。則士知束身砥行。即編戶齊民。亦可互相觀感。其道府州縣與民切近。著各就所屬地方。察其民風

習尚。有染於汙俗。惑於邪說。及不知崇尚禮

義者。各救其弊。切指而告誡之。即恭闡

聖諭

廣訓之旨。行為直解。刊刻告示。曉諭衆庶。俾知

彰善癉惡之意。其事較為簡而易行。但正德

由於厚生。州縣有牧民之責。尤當各於所治

之境。興利除害。盡心民事。以裕民生。使衣食

足而禮義興。自可期風俗日淳。邪慝不作矣。

其徵收錢糧。將三聯串票。蓋用道府印信。以

杜州縣虧挪一節著交戶部妥議具奏。至因災緩徵錢糧請於奏報請旨之先。即傳諭停徵一節。直省遇有災歉地方。應由州縣申報該省大吏查勘明確。分別蠲緩。據實奏報。候旨施行。若先即停徵。諸多窒礙。惟該督撫接奉恩旨之日。務即飭知各該州縣。立刻張貼謄黃。俾眾周知。如有私行延擱。隱匿徵課者。查出嚴叅重懲。則實惠早得下逮。是在人能奉法。而不在於更定法制也。○以故甘肅河

州屬珍珠打刺二族土指揮使韓成璋子玉鳳襲職。○辛未。

上御太和殿視朝。王以下文武升轉各官謝恩。

○諭內閣。朕恭閱

世祖章皇帝實錄。內載順治十年

諭旨。睿王墳園因伊罪惡。竟行廢壞。似屬太過。

其房屋門牆俱著修理。柱用黑色。仍命信郡

王撥人看守。欽此。嗣於乾隆年間。仰蒙

皇考高宗純皇帝錄念舊勲。特加昭雪。復還睿

忠親王故爵。世襲罔替。其墳園規制。如伊家業已改修。則已。若仍沿用黑柱。著加恩令其遵照親王規制。一體修復。用示朕追念宗勲之意。○又諭御史孫升長奏。清釐漏賦。匿稅田地。分別報墾。升科酌追花息一摺。直隸湖北廣東。屢有墾荒田畝。其餘各省。或亦有之。但漏報稅課。小民多誤於不知。若概令入官。貧民未免失業。著各督撫飭知所屬州縣。查有此等田地。俱分別勘丈。按則升科。酌追花

息。免其入官。期於國課民生。均有裨益。○命戶部尚書景安倉場侍郎朱理。馳赴甘肅審案。○以內閣學士曹師曾署倉場侍郎。○調西寧辦事大臣來靈為庫車辦事大臣。賞四等侍衛庫車辦事大臣緒莊。二等侍衛為西寧辦事大臣。○壬申。諭內閣。翁元圻奏訪獲西洋人潛至內地傳教。訊明大概情形。一摺。此案蘭月旺。以西洋夷人潛入內地。遠歷數省。收徒傳教。煽惑多人。不法已極。著翁元圻

嚴切訊究。審明後將該犯問擬絞決。奏明辦理。其供出之犯按名查拏務獲。並飛咨各該省一體嚴緝。究辦未陽縣知縣常慶查緝認真。著於此案辦竣後送部引見。再行施恩。○又諭松筠等奏查訊孜牙墩起釁情形。並嚴叅阿奇木伯克一摺。喀什噶爾三品阿奇木伯克玉素普於孜牙墩糾衆謀逆。事前毫無覺察。咎無可辭。著革退乾清門行走。拔去花翎降為六品伯克。發往阿克蘇効力贖罪。英吉沙爾四品阿奇木伯克玉努斯亦有失察從逆回人之咎。著拔去花翎降為七品伯克。差遣効力。○又諭成寧等奏續獲從逆餘匪。審明分別辦理一摺。此案孜牙墩糾衆謀逆。其專管塔什密里克回莊之六品伯克阿布都雜依特。七品伯克阿布都爾滿毫無覺察。事起又不早行稟報。英吉沙爾六品伯克密斯肯。七品伯克阿布都爾蘇阿布都呼依木。當防禦緊要之時。差遣不前。並失察所管回

莊從逆匪犯著一併斥革。其所請發往伊犁之處。辦理未協。該犯等俱著改發雲貴烟瘴地方安置。餘俱照所奏辦理。○旌表守正捐軀河南光州民楊允妻蔡氏。○癸酉。上御懋勤殿。勾到湖廣江西安徽情實罪犯。停決湖廣斬犯三人。絞犯三人。江西斬犯六人。絞犯四十人。安徽斬犯五人。絞犯一人。餘九十人予勾。○諭內閣馬慧裕等奏查獲沿習天主教各犯。審明分別定擬一摺。此案張義盛一犯。先因查禁天主教停止念經。嗣因患病。又復諷誦。茲拏獲到官。堅不改悔。實屬始終怙惡。著照所擬發往新疆給額魯特為奴。張大才等九犯。及張天賜等七十八名。口既經悔悟投首。著該督等提集當堂。均令逐一踏過十字架。應杖徒者照例折責安置。餘者免罪釋放。仍立簿登記。如有復犯。加重治罪。其訪拏獲犯之應城縣知縣奚大壯著該督撫查明。如平日官聲尚好。即奏明送部引見。

再行施恩。○諭軍機大臣等。本日勾到江西省秋審人犯內。絞犯舒盛德。金成才。何石俚等三起。共三十九名。皆因朱毛俚逆案內。得受胡秉耀等偽造憑票。問擬絞候。入於本年秋審情實。上年朱毛俚逆案。先由胡秉耀。楊易等起意私刻木戳印。刷龍票。並播散謠言。謂即日將有刀兵之災。得其憑票者。可免殺害。騙賣銀錢。使用舒盛德等。並不知所賣憑票。可免何項刀兵。但冀免於殺戮。遂爾出錢

買存。迨胡秉耀等破案。究出姓名。拏獲問擬重罪。惟是該犯等。皆係無知鄉愚。受人愚惑。間有與知逆謀。尚未得受偽封。且此外賣過憑票。未經查出者。尚不知凡幾。此時若將舒盛德等。概予駢誅。未免法重情輕。舒盛德等均免其一死。著阮元查明該三十九犯內。如從前曾經犯有姦贓盜竊等項情罪。及知逆謀者。將該犯定為永遠枷號。分在該省各府縣。枷號示衆。其並未犯事及不知逆謀者。以

年歲為斷。區分三等。將年力強壯者。發往黑龍江。稍長者。發往伊犁。衰邁者。發往雲貴烟瘴地方。均遇赦不赦。該撫查明後。列名開單具奏。再行分別辦理。其羅梯蘭一犯。現據湖北拏獲。逸犯江得明。供有羅明標。即羅梯南。尚須查訊明確。著將該犯暫行監禁。俟查明審結後。再行照擬辦理。將此諭令知之。○緩徵湖北沔陽。天門。江陵。公安。石首。枝江。荊門。潛江。漢川。黃岡等十州縣。並屯坐各衛。被水

村莊。新舊額賦。○除山西靜樂縣。坍沒地一十頃。有奇額賦。○甲戌。旌卹河南滑縣。遇賊被戕生員秦一清。秦秉鐸。許九牧。民人蕭開貞等十二名。民婦蕭車氏等四口。如例。○乙亥。諭內閣。前據那彥成。保奏永定河工出力人員。摺內將緣事降革官七員。一併列入聲稱。原案均係因公。情有可原。工竣不敢妄邀甄叙。情願照例捐復。留直補用。共計捐銀二萬一千六百餘兩。已先飭令繳庫等語。並未

將該革員等緣事原案聲敘明晰。朕為那彥成所蒙。未及細查原案。當經降旨。與所保現任各員一體加恩允准。昨據御史林鍾岱。以廢員王奎聚儲斗南二人。係因承審孔傳標一案。酷刑故勘。革職擬徒。並曾奉有不准減等之旨。那彥成為溫承惠所蒙。顛項濫保。具摺參奏。朕以王奎聚等二人獲咎較重。該督率請捐復。則其餘五員亦難憑信。令軍機大臣一併詳查具奏。茲據查明開單呈覽。朕披閱各案情節。王奎聚。儲斗南。審訊孔傳標一案。任意刑求。故入人罪。罰嚴酷吏。情節甚重。將兆璠。前任通州因循怠玩。諸事廢弛。並失察差役勒索。釀成命案。董鴻。前任典史科派斂錢。貪鄙不職。此四員斷難准其捐復。沈守恒。張洽。因本年躬耕藉田。供辦牛隻。未能勤加演習。嚴議革職。事雖因公。但褫革未及一年。該督前此奏請時。若將原案敘明。或可酌量施恩。今一併朦混入奏。沈守恒。張洽。此次

亦不准捐復。惟已革典史翁新福。因承緝盜案。四叅限滿。無級可降。革職。實屬公過。著准其捐復。那彥成。於未經具奏之先。即將該革員等捐復銀兩。飭令繳庫。以備工需。豫為邀准地步。所辦甚屬取巧。跡近專擅矣。除翁新福捐復銀兩。准其收納外。其王奎聚等六員。所繳捐復銀兩。均著擲還。即罰令那彥成。溫承惠二人。照數均勻賠出。那彥成。朦混具奏。仍著交部加等議處。嗣後保奏廢員者。俱著將該革員緣事案由摘敘具奏。違者加等議處。○戶部議准。陝甘總督先福疏報。皋蘭山丹二縣開墾地三頃八十七畝。有奇。照例升科從之。○丙子。諭內閣。明春朕恭謁西陵迴鑾時。蹕路經由北惠濟廟拈香。因憶故大學士朱珪墳塋在該處附近。面諭那彥成查明。如相距御道五里以內。即親往賜奠。若在五里以外。即遣官前往。茲據那彥成覆奏。查看在御道四里以內。屆期朕由黃新莊至

北惠濟廟紆道親臨賜奠。用達眷懷舊學之意。其經由道路著那彥成派員修治。先行繪圖具奏。○丁丑。

上御懋勤殿。勾到江蘇河南山東情實罪犯。停決江蘇官犯一人。斬犯八人。絞犯六人。河南斬犯十人。絞犯二十六人。山東斬犯二人。絞犯三人。餘一百人予勾。○戊寅。諭內閣。那彥成奏北運河建築隄壩各工。奏明動項興修。並將妄估率詳之道廳叅奏。請旨一摺。北運

河隄壩各工。前據該道廳等詳報。挑河建壩築隄各工。務關廳屬估需銀一萬三千九百兩零。楊村廳屬估需銀一萬二千九百九十兩零。經該督委員覆勘。其原估挑河格隄各工。均尚可緩辦。惟務關所屬添建月隄一道。草壩一段。楊村所屬添建月隄一道。草壩四段。俱屬極險要工。共估需工料銀九千四百九十五兩六錢七分六釐。較前實為節省。著照所請。即於通永道庫存貯歷年扣存平飯

項下動撥。飭令該道廳先行購備料物運貯工所。俟春融趕辦。勒限完竣。屆期由該督親往驗收。務期工歸實用。至原估之務關同知田宏猷署楊村通判沈旺生。於尚可緩辦各工。概行估計。以致銀數比從前另案浮多。該管通永道葉紹本。並不確切覆勘。率詳請辦。俱著交部議處。○己卯。諭內閣。此次那彥成於保奏永定河工出力各員。為溫承惠所蒙。將緣事降革官七員。合混奏請捐復。伊等俱

曾任銓部。豈不知捐復人員。向例俱由部臣摘敘緣事案由。開具清單。分別准駁。請旨。其奉旨准其捐復者。始得赴戶部交納捐項。今那彥成於未經具奏之前。即先令該革員等將捐復銀兩繳庫。無論此七員內如王奎聚等原犯案情較重者。斷難准其捐復。即悉屬情輕之員。亦從無此政體。實屬有意取巧。豫為邀准地步。跡近專擅。部議照濫舉匪人例加等議。以降三級調用。本屬咎所應得。姑念

一時簡用乏人。那彥成著加恩改為降四級從寬留任。該督當倍加感奮。勉圖後效。○諭軍機大臣等。本日據巡視東漕御史蘇繹奏稱。本年東省米價較往歲減至過半。民樂輸將。並據父老僉稱。今歲東省普熟情形。為二十年來所未有等語。各省缺額倉穀。應趁年豐穀賤及時買補。以歸實貯。前據陳預奏到東省採買倉穀章程。以該省缺額倉穀為數較多。擬分限八年買補。每年採買十三萬六千餘石。已批令覈實妥辦。昨方受疇奏豫省秋成豐稔。所屬各州縣約可買補七十四萬四千餘石。本年豫省俱屬豐收。雖東省稍次於豫省。然穀價如此平減。僅買十三萬六千餘石。似覺太少。自尚可多為買補。著陳預再督同藩司悉心籌酌。趁此稔歲。將倉糧實心經理。加增採買。以廣儲備。將此諭令知之。○庚辰。諭內閣。百齡奏訪獲正一真人法官鄒尚勤。因正一真人張鈺發給護牌。令赴蘇杭

一帶考選道童。填補京城光明殿道眾缺額等語。光明殿道眾除祈禱晴雨外。別項差使甚少。著總管內務府大臣查明光明殿額設道眾共有若干員。嗣後如有缺額。由內務府照例行文。責令正一真人。在該山道眾內遴選來歷清白。明習經懺者。保送充補。並出具切實甘結。報明內務府存案。其私令法官在外考選道童之處。著永遠禁止。正一真人張鈺著交部議處。餘著該部覈議具奏。○又諭胡克家奏。督查司庫歷任借放未歸銀兩。分別著追著賠一摺。安省藩庫借放銀兩。除歸完外。尚有未完銀九十七萬七千餘兩之多。自應立即追賠歸款。但該撫開列單內。僅將各該員借放銀兩。分別應借不應借總數。籠統開載。殊未明晰。著該撫即查明原放之各該藩司。每名下共借放未歸銀若干兩。應借者係何款目。不應借者係何款目。於該員名下分晰開註。造冊報部察覈。除不應借各款

著落原借原放之員賠繳外。其應借各款。交該部覈明實係應借者。分別徵追歸款。此內仍有不應借者。著原借原放之員按數賠繳。即將此款永遠停借。並著嗣後藩庫遇有借放銀兩。均隨時報部查覈。如將不應借之款。濫行借放。除著賠外。仍治以應得之罪。○諭軍機大臣等。據百齡等奏緝獲大乘教清茶門傳教匪徒王秉衡。即王景曾。訊明該犯一族分住灤州及盧龍縣。該犯由直隸而至楚省。復來江南。到處傳教騙錢。楚省隨伊喫齋者。均稱其為爺。向伊禮拜。端坐不起。並各家款留。臨行致送盤費。在江省傳徒柳有賢。轉傳金棕有。改立收圓教。再傳而至逆犯方榮升。潛蓄異志。推原禍始。實由王秉衡傳教貽害所致。該犯盧龍原籍家中。現藏有九蓮如意皇極寶卷真經。元亨利貞鑰匙經等項。經卷伊族中向多喫齋之人。難保其家內無藏匿邪悖經卷。潛相煽惑之事。請嚴飭查辦等

清 實 錄 嘉慶二十年十月

語。昨據那彥成奏於盧龍縣緝獲王殿魁等犯。並查提王姓充徒各犯。分別審辦。石佛口王姓一族。世傳邪教。歷年久遠。蔓延數省。現已屢次犯案。著那彥成即派委幹員前往灤州及盧龍等處。將王姓族中習教之人全數收捕。勿令免脫一名。解至省城嚴行審訊。訊明後將為首傳徒者。問擬絞決。其為從者。分別發遣流徙。並向各該犯家中嚴密搜查。將所藏九蓮如意皇極寶卷真經。元亨利貞鑰匙經。及一切邪悖經卷。全行起出。封送軍機處呈覽。務令淨絕根株。勿稍留遺孽。除惡務盡。切勿姑息。將此諭令知之。○又諭百齡等奏拏獲習教匪犯王三保等。據供節次斂銀。遣阮鳳儀等。送給發配黑龍江。遣犯王雙喜及王王氏收用。並據阮鳳儀等供出王王氏與同配遣犯劉文魁等。傳徒習教。劉文魁原籍河南柘城鹿邑兩縣交界之大吳家集。與王王氏至戚。其兄劉文煥與弟劉文燦亦在

二二七

原籍河南傳教劉文燦常時送銀出口給劉文魁使用。本年四月內阮鳳儀在口外草地公主瓦房地方遇見劉文燦偕張禿子汪姓三人送銀轉回。至劉文煥弟兄各自傳教。不知其傳徒人數等語。劉文煥劉文燦二犯係已正法教匪劉文魁弟兄仍在河南傳教。實愍不畏法。著方受疇即遴派妥員至柘城虎邑交界之大吳家集地方嚴密訪拏該二犯獲案後訊明實係傳徒為首即按律定擬絞

實錄卷三二二

十一

決其張禿子汪姓二人。是否劉文燦同教。一併拏獲訊明究辦。將此諭令知之。○給安徽五河鳳陽懷遠靈璧四縣及泗州衛被旱災民口糧並蠲緩泗桐城潛山南陵蕪湖無為巢壽宿鳳陽懷遠靈璧鳳臺盱眙五河天長滁全椒和含山懷寧合肥蒙城涇貴池當塗繁昌太湖望江東流廬江毫三十二州縣及屯坐各衛新舊額賦有差。○辛巳上詣

奉先殿

壽皇殿行禮。○諭內閣治民之道不外教養二端六禮節性八政防淫古者道人木鐸宣諭化導使人易知易從意至善也直省生齒日繁民愚易惑近日傳習邪教匪徒如白陽紅陽大乘無為以及天主教各種名目輾轉煽誘。罹法者衆朕甚憫之。地方有司日役役於簿書錢穀而於化民成俗之原罔不講甚非所以佐朕致治之意也。因思各省學政皆

實錄卷三二二

十一

慎簡儒臣畀以教化之責。且按試州郡遠邇必週於該省風土人情無難察訪周知奸民倡為邪說頗蒙從而習之。或誘於財利或溺於淫邪均各有受蔽之由。著該學政各就按試之地察其民人所易惑者作為論說剴切化導其詞無取深奧但為辨其是非喻以利害明白淺近使農夫販豎皆可聞而動心發交各州縣官刊刻印刷於城市鄉村廣為張貼務俾家喻戶曉知所從違。至士為四民之

首該學政於接見士子時尤當諄切訓誨使以孝弟忠信禮義廉恥倡率鄉閭身以先之言以喻之由寡以及衆由親以及疏蚩蚩者氓耳濡目染有所觀感而興將日用飲食羣黎徧德久之遷善遠惡翕然成風斯邪說不足以誘之矣該學政等所作論說遇有奏事之便各錄稿進呈朕將親覽焉

實錄卷三百十一

李九

大清仁宗受天興運敷化綏猷崇文經武孝恭勤儉端敏英哲睿皇帝實錄卷之三百十一

大清仁宗受天興運敷化綏猷崇文經武孝恭勤儉端敏英哲睿皇帝實錄卷之三百十二

教坊

嘉慶二十年乙亥十一月壬午朔癸未諭

實錄卷三百十一

內閣御史孫世昌奏請嚴濫保不諳文理人員以重京察一摺所奏甚是京察為激揚大典各部院堂官自應慎選人才以備簡用如山西已革雁平道福海由工部司員保列一等外放道員與已革朔州知州明祥俱不諳文理一任幕友朦蔽播弄褫革治罪此等劣員該堂官當日何以濫行薦舉著吏部查明從前濫保該二員之堂官先行議處現在又屆京察之期各部院堂官務須精白乃心秉

公遴選以期所舉得人無瘕厥職儻仍將不諳文理之員徇情濫保外任經朕察出或由督撫糾叅即照濫保匪人例議處不貸將此通諭各衙門知之○又諭御史孫世昌奏東直門外新堡地方疊有挖棺竊物之案新堡近在輦轂從前金馬氏被賊鑿棺案懸未結現又有金王氏厝棺被挖之案該地方官何以不即為緝犯嚴懲實屬怠玩著順天府查明飭屬迅速嚴拏務獲照例懲辦以靖奸宄

實錄卷三十二

二

○兩江總督百齡奏江蘇辦賑勸捐出力人員知縣齊彥槐等加銜優敘有差○旌表守正捐軀安徽宿松縣民石秉麟妻陳氏○除江西清江新淦三縣水衝田二十七頃有奇額賦○甲申遣官祭

先醫之神○諭軍機大臣等朕聞川東一帶私梟充斥漢州彭山什邡犍為廣元昭化忠州等處梟徒白晝聚黨千百為羣搶劫鹽店嘉慶十七年七月間有鹽大使虞廷幹在雲

陽縣地方出場查井被梟徒拉出轎外剝衣毆打捆擲山澗該大使赴訴夔州府知府置之不問該大使忍辱而罷此事並未據該省奏聞川省鹽梟如此肆行日久黨徒衆多必致滋生事端於地方殊有關係著常明即將虞廷幹被毆一事查明據實具奏該處近日鹽梟情形是否斂戢應如何設法辦理俾無業貧民各有生計不致專以販私為業其兇橫不法者如何設法擒捕俾知儆懼務令日

實錄卷三十二

三

久相安勿得因循怠玩坐視養癰貽患也○又諭張師誠代監生况元禮呈遞策論一封朕留備披覽况元禮前經呈遞時務河務策兩次曾經加恩給賞此次復遞三策該生年已八十既無干求其所言亦無違礙無庸給賞亦不必治其越分之咎著張師誠即傳知該生令其自行回籍安分以養餘年勿許多事○擢浙江鎮海營叅將林孫為福建金門鎮總兵官○予四川陣亡都司郭成陝西陣

亡外委馬秀藍翎馬兵韓永祿河南陣亡外委張士俊雲南陣亡土練賀細利波保等祭葬世職如例○旌表守正捐軀河南西華縣民李智嶺媳許氏○戶部議准浙江巡撫顏檢疏報富陽定海慈谿象山瑞安蕭山六縣開墾地一百三十三頃五十畝有奇照例升科從之○乙酉

上詣

雍和宮行禮

宣仁廟

凝和廟

火神廟拈香○諭內閣晉昌等奏會同審擬酌酒生事之宗室一摺此案宗室奕讓恃醉逞兇無故至伊族孀郭羅特氏家內將雇工陳大等毆打並將郭羅特氏左手挫傷出言穢褻肆行欺辱該將軍等於審明後按律擬軍折園率請將奕讓移往吉林居住實屬有心推諉大非實心任事之道奕讓以宗室移

實錄卷百六

四

住盛京原責成該將軍等約束教導平時不加訓誨及至酌酒滋事即請移住吉林以為屏之他方伊等遂可卸責管事者只知推卸總不用實心辦理非人類矣若奕讓到吉林後再有過犯又將移往何處耶晉昌身係宗室職任將軍不應如此漠視著交部議處誠安廉善永祚一味因循隨同具奏俱著交部察議辦理宗室營房事務之文弼傑信未能豫為防閑自因將屆三年期滿該處現已揀

實錄卷百六

十

員豫備更代遂不認真管束文弼傑信著再留三年與接辦之員一同管理俟期滿請旨仍先交部議處祿康前經患病此次摺內未經敘及是否近已痊愈著該將軍查明遇便覆奏奕讓不准移住吉林著該將軍等傳齊該處宗室人等看視先行重責四十板俾共知儆戒再於所擬折園二年六箇月上加折園半年即在盛京園禁三年○諭軍機大臣等常明等會議前後藏需用火藥均由川省

製運一摺已降旨依議行矣。藏中需用火藥原額本止二千餘斤。嗣經松筠條奏添設行操合操。每年需用火藥四千八百餘斤。加增至一倍有餘。此時前後藏應用火藥統歸川省採辦。工料腳價費用較繁。著喜明等查明西藏舊例。每年各營共操演若干次。自松筠奏添行操合操後。每年共操演若干次。悉心籌酌。將後添之行操合操次數。量為覈減。較之舊例次數。仍屬加增。其每年動用火藥約計以三千斤內外為率。於製運畧為節省。而錢糧亦歸覈實。將此諭令知之。○丙戌。緩徵陝西潼關華陰榆林懷遠葭神木府谷米脂八廳州縣被水村莊帶徵額賦。○丁亥。以失察孜牙墩謀逆。降喀什噶爾叅贊大臣成寧三等侍衛。為烏什辦事大臣幫辦大臣永芹三等侍衛。為喀喇沙爾辦事大臣。○以副都統銜喜明為理藩院右侍郎。○戊子。上御懋勤殿。勾到直隸熱河山西情實罪犯。停

決直隸官犯一人。斬犯一人。絞犯十二人。山西斬犯七人。絞犯三人。餘一百人予勾。○以故喀爾喀土謝圖汗部土謝圖汗車登多爾濟子額依多布多爾濟襲爵。旌表守正捐軀河南淮寧縣民張涿魁妻周氏。○己丑。諭內閣。綿課等將宗人府團禁宗室覺羅事宜酌議章程具奏。其所請於寄存八旗官員賞俸項下餘剩利銀內撥銀二萬兩。交蘆商生息以利銀作為團禁宗室覺羅飯食爐火之費。著照所請辦理。議給飯食每名每日給銀二錢。由該管章京派役設廚代為製辦。其管理空室該班之筆帖式亦著添給飯食。與團禁人等飯食在一處製辦。毋令稍有區別。或烹飪失宜。不堪食用。致滋口角。至所稱團禁後有爭吵互毆等事。令該管章京板責一節。所議仍屬空言。斷不能行。該管章京職分較卑。令其看視責打若團禁之人不服管束。轉屬不成事體。嗣後團禁滋事者。如罪應板責。

著該管章京稟明該堂官親往看視責處。若情節重大再行具奏。其比照刑部監獄每月初二十六日。令宗室親族人等入內看視。初三十七日。令覺羅親族人等入內看視。不准婦人入內一節。亦屬未周。刑部監獄犯人。尚准母妻進監看視。團禁之宗室覺羅其母妻自應准其按期至空室看視。於關門時放出。此外親族人等之婦女。概不准放入。餘依議。○諭軍機大臣等。蔣攸銛等奏查明洋商拖欠夷人貨帳銀兩。業經停利歸本。請勒限分年清還一摺。此項洋商節年拖欠夷人貨帳銀兩。據該督等查明各行欠項。自嘉慶十七年至十九年。共還過銀一百三十萬兩零。現尚欠夷帳一百六萬零。按照欠數多寡。分定年限歸還。該商等經此次清釐之後。自遵照定限一律清還。毋令再有拖欠。惟是該夷人以貨易貨。乃戕斷盤剝。任令疲商賒欠。即明知亦有不得過十萬之舊章。朦朧匿報。亦應

嚴行飭禁。近年內地銀兩為外夷貿易攜去者動逾百萬。日久幾同漏卮。著該督撫及該監督留心稽察。如外夷有以奇巧貨物攜至洋行重價求售者。該監督斷不准用重價購買。呈貢亦不許私行留用。此等物件。飢不可食。寒不可衣。令其將中土財貝潛就消耗。太覺不值。殊為可惜。果能實力禁絕。該夷人等知內地不寶異物。不能行銷。則來者漸少。易去銀兩亦必日減。亦節財流之一道也。將此諭令知之。○庚寅給河南陝靈寶二州縣地震災民一月口糧。○除江蘇靖江縣坍廢地一十九頃二十七畝有奇額賦。○辛卯諭內閣。本日六部各衙門俱無陳奏事件。自係因明日為御門辦事之期。各該堂官等皆須進內。即有應奏之摺。亦統於明日呈遞。本日姑且高眠。以遂其安逸之私。每歲冬令。往往如此。朕屢申誥誡。而因循疲玩積習。仍復未除。夙夜匪懈之義。謂之何哉。除內廷行走諸臣

常川入直刑部昨日甫經奏事外其餘各部院衙門堂官俱著傳旨申飭嗣後務激發天良各勤其職於所辦事務盡心經理應奏者即行陳奏應引見者即行帶領勿得任意耽延致有積壓儻經此次訓飭之後仍復玩泄從事即責令該堂官等朝朝待漏以儆其情毋謂教戒之不早也（壬辰）

上御乾清門聽政○諭內閣翁元圻奏本年應行搭運通米請分兩年帶運一摺本年湖南

省應行灑帶運通米六萬四千石該軍船尚有裝運額糧若灑帶過多丁力未免拮据著照所請准其分限於二十二年均勻搭運○以太僕寺卿齊布森為都察院左副都御史前任陝西布政使慶蛟為通政使司通政使○旌表守正捐軀浙江臨海縣民何名洙妻金氏○癸巳

上御懋勤殿勾到朝審情實罪犯停決官犯五人斬犯三人絞犯十三人餘十一人予勾○

諭軍機大臣等朕聞湖南州縣官遇值歉歲詳報多有不實詞訟到官不即為聽斷輒先索取陋規有掛牌投到門規房規鋪堂坐堂各項名目每項索大錢數十千不等而出票簽差更多需索一有株連即至累月經年盜案賊贓已獲捕役等每勒捐不發索取銀錢被盜之家多不願領取原贓甚且捕役賣盜誣扳拘繫良民圖賴嚇詐交納錢糧時州縣官私加名色有短封補水補平投匱上累等

項每兩定數之外私加銀六七錢不等又該省大員因公過境地方供應每年所費動輒數千兩雖經飭禁而陽奉陰違迄未裁革以上各款均於吏治攸關該省果否有此積弊已哈布係新任之員無所庸其迴護著於入境時詳加察訪如查有前項弊端即嚴行禁革以飭官方而安民業（甲午）

聖祖仁皇帝忌辰遣官祭景陵

上詣

壽皇殿行禮○乙未諭軍機大臣等御史盧浙奏直隸省官荒地畝並各項入官地畝積案久延請旨勅令總督遴員查辦一摺直隸天津豐潤青靜海滄鹽山任邱寶坻寧河九州縣馬廠官荒地六萬五千八百餘頃豐寧縣馬廠入官地五千餘頃及旗員抄產入官並入官抵項私典入官地畝未經辦結者共一百九十六案屢經戶部奏准降旨飭令該督等委員勘丈召墾升科乃因循已久有閱十餘年或數十年尚未勘報者實屬怠玩疲懈若係官吏本家私田孰肯聽其荒廢耶先公後私之良臣竟少深可浩歎茲據該御史奏稱查明天津滄州等九州縣官荒地畝除造報升科外尚有未丈地萬頃有奇聲請展限迄今二載仍屬虛懸等語此項官荒並各項入官地畝坐落該州縣境內若果認真查勘何至事隔多年尚未勘報完竣現在直隸候

補人員甚多著那彥成於候補之道府丞倅

州縣內遴選妥幹能事者數人派令分赴各該州縣將此項官荒地畝詳悉查明其已經勘報者即行報部升科未經勘報者逐一履勘普行召墾按則升科報部並將各項入官地畝分別變價招佃一併迅速辦理如有奸胥猾吏侵隱霸占從中抗違者查出從嚴懲辦所有派出各員責成專辦此事毋得另有差委該督酌定期限先將該員等名姓開單具奏如果能認真查辦妥速歲事俟辦竣後奏明將該員等儘先補用以示鼓勵儻玩泄從事即行撤回叅處將此諭令知之○旌表守正捐軀四川雅安縣民雷振遠妻王氏○丙申諭內閣御史胡承珙奏整頓直省虧空弊端一摺所奏俱是國家倉庫錢糧原不應絲毫虧缺乃各直省積弊相仍現在江蘇山東安徽等省已節次嚴飭查辦究其致虧有由不塞其源徒截其流就令一時彌補有效

日久難保不仍蹈故轍。即如藩庫濫行借放。由於支發錢糧有扣成之弊。利其多扣。遂將不應借之款。不應借之員。概行借放。自應嚴行禁革。以杜冒濫。州縣之虧空。由於交代不清。上司抑勒。後任接收。逾限不行。結報務令遵照定限。一有遲逾。即行揭叅。儻上司扶同徇隱者。一併從嚴懲辦。至於動用錢糧。各令依限報銷。毋得藉詞延宕。日久愈滋牽混。其攤捐津貼名目。日增。州縣派累繁多。安得不形竭蹶。著各藩司剔除冗濫。逐一加大刪減。以甦其困。若升調各缺。則全在大吏公正嚴明。為缺擇人。毋為人擇缺。並以操守之廉潔。出納之謹慎與否。分別舉劾。以為勸懲。庶俾吏盡賢能。人知奉法。漸可塞其漏卮。凡此皆屢經飭諭。該督撫其各矢天良。實力整頓。視國事如家事。各飭所屬。痛改因循。急玩積習。洗心革面。日起有功。儻仍罔知悔改。視侵帑為故常。則國法具在。毋謂誥誡之不早也。將

此通諭知之。○又諭本日戶部等衙門議覆川省勦辦中瞻對軍需條款。內將賞需一款。議駁均已依議行矣。我朝開國以來。無論大小軍務。從無帶兵大臣擅取銀兩什物作為軍需之事。自福康安帶兵勦辦臺灣。廓爾喀。湖南苗疆。歷次任意咨取犒賞。由銀兩綢緞。以至布匹烟茶。無所不備。在福康安當日。原係假犒賞為名。於領到後。除給賞之外。盡皆飽其私橐。以後遂紛紛效尤。藉此名目。虛糜帑項。揆厥由來。實福康安為之作俑。方今寰宇承平。自可無兵革之事。即或偶有徵調帶兵大員。總不許擅取官帑。以為私犒報銷冊內。將犒賞一項名目。永遠革除。如有帶兵大臣違禁。向承辦軍需之人。咨取賞需者。即令承辦軍需之人。據實參奏。將帶兵大臣治罪。若承辦軍需之人。徇隱濫應。除不准開銷外。仍將帶兵大臣及承辦軍需之人。一併治罪。決不寬貸。○丁酉月食。○賞八旗兵丁一月。

錢糧○緩徵甘肅臬蘭金靖遠安定隴西平
羅西寧鹽茶八廳縣。雹災旱災霜災新舊額
賦○戊戌諭內閣。伊瑪依爾。於政才敏起意
謀逆時。能不顧私親。立時稟首。實為深明大
義。著加恩賞給七品伯克。以示鼓勵○己亥
諭內閣。朕恭閱

世祖章皇帝實錄。內載順治十三年

諭禮部。治天下。必先正人心。正人心。必先黜邪
術。乃有左道惑眾。如無為。白蓮。聞香等教名

色。邀集結黨。夜聚曉散。小者貪圖財利。恣為
姦淫。大者招納亡命。陰謀不軌。屢行禁飭。餘
風未殄。京師輦轂重地。借口進香。張幟鳴鑼。
男女雜遘。喧填衢巷。公然肆行無忌。若不立
法嚴禁。必為治道大蠹。爾部大揭榜示。今後
再有踵行邪教。仍前聚會燒香。斂錢號佛等
事。在京著五城御史。及該地方官。在外著督
撫按道。有司等官。設法緝拏。窮究姦狀。於定
律外。加等治罪等因。欽此。

聖訓煌煌。仰見我

世祖崇正。黜邪。思患豫防之至意。無為白蓮。聞
香等教。自順治年間。已有此名目。百數十年
來。重典懲治。所辦鉅案。不一而足。至前年林
清等犯門倡亂。仍由邪教而起。近又有方榮
升。藉興復舊教。潛蓄逆謀之事。雖已悉就誅
夷。但恐愚民迷惑者多。仍未能盡知悔悟。因
思奸民倡為邪教。其始不過一二人。私立會
名。斂錢惑眾。地方官若果能認真查訪。立即

捕拏懲辦。自不至糾集多人。漸成滋蔓。即如
林清方榮升。皆係邪教案內。為從擬徒之犯。
其初未必遽萌異志。當其謀復舊教。倡首傳
徒之日。地方官漫無覺察。無人過問。迨徒黨
漸眾。遂有陰謀不軌之心。若及早查辦。何至
如火燎原。變生倉猝耶。著通諭京城及各直
省官吏。有地方之責者。凡有習教結會之事。
一經訪聞。即將為首之人。迅速擒捕。按律嚴
懲。毋稍存姑息之見。以為自積陰功。不知養

癰貼患縱令煽惑多人釀成逆謀則生靈荼毒玉石俱焚其所損陰陽甚大若懲一儆百使鄉曲愚氓皆知邪教為必不可習之事漸染日少所保全者衆矣諸臣當明於大義為國家除邪去惡不可存婦孺之仁而忘弭患於未形也朕法

祖垂訓永保蒼生諸臣若視為故套漠不關心非我族類矣將此通諭知之○又諭大清一統志於嘉慶十六年交國史館補纂當經該

館行文各直省將建置沿革職官戶口人物一切裁改各事宜限半年內查明送館以便勒限纂校乃已聞五載各直省視為不急之務或全不登覆或遺漏舛錯實屬疲玩著各該督撫分飭所屬查照該館咨取事宜迅速詳查造具清冊送館毋得仍前延玩○又諭都察院奏安徽婺源縣民人吳新慶以遵例請禁鬻妻溺女惡俗具詞呈訴等語陰陽化生人道之始若民間生女皆棄而不育則生

息何由而蕃至夫婦列在五倫非實犯七出之條者豈宜輕棄如該民人所稱該處地方產女之家因貧起見往往溺斃夫婦每因小故輒相離異實屬惡俗著將該民人原呈發交百齡查辦先出示嚴行禁止並設法妥為化導以革澆風而正倫紀其各省有似此者均著一體示禁民人吳新慶著都察院飭令自行回籍○又諭綿課等奏審訊平寧砍傷圖克坦一案請將平寧鎖禁圖克坦重責六

十板所擬任性顛倒甚不平允此案平寧等與圖克坦聚賭平寧輸給圖克坦錢二百串先自行劃傷圖賴嗣圖克坦向索賭欠平寧又用刀砍傷圖克坦三處今平寧折圖議罰轉將圖克坦實責誠所謂惡之欲其死何以折服圖克坦之心平寧著管理宗人府王公等看視重責三十板仍在空室鎖禁一年期滿釋放罰養贍銀七箇月圖克坦本係永遠鎖禁之人罪無可加著免其板責○以服闋

總兵官范建志為巴里坤總兵官○庚子諭內閣御史盛惇大奏外任官捐升及為子弟報捐人員請申明前旨飭查經手倉庫一摺外官有倉庫之責者既已有力捐輸若於所管倉庫復有虧短即明係侵挪國帑報捐官職是以前經降旨令將該員等或本身捐升或為子弟報捐者均責成該管上司查明經手倉庫如有虧挪即據實報明除不准報捐外仍照虧空例治罪今據該御史所奏此次

報捐道府者共六十餘員由外任捐升者即有三十員是道府兩項由外任本身捐升者已及其半則其餘捐升他職及為子弟報捐者自必不少此項人員皆經戶部於遞呈後咨查各省其中私挪帑項者實不能保其必無乃惟王旭昇一人經御史孫汶指參外並未據各該省督撫有查出參奏者自係各該管上司因其已成之功名不忍揭叅姑為出結以俟設法籌補此等遷就瞻徇積習實乃

必有之事其於取攜公帑自便其私之劣員徇情姑息則所謂清釐倉庫者仍屬空言粉飾著再通諭各督撫將前項本身捐升及為子弟報捐人員於經手倉庫有無虧短據實確查如有侵挪情弊立即叅奏除將該員捐項抵補虧數外再有短缺即勒限著追仍按律治罪既經該上司自行查出即從前濫行結報之咎概予寬免儻經此次訓飭之後仍有瞻徇朦混者別經發覺必將該管各上司

從重懲處決不寬貸○蠲緩甘肅宜禾縣旱災本年額賦有差並貸口糧○

上以冬至祀

天於

園丘自是日始齋戒三日○辛丑諭內閣那彥成奏提審張洛焦師來明等供情狡黠難憑請解部究辦一摺所奏取巧推諉大屬非是此案先由直隸獲犯張五將張洛焦等供出江南拏獲張洛焦訊據供認與師來明等有

習教從逆之事。旋復翻供。嗣經陝省將師來明拏獲。先後將各犯俱解至直隸。交該督歸案審辦。茲該督因所訊張洛焦等。師來明供詞與江南陝西原供全不相符。輒謂該犯等鬼蜮叵測。或與林清案內諸逆交結往來。見面必能認識。請將張洛焦等解送刑部。令董惲太等認明。究辦。張洛焦等。並非林清案內供出指拏之犯。與董惲太等。毫無干涉。安能辨認年貌。豈各省教匪。皆待董惲太等認準。方可定案乎。那彥成身任總督。辦事多年。盛泰本係刑部出色司員。簡用臬司。案內犯證俱全。何難推鞠得實。乃如此巧於謝責。大乖實心任事之義。那彥成。盛泰俱著交部議處。仍傳旨嚴行申飭。此時張洛焦等犯。如已起解。距京城甚近。即交刑部監提。董惲太等姑一辨認。亦不令刑部訊供。仍發交原解官帶回保定。交該督督率該臬司審訊結案。○壬寅上詣

南郊齋宮齋宿。○癸卯冬至祀天於圓丘。上親詣行禮。○遣官祭永陵。福陵。昭陵。昭西陵。孝陵。孝東陵。景陵。泰陵。泰東陵。裕陵。○遣官祭孝淑皇后陵。寢。○遣官祭端慧皇太子園寢。○停次日朝賀。○乙巳刑部奏審擬逼姦致死三命一案。得旨。此案鄭源挾制逼姦高殿元之妻耿氏。致高殿元夫

婦被逼難堪不敢控告先將幼女住妮招贅
寫立冤狀分揣懷內一同自縊殞命情殊兇
慘鄭源著即處斬餘依議嗣後如有似此因
姦威逼致死一家三命者毋庸定擬斬監候
即照此案定擬斬決著刑部載入例冊遵行
○以病痊侍郎貴慶署理藩院右侍郎○工
部議准直隸總督那彥成疏報定州墾種河
灘淤地二十六畝有奇照例升科從之○丙
午

上詣

壽康宮行禮○幸瀛臺閱冰技○諭內閣本月
二十日御史果良額奏拾獲匿名揭帖一封
內係訐告禮親王昭槤各款其時朕居齋宮
因在
圓丘大祀齋戒期內未即明降諭旨查辦祇將
原揭帖交英和密行查訪其揭帖內有凌辱
大臣一款從前朕即聞昭槤有與景祿爭論
之事二十四日召見景祿詢問據稱伊上年

四月內進內接班時方辰初二刻昭槤以時
已巳正向其呵斥維時蘇楞額晉隆亦在內
接班當以景祿辰刻到班並未遲逾向其勸
阻昭槤則稱伊與景祿本有嫌隙並斥言景
祿至刑部每審一案總可獲銀一二千兩等
語又據景祿奏昭槤並曾面斥尚書景安為
伊家奴才經景安正言駁斥欲行奏聞為人
勸阻而止即此二事其凌辱大臣一款已為
有據又聞伊家管事之人稱為軍機中堂此

一款最重英和並訪得昭槤曾將伊門上人
鳴山鎖禁一年又遣人至昌平州拆毀莊頭
房屋抄沒家產並剋扣門上人錢糧等事昭
槤以親王如此肆意橫行豈可不加懲辦著
管理宗人府王公會同軍機大臣嚴行查問
並著英和前赴伊家查起非刑器具及鐵鎖
石墩據實具奏○丁未諭內閣禮親王昭槤
被訐各款昨派宗人府王公會同軍機大臣
查問據昭槤供認各款如與景安爭論王府

屬下名分綦嚴此語甚屬狂妄妄自尊大目無君上失為屏為翰之義實自暴自棄之徒景安一品大員與王公等同屬朝臣且與昭榑並不同旗非其屬下何得妄行指斥至景祿上班即或稍遲並前在刑部有婪贓之事昭榑祇當據實叅奏亦不得出言凌辱至伊於府內濫用非刑現據英和起出鐵鎖鑊鐐木椿等件並將受傷之莊頭程建忠程建義傳案經宗人府王公軍機大臣等驗得程建

忠等脊背均用磁瓦岔刺血痕遍體不忍寓目詢係因逼令增租不從即橫加敲扑以酷濟貪即此三款已不勝親王之任若係朕之子姪及近支晚輩用此非刑虐下朕必親視重責昭榑著革去王爵交宗人府於空室暫行圈禁其餘應訊各款及一千人證著宗人府王公軍機大臣會同刑部審訊昭榑應得罪名俟全案奏上時一併定擬具奏此旨著上書房照繕存記○又諭刑部具題因姦謀

死幼子之曲朱氏一本曲朱氏因姦謀死親生之子本內擬以絞監候秋後處決經朕看出以為毋無償子命之理舊例應永遠監禁飭部詳查覆奏今據查明實係應入緩決永遠監禁之犯該部引例錯誤奏請更正分別議處所有承辦此案之刑部司員著交部嚴加議處刑部堂官著交部議處內閣票簽之員並是日看本之大學士未能查明駁正著一併交部察議○又諭成格等奏審擬衙役

賄匪頂認燒竊屠棺一摺此案前據顏檢具奏獲犯訊擬經刑部駁令覆訊顏檢仍照原審情節奏覆又經御史蘇繹叅奏朕特派成格等前往審辦茲據成格等訊明顏檢所獲竊犯俞瑞祥等係由捕役畏比賄囑頂認並非正犯顏檢辦理此案實屬錯謬所有案內真賊尚無一名就獲著即飭屬迅速嚴拏勿任漏網錢塘縣知縣陸玉書草率定案著即革職留於地方協緝率行審轉之杭州府知

府嚴榮調任臬司廣慶俱著交部照例議處署杭州府知府涂以翰並未承審覈轉惟未能查出實情著交部察議顏檢係屢經獲咎棄瑕錄用之人於特旨查辦之案不能虛心研究兩次審擬悉被屬員欺蒙無能已極著交部嚴加議處其餘所擬罪名著刑部覈議具奏○又諭烏慧裕等奏審明習教首從各犯分別定擬一摺此案傳習邪教念呪斂錢傳徒惑眾各犯除王助大監斃外孫家望蔡奉春楊添玉俱著即處絞其邀引孫家望拜師之戴添幅與煽惑為首無異亦著即處絞餘著刑部覈議具奏所有首先訪獲案犯之知縣翟中倫巡檢孫紹棠俱著送部引見再降諭旨協同拏獲之候補知州鄭偉把總邵夢元著交部議敘○緩徵湖北京山漢陽二縣及屯坐各衛水災本年額賦○戊申諭內閣據方受疇奏豫省拏獲紅鬚匪徒二百餘名請將失察在先之地方文武處分酌予寬

免等語紅鬚匪徒久為地方之害前經降旨令該州縣實力翦除不復究其既往即如逆案各犯地方官有能拏獲者尚當免其從前失察處分加以獎擢若該省因現獲匪犯究出從前搶劫斃命并私造私藏違禁兇器販私賭博等案歷年未經報官一一追溯叅處則緝捕各員多所瞻顧轉致心生懈弛所有該省承緝各案除正兇未獲應行限緝者仍照例開叅外其報獲各案從前失察之地方文武員弁均著加恩免其處分該撫益當督飭所屬認真緝捕除莠安良毋得日久生懈○諭軍機大臣等據松筠等奏查明初與孜牙墩同謀之布魯特比圖爾第邁莫特訊供定擬一摺此案孜牙墩糾眾謀逆前據成寧等奏報降旨令松筠前往喀什噶爾查辦松筠到彼已閱四旬有餘尚未將逆首孜牙墩等正法茲又奏稱布魯特比圖爾第邁莫特反側無定當未擒首逆之先飭令協勦該比

竟不同行。以致官兵間有傷亡。其卡倫被戕。官兵器械。並孜牙墩全家衣物。盡被該比之人搶去。成寧等知其詭詐。羈縻差委。正在設法查辦。適松筠到彼。向其告述時值。頒到賞件。因一面傳令。祇領一面。密諭阿奇木伊薩克。設法詢其實情。經伊薩克設席邀請該比等。敘言世好。圖爾第邁莫特隨已吐露。似與孜牙墩有同謀情事。適貢楚克扎布到任。會同派員詰訊。孜牙墩供稱。與圖爾第邁莫特。上年八月有抱。經發誓有事互相幫助等情。當將圖爾第邁莫特鎖拏。審訊該比供認。曾與孜牙墩抱經發誓言定彼此有事互相幫助。本年八月初三日夜間。民人高建洛在孜牙墩莊內。風聞其將赴城鬧事。即向圖爾第邁莫特住所詢問。該比支吾不過。向說聞得孜牙墩意欲鬧事。令該民人自行赴城稟報。成寧永芹當派筆帖式霍隆武。以花翎荷包前去獎賞。該比已帶人乘馬執械。欲幫孜牙

墩見霍隆武知事已洩。詭言恐孜牙墩來搶。游牧故為豫備。至初六日始帶數十人前赴永芹軍營。稟請隨營効力。永芹知其詭詐。羈縻差委。所有戕害官兵搶劫馬廠。盡係圖爾第邁莫特約令布魯特愛勒奇伯克並柱瑪帶同孜牙墩之人所為。請將圖爾第邁莫特定擬斬梟等語。此案成寧等初次奏報時。首敘八月初三日民人高建洛來城稟報。據布魯特比圖爾第邁莫特囑伊送信來城。有該莊回匪勾引布魯特欲於初四日搶城。稟知速為豫備等語。其圖爾第邁莫特詭詐情形。成寧等屢次奏摺。從無一字提及。何以轉向松筠備述。即松筠前幾次奏摺。亦無一字提及。今忽有此奏。實屬可疑。如該比果有助逆情事。當民人高建洛向其查問時。該莊距城一百五十里。圖爾第邁莫特既係同謀。何難立時將高建洛殺害。或就近縛送孜牙墩處。一面帶人與孜牙墩同來搶城。乃縱令高建

洛連夜來城稟報使官兵得以先發逮成寧等遣筆帖式霍隆武以花翎荷包等物前往獎賞霍隆武僅止一人彼時該比業已乘馬執械既欲抗拒官兵又何畏霍隆武一人而不加戕害至松筠令伊薩克密行詢問伊薩克僅設席相邀一飯該比何遽將謀逆真情向其吐露且該比如與孜牙墩同謀在先後又幫助官兵協拏逆黨孜牙墩必懷憤恨何以兩月以來總未供扳直至十月二十以後

松筠派人詰訊始行供出種種疑竇殊難憑信非朕不信松筠恐松筠受伊薩克愚弄為鐵保之續耳現已有旨飭令松筠速回伊犁著長齡於接奉此旨後即帶伊犁將軍印篆由木素爾達巴罕前赴喀什噶爾並帶伊犁明白通事將此案另行審辦途中與松筠相遇以上各情節不許洩露一字密之慎之先將印篆交其帶回伊犁並已有旨令成寧永芹仍回喀什噶爾幫同長齡查辦長齡到彼

後即提圖爾第邁莫特覆行審訊並傳到民人高建洛與筆帖式霍隆武令將當日初與該比見面時話言情狀詳細敘述毋稍隱漏謀逆重情非一二人所能為無難查訪得實如訊明圖爾第邁莫特實係助逆自應照松筠原擬奏明辦理不可疏縱若該比並無同謀助逆情事且曾協同官兵查拏逆黨今以疑似之情置之重辟邊疆重地若各布魯特俱心懷不服所關匪細事關國家要務長齡

不可因松筠已有此奏稍涉迴護務與成寧永芹同秉公心虛衷研鞠不可稍有成見儻松筠所奏竟係輕疑妄聽則將松筠據實叅奏毋稍徇隱其孜牙墩等應行正法各犯如無應訊之事長齡到彼後即先行分別辦理附報奏聞將此諭令知之○免山東積年歉收並被賊滋擾之曹定陶二縣積欠額賦漕糧○己酉諭內閣綿課等奏會訊已革禮親王昭棟勒逼莊頭程幅海增租將程建忠程

建義非刑酷虐各情此案程幅海之子程建義充當莊頭二年並未欠租兼有長交租錢昭槿因于大海增租謀充莊頭即將程建義革退並令照于大海加增之數加我二年租銀程建義之父程幅海不從昭槿派護衛柳長壽前往程幅海家搶割莊稼拆毀房屋又將程幅海父子叔姪六人圍禁昭槿自擲磁瓶於地用磁片劃傷程建義程建忠脊背百餘道至於流血昏暈似此以酷濟貪虐我赤子實出情理之外我國家永不加賦正賦錢糧祇於按例催徵每遇水旱偏災仍必加恩蠲緩即如昨日山東曹定二縣豁免錢糧即有二十餘萬此外歷年所降恩旨蠲免者殆不可數計蓋損上益下民說无疆全黎庶之身家保國家之根本各王貝勒家衣租食稅亦當仰體此意豈宜分外苛求恣行貪虐昭槿承受世封席豐履厚平日以田租細故在順天府步軍統領刑部等衙門涉訟纍纍而

實錄卷三二

三

於府第中仍如此非刑虐下實屬奇貪異酷僅止革去王爵不足蔽辜俟結案時仍當治以應得之罪二等護衛柳長壽為助虐爪牙復侵入己銀一百兩著即革退動大刑夾訊嚴審治罪程幅海長交租錢二百九十一千零及被割莊稼變賣錢八百九十三千零並搶毀各項什物及拆毀木植著派秀寧穆彰阿彭希濂往該府照數提取至刑部傳程幅海等當堂給還並罰昭槿出銀二百兩分賞橫被非刑之程建義程建忠即予省釋此項地九頃六十畝著即撤出王府賞給貝子奕純仍令程幅海承充莊頭以示矜卹于大海謀充莊頭從中播弄著革去莊頭交刑部加等刑訊治罪昭槿如此妄為恐此外尚有別項殘酷款跡其頭等護衛布音圖德寧俱著解任同該府管事太監劉金磬一併交刑部隔別研訊供詞據實具奏○又諭給事中程贊寧奏嚴禁承緝各員派令家人干與捕

實錄卷三三

三五

務一摺。各衙門承緝人犯。原應責成在官捕役。認真偵緝。其或訪有要犯蹤跡。密派誠實家人。幫同踴訪。尚屬可行。但不得專任家丁。令其干與公事。藉端招搖。擾累如有因此滋弊者。除將該家丁治罪外。仍將派往之員懲處。○庚戌。

上幸瀛臺閱冰技。○諭內閣。戶部議覆那彥成奏酌定買補缺額倉穀各款一摺。直隸省各州縣常平倉穀缺額至一百五十餘萬石。自

實錄卷一百三

三六

應趁此年歲豐稔。糧價平減之時。分別買補。其採買價值。除旗租不准動用外。准其按照例價。將賑缺。豁缺。撥缺。穀石。在於司庫地糧。并恩賞經費。及當雜稅等項銀內。動用。虧缺穀石。在司庫追存穀價本款銀內。撥給。糶缺穀石。在糶存原價內。撥給。至籌酌採買收貯。盤驗稽察各款。俱照該督所奏辦理。惟立法既詳。總須行之以實。不得徒託空言。該督即督率藩司道府等。責令各州縣認真經理。務

俾實貯倉廩。如有短買虛報。及勒派病民等弊。查出。嚴行叅辦。該省自嘉慶三年至十二年。節經奏報買補穀五十七萬餘石。今復奏請買補穀一百五十餘萬石。係因何案。續行動缺。著該督查明舊缺若干。續缺若干。分別報部查覈。其出糶穀價。例應解存司庫。今該省有糶存各府州縣銀二萬餘兩。錢二萬二千餘串。易啟挪移之弊。並著查明各該處除應留買補穀價外。其餘概行提解司庫。以杜侵欺。再十二年該省奏報買補穀十五萬餘石。迄今已閱八年。尚未報銷。疲玩已極。著迅速查明報部覈銷。毋得新舊牽混。致滋弊竇。○緩徵山西解平陸芮城安邑虞鄉五州縣地震本年額賦。

實錄卷一百三

三七

弛邪教萌蘖滋生後遂釀成大案迨由貴州巡撫降補郎中因一時簡用乏人又加恩擢授浙江巡撫顏檢蒙屢次棄瑕錄用之恩自當倍圖奮勉乃仍復因循怠玩無能已極且年已就衰難望振作即著照部議革職回籍家居閉門思過其率據原招覈轉之杭州府知府嚴榮前任浙江按察使廣慶及未能查出實情之署杭州府知府涂以翰俱著照部議降調○調雲南巡撫孫玉庭為浙江巡撫

實錄卷三十三

二

以四川布政使陳若霖為雲南巡撫廣東按察使李鑾宣為四川布政使雲南迤南道劉珏為廣東按察使四川建昌道李堯棟為貴州按察使○癸丑諭內閣御史舒英奏州縣自理詞訟毋任積壓一摺地方詞訟原應隨時訊斷依限完結若民人先在本州縣呈控或積壓不辦或審斷不公赴上司衙門申訴自不得仍發本州縣審辦致滋迴護屈抑至所稱請將簡缺州縣積至十案以上者即不

准調繁缺州縣積至二十案以上者即不准保薦題升州縣衙門牒訴紛紜繁劇之區一日可至數百起何由截數且恐各牧令欲博訟簡之名意存消弭憚於接收呈詞使民情益無從剖訴是防弊而適以滋弊也該御史所奏不可行○甲寅調河南布政使姚祖同為山西布政使山西布政使吳邦慶為河南布政使浙江按察使明山為廣東按察使以江蘇蘇松常鎮道魏元煜為浙江按察使調

實錄卷三十三

三

貴州按察使李堯棟為江蘇按察使江蘇按察使毓岱為貴州按察使○鑄給湖南永綏協中軍都司關防從總督馬慧裕請也○乙卯

上幸瀛臺閱冰技○旌來守正捐軀山西太原

縣民武定邊女武氏○丙辰

孝惠章皇后忌辰遣官祭

孝東陵○諭內閣策丹奏請將改遣人犯籍詞不行接遞之防守尉等分別議處一摺此事

先經富蘭具奏已有旨令策丹查叅茲策丹奏請將和莽阿等五人一併議處殊欠分晰駐防營接遞遣犯由來已久自有一定章程此次玉田駐防營何以忽藉口漢字票文遂不接收轉遞如防守尉和莽阿係甫經到任不諳成例該防禦等不將舊例告知則其咎在該防禦等若和莽阿到任已久此次忽藉詞推諉該防禦等隨同附和不行阻止則其咎當以和莽阿為重究係何人主見著該副

平定本三十一

由

都統仍遵前旨據實查明將首先起意推諉之人奏請交部嚴加議處隨同附和者交部議處策丹駐劄密雲未能兼顧其自請交議之處著加恩寬免○旌表守正捐軀河南扶溝縣民聶句妻李氏○丁巳諭內閣宗人府軍機大臣會同刑部審明昭捷被訐各款分別定擬具奏昭捷妄自尊大輒敢陵辱大臣此一款情節最重景祿被其指斥得賊忍辱不行奏辦尚無不合景安係一品大臣被昭

捷指稱係其屬下爭論名分彼時景安亦知忿怒乃因旁人勸解遂隱忍不行叅奏殊屬非是景安著交部議處昭捷利慾熏心貪得無厭將其屬下莊頭人等禁押府內非刑酷虐種種貪暴無狀孽由自作昭捷前已革去王爵著照議園禁三年以示懲創柳長壽助虐橫行又婪贓入己于大海行賄謀奪莊頭架詞聲譽情節俱尤為可惡柳長壽于大海著加枷號三箇月于二海隨同濟惡加枷號

平定本三十一

下

一箇月滿日再行發往黑龍江等處當差餘俱照擬完結昭捷以田租細故輒咨刑部催追甚至如此案程建義長交租錢仍復捏詞追比實屬倚勢妄為嗣後各王公等田租永不准咨部催追各令自行辦理如有違旨咨部者該部除駁回不理外仍即指名叅奏○又諭禧恩奏審訊主事巴彥圖與拜唐阿圖善互相稟訐定擬具奏一摺各處設立文武大員遇有官民控訴事件應即剖判曲直訊

明定擬奏上時或交部叵議或以所辦未允派員覆訊若案未訊明即先請送部無論刑部事務繁多將日不暇給伊等自問所司何事此案主事已彥圖與拜唐阿圖善係屬姻親祇以借貸不遂致相稟訐永錚等無難立時傳案訊明情由將圖善責革完案儘可無庸具奏乃率請解送刑部經朕特派禧恩到彼提集兩造一訊即明似此細故豈永錚等即不能審出實情實屬有心推諉不肯任事

永康年紀尚輕自係隨同永錚文孚二人列入奏永錚文孚二人中又必係文孚主見永錚文孚俱著革去花翎文孚著罰俸三年永錚罰俸二年永康罰俸一年俱毋庸再交部議餘俱照禧恩所擬完結又諭衡齡奏縣令因災驚悸出缺一摺本年山西蒲解等處地震被災較重該撫接到該州縣稟報即應親身前往妥為安撫乃僅委藩司吳邦慶馳赴查勘並未親往迨派那彥寶齋帶賞銀

親往撫卹聞那彥寶曾知會衡齡同往該撫仍因循未去經朕降旨飭諭始行續往可見該撫於災黎疾苦漠不關心茲據奏稱平陸縣知縣陸樟因地方猝被重災心神驚悸赴廟申訴願以身禳旋即自縊該撫尚疑其因虧缺畏累輕生若因畏累早已輕生必待因災藉口設無災異如何辦理衡齡糊塗極矣經查明倉庫並無虧短陸樟與民同患憂戚捐軀殊堪憫惜陸樟著照軍營病故例賜卹

該故令家屬即著衡齡捐貲安為送回原籍諭軍機大臣等景安等奏查明涇州倉糧虧短及動用採買價銀一摺景安等甫入甘境即查出涇州額徵倉糧虧短至四千餘石之多並將採買價銀動用涇州知州舒保署知州王澈俱著革職交景安等提至甘肅省城嚴行審訊該員等任所旗籍貲財均著查封備抵涇州一處如此其餘州縣似此者自復不少現在景安等徧行挨查不必逐處陳

奏查有虧缺處所。即將該州縣革職。提省嚴訊。俟將河東查明彙奏後。再行查辦。河西甘省州縣如此虧缺。疊疊自應徹底查明。致虧之由其採買之名。始自何年。因採買而作弊。又始自何年。舊任督臣。必須嚴叅。各州縣或係侵吞入己。或係挪移動用。俱一一分晰。究明。覈辦。毋稍含混。先福到任後。如有扶同。弊混情事。亦即據實奏至。舒保所稱軍需墊辦銀八千餘兩。藩司僅發銀二千餘兩。尚有

六千餘兩未發。此項銀兩。該藩司應否給發。一併查明具奏。其另片所奏。籌買兵糧一節。著景安等於到省後。即會同覈明。實在應買數目。先於陝甘二省。籌款採買。再行請撥。歸款。將此諭令知之。○撥江寧藩庫銀三萬三千五十兩。賑高郵寶應三州縣被水災民。○戊午。

上幸瀛臺。閱冰枝。○戶部議准。調任雲南巡撫孫玉庭。疏報陸涼河。西文山。恩樂四州縣開

墾地九頃九十五畝。有奇。照例升科。從之。○己未。諭內閣。吏部奏。戶工二部失察。書吏冒領庫銀。案內降調。捐復人員。及上次京察。列為一等奉旨。改為二等人員。此次京察。可否保列一等。請旨。定奪。一摺。戶工二部冒領庫銀。降調。捐復人員。前於十六年二月內。降旨。令該堂官。於下次京察。不准保列一等。用示薄懲。向來京察之例。必歷俸已滿三年之員。方准保列一等。其降調人員。例不接算前俸。此案降調人員。於十六年捐復後。至十八年京察。未滿三年。本例。即不應列入一等。此次京察。該員等。甫經合例。停其保舉一次。乃所以示懲。所有二十一年京察。本案降調。捐復各員。如上次合例。未經保列一等者。此次准其保列一等。上次本不合例者。此次俱不准保列一等。以符前旨。俟二十四年京察時。有堪列一等之員。方准保送至前次京察一等人員。於引見時。改為二等者。係朕一時察看

人材酌定該員等又屆三年如果辦事奮勉准其仍行保列一等○又諭都察院奏山西民婦冀劉氏呈遞封口將原封呈覽一摺冀劉氏係一婦人有何封口呈遞該氏現以墊辦運課等款日久未償赴都察院申訴該堂官等明知即係此事或因封口不便拆閱亦當令該氏自行拆封乃率將原封入奏經朕閱看仍係申訴呈詞其詞內稱謂皆係指該堂官等而言並非奏章款式該堂官等遇事

不加體察一味顛預實屬有心因循推諉都察院堂官俱著交部議處民婦冀劉氏妄遞封口摺奏又失款式著交刑部訊供後仍解往直隸歸案質審治以應得之罪○又諭陳預等奏調劑青州駐防滿營兵丁一摺山東青州駐防滿營額設馬甲一千四百六十名步甲三百二十名茲據奏稱該滿營兵丁素稱得力生齒日繁若增添馬步甲兵需餉較多其壯丁一任閒散又殊可惜自應設法調

劑著照所請准其將該滿營所存馬價銀六千兩再於司庫扣存市平內酌提銀二萬四千兩共成三萬兩交商一分生息每歲息銀三千六百兩隨餉撥解交該副都統在於駐防八旗閒散壯丁內擇其材堪造就者二百四十名作為餘兵與甲兵一體操練每名每月支給銀一兩以資養贍除支給餘兵餉銀二千八百八十兩外每歲所存餘息銀七百兩零即陸續歸還原款○庚申諭內閣向來

刑部具題本章將立決監候二項按日均勻呈進雖未明定章程歷年以來總係監候者多立決者少本月初九日該部呈進本二十三件內立決者多至二十二件共計人犯五十二名口監候者祇一件溯查前數日所進立決之本則甚屬寥寥朕慎重人命凡立決監候本章無不細覈案情而於立決人犯尤必反覆詳閱緣一經發下次日覆奏該部即行文辦理與勾決無異較之監候人犯尚待

秋審覆勘者更關緊要。今一日之內進立決本二十二件。應正法人犯至五十二名之多。若非因循積壓。何以至此。除管理刑部事務大學士董誥。現因病告假外。所有刑部辦本司員。並刑部堂官。甚屬疲玩溺職。無論正署俱著交部議處。嗣後該部送閣進呈本章立決本。每日不得過八件。如數逾八件以外。著大學士將本駁回。仍將刑部參奏。又諭伯麟等。奏近黔之楚省地方。民人願歸黔省管轄。會勘移商未定。請勅交楚省叢議。一摺。湖南芷江縣六里地方。距貴州玉屏縣界甚近。離芷江甚遠。所有完糧考試及詞訟案件。遠赴芷江。俱多不便。該處民人劉世華等呈請改歸黔省管轄。經楚黔兩省委員會勘。各執一詞。前經伯麟等札商馬慧裕該督係湖廣總督。並曾任湖南巡撫。何以意存推諉。因循疲玩日久。不為勘議。馬慧裕著交部察議。○予喀什噶爾陣亡三等侍衛阿勒呼達祭葬。

世職。如二等侍衛例。○辛酉諭內閣。松筠等奏辦理孜牙墩謀逆案內各犯一摺。松筠前經派往喀什噶爾查辦孜牙墩一案。孜牙墩係謀逆首犯。經朕降旨飭令嚴刑審訊。即行凌遲處死。乃松筠到彼將及兩月。始將該犯正法。至圖爾第邁莫特前據松筠奏稱。係與孜牙墩同謀。定擬斬梟。請旨辦理。朕覈其情節不符。降旨令長齡覆訊。松筠既經請旨自應候旨遵行。乃忽又奏報。已將圖爾第邁莫特與孜牙墩一同凌遲處死。松筠辦理此事實屬錯謬。松筠著革去太子太保。仍交部議處。○又諭李如枚延福前因萬年吉地工程案內將扣存練山石價銀各侵用二千兩入己。詩蒙額於辦工雜料運腳等項少用多銷。侵用銀一千兩以上。該三犯俱問擬斬候業經七次免勾。詩蒙額情節較輕。著即釋放。李如枚延福俱著釋出。發往盛京該處二十一二十二年俱有應辦工程。著晉昌派在工。

程處自備資斧効力當差工竣後飭令回旗不准保奏若再有過犯奏明加重治罪餘俱照舊監禁○大學士伊犛將軍松筠等奏勦叛逆匪孜牙墩出力官弁都司台明阿等升用有差○壬戌諭內閣和寧奏緝辦土默特旗地方蒙古莊頭蓋周等七人拜傳習邪教之郝得來為師一摺除已交該部議奏外並著將失查之該管扎薩克等交理藩院議處蒙古等習氣素尚淳樸惟敬喇嘛並無沾染漢民習氣持齋作會等事近年蒙古漸染漢民惡習竟有建造房屋演聽戲曲等事此已失其舊俗茲又習邪教尤屬非是愚民習教乃前明流傳惡習豈可流傳蒙古地方以致壞其淳樸之風著交理藩院通飭內外諸扎薩克部落各將所屬蒙古等妥為管束俾各遵循舊俗仍留心嚴查儻有遊民習學邪教即拏獲報理藩院治罪儻該管扎薩克不行查辦另案捕獲時將扎薩克等從重治罪不

貸○以輔國將軍麟趾襲禮親王爵○癸亥上御乾清門聽政○諭內閣嗣後朕在宮內祇令散秩大臣一員在乾清門進班駐蹕圓明園仍令散秩大臣一員在乾清門進班一員在圓明園進班其寧壽宮進班之散秩大臣著即停止○以通政使司副使海齡為太僕寺卿○甲子以故三等公富僧額子盛福二等伯富爾松阿子嵩蔭一等男喬恒子祥安各襲爵○旌表守正捐軀直隸張家口廳民史俊禮妻賈氏○乙丑以故一等男鄂彌善子慶寬三等男恒慶叔達興阿各襲爵

大清仁宗受天興運敷化綏猷崇文經武孝恭勤儉端敏英哲睿皇帝實錄卷之三百十三

實錄卷之三百十三

十六

大清仁宗受天興運敷化綏猷崇文經武孝恭勤儉端敏英哲睿皇帝實錄卷之三百十四

臣等謹將本年內各官奏請開缺事理繕摺具奏

奉 上諭著照所請該部知道欽此

奉 上諭著照所請該部知道欽此

奉 上諭著照所請該部知道欽此

奉 上諭著照所請該部知道欽此

乾修

嘉慶二十年乙亥十二月丙寅諭內閣前據

大理寺卿慶明奏科道京察保薦請於給事

中內酌添一人御史內酌減一人並將所添

之給事中一人不拘滿漢惟舉賢良等語朕

覽奏之下即知其窒礙難行姑交吏部查覈

具奏茲經該部查例議駁京察定例滿漢官

各計七缺保送一員寧缺勿濫給事中滿漢

各十二缺應各保送一員慶明率請於給事

中添一公缺又請將御史酌減一缺其所增

所減欲將滿洲漢員合計牽算實於定制有

率。向例科場年分。不准條奏科場事宜。現在京察屆期。何得妄議更張。慶明係大理寺卿。都察院考察科道。與伊何涉。顯係滿給事中內。有伊親友。受其請託。故為此奏。慶明才具平常。京察本應罷黜。今如此冒昧陳奏。豈可復留京卿之任。慶明著降為五品頂帶。即行休致。○又諭。值年旗彙奏。分賞八旗王公大臣官員等。為奴人犯逃逸數目。此項分賞人犯。多係逆匪邪教案內之人。非尋常罪犯可比。

該王公大臣官員等。理宜不時嚴行管束。服役勿致縱逸。嗣後凡分賞為奴。關繫逆匪邪教案內人犯。若不守分為匪。即行送部加重治罪。一有逃竄。即行呈報。該旗嚴行緝捕。外於年終彙奏之時。將逃逸人犯原犯案由。開單具奏。此內設有關繫逆匪邪教案內之人。將該失察之王公大臣官員等。交部從重議處。如尋常分賞為奴人犯。若有逃竄。失察之王公大臣官員等。仍照舊例查議。○諭軍

機大臣等。那彥成奏。查明石佛口王姓實係邪教總匪惡根。已將傳教之人。拏獲審訊。大概情形一摺。所辦甚好。已另有旨加恩矣。漂州石佛口王姓。其先世自前明以來。倡立白蓮教。自稱聞香教主。流傳至今。二百餘年。已閱十輩。屢經破案。其子孫仍怙惡不悛。改教名為清茶門。種種悖逆情形。罪同林方二逆。必應照大逆辦理。著該督將為首者。照大逆律問擬凌遲。派錢臻解交刑部覆審。正法梟

示。該逆親屬。照例緣坐。其餘習教之犯。及外省被誘入教者。俱照所奏。發給回城為奴。至該處王姓族人。雖未經習教。亦如所請。從雲貴兩廣地方。分別安插。該督即研究祝劉等逆。切實下落。審明後。分別定擬。奏明辦理。其江南湖北河南等省。傳教各犯。已有旨飭令各該督撫等。迅速查拏。即於該省訊明辦理矣。將此諭令知之。○以緝拏教匪。勤能賞直。隸清河道韓文綺。花翎。○丁卯。諭內閣吏部

等衙門奏議處刑部積壓本章堂司各官一摺各部院事件俱關緊要朕歷經訓諭令各該堂官遇事隨到隨辦應題奏者即行題奏應引見者即行引見勿蹈因循疲玩之習諄諄告誡至再至三刑部為刑名總匯案牘繁多尤當勤敏將事乃本月初九日刑部題本二十三件內立決者多至二十二件人犯多至五十二名總緣平時積案既多及將屆封印紛紛趕湊未免草率遂至一時全集且近

日該部自請議處之案不一而足如曲朱氏係應擬絞監候永遠監禁之犯誤寫為秋後處決又本年秋審冊內遺漏二案又題本內十九年誤寫為二十年又安徽省處決人犯行文遲逾例限種種錯誤即予點革亦屬咎所應得但其中亦有區別董誥現在因病告假伊年逾七旬精神不能周到軍機處事務繁多不必管理刑部著改為管理兵部事務崇祿韓蔚彭希濂俱係刑部司員出身且常

川在署辦事其咎較重崇祿著革去紫禁城內騎馬韓蔚著革去花翎俱降為二品頂帶彭希濂降為三品頂帶伊三人仍俱革職留任恩寧穆彰阿年力方壯派令兼署刑部召見時諭令其留心學習乃不思奮勉於部務全不究心甚屬可惡俱著降為三品京堂再觀後效現有大理寺卿一缺即著恩寧補授穆彰阿著以正從三品京堂候補盧蔭溥在軍機處事務較繁甚屬盡心暫署刑部不能

到署辦事此不過一時疏忽著加恩改為降二級留任漢本房係專辦題本之處各司交到本章並不分析勻配具題其咎尤重主事得壽年昌阿隆文俱著照部議革職其各司承辦遲延之候補郎中董斯福員外郎豐仲泰誠齡章慶治候補主事趙協中俱著從寬改為革職留任○又諭朱勳奏審擬逆倫重犯一摺此案倪石氏因差役楊順等藉伊夫倪開周窩竊詐去包穀青苗又逼令離莊情

急起意自盡。令伊子倪勝兒代掛縊繩。倪勝兒勸阻。該氏即欲搥死。倪勝兒無奈代掛。是伊母之死。實係自行起意。倪勝兒並無致死。其母之心。擬以凌遲。未免漫無區別。著改為斬立決。至差役楊順。嚇詐貧民。致釀成逆倫重案。情節可惡。著改為絞立決。餘依議。○以故二等子鄂碩霍子成麟。二等男恒通子文奎各襲爵。○命協辦大學士吏部尚書章煦管理刑部事。以署理藩院右侍郎貴慶為禮部右侍郎。署刑部右侍郎。兼鑲紅旗漢軍副都統。總管內務府大臣常福為兵部右侍郎。兼鑲紅旗滿洲副都統。○戊辰。諭內閣。托津等奏。叢議和寧奏土默特貝勒旗酌擬分析家產一摺。所駁甚是。理藩院管理蒙古事務。向無與該王貝勒等議析私產之例。此案事關計訟。本與分產無涉。若如和寧所奏。將原任貝勒根敦扎布之妻格格原分產畜與承襲貝勒之人另議分析。此端一開。各蒙古王

公遇有析產之事。紛紛赴院呈訴。不特於事體未協。日久易滋弊竇。嗣後蒙古王公等。有以析產私事涉訟者。理藩院概行駁回。無庸准理。○又諭富海於九月間補放左江道。甫經請訓。召見。旋即任部告病。茲例限屆滿。又復呈請開缺。顯係以廣西地處邊遠。遷延規避。富海著即開缺。病痊之日。以理藩院主事降補。○以直隸總督那彥成。查拏邪教認真。寬免歷任內降留處分五案。仍賞戴花翎。○以葉爾羌阿奇木伯克貝子邁哈默特鄂三子邁哈默特鄂。對幫辦軍需出力。賞戴花翎。○以勦辦喀什噶爾逆匪。孜牙墩出力。賞四品伯克。博巴克。五品伯克。帕拉特。伊布喇依木。花翎。金頂。回子。博巴克。藍翎。並升補有差。○予原任陝西鎮安縣知縣聶燾。入祀名宦祠。直隸故翰林院侍講李殿圖。江蘇故直隸清河道魯銓。四川故福建臺灣澎湖通判周于仁。江蘇故江西南康縣知縣孫穀。入祀鄉

賢祠從總督那彥成常明巡撫張師誠方受
嘯朱勲董教增請也○旌表守正捐軀山東
清平縣民孫子付妻郭氏○已已諭內閣昨
因刑部本章積壓封印期內不能呈進完竣
准令改題為奏此不過暫時權宜不可為例
若各衙門因可改題為奏相率效尤恐因循
疲玩將來積壓之件愈多不可不加以懲處
除刑部堂官及前案已處各司員毋庸再議
外著刑部將逾限本章逐一查明將各該司
員職名咨交吏部概行議處○又諭本日據
和舜武程國仁奏審結京控案件各一摺東
省積案繁多前經降旨令巡撫及藩臬兩司
趕緊分審仍將審結起數隨時具奏茲據和
舜武奏前後共分案五十六起程國仁奏前
後共分案六十一起現已全行審結同興朱
錫爵劉大懿前在山東諸事廢弛以致案牘
塵積京控日多可惡已極今該司等認真整
頓一載有餘已將積案全清實屬可嘉近日

京控之案較之從前不過十之二三和舜武
程國仁實心任事程國仁到任在前結案亦
多尤屬可嘉程國仁著加恩賞加一級和舜
武賞加紀錄二次以為京外各員不因循疲
玩者勸○旌表守正捐軀雲南嵩明州民馬
來發聘妻馬氏○除河南杞縣淹廢地三百
一十二頃有奇額賦○辛未

上御寧壽宮賜王公大臣及蒙古王貝勒貝子
公額駙台吉等食並賞賚有差○諭內閣向

例祈雨祈雪期內俱不進立決本章但祈雨
祈雪原為京畿附近而設非概為直省致祈
也嗣後祈雨祈雪期內若立決人犯應在京
處決者著無庸具奏如係應在外省處決者
則奉旨之後行文該省計奉到時已相距日
久俱照常進本著為令再刑部議覆立決本
章期限亦覺太寬著刑部酌議量減具奏候
旨遵行○壬申

上詣

大高殿行禮○幸北海閱冰技科爾沁扎薩克郡王琳沁扎勒贊等四人。阿巴噶扎薩克郡王喇特納錫第扎魯特扎薩克貝勒忠濟勒車凌等七人。杜爾伯特扎薩克貝子鄂綽爾瑚雅克圖等二人。烏喇特扎薩克鎮國公巴圖鄂齊爾郭爾羅斯扎薩克輔國公恩克托克托瑚蘇尼特輔國公額琳琛克什克騰扎薩克頭等台吉旺楚克喇布坦土默特固山額駙扎勒瓦多爾濟喀爾喀扎薩克頭等台吉哀布多爾濟青海扎薩克頭等台吉濟克默特察哈爾和碩特西等台吉巴彥濟爾噶勒等二人。帕克巴拉呼圖克圖等二人。於神武門外瞻觀○諭內閣甘肅藩庫私借無著銀至二十萬餘兩之多。皆由歷任藩司瞻徇情面私借私挪毫無顧忌。所有歷任正署各藩司除王文湧楊揆廣厚陳祁積朗阿威悖崇業經病故蔡廷衡業已革職外。何銑德克精阿俱著即革職○刑部奏覆審河南已革

通判竹騰霄訐控藩司剋扣工賑銀兩。收受漕規等款一摺。得旨。此案竹騰霄所控各款。經李鴻賓等審屬虛誣。問擬發往烏魯木齊該犯延不赴配。經方受疇飭催。復具呈挾制。奏交刑部提審。所訴又屬全虛。加重改發黑龍江。奏上時。朕以其堅不成招。諭令刑部堂官覆加訊問。令其指出確據。該犯毫無指實。但一味強詞抗辯。實屬刁頑。竹騰霄著照部議。發往黑龍江充當苦差。加枷號三箇月。如到配後仍復逞刁妄訴。再行加重治罪○以繕摺錯誤。降禮部右侍郎貴慶為奉天府府尹。以盛京副都統文寧為禮部右侍郎兼鑲紅旗漢軍副都統。以盛京工部侍郎康善兼盛京副都統○癸酉上御撫辰殿大帳次。賜蒙古王貝勒貝子公額駙台吉等宴。並賞賚有差○諭內閣。近來宗室人等。疊有恣意妄為之事。如昭健爵襲親王。任性貪殘。尚必加以嚴懲。其餘宗室人等。

妄自尊大。不知自重。自蹈罪愆。安能不執法嚴辦。以示警戒。此案宗室盛雲前經移住盛京。本年因嫁女告假來京。假滿之日。即應仍赴盛京。乃託病遷延。在京寓賭。復手持鐵器。同衆賭犯拒傷兵役。其所稱腿疾。捏飾顯然。管理宗人府王公。因循疲玩。先行明白回奏。即著宗人府會同刑部提集案內一千人證。嚴審。於二十九日具奏。按律治罪。○以審辦直隸石佛口王姓傳教惑衆一案。賞按察使盛泰知府阿霽花翎。餘升敘有差。○甲戌諭內閣。章煦等奏審訊攻訐入祀鄉賢不公一案。大概情形一摺。此案盧觀恒以洋商致富。未曾讀書。兼有毆兄一事。經章煦等訊明。徹出鄉賢祠。所辦甚是。其劉華東妄刊草茅坐論。亦有應得之罪。章煦因與原保盧觀恒之前任廣東藩司趙宜喜係兒女姻親。奏請迴避。著將此案交熙昌會同蔣攸銘秉公審訊。有無營求賄囑情弊。分別定擬具奏。章煦現

已派令管理刑部事務。著將其餘交審各案。與熙昌迅速審擬完結。即行回京供職。○以故喀喇沁輔國公布尼雅錫哩弟班咱錫哩襲爵。○乙亥孝莊文皇后忌辰。遣官祭昭西陵。上詣慈寧宮。壽康宮行禮。○諭內閣。陳預奏查明東省泰充沂登四府屬十五年以後續虧數目一摺。東省各州縣虧缺錢糧。前據章煦等查明十四年以前共銀三百零五萬五千數十餘兩。十五年以後共銀三百三十四萬七千七百餘兩。其十五年以後虧缺之處。因無存司檔案。可憑恐不免以多報少。以少報多情弊。當經降旨。展限一年。令陳預確查具奏。茲據該撫將十五年以後虧數內之泰安兗州沂州登州四府屬查明確數。共銀九十三萬六千四

百三十七兩零。開單具奏。朕披閱單內。如現任蘭山縣知縣朱安國一員名下。即虧銀至六萬餘兩之多。其餘數在一萬兩以上者。尚有多人。此等劣員。以國帑恣其慾壑。取攜無忌。以致閩省虧缺。至六百餘萬兩。若不從嚴懲辦。尚復何所警懼。著將單內所開各員。除病故者仍照原議章程辦理外。其虧缺在一萬兩以上者。俱著革職。掣回。解交刑部。一萬兩以上者。問擬斬監候。二萬兩以上者。問擬斬決。將所虧銀數。令刑部分別定限。較例限加緊。奏明監追。限內全完。貸其一死。釋放。永不敘用。其逾限不完者。刑部於限滿日。按名具奏。請旨立即處斬。斷不寬宥。其數在五千萬兩以上以下者。仍照例在任著追。依限歸補。吉綸同興俱久任山東巡撫。廢弛貽誤。至於此極。俱應發往吉林。姑念同興前歲究出首逆林清。由驛馳奏。尚有微勞。吉綸著即發往吉林。同興著發往盛京。交普恭等派在工程

處効力。朱錫爵係該省藩司。厥咎尤重。伊名下共有罰賠銀十一萬五千六百餘兩。除已繳過三萬六千兩外。尚有未完銀七萬九千餘兩。著勒限三年。完繳。後發往烏魯木齊充當苦差。如限滿不完。交部治罪。○又諭陳預奏十四年清查案內恩縣知縣施常。稟出八年前漏報張秉銳虧缺銀三萬七千七百四十三兩零。現查張秉銳任內短缺。施常均已於接收交代時造報。至十四年清查。張秉銳業已身故。忽又具稟漏報。該卸故員名下。希冀置身事外等語。前任恩縣知縣施常。於交代案內。將虧缺帑項。誣之前任。乃自挾厚資。捐升知府。情弊顯然。施常著革職。其捏報虧缺銀三萬七千七百四十三兩零。著勒限監追。毋任延宕。○又諭那彥成奏查明直隸省初二兩次及三次清查倉庫案內。已未完銀數一摺。直隸省三次清查虧欠各員。前經立定期限。處分。分別任所旗籍催追。乃據該

督所奏初二兩次案內十九年祇完銀七百五十兩尚未完銀九十六萬一千九百兩零三次案內十九年祇完銀一千三百九十六兩尚未完銀九十四萬四千九百兩零似此任意拖延。帑項迄無歸補之日。著該督將本省勒追各員查明限滿未完者即分別監追治罪。並咨行各旗籍一體勒限嚴追。毋稍寬縱。現經降旨將山東省虧缺倉庫各員一萬兩以上者俱革職拏問。解部問擬大辟勒追嚴辦。此後直隸各州縣如有新虧者即著照此例辦理。○刑部遵議量減立決本章期限一摺。得旨。向來刑部屆秋審時因呈進黃冊遂將各項本章減數呈遞黃冊於進呈後留中。朕不時披覽。與每日閱看本章兩不相妨。嗣後秋審時刑部各項本章著照常呈遞。無庸減數。至每年開印後三日刑部向不進本章減去一日。於開印後第三日進紙張。本第四第五日進輕罪本。以後陸續加數呈進。其

齋戒祭祀月朔日忌。並各項應行迴避不進刑本。及不進決本日期亦應酌減。著刑部查明開單具奏。候旨遵行。尋奏上得旨刑部查明不進刑名本及不進決本日期開單呈覽。嗣後冊封妃嬪日及朝審勾到日俱准進刑名本祭先蠶壇日准進立決本自小暑節至立秋日祇不進現審立決本自大暑節至立秋日再停進直隸山東山西河南盛京五省立決本。餘均照舊例行。○丙子諭內閣慶保奏審明臨桂縣歷任短交捐款並挪缺倉庫各知縣現已賠繳銀兩分別定擬一摺。此案臨桂縣歷任知縣短交捐款銀兩及應追徵折盤折倉穀價銀經該撫查明各任知縣已未完數目分別開復追賠俱著照所議辦理。直省倉庫錢糧本應實徵實貯不容絲粟虧短近年以來朕為各督撫所蒙該督撫又為各州縣所欺辦理寬緩以致肆無忌憚各省虧缺累

疊。幾於百孔千瘡。不可究詰。若不嚴加懲辦。何以警怠除貪。昨已降旨。將山東虧缺各州縣銀數在一萬兩以上者。全行革職。拏問解交刑部。分別問擬。斬候斬決。勒限監追。限內全完。貸其一死。永不敘用。逾限不完。即行正法。其廢弛貽誤之前任山東巡撫吉綸。同興藩司朱錫爵。均予請戍。嗣後直省各州縣。如有侵蝕錢糧數逾巨萬者。該督撫查明。參奏。即照新例辦理。如該督撫藩司不認真整飭。

徇庇墨吏。廢弛地方。即照吉綸等一律發遣。決不寬宥。○又諭前據馬慧裕等奏。湖北江陵縣知縣捐升知府李若璋。請加捐離任。留楚委用。當經降旨准行。茲經吏部查明。該員任內有承緝展參各案。均干降調。與報捐離任之例不符。請旨查銷。所駁甚是。殊為可嘉。直省各督撫具奏事件。不將例案原委聲明。朕安能一一鑒悉。若一經奉旨允准。雖與例格礙之事。亦皆遷就奉行。轉非都俞吁咈並

行不悖之意。吏部駁奏此案。朕不特不以為非。尚且加以嘉獎。各部院皆當引以為法。所有李若璋捐升知府著註銷。令其仍回江陵縣知縣之任。馬慧裕係吏部司員出身。此等定例。豈得諉為不知。乃與張映漢聯銜具奏。實屬朦混。馬慧裕、張映漢均著交部嚴加議處。○又諭汪志伊奏。福建尤溪古田二縣有匪徒興復雙刀會。糾夥橫行。經知縣諭令鄉民偵知首犯下落。親帶兵役馳往拏獲等語。

此案匪徒侯二、八雄膽敢興復雙刀會。糾人入夥。拆毀民房。強取食物。並搜有悖逆簿據。現已捕獲。著即審明。按律定擬具奏。建安縣知縣李孔均。平素認真編查保甲。茲緝獲首犯實屬勤能。著加恩於事定後。送部引見。里長謝雲臺、練鍾英偵緝出力。俱著賞給八品頂帶。如情願入伍。著隨營差委酌量補用。如不願入伍。即以頂帶榮身。○諭軍機大臣等。汪志伊奏提訊偽造諭旨人犯大概情形。一

摺此案偽造諭旨。既據朱友堂供認自行捏造。又供稱在杭城內洋市街檢拾彼此互異。偽造諭旨。訊明實出何人之手。則其人應照詐傳詔旨律問擬大辟。罪名出入關繫甚重。不可稍涉草率。前次降旨。令汪志伊密查此項偽造諭旨。是否由京傳出。並密訪欽差隨帶之人者。原因此次成格陳希曾請訓時。朕曾經面諭伊二人到浙審辦此案。如顏檢並無大誤。祇係尋常處分。則於拜摺後即行來京覆命。若顏檢辦理舛謬。應行嚴議。則奏奏後暫緩起程。俟奏摺批回後。朕簡放浙江巡撫有人。或於伊二人內派一人暫署撫篆。今偽造諭旨內。即有成格護理浙撫之語。此事成格等二人縱未必自行宣布。或伊家人等因伊主洩漏此語。張揚傳說。以致好事之徒。生心偽造。亦屬事之所有。仍須密加訪察。不可稍存迴護。冤屈傳播之人。至朱友堂現已委頓。不可徒事刑求。該犯既向鄭丹華有剛

纔有人送來之語。何以又囑咐鄭丹華不要在外多說。其言殊覺自相矛盾。若執為該犯所造。則偽造諭旨罪名甚重。該犯意欲何為。豈顏檢見此偽旨。即肯離浙候議乎。該犯與顏檢有何仇怨乎。種種疑竇甚多。該督務悉心推鞠。究出確情。以成信讞。毋稍含混。○又諭。偽造諭旨內。恰有成格護理浙撫之語。與朕在養心殿面諭之詞。不謀而合。或係二人於召見後。曾向隨帶司員等言及。伊等家人在旁聽聞。遂有偽造此旨者。著成格陳希曾自行追憶。曾否漏洩此語。據實覆奏。○上以歲暮禋祭太廟。自是日始齋戒三日。○丁丑。諭軍機大臣等。前因甘肅省虧缺倉糧。特派景安朱理前往查辦。並令先福督率藩司嚴娘協同該欽差等辦理。茲復據嚴娘奏。該省各屬有續虧銀一百萬兩有零。先經督臣先福奏請檄委隔屬道員互查結報。尚未報齊等語。甘省倉

糧既已空虛庫銀又復虧短敝壞已極均應徹底查辦。皆因近年所用大員因循疲玩所致。實皆朕不明之愆。著景安、朱理、先福即督同嚴娘將各州縣倉庫實數一併查明。大破情面。和盤托出。其係何年月日總督藩司任內之事。據實分晰。久暫正署。由五百里具摺嚴叅。有贓私入己者。亦一併叅出。所有虧空州縣。即照昨降諭旨辦理。山東虧空之例。除銀數在五千兩上下者。仍准在任著追依限歸補外。其虧缺至一萬兩以上者。俱革職拏問。一萬兩以上者。問擬斬監候。二萬兩以上者。問擬斬決。將所虧銀數勒限監追。限內全完貸其一死釋放。永不敘用。逾限不完者。按名具奏。即行處斬。正法之員所虧之項亦即豁除。毋庸再行攤賠。以杜藉口。貽累。此次既將閩省倉庫通行確查。定案諒非兩月所能竣事。其嚴娘交代展限以查明奏出之日為度。亦不必拘定兩月也。朕又訪聞得德克精

阿時常餽送食物等項。高杞任內恐亦不免密訪的確。具奏將此各傳諭知之。○戊寅以歲暮。給祭遣官祭

太廟中殿。

後殿。○諭內閣。先福奏訪獲積年省友從嚴叱倒。定擬一摺。甘肅各州縣倉庫糧銀虧缺。累該省向有省友名目。在省盤踞。多由此等積蠹。從中勾串。吏胥通同舞弊。自應嚴辦。示懲。此案龔世祿以未滿書吏捐職。久住會城。

甘肅通志

卷一百一十五

交結官員書吏為玉門等三縣代造銷冊。得錢使用。甚屬可惡。龔世祿著枷號一年。滿日再發極邊烟瘴充軍。該省現當查辦虧缺之時。若枷號後聽其自便。難保不復與不肖州縣勾通滋弊。著將該犯提至司監。派人嚴密看管。如有交通漏洩情事。查明再行從重治罪。其玉門、中衛、西寧三縣若查出倉庫虧短。則罪名較重。應從其重者辦理。如查明無虧。其託人代造冊籍。事在未行禁止以前。著加

恩免議○己卯裕祭

太廟

上親詣行禮○遣官祭

永陵

福陵

昭陵

昭西陵

孝陵

孝東陵

景陵

泰陵

泰東陵

裕陵○遣官祭

孝淑皇后陵寢○遣官祭

端慧皇太子園寢○遣官祭

太歲之神○回部伯克莫羅阿布都爾咱克

等十一人朝鮮國使臣洪義浩等三人於午

門外瞻觀○庚辰

上御保和殿筵宴朝正外藩科爾沁巴林喀喇

沁奈曼敦漢阿巴噶扎魯特喀爾喀土默特

杜爾伯特烏喇特郭爾羅斯蘇尼特克什克

騰翁牛特阿巴哈納爾青海土爾扈特和碩

特王貝勒貝子公額駙台吉及朝鮮國正副

使等隨文武大臣依次就坐諸樂並作

上進酒召左翼科爾沁扎薩克土謝圖親王諾

爾布琳卓哩克圖親王噶勒桑棟羅布巴

林親王銜扎薩克郡王索特納木多爾濟喀

喇沁親王銜扎薩克郡王滿珠巴咱爾科爾

沁扎薩克郡王和碩額駙索特納木多布齋

奈曼扎薩克郡王巴勒楚克科爾沁貝勒鄂

勒哲依圖土默特扎薩克貝子固倫額駙瑪

呢巴達喇右翼喀爾喀賽因諾顏扎薩克親

王固倫額駙拉旺多爾濟科爾沁扎薩克達

爾漢親王布彥溫都爾瑚喀爾喀扎薩克圖

汗部扎薩克汗布尼喇特納杜爾伯特扎薩

克親王固魯扎布回部郡王銜貝勒哈迪爾

喀喇沁扎薩克貝勒托恩多喀爾喀鎮國公
巴彥濟爾噶勒喀喇沁扎薩克輔國公理藩
院額外侍郎瑪哈巴拉至

御座前賜酒成禮○是年旌表孝子江西等省
熊廷等八名孝女江蘇等省馮氏等五口守
節合例宗室善永妻佟佳氏等十三口滿洲
賽冲阿妻張氏等一百十七口蒙古希布妻
曾氏等四十二口漢軍劉洪緒妻吳氏等三
十五口內務府德齡妻張氏等三口各省駐
防石永現妻張氏等一百七十四口直隸等
省宋鐸妻劉氏等八百五十一口未婚守志
蒙古德喜聘妻扎克奇特氏內務府槐蔚聘
妻扎思呼里氏江蘇等省沈如宗聘妻李氏
等二十一口百歲壽民婦直隸等省張秉鈞
等十二名口五世同堂直隸等省霍旋等三
十一家各給銀建坊如例○一產三男直隸
等省李耕臣等八家○會計天下民數穀數
直隸等省通共大小男婦三萬二千六百五

十七萬四千八百九十五名口存倉米穀三
千八十萬二千八百六十九石九斗一升七
合五勺

大清仁宗受天興運敷化綏猷崇文經武孝恭
勤儉端敏英哲睿皇帝實錄卷之三百十四

大清仁宗受天興運敷化綏猷崇文經武孝恭勤儉端敏英哲睿皇帝實錄卷之三百十五

監修總裁官禮部尚書太子太傅武英殿大學士文淵閣領事稽察欽奉 上諭軍機處管理工部事務翰林院掌院學士隨帶

四庫全書四庫全書總纂官太子太傅武英殿大學士文淵閣領事稽察欽奉 上諭軍機處管理工部事務翰林院掌院學士隨帶

閣從學士稽察欽奉 上諭軍機處管理工部事務翰林院掌院學士隨帶 上諭軍機處管理工部事務翰林院掌院學士隨帶

軍機處管理工部事務翰林院掌院學士隨帶 上諭軍機處管理工部事務翰林院掌院學士隨帶 上諭軍機處管理工部事務翰林院掌院學士隨帶

上諭軍機處管理工部事務翰林院掌院學士隨帶 上諭軍機處管理工部事務翰林院掌院學士隨帶 上諭軍機處管理工部事務翰林院掌院學士隨帶

校修

嘉慶二十一年丙子春正月辛巳朔

實錄卷三百十五

上詣

奉先殿行禮○詣

堂子行禮○遣官祭

太廟後殿○御太和殿受朝作樂宣表如儀○

詣

大高殿

壽皇殿行禮○御乾清宮賜皇子皇孫親藩等

宴○壬午

上御重華宮茶宴廷臣及內廷翰林以祕殿珠

林石渠寶笈聯句○癸未

高宗純皇帝忌辰遣官祭

裕陵

上詣

奉先殿

壽皇殿行禮○甲申

上御紫光閣賜蒙古王貝勒貝子公額駙台吉

及外藩使臣等宴並賞賚有差○展賑奉天

承德鐵嶺金州牛莊岫巖廣寧巨流河撫民

實錄卷三百十五

廳八處上年水災旗民○緩徵直隸武清寶

坻薊霸保定文安水清東安清苑新城蠡雄

安高陽新安天津青靜海滄元城大名南樂

清豐豐潤冀新河寧晉二十七州縣及津軍

同知所屬上年水災新舊額賦並給武清霸

永清東安雄安高陽保定新城九州縣貧民

口糧有差○展賑江蘇高郵寶應三州縣上

年被水災民並貸上元江寧江浦六合阜寧

清河安東銅山蕭碭山宿遷睢寧山陽桃源

鹽城。秦東臺江都。甘泉。興化。二十州縣銀穀有差。○給安徽南陵縣上年水災貧民一月口糧。○貸河南安陽湯陰內黃濬河內溫陝。靈寶八州縣上年水淹地震災民倉穀。並緩徵睢寧陵商邱三州縣攤徵各項銀兩有差。○貸山西保德奇嵐嵐興臨偏關河曲虞鄉解平陸芮城安邑永濟臨晉猗氏榮河夏間喜十八州縣上年地震災民倉穀。並緩徵奇嵐興臨保德托克托城五廳州縣舊欠穀石。

○給陝西乾鄜洋城固沔南鄭定遠寧陝寧羌留壩西鄉鎮安潼關華陰寶雞長武臨潼十七廳州縣上年被雹被水災民口糧。並貸安塞膚施定邊榆林懷遠神木六縣倉穀。○貸甘肅皋蘭金靖遠安定隴西平羅西寧鹽茶狄道靜寧會寧通渭寧遠漳靈臺秦安清水靈礪伯大通秦兩當平涼寧夏寧朔二十五廳州縣及花馬池州同所屬上年歉收貧民籽種口糧。○乙酉。以成都協領常忠為寧

實錄卷一百五

三

夏副都統○丙戌。上詣雍和宮行禮。火神廟拈香。○命禮部右侍郎文寧馳往河南審案。○直隸總督那彥成奏。官紳勸捐興復通省義倉。賞監生李生榮等七品頂帶。餘議敘有差。○丁亥。世祖章皇帝忌辰。遣官祭孝陵。○諭內閣。本年元旦乾清宮筵宴宗親。輔國公綿懋。於本席誤將食碗拂墜。彼時朕已目覩。並未降旨查問。迨至養心殿移時奏事。太監曹進喜口奏。慶郡王永璘進內向伊告知。本日筵宴時綿懋就席稍遲。經奕紹推令入座。綿懋一時匆遽。致將食碗拂墜。奕紹並無他意。令節典禮有此失錯。將如之何。噲令口奏等語。朕但諭以明日遞摺請罪一言。次日永璘率綿懋奏請議處。本日宗人府奏上。請將綿懋罰公俸六箇月。永璘罰職任俸三

實錄卷一百五

四

箇月已依議行矣。向來遇有各項筵宴。與宴臣工。於席間失墮器皿。亦事時有。此次綿懋偶有失誤。若照例自請議處。則失儀小過。朕但將綿懋示罰。永璘儘可加恩寬免。乃永璘先令曹進喜面奏。其咎實在於此。不能不加以薄懲。我朝設立外奏事官員接收章奏。再交內奏事太監捧進。該太監等不過供奔走呈遞之役。其所奏之事。毫不許其與聞。原以防聞寺人等與外廷諸王臣工交接。杜漸

實錄卷三百五

五

防微。最為良法美意。朕之皇子皇孫。面見奏事太監口奏事件則可。永璘係藩王。則大不可。今永璘輒以細事面囑奏事太監口奏。事屬違制。此端斷不可開。朕又聞近日在內行走諸王。往往在內奏事太監處所閒坐。探聽內事。尤屬非是。朝廷內外各有限制。軍機大臣係內廷行走常川召見之人。非遇公事從無至內奏事處者。諸王與奏事太監有何交涉。而數數往來。其意何居。必欲探聽。是誠何

心。嗣後在內廷行走之儀親王。成親王。慶郡王。永璘肅親王。永錫遇有應奏事件。俱在乾清門外。及出入賢良左門。交外奏事官員呈遞。不准徑交內奏事太監。其奏事太監亦不准接收。非遇召見。及帶領引見。朕在宮時。不准進乾清門。在圓明園。不准進左門。其有無故進內。至內奏事處者。著御前大臣會同內務府大臣奏聞候旨。此旨著抄錄一通。交內奏事處永遠張貼。並令儀親王。成親王。慶郡

實錄卷三百五

六

王永璘肅親王。永錫各錄一通。敬謹閱看。○戊子。享

太廟。遣皇三子綿愷恭代行禮。○遣官祭

太歲之神。○緩徵福建澎湖廳上年風災未

完額賦。○是日。立春。順天府進土牛春山寶

座。○

上以次辛祈穀於

上帝。自是日始齋戒三日。○庚寅。

上詣

南郊齋宮齋宿。○諭內閣。馬慧裕等奏湖北崇陽縣士民具呈代前任該縣知縣李夢珠出資捐復原官一摺。所奏不可行。李夢珠係部議降調。引見奉旨以巡檢補用之員。如果該員官聲素好。於補用巡檢之後。該督撫保題升用。尚無不可。若士民人等具呈代去任之員捐復原官。則此風斷不可長。李夢珠著不准其捐復。○辛卯。祈穀於

上帝。

上親詣行禮。○幸圓明園。○詣

安佑宮行禮。○壬辰。諭內閣。莊浪城守尉員缺。即著德寧補授。毋庸撤回。其誤將驍騎叅領一體揀選。自乾隆四十五年以後。歷案相沿。並非始自此次。所有此次揀選之值年旗王大臣。及承辦章京均著免其議處。嗣後各處城守尉缺出。仍俱遵照定例辦理。並著值年旗將揀定之員。先行咨明兵部查覈。其不合例者。該部即行駁回更換。查明與例相符者

再行帶領引見。候旨簡放。○諭軍機大臣等。慶保奏查明粵西各屬未經買補倉穀實在情形。懇請分限買補一摺。粵西通省動缺未買倉穀共四十餘萬石。倉儲為國用攸關。豈容絲毫短絀。該撫將此項未買穀石責成各州縣先行買補十五萬石。現已收倉過半。餘亦陸續報收。此後如值上歲。仍可買補十餘萬石。中歲亦可買補七八萬石。務於四年之內。全數買足還倉。該撫即督率藩司等認真經理。如有延不買補。及買不足數。或多買短發。浮收勒索等弊。一經查出。即將該州縣據實嚴叅。並將督催不力之府州一併叅處。其以穀價及民欠留於後任作抵之弊。著永行禁革。如陽奉陰違。查出一併嚴叅著賠。將此諭令知之。○甲午。

上御奉三無私殿。賜皇子皇孫親藩等宴。○御山高水長。賜王公大臣蒙古王貝勒貝子公額駙台吉及外藩使臣等食。至丙申。皆如之。

○乙未

上詣

安佑宮行禮。○御正大光明殿。賜朝正外藩等宴。作樂賜酒。如除夕儀。○丙申。

上御正大光明殿。賜大學士尚書等宴。○諭軍機大臣等。百齡等奏。凌汛工程平穩。一摺。河工為國家重大之務。上年三汛安瀾。兆民樂業。國用亦多節省。朕召見吳璥。據云。此次河底淘刷漸深。可保十年無事。吳璥所言如此。

實錄卷三二五

九

百齡等在彼目擊情形。自亦相同。但不可因此遂心存自滿。

天道戒盈。百齡等總當常存敬畏。思全河大局。關繫國計民生者甚鉅。刻刻加意修防。方能有備無患。現在河口海口俱各通暢。湖水高於黃水二尺有餘。足收敵黃之效。運河水勢深通。重運首幫早已渡黃。事機極為順利。此時要務。惟當將兩岸隄堰逐處留心察看。如有單薄殘缺之處。即時補築。務令一律鞏固。

雖無工處所。亦不可大意。平時補苴罅漏。所費錢糧。不過千百。而太平無事。則所省者不可數計。該督等常念未雨綢繆。防患未然。自能永慶安瀾也。將此諭令知之。○丁酉。以吏部右侍郎佛住署工部右侍郎。○己亥。

上御山高水長。賜王公大臣蒙古王貝勒貝子公額駙。台吉及外藩使臣等食。○諭內閣。理藩院轉奏。據喀喇沁王滿珠巴咱爾陳奏。秋獮情形。十二條一摺。滿珠巴咱爾係行圍領

實錄卷三二五

十

轟大臣。且係圍長。行圍事宜。理應條奏。且所奏十二條。均係援引舊例。所奏甚是。其所奏支搭看城人等。不許前一日出卡倫。仍照舊例。於是日三更出卡倫支搭。其芟割大營地基野草之綠營兵丁。亦於是日一同前往。至朕行圍到大營駐蹕後。嚴禁附近圍場擅放鳥鎗打牲。三條俱照所請行。如有違者。應如何治罪。及其餘九條。並著總理行營王大臣公同理藩院一併議定章程具奏。○庚子。

上幸萬壽山。○辛丑。諭內閣連日據廣惠策丹徐銳先後奏報。本月十七八日。天津得雪四寸。密雲得雪三寸。古北口得雪五寸。惟京城內自去冬至今。未經得雪。十八日早開雪花飄灑。積地亦未及寸。自或因政治未孚。遺孽未淨。尚有沴氣未除。不能感召。

天和京城步軍統領衙門。順天府。五城。皆有緝捕之責。近日召見各該堂官等。詢及督緝逆犯情形。或稱察訪無蹤。或稱眼線不確。奏對

全無實心。頻以虛言搪塞。即所謂傳集屬員兵役嚴詞督責飭令緝緝。亦不知實有其事與否。且不但逆犯祝現等六名。及次要之五十餘犯。稽誅二載有餘。即飭緝投遞匿名揭帖各犯。如控告曹黑臉謀逆一案。控告張翔謀逆一案。控告蘇楞額徇私受餽一案。控告昭捷貪酷各款一案。控告參領六十五派差不公一案。控告參領何銘盜用印信一案。訪緝已久。亦未報獲一犯。國家設立督捕衙門。

實錄卷三百五十一

十一

實錄卷三百五十一

十二

專以盤詰姦宄。今如此因循疲玩。朕亦安用伊等為耶。所有步軍統領衙門。都察院。順天府堂司各官。均應褫革治罪。但一經褫革。另行簡員接緝。則伊等置身事外。轉得遂其苟安之私。步軍統領衙門。都察院。順天府堂官。俱著傳旨嚴行申飭。此後朕亦不頻見伊等。伊等亦何顏陳奏。仍責令訪拏各案犯。該堂官等務激發天良。督率所屬上緊嚴緝。毋得日久懈弛。自取咎戾。若能將要犯緝獲。仍當加以恩施。其各勉力圖效。毋怠朕計日以待之。○壬寅。諭軍機大臣等。據松筠奏請將孜牙墩等犯緣坐妻女幼子十三名口解交烏嚕木齊都統分賞該處駐防官員為奴。以免長途解送等語。逆回孜牙墩。莫洛薩賚通事薩賴等犯緣坐家屬。前經成寧等奏明解送刑部辦理。今松筠奏稱內地似此緣坐之犯。多發新疆。不知此等逆回在新疆犯事。其家屬應行解送刑部辦理。正與內地犯屬發往

新疆徙諸遠方者。例意相同。若謂道路遙遠。徒勞驛站。則近日發往新疆緣坐犯屬不下數百名口。此次逆回家屬應解京者僅十三名口。何至有勞驛站。松筠不知例意。所奏不准行。其孜牙墩三犯緣坐妻女幼子十三名口。著長齡於奉此旨後。即解京交刑部照例辦理。○癸卯。

孝聖憲皇后忌辰遣官祭

泰東陵

實錄卷三百十五

十三

上詣

恩慕寺

恩佑寺行禮。○諭內閣。向來恭遇

大祀

中祀。太常寺題請。或親詣行禮。或遣大臣恭代者。其恭代之大臣。以儀親王。成親王。慶郡王永璘。定親王綿恩。輪流開列。內閣即於開列單內票擬一人進呈。朕思

壇

廟行禮。偶遇不親詣之時。遣員恭代。自應於朕弟姪親郡王內遣派一人。俾肅將駿奔以供祀事。儀親王。成親王。均係朕兄。年在七旬上下。登降跪拜。禮節較繁。嗣後遇有恭代行禮之處。俱毋庸開列。著於慶郡王永璘。定親王綿恩。肅親王永錫三人內。輪流開列。票擬進呈。再遇歲時恭祭

兩陵及

壇

實錄卷三百十五

十四

廟視牲等禮。應以親郡王開列者。儀親王。成親王二人。除奉特旨派出外。該衙門亦均毋庸開列。○又諭。朱勲奏查明伯克過境委員接護交替日期一摺。向來回子伯克等年班進京。經過省分。例派道府大員接替護送。上年伯克過陝省時。朱勲並未派出道府護送。即或該道府等應於冬閒往各屬抽查保甲。儘可於護送伯克後再往抽查。亦不為遲。朱勲僅派同知護送。實屬違例。其伯克等入境出

境程限。並未遲逾。朱勳前已交部議處。嗣後每年伯克過境。務遵照定例。派委道府大員接護。毋再違誤。○諭軍機大臣等。喜明奏接到廓爾喀來稟。遵旨駁飭一摺。此次廓爾喀來稟內有現在與天朝進貢。若投誠披楞。就不能容我與天朝進貢等語。其詞實屬狡詐。喜明等所與檄諭。措詞猶未得當。應指出紕繆之處。責以大義。以該國久經投誠。即為天朝臣僕。如屆期不行進貢。即屬背叛。若將此

實錄卷三十五

十五

稟奏聞。大皇帝必然震怒。立即興師討罪。是以不敢具奏。爾國來稟之意。不過要求天朝幫助。但天朝於邊外部落彼此相爭。從無發兵偏助一國之事。爾國與披楞或和或戰。即或竟投誠披楞。天朝總置不問。但屆至貢期。仍當按例進貢。儻至期不來。即當奏聞大皇帝發兵進剿。彼時爾國追悔何及。至爾國境內。天朝無駐兵之理。若係唐古忒邊界自有大兵鎮守。披楞斷不敢窺伺。儻敢侵及邊界

立即剿殺。諒披楞么膺小國。何能為患。如此嚴詞飭諭。自可破其奸謀。但喜明等於各處邊界。不可不加意防範。儻披楞之兵。竟敢輒入邊界。殊屬不成事體。此時各卡隘原設之兵。殊不足恃。喜明等即於該處漢番官兵內。挑選數百名。派得力曉事將弁帶領移駐該一面地方。鎮靜彈壓。隨時偵探。如有越界擾及者。無論披楞廓爾喀。即當痛加剿殺。以振邊威。現已降旨令賽沖阿攜帶欽差大臣關

實錄卷三十五

十六

防。前往西藏察看情形。賽沖阿到彼後。凡藏內一切事宜。著與喜明會同妥協辦理。將此諭令知之。○甲辰諭內閣。賽沖阿等奏審辦兵丁挾忿糾眾逞兇一摺。此案營兵孫占鰲先經犯竊。改名入伍。知府葉文馥訪知率同知縣魯鳳輝查拏究辦。該犯懷恨糾約革兵陳倖等攜帶刀械。先後赴府縣衙署逞兇放火。傷斃丁役數人。復以遊擊黃玉堂平日管束嚴緊。將黃玉堂寓所焚燒。途遇丁憂縣丞

羅炳經匪夥邱得勝用棍毆斃不法已極。賽冲阿等當匪徒乘夜燒搶之際。持以鎮定。分派兵役看守倉庫監獄軍裝火藥。次日城門照常啟閉。市廛安堵。先後將首夥十六犯全行拏獲。所辦甚好。惟首犯孫占鰲於省會重地。膽敢糾衆逞兇。連燒官廨。並手刃二人。係屬罪魁。應凌遲處死。以昭炯戒。賽冲阿等將該犯與楊貴等犯一同問擬斬梟。尚覺輕縱。業經處決。著將孫占鰲妻子查明俱發往伊犁給額魯特為奴。其問擬斬決之葉萬春王言林占魁三犯。王言林占魁俱著即處斬。其葉萬春一犯。於孫占鰲放火時。曾經呼名喊阻。因此官役等共聞孫占鰲之名。得以追蹤捕獲。該犯亦未敢搶上大堂。葉萬春著改為斬監候。餘俱照所擬完結。至賽冲阿自請嚴議。僅將該管營員職名送部查議。輕重亦未允協。孫占鰲等以營兵構亂。本管營員失察之咎甚重。著查明俱咨部嚴加議處。賽冲阿。

實錄卷三百五

十七

常明辦理此案鎮靜妥協。著加恩寬免處分。多隆武提標係其專轄。著與葉文馥魯鳳輝俱交部察議。○諭軍機大臣等。先福奏陝甘道府年底例應出考密陳。因該省係二十年補行十九年大計。該督甫經出考。向逢大計之年。無需再陳密考等語。此例出於何典。向例督撫於年底將提鎮司道府各員賢否出考密陳。朕將原單留中備覽。其大計所出道府考語。則係題本存吏部備案。二者各為一事。直省督撫從無因大計之年。不陳密考者。今先福於甘肅提鎮藩臬。仍照常奏及惟道府各員。藉詞甫經大計。不行出考。其意因該省現值查辦倉庫虧缺。將來定案時。該道府等必紛紛獲咎。該督此時若與上考。慮及事後責問。如概與下考。則平日何不早行劾參。進退無據。故遁而為此一奏。先福有此隱情。何不據實直陳。乃飾詞取巧。大屬非是。先福著傳旨申飭。此次道府密考。竟著停止。本年

實錄卷三百五

十八

歲底再照例陳奏可也。將此諭令知之。○乙巳。諭內閣。松筠奏請。按照舊例。咨留書吏一摺。向來新疆各處書吏。五年期滿後。咨部酌留。至九年役滿。即以從九品未入流二項選用。嗣經御史高鶚條陳。役滿即飭回籍。將已留再留之例停止。今松筠以該處書吏熟諳者少。請仍照舊例辦理。著照所請。新疆南北兩路各處書吏。仍准其留滿九年。報部回籍聽候銓選。○丙午。諭內閣。御史盧浙奏嚴禁兵民挖取城根黃土。竊取執塊。並請培修城垣缺損各處一摺。京城內外城垣。根腳多有刨挖土坎。執石亦有脫損。該御史所奏。係屬實在情形。著步軍統領衙門。嚴行查禁。將現在內外城根土坎。即行填築完固。執塊脫損者。一律粘補整齊。嗣後僮再有在城根挖土及偷竊執塊者。立即查拏懲處。其內城溝道渣土填塞處所。並著於每年二三月間。飭令該管官役人等。分段起除挑挖。以利水道。毋

實錄卷一百十五

十九

得視為具文。○朝鮮國王李瑢遣使表賀萬壽。冬至元旦三大節。及歲貢方物。賞賚筵宴如例。○丁未。

上詣

大高殿行禮。○還宮。○諭內閣。三載考績。為國家激揚大典。朕釐工熙績。統計三年功過。以示甄別。現在京察屆期。吏部將京外各大員開單具奏。朕詳加覈定。大學士松筠近年以來辦事漸覺任性改常。凡所陳奏亦多窒礙

實錄卷一百十五

二十

難行。雖不至即予罷黜。無庸給予議敘。大學士董誥。托津。在軍機處承旨書諭。夙夜宣勤。兼綜部務。悉臻妥善。大學士曹振鏞。總理工部兼管三庫事務。均屬妥協。協辦大學士兵部尚書明亮。年逾八旬。精力尚健。辦理兵部事務。毫無舛誤。協辦大學士吏部尚書章煦。前署直隸總督。緝獲逆案要犯多名。辦事認真。兵部尚書吳璥。督辦睢工。經理完善。戶部侍郎盧蔭溥。在軍機處承旨書諭。甚屬盡心。

俱著加恩交部議敘。吏部尚書英和、戶部尚書劉鏞之辦事均各奮勉。但英和兼任步軍統領。劉鏞之兼管順天府事務。皆有督緝之責。年來所獲僅餘餘犯。於飭緝要犯。迄未報獲一名。此時朕不將伊二人罷黜降罰。已屬施恩。不能再邀甄敘。兩江總督百齡。江南河道總督黎世序。於南河事務。經理得宜。工程鞏固。從此可以長保安瀾。百齡並能捕獲逆犯方榮升。銷除鉅案。河南巡撫方受疇。綜覈倉庫錢糧。並訪獲紅鬍匪犯數百名。山東巡撫陳預。清釐積案。督催倉庫錢糧。均屬認真。俱著交部議敘。餘俱著照舊供職。○戊申。諭內閣。陳預奏遵旨查辦虧缺各員一摺。前因東省州縣。虧缺倉庫錢糧。動盈鉅萬。特降諭旨。從嚴懲辦。將十四年以後虧空各員銀數。在一萬兩二萬兩以上者。分別予以實犯死罪。茲據陳預奏。查明從前單開各員。虧缺銀數之內。尚有應准扣抵。及刪除各款。其現經

實錄卷三二五

十一

措繳者。亦請准其完解等語。此次革職。拏問交刑部監追各員。其原開銀數內。尚有軍需煮賑修理營房辦理剝船等款。其例得准銷者。本應作正開銷。即例不准銷者。經該撫查明實用有據。籌補歸款。亦准其扣除。至攤捐各款。非正雜錢糧可比。亦著查明於虧缺數內劃除。現在措繳者。必實已提存司庫。方准作完。該撫再稟明實虧銀數。遵照前降諭旨。將一萬兩二萬兩以上者。解交刑部監追。限滿之日。分別斬決。斬候罪名辦理。至已離東省各員。亦著照該撫所請。先行解至東省監禁。俟覈算明晰。再將實虧銀一萬兩二萬兩以上者。解交刑部一併辦理。○以協辦大學士兵部尚書明亮。都察院左都御史茹荼。署經筵講官。○緩徵湖北沔陽漢川天門江陵四川縣上年被水淤田花利銀。○己酉。裕陵。○諭內閣。

實錄卷三二五

十一

孝淑皇后陵寢不宜用奉先帛嗣後俱改用素帛。○旌表守正捐軀江西廣昌縣民婦揭符氏。○庚戌諭內閣景安等奏覈議甘省出借籽種口糧限期一摺。前據藩司嚴娘奏請酌定甘省出借籽種口糧詳奏限期當經降旨令景安等查覈具奏。茲據景安等奏稱甘省距京路途較遠。若如該藩司所議限期恐致稽延。另行酌議奏聞請旨。著照所請。嗣後僅遇歲饑仍照例隨時撫卹外。其偶被偏災之區應於該年冬閒出借口糧者於九月內具奏。收成不及六分暨六分有餘應於次年春閒出借籽種口糧者於年前十一月內具奏。歉收處所應於青黃不接之時出借口糧者於二月內具奏該州縣道府如有詳報覈轉遲延者查明分別嚴叅。仍著該督隨時酌量如計程不誤限期照常差人齎遞。儻民食孔亟准其由驛具奏以重民瘼。○緩徵福建平潭廳及南日縣丞所屬上年旱災新舊額

賊○是月兩江總督百齡等奏編查保甲各事宜得旨良法在好官辦理不可廢弛亦勿膠柱鼓瑟仍在隨時密訪若編入者即信為良善漏名者即為匪徒又失之遠矣

大清仁宗受天興運敷化綏猷崇文經武孝恭勤儉端敏英哲睿皇帝實錄卷之三百十五

大清仁宗受天興運數化綏猷崇文經武孝恭勤儉端敏英哲睿皇帝實錄卷之三百十六

監修總裁官延日講起居淳常子太傅兼英殿大學士太淵閣領閣事稽察欽奉
上諭事件處管理工部事務翰林院掌院學士隨常

加級尋常加四級臣曹振鏞總裁官太子太保文淵閣大學士兼理刑部事務加五級臣戴均元經筵日講起居注官太子少保內大臣文淵

閏促舉閣事稽察欽奉
上諭事件虞協辦大學士戶部尚書翰林院掌院學士教習唐吉士總管內務府大臣銀黃旗滿洲都統步

軍統領管理戶部庫庫察院清湖等處總理工程處御茶膳房御藥房太醫院西洋堂事務軍功加三級隨帶加級尋常加五級紀錄十二

一次臣英和經筵講官太子太保禮部尚書上書房行走武英殿總裁管理國子監事務加六級隨帶加級紀錄四次汪廷珍等奉

救修

嘉慶二十一年丙子二月辛亥朔旌表守正

中興錄卷之百一

十	
---	--

捐軀河南西華縣民趙文媳許氏○壬子以
舉行仲春經筵遣官告祭

奉先殿。

傳心殿。

上御文華殿經筵直講官英和曹振鏞進講益
子善教得民心講畢

上宣御論曰君心民心理一貫也善教民者能得其心也所謂從欲以治正其本也道之以政僅制其外耳道之以德斯格其內矣天君

泰然百體從令。烏有犯上作亂之舉哉。教也。

者古先聖王馭世之大經大法即在倫常之

聞惜乎奉行不善舍本逐末而民不率由妄

興邪說鼓惑癡愚風俗日趨儇薄皆在上位

者不盡心化導之所致也。夫人情莫不欲安。

存而惡危亡。然而干名犯義之徒。莠言亂法。

之輩。雖用嚴刑峻法。尚不知改悔其故何也。

未得其心也若平時宣三德弼五教仁以養

之義以正之禮樂以陶淑之政治以化導之

年錄卷三

1	2	3	4	5	6	7	8	9	10	11	12	13	14	15	16	17	18	19	20	21	22	23	24	25	26	27	28	29	30	31	32	33	34	35	36	37	38	39	40	41	42	43	44	45	46	47	48	49	50	51	52	53	54	55	56	57	58	59	60	61	62	63	64	65	66	67	68	69	70	71	72	73	74	75	76	77	78	79	80	81	82	83	84	85	86	87	88	89	90	91	92	93	94	95	96	97	98	99	100	101	102	103	104	105	106	107	108	109	110	111	112	113	114	115	116	117	118	119	120	121	122	123	124	125	126	127	128	129	130	131	132	133	134	135	136	137	138	139	140	141	142	143	144	145	146	147	148	149	150	151	152	153	154	155	156	157	158	159	160	161	162	163	164	165	166	167	168	169	170	171	172	173	174	175	176	177	178	179	180	181	182	183	184	185	186	187	188	189	190	191	192	193	194	195	196	197	198	199	200	201	202	203	204	205	206	207	208	209	210	211	212	213	214	215	216	217	218	219	220	221	222	223	224	225	226	227	228	229	230	231	232	233	234	235	236	237	238	239	240	241	242	243	244	245	246	247	248	249	250	251	252	253	254	255	256	257	258	259	260	261	262	263	264	265	266	267	268	269	270	271	272	273	274	275	276	277	278	279	280	281	282	283	284	285	286	287	288	289	290	291	292	293	294	295	296	297	298	299	300	301	302	303	304	305	306	307	308	309	310	311	312	313	314	315	316	317	318	319	320	321	322	323	324	325	326	327	328	329	330	331	332	333	334	335	336	337	338	339	340	341	342	343	344	345	346	347	348	349	350	351	352	353	354	355	356	357	358	359	360	361	362	363	364	365	366	367	368	369	370	371	372	373	374	375	376	377	378	379	380	381	382	383	384	385	386	387	388	389	390	391	392	393	394	395	396	397	398	399	400	401	402	403	404	405	406	407	408	409	410	411	412	413	414	415	416	417	418	419	420	421	422	423	424	425	426	427	428	429	430	431	432	433	434	435	436	437	438	439	440	441	442	443	444	445	446	447	448	449	450	451	452	453	454	455	456	457	458	459	460	461	462	463	464	465	466
---	---	---	---	---	---	---	---	---	----	----	----	----	----	----	----	----	----	----	----	----	----	----	----	----	----	----	----	----	----	----	----	----	----	----	----	----	----	----	----	----	----	----	----	----	----	----	----	----	----	----	----	----	----	----	----	----	----	----	----	----	----	----	----	----	----	----	----	----	----	----	----	----	----	----	----	----	----	----	----	----	----	----	----	----	----	----	----	----	----	----	----	----	----	----	----	----	----	----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----	-----

因民之所利而利之修身及家均平天下民俗厚而忠愛生孝親敬君明倫宣化則正氣充盈民生安樂皆善教之明效大驗也同其好惡得心也拂人之性失心也國家之得失在乎民心之得失民心之得失在乎政教之隆替也誠能君臣交泰盡心教養休戚相關胞與為念海宇蒼生同心向化善教所得者大矣直講官佛住盧蔭溥進講易經君子以明慎用刑而不留獄講畢

上宣御論曰聖人釋旅象曰山上有火去而不留仁義兼賅之至德也刑獄者庶民之身命所關先王不得已而用之哀矜惻怛之念斯須不可去也審察必極其詳而使無遁情聽斷必盡其詞而使無偽說勿以猛厲之言折之而不能申其蘊勿以慢易之心棄之而必欲得其實出入惟允輕重得宜公則明偏必暗勤則愼怠必疏公正勤敬理刑之要道也獄既成而斷決宜速不可留滯使冤濫之氣不伸又增吏胥之勒索詭計仍流於不明不愼矣刑獄之弊情偽百出汙吏貪婪為鬼為蜮若稍怠忽姑容民不堪命戾氣騰達上干天和所繫非淺鮮也勤敬之功用日勉於君心明愼之效驗日見於行事矣世道人心日流日下犯法者多為民上者宜思己過不能格其非心化其汙俗使之犯罪遭刑日覩銀鐺桎梏傷心慘目何忍因循怠玩漠不關心留獄盤詰冤苦莫訴非人心矣明愼不留誠

用刑之極則因循怠玩百弊叢生勤敬二字不可稍忽期于無刑予之深願也禮成上幸文淵閣賜講官及聽講諸臣茶復賜宴於本仁殿○癸丑遣官祭文昌帝君廟○大學士管理藩院事托津等奏各回城伯克等年班來京請將所帶行李照例稱驗除方物外如有多帶物件及代奸商夾帶私貨者查出叅辦得旨年班回子伯克進京沿途於例帶斤數外代奸商夾帶私貨應以私貨之多寡定伯克處分奸商罪名之輕重著理藩院會同刑部再行詳議具奏尋議奸商託年班進京回子夾帶私貨在五百斤以內者分別擬杖至六百斤者杖六十徒一年私貨俱照例入官每百斤加一等罪止杖一百流三千里回子伯克年班進京夾帶私貨在百斤以內者停升一次至一百斤者降一等私貨俱照例入官每百斤加一等罪止革去伯克回子王貝勒貝子公等年班

進京夾帶私貨者俱按其兼任伯克等第降革。私貨俱照例入官從之。○以理藩院左侍郎蘇沖阿兼正白旗護軍統領調鑲紅旗漢軍副都統文寧為正藍旗滿洲副都統以頭等侍衛額勒經額為鑲紅旗漢軍副都統。○以直隸馬蘭鎮總兵官文孚為錦州副都統。錦州副都統慶惠為馬蘭鎮總兵官兼總管內務府大臣。○正白旗護軍統領福勒洪阿以失察所屬冒官詐騙降二等侍衛為葉爾羌幫辦大臣。○甲寅遣官祭先醫之神。○乙卯諭內閣向來各項引見人員內有大員子弟皆不聲明朕無由知悉速簡用後其父兄具摺謝恩朕始知之嗣後無論京察軍政及京外各項引見人員內凡滿漢文武二品以上大員之子弟俱著自行呈報引見時於綠頭籤內註明如有漏報者查出交部議處。○免雲南銅廠民欠工本銀。○上以祭

社稷壇自是日始齋戒三日。○丙辰遣官祭黑龍潭。昭靈沛澤龍王之神玉泉山。惠濟慈佑靈瀍龍王之神昆明湖。安佑普濟沛澤廣生龍王之神密雲縣白龍潭。昭靈廣濟龍王之神。○諭內閣巡視東漕御史蘇繹奏東省續虧案內之六府二州請飭該撫酌展奏限一摺東省十五年以後虧缺倉庫錢糧之泰安兗州沂州登州四府屬州縣經朕特降諭旨從嚴示懲其餘六府二州尚未奏到應如何分別覈辦係巡撫陳預本任之事乃該御史率行陳奏此事既與漕務無干又非關繫民瘼似此越職妄言變亂是非明係袒護貪官甚屬多事蘇繹不勝巡漕之任著即撤回交部議處。○諭軍機大臣等御史王耀辰奏江蘇上海沿關一帶外通黃浦為海船出入之所其間有奸商借開設米

鋪為名暗用小舟於屋內偷運。土人名為大袋米。大袋米出時糧價立即騰貴等語。江蘇各屬為產米之區。前年偶遇旱災。糧價立形昂貴。自係該處奸商計圖漁利。有偷運出洋情弊。內地米糧藉供民食。若任令偷運出口。不特洋面匪徒借資接濟。而內地糧少價昂。於閭閻口食亦殊有關繫。著百齡等即飭該管道員嚴查關口。並派員密行察訪。如有奸商囤戶借開設米鋪為名私運出洋及關口

實錄卷一百六

七

奸胥猾役得錢賣放者立即嚴拏懲辦毋稍疏縱。將此諭令知之。○又諭御史王耀辰奏浙江長興之四安合溪棚匪奸淫攘奪積案累累等語。該棚民等聚處山場與居民間隔且多係外方之人往來無定最易藏奸。全在地方官嚴密稽查務使奸宄息跡。浙省棚民從前本定有章程著該護撫即飭該管官按照舊章實力奉行。將准其入籍之棚民一體編立門牌保甲嚴行查察其原編各戶棚民

之外不准再添一戶。以杜聚集日多滋生事端。不可因循怠玩。為目前苟安之計也。將此諭令知之。○展緩雲南騰越州民欠米穀○丁巳。

孝淑皇后忌辰命

皇次子智親王

祭

陵寢○祭

先師孔子遣皇三子綿愷行禮○戊午祭

大社

實錄卷一百六

八

大稷

上親詣行禮○幸圓明園○己未遣官祭

關帝廟○諭內閣給事中賈聲槐奏現在住園稽查之北城御史於分駐司坊官外添派一員幫辦其西城御史所轄地面祇有分駐司坊官一員香山一帶向係西城副指揮稽查該衙門相距較遠不能常往請照北城章程於西城揀發司坊官三員內分撥二員在園居住香山一帶即由該員稽查等語西北

兩城御史住園稽查事同一例北城既添派司坊官員西城地方亦復遼闊著都察院堂官即查照一體添派其該司坊官應分住何處香山一帶地方應如何分界稽查之處均著該衙門自行酌定辦理至該給事中所稱外省保甲請派分發試用人員分駐各州縣抽查一節各州縣編查保甲本係該地方官應辦之事再令該管上司不時抽查分別勸懲自能行之以實若添派委員分駐查辦必

實錄卷三二六

九

致干與事權勒索供應紛紛擾累所奏不可行著無庸議○引見京察三四五品京堂得旨光祿寺卿海福太僕寺少卿文修通政使司叅議和靖額年力就衰俱著以原品休致餘著照舊供職○以候補三品京堂穆彰阿為光祿寺卿○庚申

上辛靜明園詣

龍神廟拈香○諭內閣方受疇奏籌撥河工搶險銀兩一摺豫省河工每年於藩庫地丁

內撥銀三十萬兩另款存貯以為搶險之用所有上冬支發豫買稽料銀十四萬兩著毋庸扣除仍照向例儲備其臨時添撥銀兩若於具奏後給領實恐緩不濟急嗣後如遇歲定搶險銀三十萬兩將次用完著該河督察看情形應需添撥若干會同該撫覈明一面具奏一面行司提取備用俟霜降後如有餘存仍奏明歸還原款覈實報銷毋稍浮冒○諭軍機大臣等本日據嚴娘差人齎摺密奏

實錄卷三二六

十

訪聞德克精阿於各屬請領採買銀兩剋扣平餘並於十八九年豫陝軍需給發銀兩亦有扣平短發等語甘肅通省倉庫虧缺各情弊現派景安朱理先福會同秉公查辦嚴娘既查明德克精阿前在署藩司任內有扣平短發之事即應稟明欽差及該督向德克精阿嚴切詢究景安等訊明叅奏亦必聲明係嚴娘查出茲嚴娘不先稟明景安等查辦又因不能由驛奏事輒差人齎摺密陳甘肅至

京路途遙遠。此摺奏到再行降旨飭辦。豈不徒延時日。著景安等即將德克精阿等。將扣平短發各款。逐一嚴行審訊。並追究所扣銀兩。作何使用。令其據實供吐。毋稍含混。嗣後嚴煥續行查出弊端。俱稟知景安三人。辦理如景安意存消弭。再行具摺密奏。將此諭令知之。○辛酉。

孝康章皇后忌辰遣官祭

孝陵○旌表守正捐軀河南羅山縣民婦孫郭氏○壬戌以故翁牛特貝子圖們巴彥子豐紳保降襲鎮國公○癸亥直隸總督那彥成奏報拏獲逆犯劉玉澄。擢守備李士剛。為都司。賞民人杜連城。把總並藍翎。餘升敘有差。

○甲子遣官祭昭忠祠○諭內閣前據那彥成奏。在樂陵寧津交界地方。拏獲次要逆犯劉玉澄。現已解部審訊。實係正犯。本日陳預奏。接據樂陵縣稟報。訪得該縣境內小宋家莊。有來歷不明之劉姓。會營率領兵役前往

查拏。已被直隸寧津縣差役獲去。當將窩留劉姓之宋丑呂廷等拏獲。並起獲畫虎一幅。鐵錘一箇等語。劉玉澄係久經飭緝要犯。在該縣境內一年之久。作磨畫虎。教習拳棒。公然與人交接往來。並非潛匿地窖山洞可比。該縣平日編查保甲。訪緝逆蹤。所辦何事。今該犯已為鄰境拏獲。率將虛詞稟報。以冀彌縫。實屬可鄙。可恥。前經屢次降旨。令陳預飭屬緝拏要犯。並諭以如果獲犯。即係從前久匿境內。不但免其失察之咎。仍予恩施。原指各州縣自行拏獲者而言。若久經窩留境內。毫無見聞。經鄰境差人捕獲。則其咎豈能寬貸。樂陵縣知縣唐縉。良著革職。拏問。交陳預審訊。擬罪具奏。陳預此次京察。予以交部議敘。原因其在山東巡撫任內二年。辦事認真。今於所屬境內窩留逆犯。漫無覺察。即應交部議處。姑念平日辦理本省地方事務。尚無貽誤。著將京察議敘之處註銷。免其交議。○

兵部奏請給住歇官兵馬乾銀兩一摺得旨此項隨從官兵所領官馬自三月初一日起至初九日止在京住歇例無應得乾銀即如朕每年秋獮木蘭先期駐蹕熱河幾及一月或暫於中途駐蹕該官兵等原領官馬均無計日給與乾銀之例兵部既無辨過成案此次何以率請賞給乾銀殊屬有心見好邀譽沽名所有兵部承辦司員著交部加等議處兵部堂官著交部議處董誥甫經管理兵部著加恩寬免尋議上得旨兵部率請賞給隨從官兵住歇馬乾銀兩一事朕召見該部堂官屢經詢問係承辦司員先行具稿呈堂該堂官等並無先出主見之人亦未公商遂以次畫諾是邀譽之舉先由於該司員所有部議降三級留任之郎中增壽永恆俱著改為實降一級以兵部員外郎補用姚文田在內廷行走未能常川到署著加恩改為降一級留任餘依議○旌表守正被戕河南裕州民

賈維洛妻李氏○丁卯

上幸萬壽山○戊辰諭內閣御史王松年奏嚴飭各督撫慎揀首邑並繁缺州縣一摺敕令為親民之官總以勤理民事為重首縣為通省倡率要缺亦賦重事繁必須慎選賢能方克稱職乃向來督撫大吏專以浮華便捷工於周旋應酬之人奏請升調甚至視首縣如奴隸各上司衙署一切日用所需悉皆取給該縣今日役役於供頓逢迎非朘削閭里之膏脂即侵挪國家之帑藏直省州縣敢於公然虧缺肆無忌憚其風氣實開於此近雖漸知斂戢仍恐陋習未能盡除著通諭各督撫凡有升調首邑繁缺州縣務擇悃愾無華盡心民瘼者以端風尚如德品端方又才能幹濟自屬上選即德優於才雖器局稍謹而樸誠任事廉潔愛民亦必不致貽累地方較之流俗波靡者其相去遠矣督撫為吏治綱領其各正己率屬慎簡乃僚用副朕崇實黜浮

至憲○庚午引見各衙門京察保送一等人員得旨此次京察一等圈出人員著各該堂官再行出具切實考語交吏部帶領引見圈出之滿洲蒙古中書筆帖式等官著歸入理事同知通判內遇有缺出與舊記名人員一體帶領引見漢軍漢人著交部以撫民同知通判分別選用兵部主事兼太常寺贊禮郎善祿侍衛處主事色卿額先祿寺署正聯昌交部照例以應升之缺升用直隸州暫留東城兵馬司指揮謝天樛著以知府用翰林院侍講何凌漢左春坊左中允恒山查訥勤俱准其一等宗人府主事連謹准其於筆帖式任內一等加一級戶部郎中蕭鎮准其於員外郎任內一等加一級其餘內閣侍讀扎清阿等二百五十員俱准其一等加一級○辛未

上詣

大高殿行禮○還宮○壬申以荊州協領莫爾

格訥為乍浦副都統○癸酉春分朝日於東郊

上親詣行禮○詣

東嶽廟拈香○甲戌

上啟鑒恭謁

東陵○命肅親王永錫大學士曹振鏞尚書英和蘇楞額留京辦事○遣官祭賢良祠○以恭謁

兩陵免蹕路經過地方本年額賦十分之三

是日駐蹕烟郊行宮○乙亥駐蹕白澗行宮

○丙子

孝昭仁皇后忌辰遣官祭

景陵○是日駐蹕隆福寺行宮○丁丑

上恭謁

昭西陵

孝陵

孝東陵

景陵

裕陵俱未至碑亭。即降輿。慟哭。步入隆恩門。詣

寶城前行禮。躬奠哀慟。王以下文武大臣官員均隨行禮。○賞看守蹕路經過各行宮弁兵半月錢糧。○是日迴鑾。駐蹕桃花寺行宮。○戊寅。諭內閣。緒莊奏。審明遣犯高爾丙。教令回民。誣良為竊。請交刑部擬罪一摺。此案遣犯高爾丙。因奉差緝捕。恐限滿被責。起意誣賴。回民馬祥行竊。嚇誘教供。該弁兵等復用刑拷逼。以致馬祥情急。自戕受傷。緒莊既訊出各情節。實係誣良為竊。並弁兵私用非刑。庫車頗有大清律及續纂條例。即應按律定擬罪名。乃謂案情與律例不符。不能擬罪。請交刑部覈擬。試思案情與律文。安能字字符合。准情比例。自無枉縱。況此案行竊正賊及贓物俱已就獲。其誣良及刑拷各條。均例有明文。無難引斷。乃欲交刑部擬罪。刑部為刑名總匯。各省奏咨案件。所定罪名。是否允當。

實錄卷三二七

十一

該部應分別准駁。若刑部先代外省案犯擬定罪名。國家豈有此規制耶。緒莊因循推諉。無恥無能。太不曉事。豈復能勝西寧辦事大臣之任。前簡放時。由四等侍衛升授二等侍衛。著仍降為四等侍衛。所有高爾丙一案。仍著緒莊定擬具奏。俟來靈接任後。即行回京。在大門上當差。都司鄭栢著交部嚴加議處。○以吉林副都統松寧為西寧辦事大臣。調熊岳副都統祿成為吉林副都統。以吉林協領烏登額為熊岳副都統。○是日駐蹕白澗行宮。○己卯。以陝西按察使繼昌為雲南布政使。太僕寺少卿恒敏署陝西按察使。○是日駐蹕烟郊行宮。○庚辰上還宮。

實錄卷三二七

十一

大清仁宗受天興運敷化綏猷崇文經武孝恭勤儉端敏英哲睿皇帝實錄卷之三百十六

實錄卷三百十六

九

大清仁宗受天興運敷化綏猷崇文經武孝恭勤儉端敏英哲睿皇帝實錄卷之三百十七

纂修總纂臣等謹將纂修實錄卷之三百十七

纂修總纂臣等謹將纂修實錄卷之三百十七

纂修總纂臣等謹將纂修實錄卷之三百十七

纂修總纂臣等謹將纂修實錄卷之三百十七

纂修總纂臣等謹將纂修實錄卷之三百十七

纂修

嘉慶二十一年丙子三月辛巳朔祭

實錄卷三百十七

一

先蠶之神

皇后親詣行禮○諭內閣阮元奏候補知府博起係臬司玉輅妻之堂兄雖非例應迴避之員恐跡涉嫌疑仍請迴避一摺近來外省於所屬官員內往往以例非迴避之員率請迴避及交部議又復援例奏駁殊屬煩瀆且恐迴避之員或以缺分肥瘠藉引嫌為規避亦不可不防其漸著吏部即將迴避定例通行直省嗣後如例應迴避者即奏明迴避其非

例應迴避之員。一概毋許讀奏。博起一員。即著照例辦理。○壬午。諭內閣。貝子奕純自幼在上書房讀書。甚為誠樸。茲遽聞溘逝。深堪惻憫。著加恩賞給陀羅經被。派載銓齋往賜奠。仍由廣儲司賞銀二千兩治喪。伊子載錫係

皇考高宗純皇帝五世元孫載錫生時。曾蒙特恩將奕純晉封貝子。且因鍾愛。載錫賦詩。眷注。並幸伊家看視。今若照例將載錫降襲公

實錄卷三十七

二

爵。朕心實有不忍。自應仰體

皇考高宗純皇帝慈愛之意。載錫著加恩再襲貝子一次。○癸未

上御乾清門聽政。○諭內閣。御史盧浙奏編查保甲請加保結一摺。保甲即周官比閭族黨遺意。且相糾相察。詰奸正所以安良。然治法全在治人。若一經編成冊籍。逐戶查點。即信以為無隱。無漏。則良法雖具。仍屬有名無實。現在各直省舉行保甲。覈對門牌。而責成不

專里長甲長等。恐不免有容隱之弊。著各省督撫再嚴飭地方官。於編查保甲時。責令里長甲長等。取具連名互保甘結。如有來歷不明。蹤跡可疑者。該里長等畏其株連。自不肯代為具結。立時首報。儻一經具結。其所保之人。或曾經作奸犯科。或竟係逆案逸犯。查出後。將出結之里長甲長。按律連坐。本犯罪輕者。里長等之罰亦輕。本犯罪重者。里長等之罰亦重。庶羣知警惕。不敢輕易容隱。在逃逆

實錄卷三十七

三

匪。無難悉數緝獲。該地方官務各實力奉行。勿得視為具文。將此通諭知之。○引見內務府京察一等人員。得旨。此次內務府三院等處京察一等。圍出人員。著各該堂官再行出具切實考語。帶領引見。圍出之主事。恒梧。筆帖式。福祥。增祿。塔清阿。長庚。寶善。景德。著交吏部記名。照例選用。所有一等官員。達他筆帖式。俱著准其一等加一級。○以大理寺少卿同麟。為內閣學士。兼禮部侍郎。銜陝西布

政使陳觀為太僕寺卿○以湖南按察使徐忻為陝西布政使太僕寺卿海齡為湖南按察使○甲申遣官祭

歷代帝王廟○諭內閣百齡奏禁止鬻妻溺女一摺民間溺女最為惡俗該督於所屬三省州縣倡率捐置育嬰堂收養遺嬰如仍有溺女者查明照例治罪各地方官果能行之以實其惡習自可漸革至鬻妻一事大率出於無賴游民然果使衣食有資亦孰肯輕於

實錄卷三十七

四

離異家室此又在親民之官為小民熟籌生計能使人習勤勞俗敦儉樸富者餘於所蓄而有賙恤之施貧者足以自完而無飢寒之迫則衣食足而廉恥生庶妻孥皆可以相保是又教與養相因不徒恃法令之禁止也○大學士托津等議奏江西省行銷淮引堵緝鄰私章程得旨此項緝私巡役准其攜帶鳥鎗但必編刻字號官為給發如所帶鳥鎗並無官編字號即屬私帶雖實係抵禦聚眾私

梟仍照凡人鳥鎗殺傷例治罪○乙酉復引見京察一等圈出人員得旨德蔭陸藻查訥勤吳信中陶樸林培厚劉榮黼費丙章齊哈納穆揚阿朱桂楨祥瑛吳鼎臣福祥胡枚巴彥珠瑞生奎昌嵩岫程同文世寧祥瑞梁承福德光誠安惠顯吳榮光福兆馬瑞辰張本枝柏齡額永和德寧額富祿善程贊寧宜清安黃鳴傑蔡炯增柱俱著交軍機處記名以道府用○復引見內務府京察一等圈出入

實錄卷三十七

五

員得旨六庫郎中達林會計司郎中惲桂造辦處郎中嘉祿上駟院郎中恒太奉宸苑郎中阿揚阿南苑郎中富森保圓明園郎中明禧會計司員外郎普成營造司員外郎達三都隆阿武備院員外郎長庚圓明園員外郎文祥俱著交軍機處記名○丙戌旌表守正捐軀山西太平縣民吳五成妻衛氏○丁亥上耕耤詣先農壇行禮更服至耤田所

躬耕三推復加一推

御觀耕臺命禮親王麟趾睿親王端恩鄭親王

烏爾恭阿各五推吏部右侍郎佛住戶部左

侍郎果齊斯歡禮部左侍郎寶興兵部左侍

郎禧恩刑部右侍郎彭希濂署工部左侍郎

戴聯奎都察院左副都御史多山通政使司

通政使張鵬展大理寺卿恩寧各九推畢順

天府府尹率農夫終畝賞賚農夫耆老如例

○以詹事府少詹事昇寅為太僕寺卿○戊

子清明節

上詣

壽皇殿行禮○遣官祭

永陵

福陵

昭陵

昭西陵

孝陵

孝東陵

景陵

泰陵

泰東陵

裕陵○遣官祭

孝淑皇后陵寢○遣官祭

端慧皇太子園寢○諭內閣本日節屆清明

朕恭詣

壽皇殿瞻禮

神御因憶嘉慶己巳朕五旬正壽之年清明日

恭謁

裕陵行數土禮並舉

隆恩殿大饗及今已越七載朕春秋五十有七

自惟精力康強如昔敬擬於己卯朕六旬正

壽之年仍恭詣

裕陵躬行數土禮並舉

隆恩殿大饗朕非敢於過禮敬念仰承

皇考高宗純皇帝付託之重丙辰年

親御太和殿

授璽又復

訓政三年周極

慈恩實為互古所未有朕孺慕之懷與年俱益

計惟捧土

珠邱藉可稍申忱悃著禮部太常寺將此旨存

記屆期奏請親詣行禮令各該衙門敬謹豫

備○己丑諭內閣奏摺題本乃臣下告君之

言豈可以市井匪類穢語連形章牘初八日

刑部進呈直隸總督那彥成等具題趙春穢

實錄卷一百一

本

詈邊范氏以致氣忿自盡一本將字典未有

之字極村極穢之言連敘二處刑部堂司各

官俱未看出依樣葫蘆仍照原題直書甚屬

因循失體非尋常錯誤字句者可比著大學

士董誥托津尚書蘇楞額吳璥將具題之那

彥成盛泰及本內列名之堂司各官寫本之

人分別議罪於十二日具奏○以故阿魯科

爾沁扎薩克貝勒多爾濟帕勒瑪子丹津巴

勒桑襲爵○以江南江寧城守協副將鮑友

智為湖南永州鎮總兵官○旌表守正捐軀

直隸肅寧縣民婦邊范氏○庚寅

上啟鑒恭謁

西陵○諭內閣前因松筠審辦布魯特比圖爾

第邁莫特罪名前後兩歧於該犯謀逆情形

聲敘亦未明晰特降旨令長齡會同成寧等

秉公確查茲據長齡等奏訊據圖爾第邁莫

特之子阿則依及塔莫瑪什等供該犯先曾

應允幫同致牙墩滋事抱經起誓繼欲謀害

實錄卷一百一

九

霍隆武等經其妻及子弟等勸止嗣事竣後

貪得致牙墩莊田未遂心懷怨恨復有斷不

甘心定行鬧事之言是該犯同謀助逆有眾

供可憑自應按律治罪但該犯究係謀而未

行與致牙墩之糾眾背叛戕害官兵者情罪

有間松筠既經奏請將該犯斬梟所擬罪名

原無錯誤必應俟奉到諭旨後再行處決方

為正辦乃未奉明示忽將該犯凌遲處死與

致牙墩毫無區別且縱令該犯家屬多名同

時遁逃。辦理實屬草率。松筠前已革去太子太保。部議降四級調用。無級可降。應行革任。著加恩改為革職留任。阿奇木伯克伊薩克經松筠派查圖爾第邁莫特逆跡。既查有端倪。即應將該犯家屬先行嚴密防範。乃於席間探出逆言。乘夜面稟。全不愼密。以致犯屬脫逃。亦屬疏縱。伊薩克著即降補五品伯克。其喀什噶爾阿奇木伯克員缺著長齡會同松福貢楚克扎布秉公揀選擇其實堪勝任者。奏請調補。○是日駐蹕舊衙門行宮。翼日如之。○辛卯。

孝賢純皇后忌辰遣官祭

裕陵。○壬辰。諭內閣。前因刑部議覆直隸總督那彥成具題趙春穢詈邊范氏以致氣忿。自盡。本內將極村極穢之言連敘二處。有失體制。特降旨令董誥等將具題之那彥成。盛泰及本內列名之刑部堂司各官。分別議罪。茲據董誥等奏請將盛泰革職。那彥成及刑部

堂司各官分別降調。所議甚是。此案盛泰先將穢語敘入原詳。本應照議黜革。姑念該臬司現在查辦逆案。一時更換乏人。盛泰著革去花翎。加恩改為革職留任。盛泰既已從寬。其原議降三級調用之那彥成著加恩改為降三級留任。原議降二級調用之刑部郎中福智員外郎德光。蔣翎主事富祥。候補主事汪鳴謙七品京官梁恩照。俱著加恩改為降二級留任。原議降一級調用之崇祿。韓對。那彥寶。盧蔭溥。文寧。俱著加恩改為降一級留任。惟彭希濂於昨日召見時。奏稱伊閱看此案。曾將本內村穢字句用筆記出。因嘉慶五年奉有諭旨。凡語言調戲案件。令將該犯如何調戲。致本婦羞忿莫釋之處。詳晰聲敘。是以拘泥未經刪改。亦未與各堂官相商。所奏殊屬巧辯。朕前降諭旨。原令將案內情節詳晰聲敘。豈令將村俚之言一併載入。彭希濂強詞支飾。不勝刑部侍郎之任。著以正三品

京堂降補。○諭軍機大臣等。據嚴烺奏。秦州知州李醇和。在皋蘭縣任內。代各衙門餵養馬匹一節。該司前在蘭州道內騎用驛馬。亦係該革員代為餵養。懇請交部嚴加議處等語。向來藩臬准令奏事。如該省督撫有不公不法。及地方緊要事務。匪不上聞。原許兩司專摺陳奏。若尋常事件。總應稟詳督撫。據以入告。豈容越分妄陳。甘省虧空之案。現派欽差大臣會同總督查辦。嚴烺曾交首縣餵養馬匹。亦係案內之事。自應稟明景安等歸案彙辦。何須自請嚴議。殊屬邁越。著景安等傳旨申飭。其該藩司交首縣代餵馬匹一事。著景安等歸入同案交餉馬匹各員。一律叅處可也。○調吏部右侍郎帥承瀛為刑部右侍郎。署工部左侍郎戴聯奎為吏部右侍郎。○賞看守南苑各行宮苑戶一月錢糧。並賞海戶銀一千三百兩。○是日駐蹕團河行宮。○癸巳諭內閣。首齡等奏。王營減壩盤做裏頭

工程必須丞倅專司經理。請將丁憂同知唐文睿暫留掌管等語。王營減壩盤頭工程。非搶辦緊要鉅工。可比。南河廳員及候補人員甚多。儘可量材派委。唐文睿現已丁憂。例應回旗守制。似此違例奪情。其端斷不可開。所奏不准行。唐文睿著即飭令回旗守制。毋任遷延。○是日駐蹕新衙門行宮。○甲午諭內閣。張映漢奏。黑龍江減回內地流犯龔亞文。在配脫逃。於五日內拏獲。訊係附近躲避。尚未出境。遵例請旨定奪等語。龔亞文著仍發黑龍江為奴。如再脫逃。拏獲即行正法。餘俱照所議完結。嗣後凡免死減等發遣盜犯。改發者。如在配脫逃。五日限外拏獲。仍照例正法。其五日限內拏獲。訊明實係附近躲避。並未遠颺者。即仍發原配地方。毋庸奏請定奪。著為令。○是日駐蹕黃新莊行宮。○乙未賞直隸危衛弁兵等銀幣有差。○除陝西城固縣水衝地十頃三十二畝有奇額賦。○是日

駐蹕半壁店行宮○丙申駐蹕秋瀾行宮○
丁酉

上臨慧愍固倫公主園寢賜奠○賞蹕路經過
看守各行宮弁兵半月錢糧○是日駐蹕梁
格莊行宮○戊戌

上恭謁

泰陵

泰東陵俱未至碑亭即降輿慟哭步入

隆恩門詣

寶城前行禮躬奠哀慟王以下文武大臣官員

均隨行禮○至

孝淑皇后陵寢奠酒臨

妃園寢賜奠○旌表守正捐軀直隸南和縣

民王煥新妻張氏○是日迴鑾駐蹕秋瀾行

宮○己亥諭軍機大臣等景安等奏訊明李

醇和前在皋蘭縣任內賠累各項共銀八萬

餘兩餘銀四萬一千餘兩據供零星用去不

能逐款指出等語那彥成前在陝甘總督任

內除將舊虧奏明彌補外其失察所屬州縣
自十六年以後又新虧倉庫二項至一百萬
餘兩之多其咎甚重景安等將來定案時應
以此將那彥成嚴叅其李醇和所虧銀兩除
自認賠累各款外餘銀四萬一千餘兩該革
員但以不知儉省濫行花費空言登答殊屬
含混究竟作何使用或伊饋送何人令其據
實供吐儻竟不能逐款指實則係該革員自
行侵蝕或捐官或置田或徵歌選舞俱應臚
列實跡不准含混訊明後即照所虧銀數問
擬罪名又另摺所奏章程五條已交軍機大
臣速議具奏該省查辦虧缺總當以新虧銀
數多寡分別輕重若十五年前舊虧前於
那彥成查明奏請分限彌補時已降旨允准
此次仍著遵照前議辦理如祇有舊虧而無
新虧者儘可留任照依原定年限分別追補
其新虧舊虧俱有者則必應從重懲辦即照
山東虧空之例分別銀數多寡著追治罪景

安等先確實查明分別覈辦俟軍機大臣議奏上時再降旨飭遵可也。將此諭令知之。○是日駐蹕半壁店行宮。○庚子諭內閣百齡等奏江寧旗營開缺甲兵家口養贍不敷設法調劑一摺。前據穆克登布等因該旗營無依丁口較多。請將各兵舊置洲地變通辦理。以為歷久調恤之需。當經降旨令百齡再行會同覆覈具奏。請旨。茲據該督等會商覆奏。請將洲租錢文計口分給。雖應給丁口隨時增減。而歲入租項總有贏無絀。官兵既免扣餉。公費亦可節省。實於該旗營大有裨益。俱著照所請行。該將軍等惟當督飭經管各員認真稽覈。以期經久無弊。並造具冊圖報部以備查覈。○又諭前據御史盧浙奏。州縣徵收錢糧。例用三聯串票。欲杜州縣虧欠之弊。請飭令蓋用該管道府印信。經戶部議准通行。茲據百齡等會奏窒礙難行之處甚多。朕詳加披覽。所言皆係實在情形。徵收錢糧串

票。鈐用州縣印信。奉行已久。即加用道府印信。如已徵之銀。仍不催提報解。亦難杜虧挪之弊。徒使官病稽遲。民滋擾累。吏胥往返。亦易作奸。江蘇安徽江西三省情形如此。推之他省。自必皆然。與其紛更無益。不若仍循舊章。以歸簡易。所有前議三聯串票。蓋用道府印信之例。著通諭各直省。即行停止。○旌表守正捐軀河南太康縣民劉成妻李氏。○是日駐蹕黃新莊行宮。○辛丑。上臨故大學士朱珪墓賜奠。○旌表守正被戕奉天興京廳民王仁女王氏。○是日駐蹕北海濟龍王廟行宮。○壬寅。貴州巡撫曾燠奏。查明已革知縣虧缺倉庫請拏問。得旨。此案已革知縣金雲前於署鎮寧州任內虧缺倉庫銀穀。著拏問交該撫提同丁胥人等嚴審定擬具奏。各省督撫叅劾虧缺州縣。如係現任人員。自應奏明革審。至已革人員。續經查有虧缺。即可先行拏問。審訊俟定擬具奏時。

於摺內聲明。若俟奏明奉旨始行審辦。豈不徒延時日。任令彌縫。嗣後各省已革人員。續經查有虧缺者。均即照此辦理。毋庸先行請旨。○是日。駐蹕靜宜園。至丙午。皆如之。○癸卯。諭軍機大臣等。董誥等議覆甘省新舊虧缺酌擬追補章程一摺。已依議行矣。甘省新舊虧缺。至二百二萬餘兩之多。新舊必須劃明。誠恐不肖州縣。將十六年以後之新虧銀數。挪入十五年以前。希圖輕減銀數。藉免罪名。景安等務須查明年限。劃分清楚。毋任朦混。至新虧項內。有攤捐雜款。無關倉庫正項錢糧者。原不應與正項併計治罪。但既有攤捐名目。必須確有憑據。方准於新虧項內劃除。歸入攤捐項下辦理。不可任聽州縣捏報。將實係侵蝕入己之項。指作攤捐。藉以避重就輕。景安等務當留心稽覈。別除弊竇。以昭公允。所有董誥等議覆之摺。著即抄錄發給遵照辦理可也。將此諭令知之。○以勦辦致

牙墩出力。賞布魯特比蘇蘭齊二品頂帶。阿哈拉克齊拜呢雜爾比伊薩比伯克莫特。五品頂帶花翎。伊里斯拜。六品頂帶藍翎。○乙巳。上御演武廳。閱健銳營操。○以故四川長寧安撫使蘇朝仕弟朝相襲職。○丁未。上幸靜明園。詣龍神廟拈香。○還圓明園。○旌表守正捐軀山東陽穀縣民韓懷妻許氏。○戊申。諭內閣。御史盛唐奏嚴查戶口一摺。保甲為詰奸良法。京師內外城。現行章程。均已周密。內城地方。應仍由步軍統領衙門。按季編查。外城門牌。亦只須按月更換。若十日一換。太覺紛煩。惟在各該管官實力稽查。勿以日久疏懈。俾收實效。至各巷口柵欄。啟閉均有定制。著該管衙門嚴飭看守兵役。以時關鎖。如有疏縱懈弛者。查明懲處。○又諭工部奏駁吉林於營盤溝相連山坡開採煤窑一摺。所駁是吉

林前經奏准開採煤窰六處。其缸窰等五處產煤豐旺。已足供旗民日用之需。至營盤溝一處試採無煤。即應照例題請封閉。乃於相連之西南山坡換給執照開採。易啟影射。朦混之弊。著即封閉。將執照徹銷。以符定制。其缸窰等五處煤稅均著於開創之年起納。○以都察院左副都御史多山為禮部右侍郎。○調鑲紅旗蒙古副都統景祿為鑲藍旗滿洲副都統。以署正白旗漢軍副都統吉勒通阿為鑲紅旗蒙古副都統。○貴州巡撫曾燠以親老乞養。允之。以禮部右侍郎文寧為貴州巡撫。○是月。欽差大臣成都將軍賽沖阿奏帶兵赴藏。行程遄利。得旨命汝帶兵至藏。總為嚴防邊界。斷勿協助廓爾喀。若披楞擾及藏地邊界。必應痛驅逐。切勿貪功窮追。若廓爾喀王子情急。本身來投。亦可收留。安為安插。嚴堵披楞。勿令闖入。若兩處講和罷兵。汝即回成都可也。又批。汝至藏時。以奉旨

實錄卷三十一

十一

訊問達賴喇嘛呼畢勒罕為名。勿宣露帶兵衛邊之意。即廓爾喀又來請助。總置不問。仍令喜明。珂什克二人寄信。勿令彼知汝在藏方妥。

實錄卷三十一

十一

大清仁宗受天興運數化綏猷崇文經武孝恭勤儉端敏英哲睿皇帝實錄卷之三百十七

准捐復。其部議不准捐復原官之張世彥前據同興奏。該員講論軍務。不中肯綮。降補同知。同興於軍務先自茫然不解。人言之中竅與否。安能辨別。其原奏未足為憑。張世彥著發往河南。交與方受疇差遣委用。仍著該撫察看。如張世彥尚堪勝知府之任。一二年後奏明。令其捐復原官。儻才具實屬中平。即留河南以同知補用。○諭軍機大臣等。富俊奏發往吉林之宗室綿遜。三年期滿一摺。前因宗室綿遜獲罪。令其攜眷發往吉林。交該將軍嚴加約束。特以盛京吉林為滿洲根本之地。將不安分之宗室發往。使之漸習淳風。原與伊犁等處罪人有間。今富俊奏稱宗室綿遜三年期滿。殊屬非是。宗室綿遜著永遠攜眷居住吉林。仍交該將軍嚴加管束。嗣後遇有似此者。即照此辦理。年滿時不必具奏。儻吉林發遣宗室人數過多。該將軍等再酌照盛京例。建房安插。派員管束。○撥直隸滄州

營馬二十一匹。烏鎗六十桿。分設於寶坻東安。采育三處。以資操演。從稽查左翼四處駐防官兵大臣秀寧請也。○乙卯。以貴州永安協副將格綢額為雲南普洱鎮總兵官。○丙辰。以翰林院侍讀奎耀充日講起居注官。詹事府少詹事汪守和署日講起居注官。○旌表守正捐軀直隸蠡縣民賈立秋妻王氏。○丁巳。

上辛萬壽山。○戊午。

上詣

大高殿行禮。○還宮。○諭內閣。慶保奏審擬放火謀殺病丐致斃多命之兇犯一摺。該犯梁毓任。因侵用村眾捐給病丐銀兩。經朱本貴查知。理論起意。將朱本貴燒斃滅口。又延燒七人。案關八命。兇殘已極。該撫仍照殺死非一家三命之例。問擬斬決。奏請定奪。辦理實屬姑息。慶保著傳旨申飭。各省頒發王命原為案情重大。刻難稽誅者而設。似此情罪兇

惡之犯尚侯奏請。又安用頒發王命為耶梁毓任著即處斬梟示。餘均照所擬完結。○以江南督標中軍副將慶廉為甘肅西寧鎮總兵官。○以常雱祀

天於

圓丘。自是日始齋戒三日。○庚申。

上詣

南郊齋宮齋宿。○辛酉。常雱祀

天於

圓丘。

上親詣行禮。○辛圓明園。○壬戌。諭內閣本月十一日。輪應鑲黃旗直日。是日例不應推班。該三旗俱值無事。各具摺片呈遞。蒙古副都統那丹珠因誤記推班日期。將該三旗公遞摺片。尚奏事官員處一同徹下。那丹珠誤記推班。其咎尚輕。至各衙門陳奏事件。應於具奏之前。將應遞與否。公同酌定。若既交奏事官員接收。應即上達朕前。王公大臣等斷不

准私行徹出。那丹珠以內閣學士副都統在批本處行走。輒敢如此率意妄為。其重咎實在於此。那丹珠著革去內閣學士副都統降三級調用。退出批本處。現出有鴻臚寺卿一缺。即著那丹珠補授。嗣後王公大臣有似此者。俱照此降調。奏事處官員德寧於該三旗已遞事件聽其徹下。亦屬不合。德寧著退出奏事處。仍交部議處。○刑部奏審擬直隸民婦王李氏因姦毆逼伊媳身死一案。得旨。明刑所以弼教。此案郎復興與王李氏通姦。經李氏之媳香兒窺破。李氏欲抑令香兒同陷邪淫。與郎復興相商。郎復興以香兒性傲。止好先向探試之言回覆。嗣李氏令香兒與郎復興斟酒。香兒不從。李氏將香兒毒毆。致香兒服酒自盡。詳覈案情。郎復興既有先向探試之言。是已有圖姦香兒之心。以致釀成命案。即同羞忿自盡。李氏例不擬抵實。發新疆為奴。若照部議將郎復興減為杖流。出於何

典實屬疏縱香兒貞烈捐軀竟無抵命之人殊不足以懲姦邪而維風化郎復興著改為絞監候入於朝審情實辦理嗣後有案情似此者均照此例問擬○以禮部右侍郎多山兼鑲黃旗蒙古副都統○以貴州遵義協副將恒安為湖北宜昌鎮總兵官○甲子諭內閣成格等奏增復鑄錢料價一摺寶泉局額給爐頭料價因物值增昂不敷辦公加恩著照所請准其照雍正十二年以前舊價每卯增復料錢一百四十七串六百文每年共增復料錢一萬六百二十七串二百文將局庫現存餘錢內撥出錢十萬串交蘆商生息其增復料錢即以此項息錢給發惟料價既增務須督飭該爐頭等如式鼓鑄毋令再有偷減以肅錢法○乙丑

上御勤政殿聽政○禮部右侍郎王宗誠以親老乞養允之調兵部右侍郎姚文田為禮部右侍郎以內閣學士曹師曾為兵部右侍郎

仍兼署倉場侍郎○以太僕寺卿昇寅為都察院左副都御史通政使司副使明興阿為太僕寺卿○丙寅

孝端文皇后忌辰遣官祭

昭陵○命內閣學士湯金釗在上書房行走○

丁卯河南巡撫方受疇奏審擬魯山等縣匪徒罪名一案得旨王太平王有貴俱著即處絞趙丙柱等十九犯均發回城給大小伯克及力能管束之回子為奴其年逾七十之宋

王賓王添珠張林及尼僧緒賢均毋庸發遣即在豫省犯事地方分置各處永遠枷號並將該犯等犯事案由標明曉示俾眾觸目警心用昭炯戒餘俱照該撫所擬完結嗣後各直省遇有倡立邪教惑眾騙錢案內應行發遣之犯著該督撫於審明定案時即照此案酌留一二名於該省犯事地方永遠枷號示眾○戊辰

上詣

火神廟拈香。○還宮。○旌表守正捐軀河南陝州民莫登元妻王氏。○己巳。

上御太和殿視朝。王以下文武升轉各官謝恩。○辛酉。明園。○四川總督常明奏漢州紳士捐建河橋。州同銜張鴻道等議敘有差。○庚午。諭內閣。佛住等奏請照戶局增復料錢一摺。工部寶源局額給爐頭料價。前於雍正年間。與戶部寶泉局額給料錢。同時酌減。前此戶部因該爐頭等辦公不敷。奏請增復料價。

業經降旨允准。工局與戶局事同一例。加恩著照所請。准其照雍正十二年以前舊價。每卯增錢七十三串八百文。每年共增錢五千一百六十六串文。由戶局存貯餘錢內。再撥錢五萬串。同戶局前請撥錢十萬串。一併發交蘆商生息。按年解交戶部。其工局每年所增料錢。即自奉旨之日為始。按月在於鑄出卯錢內數給。該侍郎等務督飭該監督等。責令各爐頭如式鼓鑄。毋稍偷減。以肅錢法。○

辛未。諭內閣。本月二十日。朕由宮內臨幸圓明園。路間有驚逸馬匹。由後跑來。經過朕前。經綿恩查明。係四執事太監墜馬致逸。已將該太監重責四十板。彼時扈從之侍衛等。均未即時攔截。該侍衛等隨扈行走。蹕路所經。如有叩閭之人。及驚逸馬匹。俱應嚴肅管轄。乃是日。但聞御前侍衛乾清門侍衛等。一同聲喊。並無一人將馬匹攔回。本應概予懲處。因念人數衆多。姑從寬免。孟住。蘇冲。阿。阿勒罕。保容。照。台。保。係專派後扈侍衛。當經降旨交部嚴議。本日兵部議奏。請將孟住等俱照溺職例革職。實屬咎所應得。惟是日隨扈行走之侍衛等。既未悉予懲處。伊等亦可稍從寬減。孟住等五人。除俱已退出乾清門外。孟住著降補副都統。仍留世職。蘇冲。阿。阿勒罕。保著降為頭等侍衛。蘇冲。阿。仍留世職。容。照。台。保著降為二等侍衛。俱在大門上行走。嗣後蹕路經由之處。如有驚逸馬匹。自前至者。

著該侍衛等向前驅逐。自後至者著該侍衛等向後驅逐。若橫逸近至朕前。即著近御之侍衛等截拏。儻再似此疏懈。定將該侍衛等實予降黜。不稍寬貸。○刑部等衙門奏審明。領催寶瑛聽從母命。帶子投河。擬罪一摺。得旨。律設大法。案關倫紀。法司不能不依律擬罪。而情節重輕。其間實大有區別。朕斟酌權衡。則必使歸於至當。此案寶瑛聽從伊母連伊子三人一併投河自盡。伊母淹斃。而寶瑛

被救得生。刑部將該犯問擬斬決。法固如是。惟朕詳閱案情。寶瑛於母老劉氏素無違忤情事。老劉氏因續娶媳小劉氏瘋病。不能料理家務。貧難過活。起意自盡。寶瑛再三勸解不從。因以情願同死之言。答覆是實。瑛不願獨生。實有以身殉母之意。次早伊母攜孫出門。伊慮及追往。伊母誑稱閒遊。至晚伊母執意投河。寶瑛又跪地哀求。伊母聲言再向阻擋。即係不願同死。揮之使去。寶瑛不敢分辯。

甘心併命。其三人手腕亦係老劉氏自行拴繫。是寶瑛以身從死。實屬計無復之。情實可憫。至汎兵撈救後。三人中惟寶瑛一人得生。轉在意料之外。推原寶瑛當日從死之心。實為無罪。寶瑛不必問擬斬決。著即釋放。聽其依守伊母墳墓。永不准挑取差使。至小劉氏雖係瘋病無知。但伊姑老劉氏及幼子圖塔布兩命之死。實由伊所致。小劉氏應照瘋病殺人例。問擬斬監候。永遠監禁。○以西寧辦

事大臣松寧為理藩院左侍郎。○以烏里雅蘇台將軍伊冲阿兼正白旗蒙古都統。吏部左侍郎秀寧兼正白旗護軍統領。降正白旗蒙古都統孟住為鑲黃旗蒙古副都統。以鑲白旗滿洲叅領穆通阿為鑲藍旗蒙古副都統。○甲戌

上幸萬壽山。○諭內閣。巴哈布奏湖南省幫丁情形。懇恩酌借銀兩。量為津貼一摺。前因浙江漕船運丁債累。降旨查詢有漕省分。有無

聞款可以酌借調劑疲丁。茲據該撫奏該省幫丁等素稱疲乏。運道較他省尤長。費用繁多。稱貸辦公。時形竭蹶。加恩著照所請。准其於司庫備貯項下。賞借銀五萬兩。發給漢鎮岸商承領。按月一分行息。每年息銀六千兩。以二千五百兩解司歸還原借本款。其餘三千五百兩均勻散給各丁。俟二十年後本款全數歸還外。所有岸商承領銀五萬兩。仍令長年生息。每年息銀六千兩。即儘數分給各

實錄卷三二八

十一

幫俾丁力。咸臻寬裕。以裨運務。○乙亥。諭內閣張師誠奏。伊父病勢危篤。現將江蘇巡撫印務交藩司代辦。即日起程歸省。由驛具奏一摺。實屬絕無僅有之事。誕妄極矣。張師誠身係巡撫。封疆責任綦重。伊父病既危篤。即應早先陳請開缺。回籍省視。朕必加恩允准。乃該撫並不豫為之計。接到家信。輒將巡撫印務交藩司代辦。徑自起程回籍。伊籍隸浙江湖州。距蘇州甚近。若他省督撫大吏等距

實錄卷三二八

十一

家遙遠者。亦如此效尤。豈不以私廢公耶。至驛遞原為緊要公務。而設凡無關緊要事件。擅發驛遞者。尚干吏議。張師誠所奏伊父患病情形。係伊家事。輒由驛馳遞。實屬冒昧。張師誠著交部嚴加議處。尋議革職。從之。○旌表守正被戕安徽阜陽縣民李年妻李氏。○丙子。調安徽巡撫胡克家為江蘇巡撫。以安徽布政使康紹鏞為巡撫。雲南按察使韓克均為安徽布政使。降調貴州按察使廣慶。以四品頂帶為雲南按察使。○貸甘肅臬蘭靖遠隴西安定鹽茶平羅西寧會寧寧遠漳寧夏靜寧寧朔大通碾伯十五廳州縣上年旱災及歉收地方貧民口糧。○己卯。

上幸靜明園。詣龍神廟拈香。

五月庚辰朔。以太僕寺卿陳觀為內閣學士。兼禮部侍郎銜。○壬午。孝誠仁皇后忌辰。遣官祭。

景陵○甲申盛京禮部侍郎誠安以失察其子和慶包訟得贓降都察院左副都御史以左副都御史昇寅為盛京禮部侍郎盛京戶部侍郎德文兼管奉天府府尹事○乙酉

上幸萬壽山○丙戌

上御勤政殿聽政○諭內閣御史王維鈺奏嚴禁錢鋪短數並查緝逃騙一摺京城市廛稠密錢鋪衆多其每日交易錢文短少數目豈能概令官為查察此事太涉苛細如有假票

中書奉
上

上

詐騙經被累之人首告者著步軍統領順天府五城各衙門查拏究辦有犯必懲以儆奸儈○以光祿寺卿穆彰阿為內閣學士兼禮部侍郎銜○丁亥旌表守正捐軀山東臨邑縣民李希孟女李氏○己丑緩徵河南蘭陽儀封二廳縣電災額賦○庚寅

上幸靜明園詣

龍神廟拈香○刑部奏審擬楊四等毆傷覺羅富定賄囑司員一案得旨此案楊四即楊

春霖以無賴子弟狎優遊蕩倚醉逞兇既知富定係屬覺羅仍口出不遜之言肆行毆辱迨案經控送到部復敢挾富賄求致不肖司員貪財聽囑雇法多人情殊可惡著刑部堂

官傳到富定眼同將該犯楊四當堂重責四十板再於犯事地方枷號一箇月標明犯事案由示衆以昭儆戒滿日照擬發往黑龍江當差刑部為執法衙門案無大小悉應秉公審斷若司員等竟敢聽情受賄其契將何所

中書奉
上

上

不至穆克登布係德楞泰之姪首先包攬此案得贓最多實為罪魁穆克登布照擬絞監候入於本年朝審情實辦理和慶係德成之孫誠安之子保齡係倭什布之子且係掌印司員均分得多賍卑汙無恥和慶保齡俱著在刑部枷號一箇月滿日分別發遣其在逃之張順楊五等著步軍統領順天府五城勒限嚴緝獲日另行擬結富定被毆多傷著於起出贓銀內賞給一千兩以示矜卹餘依議

○辛卯吏部奏議處都察院左都御史茹菜等失察子弟夤緣受賄一摺得旨都察院衙門職司風憲尚當察弊除奸乃左都御史茹菜給事中李培元於伊子茹壽彭李之瑄攬訟受財毫無覺察雖職數無多其平日不能管束咎無可辭著照部議茹菜降二級調用李培元降四級調用四川松茂道黃思宸雖遠任外省其子黃華攬訟滋事平日失於教導著降一級調用○以湖廣總督馬慧裕為

都察院左都御史浙江巡撫孫玉庭為湖廣總督調湖北巡撫張映漢為浙江巡撫以江蘇布政使楊夔為湖北巡撫調江寧布政使陳桂生為江蘇布政使以江蘇按察使李堯棟為江寧布政使江南河庫道伊什扎木素為江蘇按察使○壬辰命

皇次子智親王

祭

關帝廟○旌表守正捐軀安撫懷寧縣民劉添禧妻鄒氏○癸巳以故土默特扎薩克貝

勒貢楚克巴勒桑子濟克默特扎布襲爵○旌表守正捐軀直隸通州民王成功妻張氏四川彭縣民李遺章妻袁氏○甲午諭內閣十八年九月十五日之事謀逆渠魁如林清李文成牛亮臣馮克善徐安綢等悉已誅殛無遺

上蒼佑順國法顯彰其在逃從逆各犯經刑部就獲犯所供分別情節重輕列為最要次要若干名朕所以嚴飭緝拏者原以除莠安良欲將邪惡芟夷萌蘖為吾民久遠安全計也由都城以及直省果能認真訪緝各於本境燭照數計則知縣能知一縣之事知府能知一府之事按其里圖保甲比戶周知逸賊將何所遁藏無如府州縣中智愚不一勤惰不齊以至荏苒三年逋逃未獲其辦理不善者則惟多派委員越境四出各委員所到之區人地生疏無從查訪於是本境民人之誦詐者將其素有嫌隙之人吹聲送線報名委員

各委員意在貪功受賞。未有不尋蹤捕緝者。及捕拏到案。審出虛誣。而被誣之人早已家產蕩然。且有拖累致斃者。是莠民未除。而良民之無辜被害者。已不可勝計。豈不與朕本意大相逕庭乎。近日各省奏報緝匪之摺。每張皇馳報於前。迨至查拏審實。均與正犯無涉。在該督撫之意。亦明知事多虛妄。特因要犯日久無獲。每閱旬時。藉以搪塞。以見其督捕緊嚴。雖疑似者尚無遺漏。設有真犯。必能

實錄卷一百一十五

七

弋獲。而當飛章入告之時。朕旰食宵衣。盼詔旨。屢頒久之。輒化為烏有。予虛者。蓋不知凡幾矣。是該督撫等以偽相嘗。而朕日為之勞心焦思。究之於事何益耶。嗣後各省緝拏要犯。總當責成地方官。各就本境實力嚴查。其派出委員。著概行撤回。各該州縣果能於所屬境內。將要犯緝獲。不但免其從前失察窩留之罪。仍必大沛恩施。若在境內潛藏。毫無覺察。經鄰境盤獲者。即照東省樂陵縣知縣唐

綰良之例治罪。斷不寬貸。各該督撫於所屬稟報獲犯。均親提審訊。如審係虛誣。即自行省釋。不必具奏。其最要次要逆犯。必訪有確蹤。方可奏聞。不得先以虛詞入告。徒成畫餅。總之殲除遺孽。意在安戢閭閻。實則有功。虛則無益。慎勿以朕安民之心。該官吏奉行不善。致成擾民之舉也。將此通諭知之。○又諭。外省應行謝恩道府人員。原可進內謝恩。而各部院大臣官員。遇朕在勤政殿引見。本應

實錄卷一百一十五

七

進內謝恩。若遇在出入賢良門。閱看布靶之日。即著在出入賢良門外謝恩。嗣後若遇臨幸萬壽山靜明園之日。所有大臣官員。毋許謝恩。違者治罪。○乙未。

上幸萬壽山。○以本年鄉試。考試應開列試差人員於正大光明殿。○丙申。諭內閣。昨經降旨。令內外緝捕衙門。將派出訪緝逸犯委員。概行撤回。責成該地方官。各就本境認真緝拏。原以齊民編戶比櫛而居。由一甲一里以

至州縣府廳境址愈近。則耳目愈真。不似各委員越境訪查。徒勞罔益。即如本案首逆林清。係步軍統領衙門官役擒獲。其宋家莊董村等處從逆各犯。亦皆由本管文武衙門按名捕誅。至李文成。牛亮臣。徐安。惲。則係官兵殲捕。馮克善一犯。逃至獻縣。亦由本管知縣張翔立時盤獲。其各衙門越境四出之委員。三年以來。從未獲一正犯。其閒誣指妄拏者。轉不一而足。朕不忍以為民除害之心。致成

實錄卷三十八

七

擾民之舉。特行降旨停撤。此視民如傷之心。當亦天下黎元所共見也。爾小民共有天良。食毛踐土。久享太平。於此等梟獍之徒。諒必矢切同仇。懷不共戴天之憤。著各該督撫轉飭各州縣。徧行曉諭。凡保甲冊內。十家為牌。一牌十戶。令其互相稽查。如有形跡可疑之人。即行首報到官。能將逆犯捕獲。不但首報之人。賜金授職。其同牌十戶。一併酌加賞賚。若窩留逆犯。不行舉首。經地方官訪聞捕獲。

實錄卷三十八

七

窩藏之家。即與叛逆同罪。其同牌十戶。一併連坐。即有先曾習教之家。現經悔悟。能將逆犯縛送。或指告到官捕獲者。其習教之罪。一切弗問。仍給予厚賞。若容隱窩留。別經發覺。則罪上加罪。刑茲無赦。朕愛民如子。志在翦除逆孽。以安善良。凡我兆庶。尚其凜茲明訓。共勵尊君親上之心。効忠殄惡。以稱朕意。將此通諭知之。○丁酉。以故輔國將軍永彩子綿壽襲職。○戊戌。諭軍機大臣等。賽沖阿等奏商辦廓爾喀披楞交兵。潰稟一案。先行馳檄詰責。隨帶兵前赴邊境。脅以兵威。一摺。所奏實屬妄誕。紕繆之至。此次令賽沖阿帶兵赴藏。原為嚴防邊界。並令該將軍到藏。以奉旨詢問達賴喇嘛。呼畢勒罕為名。不可稍露風聲。乃賽沖阿竟不欽遵辦理。輒首先出名。將讓路阻貢之詞。分馳二檄。詰責廓爾喀披楞。其詰責廓爾喀之詞。已屬糊塗無理。至詰責披楞。則謬妄更出情理之外。如披楞接到

檄諭該國王以讓路阻貢之言係廓爾喀捏稟懇請天朝發兵其將何以應之若恃其險遠竟承認伊向廓爾喀曾有此言又豈能因此一言即大興師旅窮兵黷武乎至廓爾喀屢次投稟請兵請賞今接到檄文即回稟以前此屢稟駐藏大臣未蒙轉奏今聞大皇帝特差將軍帶兵前來感恩懼喜其讓路阻貢之言實係披楞所說懇請天朝發兵萬里遠征國家何所為而出此若如賽沖阿等檄諭

書

書

所言我兵兩路進搗陽布檄飭披楞攻其南面則廓爾喀臣順多年不卹其難轉率同外夷夾攻其地堂堂天朝大體安在賽沖阿此舉首鼠兩端進退無據朕惟自恨誤用無能奴才之咎曷勝憤懣看來伊因朕派令赴藏即妄起貪功之心欲構成邊釁以邀爵賞而置國家大局於不顧是誠何心太不度德量力矣況如此重大軍情不待奏聞先行馳檄其專擅之咎亦無可辭賽沖阿著傳旨嚴行

申飭先拔去雙眼花翎降為二品頂帶喜明珂什克並不阻止隨同會銜俱著降為三品頂帶喜明並拔去花翎現在檄諭已發料難追回惟有靜候該二國回稟再行覈辦其回稟齋到時賽沖阿等即將原稟譯出不得增減一字候朕指示辦理彼時邊疆靜謐賽沖阿即帶兵徑回成都喜明自回前藏此時惟有嚴防邊境待以鎮靜不許輕舉妄動若賽沖阿等再妄發檄諭或帶兵擅出邊界敬成

書

書

慶端朕必將賽沖阿革職拏問從重治罪將此諭令知之○旌表守正捐軀河南新安縣民燕景春妻高氏○庚子

上辛靜明圓詣

龍神廟拈香○壬寅

孝恭仁皇后忌辰遣官祭

景陵○

上詣

大高殿行禮○還宮○以夏至祭

地於

方澤自是日始齋戒三日○癸卯諭軍機大臣等陳預奏設法緝拏祝劉二逆情形一摺捕賊之法如治疾然治疾冀其速愈方藥不效即當亟思改圖自十八年九月以後飭緝在逃逆犯其時各委員既無現任職守攜帶眼目越境躡訪自必急於自効乃已歷三年未獲正犯一名而貪功邀賞妄拏無辜者指不勝屈訟獄繁興簿書叢積大失安民之心轉成虐民之政且委員所到之區張皇聲勢即有真實要犯在境亦必聞信遠颺是直驅之使遁委員之流弊如此朕是以降旨令將各委員停撤責成地方文武各就本境緝拏須知各逆犯總不能遁於天壤之外果能由一州一縣以至一甲一牌處處稽查周密則逆犯縱令如鬼如蜮亦將何所逃匿前已屢經降旨諭知各州縣如能獲犯即免其失察之咎仍一體施恩然地方官規避處分扭於結

習仍恐觀望遲疑著該撫再行通飭各屬破除成見前旨具在朕示大信於臣民斷無食言者但令該地方官今日獲犯則雖自十八年九月以後在該境潛匿亦斷不追論其日久失察之罪仍必立予恩施若本境惜無覺察經鄰境訪獲則照樂陵縣知縣唐縉良之例治罪儻更有昏憤之員既經失察慮干處分訪有要犯在境私行驅逐以冀目前暫時無事一經查出則故縱大逆即與大逆同罪尤為法所不容該撫接奉此旨通飭所屬仍聞隔旬時嚴檄督催如該州縣等訪有確蹤或力不能掩捕即令密稟該撫立派文武幹員協緝總之捕拏逆犯實心實力必能有獲不在空言塞責也將此諭令知之○甲辰以故土爾扈特扎薩克貝勒巴圖克什克弟巴圖納遜襲爵○命大學士御前大臣前任伊犁將軍松筠即行回京○乙巳夏至祭

地於

方澤

上親詣行禮。○幸圓明園。○丙午遣慶郡王永璘往奠故禮部尚書王懿修茶酒予祭葬。謚文僖。○丁未以翰林院編修郭尚先為雲南鄉試正考官。內閣中書聞人熙為副考官。翰林院編修黃安濤為貴州鄉試正考官。廖鴻荃為副考官。○命科爾沁貝勒鄂勒哲依圖在御前大臣上學習行走。以御前大臣索特納木多布齋為鑲黃旗領侍衛內大臣。兼正黃旗蒙古都統。○以烏什辦事大臣成寧為直隸泰寧鎮總兵官。兼總管內務府大臣。賞降調泰寧鎮總兵官成書二等侍衛。為烏什辦事大臣。○以廣西潯州協副將劉廷斌為右江鎮總兵官。○遣御前大臣索特納木多布齋等往奠故御前大臣喀爾喀賽因諾顏扎薩克親王固倫額駙拉旺多爾濟茶酒賞銀二千兩治喪。○戊申諭內閣景安等奏查明甘肅司庫撥存新疆俸餉銀兩並無虧挪

請將伊犁俸餉照舊彙撥一摺伊犁官兵俸餉向係彙入內地估撥案內一同請撥後因口外錢糧各歸本處奏銷奏明另案請撥以致撥解較遲嗣後著伊犁官兵俸餉仍照舊定章程附入冬撥案內同時請撥其各該省應解協甘餉銀務按照例限如期解齊所有本年長蘆河東江西江蘇山東湖北未經解到餉銀並著該部行文飭催毋任遲延○諭軍機大臣等董教增等奏喀喇國遣夷官稟稱該國遣使進貢於上年十一月起程由浙江舟山一路水程入都從前進貢即係由此路行走約本年五六月間可到天津等語喀喇國遣使進貢由海洋水程至天津入都業經准其入貢第洋面風信靡常該國貢船現在未知行抵何處著福建浙江江蘇山東各督撫各飭知沿海州縣一體查探該國貢船經過之處如在洋面安靜行走即毋庸過問儻近岸停泊或欲由彼改道登岸即以

聞風竄匿。譬如釣者之於魚。獵者之於獸。惟不驚不擾。巧於偵伺。方能有獲。若先使之瀾翻數駭。則魚已潛藏。獸已遠遁。豈非徒勞罔益乎。著諭知那彥成。即通飭所屬。刻下緝捕之法。惟密之一字。最為緊要。果能不動聲色。外示寬緩。暗布耳目。必能投閒伺隙。訪有端倪。勿徒虛張緝捕之名。轉致有妨實效也。將此諭令知之。○旌表守正捐軀直隸磁州民楊四女楊氏。○丁巳。兵部奏。議處盤獲人犯。

實錄卷一百九

二

任意耽延。致令乘間自縊之黑龍江將軍特依順保等一案。得有此案。特依順保等。於盤獲形跡可疑人犯王俊時。自應立即訊明虛實。分別辦理。乃該將軍因值年班進京。未及提訊。蘇清阿署任將軍。並不派員訊究。迨特依順保回任。又遲延不辦。致令該犯乘間自戕。如王俊係屬逆犯。轉得倖逃顯戮。若非逆犯。寧非拖斃無辜。是此疑案虛懸。皆伊等因循疲玩所致。著照部議。蘇清阿降一級調用。

特依順保降一級留任。○以署鑲紅旗護軍統領烏勒德尼。為齊齊哈爾副都統。頭等侍衛安福。為正白旗蒙古副都統。○戊午。以翰林院修撰吳信中。為廣東鄉試正考官。編修錢林。為副考官。刑部郎中程祖洛。為廣西鄉試正考官。翰林院編修王贈芳。為副考官。編修何彤然。為福建鄉試正考官。工部主事吳孝銘。為副考官。○己未。

實錄卷一百九

三

上幸萬壽山。○庚申。諭內閣。戶部寶泉局東廠匠役。訛索爐頭喧鬧滋事。該監督文祿等。平日辦理不善。臨時又不能約束。侍郎成格等。率將增復料錢。許給匠役三成。辦理亦屬軟弱。文祿象曾業。經交部嚴加議處。其實泉局監督。著常格溫承惠充補。該二員無庸帶領引見。即行赴局任事。成格黃鉞。管理錢法堂。均不稱職。現經交部議處。那彥寶著調補戶部右侍郎。兼管錢法堂事務。其未假滿以前。著秀寧署理。熙昌著轉補刑部左侍郎。所遺

刑部右侍郎員缺著成格調補盧蔭溥著調補戶部右侍郎兼管錢法堂事務其戶部左侍郎員缺著姚文田調補所遺禮部右侍郎員缺著黃鉞調補○以戶部右侍郎那彥寶兼京營左翼總兵正紅旗漢軍副都統扎坤珠為正紅旗護軍統領旌表守正捐軀山西太平縣民楊友洛妻趙氏○辛酉旌表守正捐軀河南祥符縣民段先妻張氏襄城縣民孫同州妻張氏○壬戌命新調浙江巡撫張映漢仍為湖北巡撫調湖北巡撫楊釁為浙江巡撫○甲子

上幸萬壽山○乙丑以翰林院編修黃中樸為湖南鄉試正考官檢討李德立為副考官編修宮燦為四川鄉試正考官孔傳綸為副考官○旌表守正捐軀山東單縣民喬美玉妻李氏○丙寅諭內閣向來三品以上大員無論現任在籍其中式科分適遇花甲再週應重赴鹿鳴宴者該省大吏專摺陳奏朕念其

曾任大員又年登耄耋每加恩晉秩以彰人瑞若尋常年老舉人准其重赴鹿鳴宴已足以昭恩澤無庸專摺具奏嗣後除三品以上大員仍准專摺奏請與宴外其四品以下者俱著該督咨報禮部准令與宴該部於科場事竣彙總具題○庚午諭內閣十八年九月逆匪林清勾約李文成來京滋事經滑縣知縣強克捷訪破逆謀將李文成獲案嚴刑拷訊逆黨牛亮臣等知事已敗露糾夥劫獄將強克捷全家戕害而李文成刑傷甚重遂不能剋期赴約逆首林清尚遲疑株待因得迅就捕誅是強克捷不獨訪獲所屬境內逆匪兼能破敗林清等勾結奸謀厥功甚大前經賞給騎都尉世職令伊長子強逢泰承襲茲據強逢泰以自幼未習弓馬恐誤差操呈懇改就文職雖與兵部奏准定例不符惟強克捷功烈偉著不能拘以常例朕褒卹忠蓋逾格施恩強逢泰著准其改就文職以六部主

事補用○辛未遣官祭

火神廟○浙江黃巖鎮總兵官陳夢熊因病

乞休允之以福建閩安協副將黃耀武為黃

巖鎮總兵官○旌表守正捐軀河南泌陽縣

生員馬中驥女馬氏○壬申旌表守正捐軀

安徽歙縣民汪大福妻葉氏○癸酉禮部左

侍郎寶興緣事降補大理寺卿轉禮部右侍

郎多山為左侍郎調盛京工部侍郎廉善為

禮部右侍郎以大理寺卿恩寧為盛京工部

侍郎○調正黃旗漢軍副都統福長安為正

黃旗滿洲副都統以禮部右侍郎廉善兼正

黃旗漢軍副都統吉林協領和福為盛京副

都統○甲戌諭內閣昨據秀寧甘家斌吳椿

會銜西琅阿單銜奏光祿寺署正花良阿

各一摺又秀寧附片陳奏西琅阿為子請託

一事除將花良阿解任交刑部審訊外當令

軍機大臣傳到秀寧西琅阿甘家斌吳椿及

署正春林等秉公查問茲據查明具奏朕覈

其情節西琅阿先任光祿寺少卿伊子奎齡

照例迴避嗣西琅阿升任後向秀寧請託欲

將奎齡照題選兼補舊案奏留秀寧祇將奎

齡留補選缺西琅阿疑係豫為花良阿升補

題缺地步此次升任光祿寺卿遂挾嫌報復

查出花良阿提調情弊始欲奏繼又欲勒

令告病並將伊子現未得缺亦令花良阿等

缺之言向春林等面述西琅阿已離光祿寺

之任其子或題或選本不應囑託干求至為

伊子報復輒於所屬司員前宣言無忌尤為

舛謬西琅阿著交部嚴加議處至各部院奏

留迴避在先之員係常有之事秀寧將奎齡

奏明專補選缺並未徇西琅阿之囑後西琅

阿查出花良阿情弊秀寧答以查明再辦旋

即會同甘家斌等奏亦無不合惟西琅阿

向伊請託不即時將西琅阿奏奏是其錯誤

秀寧著交都察院察議各部院堂官理宜同

寅協恭和衷共濟不宜各存意見扶怨互爭

於政事何益乎。○乙亥。諭內閣。御史蕭鎮奏。工部寶源局匠役停爐。誤鑄扶制官長。請嚴行懲創。並錢法侍郎因循不奏。請旨查辦。一摺。工部寶源局匠役。欲分調劑爐頭料錢。互相爭鬭。係五月初旬之事。該監督不能彈壓。許以回堂分給。該堂官派員前往曉諭。該匠役復敢恃衆逞刁。守閉廠門。先後將派員放出。該錢法侍郎。彼時即應據實奏聞。查拏懲辦。乃佛住等於五月十六日。朦混奏請。將料

平糶本三十二

八

錢分給匠役。以圖將就了事。該匠役等益肆無忌憚。復逼令爐頭代還借項。至六月初六日。戶局匠役亦聞風效尤。將爐頭圍繞逼脅。勒分錢文。經成格等奏請嚴拏。交部審辦。此後朕屢次召見佛住。吳煊。分別詢問。工局近日情形。該侍郎等均以安靜無事回奏。於該匠役等滋事。始終無一字奏及。直至於今。工局仍有停鑄未開之爐。經御史蕭鎮訪聞。叅奏。是該侍郎等既經朦混於前。又復欺飾於

後。佛住。吳煊。始則畏葸無能。繼則將就朦蔽。俱著交都察院嚴加議處。一二日內即行具奏。其監督良禧。馬瑞辰。周維垣。並派往曉諭之司員柏齡。額。周廷授。俱著軍機大臣傳訊具奏。至戶局匠役。祇於圍逼爐頭。在大使廳前喧鬧。工局匠役。公然守閉廠門。將司官扣留。尤屬目無法紀。著英和帶同番役。即刻前往寶源局。立將滋事為首之匠役賈喜子等。拏交刑部嚴審治罪。○賞已革兵部尚書初

平糶本三十二

七

彭齡。筆帖式延豐。工部主事充寶源局監督。○丙子。

上御勤政殿聽政。○命左春坊左贊善陳官俊。在上書房行走。○緩徵直隸博野。祁深武強。饒陽。安平。六州縣旱災。歷年節欠額賦。○丁

丑。

上幸萬壽山。○諭內閣。錢局匠役係微末小人。貪得無厭。是其常態。全在該侍郎等平日督率監督申明約束。此次工局增復料錢。本係

賞給爐頭之項該匠役等妄生覬覦即屬不安本分自當立予責處枷示俾知懲創佛住等率領司員齋旨發交閱看辦理已失之輒弱及該匠役等仍不遵奉將該司員監督等留於局內關閉局門求索不已其時並欲該侍郎等到局設佛住等進局亦被遮留更復成何事體該匠役等似此貪昧肆妄佛住等並不據實奏交刑部治罪輒將增復料錢朦混奏請酌成分給調停了事朕屢次召見詢

實錄卷一百一十七

十

問工局情形佛住等均奏稱極為安靜希圖掩飾實屬因循疲玩已極似此庸碌具臣斷難姑容佛住吳烜著照部議即行革職以為滿漢侍郎不實心任事者戒○調工部右侍郎普恭為吏部右侍郎以都察院左副都御史誠安為工部右侍郎轉吏部右侍郎戴聯奎為左侍郎調工部右侍郎王鼎為吏部右侍郎刑部左侍郎陳希曾為工部右侍郎轉刑部右侍郎帥承瀛為左侍郎調倉場侍郎

實錄卷一百一十九

十二

朱理為刑部右侍郎以內閣學士陳觀為倉場侍郎○調鑲藍旗漢軍副都統百順為鑲藍旗滿洲副都統以頭等侍衛安成為鑲藍旗漢軍副都統○休致大學士慶桂卒遣貝勒奕紹帶領侍衛十員往奠茶酒予祭葬謚文恪○戊寅刑部奏數議貴州苗民陳阿哈勒斃服兄一案得旨此案陳阿哈因大功堂兄陳阿婁強姦其妻小李氏已成聽從伊母老李氏將陳阿婁謀勒斃命陳阿婁本係亂倫應死罪犯該犯激於義怒聽從母命將其勒斃與無故逞兇者不同陳阿哈著改為斬監候餘依議○欽差戶部尚書景安等奏參甘肅前任總督那彥成商回藩司浮銷賑銀並運送糧石腳價朦混具奏各情弊一摺得旨著托津禧恩馳驛前赴保定傳旨將那彥成革職等因解京交大學士戶部刑部會同嚴審定擬具奏那彥成之子容照客恩俱著革職○命吏部員外郎張輅提督貴州學政

○以河南巡撫方受疇為直隸總督調江西巡撫阮元為河南巡撫以直隸布政使錢臻為江西巡撫調山西布政使姚祖同為直隸布政使以山西按察使習振翎為布政使雁平道富綸為按察使

閏六月己卯朔奉恩將軍咸齡因病告退以其子夢麟襲職○庚辰旌表守正捐軀河南永寧縣民孟道士妻張氏○癸未旌表守正捐軀四川邛州民梁銀剛妻蘇氏○甲申

上幸靜明園詣

十三

上幸靜明園詣

龍神廟拈香○丙戌以兵部左侍郎顧德慶為浙江鄉試正考官翰林院編修李振庸為副考官詹事府詹事吳其彥為江西鄉試正考官翰林院編修林則徐為副考官修撰龍汝言為湖北鄉試正考官浙江道御史史譜為副考官○己丑諭內閣錢局專司鼓鑄部庫專司收納定例於防弊之道最為周密近年來印錢解庫銀庫以房產不敷為詞並不

按批收貯因循疲玩實屬違例嗣後月鑄印錢著全收不准存留局中以杜弊混若銀庫房產實在不敷本年戶部內務府議准御史蕭鎮條奏遇有內務府工程以錢銀各半放給著三庫內務府錢法堂會同酌議嗣後每月局鑄印錢分解部庫若干分解內務府若干其現在戶局積存錢二十六萬餘串亦著均勻分解覈定成數奏明遵照辦理○庚寅上幸萬壽山○諭內閣方受疇等奏武陟縣應

築攔黃土埽工程並籌備防料物懇恩借項

十三

辦理一摺豫省武陟縣攔黃埽向係民修茲據方受疇等查明該處近因河溜逼刷隄根生險應於鑲築順隄護埽補還原隄加築後戲之外再盤鑲埽段作為托壩並添購防備料物以資搶護工要費繁民力猝難集事加恩著照所請將估修工料銀五萬四千九百一十兩零准其先於該省司庫存貯節年地丁銀內動支給領剋期興辦其備防料物責

令全數購買堆貯。如本年伏秋汛無須動用。即留為下年歲修之需。所借銀兩。在河北彰德衛輝懷慶三府所屬各州縣地糧內分作四年攤徵歸款。○賞熱河被水官兵房屋修費。○辛卯。以河南按察使琦善緝匪認真賞花翎。知府特通阿等。升敘有差。○緩徵陝西定遠廳本年水災未完籽種。○癸巳。續纂秘殿珠林石渠寶笈成。南書房行走尚書英和等。賞賚有差。並下部議敘。○甲午。

實錄卷一百九

十四

上御勤政殿聽政。○諭內閣。本日都察院奏據山東商人高恒立呈控沂水蒙陰兩縣梟匪聚眾搶奪。自十八年十二月。至本年五月。戕斃巡役。割耳挖眼。以及搶店毀搶。截劫派買。擄辱婦女。控告到官者。共有七十二案。陳預於十九年九月。到山東巡撫之任。其前此地方廢弛。尚得諉為同興之咎。陳預接任將及二年。地方先徙。恣行不法。至於如此。伊誰之辜。無怪飭緝要犯日久不獲。劉玉澄匿境一

年。茫無覺察。及究出。祝劉二逆。窩留蹤跡。又不能迅速成擒。一味因循。怠玩。毫無整頓。封疆大吏。所司為何事乎。方受嚆巡撫河南。與陳預均在十八年之後。豫省拏獲紅鬃匪徒。審明嚴辦者。共有七百餘名。奸宄斂戢。閭閻安枕。特將伊擢授總督。其委往督緝之梟司琦善。亦賞戴花翎。隨同出力。府縣各員。並准令登諸薦牘。奮發有為者。賞以旌功。萎靡不振者。亦罰以當罪。陳預著革去花翎。降為三

實錄卷一百九

十五

品頂戴。責令戴罪自贖。勉力速拏。要犯以蓋前愆。該商人呈遞梟匪擾害地方節畧。著發交閱看。令其自知愧恥。所有沂蒙二縣各案梟匪。即督飭文武員弁。勒限按名捕獲。嚴審定擬具奏。該撫經此次訓誡之後。儻仍不知愧奮。廢弛怠玩。必當重治其罪。不能姑恕。言出法隨。決不容此庸劣具臣。貽誤封疆。慎之。○又諭。現在暎咭喇國遣使入貢。該使臣等到京後。城內居住。會同四譯館。城外居住。洩

水湖公館著派護軍統領秀寧格布舍各帶章京十員護軍一百名在於該使臣館舍外晝夜巡查看守嚴禁該吏人等擅自出入不許內地居民私往窺視如不遵者即行鎖拏奏交刑部治罪其赴禮部筵宴時並著該護軍統領帶領章京護軍等嚴行彈壓用昭整肅○以降調都察院左都御史茹荼為內閣學士兼禮部侍郎銜○以太僕寺卿明興阿為都察院左副都御史光祿寺少卿良輔為光祿寺卿○乙未諭內閣永祚奏請捐廉添建獄房一摺盛京刑部原設監獄近因訟案繁多人犯不敷羈禁自應奏明添建永祚請捐廉辦理將估需銀兩分作三十年扣還所見太小甚屬猥瑣永祚著傳旨申飭所有此項添建獄房更房即著普恭常顯會同盛京工部動項修建工竣覈實報銷其請添禁卒二十名並著准其增設○丁酉旌表守正捐軀安徽宿州民王押妻杜氏○戊戌

實錄卷三二九

十六

實錄卷三二九

十七

上幸萬壽山○諭內閣本日朕恭閱聖祖仁皇帝實錄康熙二十六年宗人府題多羅平郡王納爾圖打死無罪人羅米又折楊之桂菩薩保二人手足應革王爵監禁得旨納爾圖著革去王爵免其監禁欽此因思上年冬間禮親王昭棟將其屬下莊頭人等禁押府內非刑酷虐經管理宗人府王公軍機大臣刑部會同審明革去王爵擬以圈禁三年朕彼時未曾記憶此旨以綿課等係照例定擬即依所擬行今思納爾圖從前打死平人又折二人手足尚恩免監禁昭棟雖濫用非刑其被虐之人究未斃命較之納爾圖尚覺稍輕朕敬承家法著加恩將昭棟釋放寧家○以左春坊左庶子顧臯為陝西鄉試正考官兵部員外郎李振祐為副考官內閣學士湯金釗為江南鄉試正考官刑部員外郎陸言為副考官○己亥予勦辦四川瞻首陣亡守備王舜年干

總阮廷麟外委蔣玉琪王彥林前鋒校成惠
屯外委沙格只木撒思等祭葬世職兵丁達
冲阿等三十二名賞卹如例○庚子諭內閣
那彥成前在陝甘總督任內與已故藩司陳
祁商同挪移賑銀並捏奏捐廉等情前經大
學士等會訊俱已供認惟陳祁提入內署銀
二萬四千兩尚無著落現在降旨確查將那
彥成監禁聽候擬罪惟聞伊母到京患病沈
篤那彥成係大學士阿桂之孫十八年勦辦

平定回疆

十八

滑城賊匪亦有微勞伊係獨子經伊母守節
撫孤至於成立朕不忍令其母子兩地推心
特破格施恩給那彥成十日之假令其回家
省視伊母如十日期內伊母病已痊愈仍令
進監待罪僕伊母病有不測准其在家穿孝
數日再赴刑部監禁著刑部侍郎成格將此
旨宣諭那彥成即帶伊回家另派刑部滿漢
司員各一人在伊家住宿看守其住宅前後
著步軍統領衙門派兵十名加意巡邏不准

那彥成出門與外人相見亦不准外人前往
看視○又諭廉善貴慶兩人均由科甲出身
其資格才具亦屬相等本年廉善因母病奏
請來京省視朕允其所請其時適有禮部侍
郎缺出即將伊補授上年貴慶自稱染患疾
疾因聞母病增劇動履需人奏懇解任回旗
調理到京後旋即銷假授為刑部侍郎嗣察
出貴慶前病係屬假託希冀留京補用是以
將伊降補奉天府府尹此二人一係據實陳

平定回疆

十九

情一係捏詞欺飾真偽不同故黜陟亦異朕
辦理庶務一秉大公並非意存軒輊也將此
通諭內外臣工知之○壬寅調吏部尚書章
煦為禮部尚書禮部尚書戴均元為吏部尚
書○以服闋總兵官李東山為直隸天津鎮
總兵官○癸卯

上幸靜明園詣

龍神廟拈香○旌表守正捐軀四川江津縣
民羅才高妻陳氏○免直隸安寧晉新河三

州縣窪地上年額賦。○甲辰諭內閣。魏粹一犯與夥盜共二十二人。乘夜爬進漳浦縣城。行劫蔡本猷當舖。入室搜贓。罪應斬決。該犯爬越進城。較白晝混入城門。及行劫後越城逃出者。尤為藐法。魏粹著即處斬。仍梟首示衆。以儆兇頑。嗣後有爬越入城行劫。罪應斬決者。俱著照此例。加以梟示。其失察此案。夤夜越城之官員兵丁。並著查明分別叅處責革。○旌表守正捐軀四川江津縣民譚奇麟妻段氏。○乙巳。

實錄卷三十九

二十

上詣

大高殿行禮

時應官拈香。○還宮。○以孟秋時享

太廟。自是日始齋戒三日。○丙午。諭軍機大臣等。本年喀咭喇國遣使入貢。其貢船於本月初間。行抵天津海口。嗣貢使人等陸續登岸赴津。其原貢船五隻。併船內官役水手等五百八十餘人。並未報明。忽於二十日放洋東

去。可惡已極。經蘇楞額廣惠詢問該貢使等。據稱船隻先回粵東等候回國。未將緣故先行告知。是伊等不是等語。該國夷人居心狡詐。雖稱貢船駛往廣東。恐於經過江南浙江洋面時。又欲乘便在該二省海口收泊。俱不可不防。著百齡。胡克家。額特布。豫飭沿海口岸文武員弁。如該貢船駛至。欲行停泊。即諭以該國貢使已奉大皇帝諭旨。令由廣東回國。該貢船應速往廣東等候。此處不准停泊。傳諭後。即飭令開行。不准一人上岸。斷不可令其寄棹逗遛。並著將攸錡董教增祥紹不時差探。一俟該貢船抵粵。即派委妥員將其船隻羈留。先行具奏。飭令安靜守候貢使等到粵。仍乘原船歸國。切勿疏懈。又似在津時縱令私自開行。以致辦理諸多窒礙也。將此各傳諭知之。○調正白旗蒙古副都統棍楚克策楞。為察哈爾副都統。以御前侍衛哈朗阿。為正白旗蒙古副都統。○丁未。諭內閣直

實錄卷三十九

二十一

省沿海地方如廣州福州浙江之乍浦江南之京口俱設有水師駐防其綠營在各沿海省分者設有外海水師歲時操演按期會哨定制周詳天津為畿輔左掖大沽等海口直達外洋從前曾建設水師駐防後經裁撤該處拱衛神京東接陪都形勢緊要自應參考舊制復設水師營汛以重巡防其應如何分駐滿漢官兵增設統轄大員及一切建置事宜操防規制著大學士軍機大臣會同該部

實錄卷三十九

三二

詳細妥議具奏○是月新授伊犁將軍長齡奏謝得旨新疆重任以守成為本切勿存見長討好之念馭外藩以威為要以德繼之切不可姑息亦不可暴戾各城大臣時刻察訪如不勝任者隨時密奏兵丁時加訓練武備不可廢弛正已率屬寬猛相濟公正居心勤明莅事新疆從無請陞見之事汝守此訓謹記無忽前任松筠可為法守晉昌不過中才而已

大清仁宗受天興運敷化綏猷崇文經武孝恭勤儉端敏英哲睿皇帝實錄卷之三百十九

實錄卷三十九

三十三

大清仁宗受天興運敷化綏猷崇文經武孝恭勤儉端敏英哲睿皇帝實錄卷之三百二十

監修鳴藏官蝦延日講起居注官太子太傅武英殿大學士文淵閣領閣事稽察欽奉
上諭事件處管理工部事務翰林院掌院學士蘭著

知三級尋常加四級臣曹振鏞總裁官太子太保文淵閣大學士管理刑部事務加五級臣戴均元經筵日講起居注官太子少保內大臣文淵

閣提舉閣事積奏敘畢
上諭事件處編辦大學士部尚書翰林院掌院學士教習庶事士總管內務府大臣鑲黃旗滿洲都統步

軍統領管理戶部一庫兼管花翎國庫處總理糧處御茶膳房御樂房太醫院西洋事務軍功加級隨帶加副尋常加五級配錄于

漢書和經廷議官太子太保禮部尚書上書房行走武英殿總纂管理國子監事務加六級隨帶加三級紀錄四次汪廷珍等奉

軟修

嘉慶二十一年丙子秋七月戊申朔享

書錄卷三百二十

太廟

上親詣行禮○幸圓明園○緩徵山西平陸縣
水災雹災村莊未完額賦○己酉諭內閣御
史秦繩曾奏先因捕犯邀恩嗣經審虛請徹
銷以重名器一摺所奏是京外承緝衙門如
所獲實係真正要犯加恩獎擢原所以示鼓
勵若所獲並非正犯其督緝上司張皇入奏
經刑部審出虛誣豈可令其濫邀恩獎所有
直隸提督徐錕原奏拏獲僧人廣安之把總

鄭克儉馬兵劉海亮郭尚德以千總外委升補之處俱著撤銷嗣後京外各衙門拏獲要犯均於審訊明確後方准懇恩甄敘不得先行奏請鼓勵以杜冒濫○又諭御史卿祖培奏刑部步軍統領飭坊傳訊人犯請行知各城轉飭一摺刑部步軍統領衙門遇有應行傳訊人犯全在辦理密速庶業犯不至聞風遁逸若如該御史所奏先行知各城再轉飭坊官傳拏輾轉行文必致事多洩漏於捕務甚屬無益所奏不可行著無庸議○命兵部尚書吳璥馳往東河防守秋汛○庚戌諭內閣朕於二十二日降旨令那彥成回家省視伊母不准外人前往看視那彥成慶收於二十三日前往看門兵丁曾向攔阻伊自稱本家堅欲進門若謂看視那彥成之母其母係於二十日到京何以不於二十二日以前往看慶收捏詞掩飾顯係違旨且年力衰耄著即照部議革職○除湖南澧州積水垸田額

10/10/10

12

賊○辛亥以故喀爾喀賽因諾顏扎薩克親王拉旺多爾濟子巴彥濟爾噶勒襲爵○壬子

上幸萬壽山○賞已革直隸天津鎮總兵官祥啟三等侍衛為喀喇沙爾辦事大臣已革山東巡撫同興三等侍衛為古城領隊大臣○癸丑諭內閣前因喚咭喇國貢船在天津海口私自開行南去降旨將祥啟革職昨祥啟到京經軍機大臣訊問具奏其過尚有可原

特賞給三等侍衛前往新疆換班此次喚咭喇國貢使仍令由天津乘坐原船回國屢經諭知蘇楞額廣惠並未有旨傳諭祥啟本日召見祥啟據奏伊接准蘇楞額等來札祇令防範夷船進口並禁止夷人登岸滋事其貢使等仍乘原船回國之處蘇楞額等亦未行知是該貢船私自放洋非祥啟意料所及朕於臣工功過賞罰一秉至公祥啟之過尚不至於斥革是以加恩錄用並非曲為寬貸也

○又諭富俊等奏營盤溝西南山坡煤密仍請照舊開採一摺吉林產煤處所已准開採缸窰等五處其營盤溝一處試採無煤復於相連之西南山坡開採經部議駁降旨令其封閉茲該將軍等又復陳請開採吉林少此一處煤窰於旗民生計有何妨礙所奏不准行富俊向於公事好固執已見著傳旨申飭所開西南山坡煤窰仍著封閉不准奸徒私採該將軍等毋許再行瀆奏○以詹事府少

詹事汪守和為山東鄉試正考官刑部主事吳恩韶為副考官翰林院侍讀翟昂為河南鄉試正考官編修胡敬為副考官工部主事徐鏞為山西鄉試正考官宗人府主事汪鑑為副考官○乙卯勅諭喚咭喇國王曰爾國遠在重洋輸誠慕化前於乾隆五十八年

先朝

高宗純皇帝御極時曾遣使航海來庭維時爾國使臣恪恭成禮不愆於儀用能仰承

恩寵瞻覲筵宴

錫賚便蕃本年爾國王復遣使齎奉表章備進方物朕念爾國玉篤於恭順深為愉悅循考舊典爰飭百司俟爾使臣至日瞻覲宴賚悉做

先朝之禮舉行爾使臣始達天津朕飭派官吏在彼賜宴詎爾使臣於謝宴時即不遵禮節朕以遠國小臣未嫻儀度可從矜恕特命大臣於爾使臣將次抵京之時告以乾隆五十八年爾使臣行禮悉跪叩如儀此次豈容改異爾使臣面告我大臣以臨期遵行跪叩不致愆儀我大臣據以入奏朕乃降旨於七月初七日令爾使臣瞻覲初八日於正大光明殿賜宴頒賚再於同樂園賜食初九日陞辭並於是日賜遊萬壽山十一日在太和門頒賚再赴禮部筵宴十二日遣行其行禮日期儀節我大臣俱已告知爾使臣矣初七日瞻覲之期爾使臣已至宮門朕將御殿爾正使

忽稱急病不能動履朕以正使猝病事或有之因祇令副使入見乃副使二人亦同稱患病其為無禮莫此之甚朕不加深責即日遣令歸國爾使臣既未瞻覲則爾國王表文亦不便進呈仍由爾使臣齎回但念爾國王數萬里外奉表納賚爾使臣不能敬恭將事代達惻怛乃爾使臣之咎爾國王恭順之心朕實鑒之特將貢物內地地理圖畫像山水人像收納嘉爾誠心即同全收並賜爾國王白玉如意一柄翡翠玉朝珠一盤大荷包二對小荷包八箇以示懷柔至爾國距中華過遠遣使遠涉良非易事且來使於中國禮儀不能諳習重勞唇舌非所樂聞天朝不寶遠物凡爾國奇巧之器亦不視為珍異爾國王其輯和爾人民慎固爾疆土無間遠邇朕實嘉之嗣後毋庸遣使遠來徒煩跋涉但能傾心效順不必歲時來朝始稱向化也俾爾永遠故茲勅諭○諭內閣此次英咭喇國進貢使臣

至天津海口登岸特命蘇楞額廣惠傳旨賜宴令其謝宴行三跪九叩禮如合式即日帶領進京如不諳禮儀具奏候旨其原船勿令駕駛仍由原路回津泛海還國蘇楞額廣惠故違旨意徑行帶來又縱令原船私去伊二人之咎在此因事已不妥又命和世泰穆克登額迎赴通州演禮以七月初六日為限限內行禮即日帶來滿限尚未如儀即行參奏候旨和世泰穆克登額於初五日含混具奏初六日徑自帶來朕於未初二刻御勤政殿召見伊二人先詢以演禮之事伊二人免冠挫頭云並未演禮及至再問以既未演禮何不參奏和世泰云明日進見必能如儀此一節伊二人之咎已同前二人矣至初七日早膳後卯正二刻朕傳旨升殿召見來使和世泰初次奏稱不能快走俟至門時再請二次奏稱正使病泄少緩片刻三次奏稱正使病倒不能進見即諭以正使回寓賞醫調治令

副使進見四次奏稱副使俱病俟正使痊愈後一同進見中國為天下共主豈有如此侮慢倨傲甘心忍受之理是以降旨逐其使臣回國不治重罪仍命廣惠護送至廣東下船近日召見廷臣始知來使由通州直至朝房行走一夜來使云進見朝服在後尚未趕到使服焉能瞻謁大皇帝此等情節和世泰見面時何不陳奏即或遺忘或晚間補奏或次日一早具奏俱可直至將次升殿總未奏明情節伊二人之罪重於蘇楞額矣若豫先奏明必改期召見成禮而返不料庸臣誤事至此朕實無顏下對臣工惟躬自引咎耳四人之罪俟部議上時再行處分先將此旨通諭中外及蒙古王公等知之尋議上得旨蘇楞額革去工部尚書鑲紅旗漢軍都統加恩以三品頂帶降補工部左侍郎仍留總管內務府大臣廣惠降內務府八品筆帖式和世泰革去理藩院尚書鑲白旗漢軍都統仍留公

爵總管內務府大臣穆克登額革去禮部尚書鑲黃旗漢軍都統降補鑲藍旗漢軍副都統○命大學士松筠管理吏部理藩院事兼鑲藍旗滿洲都統○以熱河都統和寧為工部尚書兼正黃旗漢軍都統調正黃旗漢軍都統慶祥為熱河都統鑲藍旗滿洲都統崇祿為鑲紅旗漢軍都統○丙辰以吏部左侍郎戴聯奎為都察院左都御史轉吏部右侍郎王鼎為左侍郎以內閣學士茹菜為吏部右侍郎○以詹事府詹事珠爾松阿為通政使司通政使○丁巳

孝懿仁皇后忌辰遣官祭

景陵○以署湖廣總督都察院左都御史馬慧裕為禮部尚書都察院左都御史慶溥為理藩院尚書工部左侍郎景祿為左都御史○以貝子奕紹掌鑾儀衛事○調正紅旗蒙古都統肅親王永錫為鑲白旗漢軍都統以右翼前鋒統領嗎呢巴達喇為正紅旗蒙古都

統調正藍旗蒙古都統晉隆為鑲黃旗漢軍都統以睿親王端恩為正藍旗蒙古都統調鑲藍旗漢軍副都統誠安為鑲藍旗滿洲副都統○以湖北巡撫張映漢署湖廣總督○

戊午

上幸靜明園詣龍神廟拈香○以正黃旗漢軍副都統裕全為右翼前鋒統領○己未諭內閣此次英咭喇國遣使入貢其在天津謝宴不能如儀匆遽帶領登舟北來乃蘇楞額廣惠之咎及至通州未曾演禮含混具奏徑帶來京乃和世泰穆克登額之咎迨初七日朕傳旨升殿召見來使該貢使等由通州起程行走竟夜未至館舍先抵宮門因朝服未到不敢瞻覲彼時和世泰若據實奏聞朕必降旨改期俾達其萬里來庭之意乃以失體之詞連次入奏以致遣還來使不能成禮和世泰辦理舛誤固咎無可辭但是日廷儀已備除軍機大臣

托津因病給假董誥盧蔭溥並無殿上執事
外其御前行走之王公大臣等及內務府大
臣均身在殿廷目覩其事頗有心知當以實
奏聞懇請改期者乃坐視和世泰惶遽失措
無一人肯為指引而事後召見竟有旁觀者
清之語既知和世泰茫無主見何不代奏即
或不代奏何不提醒和世泰令其實告平
時和顏悅色臨事坐視債事仕途險巇一至
於此可勝浩歎在和世泰獲咎其事甚小諸
臣獨不為國事計乎嗣後當屏除私見共矢
公忠以謀國是勿謂事不干己心存膜視以
仰副朕諄諄誥誡之至意○庚申

上御勤政殿聽政○諭內閣前據御史卿祖培
奏溫啟鵬常起等縱僕毆官藉勢橫行先
後降旨將溫啟鵬常起解任交刑部質訊茲
經刑部訊明溫啟鵬等十四員因常起升官
在聚興堂設筵作賀散席後各乘車歸寓適
侍衛于貫甲使服乘坐驢車對面相遇彼此

爭道常起家人龐太用馬鞭向趕驢車人毆
打並將于貫甲額顙毆傷于貫甲口稱伊係
侍衛司務徐甲椿車夫劉三見于貫甲未戴
頂帽諒係假冒隨喊令只管毆打並與司務
李文光車夫田姓上前幫揪溫啟鵬常起實
無喝令情事于貫甲身係侍衛應戴翎頂出
門定例宗室覺羅如不身繫黃紅帶被人毆
打者照毆打平人例辦理宗室覺羅尚以平
人論何況滿漢職官不戴頂帽即係平人于

貫甲未戴翎頂即口稱侍衛旁人焉能憑信
刑部將龐太等照毆六品官律加等問擬若
所毆之官身戴頂帽又將何所區別龐太劉
三著俱照尋常爭鬪毆人成傷本律咎責發
落無庸加等杖枷常起徐甲椿李文光失察
家人車夫毆傷于貫甲著交吏部都察院照
例議處溫啟鵬等十二員是日雖同筵席與
鬪毆一事均無干涉著無庸議處于貫甲以
現任侍衛不戴翎頂在街市行走本應斥革

姑念被毆成傷免其置議○以內閣侍讀學士瑚松額為太僕寺卿○旌恤遇賊捐軀直隸長垣縣武生崔清彪○民人邳天才等十四名如例○辛酉諭軍機大臣等賽沖阿等奏據廓爾喀國王來稟已與披楞講和趕辦貢物稟求示期進獻情詞極為恭順等語廓爾喀與披楞和議已成彼此息爭邊境寧謐賽沖阿奏請俟披楞稟覆到日即行回川計此時披楞覆稟應已到藏該將軍查看無事即回成都本任至廓爾喀備辦表貢請示期進獻該國係久經臣服之國豈有因此一事令添備一貢之理即諭以該國與披楞連年構兵今和議甫成得以安輯大皇帝體恤藩服俾令休養安息此時毋庸趕辦貢物仍遵照一定貢期於嘉慶二十二年差噶箕頭日於年內到京照例朝覲以示懷柔該將軍等接奉此旨即檄諭該國王祇遵可也至披楞已與廓爾喀講和將來稟覆諒無異說如稟詞

極為恭順著由四百里具奏如尚有應行查辦之處由五百里具奏無庸再發六百里急遞致駭聽聞也將此諭令知之○壬戌中元節
上詣
安佑宮行禮○遣官祭
永陵
福陵
昭陵
昭西陵
孝陵
孝陵
景陵
泰陵
泰東陵
裕陵○遣官祭
孝淑皇后陵寢○遣官祭
端慧皇太子園寢○以山東按察使程國仁

為甘肅布政使直隸天津兵備道張五緯為山東按察使○癸亥諭內閣御史羅家彥奏補放首府遺缺知府請飭各督撫遵旨辦理以杜鑽營一摺各省首府缺出令各該督撫揀員調補其所遺之缺應即以簡放之員奏明補授原不准一調再調致啟為人擇缺之漸至新授道府由京員簡放者雖在部院歷練有年於外省吏治或未諳習該督撫派令審辦案件以試其才具之短長係為察看人才慎重地方起見此事何關獎實該御史所奏飭令即赴新任之處著無庸議且日前該御史條奏嘆咭喇國入貢一事亦屬取巧朕因該貢使雖有失禮之愆其國王萬里輸忱奉表納賚實為恭順酌收其圖畫數件並頒賞該國王珍玉數事早經降旨辦理該御史於數日後聞知信息摺內將賞收圖畫等詞摭拾具奏作為己意明係沽名自為見長地步近日各御史條奏率多私見並非出於公

論甚屬可鄙言官言事首在慎密切勿為人驅使此等情弊均在朕鑒察之中慎勿巧為嘗試也○甲子

上詣

安佑宮行禮○乙丑

上以秋獮木蘭自圓明園啟鑾命

皇次子智親王 皇三子綿愷皇四子綿忻

於八月初旬赴熱河隨駕進哨○命莊親王

綿課大學士曹振鏞協辦大學士尚書章煦

尚書英和留京辦事○免蹕路經過地方本

年額賦十分之三○免河南寧陵縣水災歷

年額賦漕糧並展緩寧陵睢二州縣舊欠丁

耗加價銀○是日駐蹕南石槽行宮○丙寅

賞密雲縣接駕兵丁半月錢糧○是日駐蹕

密雲行宮○丁卯駐蹕要亭行宮○戊辰賞

熱河接駕兵丁及看守避暑山莊弁兵一月

錢糧看守口內口外各行宮弁兵半月錢糧

○是日駐蹕兩間房行宮○己巳以故雲南

永寧土知府阿良輔子會元襲職○緩徵安徽宿靈壁懷遠鳳陽鳳臺五州縣江蘇銅山宿遷邳睢寧豐沛蕭陽山八州縣水災本年額賦並給宿靈壁懷遠沛泗州縣災民一口糧○是日駐蹕常山峪行宮○庚午駐蹕喀喇河屯行宮○辛未

上至熱河詣

文廟瞻禮

闕帝廟

城隍廟拈香○詣

永佑寺行禮○以詹事府少詹事汪守和為內閣學士兼禮部侍郎銜○旌表守正被戕山東臨清州民萬起志妻吳氏○賞熱河綠營兵丁一月錢糧○是日駐蹕避暑山莊至八月辛卯皆如之○壬申諭內閣章煦等奏查覆給事中石承藻參奏吏部郎中溫啟鵬一摺前據御史卿祖培參奏溫啟鵬縱容家人毆辱職官當即降旨將溫啟鵬解任交刑部

審訊據刑部提集全案人證審明具奏溫啟鵬實屬無干眾供確鑿並非刑部稍有偏袒乃定案之後石承藻隨即撫拾溫啟鵬他事列之彈章甚至將伊寓所築一假山亭子俱指為款蹟其所參吏部從前違例將員外郎謝凝道題升郎中豫為溫啟鵬補缺地步及本年京察記名違例呈請親老仍留京職二款特派章煦等秉公確查現據查明覆奏均無與例不合之處是石承藻因卿祖培劾參溫啟鵬未伸其說復為此奏以羅織其罪似此迭相攻擊豈不漸類明季門戶黨援之習此風斷不可長該御史等因朕不加罪言官故敢嘵嘵瀆奏經此次訓飭之後若有仍前嘗試者定行治罪不貸○癸酉以詹事府少詹事和桂為詹事○甲戌旌表守正被戕河南光州民郭明妻雷氏○乙亥上御如意洲賜扈從王公大臣蒙古王貝勒貝子公額駙台吉等食並賞賚有差○諭軍機

大臣等吳璥奏查勘漕河工程即馳赴微山湖一帶籌辦一摺本年微山湖水長至一丈八尺四寸為近年所未有該處係瀦蓄之水可無衝決之患然亦不可使之漫溢出岸致沿湖地畝或被淹浸吳璥等當督率工員相度情形鑲護隄堰一律穩固節近秋分湖水自亦日漸消退也又李逢亨所奏拆修彭口閘座一摺彭口閘年久損壞准其拆修其於閘背上面普律加高三層並將南北兩岸雁翅量為接長之處亦俱照所請辦理吳璥於籌辦微山湖事竣即往豫省將南北兩岸隄工偏加查看現在南河工程平穩不必前往江南吳璥履勘豫省各工均各平寧即回京供職可也將此各諭令知之○賞熱河及額魯特兵丁一月錢糧○是月江蘇布政使陳桂生奏喚咭喇國使臣過境防範謹嚴不許逗遛停泊得旨懷遠以德不必憚以兵威沿途曉行夜宿豈可不容停泊所奏過猶不及

實錄卷三十一

七

矣。

實錄卷三十一

七

大清仁宗受天興運敷化綏猷崇文經武孝恭勤儉端敏英哲睿皇帝實錄卷之三百二十

大清仁宗受天興運數化綏猷崇文經武孝恭勤儉端敏英哲睿皇帝實錄卷之三百二十一

蘇修德前官岷日講起居注太子太傅武英殿大學士文淵閣領閣事務察欽奉
上諭事件處管理工部事務翰林院掌院學士隨帶

加級尋常右級臣曹振鏞。職官太子太保文淵閣大學士。吏部事務加五級臣戴均元。經筵日講起居注官太子少保內大臣文淵

閣從軍閣事務察欽奉
上諭事件處編辦大學士戶部尚書翰林院掌院學士教習庶吉士總管內務府大臣鑲黃旗滿洲都統步

軍統領管理戶部庫奉宸苑清漪園等處總理程慶御膳房御樂房太醫院西洋堂事務軍功立級隨帶四級尋常加立祀錄主

漢臣英和題送攝官太子太保禮部尚書上書房行走武英殿總裁管理國子監事務架閣隨帶二級紀錄四次汪廷珍等奉

較修

嘉慶二十一年丙子八月丁丑朔祭

先師孔子遣大學士曹振鏞行禮○戊寅祭

大社

大稷遣儀親王永璇恭代行禮○己卯秋分夕

月於西郊遣順承郡王倫柱行禮○諭內閣先

福奏審擬殘傷父屍圖賴人之民人潘春芳

一案因例無專條比照誣告他人謀害致父

母屍身經官蒸檢者斬監候例擬斬監候請

旨即行正法殘傷父母屍身圖陷害人比之

誣告人致父母屍身經官蒸檢者情罪較重

嗣後著刑部定為專條凡將父母屍身裝點

傷痕圖賴他人無論金刃手足他物成傷者

俱斬立決此案潘春芳一犯即照此例即行

正法○又諭衡齡奏審明誤傷父命按律定

擬請旨辦理一摺此案張發財隨同伊父張

治縱令弟媳王氏賣姦本係無恥之徒因王

喜等糾擄王氏謗犯持刀拊拒以致謗扎伊

父斃命輒之從前白鴈拾取土垠摸匾伊

姓彭豐伊母白王氏者。性罪不同。引強則一。

犯著即按律凌遲處死○庚辰遣官祭黑龍

潭

昭靈沛澤龍王之神玉泉山

惠濟慈佑靈瀨龍王之神昆明湖

安佑普濟沛澤廣生龍王之神密雲縣白龍

潭

昭靈廣濟龍王之神○諭內閣從前熱河所

屬地方凡關係蒙古案件屢次遲延甚至經

年不能割斷經朕召見厯任都統道府據稱

蒙古案件咨行該盟長等拘傳人證該盟長等藉端推諉以致經年遲延等語此次朕至常山峪降旨令理藩院行文土默特旗咨查該處辦事人員係何王公家護衛嗣復令軍機大臣面傳諭旨飭催該盟長等迄今尚未傳到是其廢弛推諉已屬顯然除再嚴催令其迅速傳到暫免置議外嗣後特旨交辦及咨取案件俱著迅速辦理不得任意遲延儻再遲延定行治罪並著理藩院按其程途遠近定限遵照內地遲延逾限之例將該盟長扎薩克等處分酌議具奏○以廣東陽江鎮總兵官孫全謀為水師提督調山東登州鎮總兵官馬建紀為陽江鎮總兵官以前任山東鹽運使二品頂帶劉清為登州鎮總兵官○辛巳遣官祭

為防禦毋庸賞給緞匹其未中箭之官員等均不必賞給緞匹未中箭之兵丁各賞給半月錢糧其中箭官兵著照例賞給盛京將軍晉昌平日不加訓練著交宗人府議處以示儆戒副都統和福甫經到任著從寬免其議處○壬午遣官祭關帝廟○諭內閣前據御史秦繩曾奏托津擅管覆校實錄當經降旨令留京辦事王大臣傳到該御史及承辦覆校之員查明原委覆奏本日據留京王大臣等奏稱詢據該御史以十九年議敘摺內係董誥托津聯銜而摺內未將奉旨派托津接管之處聲敘是以參奏詢之承辦覆校之禮部員外郎軍機章京王鳳翰則稱十八年慶桂休致後內閣所進紅綾本有指出錯誤之處均係董誥托津傳旨覆奏是以十九年覆校完竣摺係董誥托津聯銜畫稿等語朕恭閱

皇考高宗純皇帝實錄內有錯誤之處。即令軍機大學士敬謹更正。如漢字則令董誥托津承辦。清字本則令托津承辦。此係隨時降旨交辦之事。向不降旨特派托津既承辦其事。則與曹振鏞不同。於覆校完竣奏請議敘時。一同列銜。並無不合。乃該御史輒以此叅奏。加以專擅重詞。該御史曾充軍機章京。久知此事。如心以為非。則於擢用御史後。即應叅奏。乃該御史奏事二次均未及此。茲於八月初二日。簡放順天鄉試考官之期。忽為此奏。自因伊本年曾考試差。有此彈章。冀朕見其公正。用為同考官。伊本年考差。本未錄取。即先經錄取。朕亦斷不將伊黜用。似此借事妄言。實屬取巧。本應斥革。姑念係屬言官。若示罰過重。恐科道等又相率緘默。秦繩曾著革去御史。以吏禮兵工四部主事補用。終其身不准升轉。以示薄懲。○以前任陝西西安鎮總兵官閻俊烈。為湖北提督。○以內閣學士

常英光祿寺卿甘家斌監臨順天鄉試大學士董誥為正考官。戶部右侍郎黃鉞都察院左副都御史陸以蔭為副考官。○癸未遣官祭昭忠祠。○甲申。旌表守正被戕湖北孝感縣民吳勝全妻金氏。○乙酉。太宗文皇帝忌辰。遣官祭昭陵。○諭內閣。阮元奏前任江西糧道張溶以控案解任。審明後奉旨仍赴江西候補該省道員。僅止四缺。現有候補者四人。請將張溶改歸吏部照開復人員。一律辦理等語。張溶係奉旨開復。仍赴江西補用之員。自應俟該省出有道員缺後。儘先補用。阮元現已調任河南。乃於將次交卸之時。率為此奏。為候補各員亟於得缺地步。殊屬冒昧。阮元著傳旨申飭。仍交部察議。張溶仍遵前旨。留於江西儘先補用。○丁亥。太祖高皇帝忌辰。遣官祭福陵。○命鴻臚寺卿申啟賢為奉天府府丞兼

提督學政內閣學士湯金釗。提督江蘇學政宗人府府丞賈允升。提督安徽學政翰林院侍講學士李宗昉。提督浙江學政兵部左侍郎顧德慶。提督江西學政通政使司叅議辛從益。提督山東學政翰林院編修賀長齡。提督山西學政右春坊右庶子史致儼。提督河南學政戶部員外郎蘇兆登。提督陝甘學政光祿寺少卿吳椿。提督福建學政司經局洗馬沈維鑄。提督湖北學政翰林院編修謝階樹。提督湖南學政刑科給事中傅棠。提督廣東學政工部員外郎俞恒澤。提督四川學政戶部主事牛坤。提督雲南學政○旌表守正捐軀安徽天長縣民花自富妻王氏○戊子諭內閣給事中張源長奏漕務切弊一摺。漕糧歲輸天庾。為國家惟正之供。例係徵收本色。有漕州縣勒收折色。向干嚴禁。現值年豐穀賤。若令小民以賤價糶穀。交納折色。是閭閻終歲勤劬。所得升斗大半糶以輸官。以有

限之蓋藏。供無窮之腹削。其為病民實相倍蓰。著通諭有漕省分各督撫。轉飭所屬徵收漕糧。概以本色交納。毋許勒折滋弊。如有專利虐民者。即據實嚴叅。勿稍徇縱。○旌表守正捐軀直隸定州民韓二妻吳氏。河南鹿邑縣民李林女李氏○己丑上詣永佑寺行禮○辛卯上御卷阿勝境。賜扈從王公大臣及蒙古王貝勒貝子。公額駙。台吉等食。○旌表守正捐軀安徽阜陽縣民趙應春妻秦氏○壬辰上自避暑山莊啟鑾。幸木蘭。○是日駐蹕中關行宮。○癸巳駐蹕波羅河屯行宮。○甲午賞看守黃土坎等五處行宮弁兵半月錢糧。○是日駐蹕張三營行宮。○乙未上詣興安大嶺神祠拈香。○行圍。○是日駐蹕阿圭圖御營。○丙申

上行團○遣官祭賢良祠○遣肅親王永錫前往清河迎奠故御前大臣喀爾喀賽因諾顏扎薩克親王固倫額駙拉旺多爾濟茶酒○是日駐蹕海拉蘇台御營○丁酉

上行團○順天府以宗室鄉試中額請得旨取中八名○旌表守正捐軀河南祥符縣民牛根妮母譚氏○是日駐蹕呼魯蘇台御營○戊戌

上行團○是日駐蹕那爾蘇台梁西山根御營

○己亥

世宗憲皇帝忌辰遣官祭

泰陵○以直隸泰寧鎮總兵官成寧為禮部尚書鑲藍旗漢軍副都統穆克登額為泰寧鎮總兵官兼總管內務府大臣三等侍衛英綬為鑲藍旗漢軍副都統○贈故禮部尚書馬慧裕太子少保予祭葬諡清恪○旌表守正捐軀河南泌陽縣民陳牛妻韓氏安徽壽州民魯志順妻黃氏○是日駐蹕都木達烏拉

岱御營翼日如之○庚子

上行團蒙古盟長王公等於行帳西門外設大禮廬侍

上膳畢

上閱詐馬等技賞賚有差○辛丑

上行團○以浙江定海鎮總兵官李光顯為廣東水師提督○是日駐蹕巴彥布爾哈蘇台

御營○壬寅

上行團○以福建臺灣水師副將陳光求為浙江定海鎮總兵官○是日駐蹕達彥梁北口

御營翼日如之○癸卯

上行團○甲辰

上行團○諭內閣木蘭圍場自

聖祖仁皇帝肇開其地歲時獮狩講武詰戎內外扎薩克蒙古藩部王公等素韉隨行以將

其尊君親上之忱

恩施優渥

賚予駢蕃典至重也我

皇考高宗純皇帝六十年率循弗替

聖製避暑山莊後序以木蘭行圍繫於綏藩肆

武者至鉅

垂訓後嗣俾世世遵行朕恪循

成憲每歲舉行既躬習勤勞並以撫綏藩服訓

練軍伍此與

祖訓勿改衣冠騎射同為我國家根本之計

列聖詒謀所當萬年遵守者乃上年自熱河啟

蹕之日綿課有雨水衝漫橋梁之奏意圖停

實錄卷三十三

十三

止進哨特降旨將綿課革去御前大臣示以

罰懲本年由京啟鑾以後兼旬晴霽乃又有

以閏月節候較早哨內寒冷為詞者除御前

大臣軍機大臣均無此言外卿貳京堂及直

隸道府內頗有其人此不獨欲以淆惑朕聽

且以阻撓衆志是誠何心直同背畔矣此次

進哨以來風日暄和毫無雨雪現已行圍過

半氣候並未凝寒本日特召見皇子御前大

臣軍機大臣宣諭此旨總之歲舉秋獮係我

朝

家法必當永遠遵循嗣後每遇進哨大小臣工

概不准以雨水寒冷為詞妄生浮議屆期如

實有應行停減之處朕自行降旨儻有敢於

嘗試仍復造作浮言希圖阻止者則行圍之

事與行軍等必將其人按軍法治罪立正典

刑不稍寬貸將此通諭知之○又諭據徐錕

奏方受疇姚祖同因本年逢閏節候較早恐

哨內天氣寒冷公捐棉衣二千件為分賞辦

實錄卷三十三

十三

差兵丁之用此舉大屬非是朕巡幸木蘭歲

以為常五年再閏從前逢閏之年歷次舉行

秋獮從無加賞兵丁棉衣之事方受疇等創

為此舉後將援以為例若不能為繼兵丁等

將以此生怨且緣營兵丁由伊等捐賞所有

隨扈八旗兵丁又將誰為捐給乎方受疇姚

祖同市惠邀名而不計沮惑衆心有乖政體

俱著嚴行申飭仍交部議處○又諭散秩大

臣松齡年僅六十召見時伊即奏稱上圍不

能乘馬。且人亦平庸。松齡著以原品休致。其世襲散秩大臣員缺。著伊子瑞盛承襲。是日。駐蹕伊綿溝御營。○乙己。

上行圍。○諭內閣。本日朕閱河南秋審情實人犯冊內。有盧得才一起。該犯在李全鋪內學習染匠。因遺失帳本。被李全擄逐。該犯往向李全之母李朱氏訴說。適李朱氏之女韓李氏。攜帶四歲幼子韓令子歸寧。該犯向李朱氏訴說。李朱氏反斥其非。維時韓李氏適赴

實錄卷三二一

十一

鄰舍閒談。韓令子在旁。該犯拾取菜刀砍傷李朱氏倒地。正欲逃逸。韓令子拉住衣服喊叫殺人。該犯即將韓令子推跌連砍斃命。韓令子年甫四歲。見李朱氏被砍倒地。即能拉衣喊叫。護其所親。其情甚為可憫。該犯輒將幼孩立時砍斃。實屬兇惡異常。本日刑部具題江蘇省程忝。謀財搭死幼孩。陶招觀一案。依謀殺十歲以下幼孩例擬斬立決。此案盧得才因韓令子救護李朱氏立斃四歲幼孩。

其情節不輕於程忝一案。盧得才著改為斬立決。嗣後如有十歲以下幼孩。因救護父母被兇犯立時斃命者。俱照此例辦理。○又諭本日總理虎槍營大臣綿恩等奏。哈達圖扎布圍。又用烏鎗殺虎等語。本年九圍殺虎四隻。均係烏鎗擊獲。虎槍人等所司何事。即如前次用烏鎗殺虎。乃蒙古托霍齊在山梁站立。適遇虎至。近迫幾致被傷。是時虎槍人等皆係步行不及追至。托霍齊始用烏鎗殺虎。

實錄卷三二一

十四

朕所親見。因賞給托霍齊藍翎並荷包一對。銀四兩。並非殺虎應用烏鎗。若皆用烏鎗。則又何需數百虎槍人等上圍。且虎槍營人等技藝必漸至生疏。於行圍舊制亦必廢弛。嗣後每逢過虎。務照舊例以虎槍迎扎。如係迫於勢急。不及施用虎槍。再用烏鎗。僅應用虎槍時。竟用烏鎗。總理虎槍營大臣行圍領轟大臣。不據實奏。必當一併治罪。決不寬貸。再嗣後虎槍人等獲虎。仍照舊例頭槍賞給。

荷包一對銀四兩協同遞槍者賞給荷包一對銀二兩如有不得已而用烏鎗者著將賞銀減半此乃國朝舊制若不整飭恐漸染漢人習氣著交總理虎槍營大臣等通諭永遠遵行如違即行參奏斷不可姑息○是日駐蹕薩勒巴爾口御營○丙午

上行圍○緩徵河南汲濬安陽湯陰內黃永城六縣水災新舊額賦並賑汲新鄉淇輝獲嘉濬六縣災民給房屋修費○是日駐蹕案巴究溝口御營

實錄卷三十三

十五

大清仁宗受天興運敷化綏猷崇文經武孝恭勤儉端敏英哲睿皇帝實錄卷之三百二十一

實錄卷三十三

十六

大清仁宗受天興運敷化綏猷崇文經武孝恭勤儉端敏英哲睿皇帝實錄卷之三百二十二

監修 德義齋 曜遠日撰起居官太子太傅武英殿大學士澗閣領閣事務察欽奉 上諭事件處管理工部事務翰林院掌院學士隨帶

加三級尋常加四級臣曾振鐸總辦官太子太保文淵閣大學士管理刑部事務加五級臣戴均元經筵日講起居注官太子少保內大臣文琳

閣提舉閣事稽察欽奉
上諭事件處編辦大學士戶部尚書翰林院掌院學士教習原官一總管內務府大臣鑲黃旗滿洲都統步

軍機總管理戶部三庫兼宏範清園等處總理工程奏御膳房御藥房太醫院西華堂事務軍功三級隨帶加一級尋常加十三級紀錄二十

一次臣兵和親道議官太子太保禮部尚書上書房行走武英殿總裁管理園子監事務加六級隨帶加級紀錄四漢軍汪廷珍等奉

教修

嘉慶二十一年丙子九月丁未朔

寶鑑卷之三

[illegible]

上行園○諭內閣本日莫爾根經齊呢園牲畜並不短少朕見牲畜俱從蒙古園副蘇尼蘇之閒逸出甚多此皆管園大臣等並不嚴肅管護扎魯特扎薩克多羅貝勒甘珠爾扎布科爾沁多羅貝勒色楞多爾濟應得賞項均著毋庸賞給仍各罰職任俸半年散秩大臣公吉祥保奕禮各罰職任俸一年所有圈圍之蒙古兵丁等交該管王公等嚴懲示戒○賞還大學士松筠太子太保○是日駐蹕烏

蘭哈達南御營。○戊申。

上行園○遣官祭

歷代帝王廟。○緩徵甘肅皋蘭狄道渭源。西

寧○四○州○縣○水○災○電○災○新○舊○額○賦○草○束○。○是○日○。

駐蹕阿圭圖御營○己酉

上詣

興安大嶺神祠拈香。○賜蒙古王貝勒貝子。

公額駙。台吉等食。○是日。駐蹕張三營行宮。

○庚戌諭內閣朕每行營自御前大臣至御

晉書卷一百一十二

五

前乾清門侍衛等均各佩撒袋隨扈御前大臣綿恩因其年老特加恩不令佩帶即御前大臣等有豫備手帕差使亦無不佩撒袋之例嗣後御前大臣等不得藉豫備手帕不佩撒袋奕紹雖有管理鑾儀衛差使究係乾清門行走伊因途間豫備轎車竟不佩撒袋且如朕在途間更換轎馬不惟御前乾清門大臣侍衛等均各佩撒袋下馬豫備差使即從前御前乾清門大臣內亦有兼管鑾儀衛之

員並無推故不佩撒袋者。今奕紹祇圖便於豫備差使。竟不佩撒袋。甚屬懶惰。且本年哨內管理圍場事務。亦屬平常。奕紹著退出乾清門。仍罰職任俸半年。嗣後除有豫備鑾儀衛差使。毋庸佩帶撒袋外。其帶領豹尾槍差使。亦照舊例佩帶撒袋。○旌表守正捐軀湖北天門縣民李耀。悰妻楊氏。○是日駐蹕波羅河屯行宮。○辛亥。

上御行殿。勾到新疆雲南貴州廣西廣東情實

重錄本旨三

五

罪犯停決新疆斬犯四人。絞犯三人。雲南絞犯五人。貴州斬犯一人。絞犯九人。廣西斬犯四人。絞犯八人。廣東斬犯三人。絞犯十一人。餘一百四十七人。予勾。○遣官祭

都城隍之神。○以工部尚書和寧為滿洲繙譯鄉試正考官。內閣侍讀學士良輔為副考官。刑部左侍郎熙昌為蒙古考官。○是日駐蹕中關行宮。○壬子。

上詣

永佑寺行禮。○諭內閣。那彥成從前屢獲咎愆。經朕棄瑕錄用。復畀任陝甘總督。自當竭盡惓忱。力圖報効。即地方遇有格礙難辦之事。亦應具實陳奏。請旨遵行。乃聽信陳祁之言。挪移賑銀十九萬餘兩。以為津貼採買腳價等項之用。實屬膽大妄為。經刑部問擬斬監候。將應賠銀三萬九千八百兩勒限一年全完。請旨應否免罪。茲已於一月內繳完。惟那彥成係屬大員。雖有滑縣勦賊微勞。不能即予免罪。仍當發往伊犁。姑念伊母年老病篤。那彥成著加恩暫免發遣。即行釋寧。令其在家終養。伊子容照。容恩。前以那彥成獲咎黜革。茲那彥成既經釋放。伊子並無他咎。著各降一等。容照賞給三等侍衛。在大門上行走。容恩以上虞備用處拜唐阿用。○緩徵河南偃師。鞏二縣水災額賦。○是日駐蹕避暑山莊。至甲寅。皆如之。○癸丑。河東河道總督李逢亨奏報秋汛安瀾。得旨嘉獎。下部議敘。出

重錄本旨三

四

力員弁升敘有差。○甲寅

上御依清曠。勾到四川情實罪犯停決。官犯一人。斬犯三十二人。絞犯二十九人。餘一百二十七人。予勾。○乙卯

上自避暑山莊迴鑾。○詣

城隍廟拈香。○是日駐蹕喀喇河屯行宮。○

丙辰駐蹕常山峪行宮。○丁巳

上御行殿。勾到福建奉天陝甘情實罪犯停決。福建斬犯三人。絞犯五人。奉天斬犯四人。絞

實錄卷三三二

五

犯九人。陝甘斬犯十人。絞犯九人。餘一百九

人。予勾。○是日駐蹕巴克什營行宮。○戊午

上至古北口。御黃幄閱提標弁兵陣操技勇。賞

賚有差。○御行殿。勾到湖廣浙江江西情實

罪犯停決。湖廣斬犯三人。絞犯十四人。浙江

斬犯二人。絞犯三人。江西斬犯二人。絞犯四

人。餘一百五人。予勾。○諭內閣。本日勾到浙

江省情實人犯內張師端一起。該犯係大員

子弟。倚勢串詐。平民牽控。案外無辜之人。作

證。致令畏累。自盡。實屬法無可寬。除將該犯

予勾外。該省辦理秋審。率將該犯擬入緩決。

經刑部改擬情實。殊為寬縱。護巡撫額特布

及擬詳之臬司。俱著交部議處。○是日駐蹕

要亭行宮。○己未。諭內閣。阿蘭保係乾清門

侍衛。差竣赴行在覆命來遲。交御前大臣等

查詢。據稱途次傷足。又復感受風寒。於初五

日護送拉旺多爾濟靈柩到府。並未回家。即

日起程住宿清河。因不能支持。於初七日始

實錄卷三三二

下

起程前來等語。經御前大臣等奏請將阿

蘭保革去護軍統領副都統。朕念阿蘭保未

敢私自回家。祇因患病。未能先行奏聞。尚以

御前大臣等所奏較重。特降恩旨。免其革職。

罰俸一年。本日據英和奏查出阿蘭保於初

四日在乾清門侍衛下處住宿。初五日又住

宿一夜。初六日方至清河等語。復交御前大

臣等。詢據阿蘭保稱。在侍衛下處住宿。其妻

子往視住宿等語。阿蘭保來遲。且復捏稟。甚

屬膽大妄為。阿蘭保著革去護軍統領副都統。交御前大臣等看視責處四十板。即日發往伊犁効力贖罪。以示懲戒。○又諭。喚咭喇貢使回國。沿途經過省分。各派藩臬一員護送。直隸派出臬司盛泰。昨盛泰前來行在。於召見時。偶詢及該夷使沿途行走情形。據奏稱。曾與該夷官論及該國表文。又問伊國兵船數目等語。喚咭喇貢使遣回時。其表文朕並未閱看。盛泰係護送之員。並未降旨令其

書錄事

七

詰問該貢使。乃無端論及表文。並該國兵船數目。實屬膽大妄為。甚屬狂縱。盛泰著即革職。發往盛京。交晉昌以苦差委用。以為越分多事者戒。○工部右侍郎陳希曾。以病乞解任。允之。以都察院左副都御史陸以蔭為工部右侍郎。○以內閣學士博啓圖兼鑲紅旗護軍統領。理藩院左侍郎蘇冲阿兼鑲黃旗漢軍副都統。○以直隸熱河道瑞弼為按察使。○旌表守正捐軀河南考城縣民畢二妻

高氏。○是日駐蹕密雲縣行宮。○庚申諭內閣。本年刑部辦理秋審。所擬改緩改實各起。均各允協。即如浙江省張師端一起。該省原擬緩決。經刑部改為情實。乃係必應入實之案。並非有意從苛。是以即予勾決。此外九卿科道會議時。亦無發出或枉或縱之案。該堂官勘擬。尚為盡心。上年因該部積壓本章。且屢次錯誤。將該堂官等分別降罰。崇祿韓蔚俱著加恩開復頭品頂帶崇祿。仍賞紫禁城

書錄事

八

騎馬韓蔚。仍賞還花翎。現出有左副都御史一缺。加恩即著彭希濂補授。○是日駐蹕南石槽行宮。○辛酉賞看守湯山行宮弁兵半月錢糧。○是日駐蹕湯山行宮。○壬戌上還圓明園。○詣

安佑宮行禮。○癸亥以翰林院侍讀鍾昌侍講聶鎬敏。充日講起居注官。○緩徵山西岢嵐州霜災新舊額賦。○甲子諭內閣。張師端係捐納縣丞。又係大員子弟。倚勢串詐。平民牽

控無辜。致令畏累自盡。乃必應情實之犯。護巡撫額特布。署臬司景臨。輒將該犯擬入緩決。實屬蒙混。經刑部改入情實。儻未經改正。朕亦必記憶查問。將刑部交部議處。額特布著即照部議降一級調用。署臬司景臨先行勘詳。著降二級調用。此係格外施恩。姑從寬典。不加深究。內外問刑各官。當知儆戒。庶免重罪。凜之。○以吏部右侍郎茹荼為國史館副總裁官。○調福建布政使瑞麟為浙江布政使。以福建按察使李賡芸為布政使。浙江寧紹台道麟祥為福建按察使。○緩徵兩淮板浦中平臨興三場水災新舊折價銀。○乙丑。

上幸萬壽山。○諭內閣。先福等奏請留降調道員就近捐復留陝補用一摺。各省奏請捐復人員。朕必詳覈案情。分別予奪。如本案祇係一人而情節較輕者。向每降旨允准。若案內人數過多而情節較重者。不能因一人而寬

衆人之罰。蘇成額官聲素好。朕亦聞知。但本案因出具空白印結。同時降調者多。員若准令蘇成額捐復。則同案之人勢必援以為例。紛紛籲請。又豈能辦理兩歧。至該員擢任陝西糧道甫經一年。該省辦理軍糧積欠。豈遂無人可以接辦。所有該督等奏請蘇成額捐復留陝之處。著不准行。蘇成額仍照前旨降一級來京以京員補用。○丙寅。諭內閣。百齡等奏請將候補知州萬承紀留於南河以同知即補免其坐補本班等語。萬承紀既熟悉河務。經該督等保奏。著准其留於南河。以同知即行補用。惟該員既經改補河員。將來總令在河工出力。不得於補缺之後。又藉稱熟悉地方情形。另請升用。以杜為人擇缺之弊。○諭軍機大臣等。富俊等奏雙城堡開墾地畝被霜一摺。已明降諭旨。照所請施恩矣。雙城堡地方本係生荒。經富俊奏請開墾。本年適被霜災。業已量為調劑。但該將軍摺內有

屯兵報逃另行補派之語該處初經開墾氣候早寒屯兵等一切俱未熟悉若試種二三年歲有收穫自可以漸墾闢儻其地實不宜於種植徒勞無益富俊即當據實奏明另行籌畫不可固執己見以奏准在前意存迴護也將此諭令知之○兩江總督百齡等奏報秋汛安瀾道員張文浩等升敘有差○緩徵吉林雙城堡霜災額賦○丁卯

上御勤政殿聽政○諭軍機大臣等賽冲阿等

實錄卷五十二

十一

奏廓爾喀王專遣噶箕恭進表貢披楞部長頭人遵檄稟覆現在兩國講和邊界寧謐並遵旨撤兵回川各一摺覽奏欣慰此時廓爾喀與披楞兩國和議已成披楞來稟並有與廓爾喀更加和好永遠和睦之語彼此自可息爭邊境寧謐至廓爾喀貪詐刁頑即或另起爭端亦與天朝無涉其來稟稱有事總欲稟知此時儘可付之不答將來即有稟求之事亦仍置之不問惟當加意訓練漢番兵丁

慎守邊疆是為至要至廓爾喀貢期著仍遵照前旨於嘉慶二十二年差噶箕頭目於年內到京照例朝覲現在該二國俱已恭順服從邊圉敕寧賽冲阿著加恩賞還雙眼花翎頭品頂帶喜明珂什克俱賞還二品頂帶喜明並賞還花翎賽冲阿現已撤兵帶回成都到省後即將將軍印信交常明兼署起程來京陛見計算程期如年內可以至京即作為本年年班至該將軍等此次帶往將弁及文

實錄卷五十二

十二

職官員等並未著有勞績有何可鼓勵之處不准保奏一人喜明於查閱營伍後亦即回前藏供職可也將此諭令知之○緩徵陝西綏德米脂榆林永壽四縣電災額賦○戊辰上御洞明堂勾到安徽江蘇情實罪犯停決安徽斬犯十一人絞犯六人江蘇斬犯八人絞犯六人餘七十一人予勾○諭內閣松福等奏圖爾第邁莫特之妻自行投回一摺圖爾第邁莫特潛謀不法時曾經伊妻木巴喇克

伊子阿則依。勸阻迨滋事後。木巴喇克畏懼。逃出卡倫。將阿則依監禁。今該回婦自行投回。念其從前勸阻逆謀。尚知畏法。著加恩准其在卡內原游牧處居住。其子阿則依釋放。交其領回。並將希布察克部落圖爾第邁莫特原有隨比田地房閒賞給該回婦等。俾資養贍。至希布察克總比之缺。本非額制。著即裁撤。毋庸請補。○旌表守正捐軀江蘇丹徒縣民鄭濟川女鄭氏。○緩徵山東章邱鄒平。

實錄卷三三

十一

齊河禹城鄒汶上城武鉅野鄆城館陶恩博興臨清夏津武城濟寧金鄉嘉祥魚臺滋陽德勝等定陶郯城朝城在平。辛。辛。平原陽穀范三十一州縣及德州濟寧臨清三衛水災額賦有差。○己巳。

上幸靜明園。○庚午。

上御洞明堂。勾到河南山西情實罪犯。停決河南斬犯七人。絞犯二十三人。山西斬犯十二人。絞犯五人。餘一百三人予勾。○諭內閣。御

史王耀辰條奏運河漕務利弊一摺。衛河發源豫省。由直隸流入東境。經過州縣農民闢水灌田。設有定制。如私自築壩攔截。本干例禁。著河南直隸山東地方官一體申明定例。嚴行查禁。其故城運道向多古淺。將該處改歸下河廳管理。並將各州縣官民剝船統歸下河廳收驗之處。是否可行。著直隸總督山東巡撫會同妥議具奏。山東恩縣四女寺滾壩下游係在直隸地方。向未挑濬深通。以致去路不暢。德州哨馬營滾壩並已淤塞。著各該督撫一併會籌妥辦。至催漕委弁沿途需索。實為漕運之蠹。該御史所奏係屬實在情形。著漕運總督大加裁汰。其水次扼要之處。必須守催者。務派誠實幹弁。責令輕騎簡從。並嚴禁需索。以肅漕政。○命工部尚書和寧

實錄卷三三

十四

上詣

恩慕寺

恩佑寺

大高殿行禮○還宮○壬申

上臨故御前大臣喀爾喀賽因諾顏扎薩克親

王固倫額駙拉旺多爾濟第賜奠○除奉天

熊岳牛莊及廣寧屬之巨流河衝壓地二十

五頃九十一畝有奇額賦○癸酉

孝慈高皇后忌辰遣官祭

福陵○賞廣寧門外普濟堂煮賑小米三百石

○

實錄卷三十五

十五

上以孟冬時享

太廟自是日始齋戒三日○甲戌諭內閣陳預

奏買補動缺倉穀一摺東省連歲豐稔糧價

平減所有缺額倉穀自應及時買補該撫所

奏於本年採買穀二十萬一千二百餘石並

動支例價及酌加津貼之處俱著照所請辦

理惟此事總在行之以實俾顆粒均歸倉貯

該撫務督率該司道等實力稽查如有不肖

州縣侵吞穀價虛報採買及勒捐派累情弊

即據實嚴叅懲辦毋稍姑息○旌表守正捐

軀湖北漢川縣民邵貴萬妻田氏○乙亥

孝敬憲皇后忌辰遣官祭

泰陵

實錄卷三十五

十六

大清仁宗受天興運敷化綏猷崇文經武孝恭
勤儉端敏英哲睿皇帝實錄卷之三百二十二

大清仁宗受天興運敷化綏猷崇文經武孝恭勤儉端敏英哲睿皇帝實錄卷之三百二十三

監修禮部尚書臣等謹將嘉慶二十一年丙子冬十月丙子朔享

聖廟禮部尚書臣等謹將嘉慶二十一年丙子冬十月丙子朔享

聖廟禮部尚書臣等謹將嘉慶二十一年丙子冬十月丙子朔享

聖廟禮部尚書臣等謹將嘉慶二十一年丙子冬十月丙子朔享

聖廟禮部尚書臣等謹將嘉慶二十一年丙子冬十月丙子朔享

教修

嘉慶二十一年丙子冬十月丙子朔享

實錄卷三百二十三

大廟

上親詣行禮○遣官祭

永陵

福陵

昭陵

昭西陵

孝陵

孝東陵

景陵

泰陵

泰東陵

裕陵○遣官祭

孝淑皇后陵寢○遣官祭

端慧皇太子園寢○頒嘉慶二十二年時憲

書○諭軍機大臣等蔣攸銘等遵旨覆奏辦

理喚咭喇貢使到粵回國事宜一摺喚咭喇

國貢使不能行謝宴禮儀乾隆五十八年到

粵時並未給與筵宴此次自無庸強令入宴

行禮該督等所奏頒賞使臣筵席三桌仍賞

給牛羊等物所辦甚是至另片所請再行頒

發諭旨宣明該貢使等失禮之咎令該國王

自行查辦殊可不必要前該督所奏刊刷告示

發給該國來粵貿易各船朕即諭以六合之

外存而不論降旨飭令停止該督尚未接到

復為此奏總之此事蘇楞額一誤於前和世

泰再誤於後朕權衡裁度恩威並濟厚往薄

來辦理已為允協此後無庸多煩詞說該貢

使如此狡詐即頒發諭旨伊歸國後亦豈不能隱匿捏造虛詞以自文其過竟當置之不論較為得體俟該貢使到粵該督於接見時當堂堂正正諭以此次爾等奉國王之命來天朝納貢不能成禮即屬爾等之咎仰荷大皇帝深仁大度不加譴罰仍賞收爾國王貢物頒賞珍品此乃天高地厚之恩爾等回國不可不知感激至爾國向在粵東貿易即係爾國一定口岸儻將來再有進貢之事總須

在粵東收泊候督撫具奏請旨遵辦毋得徑往天津即駛至彼處該官吏亦必遵旨駁回爾等豈非徒勞跋涉如此明白宣諭伊等自當畏威懷德不必與之辨論曲直也朕又思噶咭喇國於乾隆五十八年入貢時懇請在浙江寧波貿易此次該國貢船來往經過浙洋並未寄稅其意似專欲來天津貿易以遂其壟斷之謀該督總當設法將伊國來津之意嚴行杜絕使之不萌此念即來亦不能徑

達方為妥善至破啞等五人既均係夷商現在仍准該國在粵貿易自不必全行驅逐致啟其疑即聽從其便可也將此諭令知之○
丁丑

上詣

大高殿行禮○幸圓明園○戊寅吏部議處失察匠役私賣時憲書稿本之欽天監堂司各官得旨此案欽天監匠役私將時憲書稿本賣給民人距頒朔之期尚遠豫先翻刻刷印

萬餘本紛紛售賣該監堂官及專辦之司書俱毫無覺察其咎較重吏部照漏洩本章例議處所議尚輕滿監正額爾登布西洋監正福文高前任滿監副工部員外郎圖寧前任漢監副戶部員外郎陳倫西洋左監副李拱辰西洋右監副高守謙俱著改為降二級留任司書方履亨著改為降二級調用如無官可補即行革職○賞順天鄉試年老諸生劉會舉人○緩徵江西清江廬陵二縣旱災額

賦○己卯

上以萬壽節御同樂園賜皇子皇孫及王以下文武大臣蒙古王公等食至壬午皆如之○辛巳

萬壽節遣官祭

太廟後殿○遣官祭

福陵

昭陵

昭西陵

孝陵

孝東陵

景陵

泰陵

泰東陵

裕陵○遣官祭

孝淑皇后陵寢○遣官祭

顯佑宮

東嶽廟

城隍廟○

上詣

安佑宮行禮○御正大光明殿皇子皇孫及王以下文武大臣官員蒙古王公等行慶賀禮○癸未

上詣

安佑宮行禮○諭內閣前據巡視中城給事中繼德等奏該城指揮謝煦因稽查保甲拏獲私刻時憲書人犯送部朕以該城巡緝認真

降旨將該巡城給事中交部議敘該指揮以應升之次先行升用昨據刑部訊明此案係刷匠程光錫先赴指揮處呈首並非該指揮自行訪聞因交軍機大臣傳到該給事中指揮等詢問本日托津等覆奏查明該指揮實因程光錫首告始將板片人犯起獲該給事中但據指揮稟報之詞具奏並未查出先經有人呈首一節據實參奏該城拏獲此案人犯既係得自首告即應據實聲敘乃隱匿情

節希圖邀功豈可令其冒膺甄敘所有該給事中繼德卓秉恬議敘及指揮謝煦先行升用之處俱著撤銷惟該城業將案犯全行拏獲加恩免其議處○甲申

上詣

大高殿

壽皇殿行禮○還宮○乙酉

皇后千秋節宮內行禮如儀停止筵宴及在外公主福晉命婦行禮○丙戌以刑部右侍郎

朱理為順天武鄉試正考官內閣侍讀學士桂齡為副考官○戊子

上詣

時應宮

昭顯廟拈香○兩江總督百齡因病乞假允之○以大學士松筠署兩江總督○緩徵江蘇句容山陽阜寧清河桃源安東高郵泰江都甘泉興化寶應海沭陽十四州縣及淮安大河徐州三衛水災本年及次年額賦並帶徵

漕米給高郵甘泉三州縣災民一月口糧○己丑命塔爾巴哈台領隊大臣圓伯特阿克蘇辦事大臣福昂伊犁領隊大臣揚桑阿富永伊鏗額回旗以塔爾巴哈台叅贊大臣富僧德為領隊大臣賞喀什噶爾幫辦大臣貢楚克扎布二等侍衛為塔爾巴哈台叅贊大臣兵部主事素納三等侍衛為喀什噶爾幫辦大臣以古城領隊大臣同興為阿克蘇辦事大臣賞降調浙江布政使額特布頭等侍衛為古城領隊大臣伊犁協領碩隆武前鋒章京金保頭等侍衛阿勒罕保副都統銜為伊犁領隊大臣○庚寅旌表守正捐軀山西絳州民周起秀妻王氏○辛卯諭內閣祥保等叅奏署叅領旺楚克於秋審勾決絞犯延不行刑率稱十月初一日起至三十日止均不准行刑請俟冬至七日後正法為時尚有一月之久恐至疏虞其奉文後延不行刑有無意圖稽緩之處應徹底根究等語外省自

九月二十日起至十月二十日止停止行刑該都統等接到部文已在停止行刑期內即應將部文封存署內以免漏泄俟應行刑之期計算程站發往方為正辦不應先行發往此係祥保二人之咎著交部察議至該署叅領既經奉文並知有此例則十月二十日後距冬至尚有半月之久自應於二十日以後冬至十日以前此數日內遵照辦理何以又請俟過冬至七日之後亦屬錯誤著祥保等提到旺楚克查明如果有意圖稽緩別情即行據實叅奏○壬辰月食○癸巳命嗣後滿洲蒙古丁憂回旗人員如奉旨任文職上行走者照例歸十月查辦其奉旨任武職上行走者俱毋庸查辦○甲午添設江南裏河運口外南兩岸二汛外委各一員從河道總督黎世序請也○緩徵河南濬縣水災帶徵漕糧貸睢州被水災民麥種牛具銀○乙未上御太和殿視朝王以下文武升轉各官謝恩

○安徽壽春鎮總兵官喀勒吉善以病解任以湖南寶慶協副將楊超鎮為壽春鎮總兵官○蠲緩浙江蘭谿東陽義烏浦江湯溪西安龍游江山常山青田麗水宣平臨海十三縣及衢州所旱災新舊額賦有差並給麗水宣平二縣貧民一月口種○丙申上御懋勤殿勾到山東直隸熱河情實罪犯停決山東斬犯五人絞犯四人直隸斬犯五人絞犯十一人餘一百四人予勾○諭內閣文寧奏各屬未買倉穀懇請分別展限次第買補一摺黔省缺額常平倉穀上年經慶保奏明分限三年買補茲據文寧奏慶保前奏係按通省應買穀數籠統定限其中尚有窒礙難行之處請將缺穀數少者照原限買足缺穀數多各屬分別加展年限所奏自係實在情形著照所請除黃平州缺額穀八百二十石零修文縣缺額穀六千一百四十石即將該州縣秋糧餘米耗米撥補毋庸採買外其

思州府等十處未買穀一萬六千八百六十石零都勻府等十九處未買穀一十二萬七千五十九石零俱照單開現定年限買補足額該撫仍隨時稽覈按限盤查務令胥歸實貯如有捏報虛收及抑勒苛派等弊立即指名嚴叅毋稍徇縱○又諭祥保等奏據實檢舉一摺向例外省秋審予勾及立決人犯奉文適遇停刑期內均嚴密封存候至過期始行辦理今祥保等於九月二十日後停刑期內將絞犯薩拉圖等處決不諳定例糊塗已極祥保棍楚克策楞俱著交部議處尋議上得旨此案祥保於停刑期內將絞犯薩拉圖等處決不諳定例轉將呈報商阻之署叅領旺楚克叅奏革職實屬糊塗兵部議以降二級留任尚覺過輕祥保棍楚克策楞本應降調姑念一時更換乏人俱改為降三級留任○旌表守正捐軀河南鎮平縣民王三妻時氏○丁酉戶部議駁直隸總督方受疇奏請

寬免交代遲延處分一摺得旨部駁是直隸省州縣交代未結各案上年據那彥成奏准予限清釐嗣後奏准展限正展限期統應於本年閏六月為止其遲延各案自應開叅職名豈得援引前案概請寬免方受疇甫任總督即率為此奏代屬員開脫處分著交部議處其遲延各案仍查取職名送部議處其自上年清釐以後該省新案交代報部者僅止八案此外交代各案必致又涉遲延並著該督嚴催造報毋再玩延○戊戌上御懋勤殿勾到朝審情實罪犯停決官犯一人斬犯五人絞犯十四人餘十九人予勾己亥諭內閣大學士吏部戶部會同議駁蔣攸銑條奏變通成例四款所駁俱是各部院保送繁缺知府該堂官祇能就其在部院行走才具視其堪任繁劇者公同保列並未親驗其治郡政績豈能將堪勝兼三兼四缺分細為區別蔣攸銑所見未免膠執即令伊為

部院堂官亦豈能如此較短絜長耶惟近來各部院於俸滿截取人員保舉繁缺誠未免過濫嗣後各該堂官務秉公甄別視其才具實優者方可保列繁缺不得以保簡得缺較遲遂一概徇情濫舉保薦繁劇其所保人員如將來不稱方面之任原保簡缺者該堂官尚可從輕議處原保繁缺者即將該堂官加重議處至大計卓異人員其在任政績向例敘入題本其才具已足表見若既列上考復

另摺保薦概免其停升處分亦於定例未協其獲盜人員覈實升補及酌覈失察屬員虧挪處分二條亦多窒礙難行考課吏治旌別賢能惟當隨時整飭非更改成例即能收效也○又諭本日潘世恩差人齎摺奏請終養又因伊子中式舉人具摺謝恩潘世恩前以丁憂回籍本年九月服闋又值伊子中式舉人伊係一品大員自應親身來京具摺陳謝即因伊父年逾七旬欲求終養亦應於到京

召對時據實陳情朕必俯允所請今伊摺內祇云體察伊父精神迥不如前並非疾病沈篤刻不可離潘世恩來京往返不過月餘乃憚於跋涉輕率陳請殊乖人臣之義潘世恩著降為侍郎准其終養俟養親事畢後來京以侍郎補用○命協辦大學士禮部尚書章煦在軍機大臣上行走○緩徵甘肅寧朔縣水災新舊額賦○辛丑諭內閣楊護奏署旁書吏房屋失火請交部議處並自行賠修一摺楊護著免其交部議處其被燒書吏房屋准其自行賠修至失火之屋係刑房書吏所居恐現辦案卷內有關係該書吏事件意圖滅跡乘夜縱火焚燬其所供廚竈遺火之處未可遽信著該撫詳細查究如得有端倪即提該書吏嚴訊訊明情弊從重定擬具奏○旌表守正捐軀直隸晉州民周來儀妻馬氏

○壬寅
上御乾清門聽政○諭內閣本日大學士會同

該部議奏天津添設水師一摺。竟係誤會朕意。前因天津為畿輔左掖。降旨添設營汛。原以京城八旗生齒日繁。欲倣照密雲增設駐防官兵。俾資移駐。並非添設水師營汛。船械此次所議各條。過於繁瑣。著大學士會同該部。按照密雲駐防官兵規制額數。另行悉心妥議具奏。○又諭永祚奏赴監查驗添建獄房。衆犯等搶地叩頭感激恩施。不敢壅於上聞。據實具奏等語。外省添建監獄。條常有之事。永祚奉派查驗獄房。祇應將工程情形據實覆奏。乃將獄囚感激之詞。附片聲敘。竟似代獄囚等謝恩。實屬荒唐乖謬。不知體制。永祚著交部嚴加議處。尋議革職。從之。○癸卯旌表守正捐軀江西上猶縣民陳棕柄妻方氏。○甲辰諭內閣。國家設立部院衙門。遇有交議事件。各堂官應虛衷商榷。俟詢謀僉同。方可畫稿聯銜具奏。如事關重大。有交大學士軍機大臣會同各該衙門議奏者。原以一

人之心思有限。衆人之才識無窮。尤應公同籌酌。以期事臻盡善。或其事衆人皆以為是。中有一人獨覺其非。即應抒其所見。向衆人剴切陳說。其言果當。衆人自當擇善而從。其言不當。衆人亦可面折其非。如其人心仍不服。朝廷本有兩議之例。即當自抒己見。據實直陳。候朕裁定。朕執兩用中。言之是者。即降旨俞允。言之非者。亦必降旨駁正。乃近有公同會奏之事。有一二人又於召見時。以所議未協。向朕前密陳。是竟強勉唯阿。而復退有後言。其心實私而不公。豈忠誠體國之義乎。嗣後凡遇特交會議事件。務須公同定議。必意見毫無異同。方可會銜陳奏。若意見不合。即單銜具奏。其會奏摺內。無庸列名。此時在廷並無攬權專擅之臣。儻有過抑羣言。阻其獨奏者。准其人指名叅劾。若於畫稿具奏之後。向朕前別生異議。則是首鼠兩端。其人殊不足取。茲特明降諭旨。詳悉曉諭。以後凡特

交會議摺內俱先將此旨恭錄於前。所有此次御史羅家彥條奏籌畫旗民生計交八旗都統會議一摺。奏上時即著將此旨載入。○又諭御史孫世昌奏請將秋朝審冊籍早送詳閱一摺。秋鞫大典與議各員自應悉心詳覈。每年九卿科道所閱招冊刑部於七月二十日後始行分送。距上班之期祇三四日未免稍促。嗣後刑部堂議著較向年移前數日。其招冊亦可趕早分送。俾得從容覈閱。以昭詳慎。○又諭御史孫世昌奏棚民滋害請嚴中議准章程一摺。安徽徽州府屬棚民於嘉慶十二年議定章程。以租種山場契約年限為斷。限滿退山回籍。其未載年限者亦不能過十年。迄今已屆年限。據該御史奏該處老棚不退。新棚日增。恐限滿棚民仍在彼占種滋事。著康紹鑪督飭該地方官詳查現在棚民業經限滿者。概令退山回籍。仍按年造冊報部查覈。再棚民限滿地方官延不查辦。應

予議處。如從前未經定有處分。著該部明定處分。奏准後由該管上司照例查叅。○調盛京工部侍郎恩寧為盛京刑部侍郎。以密雲副都統多福為盛京工部侍郎。○乙巳上詣奉先殿壽皇殿行禮。○諭內閣陳預奏查明泰安兗州沂州登州四府屬原叅虧缺各員分別全完未完實虧銀數請旨一摺。各該叅員完繳銀兩。雖據藩司詳明全數清繳。而陳預未經查驗。尚不足信。著陳預即親赴藩庫查明實係繳存在庫。並無虛捏牽混。所有全完之原任知縣朱奕勳張京吳璋周崇禮宋銘陳醇陳淦周景巖蔣因培原任通判錢日昭原任知州胡道垠俱著准其開復原官。留於東省各照原缺繁簡酌量補用。其現經完繳抵除覈計實虧銀數已在五千兩上下之楊希賢袁潔徐霖陳錫齡張畬彭驥曾冠英善寶八員

內除善寶另歸參奏虧缺之案審辦外其餘
七員仍著按限勒追如果全完該撫再行奏
明請旨其完繳抵除外虧數尚在一萬兩以
上之朱安國喻春林張孚遠徐秉謙張煦周
履端六員內除周履端另有參奏虧空之案
現應審辦外其餘五員亦著照該撫所請暫
緩解部先在東省監追如不能依限完交俟
六府二州清查完竣時有應行解部之員一
併解交刑部監追

實錄卷三百二十一

光

大清仁宗受天興運敷化綏猷崇文經武孝恭
勤儉端敏英哲睿睿皇帝實錄卷之三百二十三

大清仁宗受天興運敷化綏猷崇文經武孝恭
勤儉端敏英哲睿睿皇帝實錄卷之三百二十四

監修欽定四庫全書纂修官太子太傅武英殿大學士劉世明等謹奏

聖鑒事竊臣等謹將臣等奉 上諭軍機處管理軍機處事務大臣等因欽此

欽此等因欽此臣等遵即欽此欽遵在案竊臣等查該處事務大臣等因欽此

欽此等因欽此臣等遵即欽此欽遵在案竊臣等查該處事務大臣等因欽此

欽此等因欽此臣等遵即欽此欽遵在案竊臣等查該處事務大臣等因欽此

敕修

嘉慶二十一年丙子十一月丙午朔貸甘肅

實錄卷三百二十四

一

臯蘭狄道渭源西寧寧朔隴西寧遠安定岷

通渭兩當十一州縣被雹被水災民口糧

上以冬至祀

天於

園丘自是日始齋戒三日○丁未諭內閣百齡

等奏守備押催幫船迅速回空請賞加都司

銜等語本年運河水足重運抵通較早袁州

衛守備牛斗南催趲出力業經加恩交部議

敘此次押催回空船隻迅速渡黃亦因水勢

充足並非由催趲得力。若亦籲請恩施。竟似歲以為常。與漕船行走遲滯。年分催趲出力者。轉無所區別。所有該督等請將守備牛斗南。賞加都司銜。著不准行。如該弁將來另有催趲奮勉之處。再行保奏。○改廣東新寧縣海埕場大使為上川司巡檢。廣海寨司巡檢為主簿。從巡撫董教增請也。○戶部議准。山西巡撫銜齡疏報寧遠廳屬開墾地七十二頃有奇。照例升科。從之。賑直隸安。新安。雄。高陽。四州縣被水被雹災民。並蠲緩雄。高陽。任邱。薊。霸。保定。文安。永清。清苑。安肅。新城。蠡。獻。天津。青。靜。海。滄。鹽。山。南。和。任。元。城。大名。南。樂。清。豐。龍。門。冀。新。河。隆。平。寧。晉。博。野。完。祁。河。間。阜。城。三。十。四。州。縣。及。津。軍。同。知。所。屬。新。舊。額。賦。有。差。○減免直隸文安縣窪地額賦十分之五。○戊申。

上詣

南郊齋宮齋宿。○己酉冬至祀。

天於園丘。上親詣行禮。○遣官祭。永陵。福陵。昭陵。昭西陵。孝陵。孝東陵。景陵。泰陵。泰東陵。裕陵。○遣官祭。孝淑皇后陵寢。遣官祭。端慧皇太子園寢。○停次日朝賀。○庚戌諭。內閣。刑部。奏審擬私刻時憲書人犯黃三等罪名一摺。已依議行矣。時憲書頒行天下。以便民用。若不遵欽天監推算。自行私造。干支。

錯誤自應從重治罪。如照依監本翻刻刑部並無治罪之條。其時憲書冊尾所載偽造者依律處斬。如無本監時憲書印信。即同私造等語。實屬虛設。即冊面欽遵。

御製數理精蘊印造數語。現在欽天監推步之術。恪遵成法。由來已久。亦無庸特為標著。所有時憲書冊面冊尾兩條。俱可刪除。至各省所頒時憲書。向於每年四月初一日。由欽天監豫將樣本發交各布政司衙門刊刷。至十

清實錄卷三十四

四

月初一日。頒朔後頒行。近京一帶。若由監頒行。勢難徧及。或交順天府募匠刊刷。照各省布政司之例辦理。惟總須定於十月初一日頒朔以後。方准出售。若於頒朔之前。私行售賣。即照違制律治罪。其應如何酌定章程。著欽天監詳議具奏。尋議上。得旨。嗣後直省各布政司刊刻時憲書。仍鈐蓋庫貯欽天監時憲書印信。各州縣照刻之時憲書。即鈐蓋各該州縣印信。其無附郭首縣之府。即鈐蓋該

府印信。各布政司均於頒朔之日。即將樣本分發各府州縣遵照刊刻。以廣流通。○兩江總督百齡等奏。籍案索贓之署。知縣請革職嚴審一摺。得旨。此案京口駐防閒散鄔勒興阿之妾吳氏。自縊身死。何遽出銀一千九百兩。交差役賄通知縣鄔勒興阿。係駐防閒散。何從得有如許銀兩。且既已交銀寢息。即差役索謝諒亦無多。何以又復情急自縊。情節種種可疑。署丹徒縣南匯縣縣丞楊超鐸

平銀表三十四

五

著即革職。交松筠胡克家提同案內人證嚴訊。賄銀來歷。並案內確情。秉公定擬具奏。其在逃之縣役楊錦門。丁韓升。迅速嚴拏。務獲歸案辦理。○辛亥。以故唐古忒輔國公琳沁朋楚克子策旺珠美襲爵。○壬子。諭內閣朕風聞鄂勒哲依圖索特納木多布齋二人。近日坐轎。並見鄂勒哲依圖穿用卑靴。伊等均係蒙古。且現任御前大臣。領侍衛內大臣。亦屬武職。並無坐轎之例。從前拉旺多爾濟丹

巴多爾濟坐轎係特恩所賞。今鄂勒哲依圖索特納木多布齋未奉諭旨。即私行坐轎。且鄂勒哲依圖又穿卑靴。貪尚安逸。殊屬不合。著傳旨申飭。仍交理藩院議處。尋議革職。得旨。加恩免其革職。將伊等領侍衛內大臣都統革退。鄂勒哲依圖著罰貝勒俸二年。索特納木多布齋著罰郡王俸一年。其餘管轄仍著管理外。鄂勒哲依圖仍著在御前大臣上學習行走。索特納木多布齋仍著在御前行

實錄卷三三四

六

走。又諭陳預奏李逢亨於黃河情形不甚熟悉。近日河勢北趨。魏家埠道迤東迎溜頂衝。明歲必須加意修防。李逢亨每喜於隄內添築土壩。不惟與水爭地。抑且引溜生工。轉多糜費。豫東二省險工林立。李逢亨到東河日淺。未能曉暢。機宜難保。不為廳員朦混等語。朕本日召見吳璥。據奏稱李逢亨於東河河務機宜實未熟諳。其言與陳預相符。兩年以來。河流順軌。由於海口深通。建瓴直下。此

時上游修防尤關緊要。李逢亨於黃河情形既未能熟悉。著仍回永定河道之任。伊在河東河道總督任內。並無咎愆。著加恩賞戴三品頂帶。其河東河道總督員缺著葉觀潮以三品頂帶補授。俟明年三汛安瀾後再行施恩。又充沂曹道斌良於河務情形亦未諳悉。著發往江南以地方道員補用。其所遺員缺著張鼎補授。○調湖廣總督孫玉庭為兩江總督。以河南巡撫阮元為湖廣總督。調貴州

實錄卷三三四

七

巡撫文寧為河南巡撫。以刑部右侍郎朱理為貴州巡撫。都察院左副都御史彭希濂為刑部右侍郎。○賞還故兩江總督三等男百齡協辦大學士。遣乾清門侍衛博啟圖往奠茶酒。予祭葬。謚文敏。以其子扎拉芬襲爵。○緩徵陝西府谷神木二縣電災新舊額賦。

癸丑

上詣

雍和宮行禮

火神廟拈香○以服闋左副都御史莫晉為都察院左副都御史○調雲南布政使繼昌為江寧布政使江寧布政使李堯棟為雲南布政使○甲寅遣官祭

先醫之神○諭內閣八旗都統等奏駁御史羅家彥條奏籌畫旗民生計章程一摺所駁甚是該御史條陳以為旗民生計艱難欲令八旗老幼男婦皆以紡織為業當奏上時朕即覺其事不可行今該都統等所奏果衆論

實錄卷三十四

八

俱以為事多窒礙公同議駁本日特召見諸皇子軍機大臣等明白宣諭我八旗滿洲首以清語騎射為本務其次則誦讀經書以為明理治事之用若文藝即非所重不學亦可是以皇子等在内廷讀書從不令學作制藝恐類於文士之所為凡以端本務實示所趨嚮我朝

列聖垂訓命後嗣無改衣冠以清語騎射為重聖謨深遠我子孫所當萬世遵守若如該御史

所奏八旗男婦皆以紡織為務則騎射將置之不講且營謀小利勢必至漸以貿易為生紛紛四出於國家贍養八旗勁旅屯住京師本計豈不大相刺謬乎近日旗人耳濡目漸已不免稍染漢人習氣正應竭力挽回以身率先豈可導以外務益遠本計矣即如朕三年一次閱選秀女其寒素之家衣服尚仍儉樸至大臣官員之女則衣袖寬廣踰度竟與漢人婦女衣袖相似此風漸不可長現在宮

實錄卷三十四

九

中衣服悉依國初舊制乃旗人風氣日就華靡甚屬非是各王公大臣之家皆當力敦舊俗倡挽時趨不能齊家焉能治國以副朕崇實黜華至意羅家彥此摺若出於滿洲御史必當重責四十板發往伊犁姑念該御史係屬漢人罔識國家規制但伊識見如此竟欲更我舊俗豈能復勝言官之任著革退御史仍回原衙門以編修用將此通諭知之○又諭理藩院奏據喀爾喀扎薩克和碩親王已

彥濟爾噶勒呈稱伊族兄佐領端多克琳沁屢次欲將伊曾祖母公主金冊伊曾祖策楞遺像扁額強行移去供奉並欲索取伊看守墳塋之官員莊頭等情轉行具奏一摺巴彥濟爾噶勒既襲王爵自應將伊曾祖母公主金冊及伊曾祖策楞遺像扁額承奉端多克琳沁既襲佐領即應辦理佐領事務今乃屢向巴彥濟爾噶勒寄信索取金冊等物甚屬非是即欲索取亦應呈報該旗乃端多克琳

實錄卷三百五

十

沁並未呈報可見伊以巴彥濟爾噶勒年幼有心欺凌且欲謀看守墳塋莊頭又自恃佐領將看守墳塋之馬甲拜唐阿等每月應支錢糧內菜蔬銀兩自閏六月至今扣留未放殊屬不堪端多克琳沁著革去佐領即日交兵部發往伊犁以示懲戒巴彥濟爾噶勒尚屬明白所遺佐領一缺即著巴彥濟爾噶勒承襲○乙卯諭內閣先福奏覈實取中駐防武舉一摺所奏是鄉試考取武舉必須馬步

射與弓石俱能合式者方准取中各省駐防應武鄉試之人馬步箭素所練習合式者多於弓石鮮能合格若一概送考不能取中未免徒勞往返嗣後設立駐防省分凡遇鄉試之年著該將軍都統副都統城守尉等將應試各旗武生及前鋒等均先行認真甄別其馬步箭與弓石俱能合式者方准錄科送考其不合式者即行駁退無庸錄送以昭覈實○命刑部查明緩決三次以上人犯照例分

實錄卷三百五

十一

別減等發落○丙辰諭內閣大學士會同兵部議奏天津安設八旗駐防及添設綠營水師各一摺其安設駐防應需各項事宜過於繁重國家經費有常此時且無庸辦理至添設水師綠營兵一千名就江浙閩廣四省水師額兵內抽裁尚不及百分之三所有天津原設之葛沽等陸路營官兵無庸裁汰即著兩江閩浙兩廣總督各就該處地方情形共抽裁名糧一千名交天津新設之水師營官

弁照額募充分營管轄。又諭御史伊綿泰奏請將刑部監斃人犯無論罪名輕重概入年終彙題一摺。所奏是刑部收禁人犯遇有監斃。向祇將斬絞監候一項。於年終彙題。其餘輕罪人犯概不敘入。儻有濫收監斃者。轉致無所稽考。嗣後著刑部將一切監斃人犯。俱於年終彙題本內概行敘入。並將收禁年月。以及應擬何罪之處。一體聲敘。用昭慎重。○以內大臣綿志為正白旗領侍衛內大臣。

實錄卷一百一十四

十二

兼正黃旗蒙古都統內大臣晉隆為鑲黃旗領侍衛內大臣。禮部尚書成寧兼正白旗蒙古都統。正紅旗蒙古副都統阿那保為鑲藍旗蒙古都統。內閣學士穆彰阿兼正紅旗蒙古副都統。正紅旗蒙古都統瑪呢巴達喇戶部尚書景安為內大臣。○旌表守正捐軀奉天承德縣民張住兒妻黃氏。蠲緩湖南澧安鄉武陵沅江四州縣水災本年額賦有差。○賑雲南鄧川鶴慶二州被水災民並蠲緩

額賦有差。○緩徵烏魯木齊宜禾縣旱災額賦並貸口糧。○緩徵奉天金州寧海二處風災帶徵銀米。丁巳諭軍機大臣等據巡漕御史孫汶奏。檢拾候補縣丞李德稟帖一函。內稱本年河工三汛安瀾。首齡黎世序保奏不公。將情託投工効力之地方鹽務三十餘員保舉二十九人在工年久出力者。僅保十五人。懇請轉奏等語。該給事中拆閱揭帖。當即飭縣查明河工並無候補縣丞李德其人。

實錄卷一百一十四

十三

自係假捏姓名。砌詞控告。與匿名揭帖無異。看來即係此次河工候補各員內未得保舉之人。但河工現任候補各員。約有三百餘人。僅保舉十五人。投効各員三十餘人。得保舉者竟有二十九人。顯有不公情弊。至此內鹽務人員與河工毫無干涉。一例列入薦章。更屬非是。且控詞內並有身未到工掛名當差之語。如果屬實。尤為冒濫。著松筠會同孫汶秉公確查。現在黃河普慶安瀾。工員既有

三百餘人。儘數差委。所有投効之地方鹽務各項人員。無可需用之處。即行徹退。有原發省分者。飭令各回原處。其已保各員內。如有身未到工。濫膺保舉者。即奏明將所得議敘徹銷。百齡業已病故。黎世序如有徇情濫舉之事。亦據實叅奏。至投遞匿名揭帖之人。亦應查拏究辦。松筠等一面查辦此案。即一面密訪匿名之人。一經拏獲。訊明照例治罪。將此諭令知之。○戶部議准。四川總督常明疏。報會理。西昌鹽源冕寧越雋五廳州縣開墾田三百八十七頃六十五畝。照例升科。從之。○戊午。

聖祖仁皇帝忌辰遣官祭

景陵

上詣

壽皇殿行禮。○調鑲藍旗蒙古副都統巴靈阿為墨爾根副都統。以內閣學士同麟為鑲藍旗蒙古副都統。己未。賑安徽宿靈璧懷遠。

鳳陽泗五河六州縣及屯坐各衛水旱災民。並緩徵宿靈璧懷遠鳳陽泗五河壽定遠鳳臺盱眙天長無為蕪湖繁昌潛山蒙城懷寧太湖廬江當塗和巢東流桐城太和亳二十六州縣及鳳陽長淮泗州建陽四衛新舊額賦有差。○庚申。賞八旗兵丁一月錢糧。○壬戌。諭內閣。戶部議駁長蘆半文加價全數歸商一摺。前因蘆東商力疲乏。准其正餘引票官鹽每斤加制錢一文。以一半歸商。俾資成本。一半交官抵完各商積欠。此係朕特沛恩施。乃自加價以來。該商等歲得一半歸商所加之價。其交官之項。僅於十八年交過一限銀一十九萬二千餘兩。其餘屢經奏請展緩。今該鹽政復奏懇將交官之半文加價一併歸商。是該商人貪得無厭。而官欠必致盡歸無著。嵩年甫抵長蘆鹽政之任。即輕聽商人慫恿。率為乞恩。除不准行外。嵩年仍著交內務府議處。○癸亥。

上幸瀛臺閱冰技○諭內閣向來派親郡王等恭祭

東陵

西陵該王等謁

陵時俱在

隆恩門外月臺上行禮儀親王永璘成親王永

理慶郡王永璘支屬切近嗣後恭謁

裕陵俱著導引官引至

隆恩殿後琉璃門外內廷皇子行禮之處行禮

實錄卷三十四

十六

以示恩禮其致祭

泰陵以上仍各按親郡王班次在

隆恩門外行禮此旨著各該衙門載入則例永

遠奉行○甲子諭內閣內務府奏武清東安

二縣申報莊頭園頭等地畝災分查與直隸

造報戶部該二縣民地災分不符顯有捏報

現又據順天府送到通州等十三州縣莊頭

園頭等官地被災分數均應確切查明再行

具題等語武清東安二縣民地被災村莊現

據戶部查明冊載止於五六七分不等乃該

莊頭園頭等地畝均報逾九分同在一縣且

有毗連之區何以所報迥不相符恐該縣有

聽受莊頭園頭等賄囑捏報情弊著方受疇

即派明幹之員前赴該二縣確切查勘如查

有情弊即行據實嚴參分別治罪其通州等

十三州縣官地被災分數一併確勘具奏

旌表守正捐軀湖北穀城縣民楊得太妻冷

氏○緩徵湖北漢川沔陽潛江天門江陵公

實錄卷三十四

十七

安監利江夏武昌嘉魚漢陽松滋咸寧興國

黃岡黃梅石首荊門十八州縣及屯坐各衛

水災新舊額賦有差○乙丑以貝勒永珠為

宗人府左宗人鎮國公奕額為右宗人以

服闋侍郎吳芳培署兵部左侍郎○賞河南

等省鄉試年老諸生李儉等三十名舉人副

榜有差○以甘肅故河州土百戶王斌子煥

章西藏瓊布色爾查族百戶彭楚旺結弟彭

錯汪扎噶魯族百戶索諾木扎克巴納木扎

爾子任盡納結各襲職○丙寅

上御乾清門聽政○予故侍郎原任江寧布政使許兆椿入祀名宦祠江蘇故御史追贈副都御史曹錫寶入祀鄉賢祠從巡撫胡克家請也○戶部議准陝甘總督先福疏報烏魯木齊蘆草溝所開墾地三頃九十畝有奇照例升科從之○丁卯

上幸瀛臺閱冰枝○戊辰諭內閣松筠奏江蘇巡撫衙門自將兩關公費歸公後甚形支絀

平定奏

十八

請將總督應得之永豐壩公費銀八千兩改撥巡撫衙門等語江蘇巡撫衙門辦公不敷自應量為調劑但永豐泰壩公費向歸兩江總督衙門辦公之用總督公用較巡撫為繁若撥出銀八千兩未免過多著於永豐壩公費內撥出銀四千兩再於楊海兩關平餘飯銀內每關各撥銀二千兩共銀八千兩賞給巡撫衙門俾資公用○又諭據慶祥奏書吏熟悉例案現屆五年役滿請照新疆書吏五

平定奏

十九

年期滿再留四年役滿咨部選用等語熱河距京較近非新疆可比若照新疆書吏留役四年即准銓選未免過優書吏潘克坦准其留役俟再屆五年期滿方准咨部以從九品未入流選用嗣後該處如有留役書吏俱照此例辦理○己巳諭內閣御史胡承珙奏請禁私鑄小錢一摺私鑄久干例禁立法綦嚴而出產鉛斤之貴州省及鉛斤聚集之湖廣等處私鑄尤多現在貴州黑鉛暫停採運其廠座必當嚴行封禁不可絲毫偷漏其兩湖地方遼闊為私販聚集之所稽察尤不可不周或在官人役得錢包庇或船戶水手勾串販運如該御史所奏均屬實在情形著該督撫務飭所屬州縣實力訪拏並於各關隘認真稽查如有私鑄並書役容隱包庇販運等弊立即嚴拏究辦其鋪戶如有存留小錢仍明白曉諭令其悉數繳官給值庶商民咸知畏懼而私鑄私販之弊可期日漸斂戢矣○

又諭御史胡承珙奏請禁書役侵欠錢糧一摺直省州縣徵收錢糧例應當給串以免書役等包攬完納侵欺積欠之弊乃竟有新任州縣私向庫書糧戶挪移銀兩歸還私債迨至開徵時即將串票交該書吏私徵抵還代借之項以致書吏侵漁弊端百出積欠日多該御史所奏係屬實在情形著各督撫督同藩司道府等嚴密訪察如有新任州縣負欠私債債主隨同前往向庫書糧戶私挪銀兩還欠者即行叅揭開徵之日儘聽信書役折串包徵亦即據實叅辦毋稍徇縱○命大學士松筠管理刑部事○調協辦大學士禮部尚書章煦為刑部尚書工部尚書周兆基為禮部尚書以吏部右侍郎茹茶為工部尚書署兵部左侍郎吳芳培為吏部右侍郎

庚午

上詣

壽康宮行禮○諭內閣方受疇奏現於奏銷冊

平集卷三十二

三

內查出各州縣虧空銀兩請予限覈實查辦一摺奏銷冊籍原應由藩司覈實勾稽其各州縣冊報已完者必實已徵解其列入未完者必實係民欠不得以已徵未解名目混入民欠數內今直隸既於奏銷冊內查有各州縣虧空銀兩著予限三箇月交方受疇督同姚祖同徹底查明各按所虧銀數多寡分別叅辦其該督及藩司自請議處察議著暫行寬免如屆期不能查辦明晰必當重治其罪至該督另片奏每年於通省養廉辦公項下捐貯銀五萬兩撥補無著虧空本係從前奏定章程著於二十二年春季為始仍照舊辦理本年年班方受疇正在查辦三月期內無庸來京屆期著徐銀前來方受疇留駐省城認真督辦又諭阿克當阿奏校刊全唐文告成裝函進呈一摺內府舊存全唐文寫本係由蘇楞額呈進朕特派館臣續加編輯閱定後發交兩淮鹽政衙門刊刻茲該鹽政覆

平集卷三十二

三

加校對剗刷竣工裝函進呈尚為完善阿克當阿督辦認真應量予鼓勵伊前因太監林顯投書通問一案由內務府護軍統領降為內務府郎中頂帶茲著加恩賞還三品頂帶其捐貲承辦之商人等著查明捐數較多者奏明給予議敘蘇楞額前於啖咕喇貢使一事辦理舛錯將伊降補侍郎仍戴三品頂帶但其獲咎較和世泰為輕蘇楞額著加恩賞還二品頂帶該鹽政另片奏請將此書賞令

千象本三二四

二二

該處官紳等自備紙墨工價分印一節全唐文哀集刊刻原以嘉惠士林著准將板片存留運庫聽其刷印以廣流傳○以故輔國將軍倫正子純粹降襲奉恩將軍○命協辦大學士刑部尚書章煦管理禮部事○調刑部左侍郎熙昌為吏部左侍郎吏部左侍郎秀寧為刑部左侍郎○壬申

上幸瀛臺閱冰技○甲戌諭內閣戶部奏直隸省自嘉慶十一年至十九年地丁奏銷案內

行查各款共銀一千二百餘萬兩節經奏催總未造冊登覆其中有例應專案報銷者亦遲至八九年之久未據題報覈銷辦理實屬延玩著該督即督率藩司將節年報銷各案迅速逐案查明分別題報覈銷並將單開年久未結各案一併趕緊清釐報部覈辦其遲延各職名查明照例議處○又諭戶部奏福建省額貯常平穀石自嘉慶九年以後並未照例按年具題又乾隆六十年清查案內缺額穀石尚未買補足額又臺灣府屬每年運供內地沿海各營兵米嘉慶十年至十四年未運穀十五萬七千餘石前經奏明自十五年七月起分作五年運完此時例限久逾亦未據隨案報部實屬延玩著該督撫即督率藩司將該省各屬額貯並缺額未補及臺灣應運穀石迅速逐案查明曾否買運足額據實報銷並將單開駁查未結各案一併趕緊清釐分別奏咨覈辦其遲延各職名查明照

實錄本三二四

二三

例議處○旌表守正捐軀廣東新安縣民女戴氏

實錄卷三百十四

二十四

大清仁宗受天興運敷化綏猷崇文經武孝恭勤儉端敏英哲睿皇帝實錄卷之三百二十四

大清仁宗受天興運敷化綏猷崇文經武孝恭勤儉端敏英哲睿皇帝實錄卷之三百二十五

乾隆

實錄卷三百十五

嘉慶二十一年丙子十二月乙亥朔除浙江

蕭山縣坍廢地一萬五百頃四十八畝有奇額賦○丁丑諭內閣衡齡奏審明邪匪王寧葉生寬等分別定擬一摺王寧倡立先天教名目斂錢做會傳徒多人葉生寬慫恿王寧分字惑人圖利教誘經該撫審明將該二犯俱照傳習邪教惑眾為首絞立決例問擬絞立決惟葉生寬曾供有從傳濟傳授老子歌並經傳濟給與龍華經一部前經孫玉庭等提訊傳濟祇認曾傳葉生寬點香治病並未

給與經卷與葉生寬原供不符王寧葉生寬俱著暫行監禁俟傅濟解至晉省當面質對如傅濟實有傳教並給與經卷情事實證明確即將王寧葉生寬先行處決並將傅濟一犯亦照邪教為首例問擬絞決具奏俟奉到諭旨再行處決其餘各犯俱著照所擬完結廩生衛君選偽投入教探聽得實到官呈首甚屬可嘉著加恩賞給舉人准其一體會試教諭張瑄帶同衛君選呈報著加恩交部議

實錄卷三三五

二

敘○戊寅戶部議准陝甘總督先福疏報鹽茶正寧二廳縣開墾地十八頃八十八畝照例升科從之○己卯

上幸瀛臺閱冰技○以內閣侍讀學士廉敬署

江西按察使○庚辰

孝惠章皇后忌辰遣官祭

孝東陵○辛巳諭內閣陳預奏曹工軍需兩款各州縣應攤養廉請隨耗羨提解歸款一摺東省曹工軍需兩款業由司庫借墊自應隨

時扣解歸款乃自起限以後尚有未完銀二百三十餘萬兩茲據該撫查明奏請嚴定章程著照所請將各州縣應解三成曹工二成軍需銀兩勒令按季覈扣隨同耗羨解司歸還原款如有未完統歸耗羨奏銷案內覈叅議處其曹工項下歷年未扣積欠銀兩仍著於應攤之現任及事故各員名下分別查明嚴追完繳至榮成博山蒙陰嘉祥四縣耗羨銀兩不敷支放養廉即著於存司應領銀兩

實錄卷三三五

三

內扣抵應解五成之數以清款項○倉場侍郎陳觀以病乞解任允之以都察院左副都御史莫晉為倉場侍郎○壬午

上幸瀛臺閱冰技○癸未命工部尚書和寧刑

部左侍郎帥承瀛馳往甘肅查辦事件○以

吏部尚書英和署工部尚書戶部左侍郎盧

蔭溥署刑部左侍郎○乙酉諭內閣向來值年旗於封印前辦理承襲世職進呈家譜將應襲人員分二日引見朕因此項世職人數

較多。止分二日。恐各衙門因此將引見人員。概不同日帶領。於十八年降旨。分為四日。以便各衙門均勻帶領引見。乃諸臣誤會朕意。於此四日。世職引見期內。別衙門借此怠惰偷安。仍不帶領。殊屬非是。本日值年旗具奏承襲世職應引見者。祇一百十六員。分四日帶領。覈其人數。尚不及每日引見人員之數。若各衙門俱不帶領。則封印前祇有十八十九兩日。引見人數。必致過多。著於十二日為

實錄卷一百五十五

四

始。各衙門引見人員。即隨時帶領。毋許積壓。其十四至十七日。帶領世職之期。吏兵二部及各部旗文武大小衙門。有應行引見者。俱著均勻帶領。若實無引見人員。則已。儻積至十八十九兩日。人數過多。必將不於前四日帶領引見各堂官。概予議處不貸。○又諭孫玉庭等奏傳習牛八邪教案犯。先後赴官投具悔結。懇請免罪一摺。湖北省傳習牛八教之邵元勝等。經地方官宣諭開導。具結改悔。

投案者共有三百六十四名。湖北一省如此。可見各省傳習邪教者。尚復不少。鄉民妄聽邪說。信從入教。本應治罪。但人數過多。愚民無知。一時被誘。若不予以自新之路。朕心實所不忍。惟是此內真心改悔者。固不乏人。恐亦有希圖免罪。暫時投首者。閱時既久。難保其不故智復萌。應酌定條例。以示警戒。著阮元、張映漢飭令該地方官。將此次具結改悔之人。再行曉諭。以該犯等本係有罪之人。現

實錄卷一百五十五

五

奉恩旨。准予自新。係屬法外施仁。若改悔之後。又復習教。則是怙惡不悛。定當加等治罪。責令各出具再犯習教情願。加等治罪甘結。方准免罪。該地方官仍將具結之人。開造名冊。申送臬司衙門存案。儻將來冊內之人。再有傳習邪教者。一經訪獲。即將該犯按律加一等治罪。各直省俱照此一律辦理。將此通諭知之。○予原任貴州石阡府知府羅文思。浙江江山縣訓導蔡英。入祀名宦祠。江蘇故

國子監祭酒顧棟高浙江故翰林院侍講學士梁同書江西故蘇州府同知夏家瑜福建故順天府丞陳桂洲故吏部郎中孟超然湖南前明常德府教授蔣道亨山西故徵士閻若璩入祀鄉賢祠從巡撫朱勳署巡撫額特布巡撫張師誠阮元王紹蘭巴哈布銜齡等請也○鑄給湖南岳州營中軍守備關防從巡撫巴哈布請也○以故廣西南寧府歸德土知州黃昌子學濬病休貴州黃平州重安司土吏目張若齡子星煌各襲職○旌表守正捐軀陝西南鄭縣民王朝銓妻陳氏趙玉麟妻張氏趙寶麟妻門氏○丁亥命禮部左侍郎汪廷珍工部左侍郎王以銜仍在上書房行走○旌表守正捐軀山東蘭山縣民陳平安妻郭氏陝西邠州民楊順妻劉氏雲南寧州民王幅妻祁氏○戊子諭內閣向例蒙古王公等子孫內有應封者俱行報部俟缺出承襲若無子嗣將承嗣之子亦准其報部

作為應封之子拉旺多爾濟前以巴彥濟爾噶勒為嗣並未報部至巴彥濟爾噶勒求賞差使時朕以為係伊親子業經報部是以賞給公爵令在乾清門行走嗣經拉旺多爾濟缺出襲爵時由理藩院咨行該盟長令其保舉應襲之人始知拉旺多爾濟以巴彥濟爾噶勒為嗣未經報部殊屬違例朕因軫念拉旺多爾濟在內廷行走多年於一切差務尚屬奮勉將其爵令巴彥濟爾噶勒承襲此不可為例嗣後凡蒙古王公等以族人之子為嗣作為應封之子者仍遵舊例報部註冊俟出缺時照例承襲如有未經報部者將來缺出概不准其承襲著交理藩院永遠遵行○己丑封睿親王淳穎子謙恩為二等鎮國將軍貝勒永珩子綿崗為頭等輔國將軍貝勒綿懿子奕經奕紀為二等輔國將軍貝子弘諫子永緒為奉恩將軍貝子奕紹子載銓為二等輔國將軍不入八分公恒勳子保齡為

三等輔國將軍鎮國將軍德文泰子蘇敏為三等輔國將軍奉國將軍恒維子文哲麟子奎璧寧忠阿子德彞為奉恩將軍貝子奕純子載銘為三等輔國將軍○三等子那彥成緣事革退以其子容安襲爵○庚寅

上御乾清門聽政○諭內閣胡克家奏勘估吳淞江疏濬工程分年捐辦一摺吳淞江為大江以南衆流入海要道上海等縣漕運經由且關繫蘇松太三屬民田水利近因潮沙淤

墊河流淺澀自應亟為疏濬茲據該撫估計需銀二十八萬三千六十兩著照所請以三分歸沿河之上海青浦嘉定三縣七分歸長洲等十三州縣按歲徵糧額分作兩年攤捐並豫選公正殷實董事由縣給發印簿令各業戶照數捐交解存道庫於二十三年捐足即於是年秋成後按照估定寬深丈尺興工修濬一切俱聽民間自為經理不令官吏插手工係民捐民辦毋庸造冊報銷○又諭慶

實錄卷五十五

八

實錄卷五十五

九

祥奏勒限嚴催控案請將屢提不解之知縣交部議處一摺所參甚是足見實心任事熱河州縣審理案件向多遲緩經該都統屢次催提延不傳解疲玩已極建昌縣知縣恒慶朝陽縣知縣德興署赤峯縣知縣金德俱著先行交部議處仍勒限明歲四月內將二十一年以前積案迅速審解完結如再遲延即據實嚴參其承德府及平泉州豐寧灤平三縣暨四稅員各處未結控案並勒限三月以內一律解審詳結如有遲誤一併參處○以故喀爾喀賽因諾顏扎薩克貝勒衮布車琳子朋楚克多爾濟襲爵○以大理寺卿王引之為都察院左副都御史○壬辰諭軍機大臣等朕聞百齡在兩江總督任內派委員在海州地方查拏鹽梟多犯甚為認真該梟徒聞拏竄逸大半遁入安徽境內及山東曹州一帶地方又豫省緝拏紅鬚匪犯獲案甚多其逸犯亦俱竄入安省毘連處所潛匿可見

該省向來緝捕疏懈百齡現已身故恐地方文武員弁於緝捕事宜漸形廢弛匪徒又復逃回著康紹鏞督飭所屬務將境內匪犯嚴密查拏獲案審明按律究辦勿使鄰省匪徒紛紛竄匿竟為逋逃淵藪也將此諭令知之

○癸巳諭內閣戶部奏各省積欠原數並已未完分數一摺各直省積欠地丁耗羨雜稅等款銀兩前經降旨勒限催追迄今又聞五載各省欠項仍積壓至一千七百二十餘萬

實錄卷三三五

十

兩之多實屬疲玩除年清年款之湖南奉天四川貴州四省外其欠項在二萬兩及數千兩並十餘兩之廣西山西雲南三省著該督撫等勒限督催報完均免其議處欠項較多之山東福建河南江蘇江寧廣東浙江江西安徽陝西湖北甘肅各督撫藩司俱著交部議處至各省積欠雖未能全完尚各有完解數目惟直隸原欠銀三百五十八萬餘兩分釐未解該總督藩司尤為懈怠著加等議處

○調荊州副都統西齡阿為密雲副都統以福州協領都明為荊州副都統○旌表守正捐軀四川灌縣民女鄧氏○是日丁丑年立春順天府進土牛春山寶座○甲午以前任廣西右江鎮總兵官李錦麟為雲南騰越鎮總兵官○乙未

實錄卷三三五

十一

上御寧壽宮賜王公大臣及蒙古王貝勒貝子公額駙台吉等食並賞賚有差○諭內閣康紹鏞奏查明赴京呈控已未完各案一摺安徽省本年四月以後奏咨各案除經康紹鏞審明擬結八案外其遲延逾限未經審結者尚有七案自係從前承審各員因循疲玩所致務即督飭迅速審辦毋任稽延朕聞外省發審案件承審各衙門接到公文時往往為書吏壓擱先向原被告輾轉關說將屆限滿始將公文呈出承審官慮干逾限處分不及詳細推求聽斷草率出詳以致案情不確且有任意遲延不結者是該府州縣不過虛有

其位。而其權悉歸書吏。殊屬廢弛。嗣後該督撫等務當嚴飭所屬。於接到發審公文時。先計其道路遠近。覈算時日。如有遲逾。即將該書吏究明懲處。庶積壓公文之弊可除。而積案自可漸次清釐矣。將此通諭知之。○丙申。

上詣

大高殿行禮。○幸瀛臺。閱冰技。科爾沁扎薩克郡王敏珠爾多爾濟等五人。蘇尼特扎薩克郡王喇特納錫第阿巴噶扎薩克郡王瑪呢

實錄卷一百一十五

十二

巴達喇等三人。喀爾喀扎薩克郡王巴圖鄂齊爾等九人。阿巴哈納爾扎薩克貝勒瑪哈巴拉。烏珠穆沁扎薩克貝勒圖克濟扎布等三人。土默特輔國公濟魯布。青海扎薩克輔國公伊什達爾濟等二人。伊克明安扎薩克輔國公呢瑪藏布。土爾扈特扎薩克輔國公拜濟瑚等二人。和碩特輔國公丹津扎布等五人。回部扎薩克郡王邁瑪薩伊特等十六人。及琉球國使臣毛維憲等二人。於神武門

外瞻觀。○以禮部左侍郎多山。右侍郎廉善充經筵講官。○丁酉。

上御撫辰殿大幄次。賜蒙古王貝勒貝子公額駙台吉及外藩使臣等宴。並賞賚有差。○戊戌。以故廓爾喀額爾德尼王吉爾巴納租塔畢噶爾瑪薩野子熱尊達爾畢噶爾瑪薩野襲爵。○調山西按察使富綸為安徽按察使。以鴻臚寺少卿汪如淵為山西按察使。○己亥。

實錄卷一百一十五

十三

孝莊文皇后忌辰。遣官祭

昭西陵。

上詣

壽康宮行禮。○諭內閣。葉觀潮等奏請將上河廳屬各汛隄堰。加幫培厚。並加高臨清板閘一摺。東省臨清閘外衛河。連年高於汶水。倒灌捫口。自應蓄高汶水。以敵衛河。得收刷滌之效。據該河督等勘明籌議。請將閘內隄堰增培高厚。著照所請。上河廳屬自聊城汎周

家店起至臨清汛磚板閘止。內聊城堂博清平臨清四汛官隄七十一段。估需土方銀一萬七千七百一十九兩零。准其由該省司庫節年地丁銀內照數動撥。其民堰八十四段。估需土方銀一萬七千一百八十四兩零。除聊城堂博臨清四州縣照例由民間修築外。清平一縣由該縣捐辦。其出夫挑土。仍令民間自行辦理。不許胥役經手。以杜弊端。至加高板閘兩層。估需銀一千三百一十四兩零。亦著由該省司庫動支。統限於明年四月內一律完竣。官隄閘工。由該河督覈明具奏。民堰土工。由該撫照例查辦。○緩徵江蘇句容山陽阜寧清河桃源安東高郵泰江都甘泉興化寶應銅山蕭山宿遷睢寧沭陽上元江寧溧水江浦六合鹽城東臺二十五州縣及淮安大河徐州三衛積欠額賦。○庚子。上以歲暮裕祭。太廟自是日始齋戒三日。○辛丑。以福建興化

城守協副將慶熙為浙江衢州鎮總兵官。○壬寅。以歲暮裕祭。遣官祭太廟中殿。後殿。○癸卯。裕祭太廟。上親詣行禮。○遣官祭永陵。福陵。昭陵。昭西陵。孝陵。孝東陵。景陵。泰陵。泰東陵。裕陵。○遣官祭孝淑皇后陵寢。○遣官祭端慧皇太子園寢。○遣官祭

太歲之神○甲辰

上御保和殿筵宴朝正外藩科爾沁喀喇沁奈
曼蘇尼特浩齊特阿巴噶阿巴哈納爾烏珠
穆沁鄂爾多斯巴林土默特教漢喀爾喀吐
魯番翁牛特青海伊克明安土爾扈特和碩
特王貝勒貝子公額駙台吉及朝鮮琉球國
正副使等隨文武大臣依次就坐諸樂並作
上進酒召左翼科爾沁卓哩克圖親王噶勒桑
棟羅布喀喇沁親王銜扎薩克郡王滿珠巴
咱爾科爾沁扎薩克郡王和碩額駙索特納
木多布齋奈曼扎薩克郡王巴勒楚克浩齊
特扎薩克郡王貢楚克棟羅布科爾沁貝勒
鄂勒哲依圖土默特扎薩克貝子固倫額駙
瑪呢巴達喇右翼喀爾喀扎薩克親王朋楚
克達什喀爾喀扎薩克郡王蘊端多爾濟回
部郡王銜貝勒哈廸爾翁牛特扎薩克貝勒
達瑪琳扎布喀喇沁扎薩克貝勒托恩多喀
爾喀扎薩克貝勒凝保多爾濟喀喇沁扎薩

實錄卷五十五

五

克輔國公理藩院額外侍郎瑪哈巴拉等至

御座前賜酒成禮○是年旌表孝子江蘇等省

徐煌等九名孝女江蘇省曹玉枝等二口守

節合例宗室薩炳阿妻吳佳氏等三口滿洲

護軍常山妻瓜爾佳氏等一百八口蒙古富

成妻馬佳氏等三十六口漢軍王兆麟妻門

氏等三十五口內務府數式漢妻方佳氏等

七口各省駐防珂力薩朗妻白佳氏等二百

四十三口直隸等省白士聰妻張氏等八百

實錄卷五十五

五

二十八口未婚守志滿洲鶴齡聘妻伊爾根

覺羅氏一口江蘇等省潘師鼎聘妻陳氏等

二十八口百歲壽民婦廣東等省鄒鐵券等

二十二名口五世同堂陝西等省薛崇孝等

五十一家各給銀建坊如例○一產三男四

川等省楊存貴等四家○會計天下民數穀

數直隸等省通共大小男婦三萬二千八百

八十一萬四千九百五十七名口存倉米穀

三千二百六十五萬一千四十三石三斗七

升六合五勺。

實錄卷三百五

十八

大清仁宗受天興運敷化綏猷崇文經武孝恭勤儉端敏英哲睿皇帝實錄卷之三百二十五

二九四

大清仁宗受天興運數化綏猷崇文經武孝恭勤儉端敏英哲睿皇帝實錄卷之三百二十六

監修職官櫻井清起居注官太子太傅武臣殿大學士文利閣領閣事務察敘奏
上諭事件處管理工部事務翰林院掌院學士隨帶

二級序常勳級員曹振鏞總校官太子太保文淵閣大學士管理刑部事務加五級在戴均元校官司馬龍居德官太子少保尚文臣文淵閣提舉閣事

稽察欽奉
上諭事件處偏辦大鑒李士部尚書翰林院掌院學士教習庶吉士總管內務府大臣鑲黃旗滿洲都統步軍統領管理戶部三

庫奉宸苑清漪園等處總理工程處御茶膳房御藥房太醫院西洋堂事務單功加五級隨帶加二級尋常加三級紀錄三次

爲官于女僕禮部尚書書房行及武英殿總裁管理國子監事務加六級隨帶弘光紀勳等臣汪廷珍等奉

較修

嘉慶二十二年丁丑春正月乙巳朔

上詣

奉先殿行禮○詣

堂子行禮○遣官祭

太廟後殿○御太和殿受朝作樂宣表如儀○

詰

大高殿

壽皇殿行禮○御乾清宮賜皇子皇孫親藩等

宴○丙午

上御重華宮茶宴廷臣及內廷翰林以南薰殿

奉藏圖像聯句。○給直隸安。新安。雄。高陽。四	州縣。上年被水被雹災民一月口糧。貸任邱	縣。被水災民籽種。○給江蘇沛縣上年被水	災民一月口糧。○給安徽泗。五河。鳳陽。三州	縣。上年被水被旱災民一月口糧。貸宿靈璧。	懷遠。盱眙。四州縣及各衛所。貧民籽種。○緩	徵山東章邱。鄒。滕。嶧。鉅野。濟寧。魚臺。七州縣。	並各衛所。上年水災額賦。○貸江西清江廬	陵二縣。上年被旱災民籽種。○貸河南蘭陽	儀封。汲。新鄉。輝。獲嘉。淇。濬。安陽。湯。陰。臨漳。內	黃。永城。十三廳縣。上年被雹被水災民倉穀。	○貸山西岢嵐。平陸。代。五臺。四州縣被霜被	雹災民倉穀。○貸甘肅皋蘭。狄道。岷。隴。西。伏	羌。安化。寧。撫。彝。武威。永昌。鎮番。古浪。大通。清	水。禮。徽。兩當。安西。玉門。十九廳州縣及王子	莊州同所屬。上年歉收貧民籽種口糧。○丁	未。	高宗純皇帝忌辰。遣官祭
------------------------	---------------------	---------------------	-----------------------	----------------------	-----------------------	---------------------------	---------------------	---------------------	------------------------------	-----------------------	-----------------------	-------------------------	-----------------------------	-------------------------	---------------------	----	-------------

裕陵。	上詣。	奉先殿。	壽皇殿行禮。○詣	雍和宮行禮。	火神廟拈香。○戊申。	上以上辛祈穀於	上帝。自是日始齋戒三日。○己酉。諭內閣。張映	漢奏各屬編查保甲完竣。請將辦理認真之	員。懇恩獎勵一摺。編查保甲。係各省通行辦	理之事。不獨湖北一省為然。此乃地方官分	所應為。若因此遂加鼓勵。恐各省紛紛保奏。	不免失之太濫。江夏縣知縣劉琴。拏獲鄰境	劫盜四名。尚有微勞。足錄。著照所請。劉琴。遇	有知縣應升缺出。儘先奏請升署。漢陽縣知	縣裴行恕。僅止稽查保甲。無功可敘。其所請	遞捐分發在任。以直隸州知州候補之處。著	不准行。○諭軍機大臣等。上年十二月間。據
-----	-----	------	----------	--------	------------	---------	------------------------	--------------------	----------------------	---------------------	----------------------	---------------------	------------------------	---------------------	----------------------	---------------------	----------------------

孫玉庭等奏。湖北省傳習牛八邪教先後赴官投具悔呈者共有三百六十四名。本日據張映漢奏。該省沿習天主教具結投悔。將經卷十字架圓像等件交官者。共三十七名。又交出大乘經卷具結改悔者十餘名。均降旨准其免罪。湖北省民人向來沿習邪教。經該地方官宣諭開導。具結改悔投案者。已有三百四十名之多。俱將經卷圓像等件呈繳到官。可見該民人等能知大義。係屬真心改悔。不復誦習。方肯將家傳經像全行交出。即或此內尚有一二暫時改悔。閱久復萌故智者。彼時查出再治其罪。而其真心改悔者。總十居八九。則化莠為良。所全者亦已多矣。直隸山東河南。向來邪教最多。山西近亦有傳習邪教者。何以數年以來。並未見該督撫等奏有具結改悔投首之案。鄉民愚魯無知。苟圖目前小利。不顧日後大害。惑於禍福之說。學習邪教。傳染汙風。歷年已久。人數衆多。誠有誅

之不可勝誅者。若不導以湔洗之路。蚩蚩者祇畏罹罪名。猶復深藏銅鐵。隱匿經卷。不行首報。是仍不能化其汙俗。咸與維新。實堪憐憫。莫若依照湖北現辦之案。明白出示曉諭。凡向來習教之家。如真心悔悟。將經卷及一應邪書到官投繳。出具改悔甘結。州縣官將所繳經卷申詳督撫。驗明銷燬。即將投悔之人奏明免其治罪。現在湖北業已辦有成案。奏到之日。朕必照湖北一例施恩。允准如此。則地方少一莠民。即多一良民。禍福在一心轉移。須加猛省。切勿沈迷。皆吾赤子。豈忍不救。較之逐處搜查。豈不事半功倍乎。至緝拏之祝現等。皆係謀逆重犯。罪在不赦。所以嚴拏務獲者。係拏從逆之人。非拏習教之人。該四省民人內。如有向來習教。曾經富藏祝現等犯。並知其現在隱匿處所者。一經到官出首。俾要犯就獲。可見其人必係真心改悔。方肯將同教逆犯據實首報。審明之日。不但免

其治罪。仍必優加恩賞。以示獎勵。其軍民人等如能拏獲要犯。則其功甚大。朕必照節降諭旨。從重施恩。該督撫等務各通飭所屬。盡心化導。廣為宣諭。俾比里周知。革面革心。勉為良善。庶邪俗日漸改移。而要犯亦可從此就獲矣。將此各諭令知之。○庚戌

上詣

南郊齋宮齋宿。○辛亥。祈穀於

上帝。

上親詣行禮。○

世祖章皇帝忌辰。遣官祭

孝陵。○諭內閣。先福等奏。軍營出力之藍翎馬兵。現據自首係配軍脫逃。懇恩曲宥。留營効力一摺。牛化麟以軍犯在配潛逃。原有應得之罪。念其投効軍營。身受多傷。殺賊立功。著有微勞。現又係自行呈首。著加恩免其前罪。仍准以藍翎馬兵留營効力。將來如有格外出力之處。方准拔補。不必定以三年。其楊遇

春自請察議之處。著加恩寬免。○壬子。享

太廟。命

皇次子智親王。恭代行禮。○

上詣

大高殿行禮。○幸圓明園。○詣

安佑宮行禮。○遣官祭

太歲之神。○癸丑。諭內閣。

壇

廟祀典重大。執事各員。應倍矢恪恭。期無愆忒。

本月初八日。孟春時享。

太廟。讀祝官桂芬。將二十二年誤讀為二十一年。有失敬謹。應交刑部治罪。該堂官等僅奏請將桂芬嚴加議處。並自請議處。甚屬非是。桂芬著即革職。發往伊犁。以示懲儆。舒寧色克精額。俱係贊禮郎出身。桂芬讀祝錯誤。皆由伊等平日教習疏懈所致。伊二人均著交部嚴加議處。成寧管理太常寺。甫經數日。著交部議處。至該衙門漢堂官。如儀文禮器有

舛誤之處。自應一併交議。今讀祝係屬清語。漢人不能諳悉。韓鼎晉楊懌曾俱著免其議處。○諭軍機大臣等。松筠奏。邳州沿途窮民。懇請撫卹。詢據知州丁觀堂稟稱。前奉諭旨。令督撫查明災區情形。恭候新正加恩。當將邳州被災較廣。小民謀食維艱。來春必須酌給口糧。於十一月內通詳。嗣奉行知賞給口糧。僅止沛縣。不知巡撫何以具奏時。未將邳州情形聲敘。又面詢徐州府知府王澤據稱。銅山。蕭縣。豐縣。俱會一律詳請賞給口糧。各等語。上年江蘇徐州府各屬被水成災。曾經降旨。令該督撫查明如有應須接濟之處。據實覆奏。候旨加恩。嗣據孫玉庭。胡克家會奏。據江寧布政使李堯棟查明實在情形。詳請分別酌辦。查淮安。揚州。徐州。海州。四府州屬被淹地方。俱係勘不成災。業經奉旨緩徵。各屬被水田地。已漸涸復。補種二麥。冬雪頻霑。糧價平減。毋須再行接濟。惟沛縣東北一帶。

各鄉被水較重。涸復稍遲。麥田未能種齊。請賞加一月口糧。是以新正降旨。祇將沛縣一縣加恩。茲據松筠奏。邳州窮民攔路呼號。懇請撫卹。並銅山等縣均須賞給口糧。著松筠。孫玉庭。動用不拘。是何款項。先行妥為撫卹。一面會同確查。如邳州。銅山等縣災地情形。與沛縣實屬相等。應行賞給口糧。以資接濟。迅速由驛奏明。撫卹勿使窮黎失所。其邳州。銅山等處。既據該府州縣詳請撫卹。何以胡克家未經奏請加恩。是否藩司李堯棟遺漏具詳。胡克家被其朦混。抑係該府州並未通詳。在松筠前飾詞捏稟。並著秉公查明。如有草率朦混情弊。即行據實由驛嚴叅。松筠查辦事竣。再行來京復命。不可草草了事。將此諭令知之。○甲寅。上御山高水長。賜王公大臣。蒙古王貝勒貝子。公額駙台吉。及外藩使臣等宴。並賞賚有差。○諭內閣。國家一日二日萬幾。朕辦理庶務。

惟日孜孜內外章奏無不隨時批荅從不稍存避忌其誼吉舉行者皆事關典禮即古人外事剛日內事柔日之義非尋常事件所當比例也乃直省各督撫奏事於拜摺時先擇吉日又豫擇吉日囑令差弁於到京後屆期呈遞是以近日遇開破之期竟全無奏摺遇成開之日數省之摺彙齊呈遞朕檢閱時憲書其日必係良辰甚屬可笑可鄙即在京各部院引見奏事亦往往選擇吉日均屬陋習

著通諭內外各衙門嗣後遇有應辦之事務各迅速辦理一經辦竣立即具奏毋得仍前拘忌選擇良辰致有叢脞用副朕勤求治理至意○又諭上年曾經降旨俟百齡靈柩到京准其入城治喪並著軍機大臣屆時奏聞派皇子至伊家賜奠昨據松筠奏徐州府屬邳州窮民攔路呼號懇請撫卹事聞民瘼前此百齡在任時未能查辦周詳使其尚在必當治以應得之罪今已身故姑免追究百齡

靈柩到京時毋庸奏派皇子賜奠仍准其入城治喪○又諭近來各省軍流徒犯在配脫逃者甚多此等人犯發往該處原欲令充當磨折差使地方官自應嚴行管束勿任潛逃乃各州縣於犯人到配後一經安插即聽其出入自如漫無稽察以致該犯等肆意脫逃甚至有逃後赴京妄遞呈稟者非為報復洩忿即係聞知近日緝拏要犯希冀充作眼目邀功免罪皆由外省因循疏懈所致著各督

撫通飭地方官凡遇軍流徒犯到配務須嚴加管束時刻稽察勿令乘間逃逸並著吏部將地方官失察軍流徒犯到配脫逃處分查明舊例酌量加等妥議具奏尋奏遵查舊例各條擬定加等議處從之○丙辰諭內閣內務府奏據直隸咨報玉田縣錢糧莊頭宋禮等十一名承種地畝二十年分收成歉薄計被災四分查據戶部覆稱二十年分直隸因災蠲緩民地之各州縣內並無玉田縣歉收

分數其莊頭等應交二十年分錢糧銀一千四百九十餘兩。已於上年十二月內全數交庫。顯係申報不實。請交直隸總督派員確查辦理等語。玉田縣宋檀等十一名承種地畝。與民地同隸一縣。何以豐歉不符。情弊顯然。著方受疇即派明幹之員前赴該縣確切查勘。據實叅奏。並查訪該莊頭等何人賄囑該縣書吏。朦混申報。質訊明確。一併按律治罪。

○戊午

上御奉三無私殿。賜皇子皇孫親藩等宴。○御山高水長。賜王公大臣蒙古王貝勒貝子公額駙台吉及外藩使臣等食。至庚申皆如之。

○己未

上詣

安佑宮行禮。○御正大光明殿。賜朝正外藩等宴。作樂賜酒。如除夕儀。○庚申

上御正大光明殿。賜大學士尚書等宴。○諭內閣。昨日正黃旗三等侍衛達靈阿。醉後欲進

西南門。維時尚早。經管門護軍統領格布舍率領章京等攔阻。該員逞醉狂罵。並將管門章京衣服扭破。已降旨將達靈阿革去侍衛交刑部治罪矣。朕聞各處直班官兵。竟有挈酒至直班處酣飲者。殊非敬慎之道。著交該管大臣等留心稽查。如有似此者。務須從重叅處。其御前侍衛乾清門侍衛等俱在內廷直班。尤不應飲酒。嗣後著御前大臣等嚴查。儻有飲酒之員。即行叅奏。加等治罪。斷不可

因循姑息。此旨著內外直班處各錄一道。張貼俾各員觸目警心。永遠遵行。○辛酉。諭內閣。陳預奏。鹽運司福珠隆阿。歷俸已滿六年。由吏部調取引見。該運司自上年八月到任。現在清釐積欠。未便遽易生手。請緩給咨。俟整飭鹽務。諸有頭緒。再行出具考語。送部引見等語。該撫摺內並未聲明展限年月。殊屬含混。但福珠隆阿係由補授。荆宜施道之日。起算。方滿六年。該員於上年八月已升任運

司何以仍接前俸計算著吏部查明舊例另行詳議嗣後升任之員有前俸將滿者應如何於新任內酌展年限再行調取引見之處妥議章程具奏尋議將屆俸滿升任調任人員向例於該員到新任三月後調取引見茲酌議展限請將此項人員俟到新任半年後再行調取引見再查向例同知通判州縣在任曾有別項引見者以後次引見之日起扣滿年限調取引而運使道府直隸州則惟以初次引見奉旨之日起扣定例本未盡一請嗣後改照同知通判州縣之例有曾因別項引見者即以後次引見之日另扣年限再行調取引從之○癸亥

上御山高水長賜王公大臣蒙古王貝勒貝子公額駙台吉及外藩使臣等食○甲子

上幸萬壽山○乙丑免雲南銅廠民欠無著工本銀○丙寅諭內閣御史周鳴鑾奏河隄歲修工程請旨覈實辦理一摺黃河連年順軌

現在清口一帶清水高於黃水數尺河底刷深海口益形通暢所有上游隄岸各工應倍加慎重未雨綢繆實力保護以期永慶安瀾著該河督等督率廳汛員弁於歲修工程務各培築堅實不可草率偷減所辦料礮隨時嚴密稽查如有虛浮即行叅辦其應修各工確實勘估造報該部按冊詳查勿任弊端○又諭御史周鳴鑾奏嚴防監獄以杜刁健一摺刑部為刑名總匯之地監獄理宜嚴肅凡有未經定案之犯有訟師假託犯人親屬進監探視教供以致案情多有翻易人證反受拖累不可不豫為防範其外省監獄亦當一律整飭應如何嚴申例禁加意慎密及滿漢提牢廳輪流住宿之處著交刑部妥議章程具奏尋議向例未經畫供定案人犯親屬人等一概不准進監探視其已經結案者許親屬每月探視二次誠恐奸徒冒稱已結案犯親屬入監向現審案犯教供應請申明舊例

除未結案者仍不准親屬探視外其已結各案如有親屬進監亦令定立號簿將其犯某親逐一詳訊登記並令嗣後滿漢提牢司員每日輪流一人在外廳直宿嚴行查察如有捏稱犯屬入監舞弊情事一經察覺嚴拏究辦至直省司府州縣監獄亦應令各督撫申明例禁並登記號簿詳密稽察從之○又諭御史王松年奏各省春借籽種口糧及蠲緩錢糧請嚴禁吏胥短放浮收并壓攤騰黃一摺直省偶遇水旱偏災奏到之日朕無不立沛恩施復恐青黃不接之時民力拮据先期降旨詢問各督撫據實覆奏新正加恩或酌借籽糧或予以緩徵該督撫自宜仰體朕恩實力奉行今該御史奏各州縣每遇出借籽種口糧胥役押令里甲短數支領所領之糧並不實散民間先以貴價售賣折色給領迨交納時又復令加津貼至蠲緩恩旨到時並不立時騰黃曉諭壓攤多日希冀民間完納

以徵作欠此等弊竇實難保其必無自應嚴行查禁該督撫職司民牧如遇事關民瘼務當盡心經理以期實惠及民不得任聽吏胥延擱侵漁致滋弊竇○諭軍機大臣等陳預奏藩司和舜武稟稱嶧縣陰平集有無業貧民一二十人攔輿求食馬蘭屯地方有十數人遞呈求借倉穀又郟城縣民管聖修等赴邳州具呈請一律撫卹經松筠將原呈十餘紙先後函寄現飭藩司先赴郟城查辦等語東省上年章邱等州縣衛被水歉收降旨分別蠲緩其時郟城縣長城保等二百八十七村莊俱在緩徵之例本年新正加恩豫飭該撫查明各災區將應否接濟情形具奏嗣據該撫覆奏將嶧縣等七縣本年上忙新賦再請緩徵俱照所請施恩此內郟城一縣未經再行列入必係遺漏茲該縣因與江南邳州接壤本處窮民見邳州現辦賑卹紛紛具呈祈請該撫不可稍存諱飾著即飭知和舜武

到彼確實察看。如果窮民口食維艱。即據實詳明奏請撫卹。並將各窮民妥為安頓。勿令聚集滋事。即日南漕將入東境。沿河無業貧民有可營趁謀食之處。並廣為籌畫。毋令失所。將此諭令知之。○丁卯。

孝聖憲皇后忌辰遣官祭

泰東陵

上詣

恩慕寺

恩佑寺行禮。○戊辰。諭內閣。據松筠等奏。撫卹邳州貧民。並查明銅山等縣。衛均須一體接濟。一摺。邳州地方濱臨河湖。因上冬雨雪交加。低窪處所積水難消。與銅山宿遷豐縣蕭縣及徐州衛被水農民均須接濟。因該府州縣衛詳報遲延。以致該撫陳奏後時。現在松筠孫玉庭在彼會同撫卹。胡克家並已馳往查辦。除邳州貧民業經該省分別捐賞錢文。銅蕭等縣衛該管道府分廠粥賑外。所有邳

州銅山蕭縣豐縣宿遷及徐州衛被水農民均著加恩賞給一月口糧。該督撫務督率地方官嚴實散放。以期實惠及民。其詳報遲延之府州縣衛各職名著查明咨部議處。胡克家前此僅將該府縣等嚴行申飭。並未奏著交部察議。○又諭。昨據御前大臣綿恩等口奏。代巴彥濟爾噶勒請假五日。索特納木多布齋請假五箇月等語。巴彥濟爾噶勒係殯葬伊父請假五日為日無多。御前大臣等

尚可代奏。索特納木多布齋係回游牧殯葬伯母請假五箇月為日過多。著交理藩院計其程途。應給假幾箇月。覈議具奏。請旨。再令索特納木多布齋起程。嗣後凡御前乾清門行走之蒙古王公等。其在京請假數日者。著御前大臣代為具奏。其請假回游牧俱報理藩院。由該院計其游牧遠近往返行程。及至游牧辦事日期。共應給假幾箇月。並將伊等請假幾箇月之處一併聲明具奏。請旨。○己

已諭內閣前據御史熊瑋奏訪聞山西平陽府通判龔文淵係原任知縣張五典管門家人龔有爵之子經銜齡查明並無確據奏請將龔文淵解任解京質訊當派軍機大臣傳提張五典之壻原任按察司經歷吳裕信並飭調張五典之子現任大名縣知縣張菊遂加詳訊會稱張五典署內並無龔姓家人龔有爵曾賣古玩與張五典張菊俱認識往還平等稱謂張菊並曾為龔文淵授讀龔有爵

現已訊明實非張五典家人伊子龔文淵無庸解任解京張菊即令回任供職熊瑋風聞不實著無庸議○庚午朝鮮國王李瑔遣使表賀

萬壽冬至元旦三大節及歲貢方物賞賚筵宴如例○琉球國中山王尚灝遣使表貢方物賞賚筵宴如例○辛未

上詣

大高殿行禮○還宮○壬申以舉行仲春經筵

遣官告祭

奉先殿

傳心殿

上御文華殿經筵直講官果齊斯歡戴均元進講孟子我亦欲正人心講畢

上宣御論曰古先聖王以道德仁義維持世道惟恐人心失於正教流於邪僻而不自覺其害非淺鮮也孟子當周之末世諸侯爭衡大夫放侈加之以楊墨之道不息孔子之道不

著邪說誣民充塞仁義故欲正人心以承三聖孟子聖人之徒尚如此亟欲挽回正教況君臨天下養育蒼生何忍坐視愚民從流下而忘返不思拯救乎夫人之一身以心為主天君泰然百體從令心正於內行正於外內外交養本末相資正己正人皆歸正道世治民安庶幾可望矣若不正本清源徒以嚴刑峻法繩治加以貪官汙吏從而剝削顛倒是非妄緝株連是驅之日就邪路陷溺沈迷終

不能歸於正道。甚至以邪為正。為害益鉅矣。三代去古不遠。尚有楊墨之徒。後世人心持正者鮮。可不強勉養正之聖功。以希成己成物之善政哉。孟子法言。宜自勵也。直講官秀寧汪廷珍進講。易經理財正辭。禁民為非曰義。講畢。

上宣御論曰。聖人守位曰仁。體天地好生之大德也。天生蒸民。若有恒性。全賴人君以養之。何以聚人曰財。養之之道必宜理也。崇本業。

祛浮靡。躬行節儉。懷保惠鮮。遇豐年務使家有餘糧。逢歉歲則宜力籌接濟。從欲以治。胞與為懷。同甘共苦。藏富於民。理財之道備矣。繼以文辭教之。昌明先聖王之法言懿行。辨上下。定民志。正五倫。宗正學。先養後教之誠盡矣。教養既備。宜循正道而行。然良莠不齊。或體質愚昧。或迫於飢寒。為非肆橫。則不能不申法令。明刑罰。以禁之。不得已之苦心。仍應存哀矜。勿喜之念也。理財先養也。正辭禁。

非後教也。必皆裁之於義焉。蓋合於義則財賦平均。家給人足。文辭宣達。格其非心。明刑弼教。毫無枉曲。聖人之功業垂裕無窮。與天地之大德侔矣。君與臣民一心貫注。則治離心離德。則亂。己所不欲。勿施於人。言似淺而意深。稽諸往代。事蹟昭然。孔子述大易之精義。誠萬古之至德要道也。禮成。

上幸文淵閣。賜講官及聽講諸臣茶。復賜宴於本仁殿。諭內閣朕恭閱。

聖祖仁皇帝實錄。內載康熙四十七年八月。諭諸大臣曰。近日聞諸阿哥常撻辱諸大臣侍衛。又每尋釁端。加苦毒於諸王貝勒等。諸阿哥現今俱未受封爵。即受封後。除伊屬下人外。凡有罪過。亦當奏聞。候朕處分。伊等何得恣意妄行。撻撻乎。朕為天下元后。凡事但遵大義而行。無罪之人。未嘗枉法處治。國家惟有一主。諸阿哥擅辱大小官員。傷國家大體。此風斷不可長。嗣後諸阿哥如仍不改前轍。

許被撻之人面詰其見撻之故稍有冤抑。即赴朕前叩告。朕且欣然聽理。斷不罪其人也。至於爾等有所見聞。亦應據實上陳。若一切隱諱。後來漸至殺人。亦將隱而不奏乎。爾等隱而不奏。即爾等之罪矣。等因。欽此。仰見聖訓煌煌。端本養正之至意。現今皇子等恪遵綱紀。實無敢有逞性作威之事。但諭教之道。不可不先。

聖祖詒謀洵為萬年法守。皇子等皆當聰聽。

彝訓。知所鑒戒。凡左右隨從之人。如諧達哈。哈珠色太監等。遇有過失。據實奏明。候朕處治。不可任性妄行。有乖禮則。再朕聞近日上書房四阿哥奕緯。阿哥均係按日授經。二阿哥三阿哥不立課程。二阿哥尚閒日撰作詩文。三阿哥則經年累月。詩文俱置不作。朕在潛時。未有一日不作詩文。今雖日理萬幾。於政事之暇。尚時時游藝。不肯稍有暇逸。御製詩文。日月編排。卷帙繁富。阿哥等日在書房。並

無他事。又無旗務管理。若僅卯入申出。不肯留心問學。豈不竟成佚曠夫人之心志。不專於此。必移於彼。豈可別有所好。關繫甚鉅。奚若游藝詩文。發抒經史。可以陶冶性情。增長智識。且日有常課。亦以收其放心。其獲益實非淺鮮。嗣後二阿哥三阿哥。每日俱應作詩。閒三五日。必作文一篇。不可閒斷。使業精於勤。勿荒於嬉。以收遜志時敏之效。著將此旨抄錄一通。交上書房存記。俾皇子皇孫等觸

目警心。永遠欽承。○癸酉。

孝儀純皇后忌辰。遣官祭。

裕陵。○諭內閣。嗣後凡遇朕由圓明園進宮至大高殿拈香。著派侍衛四員率領親軍數名。在大高殿西面小心查管。如有向前奔馳跟役馬匹。即行禁阻。俟朕還宮後。方准放行。如遇進地安門由西路行走。進神武門。其西柵欄外。亦著派侍衛四員率領親軍等一體小心查管。○諭軍機大臣等。陳預奏。拏獲得受偽封。

逆犯曹興泗審明按律辦理一摺。曹興泗從逆得受偽封。在逃日久。經該撫委員越境拏獲。審明正法。緝捕尚屬認真。但該犯僅係助逆。從犯與祝現等有名要犯不同。不能因此即將陳預加恩。近日朕聞祝現確在山東曹州一帶窩藏。陳預務上緊認真訪緝。儘能將祝現或劉第五等犯拏獲。審明實係正犯。布告中外。使人心大快。彼時不但開復該撫二品頂帶。仍當立沛重恩。該撫不可不勉之。又

奏為

奏

勉也。至曹興泗供出劉允中一犯。亦係賊中大頭目。雖據供稱逃往南去。安知此時不又逃回。該撫務飭屬嚴緝。以冀速獲。通判王家瑞訪獲逆犯。著交部議敘。眼線劉化文著賞給外委銜。如情願入伍。即令入伍當差。將此諭令知之。○又諭。萬年奏長蘆商人因天津海口添設水師營汛。呈請捐銀二十萬兩。以十七萬兩為建蓋衙署等項之需。以三萬兩發商生息。為每年增給俸餉等項之用。所捐

銀兩於運庫徵存。加價項下先行借撥。俟該商等前次所捐山東生息本銀四十萬兩照限完交之後。接續起限。分五年完交。歸款等語。天津添設水師經費。本無須商力捐辦。今伊等請捐之項。仍係借用庫銀。又懇俟前次捐款扣完之後。再行起限交納。拖延年限。徒有捐輸之名。毫無實濟。所有此次請捐銀兩。概不賞收。其添設水師經費。著方受疇會同萬年覈實估計。即於運庫徵存加價項下酌

奏為

奏

撥銀二十萬兩以內。以為建蓋官署兵房礮臺戰船等項。及發商生息。每年增給俸餉馬乾之用。該督等務摺節覈計。奏明辦理。將此傳諭知之。○是月直隸總督方受疇奏出示曉諭民人。凡向習邪教者。真心改悔。准其投首免罪。並設法嚴緝祝現等。得旨。呈出邪書。方准免罪。口說難信。仍應治罪。從逆之徒。斷不姑恕。勿涉疲玩。免之。○山西巡撫銜齡奏出示曉諭習教民人。准其投首免罪。並訪拏

祝現等得旨。汝不可因有此旨。又起因循疲玩。將就了事。無羞無恥之念。仍須嚴密查訪。實力緝拏。以期速獲逆犯。汝若妄行招致。有意彌縫。立刻將汝革職拏問。慎之。上元夜寅正特諭。○河南巡撫文寧奏報到任日期。得旨。實心辦事。執中而行。切勿忘刻寬而有制勉之。

大清仁宗受天興運數化綏猷崇文經武孝恭勤儉端敏英哲睿皇帝實錄卷之三百二十六

三〇八

大清仁宗受天興運數化綏猷崇文經武孝恭勤儉端敏英哲睿皇帝實錄卷之三百二十七

監修職官等逐日議起居注官太子太傅武英殿大學士文淵閣領閣事稽察欽奉
上諭事件處管理工部事務翰林院掌院學士隨帶習經

屏常駕馭平曹振鏞明職官太子太保又調閩太學士管理刑部事務加五級臣戴均元禮部司議起居官太子太保內大臣又調閩提舉閩茶務

黎欽奉
子爵事件處協辦大學士戶部尚書翰林院掌院學士教習處書學總管內務府人參漢黃旗滿洲都統步軍統領管理戶部廣

奉依託清國等處總理工程處御茶膳房御藥房太醫院西洋堂事務軍功加三級總帶加二級尋常加三級紀錄二次臣等謹議

太子太保禮部尚書上書房行充武英殿經載管理國子監事務加六級隨帶加二級紀錄四等王廷珍等奏

較修

嘉慶二十二年丁丑二月乙亥朔

上以祭

社稷壇自是日始齋戒三日○丙子諭軍機大臣等文寧奏遵旨飭屬化導教匪勉為良善一摺習教匪徒顯背正教自蹈邪僻本係律應治罪之人前經降旨准令自首到官免其治罪者原因其真心改悔雖暫時迷惑於前即能翻然悔悟於後是以特從寬宥俾為良民該撫但當轉飭地方官出示曉諭俾眾咸知聽其自行投首斷不可妄行招致如有執

迷不悟者一經發覺法令具在禍福惟其自取若不論其是否真心一例勸諭則此時雖勉強順從具結出教冀免查拏日久又必故智復萌是革面而不革心於前旨化莠為良之意仍屬誤會設如祝現等各逆犯詭託姓名自行投首亦一體給予執照編入良民冊籍更復成何事體該撫仍當分別辦理其實係愚民被惑此時真心改悔將家中舊存邪經圖像等件呈首到官者驗明當堂銷燬免

其治罪列為良民仍督飭所屬嚴拏祝現等各逸犯認真查察勿令真偽混淆致涉疏懈將此諭令知之○旌表守正捐軀河南鄧州民孫廣平妻楊氏○丁丑祭

先師孔子

上親詣行禮○詣

雍和宮行禮○遣官祭

文昌帝君廟○戊寅祭

大社

大稷

上親詣行禮○春分朝

日於東郊遣皇三子綿愷行禮○幸圓明園○己卯諭內閣御史謝崧奏河漕員弁議敘太多請覈實辦理又地方候補不由河工出身人員請停止改補河工二摺所奏俱是河工設立文武員弁保護安瀾是其專職其沿河各員於漕運過境催趲迅速亦係分內之事近來河漕保舉出力人員本屬過多並有捐

升降革兩項人員既非現在河工亦一體保列奏留本省及捐復原官實為冒濫至地方人員與河工本各有職守此時河工人員儘數差委又何庸於地方人員內紛紛撥用不過為該員等補缺升遷地步亦屬取巧嗣後該督撫及河督漕督等於每歲防工催漕人員均不得率行保列如遇有特旨飭令保奏准將尤為出力人員覈實保舉勿許濫及多人若未經奉旨率行保奏者或將捐升降革

人員奏留本省。及捐復原官者。除不准行外。仍將該督撫河督漕督等交部議處。以杜奔競而肅官方。○又諭慶保奏西隆州知州一缺。請以隆安縣知縣多福升補。並聲明該員參罰係在十案以外等語。向來各督撫遇升調人員有參罰案件者。皆開列參罰清單附奏。朕披覽時。可以察其案情之輕重。以定准否。今該撫摺內。祇稱該縣多福參罰在十案以外。並不開列清單。辦理實屬草率。除交吏

部議奏外。慶保著傳旨申飭。○庚辰。遣官祭黑龍潭。

昭靈沛澤龍王之神。玉泉山。

惠濟慈佑靈濩龍王之神。昆明湖。

安佑普濟沛澤廣生龍王之神。密雲縣白龍潭。

昭靈廣濟龍王之神。○諭內閣。英和等奏南營汛地南橫街地方舉人劉經祕家被盜。將專汛都司及叅將遊擊等叅奏交部議處。一

摺。此案盜犯執持器械。嚇禁事主。強劫銀物。近在輦轂之下。實屬目無法紀。著步軍統領衙門五城一體嚴拏。務獲。按律懲辦。至向例京城地方盜案。三月無獲。始行題叅。未免過寬。嗣後京城外七門以內。尋常竊盜案件。三月限滿。題叅。如有執械嚇禁強劫之案。二月無獲。即行題叅。其九門以內。尋常竊盜案件。二月題叅。強劫之案。一月無獲。即行題叅。著為令。○辛巳。

孝淑皇后忌辰。遣官祭。

陵寢。○諭內閣。巡視北城御史德莊等叅奏疏防盜案坊官一摺。此案盜犯持械入室。嚇禁事主。強劫銀物。膽敢於輦轂之下。肆行無忌。該管文武員弁。非尋常疏防可比。北城吏目梁習敏著即革去頂帶。專汛營弁著步軍統領衙門查明。亦即革去頂帶。均勒令上緊緝拏。獲犯之日。奏明開復頂帶。如限滿無獲。即行叅處。嗣後京城九門以內。及外城七門以

內有似此強劫之案。該坊汛員弁俱先行革去頂帶。勒限嚴緝。○旌表守正捐軀江蘇江都縣民婦杭翁氏。逼嫁捐軀湖北漢陽縣民周海燕妻黃氏。○壬午。諭內閣。和寧等奏。查明西寧縣私運倉糧。並捏報採買大概情形。一摺。此案河州知州前任西寧縣知縣沈仁澍。與已革西寧縣知縣楊毓錦。交代轉轄不清。沈仁澍離任三年之久。忽遣家人董幅赴西寧縣。私自開倉搬運豌豆二千九百餘石。實屬膽大妄為。沈仁澍著革職。拏問。楊毓錦任聽沈仁澍遣人私搬豆石。且該縣倉儲現在查明實貯糧九萬八千餘石。應撥兵糧。不過八千一十餘石。儘數支放。乃隱匿糧款。另估採買。楊毓錦前已革職。拏問。著和寧帥承瀛。提集該革員等。並沈仁澍家人董幅。及倉書人等。秉公嚴審確情。按律定擬具奏。西寧道龍萬育。知府錦明。近在同城。並不據實稟揭。難免扶同徇隱情弊。俱著解任歸案質訊。

先福於陳啟文稟揭楊毓錦隱匿倉糧不行查究。沈仁澍侵冒銀糧。龍萬育徇隱不辦。亦不據實嚴叅。實屬有心徇庇。先福著先行革去頂帶。交部嚴加議處。即在蘭州聽候部議。所有陝甘總督印務。著和寧署理。○癸未。諭內閣。汪志伊等奏。提審改教知縣朱履中。稟揭原管道府得受陋規一案。解任藩司李賡芸。自縊懷有親筆紙片。不肯認誣等語。此案前交汪志伊。王紹蘭審辦。李賡芸係解任之員。該督撫並未派員看管。以致自縊。如李賡芸實無得受陋規之事。朱履中肆意誣評。該藩司豈非含冤畢命。儻實有其事。則係畏罪自盡。藉免國法。汪志伊。王紹蘭辦理疏忽。咎實難辭。俱著交部議處。現已派熙昌等前往該省。秉公審辦。所有案內人證。汪志伊。王紹蘭。均毋庸覆審。著將已革改教知縣朱履中。先行拏問。解任漳州府知府畢所譜。先行革職。及李賡芸家人黃升。並案內應訊緊要人

證俱嚴行鎖押分別監禁派員嚴密看管聽候欽差審辦儻再有疏虞定將該督撫治罪不貸○戶部議駁吉林將軍富俊奏吉林各屬民戶滋生人丁請照阿勒楚喀拉林之例一律徵丁數與定例不符應毋庸議得旨部駁甚是各直省續生人丁康熙年間奉有永不加賦

恩旨所當永遠遵行其阿勒楚喀拉林二處係專為編查流民而設豈得援以為例將吉林

閭屬一律徵丁富俊不知政體著傳旨申飭所有該將軍奏請將吉林寧古塔伯都訥三姓等處滋生人丁起科加賦之處著毋庸議○命吏部左侍郎熙昌都察院左副都御史王引之馳往福建審案○以伊犁將軍長齡為陝甘總督調盛京將軍晉昌為伊犁將軍吉林將軍富俊為盛京將軍以理藩院左侍郎西寧辦事大臣松寧為吉林將軍浙江衢州鎮總兵官納爾松阿為西寧辦事大臣○

以廣東按察使明山為福建布政使直隸清河道韓文綺為廣東按察使○旌表守正被戕四川閬中縣民侯益妻魏氏○甲申上幸靜明園詣

龍神廟拈香遣官祭

先醫之神諭內閣陳預奏查勘嶧滕邳城三縣貧民情形懇恩賞給口糧一摺東省上年被水各州縣前陳預奏請新正加恩摺內未將邳城列入降旨飭查據陳預查明該府

縣因邳城上年秋收五分有餘並未成災但現在該縣及嶧滕二縣多有乞食貧民雖已出借倉穀散施錢粥時距麥收尚遠仍需量為接濟著加恩將上年被水之嶧縣侯孟社劉家村等二百十三莊滕縣黃家橋等六十四莊邳城縣長城保等二百八十七莊無力貧民俱賞給一月口糧照例折給該撫即騰黃通行曉諭遵員妥速散放俾窮黎均沾實惠其邳城縣被水村莊本年上忙新賦緩至

麥收後啟徵陳預和舜武未能先事確查俱著交部議處其遺漏詳請之府縣著該撫查明即行叅奏尋議上得旨此案陳預等將上年被水之郟城縣遺漏請旨加恩撫卹情近匿災本應照部議降調姑念一時簡用乏人陳預著改為降二級留任和舜武職任藩司先未申詳其咎較重著改為降三級留任以觀後效○以內閣學士常英為理藩院左侍郎○以戶部左侍郎果齊斯歡署吏部左侍郎

郎禮部左侍郎多山署吏部右侍郎○乙酉

孝康章皇后忌辰遣官祭

孝陵○諭內閣方受疇奏錢糧完解九分有餘請免上忙經徵督催各員處分等語直隸二十一年分上忙錢糧三河等州縣未完銀十九萬三千餘兩前降旨令方受疇將徵解不力各州縣及督催不力各道府直隸州職名咨部議處嗣經議定章程各直省上忙錢糧將徵解實數造冊報部毋庸予以處分統歸

入下忙辦理所有直隸上年上忙未完錢糧徵解不力州縣及督催不力之道府廳州俱著免其議處其民欠未完錢糧州縣經徵不力處分統俟奏銷時覈計分數照例叅處○丙戌遣官祭

關帝廟○諭內閣御史譚瑞東奏請仍令左右翼總兵分駐外城一摺嘉慶四年添設左右翼總兵彼時分駐外城一員以資查察嗣駐蹕圓明園該總兵等即輪流在園直班若

再分駐外城勢難更代惟在該步軍統領及總兵等嚴行督飭營汛員弁認真緝捕務令宵小斂跡輦轂之下自可一律肅清豈必移駐外城始能禁暴詰奸乎該御史所奏不可行著無庸議○諭軍機大臣等本日吏部議奏將先福照溺職例革職已依議行矣此案先福於陳啟文稟揭楊毓錦隱匿倉糧不行查究沈仁澍侵冒銀糧龍萬育徇隱不辦亦不據實嚴叅實屬有心徇縱著和寧等密加

查訪先福有無得受該革員等賄賂因而徇情袒庇再先福在陝甘總督任內已將三載其平日聲名若何此案之外有無別項貪婪劣蹟並著留心密訪如查有婪贓實據一面嚴行審訊將伊任所貲財先行查抄一面據實由驛叅奏奏到之日以便派員抄伊在京家產和寧等於定案時再將先福按律擬罪若查無贓款和寧等於本案審結時摺內聲明令先福在蘭州候旨帥承瀛先行來京覆

命和寧署理督篆俟長齡到任交代後再行起程回京可也將此諭令知之○丁亥遣官祭昭忠祠○戊子以故奉恩將軍松廷子歸當阿襲職○協辦大學士刑部尚書章煦以病乞解任賞假調理以兵部尚書吳璥署刑部尚書○緩徵江蘇邳沛二州縣毘連災區地方額賦及未還倉豆○庚寅諭內閣御史蕭鎮奏清釐賦稅以裕國課一摺直隸順天府所屬州縣內沙壓地畝並入官抵帑退差

退耕各地均應招佃報墾乃延擱多年廢置不辦一任奸胥蠹役隱匿欺占間有小民呈請認種輒往返駁查多方勒措以致國課日久虛懸著直隸總督順天府尹即將前項地畝分飭各該地方官趕緊清釐照例招佃報墾如有胥役影射把持情弊立即查明從嚴懲辦以除積蠹而清田賦至酒稅一項應如何稽察以杜包攬偷漏之弊著崇文門監督妥議章程具奏○旌表守正捐軀直隸曲陽

縣民劉占金妻葛氏 辛卯

上幸萬壽山詣

廣潤祠拈香○遣官祭

歷代帝王廟給山東濟寧魚臺二州縣上年被水災民一月口糧並貸籽種有差○壬辰諭內閣御史卿祖培奏請嚴拏竊盜並禁止賭博各一摺弭盜之方全在平日稽查嚴密自然宵小斂戢該御史摺內稱涿州一帶現在禁止夜行該處地當孔道行旅往來豈

可任聽捕務懈弛轉嚴夜禁著直隸總督順天府嚴飭地方官認真緝捕如有兵役包庇窩家隱留情弊立即嚴拏懲辦其徒流充警並著查明定例遵行勿任潛逃再犯以靖奸宄至賭博為盜竊之源久干例禁官員衙署尤當杜絕澆風並著一體申禁有犯必懲勿稍姑息○諭軍機大臣等和寧等奏審明叅革知州沈仁澍侵蝕倉庫銀糧畏罪自盡該管道員龍萬育有派累需索情弊請旨革審並查出沈仁澍侵虧承運倉糧腳價請將督運知府黃方革審各一摺本日早聞先據先福奏到摺內稱革職知州沈仁澍於正月二十八日早出門未刻回寓即氣悶不言喫粥艱臥面色漸次改變子時氣絕沈仁澍常帶小荷包一箇或者藏有毒藥實不知係何毒物何時服毒等語情節甚屬可疑沈仁澍於二十八日早間出門係往何處先福摺內未經聲敘明晰恐有情弊其身帶荷包素無事

故何至藏有毒藥即藏藥在內先福何由得知更非情理沈仁澍是日出門必有跟隨家人著和寧帥承瀛查明提到嚴行審訊沈仁澍二十八日如係在先福署中午飯則是先福因曾得該革員賄賂恐其到案供明致死滅口必有家丁廚役人等串通謀斃如集訊供證確鑿即將先福鎖拏究問審明治罪不可稍存迴護儻訊明沈仁澍是日並未往先福署內亦必有所往之處其在何處中毒或

係先福指使授意必須徹底根究若係未刻回寓喫粥後臉色始行改變則是沈仁澍在本寓服毒其親屬家人必知其遺紙是否親筆務須查審明確不可稍有含混此一節關繫重大切勿草率至沈仁澍前在阜蘭縣任內撥運鎮番糧二萬石業經鎮番縣具報全數撥出而阜蘭縣僅收貯三千石其未運糧一萬七千石並運腳銀三萬一千四百兩均歸無著先福近在同城豈竟全無聞見先福

現已革職著和寧等即傳提到案嚴審並詢問陳啟文伊既稟出沈仁澍銀穀兩空其所領銀兩送與何人如有見聞令其據實指出若係饋送先福亦即將先福拏問嚴審沈仁澍任所貲財著和寧等即行查抄其原籍何省查明迅即咨明該省督撫一併查抄龍萬育黃方均已降旨革職著即歸案嚴行審辦至案內應賠各項銀兩統俟全案審明擬結時一併分晰奏明著落賠繳將此諭令知之

○以故奉恩將軍綿果子奕徵倫蓋子純惠各襲職○賞陝西等省丙子科鄉試年老諸生張玉徽等四名副榜○癸巳清明節

上詣

安佑宮行禮○遣官祭

永陵

福陵

昭陵

昭西陵

孝陵

孝東陵

景陵

泰陵

泰東陵

裕陵○命

皇次子智親王○祭

孝淑皇后陵寢○遣官祭

端慧皇太子園寢○祭

先蠶之神

皇后親詣行禮○諭內閣慶保奏粵西春種無多全賴秋收始能陸續輸將請仍照舊催收錢糧毋庸另改上下兩忙限期等語各省徵收錢糧自戶部奏明截分上下兩忙期限各省均有成效廣西省上年錢糧截至年底亦較前多完五六萬兩即云該省春種無多必待秋收後始能踴躍輸將昨已改定章程將上忙處分寬免統歸下忙覈辦已無格礙難

行之處該撫率請將上下忙限期停止與各省辦理不能盡一勢必相率效尤藉詞延玩慶保所奏不准行仍著傳旨申飭○命青州駐防新設兵丁遇有紅白事件一體賞給恩賞銀兩從副都統八十六請也○乙未諭內閣國家向遇旬慶大典或鑾輅時巡臣工等例得呈獻詞章明年朕巡幸盛京祇謁三陵越歲己卯屆朕週甲旬慶諸臣雍容揄揚合諸天保頌君之義原以達下情而光盛典

但呈進之人應辨以差等其文亦應示以體裁茲特先期通行告諭凡宗室王公內其能文者俱准呈進在內滿漢大臣京堂翰詹科道在外督撫凡由科甲出身者一體照例備進此外概不准呈遞至廢員係罷斥之人尤不應越分妄干儻有違例僥倖者各衙門概不准接收再近來進呈各冊往往貪多務博競為纖巧新奇甚非人臣對揚之體朕於宮中披覽舊時臣工所進冊頁每人或詩數首

或頌賦一章詞旨敦厚體裁亦復正大嗣後諸臣進冊者每人祇進一冊詩文亦各專一體毋許誇多鬪靡華而不實其擇言務求雅正尤當頌不忘規期於政事有裨用副朕返樸還淳釐正文體至意○以候補總兵官沈烜為廣東陽江鎮總兵官○丙申

上御勤政殿聽政○都察院奏和郡王莊頭張守魁妻宋氏以夫死情屈具控得旨此案張宋氏所控伊夫張守魁因族姪張恒爭產構

釁和郡王之子奕亨派令護衛德祿判斷將張守魁板責鎖押致斃張守魁係王府莊頭若因其拖欠糧租責押身故雖干例禁尚屬有因今因伊叔姪爭產與本府毫無干涉輒濫加刑虐致斃人命若非聽受賄囑何至偏袒若此奕亨著解任護衛德祿著革職交宗人府嚴審定擬具奏○以鑲藍旗漢軍副都統英綬為內閣學士兼禮部侍郎銜光祿寺卿甘家斌為大理寺卿○旌表守正捐軀山

東濟陽縣民于景魁妻何氏○丁酉

上幸靜明園詣

龍神廟拈香○戊戌諭內閣富俊奏分賠淺價各員請免扣俸歸入抽收項下抵補一摺吉林應賠駁淺價銀一案原以該員等辦理不善分別著賠該員等無力完交准令按季扣繳一半俸銀抵補已屬格外施恩今該將軍率請免其扣俸歸於淺務抽收項下抵補雖為數無幾但係該員應賠之項自當令其

遞年坐扣以示罰懲若准以官項抵補此外各案扣俸之員甚多似此紛紛續請又將如何辦理富俊所奏不准行其明保等四員應扣俸銀仍著照依原奏按季扣繳○己亥旌表守正被戕山西猗氏縣民婦喬路氏○庚子

孝昭仁皇后忌辰遣官祭

景陵○奉國將軍恒持因病告退以其子文謙襲職○辛丑遣官祭賢良祠○旌表守正捐

軀河南夏邑縣民婦路王氏山西夏縣民蘇滿金妻吳氏○壬寅諭內閣長齡等奏訪獲盜犯致死盜夥審明定擬一摺此案林麥孜孫常甫均係免死盜犯發遣伊犁在配復敢起意強劫又將盜夥致死滅口兇惡已極且在新疆地方該將軍等於審明後自應一面將該二犯正法一面奏聞今仍定擬請旨辦理殊屬軟弱長齡等俱著傳旨申飭所有林麥孜孫常甫二犯俱著即處斬嗣後新疆地

方遇有免死盜犯復行強劫者均照此辦理○大學士松筠等奏審擬永遠枷號斬犯兆昌誣控禁役等拜會勾引匪徒一案得旨兆昌前因匿名誣告胞叔祖興德保等謀逆又牽告伊父剛柱罪案擬斬奏請即行正法從寬改為監候朝審未經勾決嗣在監又兩次誣告常明及刑部司員等遞加板責永遠枷號今復捏造禁役吳應連等拜會勾引匪徒入獄及問官刑逼改供重情用香頭書寫呈

詞誣陷多人。本應照擬即行處斬。姑念此次該犯先因司獄吉椿書寫無名字帖。將伊詈罵。該犯始捏寫呈詞。計圖嚇制。尚非突然起意。兆昌著改為絞立決。至吉椿身係獄官。不能約束監犯。又不回堂辦理。乃私寫無名字帖。詈罵犯人事發。又先行燒燬。糊塗已極。僅予枷杖折圍。尚覺輕縱。吉椿著當堂重責四十板。發往盛京。歸於移住營房內。交該將軍等嚴行管束。餘依議。○旌表守正捐軀吉林

閒散景連妻伊爾根覺羅氏。○癸卯。

上詣

大高殿行禮。○還宮。

大清仁宗受天興運敷化綏猷崇文經武孝恭勤儉端敏英哲睿皇帝實錄卷之三百二十七

實錄卷之三

三

大清仁宗受天興運敷化綏猷崇文經武孝恭勤儉端敏英哲睿皇帝實錄卷之三百二十八

監修總裁官總理大臣府武英殿大學士文淵閣領閣事務稽察欽奉 上諭事件處管理工部事務翰林院掌院學士隨帶

加三級存案四級臣曹振鏞跪奏官太子太保文淵閣大學士管理刑部事務五級臣戴均元跪奏日講起居注官太子太保內大臣文淵閣提舉閣事楊

上諭事件處編纂學士戶部尚書翰林院掌院學士教習庶吉士總管內務府大臣鑲黃旗滿洲都統步軍統領管理戶部三

庫奉宸苑清御園等處總理工程處御茶膳房御藥房太醫院西洋筆事務軍功加三級隨帶心級尋常加三級紀錄三次臣英和謹頌

撰官太子太保禮部尚書上書房行走武英殿總纂管理國子監事務加六級隨帶加二級紀錄四次臣汪廷珍等奉

較修

嘉慶二十二年丁丑三月甲辰朔諭軍機大

臣等閩省應撥天津水師弁兵及船隻礮械現經汪志伊籌辦齊全乘風北上於五月內可以抵津所有直隸應行添建礮臺營汛衙署兵房各事宜何以方受疇至今尚未奏及僕屆期尚未竣工該弁兵到時將何所棲止著方受疇迅速估辦即派嵩年同天津道李于培就近作為監督催令趕緊修造閩省弁兵抵津後其江浙廣東弁兵亦即接續前來務將應辦工程一律督造齊全毋致臨時貽

誤此次春圍嵩年竟不必前來隨扈即在天
津將此事妥速經理可也將此諭令知之○

閩浙總督汪志伊因病解任以廣東巡撫董

教增為閩浙總督調雲南巡撫陳若霽為廣

東巡撫以雲南布政使李堯棟為巡撫廣西

按察使祝慶承為雲南布政使直隸大順廣

道程卓樑為廣西按察使○乙巳

上幸圓明園○丙午旌表守正捐軀河南光山

縣民彭玉昆妻程氏。○丁未。

上幸萬壽山。○諭內閣大挑舉人原以疏通寒
畹。近來各省分發人員漸覺壅滯。昨經大學
士會同吏部酌議章程。量加調劑。朕思南河
東河北河三處河工亦需員差委。若於此項
大挑一等人員內分發試用。俾之學習河務。
以河工之繁簡定人數之多寡。既可策勵人
材。亦可疏通額缺。其應如何酌定員數。並試
用甄別限期。及補用缺分章程。著吏部詳議
具奏。尋議分發南河三十員。東河二十員。北

河十員赴工差委一年期滿甄別擇其諳練河務堪膺民社者咨部註冊以知縣用照地方以原銜借補佐貳之例先行咨署管河佐貳俟經歷三汛後實授遇有沿河調缺知縣缺出准其調補若甄別以佐貳改補者得缺後照現缺升轉不准調還知縣得旨此項大挑一等分發河工人員著定為試用二年經歷六汛後甄別該河督秉公察看其能通曉河務者留於河工照新定章程分別補用如河務不能諳習而才具尚堪膺民社者奏明改撥地方仍以知縣補用其才識迂拘者以教職改補○戊申諭內閣上年大學士會同兵部議奏天津添設水師請將新添水師兵一千名分為左右兩營歸天津鎮總兵統轄該鎮向係專管陸路且每年有催趲漕運差使事務本繁今將水師兩營歸其統轄恐洋面一切巡緝操防未能兼顧著再添設天津水師總兵一員將新設水師營弁兵丁令其

管轄以專責成其應給勅印俸廉及建蓋衙署各事宜著各該衙門迅速具奏照例辦理若因循疲玩定行重治不赦○又諭天津添設水師係上年十一月降旨飭辦之事現在已逾數月所交直隸添建之礮臺營汛衙署兵房尚未據奏明籌辦昨經降旨飭催本日據方受疇奏前經委員分投查勘現尚未據估報實屬因循疲玩方受疇著傳旨申飭現在福建江南兩省應撥船隻礮位已奏明乘南風之便由海程押解來津其廣東浙江亦接續撥送前來為期甚近著派廣惠即刻前赴天津會同嵩年李于培一併作為監督將該處礮臺營汛衙署兵房晝夜趕緊購料興修不准片刻耽延方受疇於朕至南苑日送駕後即行親往查勘籌畫妥協再回省城此項工程總須於五月初各省水師員弁到津以前辦理完竣如有遲誤定將該督及該監督等一併懲處○旌表守正捐軀河南河內

縣民黃小木妻申氏○己酉

上詣

時應宮拈香○還宮○以禮部左侍郎多山太常寺卿韓鼎晉知貢舉大學士曹振鏞吏部尚書戴均元為會試正考官戶部左侍郎姚文田刑部左侍郎秀寧為副考官○以戶部尚書劉鑲之署吏部尚書吏部左侍郎王鼎署戶部左侍郎工部右侍郎誠安署刑部左侍郎○命吏部尚書英和禮部左侍郎汪

廷珍署翰林院掌院學士兼教習庶吉士○庚戌諭內閣萬年奏天津建蓋水師衙署兵房共計二千數百餘間現距立夏節僅止半月趕辦不及若草率從事難期堅固等語天津添建水師衙署兵房各事宜前交方受疇籌辦該督漫不經心數月尚未興工實屬因循疲玩方受疇著交部議處並著該督將派委承辦各員職名查明一併交部議處所有此項工程著即趕緊興辦儻草率從事工不

堅固仍行懲處不貸○吏部奏緣事降革廢員呈請捐復原官分別開單請旨得旨張泰交革職原案係因同鄉劉錦堂到署求助該革員輒起意刑拷逼令誣認逆犯劉第五捏報由山洞捉獲屈陷平民妄冀邀功心術甚為險詐曹天桂身任司獄於絞犯在監逞兇自戕毫無防範又監斃遣犯六命情節亦重張泰交曹天桂俱不准其降捐其餘擬准捐復之扎勒杭阿彭玉龍孫琚蔡任賀樹環李

榮椿張鳴珮擬不准捐復之安興阿俱著依

議行○旌表守正捐軀河南偃師縣民王月妻蕭氏○辛亥

上耕耤詣

先農壇行禮更服至耤田所

躬耕三推復加一推

御觀耕臺命睿親王端恩鄭親王烏爾恭阿怡親王奕勳各五推吏部右侍郎吳芳培戶部左侍郎果齊斯歡禮部右侍郎廉善兵部右

侍郎曹師曾刑部右侍郎成格工部右侍郎陸以莊都察院左副都御史明興阿通政使司通政使張鵬展大理寺卿甘家斌各九推畢順天府府尹率農夫終畝賞資農夫耆老如例○壬子

上啟鑒恭謁

東陵○命莊親王綿課大學士董誥尚書英和成寧留京辦事○免蹕路經過地方本年額賦十分之三○是日駐蹕湯山行宮○癸丑

諭內閣方受疇奏遵限查明奏銷冊內虧空銀款一摺上年直隸奏銷案內各州縣有徵存未解及虧空銀款當經降旨予限三箇月交方受疇督同藩司姚祖同徹底查明分別叅辦茲據該督詳查此案冊報虧短銀二十七萬七千餘兩除前後追提銀七萬三千餘兩外現尚虧銀二十萬四千餘兩此內丁憂降革病故勒休各員仍交該督查明原虧各案分別叅辦監追查產變抵及歸後任分賠

分案奏咨辦理其現任無極縣知縣金偉候

補知縣陳楷何志清王德榮柯映伊傅以納

並改選貴州龍里縣知縣錢鴻誥均著先行

革去頂帶現任者停其升轉候補者停其補

缺數在五千兩以上者限一年完繳一千兩

以上者限半年完繳一千兩以下者限三月

完繳逾限不完分別叅處治罪遵限完繳給

還頂帶照常補缺升轉其查出金偉造報奏

銷冊內多開前任知縣慶善虧欠地糧正耗

銀二千七百七十餘兩該管知府任銜蕙並

不分晰覈對此項銀兩著金偉賠繳七成任

銜蕙賠繳三成以示懲儆金偉統俟此項銀

兩繳足後再行開復頂帶○是日駐蹕三家

店行宮○甲寅

孝賢純皇后忌辰遣官祭

裕陵○旌表守正捐軀安徽績溪縣民戴白琴

妻許氏○是日駐蹕大新莊行宮○乙卯駐

蹕白瀾行宮○丙辰駐蹕隆福寺行宮○丁

已

上恭謁

昭西陵

孝陵

孝東陵

景陵

裕陵俱未至碑亭即降輿慟哭步入

隆恩門詣

寶城前行禮躬奠哀慟王以下文武大臣官員

均隨行禮○諭內閣巡漕給事中孫汶奏知
府兌漕草率被參許稟弁丁有勒索情弊請
旨查辦一摺前據李奕疇參奏常州府知府
卞斌交兌宜興縣漕糧草率請將卞斌交部
議處並勒令分賠茲據該府許稟該幫弁丁
等因裁減浮費不滿其欲刁難勒索不肯受
兌該倉米色本係純潔等語案關漕務積弊
不可不徹底根究著交孫玉庭秉公查辦如
宜興縣所兌漕糧本不純潔該府卞斌草率

交兌被參後又捏稟掩飾則其咎更重即從
嚴參辦儻該弁丁等實因勒索不遂裝點朦
混亦即據實查明嚴懲○是日迴鑾駐蹕桃
花寺行宮○戊午賞直隸扈衛弁兵等銀幣
有差○是日駐蹕盤山行宮至壬戌皆如之
○己未諭內閣戶部將著賠天津海稅盈餘
銀兩逾限未完各員開單具奏此項追賠銀
兩已閱九年尚有未完銀三十六萬九千餘
兩除已完及寬免各員外所有單開全未完
繳並完不足數各員著再格外施恩銀數在
五萬兩以上者予限五年三萬兩以上者予
限三年二萬兩以上者予限二年一萬兩以
上及不及一萬兩者俱予限一年著該旗籍
都統督撫等實力追繳如逾限不完本員尚
在者即參奏監追若本員已故奏明請旨其
准扣廉俸並攤賠歸款者並著查明覈實辦
理儻該旗籍不認真查催均各懲處不貸○
諭軍機大臣等和寧等奏查明已革知州沈

仁澍實因盜賣倉糧侵蝕運腳畏罪自盡並查訪先福並無婪贓款跡各一摺。沈仁澍服毒情由據該親族家人供認實係在寓自服金瘡藥毒發身故。其為畏罪自盡似無疑義。惟沈仁澍既侵蝕運腳銀三萬一千餘兩。復又將撥運糧石賣與武威縣得價銀二萬兩。此五萬餘兩究係作何用項。必須根訊明確。現訊據先福及伊家人供稱並無得受賄賂之事。僅係伊等一面之詞。難以憑信。且據沈

仁澍家人供出先福署內器具鋪墊均伊主人供應。並先福生日曾送禮物收受綢緞大呢。餘俱退回等語。是先福收受屬員禮物供應已有確據。其退回禮物。是否即係銀兩。抑係別項禮物。亦須一一究明。至先福在廿三年。聲名既不滿人意。仍須細加察訪。其沈仁澍撥運鎮番糧石。據先福供稱係高杞任內批准之事。高杞為人聲名平常。尤不足信。著和寧等再逐細訪察。如有婪贓確據。均即據

實叅奏。不可瞻徇。僅查明實無贓款。先福僅止得受供應餽送。即於全案審明時按律定擬具奏可也。將此諭令知之。○又諭伯麟等奏確查臨安邊外夷匪滋事情形。分別招撫堵剿一摺。逆夷高羅衣膽敢自稱窩泥王。並將附從漢奸等偽封官職。裹脅至萬餘人。搶擄江外土司地方。復率眾搶渡窺伺內地。實屬罪大惡極。事關邊境軍情。伯麟此摺僅由三百里具奏。殊屬不曉事體。嗣後奏報皆當

由五百里馳遞。俟辦理完竣。即由六百里馳奏。現在偽封軍師之漢奸章喜業經擒獲。訊明該逆等犯事緣由。伯麟雙林等已調派本省官兵及廣南土練定期進剿。此事務須一鼓撲滅。不可因循疲玩。如現調兵力尚有不敷。貴州官兵素稱趨健。該督即行添調。或一千名。或五百名。迅速來滇。選派曾經出師打仗奮勇將弁帶領。迅即進剿。此時賊眾初集。兵貴神速。趁此烟瘴未起之時。立即擒渠掃

穴不可靳惜小費。遷延時日。若辦理遲緩。一至暑熱瘴生。官兵即須撤退。使賊得以乘暇裹脅。秋冬再舉。則勞費更重。伯麟等務勉力辦理。將首逆高羅衣及逆姪高借沙等。剋期擒獲。凌遲處死。其餘烏合之衆。自必即時瓦解。其章喜一犯。暫行牢固監禁。俟首逆就擒。實訊明確。一併凌遲。以伸國法。而靖人心。將此諭令知之。○調福建漳州鎮總兵官許松年為直隸天津鎮總兵官。以前任廣東陽江鎮總兵官馬建紀為漳州鎮總兵官。○庚申。賜扈從王公大臣等食。並賞賚有差。○壬戌。禮部以宗室會試中額請得旨。取中三名。○旌表守正捐軀江蘇高郵州民徐思義妻吳氏。○癸亥。諭內閣。前經降旨。以向遇旬慶大典。或鑾輅時巡。臣工等呈獻詞章。並未辨以差等。定以體裁。特諭令宗室王公之能文者。及大學士科甲出身之滿漢大臣。京堂翰詹科道督撫。方准備進。其冊或詩或文。體裁務

取正大。勿許誇多競巧。凡不應呈遞之人。不准越分妄干。本日朕在白澗行宮。見有五旬萬壽時。江蘇附生蔣繼照所進冊頁。其文係集易經成語。體既纖巧。且雜湊成文。於時事一無關合。生員既非應行獻冊之人。而所作又毫無足取。似此生心僥倖。大非士習所宜。著再通行申諭。明年戊寅。朕巡幸盛京。己卯。朕周甲旬慶。其非例應呈進冊頁之人。概不准呈進。各衙門亦不准接收。毋庸豫期撰擬。作為無益妄希恩澤也。○是日。駐蹕白澗行宮。○甲子。諭軍機大臣等。本日據陳若霖奏。途次接到伯麟移咨。因該督現赴臨安邊境。辦理夷務。省城無大員彈壓。兼程趕赴滇省。並稱該督現在調派官兵督同土司勦捕防守。兼諭令南掌越南一體協緝等語。臨安邊界與南掌越南境壤毗連。如逆夷高羅衣及其夥匪被官兵勦捕窮蹙。越境逃竄。該督豫期檄知該國。令其各守本境。一有竄入該國。

之賊即行攔截縛送交該督軍營事屬可行但不可令該兩國帶兵出境幫同勦辦即該國王等以此為請該督當正辭謝卻斷不可令其前來方為得體此事總以趁瘡癰未起之前迅速辦竣為最要滇省距京遙遠軍情重務所有辦理情形必當隨時馳奏不可俟竣事始行發摺該督接奉此旨除先發奏報外仍將現辦情形由驛迅速覆奏將此諭令知之○賞蹕路經過看守各行宮弁兵半月

錢糧○是日駐蹕烟郊行宮○乙丑駐蹕舊衙門行宮○丙寅

上行圓○禮部以會試中額請得旨滿洲取中八名蒙古取中二名漢軍取中四名直隸取中二十三名奉天取中二名山東取中十九名山西取中十二名河南取中十二名陝甘取中十名江蘇取中二十名安徽取中十四名浙江取中二十三名江西取中十九名湖北取中十一名湖南取中九名福建取中十

三名廣東取中十一名廣西取中七名四川取中八名貴州取中十名雲南取中十二名○是日駐蹕圓河行宮翼日如之○丁卯諭內閣胡克家奏兌漕草率一案應徹底查辦請將知府及監兌通判解任質審一摺常州府知府卞斌常糧通判顧文光均著解任交孫玉庭歸案秉公審辦至胡克家摺內稱該撫泊舟之處漕船朝夕經過並無一船稟告米色不純該府亦未稟及旗丁刁難之事何以經李奕疇參賠後卞斌忽有此稟或係因被參藉詞掩飾但該府既稟計弁丁勒索應令指出弁丁何人勒索若干給與若干務令水落石出以成信讞該督審明秉公定擬具奏毋稍偏畸○撫卹四川口外章谷地方地震災民○賞看守南苑各行宮苑戶一月錢糧海戶銀一千三百兩○戊辰以戶部右侍郎盧蔭溥為禮部尚書調戶部左侍郎姚文田為右侍郎禮部右侍郎黃鉞為戶部左侍

郎以內閣學士湯金釗為禮部右侍郎仍留江蘇學政任○是日駐蹕新衙門行宮○己巳。

上還圓明園○庚午諭內閣本月二十二日朕駐蹕舊衙門行宮晚膳後召見果齊斯歡並未在宮門祇候令人至阿哥書房查問亦未入直至申刻伊始趕赴宮門告知因回真武廟寓所以致失誤當將果齊斯歡交都察院議處自交議至今已距六日之久本日都察

院堂官來園奏事並未將果齊斯歡處分議上實屬遲延所有都察院堂官俱著交部察議果齊斯歡無庸令其再議現在穆彰阿補授侍郎出有內閣學士一缺即著果齊斯歡降補並罰俸一年仍著在上書房行走○又諭御史謝崧奏請速發會試盤費一摺直省舉人起送會試給予水腳銀兩原係國家嘉惠士林優恤寒畯之恩自應早為給發俾作長途資斧乃有延至次年俟該舉子由京回

籍始令補領者殊乖立法本意嗣後此項銀兩著各該藩司按照定例於起送會試時飭令該州縣全數給發其本科未經給領者俱查明補給如有書吏剋扣勒掯情弊查出嚴懲以均實惠而杜侵欺○又諭御史謝崧奏申嚴匿名揭帖律例以挽澆風一摺隱匿姓名告言人罪律應縲首立法至為嚴切原以此等陰狡之徒計圖傾陷故重懲以息刁風然此律久已頒行而匿名揭帖仍疊疊不絕

在其人豈盡不知此律其心以為蹤跡詭秘或可倖逃緝獲遂為此明知故犯之舉朕所以飭令查辦者原欲將作奸之徒設法拏獲按律懲治以儆其餘是以凡經破案者俱按律治罪從不寬貸且有數案祇飭拏投遞揭帖之人並未將所控之人所控之事查訊究辦者若事無鉅細一概付之不問恐亦不能因此即無匿名揭帖之事人情澆薄一切姦盜治罪之條律載甚詳然斷獄者甫執法於

前犯科者仍接踵於後。豈獨此匿名揭帖一事。遂能朝令夕止。總之察奸正以除惡。使鬼蜮不能倖逃。庶澆風日漸斂戢。未可執一而論也。○調兵部左侍郎禧恩為戶部左侍郎。轉兵部右侍郎。常福為左侍郎。以內閣學士穆彰阿為兵部右侍郎。○以兵部右侍郎曹師曾署刑部左侍郎。○以禮部尚書盧蔭溥為國史館總裁官。吏部右侍郎吳芳培為副總裁官。工部左侍郎王以銜為會典館副總

裁官。○辛未。協辦大學士刑部尚書章煦因病解任。命吏部尚書戴均元協辦大學士。○調兵部尚書吳璥為刑部尚書。禮部尚書盧蔭溥為兵部尚書。轉都察院左都御史戴聯奎為禮部尚書。以禮部左侍郎汪廷珍為都察院左都御史。都察院左副都御史王引之為禮部左侍郎。○以禮部右侍郎廉善署吏部左侍郎。○以通政使司副使毛式郇為光祿寺卿。○以山西按察使汪如淵為順天府

府尹。○以正白旗蒙古副都統安福為正紅旗護軍統領。工部左侍郎蘇楞額兼正紅旗漢軍副都統。○以前任山西河東道承光為山西按察使。○贈故順天府府尹費錫章兵部侍郎銜。予祭葬。○壬申。諭內閣。向來部院遇有議處事件。每因查被議之員有無加級紀錄。以致議奏遲延。嗣後著於奉旨五日之內。即行議上。其例不准抵者。於摺尾聲明。即係應以級紀錄抵者。亦毋庸先行查計。著於

摺尾聲敘。例係應行議抵之案。可否准其抵銷。請旨遵行。如奉旨不准抵銷。毋庸查計。若准其抵銷。再行查明覈辦。○又諭本日永錫等奏閱看左翼前鋒營兵丁步射。中五箭者二名等語。業將中箭五枝之前鋒薩炳阿。成永施恩矣。朕本年閱看前鋒護軍營官兵射箭。現已看畢五營。惟正黃旗護軍營有中五箭者二名。其餘四營並無中五箭者。王大臣等甫經驗看前鋒一營兵丁射箭。即奏有中

五枝者二人看來此內不無徇情充數嗣後王大臣等閱看兵丁射箭務須將實中箭數覈計仍交都察院於監察御史內奏派二員會同王大臣等監射儻有徇情該御史即行據實叅奏如該御史不行具奏查出後一併治罪著都察院於明日即行奏派○癸酉

上詣

大高殿行禮○還宮○以刑部右侍郎成格署戶部左侍郎○以故雲南廣通縣沙矣舊土

巡檢蘇遇祿孫庭桂襲職○以常寧祀

天於

圜丘自是日始齋戒三日○是月山西巡撫衡

齡奏奉到頒賞

御製因循疲玩論墨刻得旨四字是衡齡之考語汝尚為此奏耶幕友浮詞覽之生厭○陝

西巡撫朱勳奏奉到頒賞

御製因循疲玩論墨刻得旨百篇中儆盡為君之心一字不循失為臣之道中外皆同奈何

奈何

實錄卷三二九

三

大清仁宗受天興運敷化綏猷崇文經武孝恭勤儉端敏英哲睿皇帝實錄卷之三百二十八

大清仁宗受天興運敷化綏猷崇文經武孝恭
勤儉端敏英哲睿皇帝實錄卷之三百二十九

此條係纂修實錄時所遺者。上諭軍機處。奉旨。著。將。此。條。刪。去。其。餘。各。條。均。照。舊。存。在。欽。此。

此條係纂修實錄時所遺者。上諭軍機處。奉旨。著。將。此。條。刪。去。其。餘。各。條。均。照。舊。存。在。欽。此。

此條係纂修實錄時所遺者。上諭軍機處。奉旨。著。將。此。條。刪。去。其。餘。各。條。均。照。舊。存。在。欽。此。

此條係纂修實錄時所遺者。上諭軍機處。奉旨。著。將。此。條。刪。去。其。餘。各。條。均。照。舊。存。在。欽。此。

此條係纂修實錄時所遺者。上諭軍機處。奉旨。著。將。此。條。刪。去。其。餘。各。條。均。照。舊。存。在。欽。此。

秋修

嘉慶二十二年丁丑夏四月甲戌朔日食○

享

太廟遣慶郡王永璘恭代行禮○乙亥

上詣

南郊齋宮齋宿○丙子常雩祀

天於

圓丘

上親詣行禮○辛圓明園○丁丑諭內閣御史

王耀辰奏申禁武職違制以重營務一摺武

職官員統率營伍訓練兵丁分應習勞戒逸

以勵勇敢之氣定例不准乘坐肩輿私役兵

丁禁令恭嚴近來將軍都統提鎮等恐又有

養尊處優故違定制者著再申明例禁嗣後

將軍都統副都統提督總兵官如有乘坐肩

輿者經人糾參即行照例革職城守尉協領

副將參將以下等官如有乘坐肩輿者著該

管將軍都統副都統督撫提鎮一面參奏一

面即將該員革職其曾經出兵著有勞績者

奏明作為兵丁食糧効力其並無勞績者即

行革職至武職應用儀從等項俱著查照會

典遵行毋得違例妄事華靡多役兵丁致干

嚴禁將此通諭知之○陝西巡撫朱勳奏知

縣辦理蔑倫重案錯謬請交部議得旨此案

李仁美李仁潮商同勒斃伊母似此逆倫重

犯本應解省鞠審明正典刑但李仁美既已

絕食斃命李仁潮又患病沈重西鄉距省千

餘里若解至中途病斃復使倖逃顯戮殊不

足以快人心該縣知縣伍敏傳齊犯屬親族

立將李仁潮杖斃。並將李仁美戮屍。係屬權宜辦理。並無不合。伍敏著免其交部議處。○移山東曹州營叅將守備駐東昌。添設曹州鎮總兵官一員。遊擊守備各一員。為鎮標中營。改東昌營都司為鎮標右營。撥鉅野臨清東昌壽張梁山高唐德州七營隸之。從巡撫陳預請也。○緩徵陝西榆林神木府谷葭懷達綏德米脂清澗吳堡九州縣上年歉收舊欠額賦。並各項銀糧。○戊寅。命都察院左都

御史汪廷珍為上書房總師傅。翰林院侍讀學士徐顥。在上書房行走。○己卯。諭內閣慶祥等奏。熟河行宮左近山陽地畝。禁止墾種。並山場餘地。可否賞給額魯特游牧一摺。熟河居住額魯特生齒日繁。畜養馬匹增多。著加恩將普寧寺東西山場建廟餘剩地面。一併賞給額魯特游牧。不准私招民人開墾。餘俱照所議辦理。○辛巳。

上幸萬壽山。○命

皇次子智親王。皇三子綿愷分詣

黑龍潭

覺生寺祈雨。○以陝甘督標中軍副將楊逢春為山東曹州鎮總兵官。○壬午。諭內閣。十年九月。逆匪林清勾結李文成滋事。經滑縣知縣強克捷先期訪破逆謀。將李文成獲案。夫訊。刑傷甚重。該逆黨因而乘夜在滑城劫獄起事。李文成不能率眾北來。與林清會合。及遁出滑城。又不能乘騎行走。得以迅就殲戮。強克捷之功甚鉅。其全家被害。尤為可憫。前疊經降旨褒卹。忠蓋強克捷長子強逢泰。以騎都尉世職。改授主事。其次子強望泰。賞給舉人。本科會試。未經中式。強望泰著再加恩。賞給進士。准其一體殿試。○賞會試年老舉人李儉等五名。檢討學正職銜有差。○癸未。諭內閣。孫玉庭等奏。揀員調補元和縣知縣一摺。朕披閱單開李景嶧。叅罰處分。共有三十六案。多係承審遲延及疏脫罪犯事。

件該縣現任丹徒已不能辦理裕如豈復能勝省會首邑劇任所奏不准行該督等率行保奏均著傳旨申飭仍另選賢員奏請調補○以禮部尚書成寧為滿洲繙譯會試正考官刑部右侍郎成格為副考官太僕寺卿瑚松額為蒙古考官○甲申

上幸靜明園詣

龍神廟拈香○幸靜宜園○刑部議覆陝西巡撫朱勲疏報馬庭玉等強姦王丁兒一案

得旨此案馬庭玉起意約同林喜兒馬慶兒強姦王丁兒迨劉思正路遇理勸不從往邀村衆捕捉林喜兒輒聽從馬庭玉指使持刀趕往將劉思正砍傷又首先將王丁兒姦污是馬庭玉固係首惡林喜兒同惡相濟情罪亦重馬庭玉著即處斬林喜兒著改為絞立決餘依議○以故奉恩將軍綿烈子奕襲襲職○是日駐蹕靜宜園至戌子皆如之○乙酉命

皇次子智親王

黑龍潭

覺生寺謝雨○旌表守正捐軀甘肅狄道州民楊噶三妻張氏○丙戌諭內閣昨據長齡奏伊犁遣犯日多難以安置請查覈歷次奏改章程將吉林黑龍江改發伊犁之強盜免死減發等案十八條人犯改發極邊烟瘴充當苦差暨發極邊遠充軍量為疏通等語新疆遣犯日積日多即改發烟瘴及極邊邊遠等處恐亦不免壅積朕思烏里雅蘇台庫倫科布多三處地方從前未經議及發往遣犯該三處均設有將軍大臣足資管束若將該三處增入將犯何條罪名者擬定發遣何處似此分地改遣當可以漸疏通著交刑部通行覈計悉心妥議具奏○丁亥上御演武廳閱健銳營操○諭內閣陳預奏請將因公降革送部引見知縣就近捐復原官留東補用一摺向來部議降革人員降旨令

該督撫出具考語送部引見者均係因公案件引見時朕量材錄用其年力強壯人材可觀者多加恩以原官補用如年齒衰績即照部議降革若將送部引見之員先令其捐復再行送部引見是已准其復還原職引見轉屬具文殊屬取巧所有該撫請將革職知縣張日昇降調知縣劉東果就近捐復原官留於東省補用之處著不准行仍遵前旨將該二員送部引見嗣後各省凡係部議降革有

旨送部引見之員俱不准先行奏請捐復若部議降革未經奉有送部引見之旨者如該員官聲素好熟悉地方情形准該督撫代為奏請捐復仍聲明將該員先行送部引見俟引見奉旨准其捐復再令該員交納捐款以原官補用○己丑

上還圓明園○庚寅

孝端文皇后忌辰遣官祭

昭陵○諭內閣本日兵部將卓異侍衛章京等

帶領引見其步射平常人員當經降旨不准卓異此內鑒儀衛章京及八旗章京尚有承辦事務不能專心習射至侍衛等有何應辦事務平素理宜將步射騎射演習精熟茲辦事章京頭等侍衛廣裕引見時步射甚屬平常顯係平素不加習演所致廣裕著革去辦事章京頭等侍衛降為二等侍衛以示懲儆○諭軍機大臣等每歲伊犁將軍於四五十等月應進四次馬匹因患路途遙遠送馬

官兵不無勞費著寄知音昌嗣後惟計程於四八十等月到京進馬三次其五月一次著即停止○辛卯諭軍機大臣等伯麟等奏勒平江外夷民膽敢謀逆滋事據該犯供稱因江西湖廣等處漢人在夷地貿易取利甚為刻苦遂借驅逐漢人為名聚眾謀逆等語夷民愚蠢無知多因內地民人私往夷地或潛相煽惑或激生事端釀成大案致勞兵力戕害

生靈此案拏獲之偽軍師章喜一犯即係漢奸現將首從各逆悉數殲獲邊境敕寧正當趁此出示曉諭嚴飭沿邊各州縣凡內地民人不准私往夷地貿易侵奪夷人生計若有私越邊境者查明嚴禁治罪務令弭患未形勿再滋生邊隙為要將此諭令知之○以勸平夷匪高羅衣首夥各犯加雲貴總督伯麟太子少保擢遊擊方振奎為副將並與道員誠端景謙知州丁錫屏黃士麒提舉長唐同

知陳熙遊擊趙先貴守備曹德周均賞花翎賞知縣楊晉春等藍翎線目普朝富六品頂帶餘升敘有差○壬辰諭內閣常明奏捐建義倉義學辦有成局一摺義倉積穀與常平社倉相輔而行使民間緩急有備義學即家塾黨庠遺意常明飭屬勸諭捐輸穀石酌定義倉章程通省已辦有成局洵於民生有裨惟義倉出自民捐應聽民間自司出納不可令官吏主持致啟侵挪之弊轉滋訟端至義

學導民為善不在廣堂教授十室之邑必有忠信宜於一鄉一里分設延師使童子粗識之無即能誦習

聖諭廣訓並通曉經書大義庶幾變化氣質薰德善良教養為治世之大端惟在行之以實要之以久阜民訓俗效自可馴致也○軍機大臣會同刑部議奏已革知州沈仁澍侵盜倉糧運腳一案得旨此案已革河州知州沈仁澍盜賣倉糧侵蝕運腳並虧缺倉庫共銀

九萬餘兩本應即行正法將所虧銀兩在伊家屬名下勒追該革員先經畏罪自盡倖逃國法著將伊子沈德林發往烏魯木齊以示懲儆已革陝甘總督先福身任封疆收受屬員供應饋送又濫保貪墨劣員罪無可逭先福著照議發往伊犁効力贖罪前署陝甘總督高杞率准沈仁澍領運倉糧黃方承領運腳署藩司德克精阿私發庫銀數萬餘兩並不查究實屬溺職高杞著即革職餘依議○

禮部以繙譯會試中額請得旨滿洲取中七名蒙古取中一名○以烏里雅蘇台將軍伊冲阿為理藩院尚書○調熱河都統慶祥為烏魯木齊都統正白旗漢軍都統慶溥為熱河都統正白旗蒙古都統成寧為正白旗漢軍都統以科爾沁貝勒鄂勒哲依圖為正白旗蒙古都統○癸巳引見甲戌科散館及補行散館人員得旨此次散館之修撰龍汝言編修祝慶蕃伍長華業經授職其清書二甲

庶吉士程贊采吳振棫漢書二甲庶吉士馬步蟾楊殿邦劉學厚傳綬李裕堂袁元善奎照端木杰李浩王炳瀛顏伯燾賀熙齡王西李逢辰顧元熙吳傑陶廷杰王統仁李家慈覺羅德寧孫貫一俱著授為編修程川佑靳會昌傅繩勛余鳳喈戴於義蔡世松劉逢祿常恒昌張翔瞿溶陽宗域姜梅吳毓芳鄭敦允熊一本王瑋慶宗室奕溥陳傳均陸以烜楊思榮呈麟朱惠蘇廷玉劉燾宗室德喜保

王協夢俱著以部屬用劉禮奎萬承宗戴葆榮朱遠吉周師胡世琦張玠陳鳳翰方觀旭葉維康蔣慶均蔣超曾彭邦峻俱著以知縣即用黃暄李莒藍瑛俱著歸原班銓選○以大學士松筠董誥戶部尚書劉鏞之都察院左都御史汪廷珍吏部左侍郎王鼎戶部左侍郎黃鉞工部左侍郎王以銓內閣學士毛謨為殿試讀卷官○甲午

上御勤政殿聽政○命

皇次子智親王奕劻皇三子綿愷皇四子綿忻

分詣

三壇祈雨○策試天下貢士龐大奎等二百五十五人於保和殿制曰朕寅承大寶命二十有二年仰荷

昊緯眷佑

祖

考貽庥年穀順成函夏安乂兢兢業業不敢自逸敬思修己治民之道知人善任之原官箴

吏治之方。除莠安良之事。期與寰海生民共臻上理。茲當對揚伊始。咨爾多士。用佇嘉謨。孔子曰。修己以敬。修己以安百姓。書曰。在知人在安民。以堯舜猶病之事。責之一人。果可以無為而治乎。抑大圖在上。大矩在下。法而則之。即可以為民父母乎。百官何以治。萬民何以察。利病何以周。知情偽何以能辨。亦惟是躬節儉。屏聲色。未明求衣。不遑暇食。遂可以致太平。是必深宮有格致誠正之學。然後

朝野有官禮雖麟之化。朕日夜孜孜。勵精圖治。保泰持盈。以誠御下。雖海宇昇平。人民和樂。而由小康以致大同。其道何由歟。詩云。無競維人。易云。聖人養賢以及萬民。知人之道。非君天下者所首重歟。古所傳觀人之法。若大戴禮文王官人篇。以至陸贄司馬光蘇軾之論。亦有可采者歟。臯陶曰。亦言其人有德。乃言曰載采采。舜典曰。敷奏以言。明試以功。進賢用人。如此其難也。乃古之君臣相得。或

決於立談之間。何耶。大智若愚。大詐若忠。或外忠而內奸。或始賢而終佞。燭照數計。其道何由。君子小人。各從其類。然諸葛亮之所用。李泌之所舉。司馬光之所取。或未必賢。抑又何說。孔子曰。取人以身。知言窮理。將何以濬其原。與亮功熙績。治理所先。大法小廉。國家攸賴。朕率作興事。日昃不遑。乃內外臣工。謹身守家之意。多奮發有為之氣。少旅進旅退。流為怠惰。因循。保祿保位。相率委靡。遷就。豈

稱忘私奉國之義。六計首廉。尚已然。飭簠簋。杜苞苴。人臣之常分耳。案牘積而不釐。民生困而不卹。又安用此素食者為。至若浮躁喜事者。有似於敏勤。闇茸玩愒者。有似於持重。何以辨其真歟。惴惴安靜者。大抵便民而緩急。或不足恃。強健明幹者。易於集事而恣睢。或至殃民。何以善其用。舉劾之權。不可不寄之大吏。而不無借以遂其私者。何以委任而責成歟。天地之大。梟鸞並育。稂莠不翦。嘉禾

不生邪惡萌孽之始。或結會斂錢煽惑人心。或糾黨鬪狠武斷鄉曲。地方官及時治之。本不難於立時淨盡。乃或畏其激變姑息養奸。甚或聞之上司而封疆大吏。反以多事斥之。一味姑容縱邪害正。官既不經理民甘心順從。以致受其害者忍而不敢言。一旦煽動為患甚大。非有司釀成之罪歟。保甲之制。所以弭患未萌。法至善也。乃王安石行之熙豐。而世以為累。王守仁用之南贛。而百姓便之。其故何歟。吏胥所以察姦。兵弁所以戢盜。乃往往聲息相通。反為援引。何術以防之歟。或謂民之不法。或迫於不得已。或陷於不自知。然則開衣食之原。而明禮義之方。固自有其本歟。若是者。典學以成化。迪知以用賢。澄敎以勵官常。糾詰以除民惡。保邦致治。莫要於是。多士稽古有素。且自田閒來見聞尤習。其各陳心得。以當先資。毋泛毋隱。毋掩陳言。朕將親遴焉。○以詹事府詹事吳其彥為內閣學

士兼禮部侍郎銜宗人府府丞賈允升為都察院左副都御史。○乙未
上幸萬壽山詣
廣潤祠拈香。○諭內閣。蔣攸銑奏藩司捐廉修理連山縣城一摺。粵東連山縣城垣既因年久坍塌。即應奏明動項興修。藩司趙慎吟何須捐廉辦理。直省城垣甚多。豈能一概捐修。此奏殊屬無謂。所有連山縣城估需工料銀一千九百六十四兩零。著准其動項興修。
工竣照例造冊報部覈銷。○以光祿寺卿毛式郅為宗人府府丞。○旌表守正捐軀浙江嘉興縣民婦劉吳氏。○丙申。諭內閣。康紹鏞奏揀員調補宣城縣知縣一摺。全椒縣知縣楊國棠單開叅罰處分共有一百餘案。多係詳審遲延及疏脫罪犯。併承緝催徵不力等件。似此辦理。竭蹶之員。豈能勝繁要之任。康紹鏞所奏不准行。亦不准再行具奏。如再瀆請。定將該撫懲處。所有宣城縣知縣一缺。著

另選賢員奏請調補○丁酉

上還宮○御乾清宮召讀卷官入親閱定進呈

十卷甲第○賞已革工部侍郎佛保以六部

主事用吳烜以中允贊善用○戊戌

上御太和殿傳臚賜一甲吳其濬凌泰封吳清

鵬三人進士及第二甲孫如金等一百人進

士出身三甲伍紹詩等一百五十二人同進

士出身○幸圓明園○旌表守正捐軀直隸

南宮縣民張仲升女張氏○己亥諭內閣國

家設官分職原以天下之大萬民之衆一人

不能獨理是以自督撫司道府州縣使之遞

相統屬以分寄治民之責地方大小獄訟先

由州縣聽之州縣審斷不公方准控訴於本

管知府直隸州知州府州復不為申理再由

道司以至督撫定例不准越訴其有案情重

大應控本省衙門屈抑無申者准其來京控

訴由都察院步軍統領等衙門奏聞辦理以

達窮民之隱乃近來京控之案日多往往有

案本細微不於本省衙門具控亦或有人命

等案控經本省衙門正在緝兇提訊不候聽

斷輒行驀越赴京者呈詞內捏砌重情冀圖

聳聽或因此將該管官解任革職交審及辨

明誣妄再令開復回任而該員已不勝其拖

累又或有職官犯罪經該督撫上司叅奏革

審未經定案遣其家屬來京控告以圖挾制

其間擬軍流人犯到配後復有脫逃來京及

遣屬控告以冀翻案者民情上達本以開除

壅蔽乃刁風日長竟視以賤陵貴以卑犯尊

為故常訟牘繁滋詐偽百出其所關於風俗

人心者甚鉅不可不明立科條以遏其漸其

應如何將越訴誣告罪名酌量加重著交刑

部分晰詳議具奏○又諭本日召見成格據

奏稱日前考驗軍政有正藍旗漢軍叅領順

祥仍照該旗原列薦舉及引見奉旨記名後

訪聞順祥原名李履順前曾奉旨以其人本

平常不准保舉副都統不敢不據實陳奏等

語成格所奏甚是。考驗軍政之王大臣。不能盡知各員出身原委。成格考驗在先。今一經訪聞。並不迴護。不但將伊處分寬免。成格著加恩賞給紀錄二次。其同時考驗之王大臣。成親王。年老著免其交議。奕顯。蘇沖阿。俱著交部察議。至該旗都統。副都統。興肇。係原保李履順。副都統之人。彼時桑吉斯塔爾策楞。即係本旗副都統。朕前降諭旨。伊三人共見共聞。李履順改名順祥。伊等豈得諉為不知。保薦已殊不合。迨記名後。仍不據實檢舉。希圖朦混。本應俱予罷斥。姑念伊三人皆曾有軍功。興肇策楞。年已老邁。興肇著以二品頂帶休致。策楞著以三品頂帶休致。桑吉斯塔爾著革去副都統。退出御前侍衛。加恩賞給副都統職銜。以頭等侍衛在乾清門行走。用示薄懲。順祥即李履順著撤銷記名。改為二等。○以都察院左都御史景祿兼正藍旗漢軍都統。署正黃旗蒙古副都統。弘善前任伊

犂領隊大臣富永。為正藍旗漢軍副都統。○旌表守正捐軀直隸霸州民楊成妻馬氏。○庚子。以大理寺少卿劉彬。吉為光祿寺卿。○辛丑。命皇次子智親王。是祭
宣仁廟。詣凝和廟。
時應宮拈香。○諭內閣。國家用行政。首防蒙蔽。在廷大臣。皆當侃諤直言。不避嫌怨。以助朕明目達聰之治。即如此次軍政。正藍旗漢軍。卓薦之叅領順祥。即係從前不准保舉副都統之李履順。該員改名冀圖朦混。而本旗之都統。副都統。遂從而登之薦牘。考驗之王大臣。復不加查察。即有知者。亦或佯為不知。惟恐人怨。設非成格據實入奏。則該員竟以作偽復遷升用。成何政體乎。朕因思李履順現任旗員。近在京師。尚有此改名朦混之事。其直省文武各員。似此奉旨不准保升。及

曾經獲罪不准捐復並奉有特旨永不敘用者恐改名勝捐冒考之弊俱所不免其如何酌定條例將此等人員禁止改名如有私改獎混發覺作何治罪之處各該部會議具奏尋議嗣後官員更名先令該員於呈結內聲明任內並無奉旨不准保升及曾經獲咎不准捐復並奉有特旨永不敘用各事故再由臣部覈明如實無以上事故仍准更改儻有前項事故除不准更名外仍將本員及出結官分別議處應請嗣後如有不應更名之員呈請更名者照不應重杖八十私罪律降三級調用如有職人員在京取結更名將出結各員降一級留任其由州縣詳報者將不行查明之州縣降一級調用轉詳之府州降一級留任督撫藩司罰俸一年其有在省徑詳督撫咨部者將督撫照不行查明之州縣議處若無關銓選人員在京取結更名將出結各員罰俸其由州縣詳報者州縣降一級留

任府州罰俸一年督撫免議其在京八旗外省駐防並綠營衛所以及候補候選武職官員如有前項事故呈請改名者應將本員及出結轉詳該管各官均照文職例分別議處儻有私改獎混別經發覺審有買求官吏改洗文卷隱匿公私罪名希圖選用情事即照官員等曾經考察論劾罷黜及為事問革例不入選者事發問罪例已除授未除授者發附近各充軍仍各加枷號一箇月如係止圖頂帶榮身無關銓選即照違制律杖一百係官革職從之○又諭向例各衙門辦理事件錯誤後經自行檢舉京堂以上各官該部將照例處分及檢舉後寬免之處兩議請旨內閣票擬雙簽進呈原以該員失誤於前後經自行查出檢舉是以朕披閱時每多加恩寬免若前此辦理錯誤及查出檢舉時該員已經離任並未隨同具奏亦一體免其處分殊未平允此案刑部辦理減等遺漏之堂司各

官內彭希濬成格崇祿係自行檢舉者所議
罰俸處分俱著加恩寬免帥承瀛穆克登額
成寧熙昌宋鎔韓蔚章煦並未隨同檢舉俱
著照例議罰嗣後如有似此之案均著照此
分別辦理○壬寅諭內閣御史蔣詩奏請豫
飭被水地方搜除魚子一摺各省濱水之區
霖潦停集生長小魚遺子陂澤水涸日曬往
往化為蝗蝻上年江蘇徐州安徽鳳陽山東
章邱河南汲縣等處間被水淹現當夏令低
窪處所水涸日曝恐有魚子化蝻之事著各
督撫飭知所屬州縣凡瀕河地方上年如有
停潦之處即將魚子豫為搜除免致滋生蝻
孽有妨禾稼該督撫務各實力奉行毋得視
為具文○以雨澤愆期命刑部清理庶獄○
癸卯諭內閣現在天氣暑熱朕閱射布靶之
日諸王貝勒貝子及滿漢文武大臣年屆六
十以上者站班時著於閱看一二入後即行
退班以示體恤每年自五月初一日為始著

為令○旌表守正捐軀山東蒲臺縣民趙小
黑妻楊氏

大清仁宗受天興運敷化綏猷崇文經武孝恭
勤儉端敏英哲睿皇帝實錄卷之三百二十九

[illegible]

嘉慶二十二年丁丑五月甲辰朔旌表守正

~~_____~~

~~SECRET~~

孝誠仁皇后忌辰遣官祭

景陵 諭內閣向來新進士朝考以論詔疏詩
四項命題其詔題多係擬古朕思士子文藝

試以論疏詩三項其優劣已可概見擬作古
詔不過臨時強記敷衍成篇况可擬古詔本
屬無多歷科命題幾徧嗣後新進士朝考著
裁去詔一道以論疏詩三項命題著為令○
又諭各直省大吏叅奏職官有請旨解任者
皆因案在疑似之間虛實未定是以祇令暫
離職任以備質訊如審明該員並無不合或
雖有應得處分不過止於降罰未至革職者
仍即奏明令該員回任聽候部議若案關重
大業經訊有端倪並事涉贓私衆供有據惟
該員尚未承認者如昨日胡克家所奏署丹
徒縣知縣楊超鐸早經奉旨革職又復奏請
拏問似此往返延挨豈不與該員以彌縫之
暇實為外省疲玩惡習嗣後凡先經奏請解
任之員有應革職審訊者該督撫一面先將
該員革職一面專摺奏聞不必候旨即行提
訊以杜因循而成信讞 命刑部左侍郎秀
寧內閣學士汪守和教習庶吉士授一甲

一名進士吳其濬為翰林院修撰二名進士
凌泰封三名進士吳清鵬為翰林院編修
丁未旌表守正捐軀湖北江夏縣民饒世洛
妻郭氏 緩徵直隸安新安二州縣上年水
災額賦 戊申
上詣
大高殿行禮 還宮 以夏至祭
地於
方澤自是日始齋戒三日 己酉諭內閣和寧
等奏請將降調試用同知沈鵬等十一員加
倍捐復原官留甘補用一摺試用同知沈鵬
等十一員均因甘省賑案出具空印冊結獲
咎僅予降一級調用已從輕議前此本案內
降調道員蘇成額經該督撫奏懇捐復降旨
不准和寧等豈不知之今復為此奏此等劣
員俱請留於該省於事何益且外省州縣官
特有捐復之例在任時先不潔己奉公或豫
為積蓄以為後日地步亦於吏治有損和寧

等所奏不准行沈鵬等十一員俱仍照部議降一級調用庚戌引見新科進士得旨一甲三名吳其濬凌泰封吳清鵬業經授職外趙柄徐璣朱階吉吳敬恒龔裕裕泰沈兆濡趙榮徐培深廖鴻苞羅瑛周宏緒曾錫恩徐法績龍元任周貽徽劉嘉會彭玉田雷文模易曰廉浦曰楷李煌王植巫宜楔潘光岳郎葆辰許乃賡沈巍皆陸堯春張日最毛樹棠蔡學川祁堪董承燾時式數吳坦馬伯樂王

貽桂趙先雅汪琳岳鎮東俞登淵祥寧李鈞周如蘭王金策成世瑄陳肇陳雲章啟潘光藻繩格穆馨阿劉冀程陳功葉殿銘裴元俊王鑄王兆琛宗室保瑞龍瑛毛家槐李惺龐大奎德興胡國英馮廣颺閔受昌黃德濂許湘強望泰俱著改為翰林院庶吉士孫如金張頤雲胡錫麟朱能作趙炳言胡柏材莊瑤吾德寧董基誠徐泮李長峯葉夢芝涂國用譚敬昭魏鴻王允中李鎔經賈揚宗林士斌

張惇訓熊璞吳大宣余毓祥張士醇張澧中汪河德玉鄒栴陳燕李佩蓮廖運發那丹珠張紹衣宗室功普戈其邁廖姓樊師仲徐鼎臣陸元煥楊凝陽陳宗魯宗室桂彬鄭鳳翔永泰李開元羅士蒸馬光瀾俱著分部學習陶惟輝有慶丁泰沈第王輯寧吳思權柳際清吳先愷閻學海劉承謙何有書李仙蟠張海瀾俱著以內閣中書用孫鵬九李廷輔張楷倪植邊孔揚俱著以國子監學正學錄用

賈亮米邵堂胡巖張攀桂楊所憲王克敬張富經楊作梅彭履坦邵文英汪云任劉祖煥康節金開第吳曾貫鄭謙楊景軾牟雲倪濟遠王鵠王吉士文廷杰周百順方亨衢王正袁汝嵩雷文楣時聯輝段程式薩爾吉祥李光瀛張偉楊學顏林筠裴成章盧超宗江臚于殿章段聯鋒吳尚知查耀文郭璋葉桐封朱士達劉邦鼎胡效曾張夢驥楊霖川王元洪吉秉奇董憲黎永贊俱著交吏部簽掣分

發各省以知縣即用候補主事譚驤著以六部主事即行選用餘著歸班銓選 辛亥夏至祭

地於

方澤

上親詣行禮 辛圓明園 壬子諭內閣國家勤卹民隱凡直省訟獄有冤抑莫伸者准其來京呈控代為申理原恐覆盆之下日月照臨所不及特以通達下情開除壅蔽意至善

也乃人情講張為幻或案本細微而架詞聳聽或事皆虛誕而捏砌重情以致案牘繁滋弊端百出歷經刑部奏定將越訴誣控人犯於本例加等治罪又各遞加一等現已無可復加本日該部議請嗣後在問刑衙門呈控事件者令於呈尾將代作之人註明姓名籍貫住址一併傳案詳訊一經審屬虛誣將具呈人照例反坐代作者與犯人同罪其主唆之人起意者仍以為首論或審明另有唆訟

別案即照積慣訟棍例治罪若呈內不將代作姓名住址開載不准收理集訊時代作之人提傳未到又別無證佐即將所控立案不行分別註銷所奏殊未允協斷不可行具呈之人知有不寫代作人姓名不准收理之例何難詭託寫入以求准理又或將素有仇隙者豫為冒寫以圖拖累皆情事所必有其代作呈詞者案情審實與伊毫無所益一經審虛罪與原告同科其人豈肯自將姓名載入

呈內勢必假捏詭名脫身事外及審虛坐誣之時人本烏有何從提訊是科條愈繁巧詐愈滋於防偽除奸之道相去益遠而抱屈銜冤之真情無處申訴上干

天和下害民命朕不忍為也莫若明白曉諭俾小民簡而易遵嗣後凡有控告事件者其呈詞俱責令自作不能自作者准其口訴令書吏及官代書據其口訴之詞從實書寫如有增減情節者將代書之人照例治罪其唆訟

棍徒該管地方官實力查拏從重究辦毋稍輕縱庶訟源既清而訐告之風自可漸息矣其屬員被叅後誣揭上司者均各於應得罪名上加一等治罪一條著照該部所議行又諭本日刑部奏恩豐倉蘇拉傳長受砍傷王立兒復自行劃傷一案審明傳長受實因舊患瘋病復發砍傷王立兒並自行劃傷移時殞命別無起釁根由因思瘋病就痊者其病根未除仍或不時舉發定例素患瘋病之人不准服官著役乃日久因循往往務為姑息不行查察著通行曉諭嗣後紫禁城內及圓明園附近各處無論官員兵丁以及蘇拉茶房阜役人等凡有神氣恍惚瘋病形跡者俱即查明飭令解退不准當差行走並著總管內務府大臣查明所屬官役人等一律辦理經此次曉諭之後儻不認真查察致有因瘋滋事者定將該管官嚴懲不貸

上幸靜明園詣

甲寅

龍神廟拈香 旌表守正被戕廣西北流縣民龐潮玉妻梁氏 乙卯諭內閣前日吏部將失察宗室福存赴妙峯山燒香斂錢之宗人府王公及族長等遵例於五日內議處具奏摺內聲明以可否抵銷請旨經朕降旨將宗人府王公等准其抵銷族長等不准抵銷吏部奉旨後再行分別查辦乃宗人府王公等於次日朕臨幸靜明園時在道旁撻頭謝恩殊屬錯誤王公大臣遇有處分事件特旨

寬免者自當撻頭並具摺謝恩若部議降罰有旨准其抵銷並未寬免仍應視其有無級紀無級紀者即按所議處分有級紀者亦應分別銷除與寬免者迥不相同嗣後有似此者俱著無庸謝恩 旌表守正捐軀湖北宜城縣民婦朱孫氏河南確山縣民張明智妻田氏 丙辰命

皇次子智親王

黑龍潭

覺生寺祈雨 遣官祭

關帝廟 諭內閣御史王耀辰奏欽賞新進士表裏書吏舞弊調換請旨查禁一摺每科頒賞新進士表裏乃國家優賚儒林恩意何得任聽吏胥舞弊私行更易著禮部查明本科承領給發係書吏何人經手並出示曉諭新進士等所領表裏有不堪服用者即日自行赴部呈驗究出調換之人送交刑部治罪如該司員等知情縱容分肥等事亦即據實

參奏革職審訊勿稍徇庇嗣後每科恩賞進士表裏著該部遵派司員赴庫承領按名粘貼該司印封奏派侍郎二員親自散給毋得假手吏胥以重恩賚而昭體制 巡視西城御史伊綿泰等奏拏獲在逃兇犯請將司坊官鼓勵得旨張大即狀四張王氏即趙刁氏俱著交刑部審訊至此案候補指揮鄧燾因稽查門牌將張大等緝獲祇係尋常案犯候補吏目朱學斐僅止派委鞠訊該巡城御史

等何得遽行奏請量加鼓勵若該司坊官果能緝獲最要次要逆犯審明後朕必立施重恩又何待奏請耶除所請不准行外伊綿泰蕭鎮俱著傳旨申飭經此次訓飭之後如再有似此市恩瀆請者定行懲處不貸 丁巳諭內閣前據劉芬奏客民張喜與無服族嫂張鄭氏通姦後因無力資助忿其拒絕將該氏扎斃審明後即恭請王命將該犯斬決一案彼時朕覽奏覺其辦理過當因批交刑部

查明此等案件即行正法新疆有無此例本日據該部查奏從前新疆辦過謀故殺兩案俱仍入於秋審情實新疆地方遇有情重案件原准其先請王命正法若此案張喜與無服族嫂通姦得以凡論後因見拒忿殺祇係尋常故殺之案自當入於秋審情實勾到時亦必予勾若一概先請王命正法則新疆地方竟無秋審情實人犯矣辦理刑名事件總當細審案情權衡輕重近日往往揣摩諭旨

意為寬嚴從前因新疆有案犯兇惡異常仍拘泥本律問擬監候者曾經降旨訓飭以後遂將尋常謀故之案俱請王命正法今奉有此旨恐又將兇惡異常之犯一概問擬監候似此怠玩悠游胸無定見安能得事理之平嗣後新疆地方問擬命案惟當各就案情分別酌辦勿得畸輕畸重以副朕明罰協中之意○步軍統領衙門奏遵查大興縣門內湯家店向俱收管聽審人犯得旨大興縣遇有

輕罪人犯既在大門以內收管何得私立湯家店名目著嚴行禁止解任知縣黃萬里審案遲延因循疲玩以致押斃人命著於定案時加重治罪○旌表守正捐軀山西河津縣民原付城妻衛氏○戊午諭內閣御史謝崧奏請飭禁外省於應行請旨之缺違例保奏一摺所奏是近來直省督撫遇有道府請旨缺出或將本省候補人員開單保奏即如甘肅蘭州道缺經該署督和寧以試用道員呂

嘉言奏請補授實屬違例嗣後各省遇有道府請旨之缺該督撫務當遵照定例請旨簡放毋許將分發試用人員開單保奏以符定制○又諭御史謝崧奏留直差委縣丞請旨撤回一摺所奏非是已革知縣儲斗南前雖有不准減等捐復之旨後因緝捕出力奏准開復縣丞留直差委該員既係直隸縣丞則該省上司遇事差委乃分所應然豈得目為鑽營且儲斗南開復縣丞之時何以不即行

奏奏今事隔經年忽奏請撤回若以該御史一言即將該縣丞斥退設遇職分較大之員棄瑕錄用豈言官亦得操其進退乎此風斷不可長該御史所奏著毋庸議○諭軍機大臣等朕近日風聞四川雷波一帶有夷民滋生事端究係因何啟釁此時該省作何辦理著常明即行查明據實覆奏再據卓秉恬奏雷波馬邊等處漢租夷地日事盤剝窮夷積怨每致糾眾滋擾邊地文武意存邀功輕事

重報及官兵勦捕則劫掠之夷早已竄匿不
過虛放鎗礮搜獲頑蠢夷人數十作為俘馘
藉以邀功其致害之由總緣漢奸與熟夷興
訟漢奸輒賄通書差兵丁變亂曲直官弁復
不加體恤一經激變轉得倖邀保薦積弊日
深以致該處不能長久安靖等語夷番滋事
大率皆由漢奸逼迫或誘引所致平日地方
官稽察嚴密使漢奸不敢有侵占勾結夷人
之事則夷民自不致滋生事端一有蠢動即
設法先捕治漢奸絕其指引則蠢夷無知亦
不難立時懲創近日滇省臨安邊夷滋事亦
以漢奸就獲遂得迅速辦竣雷波馬邊等處
情形大畧相同總當重懲漢奸並嚴查書吏
兵丁之串通欺壓夷民者從重治罪則杜其
弊端邊圉自永臻寧謐矣將此諭令知之
氏 己未
上幸萬壽山 四川總督常明奏勦捕寧越夷

匪得旨嘉獎賞道員奇成額花翎千總王連
元等藍翎餘升敘有差 庚申
上詣
覺生寺
宣仁廟
凝和廟拈香 還宮 諭內閣前因御史王
耀辰奏本科頒賞新進士表裏書吏舞弊調
換當經降旨飭查承辦之禮部緞足庫查明
俱無情弊因令軍機大臣傳到該御史詢問
據稱伊在長安門外聽聞頒賞新進士內有
口稱被換者又見有領得茄色黃色者心疑
非官用緞足冒昧具奏等語頒賞表裏向例
不拘顏色由來已久王耀辰現派抽查漕糧
乃不認真辦公輒以道路傳聞之言捕風捉
影率行陳奏實屬冒昧王耀辰著傳旨申飭
所奏毋庸議即將原摺擲還 以祈雨
三壇齋戒一日 辛酉
上詣

天神壇命儀親王永璇成親王永理分詣地祇壇

太歲壇祈雨 詣

昭顯廟

時應宮拈香 幸圓明園。諭內閣那彥成獲罪應發伊犁因伊母年老病篤暫免發遣茲伊終養事畢仍應發往伊犁念其前在滑縣勦賊著有微勞那彥成著加恩免其發遣在家閉門思過 以內閣學士博啟圖為理

藩院右侍郎 以駐藏大臣喜明為烏里雅蘇台將軍調葉爾羌辦事大臣玉麟為駐藏大臣賞已革前任黑龍江將軍斌靜二等侍衛為葉爾羌辦事大臣 賞已革鑲紅旗護軍統領阿蘭保藍翎侍衛盛京刑部侍郎永祚主事直隸按察使盛泰筆帖式 壬戌諭內閣本年入夏以來雨澤稀少然亦時有陣雨入土總不及分寸殷雷閃作亦非亢旱否塞之象朕於本月十八日親詣

天神壇虔申祈禱升香之際陰雲四合至午後又復開霽仰闕

昊蒼垂象之意似天氣下降地氣不能上承是以石礎不潤未能渥沛甘膏各宜省過思愆勉修人事在京部院八旗以及內務府等衙門堂官職司表率皆當殫心竭慮翊贊猷猷深戒因循怠玩遷就模稜若徒以夙夜趨公奔走効勞遂為充盡厥職失之遠矣其司員分曹供職尤應振作精神痛改因循疲玩積習至責任緝捕各衙門則當認真訪拏逸犯使所轄境內實能洞察無遺方為不負委任毋得妄掣疑似或倖獲他案一二餘犯即張皇入奏冀圖塞責總之誠能格

天大小臣工惟當人人實心實力為國為民不可存邀功之見並不可存避過之心果能羣相策勵共矢公忠必能感召

天和甘霖立霈感應之理固較然不爽者也將此通諭知之 又諭御史卿祖培奏請嚴考

取教習關防一摺官學教習有訓課之責報滿後多得除授知縣自應慎選以端始進若關防疏懈任聽頂冒代倩以偽亂真殊非慎重遴才之道其應如何關防嚴密於入場及覆試時設法稽查之處著禮部妥議具奏尋議投考人等真偽全以出具印結之識認官為憑嗣後識認官員應令於點名處所逐細識認如考取後有冒名頂替等事發覺者本生照科場舞弊例治罪識認官照例議處至

場內諸獎請照繙譯鄉會試外簾監試之例加派滿漢御史六員稽查究辦其考試各卷如有數卷筆跡相同顯係一手所書者應令該考官概點勿錄至覆試時於例試排律詩一首外添點原卷數行嚴加校勘如字句筆跡不符即行扣除并仍由監試御史稽查令該士子於聚奎堂按號列坐無得錯亂則真偽不難立見從之戶部議准福建巡撫王紹蘭疏報閩羅源漳平三縣開墾地一頃四

十九畝有奇照例升科從之除福建閩縣水衝田十四畝有奇額賦癸亥諭內閣御史周鳴鑒奏嚴禁積壓訟案一摺近日官吏積習率多因循疲玩屢經降旨訓飭至外省詞訟聽理始於州縣該管上司各有稽察督催之責果能迅速完結何至民人紛紛赴京控訴國家設官分職原以伸理下情若俱怠惰偷安於承審事件任意遲延其何以稱牧民之義耶著各督撫嚴飭所屬州縣務各振作精神勤於聽斷毋使案有留牘該管上司並隨時飭催以防積壓儻敢仍前玩泄控案內查出延案不辦擱壓日多者定將原審官嚴懲不貸又諭長齡奏清釐倉糧一摺甘省額徵糧石向來各州縣以上色一石抵交下色二石積弊相沿前經先福奏准將十五年清查案內以一抵二之糧估支兵食茲長齡又查出十六年以後作抵之糧仍復不少著照所請准其將十六年以後作抵下色之

上色糧石查明確數造冊咨部估支兵食於奏銷冊內開除原抵下色兩石以符款額自本年秋收為始以後永不准以上色通融抵交下色儻敢復蹈舊習將濫抵濫接之員查明叅奏一併革職所短糧石仍著落各半分賠以示懲儆諭軍機大臣等甘省本係地瘠民貧近來各州縣侵虧倉庫動輒鉅萬罹罪者疊疊相接固由牧令等貪黷不肖亦緣近數任總督皆性好奢靡踵事增華以瘠苦

之區必欲效豪侈之舉屬員悉索供應曲意逢迎以致設法巧取虛領虛報侵欺國帑覆轍相尋試思總督為封疆大吏即躬自儉約其體制已極尊崇豈必藉服飾華腴始為光寵長齡甫莅陝甘總督之任現在藩司程國仁臬司屠之申居官亦俱廉明該督當與僚屬等共相勸勉砥礪廉隅敦崇節儉凡燈綵鋪陳以及衣服飲食之閒其涉於華靡者可裁則裁可省則省以期力挽積風大吏為通

省表率果能潔清自矢澹泊寡營則上行下效屬吏亦必以儉相尚以廉相高且伊等不能以供應藉口有所忌憚自能量入為出倉庫可以不至續虧一切侵挪捏冒之弊無自而生從此鮮羅法網多所保全其造福不亦大乎再伊犁將軍向來進貢馬匹原以新疆為產馬之區至陝甘總督例不進馬自那彥成任內始呈進馬匹據稱係自新疆帶來在甘省調習餵養者嗣先福踵而行之亦曾進

馬伊等以進奉為名安知不將自用馬匹一併交屬縣餵養其司道府等官又從而效之如上年查辦虧空案內臬蘭縣即指代各上司餵養馬匹一款以為口實長齡前任伊犁將軍今已改任陝甘總督即自長齡為始不許呈進馬匹伊即有自伊犁帶來之馬亦不准呈進永著為例亦減除浮費之一端也將此諭令知之甲子諭內閣御史高翔麟奏請定保送御史開列名次一摺六部保送御

史朕於引見時察看酌量記名原不因開列先後以為去取所有保送御史名次仍著吏部查照舊例辦理毋庸另立科條徒滋紛擾又諭御史高翔麟奏各省上司發審案件請旨勿許輾轉委員一摺民間詞訟原應速為審理但督撫藩臬事務殷繁若一省訟案無分鉅細俱令此數人親提審訊恐亦日不暇給且州縣凡事俱諉之上官轉得自處安閒亦安用設此冗員為耶除特旨飭交督撫等親提之案不准委員代審外其餘應發審者仍准其遵委賢員訊斷該管上司不時嚴催毋許遷延積壓則案牘自漸次清釐矣

乙丑以甘霖普被

上詣

黑龍潭神祠謝雨命

皇次子智親王 皇三子綿愷分詣

覺生寺

宣仁廟

凝和廟

昭顯廟

時應宮謝雨 丙寅

孝恭仁皇后忌辰遣官祭

景陵

上幸靜明園詣

龍神廟拈香 丁卯諭內閣熙昌等奏審訊朱履中稟訴道府收受陋規藩司李賡芸被逼自縊等情分別定擬一摺此案朱履中以

衰庸難勝繁劇改教後計控該管道府得受陋規業經該督撫於叅奏後訊據朱履中供明係屬誣控乃汪志伊等以叅奏李賡芸解任在前欲實其言屢審屢駁承審之署道涂以轉即心存迎合以李賡芸家人黃升曾向朱履中私借洋銀三百圓惟此一款屬實為數太少難以稟覆督撫定案即向李賡芸私商令其添認銀兩李賡芸並未寫供迨至身故後文卷內忽有供詞一紙稱朱履中曾有

代墊修船洋銀一千六百餘圓係應還之款已措交張均代完公項此供並非李慶芸親筆亦未畫押竟係涂以翰自出己意代李慶芸敘供誣認又拍案厲聲逼勒難堪致使李慶芸情急自盡汪志伊於李慶芸身故後慮及自干咎戾復提訊朱履中加以恐嚇以李藩司係伊逼死並以但云饋送節壽陋規屬實就可有命之語向其引誘朱履中遂聽信翻供及嚴究證據朱履中以事本烏有不能

指實是李慶芸之死由於汪志伊固執苛求而成於涂以翰之勒供凌逼熙昌等僅將涂以翰擬發軍臺効力實屬輕縱熙昌王引之俱著交部議處汪志伊年已衰邁辦事復如此謬誤毋庸交部嚴議著即革職永不敘用王紹蘭雖無授意情事但隨聲附和疊次聯銜具奏著照所請交部議處所有此案罪名著軍機大臣會同刑部另行覈議具奏尋議上得旨此案知府涂以翰於委審朱履中稟

訐道府一案既訊明李慶芸實無收受陋規情事乃因汪志伊等輾轉駁飭輒於李慶芸供內添入朱履中代墊修船洋銀一千六百餘圓竟行寫入附卷雖據供稱伊與李慶芸商量依允其言已在李慶芸身故後毫無證據其為自出己意迎合上官情弊顯然且涂以翰親書供詞亦稱李慶芸操守清廉衆所共知乃抑勒凌逼必欲被以貪污之名是何居心涂以翰著發往黑龍江充當苦差到配之

日再加枷號三箇月以示懲儆餘依議又諭貢楚克扎布奏審擬任蔓受抹傷李伏身死請旨即行正法一摺此案任蔓受向與李伏難姦後因李伏欲行辭去該犯忿恨乘李伏睡熟持刀抹斃蔓係尋常故殺之案毋庸即行正法任蔓受著依律斬監候入於本年秋審情實辦理展緩山東鄒縣及坐落鄒縣之臨清衡水災新舊額賦 戊辰

上詣

大高殿行禮還宮諭內閣前據熙昌等奏李賡芸故後福建士民感泣祭奠者踵接於門熙昌等行抵省城有紳士耆民林光天等三百五十餘人具呈臚具李賡芸生前政蹟願捐貲建立遺愛專祠請據情入奏抑或賜額表揚等語現在朱履中控告李賡芸等一案已據熙昌等訊明李賡芸實無得受陋規情事但伊家人黃升在船工廠曾向朱履中索借洋銀三百圓李賡芸失於覺察亦有應得之咎至李賡芸之死雖由於涂以輟勒供凌逼但伊係藩司大員緣事逮問如果實有罪愆自當靜俟國法若此心皦然橫遭冤抑亦應據實控訴朝廷必為昭雪乃率效匹夫溝瀆之諒性情殊為褊急李賡芸不應特予旌揚若閩省士民追思惠政自願捐貲立祠此則斯民直道之公悉聽其便以謝雨

三壇齋戒一日 己巳

上詣

天神壇命儀親王永璇成親王永理分詣地祇壇

太歲壇謝雨 辛圓明園 庚午諭內閣給事中陸泌奏請嚴立詞訟限期一摺民間大小詞訟皆應迅速審理以免拖累無如地方官因循疲玩積習相沿遂致案牘塵積百弊叢生若如該給事中所奏令鄉民於呈內註明離城道里遠近立定集訊限期恐案情不一證佐不齊仍不免藉詞延宕是多立科條徒滋紛擾總之輿情之通塞視乎州縣之勤惰州縣之勤惰存乎大吏之激揚各直省督撫藩臬果能認真率屬考察嚴明勤者優加獎勸惰者立予糾叅使牧民之吏知以民事為重不敢耽逸安而怠於聽斷斯政平訟理而吏治自蒸蒸日上矣又諭王紹蘭身任巡撫刑名案件是其專責此案朱履中誣訐道府收受陋規藩司李賡芸被逼自盡固由於汪志伊刻覈苛求王紹蘭係同審之員果

能持正商阻汪志伊或不致偏執已見涂以
輒必不敢肆意凌逼李賡芸亦不致憤激輕
生即或汪志伊執拗難回王紹蘭儘可據實
單銜陳奏乃一味隨聲附和釀成巨案實屬
溺職王紹蘭著即照部議革職諭軍機大
臣等據給事中陸泌奏江蘇歲運漕糧一百
四十餘萬石丁力疲乏於得受兌費外復向
地方官借銀墊辦近來愈借愈多聞竟有一
縣積欠至數萬兩者新舊任交代時因係借
款即作正開銷接任之員不得不於兌費內
扣除而旗丁因不敷辦運遂多方刁難非多
索兌費即不准扣除此項銀兩名雖有抵實
則虛懸請飭查明籌辦等語旗丁辦運總以
疲乏為詞近年以來准令加帶土宜糶賣餘
米所以體恤丁力者已至再至三且前數年
河道阻滯該丁等沿途提溜打聞守候時日
尚不無多費近年河流暢順糧艘行走迅速
回空亦早其所省吳費倍蓰而該丁等習於

實錄卷之五

七

浮費用度奢靡無厭之求悉取給於兌費以
此年復一年伊於胡底有漕州縣亦奚堪此
重累著孫玉庭會同李奕疇將該丁等每歲
辦運每船實在需費若干確查密訪大加撙
節酌定章程期於數用而止不准於限制之
外多所求索使州縣與運丁彼此相安以為
經久之計其從前舊欠並酌定扣補規條以
清積弊將此諭令知之以貴州布政使史
致光為福建巡撫貴州按察使毓岱為布政
使前任江西按察使玉輅署貴州按察使
辛未

實錄卷之五

七

上幸萬壽山詣

廣潤祠拈香 壬申頌

御製望雨省愆說曰今歲河淮順軌漕運迅速
齊豫晉秦麥收七八分有餘惟直隸通省缺
雨而順天所屬尤甚焉齋心默禱省愆思咎
尚未感召和甘連日密雲不雨旱氣晝夜薰
蒸麥已無收禾恐失望矣顏顏治事蒿目焦

心雖因循疲玩未能挽回然臣工深染之由總予一人之咎曷敢推卸試思癸酉九月之變非因循疲玩釀成乎今夏

上天獨在三輔昭示早象甚可畏也予宵旰勤求諸臣忍心疲怠於心安乎願諸臣勿以趨走為勤而以盡心為本勿以虛言塞責必以實政敷陳正直忠誠為法詭隨遷就為恥一時之爵祿有限千秋之名節無窮致君澤民惟諸臣是賴朕有過愆據實入告斷不加罪責也君臣交儆庶可挽救荒歉消弭邪念化莠為良敬承

昊貺若視為泛常漠不動念恐未必止於旱災也諭內閣慶溥題請將絞犯南沁擬入緩決一本該犯鬪毆情急一傷斃命擬以緩決辦理並無錯誤惟本內有仰體如天好生之仁及以廣皇仁等語措詞殊為失當刑名事件擬輕擬重一準情法之平若以緩決為推廣皇仁豈情實各犯皆仰體朕意嚴辦耶嗣

後問刑衙門題奏事件惟當據事直書依律定罪毋許濫引浮詞致乖體要諭軍機大臣等本年直隸閩省雨澤缺少而順天所屬尤甚朕宵旰焦勞躬自引咎並令在廷諸臣各思己過勉修人事以迓

天和茲特製望雨省愆說以述憂懷著發交方受疇及藩司姚祖同臬司瑞弼及各道府閱看各宜捫心自省從來感應之理歷歷不爽若該省官吏人盡公勤辦事悉皆允協未有

鄰省皆豐獨於該省早象示警者現在麥收既已歉薄如大田又不能及時播種則小民口食無資實堪焦急著方受疇督率藩司悉心體察如有應須緩徵撫卹等事迅速查明具奏其被災之區早行出示停止催科以安民心再久旱之後熱氣薰蒸易生蝗孽而盈虛之理又恐秋霖為潦此皆意中必應計及思患而豫防者凡創挖蝻子慎固隄防等事皆當飭知所屬州縣各殫乃心以盡民牧之

責況地方一有災荒則莠民潛思乘機煽惑尤不可不留心防範該督務督飭所屬認真訪緝毋稍懈弛不特此也舉凡通省地方一應公務當事事留心人人振作庶政事修舉邪慝消除善良安業冀以挽回

天意轉歉為豐若仍因循疲玩視民生休戚漠
不關心聞朕訓誨之言過而輒忘則是良心
泯滅安能上邀

天佑該督職任封圻救荒安民是其專責其凜

寶錄卷之三

三

思母忽將此諭令知之旌表守正捐軀河
南滬池縣民馬石娃妻王氏

大清仁宗受天興運數化綏猷崇文經武孝恭勤儉端敏英哲睿皇帝實錄卷之三百三十

實錄卷三百三

三

大清仁宗受天興運數化綏猷崇文經武孝恭勤儉端敏英哲睿皇帝實錄卷之三百三十一

藍修德 教官 煙臺日清北居主官 女子美術武英殿大學士大才簡領閣事務 警察 警務 工部事務 處管理工部事務 翰林院掌院學士 禮部加

既存常例。經臣曹振鏞。以該官太子太保。湖廣文學士。管理刑部事務。五級。臣戴鴻慈。以該官太子少保。內大臣。刑部提舉。開

上諭事件處協辦大學士戶部尚書翰林院掌院學士教習庶吉士理管內務府人臣儀黃旗滿洲都統步軍統領管理

三事奉宸苑清園等處辦理工程處御茶膳房御藥房太醫院西洋堂事務功加三級例帶加例尋常加三級紀錄一次自英和輝至

講官李天保禮部尚書李書房行差英殿總管管理園子監事務加六級隨帶加級紀錄四次臣王廷珍等奉

敕修

嘉慶二十二年丁丑六月癸酉朔諭內閣新

建天津水師營礮臺衙署等工現據方受書奏報均已依限完竣並造成兵房六百餘間著派蘇楞額和世泰帶同內務府諳習工程司員迅速前赴該處詳加查勘自到工之日起予限十五日將各工逐一驗收其未蓋兵房地址情形並著詳細履勘此半月內如閩浙等省兵船適值駕駛抵津著蘇楞額等將船隻礮位安設情形一併查明具奏儻限內兵船未到即將所驗工程據實奏明回京覆

命○又諭長齡奏嚴查各州縣已徵未報錢糧○以清積弊一摺○甘省州縣於徵存倉庫錢糧○既未按例報解○前此清查虧空時○又未據實報出○其中影射民欠○希圖弊混者不少○自應徹底嚴查○以昭覈實○著該督卽督同兩司嚴飭該管道府將所屬州縣已徵未報之項○逐一清釐○如係侵盜入己○卽行叅革治罪○若實係因公挪移○查明後勒限追補○以銀數之多寡定年限之遠近○屆期不完○將作何治罪之處○先行奏定○並造冊咨部立案○分別辦理○儻該道府稽查不力○再有隱漏○續經查出○卽將該道府嚴叅著賠○以示懲儆○○甲戌諭內閣○乾隆四十三年

皇考高宗純皇帝躬詣盛京。

特降諭旨。垂示後嗣。必當睠懷遼瀋舊疆。再三

周歷○斬於

祖宗遺緒身親目覩或無識臣工妄以為不宜當律以悖命之罪誅之無赦朕敬承

聖訓擬於明秋再舉躬謁

三陵大典用展孝思時向臣工言及尚未明降諭旨今夏亢旱未得甘霖昨據大學士松筠摺奏致旱之由因朕欲詣盛京

列聖示象阻止等語實屬夢鑒怪誕極矣成湯遇旱六事自責六事中有謁祖陵一節乎况一年後之事先為此言搖惑衆心大玷首輔之職矣設若明年直隸及盛京遇有歉收朕亦不待奏請何難降旨展期乎上年因綿課

阻止秋獵曾降旨儻有造作浮言阻止者必按軍法今松筠因夏令微旱竟敢阻止明歲上

陵鉅典較秋獵為尤甚此奏若在明降諭旨之後朕必將松筠置之重典仰承

皇考律以悖命之罪立行正法但今逢苦旱之時有罪之犯尚欲減等究在未降諭旨之前是以交軍機大臣會同吏部議處本日奏上議將松筠革職實屬咎所應得姑從寬典薄

示降謫朕從不因言罪人此等顯僻

聖訓之論不能不懲治也松筠著革去大學士御前大臣領侍衛內大臣都統並各項差使以二品頂帶補授察哈爾八旗都統仍帶革職留任八年無過方准開復此朕準情示罰不得已之苦衷此心不懈期挽汙俗天下臣庶其諒之此旨著上書房存記皇子皇孫懷承毋忽仍通諭中外知之○又諭給事中賈聲槐奏請整飭倉務一摺官員兵丁私賣米粟交鋪戶代領及已滿花戶把持倉務均干例禁至各倉成色土米日久未領亦恐於故米時易滋攪雜之弊著交倉場侍郎嚴加查察如有前項情弊隨時釐剔以重倉儲○又諭御史史譜奏直省題豁衝坍地畝經部覆准查有徵存錢糧如數給領以杜侵冒一摺所奏不曉事理各直省遇有水衝沙壓地畝地方官勘明詳報督撫題請豁免經部覆議奉旨允准後行知該督撫轉行該州縣定例

遵行已久。若於奉到部覆之日。再查徵存錢糧。示諭民戶呈稟領回。該州縣勢必牽混。轉轉弊竇叢生。著仍照舊例辦理。該御史所奏毋庸議。○命協辦大學士兵部尚書明亮為大學士。雲貴總督伯麟協辦大學士。仍留雲貴總督任。調工部尚書和寧為兵部尚書。理藩院尚書伊冲阿為工部尚書。以鑲黃旗領侍衛內大臣晉隆為理藩院尚書。○調正白旗漢軍都統成寧為鑲藍旗滿洲都統。以成都將軍賽冲阿為正白旗漢軍都統。在御前大臣上學習行走。調寧夏將軍德寧阿為成都將軍。以察哈爾都統祥保為寧夏將軍。○乙亥。諭內閣。本年五月以來。直隸及京畿一帶雨澤稀少。連日據各處奏報。熱河天津馬蘭鎮密雲等處均已大霽甘霖。入土深透。惟近京地方仍形早燥。朕宵旰焦思。推求其故。部院各衙門因循疲玩。積習已非一日。數年來經朕嚴切訓飭。隨事懲創。近日似較前新

知振作。前二年直省俱年穀順成。本年致旱之故。或不盡由於此。默思

上蒼示警。獨在附近數百里之內。或係在逃逆犯五十餘名。必有潛藏近畿者。以致沴氣所結。阻遏祥和。著步軍統領衙門。順天府五城各於所轄境內嚴密訪緝。若止按照門牌逐戶點查。該逆等改姓更名。竄入其中。仍屬具文塞責。即將所屬員弁兵役嚴詞告誡。亦屬空言無補。務當各竭智力。於稠人廣眾易於

涸跡及庵觀寺院隱僻難窮之處。設法偵緝。儻能於一月之內弋獲遁逃。則邪沴消除。必當和甘立召也。勉之。若將此旨視為具文。付之不辦。則非我大清國之臣子矣。○丙子。旌表守正捐軀廣東英德縣民陸爾代妻吳氏。○丁丑。旌表守正捐軀山東陽穀縣民李萬里聘媳蕭氏。○戊寅。

上御勤政殿聽政。○以太常寺卿舒寧為內閣學士。兼禮部侍郎銜。翰林院侍讀學士杜壻

為詹事府詹事仍留順天學政任○以正白旗蒙古都統鄂勒哲依圖為御前大臣兼正黃旗領侍衛內大臣○旌表守正被戕湖北竹谿縣民蕭崗妻鄒氏○己卯

上幸靜明園詣

龍神廟拈香○諭內閣徐忻奏查明各屬首悔茹素念經男婦取結釋寧一摺所辦失之寬縱習教之犯准令自首免罪原因其真心悔悟投首到官呈繳經像方予以自新之路

該護撫摺內所奏如蒲城等縣監生王瑞朋等均係自行投案呈繳經像具結改悔其蒲城等縣民人魏京昌等鳳翔等縣民人楊得才等則皆係訪查拏獲到案始自稱改悔者此等入教莠民平日甘心邪惡迨被獲畏罪藉口改悔冀圖一時苟免釋放後仍將故智復萌該護撫概予釋免殊覺漫無區別徐忻著傳旨申飭除案內自首之王瑞朋等俱准免罪釋寧外其拏獲之魏京昌等十四名楊

得才等四名○仍各照所犯之罪分別問擬不准寬免嗣後各省查審邪教改悔之案俱著照此分別辦理○又諭阮元等奏審擬

蔡允光聳母自縊圖賴將蔡允光恭請王命凌遲處死一摺此案蔡允光之母萬氏因邱成功不肯退還地畝前往哭鬧夜深住宿用繫磨草繩在磨房自縊身死該督等因蔡允光慙憑伊母赴邱成功家拏命圖賴萬氏聲言如不得地即死在邱家斷不空返該犯答稱如果尋死伊必為母伸冤等供即將該犯照依子謀殺父母已殺者凌遲處死律請王命凌遲處死辦理尚未允協萬氏前赴邱成功家圖賴蔡允光並未隨往自縊草繩係邱成功家之物亦非蔡允光付給其聳母拏命圖賴供詞係在萬氏自縊後審出祇係空言問擬斬決已當其罪若即處以極刑近日他省逆倫之案尚有逼母自盡並付給兇器從旁加功者又將加以何罪耶蔡允光業已正

法著毋庸議。嗣後審擬此等案件，亦應詳覈情節，不得漫無區別。概從重典。○諭軍機大臣等：楊蘊奏清查原虧銀兩全數完竣，並現存穀價不敷，擬提津貼採買，以期早歸實貯。一摺：浙省原虧倉庫銀一百九十四萬二千餘兩，自嘉慶五年八月起至本年四月止，均已全數彌補完竣。惟現存司庫穀價銀三十一萬四千六百餘兩，計各屬尚有未買穀四十八萬八千五百餘石，不敷買補，自應設法籌辦。俾歸實貯。著照所請，每穀一石發銀一兩，其不敷例價，即照從前提解節省之例，均勻裁減。每年止提銀四萬四千兩，以奉旨之日起，照所減之數，按季提解司庫。該藩司務於四年限內全行發買。自本年秋成為始，按限補足，均歸實貯。統俟買補完竣，該撫奏明。彼時朕簡派大員前往該省，將倉庫一併覈實詳查。此後浙省州縣，儻再有挪掩虧缺，查出一案，即指叅一案，從嚴懲辦，以遏其流。儻

該撫稍有徇縱，別經發覺，並將該撫嚴懲不貸。將此諭令知之。○戶部議准：江西巡撫錢臻疏報南昌鉛山二縣開墾地一項五十九畝，有奇，照例升科。從之。○庚辰吏部以大學士明亮應定何殿閣，請得旨著為武英殿大學士。○戶部議准：廣東巡撫董教增疏報：德慶州開墾地一項七畝，有奇，照例升科。從之。○辛巳命

皇次子智親王 皇三子綿愷分詣

黑龍潭

覺生寺祈雨。○晉大學士明亮太子太保加協辦大學士吏部尚書戴均元兵部尚書和寧盧蔭溥太子少保。○壬午諭：內閣本年入夏以來，畿輔缺雨，近日省東省南各府及古北口迤北俱陸續得有透雨，惟順天保定二府仍形早燥，連日油雲時布，總未能溥潤蒸騰，沛為澍澤。仰闕

昊蒼垂象，似天氣下降，地氣不能上承，且值濃

雲彌漫之時。輒為颶風吹散。現行夏令。非若春風鼓盪。乃節候之常。其在洪範。咎徵曰蒙。恒風若朕。思上下之交。惟在相與以誠。蒙之為患。不必實有欺蔽隱匿之事。即下有陳善納諍之心。而中存疑畏。不敢直達。亦足致否塞之象。昨朕親製望雨省愆說。頒示臣工。以為致君澤民。諸臣是賴。朕有過愆。當據實入告。乃次日即有松筠摺奏。謂致早之由。因朕欲詣盛京。

列聖示象阻止。其言怪誕不經。顯與

皇考高宗純皇帝聖訓相背。即律以悖命之罪。夫復奚辭。朕曲加寬貸。念其言在未經降旨之前。僅交議處。經軍機大臣會同吏部議以革職。朕復施恩。將伊降補察哈爾都統。仍係一品職官。暫用二品頂帶。並非若文職之降為部屬武職之降為侍衛者。朕之原情示罰。亦既再四。權衡矣。實無憎嫌松筠之念。出於萬不得已也。然恐外間無識之徒。因見松筠

以御前大臣大學士。一經建言失旨。遂被嚴譴。輒慮及保身保爵。惟恐以言獲咎。各思緘默。殊不知松筠之妄言。朕處於不能不加嚴懲之勢。而朕因災自省。冀聞諫言。以補闕失之殷懷。實堪共諒。特再通諭在廷諸臣。務各天忠誠。盡心國。是其確有所見。即據實直陳。用資匡弼。庶上下感通。除否塞之弊。而成交泰之休。和氣所蒸。兆成康阜。朕實有厚望焉。○又諭前因各部院遇有議處事件。每因行

查加級紀錄。以致議奏遲延。限以五日內具奏。其應以級紀錄抵者。毋庸先行查計。於摺尾聲明。請旨遵行。前降諭旨甚明。本日都察院會同議處吏部堂司各員行文遲延一案。仍將紀錄抵銷列入摺內。實屬錯誤。除此吏部堂司各官罰俸。依議准其抵銷外。所有都察院堂官及摺內列銜之吏部堂官俱著傳旨申飭。嗣後遇有議處事件。應以級紀錄抵者。遵照前旨將可否准抵之處。聲敘請旨。

如奉旨准抵再行查明級紀分別覈辦若不
准抵銷即毋庸查計○諭軍機大臣等富俊
等奏酌擬站道官兵章程一摺朕上次巡幸
盛京御道兩旁百姓瞻仰者甚至擁擠馬前
是以諭添站道官兵以資管束茲富俊等所
議每站派官三十員兵一千二百名於御道
兩旁分段站立復派官四員兵一千二百名
逐站隨營於道旁稍後約束已足資稽查彈
壓其所擬用夫一千二百名各攜修道器具
一件在道旁按排站立一節則斷不可行修
道之夫派自民間祇可供先期墊道之用若
鑾輅經過時民夫與官兵錯雜道旁轉不足
以昭整肅此項站道夫一千二百名著毋庸
議至富俊擬帶官兵八百名松寧擬帶官兵
三百名為隨營扈從及輪班直宿之用亦覺
太多朕啟蹕時有由京帶往官兵扈從駐蹕
時行宮大營均各按堆撥直宿更富俊等
所帶官兵不過相間守衛似可無須多人該

將軍等再詳細酌商妥議具奏將此諭令知
之○癸未旌表守正捐軀直隸新樂縣民王
清志妻祁氏○甲申諭內閣御史蔣詩奏請
定州縣開倉派員監視以杜虧空一摺直省
州縣倉廩實貯穀石其多致虧缺者皆由私
自開放而啟自應設法稽查以杜弊端該御
史所奏責成道府監視並委員監看及每年
盤查結報之處是否可行著各督撫妥議具
奏○又諭御史蔣詩奏各省上控案件請禁
發回審理一摺各省上控之案若令該督撫
藩臬一一親提審訊通省訟案繁多勢將日
不暇給前據御史高翔麟陳奏已降旨明白
曉諭嗣後各省上控案件該上司惟不得仍
發本州縣以杜迴護准其另委賢員訊斷並
示以限期以免遲延拖累則訟牘自可日就
清釐不必紛紛多設禁令也該御史所奏毋
庸議○旌表守正捐軀河南南陽縣民婦郭
岳氏○乙酉

上幸萬壽山○諭內閣給事中賈聲槐奏請嚴
州縣起解錢糧之限並禁豫印空白冊結一
摺各省州縣徵解錢糧存留起運各分款項
兩不相涉其應行起運銀兩現已責令各按
上下忙起解儻有逾限即行叅處立法已為
嚴密今該給事中謂州縣借留支為名遲延
報解請飭令將正雜錢糧全數報解不得自
行留支實屬舛誤留支款項先行報解繼復
請領是徒增解費領費之累於杜絕侵虧之
處毫無裨益至各省藩司奏銷悉以州縣印
冊為憑豈能豫提如許空白印冊代通省州
縣私捏造報該給事中所奏著毋庸議○又
諭御史熊埤奏請將滇省歲運京銅改鑄大
塊以免盜賣等弊一摺京銅關繫鼓鑄其運
員中途盜賣船戶偷竊爐頭夫役煎鍊折耗
等弊自應加意釐剔惟該省辦運向係簞裝
小塊若改鑄三四十斤大塊其煎鍊起運有
無糜費窒礙之處著交伯麟李堯棟詳查利

弊悉心妥議具奏尋議滇省每年應運京銅
七百萬斤零向例銅色八成以上方准起運
今若改用足色塊銅必須再加鎔鍊糜費通
多且改煎尤須時日恐誤運限應請仍照舊
例辦理得旨原不可行仍照舊例○刑部議
覆安徽巡撫康紹鏞疏報張成標圖姦張盤
沅不從毆傷身死殘毀屍身一案得旨此案
張成標因圖姦張盤沅不從起意殺死復將
張盤沅屍身用水澆燙刮去皮肉剖開胸腹
挖出臟腑飼犬殘忍已極僅照因姦殺死良
人子弟例問擬斬決尚覺情浮於法張成標
著即處斬再加梟示將該犯兇殘情節於榜
示內載明俾眾共知警惕嗣後斬決之犯有
情節兇殘似此者俱照此例辦理餘依議○
京營右翼總兵正藍旗護軍統領西拉布緣
事革退仍留副都統以內閣學士英綬兼右
翼總兵理藩院左侍郎蘇冲阿為正藍旗護
軍統領○丙戌以甘霖大沛命

皇次子智親王名皇三子綿愷皇四子綿忻

分詣

黑龍潭

覺生寺

廣潤祠謝雨。○以左春坊左贊善陳官俊充

日講起居注官。翰林院侍讀學士朱士彥署

日講起居注官。○除福建侯官縣水衝田二

千一百五十六畝有奇額賦。○丁亥諭內閣

康紹鏞奏審辦逆倫重犯一摺此案王助鏡

菜地與族人王延寬竹園毘連竹根穿入菜

地發筍二枝王助鏡挖取回家王延寬疑其

偷竊向族長王邦寧告知將王助鏡斥罰並

因王助鏡不服頂撞向其拳毆推跌王助鏡

回家向母王施氏告述王施氏即與次子王

助道向王邦寧理論被斥散歸王施氏氣忿

欲與王邦寧拚命乘夜潛往王邦寧門首極

頭昏暈倒地王助道睡覺趨視見伊母頭帶

極傷鼻息已微起意將伊母勒死裝點自縊

圖賴隨解伊母膏繫麻繩套入頸項用力收

勒殞命將屍懸掛王邦寧門鏢回家隱匿前

情喚醒王助鏡同往看視王助鏡即以王邦

寧父子將伊母毆勒致死赴縣呈控經該撫

審明將王助道照子謀殺母已殺者凌遲處

死律恭請王命凌遲處死惟此案係因王助

鏡挖筍被辱起釁以致伊母王施氏挾忿拚

命伊弟王助道身蹈逆倫重罪該撫不以起

釁根由科王助鏡之罪轉以誣告王邦寧父

子死罪未決將王助鏡問擬杖流殊覺輕重

失倫著交刑部詳覈案情另行定議具奏。○

旌表守正捐軀陝西盤屋縣民婦周孟氏。○

戊子諭內閣御史周為鑒奏請嚴禁非刑一

摺問刑衙門擅用非刑胥役私行拷押均干

法紀屢經降旨飭禁第恐日久玩生著再嚴

飭內外問刑各衙門儻再有設立非刑如該

御史所稱美人棒鸚哥架分金爐名目恣行

酷虐及番役捕快等私自拷押誣陷平民情

獎立即嚴參懲辦以慎刑罰而重民命○又諭御史周鳴鑾奏請嚴拏窩主一摺盜賊匪徒必有窩藏之家以為棲身銷贓之地其窩主復交通吏役私相包庇最為民害據該御史奏近日直隸山東河南此風甚熾著飭諭步軍統領五城及直省各督撫嚴飭所屬遇有竊劫案件先審明窩主實力查拏嚴究有無逸犯潛藏在內其硬拉居民牛馬牲畜勒錢回贖尤屬肆行無忌並著嚴拏懲辦如有胥役包庇等情查出從重治罪務使宵小屏跡以靖閭閻○諭軍機大臣等御史王松年奏近聞直隸督藩查辦虧缺勒令州縣屆限完繳而該州縣於已徵之款未能如數完解藉此苛求民欠以為挪補之計逐戶比追不留餘力而該督藩亦以催科為上考撫字為緩圖請飭下該督藩惟於州縣已徵應解及虧欠各款勒限嚴追將實欠在民者妥為酌劑等語直隸州縣已徵未解錢糧原應勒限

嚴追即實欠在民者係應納之款亦應分限催令完繳惟本年順天保定等府屬雨澤稀少其被旱成災之區自應早行查明出示停徵俾小民免追呼之苦其未經被災各州縣仍照舊徵收不可冒濫德者本也財者末也法固宜嚴民不可擾切勿廢本逐末恐有流弊也將此諭令知之○命刑部尚書吳璥馳往東河查驗河南睢州新鑲埽壩並山東運河工程○己丑諭內閣朕恭閱

皇祖世宗憲皇帝實錄內載雍正二年六月奉上諭朕惟除莠所以安良黜邪所以崇正自古為國家者綏戢人心整齊風俗未有不以詰姦為首務也聞江西地方頗有邪教大抵妄立名號誑誘愚民或巧作幻術夜聚曉散此等之人黨類繁多蹤跡詭秘苟不絕其根株必致蔓延日甚地方各官儻務姑息不行訪拏是養姦也澄清風俗之謂何該督撫亟當嚴飭各屬密訪為首之人嚴加懲治能去邪

歸正者則予以從寬。如有出首者。即酌量獎賞。務令萌蘖盡除。姦民屏跡。風俗人心咸歸醇正。儻或仍前因循。不能查禁。事發之後。該管官一併從重議處。此等查禁之事。亦不必張大聲勢。以駭衆聽。惟當留心密訪。設法緝獲。祇將為首者重懲。其餘被誘惑者。概不深究。如此方合朕意。假若不肖有司。借此恐嚇平民。波及無辜。則不特無益。而反有害矣。須飭諭屬員知悉。欽此。仰見我

皇祖除莠黜邪。教民成俗之至意。奸民倡為邪教。誘惑愚民。傳習既久。人數衆多。必致滋生事端。為害甚鉅。朕屢飭查辦。嚴懲倡教首惡。寬宥被誘愚民。實與

皇祖聖訓默相符合。乃地方大吏。以及有司。詰姦善俗。是其本責。平日因循疲玩。不能留心察訪。早絕邪萌。遇有特降諭旨。訓飭查拏。則惟張揚聲勢。縱任差役人等。或妄拏無辜。或將尋常茹素念經之案。辦理一二藉口塞責。

其傳教惑衆。首犯迭鮮。弋獲安能將邪愚之風。拔本塞源乎。嗣後各督撫。務督率地方州縣。將傳習邪教為首之犯。設法訪拏。嚴行懲辦。除審有悖逆重情者。從犯一併按律治罪外。其祇係被誘愚民。概免深究。則首惡既除。鄉曲之閒。無人煽惑。風俗還淳。而罹法者亦日少矣。將此通諭知之。○緩徵直隸大興宛平。通青靜海元氏。無極藁城。涑水正定易深。東光雄高陽唐蔚。保定文安永清清苑安肅。

新城蠡完。祁二十六州縣。歉收新舊額賦有差。○庚寅

上幸靜明園詣

龍神廟拈香。○旌表守正捐軀河南泌陽縣民燕文舉妻董氏。○展緩河南汲新鄉獲嘉淇輝五縣帶徵額賦。○辛卯諭內閣。給事中陸泌奏嚴緝匪之條。以佐保甲所未及。一摺。緝匪之法。全在地方官實心盡力。各於所屬境內。密訪嚴拏。俾奸匪一無遁跡。則要犯自

不能漏網。若僅設立科條責令奉行。而該地方官亦即以虛應故事為塞責。是仍不免於具文。如該給事中所稱。在官吏役人數眾多。恐有匪徒混跡。但使經書早快雜役人等各具連環保結。是不辨皂白。概行加以猜疑。且一經具有互結。轉可不加察覈。於剔奸之道。仍為無益。地方官本當周知所屬。況書役人等近在耳目之前。尤當留心查察。不使藏奸。若捕役例支工食。不敷日用。汎兵鋪堡坍塌。

無可棲身。其應須酌給養贍。修葺完整之處。本係地方應辦之事。至鄉保地鄰飭令首報。寺觀寓店。加意巡查。安置流民。應查形蹤詭秘之人。羅戲賽會。豫杜奸宄邪惡之漸。此皆地方官留心緝捕者。必應一一計及。總在行之以實。隨時隨地訪查嚴密。不使稍有疎懈。則匪徒無從託足。閭閻日臻寧戢矣。將此通諭知之。○壬辰諭內閣御史盛惇大奏常平社倉積弊。請飭查辦一摺。各省州縣例設常

平倉。又准民間報官自設社倉。每年出陳易新。以平穀價。且儲貯充盈。可為歉歲之備。立法至為美善。乃廢弛日久。積弊相沿。常平倉之弊。啟於官吏之侵貪。社倉之弊。由於社長之奸懦。以至惠政不能及民。而不肖之州縣。以及蠹胥土豪。各以飽其慾壑。著各該督撫。通飭所屬州縣。常平倉存糶穀數。務歸覈實。其遇市價昂貴。應行出糶之時。即按門牌內應領戶口。平價糶給。並飭該管道府隨時稽

察。如有官吏作弊侵漁之處。即分別揭叅懲辦。其社倉飭令各鄉公舉殷實老成之人。報充社長。以司出納。官吏不得干與。如有侵吞及強借等弊。官為秉公查究。務俾實惠及民。永除擾累。又該御史另摺奏稱江蘇常州府紳士公議章程。當年豐時。紳商富戶。每戶每日各輸錢文。按月交與存貯行息。歲終彙數報縣。至歉歲公同呈縣提取本利。糶穀施賑。現已由該地方官詳報撫藩蘇州太倉等處。

亦皆踵行等語。鄉里任恤之誼。以樂歲殷戶之羨餘。備歉歲飢民之口食。其用意與社倉相似。實為善舉。著胡克家即飭屬立案通詳。嚴行飭禁州縣官。勿許私向典商借貸挪移。俾商民不虞貽累。以堅其好善樂施之意。○又諭潤祥莫晉將查明鳳陽常州幫兌米色不純。各具摺奏聞。並將米樣呈覽。鳳陽常州幫兌宜興荆溪二縣漕米。該倉場等既公同驗明夾雜不純。此內應行賠換米二百

石。著即令該丁等照數賠補。潮溼灰暗米八千餘石。交該糧道等督令上緊挑晾風節。所有此項漕米四萬六千九百餘石。既難久貯。准其分派本年八九兩月輪放。甲米各倉先行開放。至該丁等供稱。在淮賠換時。知府卞斌並未購買粳米。係買春熟後米散給幫丁。而以幫丁日食粳米易換抵補。潤祥摺內又稱。訊據該丁等初供。有每石加銀六錢。繼稱係行月折色。又供係篩米之費等語。所訊情

節不甚符合。著將伍丁劉洪慶等解往江南交孫玉庭提同解任。知府卞斌及案內一千人證。秉公審訊。不可稍存迴護。審明後分別定擬具奏。潤祥莫晉摺及進呈米樣俱著發給閱看。○除河南孟津縣塌沒地九十七頃五十七畝有奇額賦。○癸巳旌表守正捐軀直隸樂亭縣民婦王韋氏。○甲午命刑部右侍郎成格吏部左侍郎王鼎。馳往山西查辦事件。○乙未遣官祭

火神廟。○命察哈爾都統松筠。往奠喀爾喀。賽因諾顏扎薩克親王巴彥濟爾噶勒茶酒賞銀一千兩治喪。○丙申

上幸萬壽山。諭內閣。巴哈布奏請飭各省營伍。講習紀律一摺。國家設立營伍。訓練兵丁。原應講明紀律。俾各有勇知方。若但演習技藝。而於殺敵致果之義。不能曉然於心。一經親歷行陣。或退縮不前。即平日技藝精良。亦徒為虛飾。而鮮實用。凡有將帥之責者。平日

教演兵丁。即當明白曉諭。以兵法有進無退。臨陣退縮者。國有常刑。奮勇捐軀者。恤及後裔。況果敢直前。成功者多。而傷夷者少。若怯懦奔逃。軍法殺無赦。無一能苟免者。是與其死於法。何若死於敵。死敵者。百世流芳。死法者。罵名千古。使兵丁習聞此言。人人心中大義。則勇敢倍增。節制之師。自莫非干城之選矣。至技藝。亦必時加訓練。近閱外省摺奏。操演兵丁情形。率舉春秋二操。有云。夏令兵丁多務農功。恐妨其耕作。者。此言大誤。古者寓兵於農。是以三時務農。一時講武。今兵農判為兩途。取賦於農。以贍兵。即藉兵入伍。以衛民。若仍以耕耨而誤差操。豈非虛糜糧餉。嗣後各將軍督撫提鎮等。務督率將弁。將所轄兵丁。常川練習。不可稍有曠廢。以肅軍紀。而勵戎行。將此通諭知之。○又諭富俊奏。請停每年奏派侍郎帶員巡查海口一摺。所奏是查緝私濫。惟在隨時隨地嚴密訪拏。方可冀

有弋獲。盛京每歲秋閒。派侍郎一員。帶領官役多人。巡緝海口。奸商人等。早已聞風遠颺。是以數年未經查獲一案。此事竟成具文。著自本年為始。即行停止。嗣後仍責成該將軍。及管有海口之城守尉協領。並州縣廳員等。嚴查密緝。獲犯據實報解審辦。如查緝疏懈。致私濫偷漏。經別處拏獲者。審明係由何處偷漏。將專派緝捕各員。按例懲處。並將該管上司一併察議。○旌表守正捐軀河南浙川縣民解玉寬妻張氏。○丁酉旌表守正被戕廣東海豐縣民曹日通妻余氏。○戊戌諭內閣長齡奏。請飭禁哈密小南路。以重巡防一摺。新疆地方。經由道路。俱設有墩臺營汛。稽查往來行旅。且沿途更換路照。定制綦嚴。此小南路係後來踰出僻徑。其間三百餘里。並無臺汛。屢經封閉。若復任聽行走。不特奸商私販致多偷越。即逃匪潛行。亦無從盤詰。著將由哈密至奇臺之小南路。永遠封閉。如再

有商民私由此路行走者。查獲照律治罪。再
有新疆大臣奏請復開。或私令商民行走者。
亦治以違旨之重罪。決不姑恕。○己亥。諭軍
機大臣等。朕風聞山西藩司習振翎年老健
忘。每接見屬員。不能記其姓名。皆需家丁在
旁指告。外間稱為習健忘。又每次稟見巡撫。
必私帶門丁李三。潛立窗外。將該撫藩議論
一切公事竊聽。回署後錄底存貯。以備該藩
司遺忘詢問。又忻州吏目費鈞。向在山西藩

司衙門幫辦幕務。歷任相沿。吳邦慶到任。始
將伊徹出。姚祖同調任後。習振翎又將該吏
目調入藩署。幫辦幕務。著成格等於到晉後。
密加查訪。該藩司稟見巡撫時。所帶家丁。自
不止李三一人。且衡齡亦有家丁在旁伺候。
其李三每次在窗外竊聽。或私用筆記。閩省
必有見聞。不難查訪得實。至吏目費鈞。如現
在藩署幫辦幕務。更不難一訪而知。此二事
成格等查明。且不必宣露。先將費鈞飭回忻

州吏目本任。俟查明陽曲控案。如果屬實。該
撫藩臬近在同城。均有失察之咎。若復有得
受供應等事。則情罪更重。即於彼案內。叅奏
將習振翎一併治罪。或彼案並無牽涉。或止
失察處分。成格等即將該藩司年老不職。並
違例調用屬員幫辦幕務。具摺叅奏。將此諭
令知之。○旌表守正捐軀河南封邱縣民高
可明妻李氏。○庚子。

上詣

大高殿行禮。○還宮。○諭內閣。常明奏。審明誤
傷母命之重犯曾固秀。問擬凌遲處死一案。
聲明情節。與山西民人白鵬鶴。誤傷母命相
同。奏聞請旨。所辦實屬錯誤。白鵬鶴一案。係
因拾石擲嫂。其母從旁屋走出。誤傷斃命。非
白鵬鶴意料所及。此案曾固秀與妻趙氏。
口角。用刀疊戮多傷。伊母曾趙氏適在身後。
拉勸致被戮斃。刀在該犯手內。既與擲石不
同。伊母近在身後。亦不能諉為不知。與白鵬

鶴案情迥不相符何以謂之誤殺案關倫紀
豈可稍涉輕縱曾固秀著即凌遲處死○又
諭常明秦擎獲在逃重犯審明定擬一摺此
案劉映山係殺死一家二命例應立決梟示
之犯自嘉慶二年犯事後逃逸已稽誅二十
年之久該督於擎獲審明後即當恭請王命
先行正法乃仍具奏請旨辦理殊屬錯誤劉
映山著即處斬梟示○諭軍機大臣等將攸
銘秦擎獲詐搶米判墜夷船匪犯李奉廣等
分別斬決梟示並另片奏將噢地夷人量加
賞卹等語此案米喇墜國噢地夷船在香港
外洋停泊該督將李奉廣等詐搶拒捕殺傷夷
人五命該督將李奉廣等擎獲恭請王命分
別斬梟並傳齊該國在粵夷商環視行刑俾
知天朝法度森嚴咸知畏服所辦甚是至將
噢地夷人量加賞卹一節則辦理錯誤噢地
夷船如係裝載該國貨物運赴粵省銷售被
內地奸民搶劫殺傷除將匪犯正法外自應

優加賞卹以示懷柔茲該夷人所帶鴉片烟
坭是例禁之物如該夷人私運入口即應按
律治罪今因其橫被劫奪戕害數命不行究
治已屬恩施何得再加賞卹蔣攸銘即通行
曉示各夷商以鴉片烟坭產自外夷不准私
入內地天朝例禁綦嚴此次噢地夷船私販
烟坭因其未經進口又遭劫掠是以祇將烟
坭燒燬免其治罪嗣後各夷船僮再有私帶
鴉片烟坭者進口之日兵役等照例嚴搜一
經搜出除將烟坭焚燬沈溺外必將私販之
人從重治罪決不寬貸如此嚴切曉諭先令
各夷商一體周知共知儆懼將來有犯必懲
更不能託詞未悉例禁也將此諭令知之○
以孟秋時享
太廟自是日始齋戒三日○辛丑諭內閣御史
謝崧奏請禁奸商囤積並運米出城一摺京
城鋪戶囤積米石及偷運出城例禁綦嚴現
在米價較四五月間增昂自應嚴查弊端以

平市價。著步軍統領衙門。順天府。五城。即查京城米鋪。如有違例多囤至五百石以外者。照例懲辦。其各城門私放米石。接濟回漕。並著實力查拏。有犯必懲。毋稍疏縱。○以山西太原鎮總兵官祥泰年老。命來京。調山東兗州鎮總兵官劉榮慶為太原鎮總兵官。江南徐州鎮總兵官馬瑜為兗州鎮總兵官。○旌表守正捐軀河南臨漳縣民李滿場妻房氏。○壬寅。除江西豐城。清江。二縣水衝地三十

實錄卷三三二

三

七頃六十二畝。有奇。額賦。

大清仁宗受天興運敷化綏猷崇文經武孝恭勤儉端敏英哲睿皇帝實錄卷之三百三十一

實錄卷三三二

三十四

[illegible]

嘉慶二十二年丁丑秋七月癸卯朔享

上親詣行禮。○幸圓明園。○乙巳以故鄂爾多

斯扎薩克貝子扎木巴勒多爾濟姪桑齋旺
浴襲爵○丙午諭軍機大臣等御史高翔麟
奏江蘇昭文縣令黃崐信任漕折總書張姓
勒折浮收張姓本係犯事革役因與該知縣
之孫黃仁溥結交飲博得以鑽營改名復充
勾通一氣婪索多端民間物議沸騰臚款上
控積有數十案該管上司但以一批了事請

~~_____~~

究當經降旨以楊超鐸係已經革職之員何庸再請拏問將主稿之胡克家議處會銜之孫玉庭察議飭令速拏要證楊錦韓升嚴審定擬迄今又已兩月何以尚未審結亦無一字覆奏是誠何心實屬因循疲玩著該督撫將此案與本日飭交之昭文縣黃嶠一案自接奉此旨之日起定限二十日內俱迅速審訊明確定擬具奏若再延玩嚴譴立降矣將此諭令知之○除江蘇江陰縣坍沒田一萬

四千九百七十八畝有奇額賦。戊申諭內閣御史蔣詩奏請嚴禁州縣徵收折色運弁需索兌費一摺。漕糧為天庾正供，原應徵收純潔米石，如數兌運。若徵漕時先收折色，兌運不敷，輒於水次購米完交，或串通弁丁給與兌費，於抵通前盜買回漕，攪雜輸納，日久必致京通倉貯紅朽相因，不可不嚴行查禁，以杜其源。著通諭有漕省分各督撫嚴飭所屬州縣於收漕時務令徵收乾潔好米，如數交兌。毋許私收折色，並嚴禁弁丁等通同舞弊，私索兌費。如有前項弊端，該督撫及漕運總督據實嚴叅重懲，以肅漕政而重倉儲。○緩徵陝西華陰陰潼關渭南大荔朝邑六廳州縣水災新舊額賦。○己酉旌表守正捐軀四川成都縣民李友林妻廖氏。○庚戌上幸靜明園詣龍神廟拈香。○戶部議准直隸總督方受疇疏報三河香河天津滄平山新樂遵化豐潤

廣昌九州縣開墾荒地九百七十五頃有奇。照例升科從之。○辛亥諭內閣本年京師入夏以來雨澤稀少，朕省咎思愆，恐政事或有闕失，及內外臣工怠玩不職，以致昊蒼垂象示警。又或因逆匪潛伏近畿，致沴氣所結上干天和。特降旨令在廷諸臣各矢忠誠，謹言入告，並令職司緝捕各衙門嚴緝逆匪，摘發伏匿原冀諸臣仰體朕懷，有言責者剴切敷陳。司捕務者認真訪緝，庶可除否塞而成交泰。消氛戾而召祥和，孰意上以誠求，下仍虛應。自降旨以來，科道等紛紛陳奏，並無經國遠猷，或糾一事或改一例，大率皆與吏部銓法相關。其餘五部俱無論及者。揆其意向，不過各私親故改一條例為一二人，早得除授地步，不思法令數更，最乖政體。銓法遵行已久，若朝夕改易，人將何所適從？如果吏部事務叢脞，英和戴均元等或有貪黷廢法及實不稱

職者該科道確有證據不妨指名叅奏朕必嚴行查辦若旁敲側擊毛舉細故輕改舊章遂其私意豈朕求言之意耶其步軍統領衙門及五城順天府近日屢奏獲犯祇係看香治病拜廟誦經及逃遣疊竊各細事並未緝獲逆匪一名此不過因降旨飭責藉此以見其認真訪緝掩飾目前朕以誠心待諸臣諸臣不以忠悃事上惟思苟且塞責此

上天所以昭示早象未能兆成康阜也特再降

旨通行曉諭嗣後上言者當於國計民生要務指陳利弊或確知內外大臣營私執法據實劾叅以肅綱紀職司緝捕者將飭拏最要次要各逆犯認真偵緝期於必獲不得舍本逐末以副朕宵旰勤求至意○又諭御史姚瑩奏吏部役滿經承達例留京包攬部務一摺茅友蘭朱乾豫戴易堂著步軍統領衙門拏交刑部審訊照例治罪此外各部院衙門役滿書吏藉端逗遛者自亦不少並著步軍

統領衙門及五城一體嚴查勒令回籍毋任潛匿京師招搖舞弊○又諭伯麟等奏邊地兵糧採買維艱懇請仍照原議兼支折色一摺滇省緬寧地處極邊產米稀少該處歲需兵米額徵及撥運秋糧不敷支放仍需給價於本境採買現在新增兵丁每年不敷兵米較從前增至一千七百餘石若令全數採買必致有妨民食該督等奏請照普洱威遠二鎮營之例於秋冬二季兼支折色如恩著照

所請緬寧廳新舊兵丁月糧准其於每年秋冬二季大建月折給銀十日小建月折給銀九日每石折給銀一兩八錢令兵丁自行買食其餘不敷米八百餘石仍以每石一兩價銀發給該廳採買自嘉慶二十二年秋冬二季起本折兼支其二十一年所支本折歸案分別報銷○壬子孝懿仁皇后忌辰遣官祭景陵○諭內閣八旗滿洲蒙古漢軍例有養贍

孤寡錢糧朕聞宗室覺羅內孤寡人口向無養贍成例該衙門如何辦理之處著宗人府王公查明具奏尋奏上得旨前因宗室覺羅內孤寡人口向無養贍成例令該衙門查明具奏茲據奏稱宗室覺羅孀婦生有子嗣及有可過繼為子者向例不待及歲分別給予養贍銀米至無可過繼之孀婦及無伯叔兄弟之孤女向由該族長佐領等自行辦給並無養贍成例等語八旗滿洲蒙古漢軍孀婦

孤女俱有例給養贍錢糧宗室覺羅內孤寡無依者尤當加恩贍卹資生計除宗室覺羅孀婦親子繼子仍照向例不待及歲給予養贍外其宗室孀婦無子可繼者著每月給予二兩養贍銀米無伯叔兄弟之孤女著每月給予養贍銀一兩五錢覺羅孀婦無子可繼者著每月給予一兩五錢養贍銀米無伯叔兄弟之孤女著每月給予養贍銀一兩用示推仁矜恤至意○癸丑

上御勤政殿聽政、命每年春秋致祭圓明園惠濟祠

河神廟前期奏派管理圓明園大臣行禮○以太常寺少卿色克精額為卿、以兵部尚書和寧署理藩院尚書禮部尚書戴聯奎、署兵部尚書協辦大學士吏部尚書戴均元、署刑部尚書、山西布政使習振翎以年老不職革職以湖北按察使周光裕為山西布政使起降調甘肅布政使嚴煥為湖北按察使

甲寅諭內閣太常寺進呈清文則例第三十六卷內

世祖章皇帝

孝惠章皇后

孝康章皇后

聖祖仁皇帝均未出格擡寫該員等並不敬謹校對非尋常疏忽可比太常寺滿洲堂官俱著交部嚴加議處其前次奏請議敘之處著即徹銷所有紙工等項均不准開銷該衙門

漢堂官不識清文均無庸議尋議上得旨成寧著降為內閣侍讀學士候補舒寧色克精額均著降為六品贊禮郎乙卯諭內閣御史周鳴鑾奏請甄別捐納初任人員一摺道府州縣皆有地方之責若任用非人則所關於吏治民生者甚鉅人材無方即捐班內亦未必無可用之才其由部選實缺者一經到任即有經手刑名錢穀可以驗諸實事優劣不難立見近來此項部選人員不少到任後未見該督撫甄別一人豈果人人稱職耶是在該督撫潔己秉公留心察覈與其遷延包庇迨至劣跡昭著將該員黜革治罪正所謂愛之適以害之矣何若於到任未久之時察看才不勝任早為甄別或予原銜休致或改任丞倅佐貳不令貽誤地方其所全不亦多乎其有庸鄙貪酷者尤當隨時據實揭叅如有姑容別經發覺者必將該督撫一併懲處不貸又諭御史周鳴鑾奏蠹役糾眾滋事

併革役復充嚇詐多賦請飭查辦一摺蠹役附勢擾害地方及革役復充把持弄法屢經降旨飭禁地方官自應時加查察遇事嚴懲庶足以儆積蠹而靖閭閻今據該御史奏山東單縣卑役曹岩糾眾持械陵辱生員李端恒一案該縣審明屬實僅將曹岩枷號一日即行釋放又革役姬瑞因張改毆死劉秋案證嚇詐多賦一案發交該撫飭提審訊抗延不解現仍原名充役該地方官實屬徇縱著陳預即將此二案人證親提嚴審按律定擬具奏○丙辰上幸萬壽山詣廣潤祠拈香○調兵部尚書和寧為禮部尚書工部尚書伊冲阿為兵部尚書以工部左侍郎蘇楞額為工部尚書內閣學士果齊斯歡為工部左侍郎○以二等侍衛哈寧阿為太常寺卿○調正黃旗漢軍都統和寧為鑲藍旗滿洲都統鑲白旗蒙古都統伊冲阿為

正黃旗漢軍都統正黃旗蒙古都統索特納
木多布齋為鑲白旗蒙古都統以散秩大臣
瑞齡為正紅旗漢軍副都統丁巳中元節
上詣

安佑宮行禮遣官祭

永陵

福陵

昭陵

昭西陵

孝陵

孝東陵

景陵

泰陵

泰東陵

裕陵遣官祭

孝淑皇后陵寢遣官祭

端慧皇太子園寢鑄給湖南寶慶協都司
關防從總督阮元請也戊午諭內閣御史

李振祐奏請禁考試騎射頂替積弊一摺所
奏甚是八旗以騎射為根本是以考試進士
舉人生員以及考試繙譯均先閱看騎射其
弓馬生疏者即不准應試此我朝之舊典必
應永遠實力奉行若其人素不練習騎射臨
場倩人替代即與文場考試槍替無異必應
按律治罪嗣後凡遇此項考試著各旗都統
等親身先行考驗能騎射者始准送名派出
監試之王大臣於考試時令各旗章京等逐

排識認射單步箭即射馬箭仍令本人下馬
至階前報名如查有替代情弊將雇倩之人
與頂替之人一併治罪儻監試王大臣等市
惠徇縱別經發覺定將王大臣等一併懲處
嗣後遇有考試著報明御前大臣奏派乾清
門侍衛二人至放馬處監視又諭孫玉庭
奏查明鎮江運河應辦各工請借項挑修攤
捐還款一摺鎮江府屬徒陽運河為江浙漕
艘必由之路江湖灌注易致停淤前給事中

陶澍條奏濬治修建各事宜發交該省確勘
今據該督勘明分別應緩應修詳議具奏其
應辦各工著即照所議辦理至攤捐歸款殊
可不必地方應辦公務朕從不存惜費之見
此項工程既為利漕所必需所估工料土方
價銀八萬零一百五十餘兩著即在於江蘇
藩庫抄案變價及鹽規匣費項下如數動支
飭屬勒限興修但必須工歸實用帑不虛糜
該督等認真查察如有草率偷減情弊據實

嚴叅工竣覈實報銷毋庸攤捐歸款○諭軍
機大臣等已哈布奏訪獲拜盟結會匪犯劉
東貴等提省審辦並派員馳往永州府一帶
搜拏餘犯給予告示隨帶張貼宣布皇仁許
其赴官投首照例分別減免等語所辦非是
匪犯結會斂錢一經訪聞即應嚴拏懲辦其
有畏法悔過自首到官具結改悔者方准奏
明免罪原以該犯等真心悔悟是以恩施格
外許其自新若給發告示招令投首該犯並

非出自本心免罪之後安保其不故智復萌
乎已哈布辦理錯誤著傳旨申飭仍將案內
在逃各犯認真緝獲按律辦理可也將此諭
令知之○調山西太原鎮總兵官劉榮慶為
大同鎮總兵官大同鎮總兵官董連第為太
原鎮總兵官○旌卹遇賊被戕直隸長垣縣
廩生張貽忠忠東明縣生員戴丙寅監生何庠
元民人逮永錫等七名如例○己未

上詣

安佑宮行禮○庚申

上以秋獮木蘭自圓明園啟鑒命

皇次子智親王○皇三子綿愷皇四子綿忻

隨駕○命莊親王綿課大學士曹振鏞尚書

英和景安留京辦事○免蹕路經過地方本

年額賦十分之三○是日駐蹕南石槽行宮

辛酉諭軍機大臣等陳預奏長山縣知縣

譚之遂因縣民置產匿稅經該縣開單分交

約正挨戶催追有鄉民朱可輅等多人聚至

大堂求請免催該縣當堂開導該鄉民等不服喧嚷破暖閣復至典史陳爾寧署中抄打請將譚之遂解任並將陳爾寧撤回嚴拏朱可輅等質究確情從嚴懲辦等語民間匿漏契稅本干例禁此案長山縣知縣譚之遂無論有無需索滋擾並違例多收情弊典史陳爾寧有無慙憑干與情事該民人等總不應將知縣大堂暖閣砸破並至典史衙署抄打若先將知縣解任典史撤回該民人等聞知豈不愈長刁風此時知縣譚之遂著無庸解任典史陳爾寧亦無庸撤回若慮該二員查拏各犯或有不妥該撫可遴派明幹文武員弁速往長山協同譚之遂等將朱可輅並朱元鼎等一千人犯按名全行拏獲並將譚之遂陳爾寧傳至省城秉公質訊一面委員將長山縣知縣及典史印務暫行署理如審明譚之遂並無藉端需索及違例多收典史亦無慙憑干與情事即將朱可輅等加倍治

罪該縣該典史均無庸叅處即飭令回任僅訊明譚之遂陳爾寧實有肇釁情弊除將朱可輅等照例治罪外再將該縣該典史一併叅處將此諭令知之○賞密雲縣接駕兵丁半月錢糧○是日駐蹕密雲縣行宮○壬戌駐蹕要亭行宮○癸亥諭內閣前據御史葉中萬奏藩司李賡芸自盡一案閩省輿論咸謂由於張均之多方激成張均前已奉旨革職熙昌等不應奏請開復原官交部察議當即降旨交董教增秉公確查茲據奏稱確加查訪閩省實有此案係張均激成之論以張均接收交代朱履中短缺鹽課二千餘兩欲將書欠作抵張均不允催交現銀朱履中情急遂有稟許原管道府收受陋規之事僅張均稍肯通融朱履中必無此稟亦可無李賡芸自縊之事竟委窮源羣歸咎於張均交代刁難等語朱履中短缺鹽課以書欠作抵本屬違例張均不肯接收尚為持正外省州縣

交代互相牽混接任者不加詳查扶同徇隱以致虧缺相仍張均之不肯通融正係照例辦理安得謂之有心挑剔至朱履中之情急捏稟李賡芸之被誣自盡皆非張均之所能逆料該員之過惟在代朱履中墊銀三百兩以圖自免交代遲延處分又代朱履中改削捏造家人何佳姓名混請銷案稟帖有此二節均干吏議若張均並此而無之即察議亦無庸矣此案業已查明張均著仍照熙昌等

原擬開復原官交部察議熙昌王引之所擬並無輕縱著無庸議○諭軍機大臣等綿課等奏審訊宗室慶豐自首入教一案慶豐初供伊與胞兄慶遙俱係白蓮教曾拜海康為師今又供伊因向慶遙借錢口角起釁氣忿赴步軍統領衙門混喊入教伊與慶遙並未習教慶遙亦供實無習教情事等語所訊情節顯有不實慶豐在步軍統領衙門供認伊兄弟拜師習教甚堅茲改供因向伊兄借錢

不遂遂捏供習教以圖洩忿試思借錢不遂其嫌甚微况係同胞兄弟何至即以入教重情誣捏陷害且將己身一併牽入殊非情理明係恐陷重咎又改前言斷不可信必須嚴究實情不可任其脫卸至倪劉氏並其姪倪七兒均係慶遙兄弟家奴素無讐怨何以到案即供明慶遙慶豐均入紅陽教係杜九之徒指證甚為確鑿此必慶豐自首後復生後悔與慶遙彼此串供慶遙亦希圖卸罪捏出

借錢情節商同翻案慶遙著革去奉恩將軍慶豐著革去繙譯舉人交綿課等嚴行審訊此案慶豐原供十八年九月十五以前豫知逆情尤為緊要情節綿課等不可因身係宗室稍存迴護消弭之見務令供吐實情母任隱匿俟審得確供於一二報後繕錄具奏再行定讞可也將此諭令知之 旌表守正捐軀江蘇豐縣民王珠女王氏安徽霍邱縣民王炳開妻張氏○賞熱河接駕兵丁及看守

避暑山莊弁兵一月錢糧看守口內口外各行宮弁兵半月錢糧○是日駐蹕兩間房行宮○甲子駐蹕常山峪行宮○乙丑諭內閣成格等奏審擬陽曲縣派差苦累一摺此案衡齡失察之咎尚輕惟該省藩司習振翎老病昏庸一任幕友家人主持公事該撫近在同城日日接見豈得諉為不知乃有心徇庇聽其貽誤地方吏部照溺職例議以革職實係咎所應得衡齡著革去山西巡撫另降清

字諭旨賞給藍翎侍衛前往新疆換班其案內應議各員著交吏部議奏各犯罪名著交刑部議奏○諭軍機大臣等綿課等奏覆訊慶豐慶遠已據供認拜海康為師入紅陽會十八年九月十一二日海康並曾告知十三十五等日街上就要搶劫似係豫知逆情請將海康提案質訊等語海康一犯已降旨令富俊迅速派員解京質訊矣慶遠既供認拜海康為師入紅陽教並海康曾於十八年九

月十五以前告知有人搶劫是其豫知逆謀已無疑義恐其中尚有隱匿未吐之情著綿課等心存公正以國家社稷為重切勿稍有瞻徇以致不實不盡再向慶遠嚴切追究當日海康既向伊告知搶劫日期必將逆謀備細向伊述說令其據實供吐即將此時未獲逆犯祝現等或亦知其下落熬審務得確情毋任狡展審明後即行據實具奏其失察慶遠之族長總族長查明開列名單並將從前

失察海康之族長總族長係屬何人當日結案時如何處分一併具奏再十八年承審海康之宗人府堂司各官係屬何人並著綿課等將原摺原稿查出於下報一併奏聞將此諭令知之○以山東布政使和舜武為山西巡撫雲南按察使廣慶為山東布政使仍戴三品頂帶署江西按察使廉敬為雲南按察使江蘇糧儲道邱樹棠為江西按察使○賞已革山西巡撫衡齡藍翎侍衛為和闐領隊

大臣（是日駐蹕喀喇河屯行宮）丙寅

上至熱河詣

文廟瞻禮

關帝廟

城隍廟拈香）詣

永佑寺行禮○賞熱河綠營兵丁一月錢糧○

是日駐蹕避暑山莊至八月丙戌皆如之○

丁卯除奉天承德蓋平二縣沙壓田四百畝

有奇額賦○戊辰諭內閣蔣攸銑奏廣東雷

瓊鎮總兵洪鼐年力就衰請旨勒休一摺國

家簡用督撫大吏統轄文武所屬官員如有

年力衰積才不稱職者俱當留心查察據實

糾叅嘉慶二十年曾經降旨通飭茲蔣攸銑

於雷瓊鎮總兵洪鼐衰老無能即行叅奏雷

瓊距省城較遠該督尚能留心體察不肯姑

容較之衡齡與藩司習振翎近在同城乃於

該藩司老病昏庸有心徇庇匿不奏聞二人

相提並論其公私明闇豈不大相懸殊嗣後

各督撫於所屬文武官吏務當認真考察而

於藩臬提鎮大員尤當秉公察覈不可瞻徇

情面聽其貽誤地方雷瓊鎮總兵洪鼐著即

勒令休致○又諭蔣攸銑奏請嚴禁茶葉海

運一摺閩皖商人販運武夷松羅茶葉赴粵

省銷售向由內河行走自嘉慶十八年漸由

海道販運近則日益增多洋面遼闊漫無稽

查難保不夾帶違禁貨物私行售賣從前該

二省巡撫並不查禁殊屬疏懈念其事屬已

往姑免深究嗣後著福建安徽及經由入粵

之浙江三省巡撫嚴飭所屬廣為出示曉諭

所有販茶赴粵之商人俱仍照舊例令由內

河過嶺行走永禁出洋販運儻有違禁私出

海口者一經拏獲將該商人治罪並將茶葉

入官若不實力禁止仍聽私運出洋別經發

覺查明係由何處海口偷漏除將守口員弁

嚴叅外並將該巡撫懲處不貸漏稅事小通

夷事大不可不實心實力杜絕弊端也○調

江西按察使邱樹棠為山西按察使山西按察使承光為江西按察使以廣東龍門協副將李增階為雷瓊鎮總兵官己巳諭內閣常明奏請留川省得力之副將余步雲遊擊江萬里馬正雄在川升補一摺川省從前勦捕教匪軍務甫竣曾經該省總督將軍將熟悉原籍地方情形之將備奏懇留川升補如桂涵羅思舉均已擢至專閫大員現在川省輯寧已久若籍隸本省之員概請奏留升

補將來必至該省營員多係本籍之人殊乖體制除從前奏留者無庸撤回余步雲江萬里馬正雄三員俱不准留川升補即自此次為限嗣後如有似此奏請者除不准行外仍將違例瀆奏之大員交部從重議處又諭從前宗人府審訊海康拜逆犯劉興禮為師入紅陽會未將與知逆謀重情審出本有應得之咎念其定案時將海康擬以縲首尚非輕縱經朕降旨改為發往盛京圈禁所有承

審之宗人府堂司各官俱加恩免其議處令慶遠慶豐已審明俱習紅陽教於十八年九月初間經海康豫先告知逆情並曾赴董村在逆犯鄭八家住宿所有該管之總族長晉隆敬徵族長屏翰俱著革職加恩賞給四品頂帶作為間散宗室晉隆敬徵著即回京仍責令承充總族長屏翰仍責令承充族長失察慶遠慶豐之宗人府堂官俱查明交部議處慶遠慶豐非我族類俱著挑去黃帶子交

刑部嚴加鎖禁再行嚴審又諭據董教增奏已革福建巡撫王紹蘭稱會審朱履中一案隨聲附和罪無可逭仰蒙不加嚴譴僅予罷斥惶悚感激交卸印務即起程赴京泥首道旁叩謝天恩等語王紹蘭係革職之員分不應謝恩伊現已自閩起程著傳諭浙江江蘇山東直隸各督撫飭知沿途地方官王紹蘭行抵何處截令即日回籍不許來京○奉恩輔國公晉隆緣事革爵以其兄伊犂將軍

晉昌仍襲奉恩輔國公○以總管內務府大臣和世泰為理藩院尚書頭等侍衛裕恩為內閣學士兼禮部侍郎銜○以正白旗漢軍都統賽沖阿為鑲黃旗領侍衛內大臣工部尚書蘇楞額兼鑲黃旗漢軍都統正藍旗滿洲副都統那彥寶兼鑲黃旗護軍統領調鑲黃旗蒙古副都統多山為正紅旗滿洲副都統以鑾儀衛冠軍使福泰為鑾儀衛兼鑲黃旗蒙古副都統○旌表守正被戕廣東歸善

縣民李瑜芳妻毛氏守正捐軀直隸高陽縣民張受仁女張氏雄縣民耿加會女耿氏安徽建平縣民嚴文漢妻岑氏○庚午

上御如意洲賜扈從王公大臣蒙古王貝勒貝子公額駙台吉等食並賞賚有差○賞熱河及額魯特兵丁一月錢糧○辛未諭內閣熱河兵丁向無普賞一月錢糧之例

皇考高宗純皇帝每年五月駐蹕避暑山莊八月始行進哨該兵丁等安設堆撥直班日期

較多且射靶中箭人數亦多是以

特恩普賞一月錢糧自朕巡幸熱河兵丁步射尚好是以照舊普賞去年今年均因兵丁等步射較前平常中箭人數稀少將都統和寧慶溥交部察議協領等議處兵丁等仍賞一月錢糧此二年內該兵丁步射俱屬平常自係倚恃賞項平日並不留心學習從前

皇考高宗純皇帝五月間即來巡幸該兵丁等直班日期較多尚能乘暇操演朕七月開始

來熱河豈轉無暇操練耶此而不示以懲戒恐兵丁等漸習偷安朕明歲恭詣

祖陵不克巡幸熱河後年朕臨幸時若該官兵等步射仍如此平常不惟將該管都統章京等從重議處併將普賞一月錢糧之例永行停止祇將中靶兵丁及額魯特兵丁照例賞給此旨著交熱河都統傳諭章京兵丁等俾其家喻戶曉一體凜遵○又諭御史王松年奏奸商運米出城請旨查辦一摺京城鋪戶

偷運米石出城例禁嚴密經降旨申禁乃內外城各門仍不免偷漏本月二十五二十六日該御史目擊大車十餘輛運米出廣寧門並見大街各米鋪門口車輛絡繹裝載守門員弁毫無稽察藐玩已極除那彥寶現在隨團英綬現在圓明園住班均予免議外英和著先行交都察院議處所有廣寧門守門官弁查明是日直班之員俱著革職交刑部嚴訊如有得賄賣放情弊計贓按例治罪其

失察之該管各員並著查明分別叅處該御史指出之隆豐等米鋪一併查明交刑部審訊並著順天府五城一體查緝獲犯歸案審辦○諭軍機大臣等劉鑲之等奏據方受疇咨會查明謀食飢民遣令回籍等語本年直隸所屬州縣多有雨澤稀少之處無業貧民有攜家北來覓食者劉鑲之等即分飭四路廳員或設局留養或資送回籍務須妥為安置毋令失所再在逃各逆犯恐有假裝飢民

吏

吏

吏

涸跡其中者著劉鑲之等派員多帶眼目留心查察或可冀有弋獲該府尹等仍一面咨行方受疇令其查明直隸被旱較重州縣先行分設粥廠善為撫卹並先期出示曉諭俾貧民等安心待賑自不致遠涉北來也將此諭令知之○是月兩江總督孫玉庭奏請以江蘇候補知縣楊欲仁變通補用得旨此人並無奇才異能豈可變更成例令別省效尤濫行保題遂其私意所奏不准吏部知道

大清仁宗受天興運敷化綏猷崇文經武孝恭勤儉端敏英哲睿皇帝實錄卷之三百三十二

大清仁宗受天興運敷化綏猷崇文經武孝恭勤儉端敏英哲睿皇帝實錄卷之三百三十三

乾隆四十四年八月二十日奉 上諭 吏部知道欽此

乾隆四十四年八月二十日奉 上諭 吏部知道欽此

乾隆四十四年八月二十日奉 上諭 吏部知道欽此

乾隆四十四年八月二十日奉 上諭 吏部知道欽此

乾隆四十四年八月二十日奉 上諭 吏部知道欽此

乾隆四十四年八月二十日奉 上諭 吏部知道欽此

奏

嘉慶二十二年丁丑八月壬申朔諭內閣長

齡奏特參需索不遂杖斃番命營員一摺地方官無故杖斃人命大干法紀今署黎園營都司甘肅提標守備徐士麟因派買牛羊不遂輒將番民莽噶拉木棍責斃命貪酷不法已極徐士麟著即革職拏問其得受交馬陋規銀兩之把總王蔭本外委滿和李天伏俱著革職交該督提同應訊人證嚴行審究將來定罪時杖斃番命之劣員應行擬抵其得受交馬規銀各員亦不得照尋常計贓論罪

均著加重定擬具奏前任都司張雲漢現來行在引見著兵部即行扣除將該員革職拏問解回甘省歸案質訊○癸酉旌表守正捐軀直隸大名縣生員陳筮泰女陳氏○甲戌

遣官祭

文昌帝君廟○乙亥遣官祭

關帝廟○諭內閣本日據松筠審擬喇嘛

敦等搶劫貨車並扎斃民人張明一案係用

清字摺具奏摺內又夾有漢字簡明節畧殊

屬重複察哈爾都統向來奏事多用清字摺

至審辦案件若情節煩冗者原准用漢字摺

具奏著諭知松筠嗣後該衙門奏事其例用

清字者仍用清字具奏若審辦案件案情較

簡者於清字奏摺之外再錄漢字供單一分

即可聲敘明晰如案情節次冗長徑用漢字

摺定擬具奏不准於清字摺之外再加漢字

節畧以符定式○步軍統領奏查拏偷運米

石人犯訊出官員得賄請交部嚴審得旨此

案西城藉查辦囤積為名索詐米鋪錢文至四千五百千之多實屬藐法其所封隆豐等鋪米石如例不應禁即不當同時查封若係例應封禁之米該巡城御史彼時即應奏泰究辦何以該米鋪一經湊給錢文旋即徹封恐尚非該吏目一人所能主持吏目朱學斐著即革職巡城御史伊綿泰蕭鎮著一併解任交留京王大臣會同刑部嚴行審訊如訊出該御史實有知情染指情弊無庸具奏即行革職嚴究按律定擬其已革城門領孫紹佑門吏王德千總德桂春成所供上月二十五六兩日大車所載均非違禁米石其言亦未可信並著歸案嚴審如有得賄賣放情弊均計贓按律治罪○戶部議准前任陝甘總督和寧疏報皋蘭靖遠靈三州縣並紅水縣丞所屬開墾地二十八頃五十畝有奇照例升科從之○丁丑祭先師孔子遣大學士戴均元行禮○諭內閣

英和等奏拏獲西城封禁米鋪案內說事過錢犯證訊明巡城御史伊綿泰蕭鎮得贓請旨辦理一摺御史為風憲之官遇有貪官汙吏聽其糾參分應廉正自持方為無忝厥職乃伊綿泰蕭鎮於封禁米鋪案內索詐分肥各得受贓錢一千二百千藐法已極伊綿泰蕭鎮俱著革職拏問交留京王大臣會同刑部嚴行審訊定案時俱著加等問擬即派熙昌前往伊綿泰家中查抄派秀寧前往蕭鎮家中查抄如查明伊綿泰蕭鎮一切字紙有囑託賣法等件密封進呈及別有不法情事迅即據實具奏所有案內一千犯證俱著解交刑部歸案審辦至已革城門領孫紹佑等前供並未得贓之言亦未可信著留京王大臣等一併嚴審確情毋任狡展其都察院議處英和之摺俟全案審結時再降諭旨○又諭景祿等奏奸商運米出城請將巡視西城御史及坊官交部分別議處一摺西城封禁

米鋪一案巡城御史伊綿泰蕭鎮並吏目朱學斐通同舞弊索詐分肥贓證確鑿景祿等不將該御史等嚴叅治罪僅請交部分別議處又不自請處分實屬含混除已降旨將伊綿泰等革職拏問外所有都察院堂官俱著交吏部議處○又諭御史蔣詩奏河南紅鬍匪徒之外又有一種名為白喫藏匿南汝光一帶或負販私鹽或糾衆為盜安徽檢匪餘棍每在江南山東河南交界處所乘間劫奪

等語此等匪徒朝東暮西潛匿各境最為閭閻之害著江南安徽山東河南各督撫嚴飭所屬實力查拏並於鄰境交界地方不分畛域互相稽察務期淨絕根株以戢奸暴而安良善○又諭每年進哨以前盛京吉林黑龍江等處將軍呈進鷹鷄此雖舊制惟朕行圍撒放鷹鷄時較少若賞給隨扈王大臣伊等亦無撒放之處嗣後盛京吉林黑龍江著各按原進數目減半呈進○旌表守正捐軀山

東郊城縣民聶文選女聶氏 戊寅祭大社

大稷遣儀親王永璇恭代行禮 己卯諭軍機大臣等陳預奏拏獲習教匪犯侯位南並究出先經斂銀送交烏魯木齊習教遣犯劉佐臣子孫劉成林等收用之劉元善夏洪章訊據供稱嘉慶七年劉元善與徒夏洪章及王白魯魏尚存馮青雲宋相貴等斂錢換銀送往烏魯木齊給劉佐臣子孫劉廷獻使用侯位南之父侯繩武出銀五十兩託張貫九轉交魏尚存寄送劉元善等六人共帶銀四百餘兩前赴烏魯木齊濟木薩地方問知劉廷獻已故經劉元善將銀交劉廷獻之子劉成林劉成器收受等語教匪侯位南等斂錢換銀不遠萬里送至烏魯木齊交邪匪子孫劉成林劉成器收用可見伊等邪黨相沿固結不解實屬胥不畏法著傳諭慶祥接奉此旨即兼程前往將劉成林劉成器提案嚴訊先

將七年劉元善等送銀數目及同行人姓名令其逐一供明再詰以同教之人既遠來資助想未必祇劉元善等一次令其據實供吐毋稍隱匿再劉成林等在烏魯木齊居住有年恐在彼尚有傳教收徒情事並向其嚴切根究一經供出立即按名查拏審訊明確即奏明將劉成林等均在該處正法並曉諭各遣犯以伊等皆係免死發遣之人在配各宜安分守法儆敢傳習邪教均立正典刑決不寬宥如有自內地潛往送銀通信之人伊等立即到官稟首將送銀通信之人拏獲治罪其稟首之人均予免罪務剴切宣示俾衆聞知羣相警惕將此諭令知之○以吏部左侍郎熙昌署刑部右侍郎○戶部議准廣西巡撫慶保疏報天保縣開墾水田四十七埤照例升科從之○庚辰

太宗文皇帝忌辰遣官祭昭陵○辛巳以故喀爾喀賽因諾顏扎薩克貝

勒德勒克朋楚克子貢楚克扎布襲爵○壬午

太祖高皇帝忌辰遣官祭福陵○癸未諭內閣綿恩等奏熱河都統慶溥失察避暑山莊後堆撥內支搭帳房一摺堆撥內向無支搭帳房之例今避暑山莊後山堆撥內支搭蒙古帳房該管協領章京等並不妥為管束實屬疏懈該管都統慶溥毋庸交部議處著罰俸一年該管協領章京等均著罰俸二年該三處堆撥兵丁著重責示儆並著將所搭帳房立即驅逐嗣後如再違例於堆撥內私搭帳房查出從重治罪不貸著通諭行營及蒙古等一體遵行○旌表守正捐軀直隸寧晉縣民趙蘭妻李氏○甲申秋分夕

月於西郊遣睿親王端恩恭代行禮○上詣

永佑寺行禮○乙酉遣官祭昭忠祠○諭內閣

御史李振祐奏不勝外任之員違例截取保送繁缺知府一摺所奏甚是錢學彬前於嘉慶五年在泉州府知府任內以自揣才不勝任請改京職該督撫具奏時經朕特降諭旨以該員有意規避交部嚴議革職嗣又失察家人舞弊婪贓以業經革職無庸再議該員捐復員外推升郎中屆俸滿時本係不勝外任之員吏部即應查明原奉諭旨扣其截取戶部接到吏部截取咨文亦應查明不准保送乃仍保繁缺知府在戶部堂官於前降諭旨或一時不能記憶該員不自行據實呈明實屬有心朦混錢學彬著交都察院嚴加議處吏戶二部堂官於錢學彬截取時不行詳查被其朦混俱著交都察院議處該御史參奏此案與成格參李履順改名冒膺卓薦情事相同李振祐著賞給紀錄二次○又諭慶豐自首習教一案因慶遙慶豐俱係宗室特派宗人府堂官會同留京王大臣刑部堂

官審訊嗣審明伊兄弟習教與知逆情屬實業已革去黃帶子其供出收伊為徒之海康久經革出宗室均與常犯無異既係常犯與王公等無涉此案宗人府堂司各官均不必會審留京王大臣每日在內直班亦不能常川全赴刑部審案綿課景安亦無庸會審現在已令董誥回京辦理部務所有海康慶遙慶豐習教傳徒案內人犯著專派曹振鏞英和會同刑部堂官審辦○以故和郡王綿備子奕亨降襲貝勒○以兵部左侍郎常福署戶部左侍郎○旌表守正捐軀江蘇泰州民柯小七妻王氏○丙戌上御卷阿勝境賜扈從王公大臣蒙古王貝勒貝子公額駙台吉等食丁亥上自避暑山莊啟鑾幸木蘭○諭內閣謝階樹奏請除武童重名冒考及雜流混考積弊一摺國家設科文武並重童試乃進身之始湖南省考試武童經該學政查出重名者寶慶

永州二府屬各有一千數百餘名之多桂陽
郴州衡州所屬每縣亦各有數百名此外冒
考者竟有僧人屠戶卑役腳夫等項雜流之
人並匿喪頂替各弊不一而足巡撫雖不與
考試之事於通省士習民風俱應留意今湖
南省學校流品混淆至於如此已哈布何至
毫無見聞著傳旨嚴行申飭該撫即會同該
學政實力整頓其查出冒考匿喪一千人犯
均提案審明照例分別治罪並通飭所屬嗣
後考試武童務嚴行甄別如有仍前作奸犯
科者隨時懲辦以除積弊○以故喀爾喀賽
因諾顏扎薩克親王巴彥濟爾噶勒子車登
巴咱爾襲爵○是日駐蹕中關行宮○戊子
駐蹕波羅河屯行宮○己丑駐蹕濟爾哈朗
圖行宮○庚寅駐蹕阿穆呼朗圖行宮○辛
卯
上行圍○是日駐蹕布克御營○壬辰
上行圍○遣官祭黑龍潭

昭靈沛澤龍王之神玉泉山
惠濟慈佑靈護龍王之神昆明湖
安佑普濟沛澤廣生龍王之神密雲縣白龍
潭
昭靈廣濟龍王之神○遣官祭圓明園
惠濟祠
河神廟○諭內閣景祿等奏被議郎中錢學
彬具呈訴辯一摺此案前據御史李振祐叅
奏降旨將錢學彬交都察院嚴議茲該員具
呈申訴以俸滿之前曾將應否截取之處面
回吏部堂官英和王鼎查辦如該員此言係
因被議捏造支飾則是朦混於前復敢巧辯
於後必應加重懲辦若實曾向英和等稟請
查辦則吏部當日係據何例將該員截取即
云例應截取該員從前革職曾經兩奉諭旨
亦應據實奏明候旨飭遵何以並未具奏除
王鼎現在出差外著吏部堂官查明錢學彬
面回英和等查辦是否實有其事並該員究

竟應否截取之處據實明白回奏尋奏上得
旨錢學彬面回英和已在吏部行文截取戶
部保送繁缺之後著仍遵前旨嚴加議處吏
戶二部堂官除英和督捕認真寬免處分外
餘仍著議處○以正白旗滿洲副都統毓秀
為杭州將軍調正紅旗蒙古副都統穆彰阿
為正白旗滿洲副都統以鑲黃旗護軍叅領
富清阿為正紅旗蒙古副都統○是日駐蹕
巴彥托羅海御營○癸巳

上行圍○是日駐蹕哈里雅爾御營至乙未皆
如之○甲午

世宗憲皇帝忌辰遣官祭

泰陵○戶部議准前任山西巡撫銜齡疏報寧
遠廳開墾地一百三頃照例升科從之○乙
未

上行圍○丙申

上行圍○遣官祭賢良祠○以貴州遵義協副
將劉國慶為安義鎮總兵官旌表守正捐

軀山東魚臺縣民黃文泗妻胡氏河南南陽
縣民李時女李氏○是日駐蹕吉林烏里雅
蘇御營○丁酉

上行圍蒙古盟長王公等於行幄東門外設大
氊廬侍

上膳畢

上閱詐馬等技賞賚有差○諭內閣松筠奏察
哈爾八旗公用款項請仍行攤扣無庸借帑
生息一摺前因祥保奏請借銀五萬兩發商

生息調劑察哈爾八旗公用仍於各該旗俸
餉扣還當降旨令松筠查議具奏茲據奏稱
查明各旗幫貼軍站備辦烏拉等差向俱攤
扣俸餉由來已久議請均勻攤派兵餉每兩
扣銀三分除買補倒斃馬匹外交各旗總管
買辦農器以資生計無庸借銀生息等語官
兵俸餉藉資當差養贍若普行攤扣殊於該
官兵等生計有礙著加恩仍於口北道庫內
賞借銀三萬兩發商生息所得息銀即以調

劑察哈爾八旗公用仍照祥保原奏分作三年俟舊欠扣完後接扣歸款如有不敷再行奏明請旨至張家口八旗滿洲官兵俸餉俱由口北道庫支領惟察哈爾八旗官兵俸餉向例赴部請領往返不無繁費嗣後察哈爾官兵每年應給俸餉銀十餘萬兩著直隸藩庫查明照數先期撥解口北道庫令其就近支放以示體恤即於直隸應行解部款內如數扣除○是日駐蹕永安湃御營○戊戌

上行圓諭內閣前於嘉慶十六年特降旨任伊遜崖口內建立敦仁鎮遠山神廟每歲舉行秋獮大典進東哨門時朕必親詣拈香仰承靈佑風日暄和諸臻順吉因思西哨門與東哨門間歲經由崖內未曾建立神祠無由升香展敬著派慶溥常顯哈隆阿於布克崖口內數里相度平坦地址建立山神廟一區其規制及春秋致祭禮儀悉依照東崖口之式一律辦理於明歲竣工朕臨幸木蘭再進

西哨門時躬親瞻禮用備明禋又諭新例蒙古王公台吉射獲牲獸二品以上人員准其在朕前跪獻三品以下人員俱交杭愛處惟御前行走之蒙古王公等每日隨扈行圍實屬奮勉伊等之胞弟胞姪親生子孫均著加恩不拘品級准其在朕前跪獻牲獸餘照例行○又諭海康現已訊明十八年八月曾經逆犯劉得山將九月十五日起事業已將伊算入林清事成給伊大官職之言向告伊當即應允該犯身係宗室乃不為大清國之臣子甘受叛逆官職狂悖已極慶遙經海康將滋事日期告知約令入夥亦即應允並於九月十四日至海康家候信海康慶遙厥罪維均著曹振鏞等即將該二犯按律定擬慶豐僅經慶遙將九月十五日街上有人打搶之言向告並未明露逆謀現又到官自首將助逆各犯全行捕獲審明辦理其罪尚可未減著照例減等治罪晉隆敬徵屏翰前以海

康等僅止入教豫知逆情是以降旨祇將晉隆等革職仍留四品頂帶並充總族長族長現審明海康竟欲受逆賊林清官職慶遙亦甘心入夥與曹綸情罪相同失察曹綸之祿康前經發往盛京該總族長族長等均應照祿康之例懲處姑念晉隆係總轄之員且伊母年老其兄晉昌又遠任伊犁將軍晉隆著革去四品頂帶總族長免其發往盛京即令在家侍養伊母敬徵屏翰俱著革去四品頂帶總族長族長發往盛京在宗室營房內居住其家屬聽其帶往所遺總族長族長額缺著宗人府另行揀選具奏○是日駐蹕齊爾博庫口御營○己亥

上行圍○諭內閣長齡奏徒罪官犯在配脫逃拒捕拏獲審擬一摺官員犯罪即與常犯無異近多瞻徇情面仍以官員相待不加約束以致肆行無忌此案徒犯劉晉膽敢在配脫逃並恃強持刀拚命迨解回原配又復私行

出境可惡已極劉晉著先在犯事地方枷號三箇月滿日發往伊犁充當苦差以示懲儆主守陳鳳因劉晉係屬官犯並不阻止著杖八十折責革役其失察之專管各員著交部照例議處○是日駐蹕森吉圖御營○庚子上行圍○留京王大臣莊親王綿課等奏嚴訊巡城官吏得贓並城門領賣放米石出城審明定擬得旨此案已革吏目朱學斐因派查鋪戶米囤起意索詐將並未逾額米石先行

封禁串通湊錢打點懲慝已革巡城御史伊綿泰蕭鎮分受多贓伊綿泰蕭鎮均罪擬絞首朱學斐首先起意尤為罪魁豈得以計贓數少為解且制錢一百四十餘千亦已逾貫乃僅將該犯擬發黑龍江實屬輕縱朱學斐著改為絞監候與伊綿泰蕭鎮均入於本年朝審情實速繕招冊於初五日具奏留京王大臣刑部堂官擬罪輕重失倫俱著交部議處所有案內各犯罪名除朱學斐伊綿泰蕭

鎮三名外餘著軍機大臣會同行在刑部覈議具奏○是日駐蹕案已完溝口御營翼日如之○辛丑

上行圍○頒

御製訓管理宗人府王公及諸族長文曰予曾著宗室訓於應為之事三復告戒不待言矣前訓又曰若問予不應為之事則一二不肖子弟自知予實不忍言也諸王思予不忍言之意諒必動心矣然向所不忍言之事不過

酗酒鬪毆淫邪放蕩耳蓋天潢一派萬枝同本何忍言我宗人竟為下流之事此所以不忍言也孰意又有大不忍言之事又下流之不若矣然百頃嘉禾難免幾莖稂莠千羣騏驎豈無一二駑駘我宗族中從未有若輩之喪心病狂至於如此非我族類何必抱愧負疚乎若祇知事後空談曷若修平時實政管理宗人府之王公族長知養而不知教知因循而不知策勵知迴護彌縫而不知流患貽

害誠能父教子兄教弟有過必懲絕無瞻顧何致出此敗類耶王公族長皆朕所命王公族長不能盡心教導皆朕不知人之愆願王公族長免朕之過懲弼朕之政治自今伊始各矢天良誠心教訓庶副朕齊家治國之本懷實有厚望焉○諭軍機大臣等朕親製訓管理宗人府王公及諸族長文一篇著發交宗人府王公等閱看即令繕書房繕譯清文進呈後刊刻清漢合璧頒發諸宗室一體恭

閱務令家喻戶曉朕篤念宗室常懷同源共本之思教誨成全惟願人人皆為良善但日理萬幾安能人人耳提面命所望諸王公族長代為化導該王公族長等與諸宗室誼同一體不當視教誨為國事直應視為家事凡同輩者皆視為兄弟卑幼者俱視為子姪平日勉以正義杜其非心使於綱常名教之大者了然於胸人性本善况派衍天潢豈有甘心從惡之理若視同塗人不屑教誨至於惡

+

清實錄
嘉慶二十二年九月

十

四〇一

例咨報理藩院。是日駐蹕伊遜河東御營。
○甲辰

上行圍。諭內閣此次圍場拏獲偷牲賊犯多名。昨據哈隆阿面奏係翼長富明於朕進西哨門時慮及東哨門官兵稀少恐巡緝不周。豫派烏爾袞泰等帶領兵丁前往查拏。尚屬留心富明著加恩賞換花翎獲犯之防禦烏爾袞泰著賞戴藍翎並加一級領催常和著賞給銀二兩兵丁三十一名著每人賞給銀一兩俱由廣儲司動用嗣後每遇朕進東哨門時著該總管等豫行派員在西哨門巡查進西哨門時亦如之著為令。是日駐蹕布敦御營。○乙巳

上行圍。是日駐蹕六道河御營。○丙午賜蒙古王貝勒貝子公額駙台吉等食。諭內閣每年由盛京吉林黑龍江官員兵丁內揀派善獵人員三十名隨扈進哨射獵牲獸原恐伊等技藝漸至生疏是以令其隨圍演習惟

黑龍江之索倫達呼爾等技藝本能嫺熟且在該處亦時常習獵若每次派善獵人員照例前來路途遙遠恐伊等未免糜費著交該將軍特依順保嗣後將隨圍之黑龍江善射人員三十名裁減一半其餘習圍人等亦應酌減以節兵力至盛京吉林應來隨圍人等著照舊揀派。○又諭據慶溥等面奏防禦烏爾袞泰曾於十八年間在北哨門紅椿外拏獲周萬春等三犯偷買木植一案交承德府審訊其二犯陸續監斃將周萬春解省覆審該犯在省翻供經臬司瑞弼關提烏爾袞泰赴省質訊著方受疇即派員將周萬春解交刑部烏爾袞泰著解任交慶溥同全案卷宗一併解送刑部秉公審辦如烏爾袞泰係屬誣良照例治以應得之罪若周萬春偷買木植屬實又復狡供翻異即行加等治罪。○賞看守黃土坎等七處行宮弁兵半月錢糧。是日駐蹕張三營行宮。○丁未旌表守正捐

軀山東聊城縣民婦李赫氏○命五城於冬春二季設廠煮賑○是日駐蹕波羅河屯行宮○戊申諭內閣御史周鳴鑾奏請飭禁隨員弁先行進城在署官員擅離職守一摺隨扈文武官員理應住宿行營各供職事若於迴鑾前期距京較近地方先行進城殊失詎勉奉公之義著行在文武各衙門堂官通行曉諭所屬官員嚴禁先期進城如有於南石槽湯山等處私自潛回者該堂官查出指名叅處至在京各部院司員日有應辦事件何得出京遠迎堂官致曠職守如有故違禁令者亦著該堂官指名叅奏儻徇隱不舉別經發覺定將該堂官一併懲處○是日駐蹕中關行宮○己酉

上詣

永佑寺行禮○諭內閣御史熊璉奏請互相稽查各城門偷運米石出城一摺老米移米私運回漕本干例禁全在各城門實力稽查其

樊自絕步軍統領順天府五城俱應隨時隨地查拏究辦凡有奏事之責者如查有贓證確據亦均可據實舉發若如該御史所奏專令此三衙門互相稽查轉啟交通推諉之弊嗣後著步軍統領順天府五城一體認真查禁如所屬官吏有包庇縱放情弊該管上司勿稍迴護嚴叅重懲則奸商積蠹自無所施其伎倆矣○給陝西吳堡縣被雹村莊一月口糧並緩徵新舊額賦○是日駐蹕避暑山

莊至壬子皆如之○庚戌土爾扈特郡王巴特瑪烏巴什因病休致以其子納木扎爾車登襲爵○以兵部右侍郎曹師曾知武舉內閣學士吳其彥為武會試正考官詹事府少詹事汪潤之為副考官○旌表守正被戕四川新繁縣民黃寶寬女黃氏○辛亥遣官祭歷代帝王廟○諭內閣曹振鏞等奏審明海康慶遙從逆罪狀及案內各犯分別定擬一摺我朝自開國以來宗室中賢才輩出雖支

分派別譜系蕃衍其中賢愚不一。然從未有千名犯義如海康慶遙之自外生成者。該二犯拜奸民為師學習邪教已屬玷辱宗支。乃海康於十八年八月經逆犯劉得山告以九月十五日起事將伊算入之言。其時劉得山之父逆犯劉興禮尚知伊身係宗室從旁阻止不意該犯竟冀圖得受偽職。甘與逆謀慶遙身係奉恩將軍經海康將滋事日期向告約令入夥亦即允從。並於九月十四日至海康家守候信息。坐收其利。海康慶遙甘心背叛間擬凌遲處死實屬罪所應得。惟是朕以仁心治天下寧人負我毋我負人。該二犯雖情真罪當猶念其究屬宗室實不忍處以極刑。海康慶遙俱著改為絞立決。派奕顯將海康帶往伊祖父墳前監視勒斃。派永珠將慶遙帶往伊祖父墳前監視勒斃。該二犯屍棺俱不准於該二家墳園內埋葬。慶豐經海康引伊入教後即改悔且慶遙告以九月十五

日有人打搶之言並未明露逆謀嗣恐家人倪六扶嫌告發旋即到官自首習教因此始將海康慶遙二犯從逆重情逐一究明其罪應從末減慶豐著改發吉林其母妻二子亦俱著改發吉林俾令完聚交該將軍嚴加管束海康妻女著照擬發往黑龍江慶遙之妻子女亦著改發黑龍江俱交該將軍安插管束即照綿課等所議章程另記冊籍辦理其餘各犯罪名著交軍機大臣會同行在刑部再行叢議具奏此旨到日著交阿哥等閱看並著管理宗人府王公通諭諸宗室知之○以服闋侍郎周系英署兵部左侍郎○壬子上詣永佑寺行禮○御依清曠勾到新疆雲南貴州廣西情實罪犯停決新疆斬犯四人絞犯四人雲南斬犯二人絞犯五人貴州斬犯十人絞犯九人廣西斬犯五人絞犯六人餘八十三人予勾○遣官祭

都城隍之神○諭軍機大臣等朕前親製訓
管理宗人府王公及諸族長文一篇令王公
宗室等閱看刊刻頒發乃朕不得已之苦心
願我宗室互相勸誡勉為善良昨曹振鏞等
將海康慶遙審明逆跡定擬凌遲在海康等
甘心背叛法無可貸奏上時朕猶念其究屬
宗支實不忍寘之極刑特減數等改為絞決
於萬無可原之中仍曲從輕典諸王公宗室
聞之諒無不同深欽感但此事祇應感激在
心不可張揚於外方為得體現在迴鑒期近
若宗室王公等於接駕時相率在道旁撻頭
致駭觀瞻轉以增朕愧慙著綿課等即傳知
應行接駕之王公等俱照常跪接斷不可因
此事在道旁撻頭務令周知仰體朕意將此
諭令知之○又諭甘省本年夏秋收成豐稔
長齡請於豫買兵糧二十萬石之外再買二
十萬石於經費倉儲兩有裨益著即照所請
辦理惟是長齡甫至甘省於該省州縣情形

尚未能深悉從前甘省之弊全在捏災冒賑
將所收監糧銀兩供應上司任意奢侈餘者
悉以自飽其囊橐迨破案後停止監糧該州
縣無利可營遂又以採買兵糧為由於中設
法挪移將所領銀兩少少採買糧石掩人耳
目其逢迎上官自贍身家悉皆取資於此如
沈仁澍楊毓錦各案侵虧情弊如出一轍以
致厯任總督因以相繼獲罪長齡現在豫買
兵糧四十萬石若不認真查察或訪有弊端
稍存姑息之見代為容隱將來一經敗露即
難辭徇縱之咎該督此次務須大破情面派
委妥員將各州縣應買糧石實力稽查須令
顆粒皆歸實貯如有虛領虛報等弊立即據
實糾參按律懲辦庶倉儲有備國帑無虧積
弊可就清釐矣將此諭令知之○緩徵河南
安陽湯陰內黃三縣被水村莊新舊額賦○
癸丑
上自避暑山莊迴鑾○詣

城隍廟拈香○調兩廣總督蔣攸銘為四川總督湖廣總督阮元為兩廣總督以廣西巡撫慶保為湖廣總督廣西布政使葉紹樞為巡撫安徽按察使富綸為廣西布政使山西歸綏道嵩孚為安徽按察使調貴州按察使王輅為廣東按察使廣東按察使韓文綺為貴州按察使○贈故四川總督常明太子少保子祭葬謚襄恪賞銀五百兩治喪○是日駐蹕喀喇河屯行宮○甲寅以福建金門鎮總兵官林孫為浙江提督○予故浙江提督三等男邱良功祭葬如例謚剛勇○是日駐蹕常山峪行宮○乙卯

上御行殿勾到廣東福建奉天情實罪犯停決廣東斬犯五人絞犯十二人福建斬犯三人絞犯三人奉天斬犯六人絞犯十二人餘一百二十五人予勾○諭內閣御史熊璉奏請嚴飭修造戰船實力巡洋一摺山東膠萊海口額設戰船遇有虧朽應按年限修造至巡

哨員弁亦應親身出洋認真巡緝今該御史奏該處戰船竟有停廠十餘年或七八年不行修造完竣營員雇船應用其例應出巡之副將叅遊等並不出洋僅委千把微弁虛應故事均屬廢弛著陳預嚴飭廠員將應修各船依限修造竣工覈實驗收並通飭巡哨各營員務按期親身出洋巡緝如有推諉捏報者嚴行叅處以重海防○以福建澎湖水師副將郭繼青為金門鎮總兵官○是日駐蹕兩間房行宮○丙辰諭內閣本日劉鏞之汪如淵前來行在接駕經朕召見詢問該府尹等自七月至今兩月以來僅奏糧價一摺此外並未具奏一事步軍統領衙門五城奏獲匪犯多名該衙門亦未緝獲一犯係屬何故據奏各逆犯實未訪有蹤跡且順天府屬本年被旱較重因查辦撫卹籌議設廠煮賑等事未經派員緝捕恐致激變良民朕即詢以查辦災務京城應設粥廠幾所需用米石若

干因何尚未具奏劉鏤之奏稱尚未查明約於九月底十月初方能具奏等語所奏支吾遮飾太不成話撫卹災黎所以安輯良民緝捕邪匪所以芟除莠民本係並行不悖之事本年直隸被旱之區不止順天府屬該省照常緝拏匪犯本日方受疇具奏所屬災區懇請賑卹蠲緩施恩與救法兩不相妨劉鏤之等竟係於朕啟鑒後一味因循疲玩素餐耽逸全不辦理公事經朕降旨飭問無可登答

強顏飾辭冒昧搪塞劉鏤之汪如淵俱著交部議處其設廠煮賑各事宜即限於數日內具奏不准遲延英和近日督捕認真慶豐自首習教一案英和立時具奏並會同審出海康慶遠從逆各實情案內人犯全行拏獲無一漏網又緝獲逆犯崔文平之妻崔史氏供出教匪頭目王銳又經王銳供出潘五張明等教匪多名先經直隸山東拏獲解部審辦實屬可嘉之至英和處分最多著吏部查明

開單進呈候朕酌量施恩開復朕於在廷諸臣實心為國者必加以獎勵怠玩從事者必加以懲創恩威一秉大公賞罰惟其所自取也○賑直隸大興宛平涿良鄉清苑滿城安肅唐博野望都容城完雄祁東鹿安高陽定興獲鹿井陘行唐靈壽元氏贊皇新樂武強定曲陽深澤二十九州縣被旱被霜被雹災民並蠲緩新舊糧租借欠倉穀及文安固安東安霸永清保定新城正定晉藁城平山

深饒陽安平通薊三河蠡樂城無極二十州縣新舊糧租倉穀有差○給廣東南海高要二縣被水災民房屋修費及葬埋銀並蠲徵新舊額賦有差○是日駐蹕要亭行宮○丁巳

上御行殿勾到四川情實罪犯停決斬犯三十人絞犯三十人餘一百七十二人予勾○是日駐蹕羅家橋行宮○戊午駐蹕懷柔縣行宮○己未除奉天廣寧縣沙壓地五萬六

千九百畝有奇額賦○賞看守湯山行宮弁兵半月錢糧○是日駐蹕湯山行宮○庚申上還圓明園○詣

安佑宮行禮○兵部以武會試中額請得旨滿洲取中二名漢軍取中三名奉天取中一名直隸取中八名江蘇取中二名安徽取中二名山東取中五名山西取中二名河南取中四名陝西取中四名甘肅取中一名福建取中二名浙江取中二名江西取中一名湖北取中一名湖南取中一名四川取中二名廣東取中五名廣西取中一名雲南取中一名貴州取中一名○河東河道總督葉觀潮等奏報秋汛安瀾賞葉觀潮二品頂帶出力員弁下部議敘○以服闋河道總督李鴻賓署禮部右侍郎○辛酉諭內閣國家簡任大臣職分所在惟當竭誠盡力黽勉奉公若平日素餐耽逸怠忽因循及朕召對責問又復飾詞巧辯殊失忠以事君之義順天府有緝捕

之責兩月以來步軍統領衙門五城奏獲匪犯多名該衙門未獲一犯前劉鏞之等至行在接駕朕面加詢問劉鏞之奏稱因府屬被旱籌辦撫卹賑賑等事是以未經派員緝捕朕即詢以賑賑事宜劉鏞之於設廠地面米石數目又全不能奏對明晰是劉鏞之置捕務於不問而於撫卹事宜亦係虛詞搪塞部議照溺職例革職實係咎所應得念其供職多年不至遽予罷斥劉鏞之著加恩降為侍郎候補以觀後效汪如淵雖辦理遲延召對時叩頭引罪並未隨同巧詞支飾著加恩改為革職留任○又諭御史盛惇大奏嚴禁愚民越境酬神一摺直省名山古剎小民焚香瞻禮原所不禁若聯羣結會越境酬神則有干禁令該御史所奏江蘇之茅山每年春秋二季四方進香男婦動以萬計鄰近江西安徽浙江等省民人亦聯翩踵至千百為羣此風不獨茅山一處為然既多耗費資財廢時

荒務且男女雜迷人數衆多奸邪溷跡亦足為風俗人心之害著直省督撫各於境內有名山寺院地方出示嚴禁如本境士民歲時瞻禮各聽其便其春秋賽會招集外省客民斂錢結隊聚集喧闐者地方官立即嚴拏將廟祝及起會之人按律懲辦以禁侈靡而杜煽惑○調兵部尚書盧蔭溥為戶部尚書以病痊協辦大學士刑部尚書章煦為兵部尚書兼管順天府府尹事○以翰林院侍講玉

綬充日講起居注官○壬戌

上御洞明堂勾到湖廣陝甘情實罪犯停決湖廣斬犯二十三人絞犯十九人陝甘斬犯九人絞犯九人餘一百一十九人予勾○緩徵山東范朝城堂邑博平茌平清平聊城莘冠館陶齊河平原東阿濮觀城臨清夏津邱章邱長清恩高唐鄒平濟寧蒙陰萊陽德平平陰博興武城蘭山郟城鄒鄆城金鄉嘉祥三十六州縣及德州東昌臨清三衛旱災雹災

水災新舊額賦漕糧及舊欠籽種倉穀有差○癸亥

上幸萬壽山越南國使臣胡公順等三人於藻園門外瞻覲○諭內閣御史卿祖培奏有代理湖北通山縣事武昌府經歷高士智投遞書信一封稱於上年冬間拏獲手刺叛逆字樣之匪犯劉潮青等疊稟該省上司遲延未結將原信稟稿一併進呈該省拏獲匪犯劉潮青等經該署縣通稟後業已飭拏審辦何

以日久未結著新任總督慶保會同張映漢迅速親提審訊即行奏結毋再遲延至高士智於代理縣事時既將此案稟出自宜靜候審辦即因該上司辦理遲延該員或有屈抑本有直揭部科之例現據該御史奏稱與高士智素不相識高士智無論與御史是否認識亦不應投遞書函呈訴公事此風斷不可長著該督等一併查訊參奏治以應得之罪○兩江總督孫玉庭等奏報秋汛安瀾出力

員弁下部議敘○旌表守正捐軀河南遂平縣民王三妻遠氏○甲子太僕寺卿瑚松額以奏對失儀革職○發京倉粟米三千石給直隸大興宛平二縣賑○乙丑

上御洞明堂勾到浙江江西安徽江蘇情實罪犯停決浙江斬犯十一人絞犯四人江西斬犯六人絞犯五人安徽斬犯九人絞犯三人江蘇斬犯八人絞犯五人餘一百一十三人予勾○調雲南巡撫李堯棟為江蘇巡撫以

四川布政使李鑾宣為雲南巡撫四川按察使曹六興為布政使浙江寧紹台道富信為四川按察使○旌表守正捐軀山東樂安縣民薛維緒妻李氏○丙寅

上幸靜明園詣

龍神廟拈香○刑部奏審明買米出城人犯得旨奸商設法進城買米因積接濟回漕例有明禁各城門於買米數在一石以外及疊次出入形跡可疑者自應查拏究辦若小民

零星自買食米及受雇背負凡在一石以內者不得紛紛查拏以杜擾累○丁卯

上御勤政殿聽政○以太常寺卿哈寧阿正黃

旗蒙古副都統載銓為內閣學士兼禮部侍

郎銜○戊辰

孝慈高皇后忌辰遣官祭

福陵

上詣

恩慕寺

恩佑寺行禮○詣

大高殿行禮○還宮○諭內閣朕因澣墅關近年關稅短絀昨於阿爾邦阿來京召對時詢以歷年關稅致絀之由據奏內河關稅向比海關例課為重近年海洋平靜各商船多由海運經行既圖船身寬大多載貨物兼可少納稅課以致內河例課多不能足額等語商船出海販運其所帶貨物應准出洋與不准出洋者本有定例如茶葉米石等項皆干嚴

禁原不能悉聽商船之便不行查察徑自放行著通諭海關省分各督撫嚴飭管理關稅之員於商船到口時驗其所帶貨物除例准出洋者令其納課放行外其例不准出洋貨物一概截留不許出口如管關之員貪得稅餘私行賣放者一經查出即行叅處庶內河外洋各守章程不致此盈彼絀以平權務以杜弊端○又諭孫玉庭奏卹丁除弊一摺漕船每歲領運於例給漕贈月糧外復優准加帶土宜並於通州變賣餘米所以體卹丁力者甚至而江省各幫船仍有勒索州縣兌費之事總藉口於賠墊積疲不能不資津貼幫船津貼日多則州縣浮收日甚伊何底止茲據該督奏請卹丁兩條其減省委員禁止餽送全在該督撫漕督實力奉行嚴加查察勿為空言其酌籌生息增給造運即著該督等詳議續奏至所指弁兵等刁難州縣有無故停兌開行勒指通關米結兩端尤為切中情

事總之漕糧未兌以前責在州縣既兌以後責在弁丁其受兌之時如有米色潮溼攙和者准其稟報該糧道查驗叅辦若米色純潔該弁丁等仍敢停兌吵鬧及指不出結者立即從嚴懲辦以杜刁制至另片所奏蘇松常鎮各幫統以米石多寡按水次舊章酌給津貼禁止每船給費均著照所奏辦理如此酌中調劑即作為一定限制如幫丁再敢格外需索州縣藉口浮收俱著嚴叅治罪以肅漕政而塞弊端○鑄給湖南靖州協都司關防從前任總督阮元請也○以孟冬時享太廟自是日始齋戒三日○己巳緩徵山西陽曲太原榆次徐溝靜樂嵐壽陽七縣旱災霜災本年額賦並貸常平倉穀○復賞大興宛平二縣倉米八千石賑賑加賞廣寧門外普濟堂煮賑小米五百石○庚午孝敬憲皇后忌辰遣官祭泰陵○頒

御製諫臣論曰人君治政臨民未能盡美盡善也天下幾務極繁百官庶司豈能毫無欺隱乎若無諫諍之臣政不綱矣是以特設科道事上存有犯無隱之忠心效學朱雲魏徵之勁節立志公正不畏權要見壞法亂紀之事直進彈章毫無瞻顧斯不負設官之意也明目達聰之職責任至重君有失德尚欲繩愆糾謬格其非心若一味緘默徒貽寒蟬之誚耳內外臣工儻有營私作孽而上不知者立時封奏叅劾不避嫌怨斯為盡心盡職之言官朝廷之大福也世道人心日流日下近年言事諸臣為公者少為私者多避人焚草者少張揚於衆者多甚至假借題目作弄威福營私納賄枉法貪財此端豈可開此風不可長也若不力加整飭馴至於前明結黨惡習誠朝廷之大患也忠告必嘉納佞口必屏斥若不論忠佞公私惟言官之言信用博納諫之虛名受亂政之實禍矣惟望言官洗心滌

慮大公無私常存以言事君之誠盡屏取巧謀利之偽作天子之耳目為朝廷之腹心上章進諫置禍福於度外密封不露雖至親手足不令與聞方不愧此職任顧名思義王章不可玩也以執法之臣為犯法之事甚幸朕求言之誠意矣為私之一二敗類不得不除為公之諸臣益當勉勵不必妄生疑懼當言則言言必有中若仍存私見自此絕口不言竟以朕為拒諫之主心更不可問罪浮於彼矣○諭內閣國家設立臺諫任以言責期於明目達聰職至要也為科道者必實有忠君愛國之心遇政事之闕失臣工之險陂者誠動於中直陳無隱此真忠言讜論朕所樂聞而願望者也近日科道章奏未為不多而能有所建白者實少或止於申明舊例而泛為鋪敘或輒議更張成法而斷難施行此皆志存塞責意在見長為私而不為公朕洞燭其情猶以其諫官而優容之不意竟有以奏事

為利媒藉以竊弄威福私納財賄者壞法亂紀莫此為甚此實臺諫中之敗類朕不能不執法懲治矣蓋忠佞邪正判然兩途嘉言裨國與莠言亂政其利害關於國家者甚鉅朕特製諫臣論一篇著發交都察院自堂官以及科道每人照錄一通嗣後初任言官者到任之日亦令照錄一紙俾各觸目警心各科道經朕剴切訓飭務各屏除私忿力矢公忠凡政務之關繫國計民生及內外臣僚營私

奏稿

五

骫法者仍據實直陳不可妄生疑懼自甘緘默惟不得假公濟私變亂是非用副朕求治納言之至意○又諭御史盛惇大奏請杜鹽漕積弊一摺漕船夾帶私鹽及私梟充斥皆應實力查禁該御史所奏漕船鬻私梟徒興販皆由於場竈之透漏不過其源則其弊不能盡除著該督撫及漕督鹽政等各飭所屬一體嚴行查禁有犯必懲如有夾帶與販等事究明私鹽來歷一併嚴拏懲辦並將該管

及失察出境入境員弁照例叅處勿稍徇隱○又諭御史盧浙奏敬陳漕河事宜一摺江南山東運河一帶閘壩重疊漕艘經行凡提溜打閘不能不添雇人夫但散而無紀向來閘官漕委互相爭競以致無所責成閘官係地方實缺人員該處水勢人情皆所素悉所有該閘關攬人夫自應責令閘官專管其漕委員弁多一人即添一人需索之費一概不許干與如閘官有浮收關攬多索夫價者查出照例嚴叅至該御史所稱幫丁應帶土宜無分貧富照數均裝一節此則事屬難行幫丁應帶土宜到關免稅本有定額原不准例外多裝其有裝不足額者亦祇可各聽其便豈能官為勻派惟在該管糧道及經過各關實力稽查各幫船應帶土宜如數在一百五十石以內者照例放行其有逾額多帶者查明嚴行懲辦則貨有定額而漏稅滯運之弊不禁自除矣

奏稿

五

大清仁宗受天興運敷化綏猷崇文經武孝恭勤儉端敏英哲睿皇帝實錄卷之三百三十四

實錄卷三百二十四

柔

大清仁宗受天興運敷化綏猷崇文經武孝恭勤儉端敏英哲睿皇帝實錄卷之三百三十五

熊隆地祇官煙草局議起省法官大才太傅武英殿大學士文淵閣領閣事務參政奉
上諭事件處管理郎中事務翰林院掌院學士隨帶胆奴

片索留吸曹振鏞職官李天佐又瀾閣大學士管理刑部事務五級日欽九龍成日講起居注官外外傳內含又瀾閣提舉閣事修纂

欽奉 上諭事件處編制學士戶部尚書對林院掌院學士彭曾廣等上總管內務府大臣錢寶琮萬州鄭曉步軍統領管理戶部庫奉

片消傳等處礦理工程處御茶膳房御藥局太醫院西華堂事務軍功加一級通帶加一級月前加一級叙紀錄二次在英和總兵填官太

子依禮部尚書上書房行走英欽殿總管理園子監事務加六級隨帶加一級紀錄四次臣等謹於奉

較修

嘉慶二十二年丁丑冬十月辛未朔日食○

一、

幸

太廟

上親詣行禮○遣官祭

永陵

福陵

昭陵

昭西陵

孝陵

孝東陵

景陵

泰陵

泰東陵

裕陵○遣官祭

孝淑皇后陵寢○遣官祭

端慧皇太子園寢○頒嘉慶二十三年時憲

書○越南國王阮福映遣使表貢方物賞賚

筵宴如例○壬申

上幸圓明園○癸酉諭內閣朕每日恭閱

列聖實錄原以

祖

考詒謀法則大備鑑往知來恪守祇遵以施於

政治本日恭閱

皇祖世宗憲皇帝實錄內載雍正五年九月內

欽奉

諭旨邪教妖言大有關於人心風俗該地方官

一有所聞即當留心根究庶可以消姦究而

安良善所謂防微杜漸也若下司隱匿不報

或上司知之又欲化有事為無事勢必至姦

究漏網匪黨無所忌憚附和者愈衆則將來

株連者愈多是本欲息事而轉致多事故不

如懲治之於早也各省督撫藩臬皆地方大

吏勉之母忽欽此仰見

皇祖睿謨深遠於百年以後之事早已

先幾燭照朕現在嚴拏邪匪用以除莠安良實

與

祖訓默相符合蓋邪教妖言煽惑愚民其始不

過數人數家私相傳習地方官當其初經發

覺時或意存寬縱懼干失察之咎不行查辦

迨至養癰貽患徒黨衆多遂敢恣行不法彼

時大加誅夷罹法者殆不可數計所謂星星

不滅勢將燎原由於弭患之不早也著直省

督撫藩臬各分飭所屬地方官境內如有傳

習邪教者總當認真查拏據實稟報該管上

司即嚴切根究按律懲治不可稍存姑息之

見此時小懲大誡治罪者不過數人而萌孽

既除則愚蒙不為所惑。善良益得自全。即以陰隲之說計之。其造福豈有涯量。慎勿務煦煦之仁。而昧正俗安民之遠計也。將此通諭知之。○加封密雲縣白龍潭。

昭靈廣濟龍神為

昭靈廣濟普澤龍神○加賞五城貧民棉衣
四千件○甲戌

上以萬壽節御同樂園賜皇子皇孫及王以下文武大臣蒙古王公外藩使臣等食至丁丑

皆如之。○丙子。

萬壽節遣官祭

太廟後殿○遣官祭

福陵。

昭陵

昭西陵。

孝陵

孝東陵。

景陵

秦陵。

泰東陵

裕陵○遣官祭

孝淑皇后陵寢○遣官祭

顯佑宮。

東嶽廟

城隍廟 ○

上詣

安佑宮行禮○御正大光明殿皇子皇孫及王

以下文武大臣官員蒙古王公外藩使臣等

行慶賀禮○除江蘇丹徒縣坍荒田八頃九

十九畝有奇額賦○戊寅諭內閣本日朕恭

閱

皇祖世宗憲皇帝實錄內載雍正五年十月內

欽奉

諭旨科道職司言路乃朝廷政務所關當矢竭

公忠無欺無隱方為稱職朕觀數年以來科

道陳奏者並無忠謹可信之詞又有庸陋之

科道既不敢直陳政務之大端。又恐蹈緘默之愆。往往摭拾瑣細。迂謬毫無關繫之事。濫行條奏。甚至顛倒是非。紊亂黑白。或借以行私植黨者有之。從來人君聽言納諫。原為美德。但言之公者。自應嘉納。而言之私者。豈可漫為聽從。今科道所奏。朕若不加採納。則以朕為不能受諫。若所言謬妄。而稍為懲戒。則謂刻待言官。以杜忠諫之路。此為君之所以難也。欽此。

聖諭煌煌。仰見我

皇祖聰明睿知。於進言者之忠佞賢愚。

坐照如神。特為

指示公私。以立萬世聽言之準。昨朕特製諫臣

論一篇。頒示都察院衙門。亦與

祖訓若合符節。朕臨御以來。於科道言事。凡有

裨政治者。無不採納施行。即摭拾浮詞連章

累牘。亦從未倦於省覽。乃竟有營私納賂。作

弄威福者。此則紊亂朝綱。法所難宥。蓋言官

為朝廷之耳目。所言公則國家受其益。所言私則國家受其害。是以

皇祖聖訓。以顛倒是非。紊亂黑白。植黨行私。為科道之切戒。人君明目達聰。以察天下之治忽。原非徒博納諫之名。朕用人行政。一秉大公。即聽言一節。惟以是非為取舍。不以愛憎為從違。此舉朝所共見。若庸陋之科道。見朕有所懲治。妄以為拒諫。朕亦姑聽之。斷不肯邀虛譽而妨實政也。茲特恭述。

皇祖聖訓。凡職司言路者。俱當敬謹繹誦。並將昨所頒諫臣論。熟讀深思。各矢公忠。屏除私念。以期無負言職。用副朕再三訓誡之至意。將此通諭科道知之。○乙卯。諭內閣。直省年歲豐歉。關係民生者至切。以四海之廣。安能歲逢大有。其間暘雨不齊。則天時人事感應之理。固有較然不爽者。每見該省吏治整飭。民俗淳良。往往雨暘應候。年穀順成。其或官吏貪污。民氣囂陵。則戾氣成象。即足以致災。

青。默加考驗。歷歷可徵。本年近京一帶夏間。苦旱。屢經祈禱。總未暢沛。甘霖。朕宵旰憂思。不得其故。嗣於七八月間。究出。海康慶遠。從逆重情。又蕭鎮貪黷。營私劣蹟。敗露。均經審明治罪。九月內。甘膏疊降。畿輔全境。優霑。蓋海康慶遠。以宗姓支裔交通。叛逆。蕭鎮以風憲官職。濁亂紀綱。此皆敗常壞法之大者。其或

上蒼示警。職此之由。茲逆泯消除。和甘立召。深

觀。天人感應之理。可不共知。儆惕予著。通諭內外大小臣工。各當靖共。爾位。熙績亮功。以冀感召。

天和共臻。上理。用副朕寅承保乂之至意。○命刑部左侍郎秀寧。馳往直隸。昌平州審案。○

庚辰。

皇后千秋節。宮內行禮如儀。停止筵宴。及在外公主福晉命婦行禮。○命工部尚書蘇楞額。仍在紫禁城內騎馬。○辛巳。

上詣

安佑宮行禮。○諭內閣。德寧阿奏李鑾宣病故。暫行代辦。總督衙門事務。曹六興奏。暫行代辦。藩司衙門事務。該省總督。藩司相繼出缺。德寧阿等以公事為重。暫行代理。所辦俱是。四川總督員缺。前已簡調。蔣攸銘降旨。令其速赴新任。蔣攸銘未到任以前。四川總督著德寧阿暫行署理。曹六興。昨已升授四川藩司。著即接印任事。○諭軍機大臣等。蔣攸銘

調補四川總督。後曾降旨。令該督查明由廣東至四川捷近道路。立即馳赴新任。彼時四川總督印務。尚有李鑾宣護理。現在李鑾宣病故。萬不得已。暫令將軍德寧阿兼署。德寧阿於地方事務。全不諳習。不識文字。蔣攸銘無論行抵何處。接奉諭旨。著即無分晝夜。馳驛兼程。前往四川接印任事。不可片刻遲延。將此由五百里諭令知之。○命調任江蘇巡撫李堯棟。仍回雲南巡撫。任以江蘇布政使。

陳桂生為巡撫按察使伊什扎木素為布政使調福建按察使麟祥為江蘇按察使以福建臺灣道糜奇瑜為按察使○以福建福州協副將安慶為四川松潘鎮總兵官○旌表守正捐軀直隸清豐縣民李毛坤女李氏○戶部議准雲南巡撫李堯棟疏報文山會澤二縣開墾田四十三頃七十四畝有奇照例升科從之○壬午

上詣

大高殿

壽皇殿行禮○還宮○命察哈爾都統松筠馳往歸化城審案○癸未諭軍機大臣等前曾有旨諭知松筠已離伊犁將軍之任嗣後不准貢獻馬匹乃松筠自到察哈爾都統任後又復進馬該處副都統棍楚克策楞亦進馬二匹張家口素不產馬該都統等向無進馬之例此次必係松筠自出主見又約會棍楚克策楞一同進獻作為陪伴甚屬無謂松筠

著傳旨申飭伊二人所進之馬俱不堪供御已歸入阿拉善羣內松筠嗣後不准再進馬匹儻再行瀆進除將馬匹立時撥回外仍將伊交部議處再昨降旨派松筠前往歸化城查辦佐領達莫龍呈控盤獲教匪副都統等不為究辦一案係因察哈爾距歸化城不遠令松筠就近前往松筠到彼審明後即繕摺具奏速回察哈爾都統本任斷不可借奉使為名妄思來京復命也將此諭令知之○甲

申命署禮部右侍郎李鴻賓馳往河南審案並查勘河南山東一帶黃運河湖水勢○命哈密幫辦大臣積德已里坤領隊大臣吉凌阿庫爾喀喇烏蘇領隊大臣佛安回京賞候補主事佛佳三等侍衛為哈密幫辦大臣已革吉林副都統達祿藍翎侍衛為已里坤領隊大臣贊禮郎舒寧三等侍衛為庫爾喀喇烏蘇領隊大臣○蠲緩江蘇高郵甘泉寶應睢寧句容山陽阜寧清河桃源安東鹽城泰

江都銅山豐沛蕭陽山宿遷十九州縣及淮安大河徐州三衛水災新舊額賦有差並賑高郵甘泉寶應三州縣災民給沛縣災民一月口糧○乙酉諭內閣盛京為我朝發祥之地

締造鴻規式瞻

前烈我

皇考高宗純皇帝臨御六十年曾四次

躬詣恭謁

祖陵並

垂訓後嗣必當賸懷舊疆再三周歷朕在藩邸

時曾隨侍

皇考東巡及寅承

大統恪遵

聖訓於嘉慶十年親詣陪都祇謁

橋山越今十有二年緬維

祖

宗遺緒慕切羹牆允宜再申叩謁敬薦肸馨特

消吉於明年七月二十二日自京啟鑾前往盛京恭謁

三陵屆期令二阿哥三阿哥四阿哥隨往所有

一切典禮事宜著各該衙門照例敬謹豫備

○又諭御史卿祖培奏請勅各省學政講明

朱子全書以端士習一摺教化為立政之本

以正人心以厚風俗非特各省學政當講明

正學以端士習即督撫藩臬以至道府州縣

各有治民之責皆應隨時化導俾小民遷善

遠惡力返淳風宋儒朱子全書固足以闡明

經術而五經及四子書炳若日星若在官者

各能身體力行以為編氓倡率亦何不可收

世道人心之益朕前降諭旨令牧民者惟以

孝弟忠信禮義廉恥為教民之先務直省大

小官吏果能仰體朕意實力奉行廣為勸諭

使父誡其子兄誡其弟久之漸摩成習薰德

而善良者衆日計雖不足月計則有餘也其

有愚頑梗化之徒狃於邪說則明刑所以弼

教化導與懲創相輔而行使民知畏法而生懼心即漸知慕義而生愧心至於有恥且格則經正民興自無邪慝矣將此通諭知之○又諭松筠等請將張家口駐防八旗協領三員作為前鋒翼長准戴翎枝並請添設前鋒叅領前鋒校等語張家口駐防員弁向無准戴翎枝之例今松筠等奏請添設斷不可行若各處駐防將軍大臣等皆效尤更張又將如何辦理松筠於所到之處祇圖邀譽此必又係聽信屬員慝希冀倖倖代為奏請除所奏不准行外松筠棍徒克策楞俱著交部議處並著松筠即將此事係伊屬員何人首先倡為慝摺指名具奏一併交部議處○緩徵江西德化星子德安三縣被水地畝額賦○丙戌試中式武舉錢殿甲等四十六人於太和殿前○諭內閣近來內外各衙門辦事因循疲玩屢經訓飭積習竟不能革除昨日朕披覽工部覈銷順天府具題嘉慶十四年

己巳恩科文武會試搭蓋棚座等項用過銀兩一本工部覈銷並未逾限順天府於事越八年之久始行具題即此一事可見劉鏞之策管順天府尹任內諸事懈弛降級調用尚未償其疲玩之咎著通諭內外大小各衙門嗣後遇有應辦事件無論鉅細俱應迅速辦理不可怠惰遲延致有積壓用副朕諄諄告誡至意○丁亥諭內閣御史王庭華奏分發佐雜人員請嚴加甄別一摺各省分發佐雜人員人冗途雜賢否不一自應立法甄汰以示區別著各督撫將分發佐雜人員於到省後即留心查察如有身家不清流品不正者隨時奏明斥革不必待至一年其才堪造就者試用一年准其咨留本省照例補用才庸品劣者一年限滿分別降調咨回原籍務各秉公考覈勿稍瞻徇五城揀發各員亦著一體甄別以肅官方○諭軍機大臣等據張映漢奏湖北清查舊案第九限應完銀五萬二

千四百三兩零現已如數完解司庫並聲明末三限銀兩完解後仍有新辦清查案內各州縣情願代前任認完無著及逃亡民欠等項銀兩請於二十五年舊案三限全完再分十年彌補等語湖北各州縣倉庫虧短銀兩前於嘉慶十二年經該督撫奏請分十二限彌補全完彼時因虧空人數衆多加恩免其治罪准其依限完繳已屬格外恩施此後何得再有續虧乃昨據阮元張映漢會奏覆加清查將前次漏報各款請於十二限滿後自嘉慶二十五年六月起再分限十年彌補完竣當即降旨申飭令慶保張映漢另行妥議此次張映漢摺內又復申理前說看來該省從前十二年清查之案開報隱漏者尚多若似此前限滿後又以清查未盡為詞續行展限拖延歲月終無清楚之日慶保係新任總督著會同張映漢徹底查明全行報出統計於前十二限滿再予限幾年可以彌補全完

嗣後各州縣查出新虧有一案即叅辦一案不准再有清查名目若仍互相容隱匿不舉報一經發覺不但將該州縣按律治罪並將該督撫嚴懲不貸將此諭令知之○又諭晉昌以賞襲公爵謝恩一摺前因晉隆在總族長任內有失查習入邪教之人將伊公爵革退以晉隆現犯之罪較晉昌前犯之罪重大是以將此公爵仍著晉昌承襲晉隆本應發往盛京朕念伊母年老晉昌復在伊犁將軍任所伊家無人侍奉加恩將晉隆免其發往留京侍奉伊母即與施恩於晉昌無異晉昌當感朕恩施盡心圖報永保邊界乂安不得更張任意辦理○福建臺灣鎮總兵官武隆阿等奏拏獲洋盜出力人員得旨嘉獎賞守備謝建雍花翎縣丞范邦幹等升敘有差○免齊齊哈爾黑龍江墨爾根被災兵丁額糧並貸貧民口糧○戊子

上詣

時應宮

昭顯廟拈香。○御紫光閣閱中式武舉馬步射。○己丑。

上御箭亭閱中式武舉技勇。○御乾清宮引見中式武舉。親定甲乙。○諭內閣。國家各旗營品制。定例已久。俱當率由舊章。張家口駐防協領。向無翎枝。亦未設有前鋒叅領。前鋒校等官。松筠率臆請增實屬沽名市惠。只知邀譽任意更張。此端一開。若各省紛紛效尤。豈不有紊官制。兵部將松筠照妄行條奏例議降一級調用。本屬咎所應得。姑從寬改為降二級留任。棍楚克策楞身任副都統。凡與都統會辦事件。可從則從。不可從即應駁正。若都統仍然固執。則當據實叅奏。乃棍楚克策楞心知不可。不敢駁詰。一味隨聲附和。伊本屬無用之人。即留任亦毫無裨益。棍楚克策楞著革去副都統。伊本係散秩大臣。著來京仍回散秩大臣之任。罰俸三年以示懲戒。○

調正紅旗漢軍副都統瑞齡。為察哈爾副都統。以散秩大臣奕禮。為正紅旗漢軍副都統。○庚寅。

上御太和殿傳臚。賜中式武舉一甲武鳳來。馬維衍。王志元。三人。武進士及第二甲張肇泰等六人。武進士出身。三甲錢殿甲等三十七人。同武進士出身。○壬辰。

上御懋勤殿。勾到河南。山東情實罪犯。停決河南斬犯四人。絞犯四十人。山東斬犯十人。絞犯五人。餘一百一人予勾。○諭內閣。富俊等奏。賑卹米石酌請變通一摺。盛京復州等處被災旗民。應領續賑米石。據該將軍等查明倉貯不敷。若由鄰邑改撥轉運。需時著照所請。准其一半照銀米兼賑。例折給銀兩。一半照依高糧米價折給銀兩。聽民自買雜糧食用。所需銀兩。即由盛京戶部銀庫動用。○又諭。朕前日披閱工部覈銷順天府具題嘉慶十四年己巳恩科會試公用銀兩一本。遲至

八年之久。始行具題。當經降旨訓飭。昨日復閱工部覈銷順天府具題嘉慶十年繙譯會試公用銀兩一本。所用銀數不過二百餘兩。乃遲至十二年之久。始行具題。尤覺可笑。順天府辦理公事。如此疲玩。恐此外緊要案件。因循積壓者。不知凡幾。著章煦注如淵。逐細詳查。應行辦理者。迅速清釐。如有玩延貽誤者。即據實奏。毋稍瞻徇。○調鑲藍旗漢軍副都統英綬。為正黃旗滿洲副都統。以內閣學士哈寧阿。兼鑲藍旗漢軍副都統。○贈故正黃旗滿洲副都統福長安。都統銜賞銀三百兩治喪。○減免直隸安隆平。寧晉。新河。南宮。任六州縣積水地畝額賦。○乙未旌表守正捐軀江西宜春縣民曾德厚妻龍氏。○丙申。上御懋勤殿。勾到山西直隸。熱河情實罪犯。停決山西斬犯八人。絞犯六人。直隸斬犯七人。絞犯十三人。餘一百一人予勾。○諭內閣。王

大。楊三。二犯入教。聽糾同往宋家莊。赴榮華會。至中途畏懼。始行逃回。已有助逆之情。法無可貸。王大。楊三。俱著即處斬。王左雖經入教。與知逆情。惟該犯曾充眼目。拏獲逆犯四名。均係凌遲斬梟之犯。尚可貸其一死。王左著照劉六斤之例。在刑部永遠監禁。遇赦不赦。劉第四。張其信。王璧。隨同入教。並未助逆。其得受白布。止係圖免殺害。劉第四。張其信。王璧。俱著解交直隸省城。永遠監禁。遇赦不赦。如有拏獲逆犯。令其識認質對。○丁酉。諭軍機大臣等。孫玉庭等奏。現在之禦黃壩。過於刷深。不能施工。東清壩亦因禦黃壩掣溜太急。難期穩立。不得不添建重壩。以資掣束。查舊二壩地方。係曾經立壩之處。可以照舊修築。原設之禦黃壩。現已收窄。照舊修守。並非聽其廢棄。止係添建一壩。期為重門掣托等語。新禦黃壩口門。刷深至八丈有餘。捆埽進占。難以施工。自係實在情形。現在清水出

口過暢若不加收束。冬令消水太多。來年清水不足。所關更鉅。該督等所議祇係就水勢較淺之處添築重壩一道。將口門收窄。藉以鉗束清水。不使過於宣洩。其現在之禦黃壩基。照舊修守。並未廢棄。且相距亦僅一百九十丈。並無五六百丈之遙。著即照該督等所奏迅速興工。妥協辦理。惟是該督等既再四酌籌。移建此壩。務期於蓄清敵黃機宜。實有裨益。儻建壩之後。或不能收效。則錯誤之咎。

惟伊二人是問。彼時不但將所用錢糧全行著賠。仍必嚴懲不貸。將此諭令知之。○戊戌上御懋勤殿。勾到朝審情實罪犯。停決官犯一人。斬犯五人。絞犯十三人。餘十六人予勾。○諭內閣。我朝

列聖相承。廣開言路。朕虛懷納諫。凡科道所上章疏。其言是者。無不採納施行。即或識見迂陋。所言不當。亦每曲示包容。不特不肯誅戮言官。即如前朝批政。廷杖諫臣。亦從無其事。

本日朝審。勾到官犯內。伊綿泰。蕭鎮。二名俱予勾決。伊綿泰枉法婪贓。法所難宥。至蕭鎮職居言路。得以上章言事。徇情聽囑。已干法紀。乃竟賄賣條陳。以奏事為納賂之具。欺君罔上。孰大於此。若不加嚴懲。則言以賄行。顛倒是非。變亂黑白。勢將何所不至。特將該犯明正典刑。以昭炯戒。內外臣工。當知朕所誅者。乃壞法營私。行同市儈之小人。於上章言事之諫官。毫不相涉也。將此明白通諭知之。

○又諭內閣。參奏陳預具題李升魁瘋病痊愈。限滿釋放一本。聲明本內於恭書

孝聖憲皇后誤書一字。票擬嚴加議處。發進呈朕。每日披覽奏章。書籍遇有

列聖

列后廟號。俱敬謹捧閱。內外臣工。尤應敬謹詳校。從前縉布。英和。成寧等。均因擡寫錯誤。立予降調。今該省具題本內。於擡寫之處。誤書一字。實非尋常錯誤可比。巡撫陳預。臬司張

五緯本應即予降調。惟東省現當整飭之時。辦事需人。若將伊二人同時降黜。乏員更換。陳預著仍降為三品頂帶。張五緯著降為四品頂帶。俱仍交部嚴加議處。其繕寫錯誤之人。著陳預自行查明。從重定擬具奏。尋議陳預。張五緯俱革職。得旨加恩改為革職留任。○又諭。巴哈布奏善化縣知縣王餘英緝捕認真。懇恩鼓勵等語。近來各督撫每於屬員辦事稍有微長。輒濫行保舉。藉以市惠。殊為陋習。即如此案。王餘英緝獲鄰境越獄盜犯譚三一名。該撫暫行存記。如該員始終奮勉。再有出力之處。始行保奏。有何不可。至該員將本境盜犯於疏防限內全行拏獲。功過僅足相抵。何得遽請恩施。所奏著不准行。○又諭。前據巡視南城御史廣泰等奏拏獲私造火藥之黃朋等一案。當經降旨交刑部審訊。茲據該部訊明。黃朋等係開設花爆作坊。其所用硝磺均買自官行。確有來歷。並經刑部

司員會同該城指揮查驗。封存料母。實係稽灰。黃朋等並非私造火藥。不在例禁。無罪可科。該城前此並不查明。妄行拘拏。奏請交部審辦。實屬錯誤。廣泰蔣詩俱著傳旨申飭。黃朋。魏思清。孫錦義。陳明。魏大成。即著省釋。步軍統領。順天府。五城均有緝捕之責。原以除莠安良。肅清輦轍。乃於降旨飭緝要犯。不能捕獲一名。日久恐干飭責。輒將尋常案犯逮繫多人。張皇入奏。甚至不察虛實。濫及平民。及訊係無辜。始行釋放。而其人業已家產蕩然。京師為萬方輻輳之區。市廛闐溢。若緝捕衙門皆似此苛擾。胥役藉爪牙之威。肆行索詐。必致民不聊生。迴非除莠安良。轉成病民苛政。但不可因有此旨。又形怠玩。著通諭步軍統領衙門。順天府。五城。所有飭緝要犯。務各上緊嚴拏。毋稍疏懈。其不在禁令者。勿許率意妄拏。致多株累。若官吏人等藉端苛擾。從中需索。至有如近日西城查封米鋪朋詐

錢文情事一經發覺。定行嚴懲不貸。○緩徵湖南澧州被水田畝新舊額賦。○貸陝西靖邊縣被雹災民一月口糧。○己亥

上詣

奉先殿

壽皇殿行禮。○諭內閣。方受疇等奏。揀員升署大興縣知縣一摺。前任大興縣知縣黃萬里。因延案不辦。拖累人命。革職治罪。近日順天府屬事件。因循疲玩。積壓纍纍。大興宛平二

縣者居多。方受疇章煦。汪如淵會同揀員升補大興縣。自應秉公遴選。擇其辦事認真振作有為者。奏請升調。本日據該督等請以玉田縣知縣黃克昌升署。朕閱該員參罰單內。開載共六十餘案。多係經徵不力。緝捕未獲事件。前曾降旨通諭各督撫。不准以參罰過多之員。違例請升。直隸州縣共有一百餘缺。其中豈乏能勝京縣之任者。即謂黃克昌才具尚優。其本任玉田。來年巡幸盛京。蹕路經

臨。儘可留該員在任經理。何必轉令升署大興。該督等不過為該員升遷起見。故爾違例陳請。除黃克昌不准升署大興縣知縣外。方

受疇。章煦。汪如淵。俱著交部議處。大興縣一缺。著另行會同揀員請補。僅再以黃克昌請。定將該督等治罪不貸。○緩徵直隸河間。肅寧。任邱。滄南。皮。冀。武。邑。衡水。新河。隆平。獻。交河。景故城。東光。天津。青靜海。鹽山。慶雲。邢臺。沙河。唐山。廣宗。鉅鹿。南和。內邱。延慶。保安。

蔚。宣化。西寧。懷來。易。涿水。南宮。棗強。趙。高邑。寧晉。柏鄉。臨城。阜平。阜城。平鄉。永年。邯鄲。成安。肥鄉。曲周。廣平。雞澤。磁。大名。元城。清豐。五十六州縣。旱災霜災電災。新舊額賦有差。○是月。山西巡撫和舜武奏。查閱省城營伍。得旨。山西營伍。大半庸劣。必須力加操練。不可怠惰。○陝甘總督長齡奏。遵諭嚴防採買兵糧積弊。得旨。能不徇隱。不顧情面。有弊即參。力加振作。自然積習可除矣。若稍姑息。則朕

之諭與汝之奏皆成空談將來又煩朕心更易大吏太不成事矣○新調四川總督蔣攸銘奏報交篆起程馳赴新任日期得旨西南保障疆宇寥廓五方雜處訟獄滋繁以清慎居心勤明任事察吏宜嚴治民以正切忌疲玩因循常思威克厥愛勉之勿怠

卷之三

走

大清仁宗受天興運數化綏猷崇文經武孝恭勤儉端敏英哲睿皇帝實錄卷之三百三十五

大清仁宗受天興運敷化綏猷崇文經武孝恭
勤儉端敏英哲睿皇帝實錄卷之三百三十六

監修規程官懷昇攝起居注官太子太傅武英殿大學士文淵閣領閣事務察院掌
上諭事件處管理工部事務翰林院掌院學士隨帶

級尋常四級在曹振鏞職職官太子太僕文蔚閣大學士管理刑部事務五級在戴均元禮部司馬起居注官六級在文蔚閣提舉副書佐

六諭事件處偏辦大學士戶部尚書翰林院掌院學士教習庚吉士禮部內務府大臣鑲黃旗滿洲都統步軍統領管理戶部

三平春夜青嶺園等處曉理工程處御茶膳房御藥房太醫院西洋堂事務軍功三級隨帶功三級尋常功三級紀錄五次臣
其和

茲請官太子太保禮部尚書上書房行走武英殿總纂管理國子監事務加六級隨帶加一級紀錄四次在江皖兗等奉

救修

嘉慶二十二年丁丑十一月庚子朔○辛丑

卷之二十一

1

上御乾清門聽政。○以故浩齊特扎薩克郡王

端多布多爾濟子額琳沁諾爾布襲爵○以

詹事府詹事和桂為通政使司通政使三等

侍衛明志為太常寺卿通政使司副使常起

為太僕寺卿（壬寅）

上

雍和宮行禮

宣仁廟

凝和廟

火神廟拈香。○癸卯諭內閣督撫違例保題係屬公罪其應得處分本可准其抵銷惟前曾降旨通諭不准以叅罰過多之員奏請升用今方受疇等以叅罰六十餘案之黃克昌奏請升署大興縣知縣實屬故違諭旨方受疇章煦注如淵著各實罰俸九箇月不准抵銷嗣後各省保題官員除尋常違例處分仍准其查抵外其奉特旨交議者俱不准抵銷著為令。○諭軍機大臣等松福等奏霍罕伯克愛瑪爾遣使入覲因所呈奏書不合體制向該貢使指明曉諭駁飭遣回其安集延回子所帶貨物姑准貿易並請於該伯克下次遣使入貢一面奏聞一面即令隨年班伯克入覲等語。此次霍罕伯克愛瑪爾遣使入覲其奏書擅自矜誇不合體制經松福素細向該貢使指明駁飭遣回所辦甚是該貢使遣回後松福等總不必與之通問向其招徠儻該伯克再行遣使齎呈奏書懇請入覲松福

等將其奏書譯出如果情詞恭順俱合體制並於筵宴時察看該貢使行禮均各如儀方可據情入奏並將譯出奏書及原奏書一併呈覽一面傳諭該貢使在喀什噶爾安靜候旨至霍罕遣使入覲原不必拘定隨年班伯克一同到京松福等所請一面奏聞一面即令起程之處殊不可行總須候旨遵辦彼時朕必降旨指示令其定於何月到京瞻覲松福等再約計程途令該貢使自彼起程可也

將此諭令知之。○甲辰遣官祭

先醫之神。○乙巳諭內閣從前

皇考高宗純皇帝御門辦事遇有內閣學士讀本錯誤者立即降革示懲昨同麟讀本錯誤交部議處已屬從寬本日吏部議上請將該員罰俸一年仍聲明例准抵銷殊屬不合同麟著實罰俸一年不准抵銷。○給安徽五河鳳陽靈璧宿懷遠泗六州縣及屯坐各衛被水災民一月口糧並蠲緩五河鳳陽靈璧宿

懷遠泗盱眙天長壽鳳臺定遠潛山蕪湖懷寧東流當塗繁昌無為巢廬江二十州縣及建陽泗州鳳陽長淮四衛新舊額賦借欠籽種口糧有差○丙午諭內閣前經降旨各部院遇有議處事件被議之員有應以級紀議抵者毋庸先行查計於摺尾聲明可否准抵請旨遵行昨日吏部具題議處工部遲誤武殿試黃案一本將堂司各員分別議以罰俸並查明各該員紀錄分別抵銷辦理殊屬錯

誤吏部堂官著傳旨申飭此次姑免交議若再錯誤定行議處況昨早議處同麟即係摺奏此件又係具本何以兩歧實不可解除此案遲誤黃案本係公罪均准其抵銷外嗣後議處事件該部照例定議分別公罪私罪其應以級紀議抵者俱於摺內聲明請旨經朕降旨准其抵銷該部再行查覈其有級紀可抵者分別查銷註冊無庸再行具奏不得先查級紀徑行抵銷以歸畫一○旌表守正捐

軀廣東乳源縣民女李氏○戊申諭內閣前棍楚克策楞隨同松筠率請於張家口駐防設立前鋒叅領前鋒校等官並加給協領翎枝任意更張朕不加重謹將伊革去副都統仍留散秩大臣已屬格外恩施昨棍楚克策楞回京召見時並不知感恩認罪伏地痛哭以手拊地嘵嘵剖辯所言多不成話並稱衆人代為抱屈伊傳到郭什哈三十名逐一曉諭等語實屬妄誕無知棍楚克策楞於召

對時肆意妄言且役使兵丁多至三十人仍沿郭什哈之稱亦屬違制棍楚克策楞著交部嚴加議處限五日內具奏又據棍楚克策楞稱該處都統衙門亦有郭什哈四十名松筠到任後並無增減松筠並著交部議處○乙酉命吏部左侍郎熙昌馳往直隸朝陽縣審案○庚戌諭內閣御史周鳴鑾奏請整飭學校一摺直省各府州縣建置學校官以

教諭訓導為名。原令其訓誨士子宣揚教化。即書院義學之設。亦以講明正學造就人材。非徒為庸儒脩脯地也。如該御史所奏各省教官廢棄職業。懶於月課。書院義學夤緣推薦濫膺講席。並有索取脩身不到館者。殊失慎選師資之義。著該督撫學政等於所屬教官時加考覈。令各勤修職事。以明倫講學為士子倡率。其書院義學務延經明行修之士講習討論。如有學品庸陋之人濫竽充數

者立即斥退。以勵師儒而端教術。又諭御史王允輝奏請嚴筆帖式考試章程一摺。各衙門實缺筆帖式人員。三年考試一次。原以考驗其繙譯之優劣。俾知有所勸懲。本年七月考試各衙門額設筆帖式一千五百餘員。咨送赴考者僅止三百八十餘員。其餘率註患病出差。顯係藉詞規避。嗣後筆帖式三年考試如該衙門需員辦公不能同時送考。務遵照定例。祇准酌留十之一二。其餘概不准

託故不到。並於考試時嚴加查察。如查有槍代等弊。即行叅奏。其各衙門章奏稿件均責令自行書寫。勿許倩人替代。儻有差使怠惰不諳清文者。該堂官隨時叅革。毋稍瞻徇。又諭吏部議處事件奉特旨交議者。仍依定限於五日內專摺具奏。其各衙門自請議處及叅奏議處者。事件繁多。若概用摺奏。未免煩瑣。均照例具題。惟此內應專案具題之件亦當予以限期。著定限二十日具題。如有違

踰即將該部堂司官議處。餘俱照所奏章程辦理。又諭近來內外管理官兵大員親隨兵丁率多逾額。殊乖體制。著軍機大臣會同兵部將在內之都統副都統及管理營務大臣在外之總督巡撫將軍都統副都統提督總兵所有親隨兵丁分別酌議人數具奏。候旨遵行。又諭棍徒克策楞隨同松筠率請於張家口駐防添設前鋒叅領等官。並加給協領翎枝實屬任意更張。朕施恩格外。僅將

伊革去副都統仍留散秩大臣並未加以嚴譴乃伊於回京召見時曉曉剖辯並稱伊因此奏獲咎衆人代為抱屈感伊之恩轉使怨歸於上所奏太不成話內外大臣代屬員乞恩經朕降旨飭駁並將原奏之大臣議處者不知凡幾從未聞敢有怨及君上者君臣之義昭如天壤即獲罪者亦不敢懷怨况尋常小事不遂所請乎棍楚克策楞倡為此論搖惑人心紕繆已極其意總自以為負屈而巧託其詞於屬員之口其居心實不可問况召見之時痛哭流涕指天誓曰實屬膽大狂妄之極至所用親隨兵丁逾額猶其咎之輕者棍楚克策楞著即照部議革職交該旗王大臣嚴行管束不時稽察若再抱不平生事妄為即行奏交刑部從重治罪其世襲散秩大臣著該旗照例辦理○辛亥

上以冬至祀
天於

園丘自是日始齋戒三日○壬子聖祖仁皇帝忌辰遣官祭景陵○諭內閣前據御史熊璉條奏漕弊三款當交李奕疇於督漕回空途次留心察訪並逐款議奏茲據該漕督按款查明覆奏南漕自水次受兌以至抵通起卸弁丁官役節節交涉查察稍有不周即易滋弊實尚不止如該御史所陳原摺內運弁乘坐花船一節據該漕督查係划船音近傳說尚屬可信至牌燈皆沿途催趲所需與糜費無涉均無庸置議其每幫頭伍承辦應領應用款項亦不能不於衆丁內選派一人以專責成惟在該管官秉公遴選並令衆丁公同具保如承充後有侵吞派累情事查出嚴行懲辦其獎自除至漕委一項遇有河路淺澀口門捫阻必須派員催趲者原不能盡行裁革但該委員等沿途挾制幫丁需索規禮事所難免多一人即增一人之累該漕督總當大加裁減慎選

誠實之員派委。如有婪索滋弊者。立即嚴叅治罪。隨時整飭。毋苛毋縱。漕政自日就肅清矣。○癸丑。

上詣

南郊齋宮齋宿。○甲寅冬至祀

天於

圓丘。

上親詣行禮。○遣官祭

永陵。

福陵。

昭陵。

昭西陵。

孝陵。

孝東陵。

景陵。

泰陵。

泰東陵。

裕陵。○遣官祭

孝淑皇后陵寢。○遣官祭

端慧皇太子園寢。○停次日朝賀。○乙卯。緩

徵甘肅臯蘭秋道平涼靜寧寧夏寧朔靈中

衛平羅涇徽十一州縣旱災水災雹災新舊

額賦並貸災民口糧。○丙辰。

上御乾清門聽政。○諭內閣。御史馮清聘奏考

試中書應令該旗叅佐領赴場識認一摺。所

奏是。滿洲蒙古漢軍考試繙譯舉人童生。俱

有臨場識認之例。其考試中書自應一體辦

理。以杜假冒頂替之弊。嗣後滿洲蒙古漢軍

考試中書。除該旗叅佐領領出。具圖結外。臨

考之日。仍令該叅佐領赴場識認。以昭覈實。

著為令。○賞八旗兵丁一月錢糧。○減免直

隸文安東安二縣大窪地畝額賦有差。○丁

巳。刑部奏審明防禦烏爾袞泰疑賊妄拏拖

斃周萬春等二命一案。得旨。此案烏爾袞泰。

因圍場外有鋸倒木植。帶兵查緝。遂遇周萬

春。張起先。胡明月三人。趕押空車。向開設柴

廠之唐九繼賣運柴枝輒疑為偷木賊犯用鞭責打逼令証認妄以人賊並復具報到官以致拖斃二命現經刑部提到唐九繼等供證明確是張起先胡明月二命之拖斃實由烏爾袞泰妄拏所致烏爾袞泰著照擬革去防禦由絞罪上累減為杖一百餘俱照所議辦理案關人命無論虛實總應到案質訊慶溥前於臬司瑞弼關提烏爾袞泰質對時執意不令前往並在朕前面奏以烏爾袞泰在

圓場獲賊經朕施恩懇請不令赴質實屬謬妄慶溥著交部議處尋議降調得旨著改為降三級留任諭軍機大臣等卓秉恬奏訪聞上年四川營兵孫占鰲滋事一案係由葉文馥前在成都府任內與提督多隆武彼此齟齬不和葉文馥挾忿搜求兵丁過犯因訪聞孫占鰲曾經犯竊欲行查拏知縣魯鳳輝迎合葉文馥之意先將孫占鰲之妻拏究縣役黃耀又將孫占鰲衣物銀錢搶去以致孫

占鰲糾眾滋事前案懲辦後眾兵丁至今積怨本年五月間提標兵丁探知葉文馥嫁女在準提閣地方糾眾攔路將綵轎毆打洩忿地方官雖經訊明恐兵丁逞兇未敢錄供詳辦葉文馥居心殘酷有葉椿棒綽號平日專用非刑往往杖斃人命魯鳳輝在成都縣時索取關帝廟金爵又在武侯祠索詐商民有金爵不歸關帝廟釘錘又到武侯祠之謠升任江北同知不禁娼妓因以為利外間稱葉

文馥為酷吏魯鳳輝為貪官節次激動營兵皆歸咎於該二員並據卓秉恬面奏從前該省審辦孫占鰲之案其查拏犯竊各情節均係事後裝點多有不實等語此案事關吏治軍紀皆地方重大要務將攸銛甫至川省正當認真整飭毫無所庸其迴護著即確查上年營兵孫占鰲糾眾逞兇之案究係因何起釁葉文馥與多隆武彼此不和是否屬實究係孰曲孰直其原奏孫占鰲犯竊被拏情節

有無捏飾。至葉文馥、魯鳳輝二員，據卓秉恬奏：「為酷吏。」一為貪官。其為不協輿論，自屬顯然。著該督即查明該二員貪酷劣蹟，據實叅辦，以服人心。至提標兵丁探知道員嫁女糾眾攔打，此風亦不可長。必應將為首之人查明，按律懲辦。其起意消弭諱匿不報之人，一併查叅示懲。蔣攸銘下車伊始，當一秉至公，更正怠玩，除貪殘之吏，以肅吏治。懲驕縱之兵，以明軍紀。不可稍有偏畸，務令人心各得其平。期兵民悅服，自可相安無事也。將此諭令知之。」以鑲紅旗滿洲都統奕紹為宗人府左宗人。○戊午，命刑部尚書吳璥馳往河南蕭南廳地方查勘河隄。○以戶部尚書盧蔭溥署刑部尚書。○己未，諭內閣朕明年前往盛京恭謁祖陵，所有閱兵行圍等事皆不暇及，俱著停止。吉林為盛京鄰省，松寧自必至盛京接駕，亦著不必率領豫備隨圍官兵前來。其黑龍江

墨爾根等處官兵亦不必前來。屆時富俊惟將射靶官兵照前豫備。○又諭值年旗將普賞八旗兵丁一月錢糧，公同謝恩，代為具奏。一摺，此項賞銀乃

皇考高宗純皇帝俯念旗僕年終用度不無拮据，

特恩增賞。俾伊等整理衣帽，正項之用朕自御極以來，以

聖心為心，教養旗僕，每歲仍舊賞賚該兵丁等

當知此係特恩加賞。一切用度務須節儉，整理正項，不可恃為每年定例之賞。任意奢侈，一經入手，即致蕩然。著各該旗都統、副都統、通諭各兵丁等嗣後感戴朕恩，務各守分於一切差使奮勉効力，返樸還淳，以副朕愛育旗僕之至意。○步軍統領英和等奏緝獲逆犯屈名兒，得旨獎賚賞守備高鐸、徐永祥、花翎李瑞等藍翎。○以詹事府少詹事那清安為詹事。○旌表守正被戕四川會理州民秦

金耀妻張氏○庚申諭內閣御史卿祖培奏敬陳倉儲情形一摺南新倉廩座坍塌不堪貯米者現在共有十二廩著工部查勘是否應修據實具奏其各倉存留土米應行發糶者著倉場侍郎嚴飭各倉隨時呈報發城變價毋令存留倉內攙和滋弊至該御史所稱保送倉監督請於各衙門實缺人員外將試俸三年奏留候補之員一體保送其事不行各衙門實缺人員任事有年較之學習候補者自多歷練若既任監督後有勾通花戶書役執法營私之事無難查叅懲辦豈改用候補人員即能保其潔清自好乎所奏著毋庸議○辛酉

上幸瀛臺閱冰技○諭內閣御史譚瑞東奏請飭禁督撫令屬員幫辦幕務一摺直省督撫大吏不准令所屬官員代辦幕務例有明禁即如本年已革山西藩司習振翎令主簿費鈞在署辦事業已嚴辦示懲著再申諭各督

撫不得仍蹈從前陋習致開交通奔競之門至該御史所稱令督撫開具幕友姓名年終報部覈實一節則事屬難行外省所延幕友更換無常即開列姓名部中亦何從考其虛實豈非徒勞案牘所奏著毋庸議○又諭御史譚瑞東奏請飭部院堂司各官公署畫稿一摺國家董正治官設公署以理公務部院堂司各官理應日常進署各勤職業除軍機大臣常川入直不能到署外其南書房上書

房內務府大臣御前乾清門兼管部院事務者朕常諭令入署辦事務各勤至公廨詳覈稿案不得藉口內直自耽安逸以期毋曠庶官至朝房不准畫稿則事不可行朝房同僚公所各部院遇有緊要事件該司員勢不能安坐衙署靜候各堂官到齊畫諾以致違誤限期轉多積壓所有乾清門外及圓明園朝房回事畫稿著仍其舊○又諭刑部議駁四川民人李均仲與張氏通姦謀殺本夫宋子

順聲明張氏尚有不忍致死其夫之心一本所駁甚是。此案李均仲與張氏戀姦情密起意謀殺其夫宋子順。當宋子順飲醉回歸李均仲入房謀殺時。張氏何難立時喊救。即使被李均仲拔刀嚇禁不敢聲張。事後亦當日首告。乃遲至月餘始向約鄰王登沅哭訴。是已難信為不忍致死其夫。且該氏之母張周氏因女與人通姦致壻被殺恐到官受累投繯殞命。張周氏未經取有生供其利資縱姦亦無確證。刑部未將此一節擬駁。儻案情不實。則張氏既因姦致夫被殺。又致母自縊兩犯重罪。更不應稍為輕縱。著蔣攸銑提集案犯。將指駁各情節另行研鞫。覈擬具奏。尋奏研鞫供詞各情節均無疑義。仍將宋張氏擬絞監候。惟該氏至兩月之久始將姦夫指拏到官。與即時首告之例不符。毋庸夾簽聲請。李均仲仍照原擬合依姦夫起意殺死親夫姦夫擬斬立決。業已在監病故。應毋庸議。

張周氏縱容伊女與李均仲通姦罪止擬杖。業已畏罪自縊身死。亦毋庸議。下部知之。○調貴州按察使韓文綺為四川按察使。四川按察使富信為貴州按察使。○壬戌諭內閣內外管兵大員親隨兵丁前已有旨明定額數。若另設更替班次。則人數仍至衆多。且該兵丁一經挑作親隨。即非輪班之日。將必藉詞不肯操演技藝。其本管營員亦復瞻徇情面。不加督責。嗣後內外管兵大員所用親隨兵丁。應用二名十二名七名者。仍照定額。各於本管旗營內每日派直。但不許專有親隨兵丁名目。亦不許派定每大員名下某人作為常川親隨。總使所管之處。不論千人百人。周流更替。除承直之日。仍一體操演技藝。以勤本業。況皆可識。隨時考校清語弓箭。殊多裨益。又免營求。○諭軍機大臣等御史鄭家麟奏山東曹縣於十八年教匪滋事兩月之前有夥盜數十人。黃夜鳴鎗露刃。人民人

樊宗智家毆傷事主並傷及多人搶劫衣物並銀數千兩當經拏獲十餘人首犯逃逸及逆匪滋事將所獲盜犯搶劫其已未拏獲之盜犯有名者有任第九朱用顯朱和尚牛龍張二短辦劉柱諸人其劉柱一犯並經事主樊宗智於逆匪平定後指控係該縣朱家集居住之積盜與捕役楚振石魁來往情熟該縣典史鄭嵩隱匿遺賊不為究辦至今盜匪仍未拏獲等語此案盜夥多人劫傷事主該縣教匪平定後已越四年何以仍未將盜犯緝獲究辦因循疲玩已極著陳預即查明從前報案原卷先將劉柱及捕役楚振石魁嚴拏到案親提鞠訊並將夥盜任第九等嚴飭按名緝拏如審明實係此案正盜捕役楚振等勾通包庇即行按律嚴懲典史鄭嵩果有匿贓諱盜情事一併嚴行叅辦將此諭令知之○旌表守正捐軀山西五臺縣民馬東喜妻董氏○癸亥諭內閣本月初九日董教增

奏審擬黃浪謀殺胞兄黃涂一案將黃浪照謀殺期親尊長律問擬凌遲處死係用專摺具奏本日刑部議覆德寧阿審擬閔源貴故殺胞叔閔兆松一案將閔源貴照姪故殺期親叔律問擬凌遲處死係用題本胞叔胞兄均係期親尊長凌遲罪名亦復相同何以題奏兩歧是否刑部原議題奏章程未能周詳明晰抑係德寧阿具題錯誤著刑部查明具奏尋奏凌遲斬梟二項條例內擇其情罪重大而案屬罕見者改為專摺具奏故於謀殺親夫一項同一罪干凌遲則以與有服親屬通姦有關倫理者具奏其與平人通姦因而謀殺者具題於殺死期親尊長一項同一罪干凌遲亦以謀殺案內例不准夾簽者具奏其故殺之案及謀殺情可矜憫例准夾簽者具題再如罪應斬梟之功服總麻卑幼圖財強姦謀殺尊長一條亦係謀殺者具奏故殺者具題總期奏案不致太多而於定律謀重

於故之意亦不相悖今四川省疏題閔源貴
故殺胞叔閔兆松一案係照議定章程辦理
報聞○甲子

上詣

壽康宮行禮○諭內閣近科以來各省中式武
舉弓馬漸不如前本年會試按額取中人數
不敷僅開十力弓者亦得入選國家設科取
士文武並重若技藝不精俾列科名殊非造
就人材之道推原其故蓋緣各省學政於考

試時不免有重文輕武之心其閱看武童技
藝先不認真遴選取進入學者率多濫竽充
數及鄉會試遂至難獲真才著通諭各省學
政嗣後考試武童馬步箭弓石務按一定程
式認真校閱於合格之中再詳加比較拔其
尤者照額取進庶人知奮勉練習技勇從此
洊登科第足備異日干城之選矣○又諭國
家設官文武並重大小官員接見均有一定
體制不容意為卑亢朕近聞外省知府同知

竟有與提督平行者若不亟為整頓恐涉前
明重文輕武惡習大有關繫著該部查明會
典內文武相見儀注開列具奏再通行頒示
各省令各遵照定制以禮接見如有意為軒
輊者交該督撫查明叅處○命刑部右侍郎
成格馳往山東查辦事件○乙丑諭內閣本
年屆應軍政之期兵部將在京之都統護軍
統領副都統左右翼總兵鑾儀使內務府護
軍統領在外之駐防將軍都統副都統領隊

大臣提督總兵分晰開繕履歷清單進呈朕
詳加披閱內鑲黃旗蒙古都統福會年老多
疾人亦平庸著以原品休致鑲藍旗護軍統
領正黃旗滿洲副都統密哩馬上年著革
退護軍統領仍留副都統之任熱河都統慶
溥辦理旗民刑名事件不能勝任著來京以
都統用餘著照舊供職其造冊遲延之提鎮
十五員內太原鎮距京最近總兵董連第延
不造報實屬玩視公事且其人亦平庸著降

一級來京以本旗參領補用提督馬元多隆武總兵楊超鑠黃耀武郭文魁慶熙武隆阿沈煥李應元劉廷斌桂溍羅思舉張志林哈豐阿俱著交部照例議處○又諭董誥近年每屆冬令其胸痛氣壅舊疾不時舉發春融後旋即痊愈本年因病給假茲復請展數旬著加恩再給假兩月在家安心調理現在天氣嚴寒且冬令公務較繁董誥即病勢稍輕亦毋庸衝寒入直統俟明年二月初旬朕進宮時天氣暄和再行銷假當差○調禮部尚書和寧為兵部尚書以直隸泰寧鎮總兵官穆克登額為禮部尚書○調熱河都統慶溥為鑲黃旗蒙古都統正黃旗漢軍都統伊冲阿為熱河都統以理藩院尚書和世泰兼正黃旗漢軍都統內閣學士英綬兼鑲藍旗護軍統領正藍旗漢軍副都統弘善為泰寧鎮總兵官兼總管內務府大臣前任副都統富祥為正藍旗漢軍副都統○以直隸河北協

副將奇成額為山西太原鎮總兵官○丙寅上幸瀛臺閱冰技○諭軍機大臣等御史王允輝奏本年八月陳預奏續查濟南等六府二直隸州所屬虧缺案內將一萬兩以上之現任堂邑縣知縣汪春熙等三員二萬兩以上之現任濰縣知縣孫世棟等三員奏請革職留任賞限一年勒追與上年該省辦理泰充沂登四府所屬虧缺一二萬兩以上各員在本省監追之案前後懸殊恐該員等一經留任巧為挪掩甚至借彌補為名倚官婪索等語此案虧空在一二萬兩以上各員俱係罪應擬辟之人本應革職監追前該撫奏懇量予從寬特降旨將各該員摘去頂帶暫予留任勒限一年追繳該員等自應知感知懼迅速完納現已起限數月著陳預查明汪春熙等六員現在完繳若干如該員等已經上緊完繳仍照前旨暫予留任勒令限內全完若遲延觀望仍不完解不必俟至限滿即著革

職監追照刑部原議章程辦理嗣後如有虧空數逾萬兩以上之案概不得援此為例奏請留任將此諭令知之○除江蘇寶山縣挖塘廢田二頃二十七畝有奇額賦○緩徵山東鄒平章邱二縣續被水災村莊新舊漕糧有差○丁卯旌表守正被戕山東莒州民王小袍母郭氏守正捐軀貴州修文縣民袁宗名女袁氏○蠲緩雲南鶴慶維西馬龍三廳州歉收新舊額賦借欠倉穀賑鄧川州被水貧民並蠲緩新舊額賦借欠倉穀○戊辰諭內閣朕恭閱

皇祖世宗憲皇帝實錄內載雍正九年八月諭大學士等肅州金塔寺原種進貢之哈密瓜朕思與其種瓜何如種穀以資民食著行文該督撫等嗣後不必進獻並著曉諭彼處人民知之欽此仰見我皇祖重農貴粟不使地有遺力惠愛黎民之至意從來食為民天樹藝五穀是為本務瓜猶

蘇蔬之屬尚恐栽植者多致分地力近日烟草之植無處蔑有更復有水烟一種產自甘肅近聞栽種益廣此皆無益民生有妨稼穡甘肅地土狹瘠尤當使民知種穀庶免艱食之虞著該督飭知地方官徧行曉諭凡種水烟地畝概令改種黍禾並隨時查禁無許仍前趨利逐末致妨地利再聞近日都城中並有以水烟入市售賣者甚至每歲隨往熱河逐隊營趁不可不嚴行禁止著步軍統領衙

門順天府五城出示曉諭各令改業營生如有不遵查拏懲辦其熱河地方並著該管文武官一體查禁隨時驅逐以儆游惰○又諭理藩院奏明歲朕往盛京恭謁祖陵請旨令東三盟之哲哩木昭烏達卓索圖御前乾清門行走蒙古王公台吉等接至山海關外扈從前往一摺伊等祖宗世受重恩理宜隨往恭謁祖陵惟卓哩克圖親王噶勒桑棟羅布等三十

六人若均令隨扈前往不惟人數衆多且伊等往來不免少有浮費著派御前行走之噶勒桑棟羅布布彥溫都爾瑚索特納木多爾濟滿珠巴咱爾巴勒楚克瑪哈巴拉乾清門行走之諾爾布琳沁錫第喇特納濟爾迪巴彥濟爾噶勒屈時仍接至山海關外扈從前往盛京恭謁

祖陵禮成後由盛京回至山海關途次酌量就近地方各回遊牧乾清門行走之幹薩巴拉

實錄卷三三七

十六

等二十六人俱不必前來接駕其西三盟之錫林郭勒烏蘭察布伊克昭及喀爾喀四部落蒙古王公台吉等遊牧遙遠均著免其前來以示朕體恤至意○旌表守正被戕湖北穀城縣民余富妻張氏○是月察哈爾都統松筠奏謝得旨汝豈不知典故總為耳軟心慈所誤近年汝之情性亦覺喜怒失常任意徑行亦不受人規勸過寬之處固多過刻之處亦不少汝捫心自問即知矣執中二字汝

其勉之、又奏伏讀

訓諭感凜欽佩得旨敬事持心切忌偏聽若非汝多年大臣朕必以汝為市恩於己歸怨於上汝何能當此重咎汝本無此念總為耳軟心慈所誤耳勉力改之、山東巡撫陳預奏飭屬上緊清釐詞訟得旨隨到隨審良民受益因循疲玩良民受害不可不明不可不慎勉之、四川總督蔣攸銑奏報接印日期得旨川省吏治樊壞專尚營求民風强悍好勇鬪狠汝竭力整頓以期挽回勉之

實錄卷三三七

十九

大清仁宗受天興運敷化綏猷崇文經武孝恭勤儉端敏英哲睿皇帝實錄卷之三百三十六

實錄卷之三百三十六

三

清 實 錄 嘉慶二十二年十二月

大清仁宗受天興運敷化綏猷崇文經武孝恭勤儉端敏英哲睿皇帝實錄卷之三百三十七

監修 欽定 纂修 臣等謹將嘉慶二十二年十二月庚午朔
上幸北海閱冰技○辛未諭內閣禮部奏文武官員接見儀注一摺會典內所載文武各官相見儀注自國初定制遵行已久無可增減著禮部再申明定制通行各直省督撫提鎮分飭所屬文武官員務遵照一定儀注以禮接見毋得意為卑抗如有故違定制者查明叅處○諭軍機大臣等據卓秉恬奏川省積弊四條內稱訪聞中瞻對逆首洛布七力前勦辦時並未焚斃因與上瞻對頭人格格絨

嘉慶二十二年丁丑十二月庚午朔

四四三

秦素有讐隙本年將格格絨秦戕害該逆酋
脅力强悍如根株未絕恐致滋蔓等語洛布
七力前據常明奏稱官兵攻破賊巢時已將
該逆首焚斃茲卓秉恬奏稱該逆酋至今尚
存並戕害鄰境頭人事關控馭番夷著蔣攸
銘確實查明如洛布七力從前果未焚斃現
仍恃強不靖或應派員帶兵往捕即奏明候
旨飭辦如能設法誘獲更為妥協彼時審明
將該逆酋正法其前此辦理此事各大員常

明雖已病故該督將會同勦辦之提鎮等查
明一併據實嚴參惟是洛布七力素有勇悍
之名或該逆酋焚斃後又有賊番假冒其名
欺壓鄰境戕害番酋亦未可定必須察訪真
確不可為其所惑致有舛誤又屏山縣知縣
張澍因事苛派挾嫌將監生王澤厚濫刑拖
斃一案地方官濫刑斃命該管上司即應秉
公參辦據卓秉恬奏稱張澍曾辦軍務知上
司有保舉冒濫情弊藉此挾制該上司不敢

根究等語是否確情著蔣攸銘即將此案人
證提省親訊按律定擬並將迴護不辦之各
上司分別叅處至卓秉恬所奏川省有紅黑
錢刀背客等賊匪搶劫民財私梟擾害鹽店
佐雜私設白役多人攬接呈詞濫押濫責婪
索贓錢各弊端並本日御史王檢所奏川東
川北民人傳習天主教潛赴廣東考取神甫
勾串夷人引誘男婦講經說法等情均係地
方應行查禁之事該督甫經到任務確查利

弊實力整頓嚴懲奸民肅清吏治以期諸弊
漸除綏靖邊圉將此諭令知之又諭本日
都察院奏山東寧海州民曹德緯呈控蘇援
基姦污伊女致令自縊一案據曹德緯供稱
伊有女未字上年七月十六日鄰婦孔高氏
與女伴宿二十二日半夜孔高氏乘女睡熟
潛將蘇援基引入房中暗行姦污伊女旋於
二十四日自縊身死控經該州驗訊有蘇援
基親表嫂曹李氏誣證和姦伊赴臬司衙門

呈控臬司據呈逐款批駁本年正月登州府開導罷訟伊又赴臬司案下懇求臬司執意不管本府署濟南府託原任寧海胡知州勸慰給與忠孝傳家四字印扁諭令不准興訟等語曹德緯之女暗遭蘇援基姦污羞憤自盡經曹德緯呈控該臬司何以不行究辦轉將呈詞批駁若謂曹德緯妄控登州府何以開導罷訟並託人勸諭給與忠孝傳家扁額情節甚屬可疑著李鴻賓馳赴山東省城親

提全案人證秉公研鞫如訊明蘇援基實係串通孔高氏暗行姦污曹德緯之女致令羞憤自盡該臬司知府有意消弭李鴻賓即據實昭雪將蘇援基按律擬罪並將該臬司等據實嚴叅張五緯原非純正之人不過小有才耳不可稍有枉縱又步軍統領衙門奏章邱縣民王學真鄒平縣民耿元崑呈請挑河水歸小清河由鄒平長山入海乾隆年間添

挖引河後小清河灰壩被衝山水歸入引河章邱縣鄒平縣屢被水災二十年民人楊文美等赴京呈訴奏交該撫派員將工段查勘未蒙挑挖今年六月九月兩次漲水淹沒田禾等語小清河道前經楊文美等呈請挑挖茲該民人等復有是請該處距省城百餘里著李鴻賓親往查勘該處河道是否應行疏濬如實係應濬之工即奏明交該撫上緊興挑以衛農田儻非應辦之工該民人等混行

瀆請即將該民人等治以應得之罪將此諭令知之○癸酉諭內閣御史孔傳綸奏請勅禁督撫遇事濫請議敘一摺所奏是國家賞以勸功原以策勵人才懋獎勲績然賞不可濫若冒舉倖邀轉失循名責實之義近日各督撫於地方官應辦事務往往往鋪張聲敘為屬員乞求恩澤甚至拏獲一二尋常案犯亦輒登之薦章實屬冒濫著通諭各督撫務當正己率屬勿存市恩干譽之見果有循良卓

著勞績優邁之人准其據實保薦若一切循分應為事件概不得懇請甄敘如有仍前濫保者除所奏不准行外仍將該上司懲處不貸○又諭紫禁城各門分派官員兵丁直班稽查出入應放行者即當放行應查拏者即當查拏乃該官兵等或失之疏縱漫無覺察否則遇事生風任意妄拏甚或裝點情節誣輕為重希冀奏上時或邀恩升擢或優蒙賞賚此種風氣不可不嚴行懲創此案已革藍翎長雙福在東華門外柵欄內酒醉喧鬧經本管前鋒侍衛六十八斤阻輒向罵欲毆雖無傷官毀械情事惟在附近禁門酗酒滋事實屬不法雙福著照擬發往黑龍江當差隊長額爾登布因挾雙福醉罵之嫌起意將槍桿踹折圖賴唆令六十八裝傷捏稟並糾約該班衆兵丁到官同聲誣陷立誓不許改供情節狡詐尤為可惡僅擬發遣尚覺情浮於法額爾登布著先在刑部枷號三箇月滿日

重責三十板再發往伊犁充當苦差前鋒侍衛六十八於雙福醉鬧之時無難令兵丁立時捆縛乃聽從額爾登布唆恣自用竹箸劃傷額顱扶同誣稟六十八著即革職發往盛京充當苦差其同日該班兵丁常亮等十九名經刑部傳訊除常亮到部即將實情供明無庸議外餘十八名扶同捏飾本應一併革退姑念人數衆多著免其革退交該前鋒統領自行酌量責懲○命戶部尚書景安刑部

左侍郎帥承瀛馳往河南查勘漳衛河道○以吏部左侍郎王鼎署刑部左侍郎戶部右侍郎那彥寶署刑部右侍郎○鑄給湖南沅州府移駐晃州通判關防訓導鈐記巡檢印記從巡撫巴哈布請也○旌表守正捐軀河南滑縣民田日濟女田氏○甲戌上幸瀛臺閱冰技○免雲南銅廠民欠工本銀

○乙亥

孝惠章皇后忌辰遣官祭

孝東陵○諭內閣前據許松年奏請於閩省金廈兩標營挑撥水兵一百二十八名內揀選能充正舵者八名其餘斗繚梭手均勻挑配攜眷來津入伍當降旨令董教增等照數揀選茲據該督等奏稱現已於金廈兩標水兵內揀選如額惟兵丁眷屬生長南方禦寒無具且食指衆多棄其廬墓全家遠徙諸多窒礙請仍照原議留津三年無庸攜眷同往等語閩省金廈兩標水兵揀選來津原以資其

練習若令全家遠徙亦非所以示體恤著照該督等所請此項水兵毋庸攜眷同來令其留津三年將天津新募兵丁上緊教習訓練如三年期滿有實在得力者或再酌留一二年其有情願在津入伍者亦聽其便至該水兵糧缺以登舟之日開除徹回時由天津鎮豫將名數咨行原營俾得扣缺收補以昭公允○又諭孫玉庭等奏湖北押運剝船委員抵江逗遛玩誤現在押回叅辦一摺湖北分

造直隸二限剝船該省委令試用通判喻芬督同試用從九品張業培等管解北上行抵江南喻芬以水手口糧不敷兩次稟借銀三千五百餘兩乃任意逗遛數月之久尚未行出江境該通判復先赴清江屢催罔應實屬怠玩所有此項剝船著慶保等迅速遴派妥員兼程赴江督率張業培等接運開行孫玉庭等一面派員將喻芬押解回楚交慶保等嚴訊玩誤確情並查明所領銀兩有無浮冒

侵扣情弊據實嚴叅具奏○旌表守正被戕河南杞縣民徐奉吉妻郭氏○丙子諭內閣守

陵官員引見所奏履歷均稱奴才某人某

陵某官殊非敬謹之道嗣後凡守

陵官員引見均著奏稱某

陵某官奴才某人其奴才字樣不准列前具奏

將此通諭知之○諭軍機大臣等本日據富

俊等奏覆查保甲一摺直省編排保甲於年

終將覆查情形具奏一次幾似具文此事總在地方官實力奉行認真查察不可但以一奏塞責奉省旗民雜處商賈雲集平時本應詰奸禁暴綏靖閭閻況明年值朕巡幸蹕路所經尤當加意肅清富俊等此時經理差務於行宮道路各事宜自必詳慎籌畫若專心於彼而於稽查保甲一事轉視為無關緊要則大不可現在各省查拏逆匪難保無一二奸徒出關溷跡該將軍府尹等務各督飭旗民地方官自本年奉到諭旨之日為始至明年鑒輅經臨時將城市村莊逐戶挨查不可閒斷其於蹕路相近之區尤當倍加周密儻奉行不力值朕臨幸時或有在道旁叩關衝突儀仗之事惟該將軍府尹等是問勿謂誥誡之不豫也將此諭令知之○以拏獲習教匪犯侯位南審辦認真賞還山東巡撫陳預二品頂帶餘升補有差○旌表守正捐軀山東鄒平縣民胥清遠媳李氏○丁丑

上幸瀛臺閱冰技○以故四川建昌道屬咱哩土千戶古應洪子榮安襲職○戊寅諭內閣朱理秦拏獲拐販婦女人犯審明定擬一摺貴州省奸民興販婦女最為閭閻之害署同知承惠副將特松阿於所屬地方聞有男婦多人繞道行走帶領兵役盤獲繆宗揚等五十九犯究出拐販婦女等情尚屬能事承惠特松阿俱著加恩送部引見至繆宗揚等犯拐販婦女至一百二十餘口之多情節甚為可惡繆宗揚劉顯基冉廣達冉廣潮四犯起意為首例應擬絞著毋庸監候各於拐販人口最多之地即行處絞以示懲儆其餘各犯罪名著刑部覈議具奏○諭軍機大臣等據御史尹佩茶奏雲南騰越州邊外野衷自嘉慶十一年至十七年搶掠內地村莊殺燒男婦伯麟赴彼將拏獲之野人數名正法旋即回省從此猖獗愈甚該管道府稟報伯麟初猶不信及難民紛紛赴控始委方振奎帶兵

勦辦未殺一賊道府稟請高星文帶兵協辦甫將邦中一股野匪殺退尚有三四股負固不服方振奎忽以總督令徹兵不准前進以至人人失望野匪益無忌憚二十一年五六兩月疊次搶劫至十二月並有搶去把總割鼻放回之事本年五六兩月亦復肆行搶劫被害民人赴州求救則城門閉赴營求救則營門閉赴府求救則曰奉總督諭不辦邊務該督自以十八年掃穴擒渠邊境肅清入奏

在先不敢復陳滋擾情形坐視內地民人屢遭慘毒等語邊外野夷搶劫內地村寨自當隨時懲辦豈得稍涉因循養癰貽患該御史所稱前此勦辦騰越野夷方振奎傳令徹兵草率完結是否實有其事至所指上年五六兩月間野匪疊劫蠻角寨毆寨裏夏寨猛隴寨皆有月日可憑似非無據且有李姓把總被擄割鼻之事更無難傳驗得實如果實有其事該把總以內地職官為野夷殘毀形體該

督隱忍不辦是何意見大員委任即行嚴叅候旨斷不可從并救人稍存迴護至內地民人橫遭荼毒赴訴地方文武官皆閉門不納更復成何事體是否該地方官匿不稟報抑係該督授意諱飾事關邊務不可不徹底查究著李堯棟即將該御史摺內所指各情節逐一密查該撫到任未久無所庸其迴護如果該御史所奏屬實即由四百里將伯麟據實叅奏不可以伯麟現係協辦大學士稍存

袒護之見該撫接奉此旨不可於伯麟前漏洩一字如事有確據該撫奏到時朕必另派大員前往查辦亦不再交伯麟辦理儻實無其事何以該省有此傳說亦據實由四百里覆奏將此諭令知之○緩徵山西陽曲太原五臺浮山汾西孝義沁源夏竒嵐長子襄垣大同陽城靜樂垣曲隰興臨保德芮城偏關平陸靈石霍聞喜絳縣文水二十七州縣並清水河和林格爾通判所屬旱災霜災應徵

米豆及借欠倉穀○己卯諭內閣御史王耀辰奏鄉會試年老舉子請禁冒濫節煩勞一摺直省年老士子賞給名銜本係國家格外恩施豈容虛增年歲及品行不醇者冒濫其閒嗣後應試老生其年例相符者先令廩生大學十名小學五名公同具保由該學教官查明實係立品老儒加結保送不准一概錄取以昭覈實所奏尚是至鄉會試考校三場久著功令歷科應試老生縱不苛責其文藝

亦必以三場完竣方為合例該御史率請止試頭場免進二三場所奏不通斷不可行此必又係受人請託冒昧陳請鄙陋極矣著毋庸議○諭軍機大臣等慶溥等奏酌定牧廠地界並繪圖貼說一摺額魯特官兵從前共有六百七十餘員名現祇餘一百八員名牲畜無多本無須多用牧廠即廣占地畝亦不過私招民人開墾藉收租息其獅子園一帶牧廠環近園庭自應撤回不許額魯特等在

彼侵擾慶溥等所定甚為公允該總管呢瑪何得任意爭執著熙昌即傳諭呢瑪等令其遵照慶溥等所議應撤回者即行交出應立界者即行安插不得貪利無厭稍有抗違如再妄求治罪不貸將此諭令知之○以吏部左侍郎熙昌署熱河都統禮部右侍郎廉善署吏部左侍郎○以翰林院侍講奎照充日講起居注官○旌表守正捐軀安徽六安州民盧言妻余氏守正被戕靈璧縣民陳聰妻

孟氏○庚辰以故喀爾喀賽因諾顏額魯特扎薩克貝子多爾濟巴勒族弟察克塔爾扎勒襲爵○癸未以故一等侯善慶子蘇勒芳阿一等男全泰子福恩各襲爵○以宋儒邵雍後裔啟運襲五經博士○甲申諭內閣方受疇奏請將本年查辦賑務經理不善及最為出力各員分別勸懲等語地方偶遇偏災查辦賑務有司牧之責者自應關心民瘼實力經理若辦理不善則當量予懲儆方受疇

所劾各員除劉思恩一員已於計典案內題
叅外候補知縣王餘師行唐縣知縣徐福年
均著照所請以教職改用至所保何維綺陳
于嘉高應元三員均係本分應盡之職如果
認真出力該督儘可自行存記隨時獎勵其
所請加恩升補之處著不准行予陝西故
知府鄧夢琴入祀名宦祠從總督長齡等請
也予雲南四川陣亡外委趙旋祭葬世職
額外外委張振兵丁金占文等一百十四名

賞卹如例予福建廣東出洋淹斃署千總
葉逢珠蔡攀龍把總林得升祭葬世職兵丁
何連登等一百五十三名賞卹如例除直
隸定州沙壓地一百四頃八十七畝有奇額
賦貸直隸正定鎮左右龍固趙州固關王
家坪龍泉倒馬忠順涿州良鄉新雄十二營
並督標五營駐劄災地兵丁銀米有差乙
酉
上御乾清門聽政諭內閣本日綿課等因頒

賞平定教匪紀畧具摺謝恩朕披覽摺內過
事掄揚轉滋慚恧王大臣等應體朕之苦心
共勉勤政切戒因循庶可稍救朕之過失從
前乾隆年間內地亂民如王倫田五蘇四十
三弄兵潢池旋即撲滅其事皆遠在外省至
十八年九月十五日之事朕平時不能修明
政教弭患於未形又不能先事覺察殲寇於
未發以致狼奔豕突闖入禁門幸賴

天

祖默佑即日肅清此事朕每一思之愧不去心
乃諸臣復以堯勤舜知虛詞鋪張頌美豈非
增朕之慚乎今事雖已往而朕惟日存求安
求治之心不敢有忘亂忘危之意所望內外
臣工大法小廉勤修職事勿駿民之生勿蕩
民之志昌明正教使邪慝之風潛移默化其
有誥姦除莠之責者勿因循姑息使之轉相
煽惑累及善良庶實心實政久道化成可期
日臻上理毋徒以虛文粉飾也將此通諭知

之○又諭吳璥奏查明蕭南廳臨黃官隄民堰情形仍照舊例辦理一摺蕭南民堰防守多年較之修築官隄保護更為得力自應仍就民堰防守其王平莊一帶搶築新工均著照吳璥所勘辦理至該處民堰工程雖歸官辦而借帑興修仍應照例攤徵還款該督等率請將民堰改為官隄錢糧作正開銷國家經費有常豈容例外多糜糜黎世序未經妥籌冒昧陳奏著交部議處孫玉庭會銜具奏著交部察議○又諭本日太常寺奏加封白龍潭

龍神神牌造竣請派員前往告祭其應行開列之散秩大臣僅有裕全常喜二人銜名散秩大臣人數不少裕全兼任前鋒統領尚照例開送其餘各員於該寺咨取銜名時俱不開送自係因時屆年節相率偷安除裕全常喜二人外所有未經開列之散秩大臣俱著交部議處○以故一等子策伯克扎布子布

彥德勒格爾襲爵○予安徽故訓導胡鑄入祀鄉賢祠從總督孫玉庭等請也○丙戌舉行本年軍政稽查右翼保定等處大臣所屬年老官一員黑龍江將軍所屬卓異官四員年老官四員有疾官三員年老有疾官一員才力不及官二員江寧將軍所屬卓異官三員年老官一員福州將軍所屬卓異官一員才力不及官一員荊州將軍所屬卓異官二員綏遠城將軍所屬年老有疾官一員西安將軍所屬卓異官二員罷軟官一員才力不及官二員寧夏將軍所屬卓異官一員伊犁將軍所屬卓異官一員廣州將軍所屬有疾官一員熱河都統所屬卓異官二員年老有疾官一員察哈爾都統所屬卓異官三員有疾官三員烏魯木齊都統所屬年老官三員密雲副都統所屬卓異官一員年老官三員山海關副都統所屬罷軟官三員涼州副都統所屬有疾官一員河南巡撫所屬卓異官

一員年老官一員分別議敘處分如例。以故阿巴噶貝子巴雅爾錫第子德木楚克達什襲爵。予浙江故訓導蔡英入祀鄉賢祠。從總督董教增等請也。丁亥諭內閣本日宗人府因質郡王綿慶之女貝子奕純之女選指額駙俱揀選在京八旗年歲相當之子帶領引見。我朝國初創建定制近派及歲宗室之女將年歲相當之蒙古世族子嗣選指額駙。此次以蒙古內無年歲相當之子備選

額駙均未報出殊失結親本意。凡指額駙著不必拘泥同歲或年長三四歲年幼三四歲均可選指。嗣後每遇指選額駙著將年長五歲年幼五歲蒙古子嗣揀選報部。僅有及歲隱匿不報者一經查出定行治罪。著交理藩院通諭各蒙古知之。予福建故左春坊左庶子陳遷鶴入祀鄉賢祠。從前任總督汪志伊等請也。戊子舉行本年軍政京營卓異官三員年老官一員才力不及官一員直隸

卓異官十四員年老官二員有疾官一員才力不及官一員江南河營卓異官一員河南卓異官二員罷軟官一員年老官一員有疾官一員陝西卓異官七員甘肅卓異官七員年老官三員有疾官二員廣東卓異官七員罷軟官五員年老官二員有疾官三員才力不及官四員廣西卓異官三員罷軟官二員有疾官一員分別議敘處分如例。予湖南故主事王文清知府周碩勲廩生陶必銓入

祀鄉賢祠。從前任總督阮元等請也。己丑予河南故貢生曾椿年入祀鄉賢祠。從巡撫文寧等請也。庚寅上御寧壽宮。賜王公大臣及蒙古王貝勒貝子公額駙台吉等食。並賞賚有差。諭軍機大臣等前據陳預奏等獲習教匪犯侯位南等究出烏魯木齊遣犯劉佐臣子孫劉成林在配接充教首曾經侯位南等斂銀七千兩送交使用業據慶祥查訊明確將該犯立正典

刑因思新疆發遣邪教案犯甚多即十八年林清案內免死發遣之犯亦復不少此種匪徒邪說相沿恐到配後故智復萌且其黨與固結不解恐又有私自出口尋訪潛通信息者不可不嚴行查禁著晉昌通飭各城凡有邪教案犯發往安插之地俱各嚴密稽查如有自內地潛往送銀通信之人立即拏獲奏明以便根究嚴懲儻該犯等在配復敢起意傳教收徒斂錢惑眾一經查出即審明從重

治罪毋稍姑息總須時刻留心不可日久生懈致有疏縱將此諭令知之予陝西故檢討孫景烈入祀鄉賢祠從巡撫朱勲等請也

○辛卯

上詣

大高殿行禮○幸北海閱冰技科爾沁郡王棟默特等二人教漢扎薩克郡王達爾瑪濟爾迪等二人翁牛特扎薩克郡王喇特納濟爾迪等二人四子部落扎薩克郡王朋楚克桑

魯布茂明安貝勒丹丕勒等二人巴林扎薩克貝子多爾濟帕勒瑪喀爾喀貝子濟里克喇什等八人鄂爾多斯扎薩克貝子額爾德尼桑青海扎薩克貝子喇特納錫第等二人察哈爾和碩特輔國公丹津扎布等五人伊克明安扎薩克頭等台吉托克托瑚等二人杜爾伯特二等台吉多布察回部伯克拜咱特等十七人廓爾喀使臣噶箕然拉作爾塔巴等二人土司巴勒珠爾朋楚克等二十九

人於神武門外瞻覲○諭內閣大理寺每屆三月將永遠枷號人犯奏聞一次原因各犯情節不同朕披覽時遇有情節較輕者仍酌量施恩寬釋至逆案及邪教人犯如有永遠枷號示眾者皆罪在不赦嗣後大理寺月摺內著毋庸列入○以拏獲教匪出力賞還山東按察使張五緯三品頂帶知府錢俊等下部議敘○以故喀爾喀賽因諾顏扎薩克親王朋楚克達什子車琳多爾濟襲爵○以協

辦大學士兵部尚書章煦禮部尚書戴聯奎
充經筵講官○予四川故道員王正常入祀
鄉賢祠從原任總督常明等請也○壬辰
上御撫辰殿大幄次賜蒙古王貝勒貝子公額
駙台吉及外藩使臣等宴並賞賚有差○諭
內閣康紹鏞奏查明安徽省新舊虧缺確數
酌議追補章程一摺定遠縣知縣任銓試用
知縣趙由植原任鳳陽縣知縣林泰增新虧
在一二萬兩以上豈可復留本任俱著革職
同另案參革知縣范照蔡一併照例監追勒
限催繳逾限不完分別辦理餘著該部分析
覈議具奏○又諭康紹鏞奏清查倉庫錢糧
在局人員可否量加鼓勵等語該省倉庫虧
空此時並未彌補全完祇係覈算數目何得
率請鼓勵所奏不准行康紹鏞著傳旨申飭
○予廣東故大理寺少卿何曰佩御史鄭士
超入祀鄉賢祠從前任總督蔣攸銘等請也
○甲午

孝莊文皇后忌辰遣官祭
昭西陵
上詣
慈寧宮
壽康宮行禮○諭軍機大臣等本月
皇考高宗純皇帝聖訓清漢本刊印全竣頒賞
臣工松筠亦與分賞之例乾隆四十三年
皇考親詣盛京恭謁
祖陵降
旨垂諭後嗣當懋懷遠藩舊疆再三周歷或無
識臣工妄以為不宜當律以悖命之罪誅之
無赦煌煌
聖諭現恭載
聖孝門內松筠前此妄行陳奏或未曾恭讀
聖訓此次頒發到日著松筠敬謹焚香跪讀捫
心自問伊率意妄言當得何罪其時朕僅將
伊降謫伊心是否允服知感知懼儻自謂抱
屈亦不妨直言即行繕摺覆奏再松筠昨奏

請賞給太僕寺商都二百五十九羣牧官兵
每羣牧各銀十兩朕以賞出無名且每官兵
所得無幾事非長策未予准行本日據松筠
覆奏惟稱今歲口外雪太各羣牧辛勤奮勉
是以奏請鼓勵等語察哈爾地方冬令雪大
係常有之事歷任以來從無因此奏請鼓勵
者松筠今歲創為此舉若一年准其賞給則
明年必將援以為例歲糜數千金亦非所惜
究之牧羣人衆所獲幾何於馬政更有何裨
益且該處官兵等聞松筠一有此奏早已心
生感激及知未蒙允行又必歸怨於上松筠
天性好行小惠煦煦為仁全不思經久長策
亦不知為政大體不可不痛自改悔也至瑞
齡身任副都統遇事有窒礙難行者即應阻
止今一味隨聲附和與棍楚克策楞何異松
筠瑞齡俱著傳旨申飭其所奏進哨調馬章
程已交兵部覈議矣將此諭知松筠並諭瑞
齡知之○以歲暮裕祭

太廟自是日始齋戒三日○乙未諭內閣本日
王大臣等因頒賞
皇考高宗純皇帝聖訓具摺謝恩我朝
列祖
列宗皆以孝治天下
列聖徽號必以孝稱誠以孝為百行之首始於
宮庭達於四海錫類推仁人人親親長長而
天下平化理之原莫重於此也
皇考聖訓首列
聖孝六十年中東西
兩陵
躬親展謁四時
廟祀
孝享惟虔盛京為
王迹肇基之地
列聖以來皆
躬詣陪都祇謁
三陵垂為

典則惟以道途遙遠不能歲奉烝嘗是以或十年或十餘年諏吉舉行世傳弗替我

皇考於乾隆四十三年三

詣盛京時

睿慮深長特降

旨垂訓後嗣當瞻念遼瀋舊疆再三周歷蘄於祖宗遺緒身親目覩勿忘

開創艱難或無識臣工妄以為不宜即律以悖命之罪誅之無赦煌煌

聖諭炳若日星本年夏間畿輔一帶雨澤偶愆大學士松筠具摺陳奏請停止二十三年盛

京謁

陵之舉朕覽奏愕然若律以悖命之罪即不立

正典刑亦當禁錮固圉朕念松筠在乾隆年

閒已任事有年又經朕擢用首揆原其陳奏

尚在未降諭旨以前僅將伊降為二品頂帶

補授察哈爾都統用示薄懲今

聖訓業已頒賜內外臣工著各恭檢

聖孝門內

皇考原降

諭旨敬謹跪讀於朕懲處松筠一事當各曉然於心知朕不得已之苦衷尚失之於姑息並未為已甚也松筠好行小惠不識大體必有為伊抱屈之人此等淺陋小人亦不值深究任彼為之朕亦不懼將此通諭知之○又諭李奕疇奏現定旗丁津貼名目易滋流弊請仍按舊章辦理毋庸另立規條一摺旗丁領

運漕糧優給行贈原不應需索規費惟該旗丁等長途輓運不無需用相沿議給津貼乃旗丁等恣意勒索年甚一年勢將無所底止前經孫玉庭奏請統以各幫米石多寡酌給津貼禁止每船給費降旨准行作為限制乃禁其多索於限外非令其必取盈於限內也今李奕疇奏稱旗丁指此為正款援引從前飭駁蔣兆奎等奏請加徵津米之旨以為事類加賦蔣兆奎費淳前奏皆請多徵米額有

類加賦是以駁斥至津貼限制與加賦迴殊該旗丁等何得視同正款該漕督受弁丁從憑不願遵依限制乃含混其詞請仍按舊章辦理以遂其無厭之求實屬闇於事理李奕疇著傳旨申飭該漕督既稱此後河道通暢丁力日裕津貼一項定可逐漸減除著即責成該漕督嚴飭各弁丁總於限制之內力加撙節愈省愈善若於限外苛求逞其停兌勒結故智肆意刁難立即嚴拏治罪如該漕督縱容袒庇定行嚴懲不貸○丙申以歲暮裕祭遣官祭

太廟中殿

後殿○河南巡撫文寧以縱容家人需索站規命來京聽候部議調山西巡撫和舜武為河南巡撫以刑部右侍郎成格為山西巡撫調禮部右侍郎廉善為刑部右侍郎○丁酉裕祭

太廟

上親詣行禮○遣官祭

永陵

福陵

昭陵

昭西陵

孝陵

孝東陵

景陵

泰陵

泰東陵

裕陵○遣官祭

孝淑皇后陵寢○遣官祭

端慧皇太子園寢○遣官祭

太歲之神○朝鮮國使臣韓致應等三人於午門外瞻觀○戊戌

上御保和殿筵宴朝正外藩科爾沁喀爾喀阿拉善巴林喀喇沁奈曼教漢翁牛特四子部落扎賚特土默特茂明安阿巴哈納爾青海

鄂爾多斯。綽羅斯郭爾羅斯杜爾伯特王貝勒貝子公額駙台吉塔布囊等及廓爾喀朝鮮國正副使等隨文武大臣依次就坐。諸樂並作。

上進酒。召左翼科爾沁卓哩克圖親王噶勒桑棟羅布巴林親王銜扎薩克郡王索特納木多爾濟科爾沁扎薩克郡王和碩額駙索特納木多布齋教漢郡王幹薩巴拉奈曼扎薩克郡王巴勒楚克科爾沁貝勒鄂勒哲依圖

喀喇沁扎薩克貝勒托恩多右翼喀爾喀扎薩克圖汗部扎薩克汗布呢喇特納喀爾喀扎薩克親王車登多爾濟阿拉善扎薩克親王瑪哈巴拉喀喇沁親王銜扎薩克郡王滿珠巴咱爾回部郡王銜貝勒哈迪爾土默特扎薩克貝子固倫額駙瑪呢巴達喇喀喇沁扎薩克輔國公理藩院額外侍郎瑪哈巴拉至御座前。賜酒成禮。○是年旌表孝子江蘇等省

孫楨等八名。順孫福建省伊恒聰一名。孝女江蘇等省周淑貞等四口。守節合例。宗室莊惠妻高佳氏等十二口。滿洲永清妻勒第氏等百十一口。蒙古塔克什布妻瓜爾佳氏等三十八口。漢軍王廷翼妻王氏等二十七口。內務府佟塞妻馮氏一口。各省駐防皇甫潤妻張氏等二百五十五口。直隸等省陳綬妻郭氏等九百十四口。夫亡殉節。滿洲花連布妻扎思胡理氏一口。蒙古薩迷達妻周氏一口。

江蘇等省鄧廷鎔妻汪氏等三十二口。未婚守志。奉天等省王益臨聘妻車氏等三十四口。百歲壽民。婦廣東等省許昌業等二十名。五世同堂。陝西等省高文河等四十家。各給銀建坊如例。○一產三男。直隸等省毛成倉等八家。○會計天下民數穀數。直隸等省通共大小男婦三萬三千一百三十三萬四百三十三名。口存倉米穀三千四百九萬七千七百一十石五斗一升四合一勺。

大清仁宗受天興運敷化綏猷崇文經武孝恭勤儉端敏英哲睿皇帝實錄卷之三百三十七

寶錄卷三百三十七

三

大清仁宗受天興運敷化綏猷崇文經武孝恭勤儉端敏英哲睿皇帝實錄卷之三百三十八

[illegible]

閩侯葉用事信谷欽奉
上諭事件處偏辦參學士戶部尚書劉朴院掌院學士嚴習原方士德世昌內務府大臣鍾黃旗滿洲都統章

續領軍印部二帶奉敕監海國等處總理工程處御膳房御藥房太醫院西洋事務處功加三級頂戴加二級府常加十三級銓錄千一

欽差兵部侍郎尚書上書房行走武英殿總裁管理園子監事務加三級紀錄四次召汪廷珍等奉

較修

嘉慶二十三年戊寅春正月己亥朔

上譜

奉先殿行禮

堂子行禮遣官祭

太廟後殿 御太和殿受朝作樂宣表如儀

詣

大高殿

壽皇殿行禮○御乾清宮賜皇子皇孫親藩等

宴庚子調盛京戶部侍郎德文為禮部右

侍郎盛京工部侍郎多福為盛京戶部侍郎

兼管奉天府府尹事以都察院左副都御史
明興阿為盛京工部侍郎○調鑲白旗漢軍
副都統博啟圖為正藍旗滿洲副都統以禮
部右侍郎德文兼鑲白旗漢軍副都統○辛

高宗純皇帝忌辰遣官祭

裕陵

上詣

奉先殿

壽皇殿行禮○諭內閣文寧係棄瑕錄用之人
復擢至巡撫由貴州調任河南乃一入豫境
沿途挑斥供應縱容家人需索站規實屬溺
職文寧著即照部議革職○以荊州協領扎
勒罕布為廣州滿洲副都統○壬寅

上御紫光閣賜王公大臣蒙古王貝勒貝子公
額駙台吉及外藩使臣等宴○御重華宮茶
宴廷臣及內廷翰林以盛京風土聯句○諭
內閣富俊等奏大凌河馬廠曠地試墾期竣

酌擬章程一摺大凌河牧場餘地試墾期竣
勘丈於原墾續墾十一萬餘畝外尚浮多地
五千八百餘畝均地近海濱其中磽薄沙鹼

者多不能按原議照直隸旗租之例升科著
加恩即照養息牧試墾地畝之例每畝徵租
銀四分作為定額現存已徵穀一千七百八
十餘石准其減價十分之三出糶價銀解交
盛京戶部存庫備用其起科年分催徵考成
及收成分數查禁私典各章程俱著照所議

辦理○廓爾喀額爾德尼王熱尊達爾畢噶
爾瑪薩野遣使進貢方物賜勅賞賚如例○
甲辰諭軍機大臣等盛京奉祀

陵寢諸宗室向遇東巡恭謁

祖陵均有接駕送駕之例因念前歲移駐盛京
諸宗室乃緣支系蕃衍漸其居業嚮善盛京
為國家根本之地習尚敦龐移居到彼為之
築室昇產以養以教使之觀感善俗興起才
俊並非獲有罪辜移徙安置也本年朕親莅

陪京自當令其一體接駕。酌予恩施。著富俊等詢問該宗室人等。其平日所習於文武兩途。各述所長。習文者或能文能詩。及通曉繙譯。習武者或能騎射。步射。豫先報名。屆期當加以校閱。分別獎勵。其接駕處所。應與奉祀陵寢諸宗室各為一班。著富俊等擬定地界。屆期傳知。遵照迎送。再歷屆奉祀。

陵寢諸宗室。均係如何施恩賞賚。現在移駐諸宗室。每年給餉若干。每戶分產若干。一併查

明分別繕寫清單。並酌擬章程。於啟鑒以前。五六月間。詳細具奏。至宗室內有因獲罪發往盛京管束及圈禁者。並著查明原犯案由。及原定年限。另繕清單具奏。以備屆時酌予恩宥。將此諭令知之。○乙巳。

世祖章皇帝忌辰遣官祭

孝陵。○丙午。享。

太廟遣定親王綿恩恭代。行禮。○

上詣。

雍和宮行禮。

火神廟拈香。○遣官祭。

太歲之神。○以來歲。

六旬萬壽。命於本年八月舉行恩科鄉試。來年

三月舉行會試。○以兵部右侍郎穆彰阿充

經筵講官。○展賑奉天復州寧海寧遠金州

四處。上年被旱旗戶。並貸貧民口糧。○給直

隸大興宛平清苑滿城望都完安雄容城東

鹿博野定曲陽行唐武強唐新樂十七州縣

上年被旱災民一月口糧。○緩徵山東章邱

鄒平朝城蘭山郯城堂邑博平茌平清平高

唐恩濟寧武城十三州縣。上年水災。本年額

賦。展賑江蘇高郵寶應甘泉溧陽睢寧五州

縣。上年被水災民。○給安徽五河鳳陽靈璧

盱眙天長五縣及鳳陽長淮泗州三衛。上年

被水災民一月口糧。○貸江西德化縣。上年

被水災民籽種口糧。○貸河南安陽湯陰內

黃澠池陝五州縣。上年被水被雹災民倉穀。

○貸陝西潼關華陰大荔朝邑渭南吳堡靖邊安康洵陽紫陽白河十二廳州縣上年被水被雹災民籽種倉糧○貸甘肅靈中衛涇靈臺鎮原寧遠武威秦安肅安西十一州縣上年被旱災民籽種口糧○丁未諭內閣兵部議駁松筠奏請調劑牧廠馬匹一摺每歲行圍調撥察哈爾廠馬放給隨扈官兵遵行已久由京出青之馬既不能旋往旋來若如松筠所奏不調廠馬將不敷馬匹概行改折贏價不特官兵乘贏隨扈無此體制儻該官兵等又將贏價挪為路費必致徒步隨行貽誤差使況察哈爾牧廠孳生及常川牧放馬共一萬一千餘匹每年秋圍不過調用二千餘匹計五年始行輪調一次豈馬力四年休息尚不能牧養蕃滋何得以苦累為詞若竟不調用則廠馬豈非虛設松筠好行小惠不顧大體所奏實屬窒礙難行瑞齡扶同附和實屬無能著傳旨嚴行申飭該都統惟

當遵守舊例妥為經理不准妄議更張儻再事漬奏定行治罪不貸○戊申諭內閣吳璥等奏請於東清壩外添建二壩以資收蓄一摺東清壩為湖水匯出之區近年湖水旺盛溜勢湍急壩口河底衝刷過深以致壩身著重自應先事綢繆著照所請准其於該壩迤北運口蓋壩迤南添建二壩一道俾作重門鉗束先於春融鑲裹進占俟秋冬閒再將口門收窄以收蓄清敵黃之效○諭軍機大臣

等松筠奏敬陳感凍下忱一摺松筠自到察哈爾都統之任不過半年先請添設前鋒叅領加給協領翎枝繼又無故請賞牧羣官兵銀兩嗣又請將每歲行圍馬匹改給贏價三次陳奏皆屬沽名邀譽窒礙難行不思國家自有定制豈可輕議更張如果利弊攸關有必應調劑之事朕早不吝恩施即前任大員亦必先行計及何待伊言松筠所至之區惟自知沽名市惠取悅下人而不顧事之難行

一經飭駁即使怨歸於上若共事者從而阻止亦必為衆謗所叢松筠所行如此是何居心禮記云善則稱君過則歸己則民作忠不學無術者未足與言著傳諭松筠伊在任惟當率由舊章不准再行妄言調劑務痛改前非以收桑榆之效戒之戒之勿貽重咎將此諭令知之○又諭康紹鏞奏各省藩臬道府向係各督撫於年終密奏一次茲遵部咨以本年係大計之年應行舉劾各員已照例具

題其藩臬考語履歷亦一併咨明吏部所有年終密奏兩司道府考語之處無庸另奏等語所奏非是向例各省督撫於年終將該管之藩臬道府及總兵出具考語開單密行陳奏朕將原單存留以備隨時披覽至三年大計其舉劾各員及藩臬考語履歷分別題咨由吏部彙奏本係另為一事今該撫因舉行計典即請將年終密奏兩司道府考語無庸另奏實屬辦理錯誤康紹鏞著傳旨申飭所

有該省兩司道府等該撫即循照向例秉公出具切實考語迅速密奏將此諭令知之○上以次辛祈穀於

上帝自是日始齋戒三日○庚戌

上詣

南郊齋宮齋宿○諭內閣孫玉庭等奏江南運河各閘壩提溜打放關纜人夫請仍照舊章派員經管一摺前據御史盧浙奏漕艘經過閘壩關纜人夫由漕委經管每多需索是以

降旨責成閘官經管茲據孫玉庭等奏江南運河各閘壩關纜需用人夫衆多前因幫丁惜費誤運漕督始派員經理歷久相安運行無誤若改歸閘員經管幫丁非其所屬轉恐互相爭持有稽輓運自係實在情形且裁撤漕委原慮其藉端需索閘官賢愚不一於雇夫給價等事亦難保其不浮多濫索著准其仍照舊章分派漕委經理但每閘壩祇許派委一員專司其事如有額外多委及本員勒

派苛索情弊查出隨時叅處其開官職司啟
閉飭令稽查彈壓人夫俾責有攸歸不致互
相推諉以利漕運○辛亥祈穀於

上帝

上親詣行禮○幸圓明園○詣

安佑宮行禮○壬子

上御奉三無私殿賜皇子皇孫親藩等宴○御
山高水長賜王公大臣蒙古王貝勒貝子公
額駙台吉及外藩使臣等食至甲寅皆如之

癸丑

上詣

安佑宮行禮御正大光明殿賜朝正外藩等
宴作樂賜酒如除夕儀○甲寅

上御正大光明殿賜大學士尚書等宴○諭內
閣大學士明亮自乾隆年間屢歷戎行著有
勞績經朕簡擢綸扉現年八十有四精神矍
鑠步履強健若令節勞頓養必更益壽延齡
長資倚任明亮著不必分日赴內閣閱本每

日本章著曹振鏞戴均元章煦三人輪流閱
看明亮現兼內大臣亦不必進內直班其所
管兵部事務遇有奏事閒一二次不到亦可
引見官員明亮無庸承旨即交和寧等帶領
用示朕優眷耆臣之意○乙卯諭內閣前據
卓秉恬奏葉文馥在成都府任內與提督多
隆武因爭相見儀注齟齬不和葉文馥挾忿
妄指兵丁孫占鰲犯竊知縣魯鳳輝迎合將
孫占鰲之妻拏究又搶去銀物以致孫占鰲

糾眾滋事前案懲辦後二十一年五月葉文
馥嫁女提標兵丁糾眾在準提閣地方將花
轎攔毆洩忿葉文馥素好酷刑魯鳳輝貪婪
索詐從前審辦孫占鰲之案多有不實等語
當降旨令蔣攸銹秉公確查茲據蔣攸銹奏
查明二十一年四月二十一日五更時有提
標兵丁趙啟倫因酒醉在天涯石街口將民
人金士堂家花轎打毀控縣將趙啟倫移營
責革葉文馥亦於是日已時嫁女以致彼此

訛傳至孫占鰲原名孫添慶實曾犯竊曾於其家起獲贓物賊具逃後改名入伍本係應拏之犯並非葉文馥挾嫌妄指孫占鰲捏詞激怒衆兵放火戕官拏獲後供認確鑿始行正法前案辦理並無虛飾該省知府以名帖往拜提督係遵照則例歷任俱同多隆武與葉文馥彼此亦並無齟齬其餘各款俱提取原案逐一查明蔣攸銘甫抵川省從前各案俱非伊任內之事毫無所用其迴護卓秉恬

原奏自係遠道傳聞多有不實惟從前魯鳳輝審辦孫占鰲之案不先開除名糧據實究辦任聽取保回營捏詞激變又濫罰商民實屬任性妄為有乖職守魯鳳輝著即革職葉文馥查拏孫占鰲時未經知會營員嗣孫占鰲誣控縣役搶奪銀物又不親提質審僅以批駁了事致長刁風多隆武於本標兵丁犯案不行嚴查延擱數日致令兵丁糾衆滋事實非尋常失察可比多隆武葉文馥著交部

分別議處○丁巳

上御山高水長賜王公大臣蒙古王貝勒貝子公額駙台吉及外藩使臣等食○戊午上幸萬壽山○諭內閣孫玉庭奏嘉慶二十二年分屆應舉行計典軍政會商江蘇安徽江西巡撫將應舉應劾各員具本分題各省藩臬兩司填註切實考語同所轄六鎮開列等第照例造冊咨部彙辦所有各員密考應請無庸具奏等語所奏非是向例各省督撫於

年終將所屬藩臬道府及總兵出具考語開單密奏朕將原單存留以備隨時披覽與三年大計軍政舉劾各員將藩臬總兵考語履歷造冊咨部彙奏者本屬兩事茲該督因舉行計典軍政即請將江蘇等三省司道知府及總兵年終密考無庸具奏實屬錯誤孫玉庭著傳旨申飭所有江蘇安徽江西兩司道府及總兵各員著該督迅即出具切實考語密行陳奏○己未諭內閣文寧曾在上書房

行走擢用至侍郎步軍統領總管內務府大臣屢經獲咎復加恩棄瑕錄用由副都統昇任貴州巡撫因其小有才具簡調豫省繁要地方乃不自檢束一至豫境即挑斥供應以致家人巡捕需索多贓雖查無縱容入己情弊究因伊呵斥屬員怒責差役始敢肆行無忌實屬任性妄為經軍機大臣會同該部議照景安等原擬發往軍臺効力文寧著不必發往軍臺即發往熱河充當披甲在外廟工程處効力郭三以巡撫家人膽敢於過境時需索站規至數百兩之多情殊可惡著在河南省城先枷號三箇月滿日再行照擬發遣

諭軍機大臣等本日步軍統領衙門奏山東民人張志法控案已有旨交景安等由豫馳赴東省審辦矣景安等本令在豫會同和舜武閱勘漳衛河工程其事無甚緊要和舜武現已到任景安等即傳諭和舜武專令勘明具奏景安即承瀛接奉此旨即由豫取道

徑赴東省本日有御史王允輝奏素識之拔貢生朱曾喆寄到匿名揭帖一件將原詞封呈一摺其揭帖內係指摘該省巡撫臬司等官貪黷夤緣之事景安等到東即提朱曾喆訊以此帖於何處檢拾先令當堂親寫字跡與原帖比對是否相符如字跡不符即訊其得自何人以便從此根究又揭帖內有竹枝罵得真切黃鶯編得堪聽之語是該處仍另有編造竹枝詞黃鶯兒俚語並著景安等查訪明確據實具奏其揭帖內所列各款如查明實有其事陳預果有貪婪劣蹟即行據實參奏若其事毫無影響則必係不得意劣員造言污蔑藉以傾陷情殊可惡景安等務根究得實拏獲嚴辦以儆刁風將此諭令知之

○以本年

駕詣盛京貸派出當差官員一年俸銀兵丁半年錢糧○庚申刑部奏審擬太平倉監督長來圖得賄賂令已滿花戶入倉影射一案得

旨長來到太平倉監督之任甫經半月即聽信唐三德憑圖得賄賂令已滿花戶李興石英入倉影射復挾花戶李泳幅等不保李興石英之嫌濫刑枷責實屬枉法貪鄙著發往烏魯木齊於到戍之日加枷號一箇月以示懲儆唐三李興石英均係積蠹應分別發遣唐三著在該倉門首枷號三箇月滿日改發雲貴極邊烟瘴地方充軍李興石英著在該倉門首枷號三箇月發往黑龍江為奴餘依

議以江蘇江寧鹽法道方體為湖北按察使（辛酉）

孝聖憲皇后忌辰遣官祭

泰東陵

上詣

恩慕寺

恩佑寺行禮○諭內閣方受疇奏審擬馬販妄文興縱馬踐食麥苗被村民驅逐失散一案已交刑部議奏矣農畝禾苗攸關民食朕每

過巡幸地方恐隨扈人等乘馬踐踏青苗特派員查禁違者照例懲治原以保護農民生計乃販馬奸商輒將馬羣畫圈夜行縱令踐食田禾大為閭閻之害著該督等出示徧行曉諭嚴禁馬販人等不准縱馬夜行如有不遵禁令帶領馬羣乘夜行走踐食麥禾者該村民即行報官追拏除將馬販照例治罪外其所販馬匹由營縣衙門拏獲即報明該管上司全行入官以充營驛公用○諭軍機大

臣等本日方受疇奏審擬販馬過境踐食麥苗之回民安文興等一案各省馬販赴口外買馬趕回內地售賣者往來絡繹即如此案安文興一起赴張家口外買馬即有二百三十餘匹之多此外各商販每歲所買殆不可以數計即此以觀張家口外一帶產馬非不蕃息何以察哈爾各牧場近日馬羣日形支絀每遇調用率以羸瘦者充數自係該牧長牧丁等將臚壯馬匹抵換盜賣而以下劣者

充公該都統副都統等不行查禁以致馬政日敝松筠瑞齡俱係新任之員無所用其迴護著即明查暗訪實力整頓如有前項情弊立即據實奏從嚴懲辦不可稍存姑息之見將此諭令知之○壬戌諭軍機大臣等本日由驛遞到斌靜奏事夾板一副拆閱時包封內夾板外藏有寧夏已革千總劉寶控告總兵游棟雲呈詞款單二紙朕詳加披閱所控各款俱指該總兵散法營私大干法紀必應查明究辦其呈內註明由王鉉站中著長齡即查明王鉉站係何州縣驛地傳提該驛吏役訊明劉寶現在何處飭拏到案先將呈內所控游棟雲各款向其逐一研訊游棟雲現在由甘起程赴京陛見已有旨飭令速回蘭州候訊俟游棟雲到日令其質對明確秉公據實具奏至劉寶控告上官以呈詞夾入奏摺包封之內有無同謀之人一併訊明治以應得之罪將此諭令知之○降四川提督

多隆武為廣東南韶連鎮總兵官以南韶連鎮總兵官何君佐為四川提督○甲子朝鮮國王李琮遣使表賀萬壽冬至元旦三大節及歲貢方物賞賚筵宴如例○予福建故光祿寺卿伊朝棟入祀鄉賢祠從巡撫董教增請也○乙丑諭內閣主位之母家如高斌緡布花沙布等已入滿洲旗分俱曾各賞滿洲姓氏書寫矣惟

玉牒內

孝儀純皇后

慧賢皇貴妃

淑嘉皇貴妃之母家姓氏仍以單字書寫著

交宗人府於

玉牒內

孝儀純皇后之母家書寫魏佳氏

慧賢皇貴妃之母家書寫高佳氏

淑嘉皇貴妃之母家書寫金佳氏○丙寅諭

內閣章煦等奏習教民人悔過投首懇請免

罪一摺趙文舉等一百九十一名。生為盛世良民。乃誤聽邪言。沿習紅陽靜空天主老佛門一炷香燒香清茶等教會。本應俱按律治罪。惟前曾降旨。准令習教之人。改悔免罪。予以自新之路。今該民人等先後到官自首。具結真心悔過。趙文舉等一百九十一名。俱著施恩免其治罪。該民人等既經免罪。即與良民無異。務各安分守業。痛戒前非。著順天府將趙文舉等姓名籍貫開造清冊二本。一咨刑部存案。一存順天府衙門。並令各州縣自行造冊存記。嗣後冊內有名之人。如犯尋常案件。仍照平人各依本律治罪。儻陽奉陰違。日久玩生。又復傳習邪教。一經獲案。為首者即行正法。為從者俱照本律加倍治罪。以示嚴懲。該民人等前經習教。其中與在逃最要次要各逆犯。必有素相識認者。該逆犯等不知該民人等業經改悔。或投至其家。該民人等立即擒拏送官。或知其潛匿他所。報官拏

獲。審明屬實。將該民人照平人拏獲逆犯者。亦加一倍施恩。該地方官務各明白曉諭。俾該民人等悔過抒誠。實心向化。用副朕宥罪施仁訓俗移風至意。○丁卯。孝儀純皇后忌辰。遣官祭裕陵。○諭軍機大臣等。朕聞山東藩司廣慶身弱多病。不能約束家人。臬司張五緯年力已衰。辦事游滑。聲名平常。景嵩帥承瀛現往該省查辦。匿名揭帖一案。著於抵東後留心察看。廣慶精神若何。張五緯因何不協輿論。是否能勝藩臬兩司之任。據實密奏。將此諭令知之。○又諭朕聞浙江藩司瑞麟年老多病。聲名平常。藩司關繫緊要。豈可任其懸棧貽誤。著楊蔭東公確查。如該藩司有貪污劣蹟。即行據實參奏。毋稍徇隱。若一時查無實據。而瑞麟精神操守不勝浙江藩司之任。亦即據實密陳。儻該撫有心徇庇。不以實奏。聞將來別經發覺。定將該撫一併懲治不貸。將此

諭令知之○撥借盛京閒款銀三萬兩給地方官分辦道路橋梁○賞盛京將軍富俊銀二千兩以資辦公○戊辰

上詣

大高殿行禮○還宮○諭內閣朕本日自圓明園進宮在倚虹堂傳膳聞迤北有點放爆竹之聲迨進西安門至玉河橋又聞東北有點放爆竹之聲均相距甚近前曾屢經降旨令步軍統領等嚴行申禁凡遇朕進宮下園及臨幸經由之處附近鋪戶居民概不准點放爆竹俟朕經過後方准點放乃步軍統領等仍約束不嚴除那彥寶在園該班外英和著交都察院察議英綬著交都察院議處該管地面官員查明一併交都察院議處所有該二處兵丁即令英和等查明自行責懲○是月兩江總督孫玉庭奏前於蕭南廳民隄工程請改官隄一事未能詳籌率行會奏實屬冒昧得旨耳軟心活豈能率屬嚴明剛決方

能治事勉之

大清仁宗受天興運敷化綏猷崇文經武孝恭勤儉端敏英哲睿皇帝實錄卷之三百三十八

大清仁宗受天興運敷化綏猷崇文經武孝恭勤儉端敏英哲睿皇帝實錄卷之三百三十九

欽定四庫全書
大清高宗純皇帝實錄卷之三百三十九
乾隆三十九年十一月
上諭
欽此

教修

嘉慶二十三年戊寅二月己巳朔諭內閣

祥等議駁御史文溥條奏八旗官員俸米請照大檔甲米之例支領一摺所駁甚是御史有言事之責如事關利弊有裨政治者原准其據實條奏八旗官員支領俸米向係分給米票自行赴倉關支自乾隆年間奏定章程歷今二十餘年相安已久該御史忽欲更改舊章請將各旗員俸米由該旗派叅領等全數領出再行分給是明為叅領等開包攬剋扣之門該御史必係受人慫恿故為此奏難

逃朕之鑒察也○庚午

上幸圓明園○辛未遣官祭

文昌帝君廟○命協辦大學士吏部尚書戴

均元兵部尚書和寧在軍機大臣上學習行

走○實授恒敏為陝西按察使○壬申

上幸靜明園詣

龍神廟拈香○予原任江蘇布政使方昂入

祀名宦祠從巡撫陳桂生請也○旌表守正

捐軀河南寶豐縣民張鎮妻程氏○甲戌遣

官祭

先醫之神○諭內閣御史蔣詩奏請嚴拏訟棍一摺民間戶婚田土雀角鼠牙勢所難免惟在州縣官勤於聽理斷獄公平則曲直較然爭端自息即有狡黠之徒亦不能欺廉明之吏使無情者妄構釁端無如吏怠其職鄉曲愚民角勝忿爭而訟棍遂得乘機教唆以遂其把持漁利之謀著直省大吏嚴飭地方官公勤聽訟辨別情偽如案內究出唆訟之

人立即查拏究辦或有著名訟棍嚴緝重懲則刀風漸戢訟獄自可日減矣○又諭御史蔣詩奏嚴禁製造賭具一摺民間製造賭具律有明禁自應查拏懲治但須查明實係私行製造之家起獲究辦若因稽查保甲比戶搜查未免擾累嗣後遇有賭博之案務究明賭具來歷將私行製造之人拏獲到案按律懲辦不得顛預了事致有疏縱○又諭都察院奏湖南新設晃州廳民人吳繼澤等以設廳不便七款來京控告又據民人鍾大祥控並江縣役吳泰等索拏具結願歸玉屏民人糾衆執持刀棍搶去牛隻衣物毆傷多人各等情湖南六里地方久隸芷江近歲該處民人紛紛呈請願改隸黔省玉屏前因屢控不休特派湖南巡撫已哈布貴州巡撫文寧公同會勘議請更設晃州廳專歸管轄降旨允行該處民人自當靜受撫綏此時甫經定制何以即知該通判日後必致擾累地方來京

控訴國家建官牧民其柄操之自上小民豈得妄興訾議似此刁抗之風斷不可長惟該民人當更制之初未諳禁令地方官當善為開導乃率任胥役人等強拏滋擾竟有搶掠民財刀棍傷人之事辦理亦屬錯謬著已哈布親赴該廳地方傳集紳士耆民明白曉諭令其遵照成議守分安業毋許妄生異論其從前滋擾閭閻之縣役著該撫逐一查明按律懲辦並示諭該民人等知悉若有刁民始終抗違即行查究治罪吳繼澤鍾大祥著該部照例解回原籍聽候查辦○旌表守正被戕山西浮山縣民馬毛蛋子妻崔氏○乙亥上詣時應宮拈香○還宮○孝淑皇后忌辰命皇次子智親王旻寧祭陵寢○大學士董誥以疾致仕命在家食俸○以祭

社稷壇自是日始齋戒三日○丙子諭內閣孫

王庭等奏湖廣江西綱引滯銷請將鹽道懲

處一摺湖廣江西丁丑綱鹽引運銷不及十

分之一實屬惰玩鹽道章廷樸胡稷俱著革

職留任摘去頂帶責令將積引督屬上緊疏

銷如能依限足額由該督等奏請開復儻始

終怠玩即叅奏離任至官引滯銷由於私鹽

充斥該二省行引地界邊關所有緝私事宜

並著湖北江西各督撫督飭地方文武官員

一體認真查辦其應如何設法疏通積滯堵

緝鄰私及稽查夾帶偷漏之處著該督撫鹽

政等會同妥議章程具奏○以協辦大學士

兵部尚書章煦管理刑部事吏部左侍郎王

鼎兼管順天府府尹事○丁丑祭

先師孔子遣皇三子綿愷行禮○戊寅祭

大社

大稷

上親詣行禮○以刑部尚書吳璥充經筵講官

○己卯

孝康章皇后忌辰遣官祭

孝陵○諭內閣前據御史王允輝奏山東省城

現有匿名揭帖指摘巡撫臬司等貪黷夤緣

等款當降旨令景安帥承瀛前往查辦茲據

查訊大概情形先行覆奏係因上年九月臬

司張五緯署理藩司委署曲阜長山二缺不

公外間紛紛訾議以後遂貼有此項揭帖請

將張五緯解任試用知縣劉東里革職革縣

知縣項立本解任質訊等語張五緯人本平

常自任山東臬司即不認真辦事前於寧海

州蘇援基強姦曹三姐一案辦理錯謬已將

該臬司交部嚴議本日又有鄆城縣民王行

素等呈訴捕役秦盜控司不行提究之案暫

署藩篆輒將不應輪委與不應入班之州縣

委署曲阜長山二缺以致屬員登門詈辱並

經景安等訪知該臬司素貪鴉片烟有玷官

箴似此種種溺職實無足惜張五緯著即革

職交景安等歸案質訊試用知縣劉東里。即因署藩司委署不公。或在巡撫衙門稟訴。或具呈控告。均無不可。何得徑登張五緯之門。肆口詈罵。亦屬刁頑。劉東里著革職。具稟詆斥上官之署單縣知縣項立本。著解任。交景安等一併嚴審。務將編造匿名揭帖之人。究明按律懲辦。陳預於上年九十月間。即知有匿名揭帖之事。並不奏聞。劉東里等向張五緯肆行無狀。亦不據實奏。著先行交部議處。

○又諭御史卿祖培奏。修辦御道請專任承辦之官。毋庸虛設多員一摺。所奏是。朕每於春秋團次。面諭直隸總督等。毋許多派辦道官員。以省擾累。乃該省積習相沿。派委之員。逐歲增多。浮費日加。勢所不免。嗣後直隸修辦御道。著專責成承辦之員。如式修墊。其督辦幫辦等官。概行裁汰。臨期再派隨園之道府總司查察。毋許藉端滋擾。如朕經臨時。御道旁見有委員雜沓。定將該督等懲處不

貸。○以刑部郎中溫承惠為山東按察使。庚辰。以舉行仲春經筵。遣官告祭奉先殿。

傳心殿

上御文華殿經筵。直講官穆彰阿。戴聯奎。進講孟子得其民有道。得其心斯得民矣。得其心有道。所欲與之聚之。所惡勿施爾也。講畢。

上宣御論曰。君臣士庶。分位雖殊。心性好惡。則一也。君承社稷重任。治理天下國家。天下國

家。託於萬民。萬民為天下國家之大本。大源。必先得其心。得其心。則治具畢張。本源鞏固矣。堯舜之道。得民心也。飽食暖衣。人所欲下。民窮困。何能自求。必多方以致之。因利而利之。廣田疇。薄稅歛。講禮義。明禁令。凡其所欲。務為聚焉。咸獲生養安全。如保赤子。心誠求之。庶民仰之如父母。敬之如神明。上下交泰。不識不知。順則成俗矣。己所不欲。勿施於人。飢寒流離。人所惡。而上不能恤。水旱盜賊。人

所懼而上不能去。上下相蒙。漠不動念。聽其轉於溝壑。而又加以重賦。苦之以差徭。桀紂之亡。失民心也。民心既失。天下國家淪胥以亡。甚可畏也。從欲以治。聖主良臣之大經大法。總在於阜財足食。平均天下。則國家安拂人之性。暴君汙吏之小巧。小識。總貪於培克聚斂。剝削閭閻。則國家危。安危之機。繫於君心。正則得民心。偏則失民心。同其好惡。安其生計。不必以智術權勢。控制籠絡。久道化成。情孚義洽。得心之效。大哉。民心之向背。興亡繫焉。有天下國家者。尚慎旃哉。直講官廉善黃鉞。進講書經。惟學遜志。務時敏。講畢。上宣御論曰。人君立極治民。學于古訓。乃有獲也。二典三謨。鉅細畢賅。在所取法耳。身居九重之上。惟恐志滿氣盈。不能虛衷從善。誠大患也。宵旰潛心。勉力終始。無間以所行之政。事證諸先王法言。合於道者從之。僭於理者改之。為學之實功著矣。驕泰之性。造次不可。

存。講益之志。無時而不敏。坦懷納諫。舍己從人。典謨之義。理靡有津涯。學問之工夫。惟虞間斷處。晦而觀明。不敢有一毫自足之心。集虛以受益。不肯萌片時自止之念。漸覺義理有得於心。可為建極立政之本。為學之大用見矣。帝王之學。貫串古今。涵育萬類。修齊治平之要。危微精一之傳。誠能篤信而深念之。身體而力行之。自學以明德成己之功也。教學以新民成物之效也。實體於寸心。推廣於萬事。內聖外王之道。備矣。夫學殖也。一念惓惓。慎終如始。日就月將。勤求不怠。自臻於緝熙光明之境。粵稽古先聖王。莫不篤信好學。尊聞念典。故能化隆俗美。治道光昭。前代昏蒙失德之主。皆由於不學無術。自以為是。至於不可救藥。廢學之貽害也。有民人社稷之任者。豈可不遜志時敏。孜孜勤學乎。禮成。上幸文淵閣。賜講官及聽講諸臣茶。復賜宴於本仁殿。○遣官祭黑龍潭。

昭靈沛澤龍王之神玉泉山

惠濟慈佑靈護龍王之神昆明湖

安佑普濟沛澤廣生龍王之神密雲縣白龍潭

昭靈廣濟普澤龍王之神○遣官祭圓明園

惠濟祠

河神廟○諭內閣向來恭遇

壇

廟祭祀於望燎望瘞位皆安設拜墊其祝帛香

饌送燎送瘞時儀注係恭立佇望並不行拜

跪禮是拜墊本係虛設嗣後望燎望瘞位拜

墊俱著裁撤此次親詣

朝日壇行禮即行裁撤○又諭從來人君日

理萬幾孜孜圖治復於聽政之暇宣講經書

以資啟沃二事並行不相妨礙緬惟

聖祖仁皇帝經筵日講無間寒暑後始改於春

秋二仲舉行本日朕臨御經筵六部九卿八

旗俱無陳奏事件甚屬非是此次姑免查究

嗣後每遇經筵之日除不帶領引見外各部

院八旗內務府均著照常奏事毋許曠怠違

旨偷安定行懲治不貸○又諭昨據步軍統

領衙門奏英綬家人達罕呈出素識之直隸

都司余國柄書信申啟拏獲教匪該省承審

各官有意開脫並託達罕向部吏轉託題升

遊擊等語達罕係英綬家人當伊呈出書信

時英綬應即自行具摺奏聞請旨查辦此事

與步軍統領衙門毫無干涉乃英綬先持與

英和閱看商同聯銜具奏大屬非是從前福

勒洪阿於所管護軍假冒官職伊自行訪出

後並不據實奏聞移交英和查辦當將福勒

洪阿降為二等侍衛派往新疆換班英綬本

應即照福勒洪阿之例懲治但念勒保年老

篤疾朕格外施恩英綬著革退內閣學士並

護軍統領祇留副都統及右翼總兵逐出乾

清門仍交部議處用示薄懲以觀後效○又

諭方受疇奏查明具結改悔習教民人懇請

免罪一摺鄉曲小民傳染汙風學習邪教前
曾降旨令該地方官宣諭化導其真心悔過
具結投首者准予免罪節經各省奏明有案
茲高自顯等二百七十四名先後到官投首
據方受疇飭屬查明均係出於真誠高自顯
等俱著施恩免其治罪惟此內恐有暫圖免
罪日久又復玩生者著方受疇飭屬出示廣
為曉諭以爾等既經改悔即係盛世良民自
此以後當終身切戒不可復蹈前轍凡冊內
有名之人如再犯傳習邪教即將為首者先
行正法為從者按律加倍治罪若該民人等
真心向化或能將在逃最要次要各逆犯探
知潛匿處所報官拏獲審明屬實亦必重予
恩施各該地方官務剴切敷宣以免善良而
除邪惡○以故杜爾伯特扎薩克親王固魯
扎布子貢噶諾爾布襲爵○辛巳遣官祭
關帝廟○諭內閣英和等奏請交部察議一
摺國家建立大臣分理庶政凡本衙門公事

必應公同商酌聯銜具奏如意見不合亦准
兩議奏聞候旨定奪若遇有控訴呈詞由一
人接收者但事關公務均當與衆堂官公商
具奏不過於摺內聲敘係由何人交出方合
同寅協恭之義儻一人接收即自行專摺陳
奏轉為錯誤至若事與該管衙門無涉而必
應奏聞者則何人接收即由何人具奏豈得
援引同官會商入告此次英綬家人達罕呈
出直隸都司余國柄書信一事信內如或牽
涉番役則英和等聯銜具奏朕必不加責因
其事與步軍統領衙門毫無干涉英綬先特
與英和閱看英和令司員商同那彥寶聯名
具奏實屬舛誤是以將英綬懲處在英和不
必有心干與外事而一二無識之徒遇事即
向英和商辦久之相習成風英和必至因此
獲咎豈非適以害之朕杜漸防微不能不遠
慮及此為此明白曉諭俾衆咸知其此次英
和那彥寶自請察議之處俱著加恩寬免嗣

後各大臣當倍加謹慎如事非職任所司軌
有私向商議者悉皆嚴詞拒絕毋為越畔之
行用副朕訓誡成全至意○大考翰林院詹
事府各官於乾清宮○以內閣學士哈寧阿
兼鑲藍旗護軍統領○壬午諭內閣御史蔣
詩奏請嚴查保甲肅清海禁各一摺編立保
甲藉以詰奸除暴原在設法互相稽查若僅
按冊點名則扶同隱混仍屬有名無實至沿
海各口岸茶葉米穀鐵器不准偷越出洋久

經載在禁令該御史所奏俱係申明舊例著
各該督撫嚴飭所屬地方官實力奉行以期
奸宄蕩除海防嚴密毋得視為具文日久生
懈○以故喀爾喀賽因諾顏額魯特扎薩克
貝子扎木彥多爾濟弟貢格多爾濟喀爾喀
土謝圖汗扎薩克郡王多爾濟扎布子達克
丹多爾濟各襲爵○癸未春分朝

日於東郊

上親詣行禮○幸圓明園○甲申遣官祭昭忠

祠○諭內閣向來蒙古風氣淳樸遇有過犯
情節本不甚重是以蒙古條例較刑律為輕
近來內地無賴游民潛赴蒙古地方引誘蒙
古人肆行不法盜劫之案日多嗣後蒙古人
犯事如無民人在內者仍照蒙古例辦理若
案內有一民人均照刑律問擬著理藩院通
行傳諭各蒙古部落俾知儆戒○吏部奏候
補郎中福昂向尚書英和呈遞書信一摺得
旨此案朝陽縣知縣德興因誤被揭參開復

留任瑞慶無缺可調吏部議駁之稿並未逾
限或瑞慶不明條例尚可自行呈訴乃伊父
福昂輒自寫書信向英和私宅投遞意在請
託實屬妄為福昂人本平常且年已衰老著
即將候補郎中斥革永不敘用英和心秉公
正昏夜乞憐之徒不必施其狡獪也○免西
寧所屬格爾吉被雪番族應徵銀三年○乙

酉上幸萬壽山○諭內閣昨日召見果齊斯歡詢

問四阿哥功課據果齊斯歡奏稱甫學屬對詩文俱未能作朕前在藩邸時十一歲即能屬對十二歲即能賦詩壬辰年十三歲時

皇考高宗純皇帝命面和

聖製五言律七言律詩味餘書室詩集中即載有朕十三歲詩章四阿哥質性聰明儘可讀書本年已十四歲詩文尚俱未學皆由果齊斯歡學問平常不能循循善誘而又因循疲玩以致耽誤果齊斯歡負恩已極著革去一

應差使俾上書房師傅共知儆戒所有四阿哥師傅著大學士會同翰林院掌院學士在翰林中選擇品學兼優者三人帶領引見候朕簡用未經引見以前著陳官俊暫行授讀○調禮部右侍郎德文為工部左侍郎以內閣學士哈寧阿為禮部右侍郎○命翰林院修撰吳信中在南書房行走○以二等侍衛慶長為正黃旗蒙古副都統調正黃旗漢軍副都統廉善為鑲黃旗滿洲副都統以內閣

學士裕恩兼正黃旗漢軍副都統○丙戌以奉宸苑卿奕經為內閣學士兼禮部侍郎銜

○丁亥

上御勤政殿聽政○諭內閣此次考試翰詹各官按其文字優劣分為等第一等五員二等四十五員三等五十五員四等七員不列等一員其考列一等之編修潘錫恩著升授侍讀編修顧元熙著升授侍講修撰吳信中著升授右庶子編修錢林著升授洗馬編修許邦光著升授右贊善二等之編修賀熙齡左贊善陳官俊編修劉斯崐修撰洪瑩侍讀學士顧臯著各賞緞二匹修撰龍汝言侍讀學士彭邦疇侍讀何凌漢編修袁銑右中允龔守正侍讀學士徐頤朱士彥編修何彤然翟錦觀費丙章錢駉袁元善宮煥胡敬祝慶蕃著各賞緞一匹及名在二等者俱著照例記名遇缺題奏其考列三等之侍讀楊惠元洗馬聶鎬敏右庶子瞿昂俱著改用郎中右贊

善程壽齡著改用主事侍講彭浚著改用員外郎右贊善覺羅德寧著降用編修少詹事寶瑛著降補贊善仍在批本處行走編修李振庸檢討師承瀚編修譚言謫黃安濤史詩著各罰俸半年編修陶廷杰童桂敷侍讀福申編修郭尚先檢討丁傑編修熊常鐸李可瓊聶銳敏沈岐檢討唐鑑著各罰俸一年編修夏國培邱煌陳繼義傅綬劉嗣綰著各罰俸二年其考列四等之侍讀學士恒福右庶

子恒祥侍講王綬俱著降補筆帖式編修施杓洗馬吉祥侍講學士明通俱著原品休致檢討李德立著罰俸三年其不列等之右庶子宗室德朋阿著革職餘俱照舊供職該員等其各敦品力學勤修職業以副朕選俊儲才至意○又諭巡視東漕御史王松年奏查勘泉源情形通籌運道全局各一摺山東運河全賴泉源接濟汶泗之間出泉處所本多聞地方官因恐報出新泉越時衰涸致干吏

議往往隱匿不肯造冊送驗莫若量為變通如該州縣境內報出泉源不認真疏濬任聽淤塞自應加以懲處若實係源流涸竭該管上司查驗明確准予寬免處分庶地方官無所畏忌探有新泉即行呈報可廣收挹注之益其滕嶧兩縣請以佐貳分管泉務及衛河灌田濟運啟閉開壩章程並下游挑挖支河情形著山東河南巡撫會同河東河道總督詳悉妥議具奏○又諭富俊等奏請將喇嘛

自置私產仍令自行取租一摺盛京實勝等寺官給莊園冊地及自置香火地畝前因該喇嘛等苦累壯丁概令官為徵租酌給口糧嗣各寺喇嘛以所得口糧不敷養贍奏經部議准其將自置及施捨地畝自行招佃行令擬定租數以免多收茲該將軍奏稱該喇嘛等以自置施捨之地並非官田懇請自取糧租歲獲餘潤如有苛取情甘領罪等語著照所請除官給莊園冊地二萬六千五百餘畝

仍照原定章程徵租。給予口糧外。其喇嘛自置私產。並香火地一萬三千八百二十畝。准令該喇嘛等自行招佃取租。以資養贍。該將軍等仍嚴飭各寺喇嘛妥協經理。不得任意加租。儻有苛求奪佃等事。隨時秉公懲辦。以杜弊端。○以通政使司通政使和桂為都察院左副都御史。○戶部議准陝甘總督長齡疏報烏魯木齊塔西河所開墾地二十九頃六十畝。照例升科從之。○戊子命翰林院侍讀學士顧臬在上書房行走。○以涼州協領德楞額為成都副都統。○乙丑。上御閱武樓閱八旗火器營操。○辛卯。諭內閣御史李廣滋奏。請將口外搶劫盜犯勒限緝拏。一摺。熱河平泉等州縣搶劫各案。前據御史李廣滋訪聞。參奏當經降旨。令熙昌督率嚴緝。旋經熙昌奏獲盜犯多名。嗣後惟當督飭所屬文武地方官。遇有報案。立將首夥各犯嚴緝懲辦。並密訪窩頓之家。拏獲按律

究治。州縣官如有隱匿不報。查出嚴參重懲。盜風自可日戢。不必另立限期。轉於定例不符也。○壬辰。諭內閣朕恭閱皇祖世宗憲皇帝實錄。內載雍正十三年五月。諭內閣凡內外臣工。身膺職掌。務須殫精竭力。圖報國恩。大小諸事。悉心整頓。此乃人臣之常分。若但知潔己而不知奉公。國家亦安用此木偶為也。如果實心為國之人。便有錯誤。朕必原諒。而保全之。如彼馬齊高其倬。魏廷珍。甘國壁等。非不能辦事之人。乃習成巧術。自謂保身遠害。藉為推卸之計。此風有妨於政治。無益於國家。況將來後進效尤。其弊有不可勝言者。欽此。仰見我皇祖聰明睿知。不特於當日臣工隱曲。坐照如神。且慮及後進效尤之弊。於百十年後竊祿保位之庸臣。其心術伎倆早已洞燭無遺。現在內外臣工沾染此習者。正復不

少朕久欲降旨訓飭茲恭讀

聖諭揆諸朕心實有默契人臣仰承知遇備位察察分應殫竭血誠實心為國凡有當言當行之事但取有裨國是君上之都俞吁咈一己之榮辱利害皆非所計方令事君以忠之義若習成巧宦遇有敷陳先心存畏忌懼干譴責或事與同官屬吏有所干涉恐因此結成嫌怨遂一味扶同遷就隱忍不言如此持祿養交即使倖全爵位在諸臣自為謀則善矣

國家奚賴焉清夜捫心將來史冊為何等人亦應愧汗矣在朝多一具臣國家受一分害朕實懼焉為此通諭內外大小臣工務各激發天良盡心國事勿存邀名市惠之心勿持遠害避嫌之見忠誠直諫無間初終庶靖共爾位庶績咸熙用副朕董正治官至意○癸巳諭內閣朕五旬誕辰曾先期降旨不准各督撫進獻金珠玩好等物來年為朕六旬正誕該督撫等情殷祝嘏因朕壽登週甲又

非五旬可比或欲加意增華用抒忱悃惟是

吏治未醇民俗未正方抱愧之不暇况朕敦崇節儉出於本性來年並不舉行慶典繁儀著通諭直省督撫除應進土貢仍循例備進外所有金珠玉器陳設仍一概不准進呈其督撫中有派出屆期來京祝嘏者准其呈遞如意暨詩冊書畫並備賞綢緞以及食品等件俾展慶祝該督撫等務各敬謹凜遵用副朕諄諄誥誡之至意○又諭刑部奏蒙古搶

劫之案有民人在內者請先令承審官分別是劫是搶照刑例強盜各條及搶奪擄搶各條分別治罪似此引例紛繁轉滋清混正所謂科條既備民多偽態無所措手足矣嗣後蒙古地方搶劫案件如俱係蒙古人專用蒙古例俱係民人專用刑律如蒙古與民人夥同搶劫覈其罪名蒙古例重於刑律者蒙古與民人俱照蒙古例問擬刑律重於蒙古例者蒙古與民人俱照刑律問擬著為令○調

江蘇布政使伊什扎木素為浙江布政使以病痊布政使楊懋恬為江蘇布政使○甲午孝昭仁皇后忌辰遣官祭

景陵○

上還宮○以兵部尚書和寧署戶部尚書禮部尚書穆克登額署理藩院尚書○乙未遣官祭賢良祠○諭內閣董誥奏呈繳密雲官房並自置海甸熱河住房二所以清賠項一摺董誥前因每年隨扈秋園是以於密雲賞給

官房一所董誥並於熱河自行置有房屋茲董誥以老病開缺即調養痊癒再行賞給差使亦必不派令隨園所有密雲官房及熱河房屋著照所請俱准其呈繳至海甸房屋一所董誥現患沈疴園林清曠於頤養為宜著仍賞還董誥其代伊弟認繳賠項銀九千九百餘兩業經交過六千兩所有未完銀三千九百二十五兩零俱著加恩寬免董誥現經賞給在家食俸其從前在任罰俸各案並著

加恩悉予開復即於本年支食全俸以示恩眷○諭軍機大臣等御史蔣詩秦山西苛嵐交城平陽霍州一帶大山連接近為匪棍藏匿之數又和順榆次平定遼州等處亦有匪棍藏匿山內土人號為山棍或即在山中劫奪行旅或出山糾約搶劫或潛入城市攘竊多賊甚至拒捕傷人等語晉省苛嵐等處山內藏匿匪徒乘機搶劫甚至拒捕傷人實屬目無法紀著成格即督飭所屬於苛嵐和順等處山內嚴查匪棍蹤跡如有潛匿窩巢嚴拏究辦毋令奸究聚集將此諭令知之○以故奉國將軍嘉培子連喜襲職○以右春坊右庶子吳信中翰林院侍讀潘錫恩充日講起居注官翰林院侍講顧元熙司經局洗馬錢林署日講起居注官○丙申祭

歷代帝王廟

上親詣行禮○諭內閣御史吳杰奏湖北緝私請派遣府查辦一摺湖北近來官引滯銷皆

由鄰私浸灌承緝員弁不能認真巡緝並兵役等得規庇縱以致梟販益無忌憚自應亟加整飭著該督撫遴派文職道府武職副將叅遊等官在於川私潞私入楚各要隘地方實力巡查設法堵緝並將得規包庇賣放之兵役查出嚴究重懲以除積弊○諭軍機大臣等前據孫玉庭等奏湖廣江西綱引滯銷當經降旨將該鹽道革去頂帶令該督撫鹽政等將堵緝鄰私及稽查夾帶偷漏之弊會

同妥議章程具奏茲據御史吳杰奏稱巫山大寧一帶鹽埠口岸素有奸商私造引張名為墨引串通土豪勾引私販各船到彼捏稱提載由水路浸入荊州宜昌等處陸路則由竈戶出賣與竹谿房縣肩挑背負之民每日不下數百人聽其販往楚界各鄉村售賣又聞陝西商南平利一帶私鹽即自潞商各店中販來由漢中順流而下至襄陽之穀城德安之安陸分途暗售河南私販即自南陽之

李官橋店中販來亦至穀城安陸等處請飭令各督撫查辦等語私鹽充斥以致官引滯銷亟應設法整頓著孫玉庭慶保張映漢錢臻阿克當阿會同確查並將該御史指出開設店鋪興販私鹽各地界移咨四川陝西河南各督撫一體查明究辦其應如何設法堵緝稽查之處歸入會議章程內一併妥議具奏將此各諭令知之

大清仁宗受天興運敷化綏猷崇文經武孝恭勤儉端敏英哲睿皇帝實錄卷之三百三十九

大清仁宗受天興運敷化綏猷崇文經武孝恭勤儉端敏英哲睿皇帝實錄卷之三百四十

此後初教習之應日講起居注官太子太傅或英殿大學士又開閣領閣事稽察奏奉
上諭事件應管理部事務翰林院掌院學士

陞帶加二級尋常加四級之員張鑑勳官太子太保文淵閣大學士右理刑部事務加級臣蘇均等謹具請起原注官太子少保內閣

刑部議進 附書積弊欽奉 上諭事件處協辦大學士鄂爾高翰林院掌院學士蘇習廉吉士麟慶內務府大臣錢廣麟滿洲都統史

奉曉諭旨理部三庫奏宸翰摹繪圖等處總理工程處御營膳房御藥房太醫院西洋堂事務案功加五級隨帶加三級尋常加一級限銜于

上諭英和經派員官太子太保禮部尚書士高房行走盛英殿總裁管理國子監事務加六級隨帶加級紀錄四次汪廷珍等奉

較修

嘉慶二十三年戊寅三月戊戌朔清明節

上詣

壽皇殿行禮○遣官祭

永陵

福陵

昭陵

昭西陵

孝陵

孝東陵

景陵

泰陵

泰東陵命

皇次子智親王旻寧祭

裕陵遣官祭

孝淑皇后陵寢○遣官祭

端慧皇太子園寢○諭內閣富俊等奏拏獲

私入園場人犯請照舊例刺字一摺園場偷

竊牲獸樹木者例應刺字其偷竊柴蔬等物

例祇松杖免其刺字近日奸徒私入園場率

以採菜為詞屢犯不悛著照該將軍所奏嗣

後拏獲私入圍場人犯審明或打鎗放狗或

採菜砍木除照例分別擬罪外不論首從已

得贓者皆面刺盜圍場字。未得贓者皆面刺

私入園場字。如有再犯。易於辨識。木蘭私入

圍場者亦照此例一律辦理○又諭直省督

撫大吏不准以屬員幫辦幕務屢經降旨飭

禁方受疇身任總督養廉優厚非不能延請

幕友者乃令現任通判陳建入幕辦事。既曠

職守又招物議實屬違制本應照部議降調不准抵銷姑念一時簡用乏人方受囑著加恩改為降四級留任○己亥

上耕藉詣

先農壇行禮更服至藉田所

躬耕三推復加一推

御觀耕臺命睿親王端恩怡親王奕勲慶郡王

永璘各五推吏部右侍郎吳芳培戶部左侍

郎禧恩禮部左侍郎多山兵部右侍郎穆彰

阿刑部右侍郎廉善工部右侍郎陸以蔭都

察院左副都御史和桂通政使司副使齡椿

大理寺卿寶興各九推畢順天府府尹率農

夫終畝賞資農夫耆老如例○庚子

上詣

永慕寺行禮○啟鑒恭謁

西陵命莊親王綿課大學士曹振鏞尚書英

和和寧留京辦事○諭內閣本年七月朕躬

詣盛京恭謁

三陵前經降旨令二阿哥三阿哥四阿哥隨往

三阿哥身體虛弱馬上平常盛京程途遙遠

跋涉非宜著祇令二阿哥四阿哥隨行三阿

哥不必前往亦不准再行祈請○是日駐蹕

舊衙門行宮翼日如之○辛丑

上詣

元靈宮行禮○壬寅

上行圍○諭軍機大臣等將攸銘奏奉旨飭查

中瞻對逆酋洛布七力未經焚斃一事密派

員弁前往訪查該處距省遠派去員弁約

須二月底方能旋省統俟查明奏請訓示等

語此事前經卓秉恬具奏降旨飭查本日朕

召見賽冲阿據奏稱伊在川省時與常明俱

有所聞洛布七力前奏報係屬焚斃又聞或

係淹斃並傳聞該逆酋於官兵進剿時先已

潛逃並未斃命事定後又復回至巢穴向上

下瞻對索取所分地土人戶上下瞻對畏其

强悍仍俱給還彼時伊與常明商酌因未查

得確實是以未及叅奏等語此事關繫邊務
蔣攸銛務訪查真確不可草率如查明洛布
七力實未焚斃現尚恃強不靖該督迅速由
驛奏聞候旨酌辦一面將原辦此事之總兵
羅思舉革職拏問並將多隆武截回四川一
併革職拏問究明從前捏飾情弊按律定擬
具奏將此諭令知之○是日駐蹕南衙門行
宮○癸卯諭軍機大臣等陳預奏東省欽差
所住之貢院前照壁上復有匿名揭帖內指
現在查辦之匿名揭帖係去年八月二十三
日劉加封蔣因培王朝幹在烏龍潭商量書
寫有劉加封家人陳安可問當將陳安拏獲
及原帖送景安等審辦並自請解任同家人
巡捕一併解交景安等研審如審有貪贓款
跡從重治罪等語此次匿名揭帖內指控陳
預各款如將編寫之人拏獲究明該撫實有
貪贓劣跡該撫自無所逃罪若查無確據即
與該撫無涉陳預此時不必心懷憤懣仍安

心照常辦事並設法訪拏兩次匿名揭告之
人一併拏獲即交景安等審訊辦理可也將
此諭令知之○又諭陳預奏東省小清河以
章邱鄒平長山新城為上游高苑博興樂安
為下游現自章邱山頭店至萬家口計河
長六十里水流無滯自萬家口至段家橋正
河淤墊又鄒平之王家橋開河橋鄒長交界
之郭家口高博樂三縣之支脉溝等處淤墊
較厚均須逐段興挑尚有萬家口灰壩及宋
龍口孫家橋一帶應開段興挑及均張壩以
東之小清廢河亦宜疏導並將淄河門口以
上海灘挑挖應照舊章各就地方自出民夫
興辦惟又據高博樂三縣民人呈訴以上游
宣洩水勢全行下注支脉溝不能容納恐致
漫漾查上游之許山泊清沙泊麻大湖係潞
水之所應先將二泊一湖挑挖寬深使水有
停頓再挑挖支脉溝並將舊有隄岸補築以
防漫溢次將上游之段家橋等處次第疏通

再由陶唐口正河通至均張壩開門。由支脈溝入海。則上游章邱等縣民人樂從襄事。下游高博樂三縣居民得水有歸宿。攔禦有備。亦無虞其堅不興挑等語。小清河水漫溢。固由下游不能宣洩。亦由上游河道淤墊所致。因勢利導。先將上游疏濬。並將潞山等二泊一湖挑挖寬深。足資停蓄。則水勢自不至建瓴直注下游。高苑等縣亦不驟虞漫溢。著陳預即照所議先行出示曉諭。俾上游居民樂於從事。其下游居民亦以次將海灘挑挖通暢。使水有所歸。不至偏受利害。將此諭令知之。○又諭本日朕在團河行宮。閱看本章。河南通本內有按察司監犯病故本三件。一係淮寧縣強姦勒死良人子弟擬斬立決犯人徐各句。於二十二年十二月十六日病故。一係信陽州強盜擬斬立決犯人齊。於二十二年十二月二十八日病故。一係息縣強盜擬斬立決犯人張景。於二十二年十二月二

十九日病故。豫省司監半月之內連斃斬決重犯三名。著和舜武督率臬司琦善確查該監犯等有無畏罪自盡情事。並提訊禁卒人等有無私通信息及凌虐賄縱情弊。據實覆奏。如查訊實無其事。或係司監瘟疫傳染以致重犯連斃三命。其輕罪人犯有無同時病斃者。若係時疫所致。該臬司應亟飭令管獄官率領人役埽除穢惡。或散給藥餌趕緊清理人命至重。慎勿怠忽從事也。將此諭令知之。○賞看守南苑各行宮苑戶一月錢糧海戶銀一千三百兩。○是日駐蹕團河行宮。○甲辰

上行圍。○諭內閣朕閱看正白旗護軍等步射閱至第四起。並無中五箭人員。且本日復有射未及靶之護軍一名。已將該護軍革退降為馬甲矣。此皆該管護軍統領護軍叅領等平日操演不善所致。秀寧係文進士出身。技藝平常。不勝護軍統領之任。秀寧著革去護

軍統領仍罰俸半年該管護軍叅領著罰俸一年以示儆戒。以吏部左侍郎熙昌兼正白旗護軍統領。旌表守正被戕河南正陽縣民張成仁妻余氏守正捐軀陝西洛川縣民陳花妻劉氏。是日駐蹕新衙門行宮。

乙巳

上詣盧溝橋

龍神廟拈香祭

先蠶之神

皇后親詣行禮。舉行嘉慶二十二年軍政湖廣卓異官十員年老官一員有疾官一員才力不及官二員分別議敘處分如例。以故喀爾喀扎薩克圖汗扎薩克鎮國公扎木薩朗扎布子剛當多爾濟襲爵。免蹕路經過地方本年額賦十分之三。是日駐蹕黃新莊行宮。丙午諭內閣本日召見弘善詢知阿哥等謁

陵來時伊係跪接等語從前朕在藩邸時守護

東陵之二十三貝子因長朕兩輩每遇接見係站立請安今弘善既長阿哥兩輩請安亦不宜跪嗣後凡近支弘字輩宗室每遇接見阿哥俱著站立請安著為例。緩徵直隸大興宛平良鄉清苑滿城唐容城完祁獲鹿井陘行唐靈壽元氏贊皇新樂定曲陽武強深安平二十一州縣旱災本年額賦。是日駐蹕半壁店行宮。丁未駐蹕秋瀾行宮。戊申孝賢純皇后忌辰遣官祭

裕陵

上臨

慧慈固倫公主園寢賜奠。諭內閣五公主著追封為慧安和碩公主同慧慈固倫公主著弘善製造牌位二座其歲時致祭禮儀該衙門照例辦理。又諭御史馮清聘奏各省常平倉穀出糶買補請恪遵定例禁止勒派一摺直省各州縣常平倉穀定例平糶時減銀出糶買補時不准豫發價直強行派買原

恐以便民之政轉致病民。今該御史奏稱近日外省並不遵例辦理著各督撫申明定例嚴飭所屬州縣務各實力奉行如有照市價出糶並將例價豫發有穀之家強行派買或勒令懦戶買穀交倉仍繳還例價腹削閭閻者一經查出立即據實嚴參懲辦毋稍徇縱。又諭御史馮清聘奏請查緝匪徒一摺山西交城縣屬葫蘆峪地方毗連陝甘山深林密素易藏奸前經銜齡奏准每歲春秋二季派冀寧道撫標中軍參將巡查一次茲該御史奏巡查派有專員恐有迴護情弊著傳諭成格嗣後葫蘆峪春秋二季巡查著於通省道府及將領大員內輪流遴派責令親歷周查認真訪緝毋得仍派專員徒以結報塞責致成具文。以故輔國將軍永羣子綿順襲職賞蹕路經過看守各行宮弁兵半月錢糧。是日駐蹕梁格莊行宮。己酉。

上恭謁

泰陵
泰東陵俱未至碑亭即降輿慟哭步入隆恩門詣寶城前行禮躬奠哀慟王以下文武大臣官員均隨行禮。至孝淑皇后陵寢奠酒臨妃園寢賜奠。是日迴鑾駐蹕秋瀾行宮。庚戌命協辦大學士兵部尚書章煦為大學士仍管理刑部事。調禮部尚書戴聯奎為兵部尚書轉都察院左都御史汪廷珍為禮部尚書以吏部右侍郎吳芳培為左都御史署兵部左侍郎周系英為吏部右侍郎。是日駐蹕半壁店行宮。辛亥旌表守正捐軀河南遂平縣民臧十一妻王氏。是日駐蹕黃新莊行宮。壬子。

上謁

北惠濟龍王廟拈香。鑄給直隸天津府海防同知關防從總督方受疇請也。是日駐

蹕北惠濟龍王廟行宮○癸丑駐蹕靜宜園至丁巳皆如之○甲寅諭內閣托津等議覆御史汪彥博條奏整飭武備一摺所議是我朝兵制詳明自京營以至各省募布星羅內外相維守衛至為周密惟在該管大臣認真操演有一兵即得一兵之用自能悉成勁旅如訓練不精雖多增兵額不過虛糜糧餉於武備毫無裨益該御史不曉事體其所請於巡捕營添足烏鎗兵五十名之處著無庸議

至大閱係屬鉅典間越數歲特旨舉行若如該御史所奏每歲親閱兩旗實於體制未協惟八旗軍械自應勤加點驗以警廢弛向例每屆五年點驗一次歷時較遠著改為三年由兵部奏派王大臣點驗一次其紫禁城內外及圓明園各門各堆撥並八旗堆撥火班城門偏吉看守公所倉庫各堆撥腰刀弓箭撒袋長槍前於十八年冬間一律更換整齊此項軍械著照該御史所奏做照查閱園馬

之例每年由兵部奏請欽派大員查驗一次以昭覈實至順天府所屬州縣府尹與總督會同管轄定例遵行已久若改為分隸則考察點陟事權歧出諸多窒礙該御史妄議更張尤不可行○乙卯旌表守正捐軀安徽阜陽縣民詹起山女詹氏○丙辰緩徵湖北漢川沔陽潛江天門江陵荊門漢陽七州縣水災帶徵額賦○丁巳

上御演武廳閱健銳營操○旌表守正捐軀河南

南林縣民李更妻楊氏○戊午

上還圓明園○旌表守正捐軀山東鄆城縣民

女宮氏○己未命於

黑龍潭

覺生寺設壇祈雨○吏部以大學士章煦應定何殿閣請得旨著為文淵閣大學士○庚申

上幸靜明園詣

龍神廟拈香○詣

黑龍潭神祠拈香○命

皇次子智親王吳寧詣覺生寺

祈雨壇拈香○調正黃旗蒙古副都統慶長為廣州漢軍副都統以鑲紅旗滿洲叅領松齡為正黃旗蒙古副都統○辛酉

上御勤政殿聽政○諭軍機大臣等將攸銛奏遵旨按款確查將辦理情形覆奏一摺逆酋洛布七力前據卓秉恬奏並未焚斃且有戕害上瞻對頭人格格絨泰之事是以降旨令

蔣攸銛查明具奏昨據賽冲阿面奏伊在川時亦聞知洛布七力潛逃未斃事定後復回巢穴向上下瞻對索取地土人戶與卓秉恬所奏大畧相同因復降旨交該督確實訪查此次該督拜摺時尚未奉到續降諭旨據奏稱查得洛布七力焚斃之處祇有該酋常用之鐵馬鞍鳥鎗及手帶之鑲珊瑚金戒指為憑其時賊骸焦爛無從辨認番眾僉稱洛布七力實已焚斃現據派往道將密訪得二十

年勒平中瞻對將地土分給上下瞻對復有洛布七力之壻七力滾一支野番揚言洛布七力尚存向上瞻對索還地方彼此忿爭而去此後七力滾亦未再來滋事上瞻對則恐其復向尋釁時常準備逐細查訪不能得洛布七力實在蹤跡至格格絨泰其人現存並未被災是卓秉恬所奏洛布七力復出戕害格格絨泰之語係屬傳聞不確惟洛布七力是否燒斃迄無確據該督仍當遵照續奉諭

旨再行訪查此事必須將七力滾拏獲訊明始能辨別真偽七力滾雖屬野番往來無定但前既有向上瞻對尋釁之事亦難保其不再前來蔣攸銛當設法偵伺購索如能將七力滾擒拏到案確切供明洛布七力實已焚斃再將七力滾治其妄索土地之罪則羣疑盡釋方能杜傳訛之口該督務勉力辦理不可顛預了事將此諭令知之○命兵部尚書和寧右侍郎穆彰阿馳往保定查辦事件○

以詹事府詹事那清安為內閣學士兼禮部侍郎銜太僕寺卿常起為通政使司通政使壬戌旌表守正捐軀安徽懷遠縣民宮綱成妻范氏守正被戕廣東陽春縣民林均和妻譚氏○癸亥諭內閣此次單開應派隨往盛京之王公大臣京堂內儀親王於嘉慶十年曾經隨往成親王於乾隆年間隨往一次又於嘉慶十二年恭送

實錄

實錄

十

玉牒派往一次慶郡王永璘亦曾隨往兩次此次俱無庸隨往著派奕勲綿志奕綸奕紹托津裕恩載銓奕經載均元普恭盧蔭溥禧恩那彥寶姚文田哈寧阿穆彰阿彭希濂陸以莊和世泰博啟圖寶璘吳信中善祿常起英桂額爾登布福泰阿那保百順阿勒精阿哈郎阿雙慶張自興賽沖阿鄂勒哲依圖常喜奕禮那蘇巴圖布都爾呼那瑪呢巴達喇索特納木多布齋安福安成格布舍蘇爾慎吉

勒通阿額勒經額富永隨往其未派各員俱不准請○又諭向來新科一甲進士適屆大考翰詹之年以該員等尚在庶常館教習未經散館皆不就試及考試試差則以已經授職為辭一體與考事屬兩歧該員等既不與大考之列則考差亦不應與試著自此次為始凡一甲進士未經散館者遇考試試差時亦毋庸與考以歸畫一○甲子

上幸靜明園詰

實錄

十

龍神廟拈香○以河南城守尉額圖璉為廣州滿洲副都統○旌表守正捐軀山西繁峙縣民穆開運妻郭氏○命撥京倉麥一萬石給順天府屬大興宛平二縣減價平糶○乙丑旌表守正捐軀直隸天津縣民王德妻李氏○丙寅諭內閣上年西城擅封米鋪一案係由漢御史蕭鎮先派吏目查辦因積婪索多金始行告知滿洲御史伊綿泰伊綿泰因而得贓迨定案後二人均寘重典近日提塘

家人張錦立自縊一案漢御史蔣詩並未會同滿洲御史審辦輒代為標畫日期據此以觀漢御史殊覺遇事專擅而滿洲御史未免退處無能不可不嚴加訓飭著通諭滿漢御史嗣後於應辦公事務宜和衷商酌秉公辦理滿洲御史當勉圖自立漢御史亦不得任意自專以肅官方而端風憲○又諭御史蔣詩巡視南城輒將北城已結之案聽信家人張蘭之言復傳人證自赴吏目衙門審訊擅

欽定大清會典事例

卷一百一十五

改供結以致張錦立被累自盡且並未會同滿洲御史審辦代為標畫日期實屬任性乖謬著即照部議革職御史姚瑩於已經審結之案既任聽南城關傳覆審又因張錦立之改供具結疑為翻異前供輒行掌責五下雖張錦立之死由於自縊究因該御史濫責所致著改為實降一級調用○丁卯

上還宮○諭內閣景安等奏查辦匿名揭帖審無確據將現訊人證擬結一摺張五緯經朕

擢用臬司大員不知自愛違禁食鴉片烟及署理藩司又委缺不公被屬員登門辱詈甘心忍受以致東省有匿名揭告之事前經革職不足蔽辜張五緯著發往軍臺効力贖罪陳預既知劉東里等向張五緯肆行無狀不行參奏嗣聞有匿名揭帖又不奏明查辦著再行交部議處署臬司德啟於屬員具稟爭缺既經會稿揭參及其事中止並不查問著交部議處其具稟爭缺各員除劉東里業經

欽定大清會典事例

卷一百一十五

革職外解任知縣項立本幫改稟稿著交部嚴加議處隨同三次列名之候補知縣王國寶吳怡趙凝禧趙白麟劉光朝俱著交部議處一次列名之孫勵恭著交部察議餘俱著照所議完結○諭軍機大臣等伯麟等奏臨安江外土司地方夷匪自相仇搶現在夷匪遠竄派兵防江一摺納更土司所屬夷人因與稿吾卡土司素有仇讐糾眾搶掠伯麟馳抵臨安查辦已據該納更土司龍恩遣伊長

子龍際清前往集練協同各土司掌寨查探
捕捉並因該夷匪等遠至界連南掌越南之
藤條江地方竄伏無定恐其折回內地各土
司地方滋擾復飭各土司厚集土練堵剿並
札飭南掌越南兩國邊日嚴防邊界於內地
江邊分飭鎮道派撥弁兵於各要隘渡口嚴
密防堵伯麟係總督大員有應辦地方事務
此時江外烟瘴已起不能調兵深入伯麟自
應回省辦事至雙林係該省提督臨江一帶
既有派兵防堵之事自應留駐該處調度一
切乃於伯麟回省後該提督亦即回署殊屬
怠玩雙林著傳旨申飭即令馳赴臨安帶兵
數百名在彼駐劄督率防守如該土司等已
將夷匪首從悉數擒獲則已若有擾及內地
之事雙林即帶兵前進相機勦辦務俾安速
竣事以靖邊圉將此諭令伯麟李堯棟並雙
林知之以本年鄉試考試應開列試差人
員於乾清宮以常雩祀

天於

圜丘自是日始齋戒三日

大清仁宗受天興運敷化綏猷崇文經武孝恭
勤儉端敏英哲睿皇帝實錄卷之三百四十

大清仁宗受天興運敷化綏猷崇文經武孝恭勤儉端敏英哲睿皇帝實錄卷之三百四十一

欽定四庫全書

實錄卷之三百四十一

欽定四庫全書

欽定四庫全書

欽定四庫全書

秋修

嘉慶二十三年戊寅夏四月戊辰朔日食○

享

太廟遣定親王綿恩恭代行禮○旌表守正捐軀河南鹿邑縣民張士玉妻劉氏○己巳

上詣

南郊齋宮齋宿○庚午常雩祀

天於

園丘

上親詣行禮○幸圓明園○以直隸獨石口副

將多隆武為甘肅寧夏鎮總兵官西安協領

穆蘭岱為涼州副都統○辛未諭內閣陳預

自簡任山東巡撫以來辦理地方事務諸未

妥協以致輿論不孚緝拏逆犯亦無弋獲本

日具奏拏獲祝現之戚謝毓孟一犯係步軍

統領衙門番役赴東訪緝該撫輒冒為自行

拏獲殊屬無恥兩次經吏部議以降二級調

用無級可降應行革任本應照議黜革姑念

一時簡用乏人陳預著改為革職留任其德

政以下各員俱著照部議降調○諭軍機大

臣等據慶保等奏查明湖北歷來鄰私浸灌

各口岸均已添建官廳卡房並酌給口糧薪

水飭令派出各員弁分率兵役常川駐宿巡

緝其餘水陸交衝各處隨時委員巡查並令

各商公舉在楚年久熟悉鹽務商人專司緝

私自選商夥分投踰緝一有梟犯蹤跡隨地

報官擒拏如各口岸有疏懈賣放之弊准其

據實密稟以憑究辦並移咨四川兩廣陝西

河南各督撫一體查緝等語私鹽浸灌引地

惟在地方大吏督率文武員弁認真緝拏按律懲辦俾私梟知所畏懼自能斂戢豈可以端緝之責諉之商人轉令各員弁兵役有所推卸試思鄰省匪徒成羣結黨突入境內地方官本應嚴拏懲辦不但堵截私鹽兼可翦除匪類以靖閭閻若不認真查緝徒為紙上空談於事有何裨益至界連湖廣各省如四川之巫山大寧陝西之商南平利河南之新野唐縣以及粵西與湖南接壤各州縣均應

認真查禁除官引之外鹽斤概不准私販出境則其源既清下游自不致受浸灌之累著蔣攸銑阮元葉紹棨朱勳和舜武各飭所屬於要隘地方實力巡緝並嚴查官役包庇賣放之弊庶周防嚴密可收裕課安民之效慎毋存畛域之見也將此各諭令知之○壬申諭內閣朕恭閱

皇考高宗純皇帝實錄內載乾隆元年正月諭總理事務王大臣私鹽之禁所以除蠹課害

民之弊大夥私梟每為盜賊逋藪務宜嚴加緝究至於失業窮黎肩挑背負易米度日不上四十斤者本不在查禁之內乃近見地方官辦理私鹽案件每不問販鹽人數多寡商人又添私雇之鹽捕水路又添巡鹽之船隻此種無賴之徒藐法生事何所不為凡遇奸商夾帶大梟私販公然受賄縱放而窮民擔負無幾者輒行拘執或鄉民市買一二十斤者並以售私拏獲又因此互相扳染牽連貽害此弊直省皆然江浙尤甚朕深為憫惻著直省督撫嚴飭各府州縣文武員弁督率差捕實拏奸商大梟勿令疏縱其有愚民販私四十斤以上被獲者照例連結不得拖累平人至貧窮老少男婦挑負四十斤以下者概不許禁捕所有商人私雇鹽捕及巡鹽船隻俱嚴查禁止等因欽此仰見我

皇考周知民隱於地方官吏緝捕私鹽之情弊洞燭無遺朕以

皇考之心為心以

皇考之政為政。昨因慶保等奏楚省緝私情形。降旨諭各鄰省督撫協同查緝。不但堵截私鹽。兼可翦除匪類。並令嚴查官役包庇賣放之弊。禁止商夥添雇鹽捕。擾累平民。與

皇考從前所降

諭旨悉皆符合。緝私一事。所重者奸商大梟。不特有妨鹺務。且足為害閭閻。乃地方文武員弁。或受其賄賂。公然包庇賣放。或畏其黨與

衆多。強橫拒捕。不認真緝拏。以致私鹽充斥。肆無忌憚。其所報獲者。皆係小夥私販。既無賄賂可圖。擒拏又易為力。兵役每藉以為冒功塞責之地。此等惡習相沿。已非一日。著該督撫等嚴飭所屬文武員弁。各於要隘地方。訪察奸商夾帶。大梟私販一體實力緝拏。按律懲辦。不得任聽不肖兵役及私設鹽巡。濫拏肩挑背負之人。徒滋擾累。庶奸民知所畏忌。官引得以暢行於國課。民生均有裨益也。

將此通諭知之。○癸酉。諭內閣。果勒豐阿等

奏請添派官兵在大青山一帶巡緝一摺。大青山後地方。為蒙古商民貿易往來必由之路。近日盜案繁多。前經果勒豐阿等議派土默特官兵輪往巡查。尚未周密。著照所請添派綏遠城滿洲佐領等四員。兵六十名。除客貨停運時。仍照常派土默特官兵巡查外。其餘三季令滿洲蒙古官兵。每月分起會哨六次。所需馬乾等項銀兩。准其於藩庫存貯十

九年耗羨銀內。借撥二萬兩。交歸綏道發商生息。分別動支。該將軍等務須督飭弁兵實力巡查。以收戢盜安民之效。○甲戌。諭內閣。御史謝崧奏山東訟獄繁多。請整飭吏治。嚴究訟師一摺。近來東省吏治廢弛。地方牧令相率因循。遇有自理詞訟。並不秉公速結。即使控訴上官。亦顛預批發。不為剖判曲直。遂致訟棍得以把持教唆。赴京控告者絡繹不絕。不可不亟加整頓。著該撫嚴飭所屬各州

縣前除積習勤明聽斷該管上司不得化重為輕如有任情枉斷者據實叅處毋稍徇庇其著名訟棍並隨時訪拏重懲庶吏治漸清而訟風自可日戢矣○又諭陳預奏滕嶧二縣分管泉務並查勘支河情形一摺滕嶧二縣泉務知縣事務繁多自應令佐貳分管以專責成著照所議滕縣泉務以地方縣丞為專管嶧縣泉務以河務縣丞為專管均仍以知縣總理其事如有諉卸廢弛分別叅處其

挑挖四女寺支河應由直隸山東兩省各按地段接續疏濬使一律深通庶足以備盛漲宣洩若偷減挑工又或將起挖之土堆積兩岸竣工未久旋即淤墊仍屬有名無實著該督撫各將境內應挑工段責成承辦之員務按原估丈尺如式疏挑報竣後乘未經放水以前派員確勘收工其堆土處所亦必令距兩岸稍遠如有偷減草率者一經查出據實叅奏懲處仍責令賠修以杜浮冒○乙亥

上幸萬壽山○諭內閣前據英和奏於圓明園紅橋牆上揭有匿名字帖帖內醜詆蘇楞額並及內務府司員八人續據奏訪有暢春園銷算房當差之張錡與內務府郎中祝麟等素有嫌隙形跡可疑適張錡因錢債另案在該衙門被控即將張錡傳案研訊昨據奏張錡已承認因挾祝麟駁減工程之嫌匿名控告請交刑部嚴審定擬當派軍機大臣會同刑部審訊及行提張錡即於是日在步軍統領衙門監門外身故情節甚屬可疑特派刑部侍郎秀寧彭希濂前往相驗據奏張錡並非受毒亦非因病實係刑傷潰爛身死此案英和屢次面奏朕諭以總須細心推鞠不可遽事刑求乃該衙門承審之員將張錡熬審二十日致因刑傷斃命且其生供亦迄未將揭帖內語句默寫符合如張錡果係匿名揭帖正犯則已倖逃顯戮若案情尚有不實豈非銜冤就斃此案辦理實屬草率冒昧英和

著交都察院察議其承審司員俱著交都察院議處以為濫刑者戒解任郎中祝麟現已無可質訊著即回任當差○丙子

上詣

火神廟拈香○還宮○諭內閣昨日酉初三刻有暴風自東南來俄頃之間塵霾四塞室中燃燭始能辨色其象甚異朕心中震懼夙夜不遑惕思

上蒼示警之因稽諸洪範咎徵恒風為蒙之象

皆朕辦事不明用人不當之故或意存怠忽不能力勤或有下情不能上達者其政事闕失無所匡正歟抑小民冤苦壅遏莫聞歟或內外大臣有奸佞傾邪而朕不及覺歟有言事之責者體朕遇災而懼之心其各屏除私意獻納忠言如朝廷所行之事有似前代秕政應行改革者即剴切論列無有所隱下民橫被冤抑有覆盆莫白者亦據事直陳代為昭雪其奸邪之病國虐民者或模稜巧宦旅

進旅退者即列款糾叅指其實跡登之彈章如此則言者出於為國之公心朕聽之即為應

天之實政若懷挾私意祇圖便一身之謀又或造作無稽以報夙嫌而洩私忿則顛倒黑白淆亂是非不特負朕求言之意更足以增晦蒙之象矣且如近日人心險惡匿名訐告之案接踵而出良民受其拖累以致蕩產亡身皆足以召災沴又風從東南而來或東南一

帶逋逃逆惡相聚潛藏地方官不能覺察以致上千

天和朕恐懼修省反復思維虛懷延訪內外大小臣工各當自省咎愆殫心竭力共勤職業以副朕修德弭災之意○丁丑

上御太和殿視朝王以下文武升轉各官謝恩幸圓明園○戊寅命再於

黑龍潭

覺生寺設壇祈雨○諭內閣欽天監衙門職

司占驗於星象風信休徵咎徵皆應據實入告近日該衙門節候占風多擇取吉祥語句聊以塞責昨初八日風霾之異朕心震懼遲至三日該衙門並未推占具奏所司何事此等異變竟不具奏豈專事諂媚以取悅於上乎真所謂尸厥官罔聞知昏迷於天象矣著即詳考占經烈風之變見於四月者主何徵應全錄原文據實奏聞毋有所隱○又諭給事中盧浙奏風沙示警請禁緝捕員弁貪功冒賞擾累平民一摺所奏甚是十八年逆案內祝現等六犯日久未獲朕所以降旨飭緝者原以除莠安良乃承緝之員不能報獲輒思以他犯塞責而番役兵丁等遂乘機肆虐或誣陷平民或藉報仇隙拖累無辜索擄財物及拏解到官審明昭雪而被害者業已家背蕩盡形骸支離其覆盆之下因而隕命者又不知凡幾實屬可憫乾隆年間謀逆重案如馬朝柱段文經二犯遁逃未獲我

皇考高宗純皇帝曾屢經降旨飭緝彼時承緝者並未於案內株連瓜蔓濫及多人迄今數十餘年餘燼寂然是即前事之鑒今林清逆案其首先謀叛之元惡大慙均已伏誅所必應緝獲明正典刑者亦惟有祝現等六犯為最要其餘各犯不過脅從現在疑似之間豈可徧行羅織害及良民者概行停緝即次要各犯亦祇令刑部存記獲日再行辦理凡內外緝捕衙門惟各於境內嚴密偵訪六犯蹤跡必須訪有確據方可就地擒拏獲日審明實係正犯仍從優獎賞若番役兵丁及一切白役人等再藉捕逆為名將情涉疑似者妄行搜拏或奸民挾嫌指控以圖陷害則誣人為叛逆者即以叛逆之罪坐之或將被害之家財產搶劫者審明計賊治罪仍將該番役兵丁等家產抄沒賞給被害之人其官弁中有貪功冒賞誣陷無辜者該管上司查出均嚴叅一體治罪務俾善良

得安。以禁苛虐而除擾累。將此通諭知之。○又諭孫玉庭等奏。東省額設營船。江南未能代造一摺。所奏甚是。各省額設營船。均係自行修造。若謂木料產自閩浙。則江南可以派員前往購運。山東何獨不能陳預以本省應辦公事。奏請鄰省代為承辦。實屬有心推諉。該部亦不應覆准。所有山東額設戰船。仍著該省自行修造。以專責成。○諭軍機大臣等。伯麟等奏。臨安江外夷匪過江滋擾。馳往查辦。並酌調官兵。勦捕一摺。滇省臨安江外夷匪。在土司地方聚眾仇搶。伯麟前往該處查辦。本不應即行回省。至雙林乃本省提督。臨安一帶既有派兵防堵之事。自應留駐該處調度一切。乃伯麟回省。雙林亦即回署。今夷匪復由藤條江外突至蠻密渡過江。擾及江內。伯麟奏稱。亟應動兵勦辦。不可遲緩。不知業已遲緩。伯麟著傳旨申飭。該督現已馳赴臨安。務須督率弁兵趕拏勦除。以靖邊圉。雙

林畏蕙無能不勝提督之任。現已將張鳳簡授雲南提督。張鳳係久歷行陣之人。已有旨令其馳驛速赴臨安。隨同伯麟妥辦。其所遺古州鎮總兵員缺。即著雙林降補。仍令在臨安軍前効力贖罪。至滇省距京遙遠。嗣後軍務情形。均著由四五百里具奏。將此諭令知之。○已卯諭內閣。據欽天監奏。詳查欽定天文正義內載。天地四方昏濛。若下塵雨。不需衣而土。名曰霾。故曰天地霾。君臣乖。大

旱又為米貴等語。本月初八日酉刻。暴風驟至。塵土晦蒙。與正義所載風霾之象相同。朕詳思其義。如前代君臣睽隔。有天子不識宰相之面者。誠不免為君臣乖離之象。我朝家法相承。君臣一體。朕恪遵

成憲。每日召見廷臣不下十餘起。躬親延訪。前席周諮。似與乖離者有別。然諸臣中實與朕同心望治者。不過十之一二。其餘召對時雖虛懷訪問。總以政治毫無闕失。頌美聖明。諛

詞容悅試問其心。豈真以為萬幾成理。無可拾遺補闕者乎。不敢面折。退有後言。總迴護己之爵位。罔恤政之得失。所謂貌合而情睽。是即乖之義也。即諸臣於同寮之中。亦每心知其非。不肯直言。臣正坐視其失而不救。甘為小人之同。而不為君子之和。是亦所謂乖也。嗣後當共矢忠誠。痛改前失。以盡人事。而感天和。宣告在廷。勿負朕意。至米貴之說。亦非無因。米穀為民生日用所需。貴乎流通而不滯。近來京城米禁太嚴。推察其故。守門官弁兵役。因有查拏回漕米石之例。輒將民間買食細米一併緝拏。其實粗米可以回漕者。但經行賄。悉皆賣放。因而米價日貴。所苦者不過貧窘細民耳。嗣後守門官吏。如將貧民買食細米索詐阻拏。審明均著照例治罪。為治以不擾民為先。總期省除煩苛。自成善政也。又諭都察院議處英和及司員增柱等一摺。所議是。此案匿名揭帖。前據英和面奏

訪得張錡形跡可疑。朕屢諭以總須默寫筆跡。背誦語句。悉相符合。方為有據。不可遽事刑求。嗣英和又奏稱張錡供詞狡展。須令跪鍊。審訊並未敢壓損用刑等語。旋據奏張錡俱已承認。請交刑部嚴審。當交軍機大臣會同刑部審訊。行提張錡。即於是日在步軍統領衙門監門外身故。特派秀寧彭希濂親往相驗。據奏實因刑傷潰爛身死。此係初七日之事。次日即有風靈之異。可不畏乎。其所奏張錡俱已承認之處。檢查生供。並未將原帖字句照樣默出。何得謂之承認。且揭帖內所痛詆者。全在蘇楞額一人。張錡與祝麟有嫌。不應全詩八句俱指詈蘇楞額。僅將祝麟之名附寫於後。併無事跡。況咸成帶領張錡估算閘武樓板橋工程。後被駁減。張錡因此銜怨。是張錡與咸成本聯為一氣。更不應將咸成亦開入所詈司員八人之內。是指張錡為此案匿名正犯。毫無證據。承審之員鍛鍊多

日迄無確供。見人已垂斃。遂懲德英和奏交刑部。欲令張錡斃於刑部獄中。以卸其責。實屬任意妄為。郎中增桂。員外郎慶源。四十九主事定住。常祥。俱著照議革職。不准捐復。永不敘用。英和被其欺蒙。著實降二級留任。不准抵銷。嗣後步軍統領衙門審訊案件。取有供詞。俱交刑部定讞。不得過事刑求。致有冤濫。其張錡之弟張舒。著軍機大臣會同刑部傳提到案。再行詳訊具奏。○申明銷燬匿名

揭帖。又諭。匿名訐告。最為人心風俗之害。其意本因挾有私嫌。藉圖傾害。一經查辦。不特所告之人枉受污蟻。並波及案外之人。酷遭拖累。以無名之飛語。令官司荼毒平民。而陰謀者乃袖手旁觀。以快其私忿。其險惡之情。甚於鬼蜮。律載投隱。匿名文書。告言人罪者絞。見者即為燒燬。若將送入官者杖八十。官司受而為理者杖一百。被告者雖實不坐。立法至為明切。嗣後凡有拾獲匿名揭帖者。

著即將原帖銷燬。不准具奏。惟關繫國家重大事務者。密行奏聞。候旨密辦。○命都察院保送巡城御史。並定不職處分。又諭。巡視五城御史審理詞訟。稽查奸宄。近在輦轂之下。責任匪輕。必須品行端方。聽斷明允者。方為稱職。向來都察院遇有巡城缺出。一概列名請簡。並不詳加遴選。如蕭鎮之貪黷營私。蔣詩之昏謬溺職。均有玷風紀之司。嗣後巡城御史缺出。著該堂官於科道內揀選公正廉

明者。每一缺保奏二員。帶領引見。候朕簡用。亦不必拘定曾經巡城次數。該員一年任內。辦理妥協。則已。儻有貪黷如蕭鎮者。將原保堂官交部嚴加議處。昏謬如蔣詩者。將原保堂官交部議處。○又諭。英綬人本平常。前因疏防盜賊降黜。嗣棄瑕錄用。復授為右翼總兵。乃於伊家人達罕呈出余國柄書信一案。不自行具奏。先持向英和商辦。當經降旨逐出乾清門。革去護軍統領。內閣學士。仍留副

都統總兵之任。用示薄懲。茲復聽信家人閭六之言。將開設炭廠之馬泳瑞驅逐。閭六已供認貪得半股買賣。恐英綬竟不免有知情分肥情事。英綬著即解任。交軍機大臣會同刑部審訊。如究有情弊。即行奏請革職嚴審。若訊無別情。英綬亦著在刑部看守。俟拏獲李清彪到日。將全案質訊明確。再行分別定擬。糧馬通判溫盈泉候補通判郭文垣俱著解任歸案審辦。尋奏上。得旨英綬從前屢獲

咎愆。本年春間伊家人達罕呈出都司余國柄書信。不行具奏。即應照福勒洪阿之例。派往新疆換班。念其祇係錯誤。姑從薄懲。此次聽信家人閭六之言。代為驅逐炭行。使閭六得分半股買賣。竟係倚恃總兵。壞法舞弊。實屬卑鄙無恥。恣意妄為。伊父勒保於達罕閭六二事因英綬俱未向其告知。異常憤懣。至於哭泣減食。不孝之罪。英綬豈能自免乎。英綬著發往伊犁効力贖罪。以伸國法。勒保老

病在家不能責處。英綬著刑部堂官將英綬提至當堂傳旨責處二十板。此係朕代勒保以家法責處。再行發遣。○以吏部左侍郎熙昌兼京營右翼總兵。○庚辰。

上詣

黑龍潭神祠拈香。○命

皇次子智親王旻

詣

天神壇定親王綿恩詣

地祇壇慶郡王永璘詣

太歲壇祈雨。○以雨澤愆期。命刑部清理庶獄。○調鑲藍旗漢軍副都統哈寧阿為正黃旗滿洲副都統。以內閣學士奕經兼鑲藍旗漢軍副都統。○辛巳。諭內閣。本月初八日都城風霾之警。朕心震惕。因降旨於近京之馬蘭峪古北口天津等處。徧行查詢。據慶惠奏馬蘭峪地方。是日酉初後風自南方來。塵霾障翳。照窗黃暗。室內猶可辨色。不至燃燭。旋有迅雷。陣雨傾盆。戌初後雨勢疾徐相間。徹

夜不息。徐錕奏。古北口地方。是日酉正初刻。風土自西南而來。其色黑黃。室中尚不至燃燭。聞有雷聲。風氣即散。亥刻降雨。未能及寸。嵩年奏。天津地方。是日並無塵霾。室中明亮。亥初北風大作。雨勢霽霽。自宵達旦。並無雷聲。各等語。本日並據陳預和舜武奏報。山東於初九日自卯至寅。得雨竟日。極為深透。河南各屬亦俱得雨深透。合觀各處奏報情形。初八日風霾並非起於東南。乃自東方而至。

盛京在京師之東。或該處有弊政冤獄。無以上聞。致有此異。著派奕紹戴均元馳驛前往。察詢風霾起自何地。據實具奏。奕紹管理嚮導處。並著順便查看橋梁道路。其該處工程。前派誠安查收。亦恐未能周妥。著奕紹等一併詳細查勘。其隨帶司員。並著馳驛前往。○又諭。順天府所屬州縣。上年春間被旱。秋收亦復歉薄。入冬雪澤優霑。冀望今歲麥秋豐稔。稍蘇民困。乃三春無雨。日來風日暎燥。朕

昨詣

黑龍潭祈雨。蹕路經過之處。所見麥田多未播種。小民口食無資。所納租稅從何而出。近郊如此。各屬情形。可想而知。朕愛恤黎元。施恩惟恐不速。著如恩將順天府屬二十四州縣。本年應徵上忙錢糧。概行蠲免。其業經徵收者。照例劃抵。該府尹等即出示曉諭。俾眾周知。○壬午。諭內閣。御史汪彥博吳杰各奏。應詔陳言。弭變一摺。朕寅承丕緒。奉若

天道。無日不乾乾惕厲。茲蒙

上蒼示警。曷敢不益深祗懼。夙夜修省。惟天下之大。朕一日萬幾。雖孜孜求治。而政事仍恐不免闕失。所賴左右大臣。矢忠直而効贊襄。封疆大吏。重民事而飭綱紀。朕前降諭旨。俱已痛切言之。豈惡聞逆耳之言乎。惟空言無以責實效。必內外臣工。視國事如己事。以民心為己心。如所謂調停諉卸。容隱瞻徇。各積習。痛加肅除。使吏治日清。民生日厚。則轉咎

為祥自克承

天心之仁愛我君臣其交儆焉○又諭御史吳杰條奏事宜一摺其請禁差務之累一款朕春秋巡幸不准派累間閭隨扈大員不敢私受饋賂久經著有明禁惟此次親詣盛京舉行謁

陵大典恐經由道途遙遠該地方官辦理差務或以明歲係朕六旬慶節如該御史所言增設行宮點綴名目並供給扈從各員酒食著先期嚴行飭禁不得稍事浮靡致滋擾累其該省總督藩臬途中車馬供億亦應自行備辦不得取給屬員致令藉詞苛派至捐廉一事久經停止澄汰捐班屢經飭諭均係現行之事其問刑衙門不准擅用非刑如腦箍等項名目著再行申禁以慎庶獄而重民命○命撥京倉粟米一萬石交順天府減價平糶撥天津北倉備賑餘米給直隸歉收地方減價平糶○戶部議准陝甘總督長齡疏報正

寧縣開墾地八十畝照例升科從之○癸未諭內閣昨因風霾示警朕降旨求言原冀聞政事之闕失下民之冤苦令各言官據實直陳乃連日京堂御史中竟有三人以松筠降謫之事為言請仍召還內用者實屬莠言亂政矣上年松筠陳奏阻止盛京謁

陵大典朕欽遵

皇考高宗純皇帝聖訓宣示其罪猶念其陳奏尚在未經明降諭旨以前曲從寬典僅革去

大學士降為二品頂帶仍授以察哈爾都統一品職任此朕準情示罰不得已之苦衷曾令松筠跪讀

聖訓松筠亦惶悚知罪並無幾微負屈之意朕以松筠多年舊臣歲時賞賚無缺意欲俟一二年後仍復召用乃該京堂御史等妄將此事牽引論列以應風霾之異其言太覺支離荒謬矣松筠謫降係上年六月之事彼時何以不見有青災告警且言者果以松筠為屈

抑。又何以去年不交章諫諍。坐待今日乃為此無稽之論。况風霾之象。專為松筠。必無是理。復召與否。其權在上。豈小臣所得干與耶。是言者祇意圖邀名市惠。而並不計及政體所關。國家進退大臣。功罪較然。豈容逞臆妄言。撓朕黜陟之大柄。此風斷不可長。特明白宣諭。言事諸臣。務各屏除偏見。毋徇私好私惡。以淆公是公非。負朕虛懷納諫之誠也。○以戶部尚書盧蔭溥署吏部尚書。○以捕獲

四川果洛克賊番。賞給中果洛克土目索朗丹巴土千戶印信。從總督蔣攸銘請也。○甲申。

孝端文皇后忌辰遣官祭

昭陵。○諭內閣御史王檢奏各直省審案遲延。請遵清理庶獄恩旨一體查辦一摺。直省積案繁多。以山東為最甚。本日據溫承惠奏稱到任未及兩月。接收呈詞已有四百餘件。尚有歷任未結之案四千餘件。其弊由於州縣

疲玩。及該管之府州推諉。現在勒限審訊。分別懲處。直隸積案。雖不若山東之多。而地方缺雨。亦應清理庶獄。以迓祥和。著直隸山東督撫。即飭所屬大小問刑衙門。各將現審案件。迅速審斷發落。牽連犯證。概行查明省釋。不准藉詞延宕。其咨部展限之案。一併清查。審擬。如有抗延不結。據實劾參。以儆怠玩。○舉行嘉慶二十二年軍政。漕標卓異官六員。年老官三員。才力不及官一員。分別議敘處

分如例。○乙酉。

上幸萬壽山詣

廣潤祠拈香。○諭內閣御史張鑒奏風霾變異。敬陳管見一摺。所奏俱屬非是。朝廷簡用職官。量材器使。分班並進。正立賢無方之義。該御史謂方今吏道濁濫。流品混淆。現在內外官吏。並未別闢一途。妄干登進。其言殊覺無當。至御園室宇。不過偶爾修葺。從未添建園座。致滋糜費。即修理廟宇一事。向例每逢

旬慶王公大臣等俱籲請成造佛座以申祝嘏之忱朕以宮中佛座充盈即將造佛之費於京城內外廟宇擇時常親詣拈香者間加丹雘並未別建一處寺觀況現在工作處所窮民借此餬口者正復不少亦可以工代賑若遽行停止豈不更令失所乎其罷貢斥諛一條朕敦崇節儉出於本性來年並不舉行慶典所有金珠玉器陳設等件早經降旨一概不准呈進何待該御史復行陳奏至國家

旬慶及巡幸典禮臣工進獻冊頁自

列聖以來相沿已久朕因近日文體浮縟曾降旨示以頌不忘規之意該御史謂皆係諂媚之詞太不成話矣若東省控案繁多則係官吏疲玩所致非因辦理虧空而起其提取節省銀兩亦非漫無區別此數事均與風霾之異無涉該御史應詔上言不應如此撝拾數陳所奏俱無庸議○鑄給四川鹽源縣新設阿所拉巡檢關防從總督蔣攸銘請也○丙

戊諭內閣給事中周鳴鑒奏刑部主事張鵬昇劣跡素著不應派律例館提調一摺部院堂官選擇司員派充各項差使以資辦公刑部堂官將張鵬昇派充律例館提調自因其尚能辦事其時先充提調之郎中程祖洛祁墳適告假五日各部司員因事暫假事所常有若程祖洛等果因張鵬昇難與共事何難據實稟明今假滿後仍與張鵬昇同充提調其非因此告假情事顯然該御史借此劾奏

實屬深文巧詆如張鵬昇確有劣跡該御史何不據實參奏若云係饋送廣興之人其咎亦不至永不敘用況亦非張鵬昇一人不能因該御史一言輒行黜退使各堂官進退屬吏無所適從周鳴鑒原摺著擲還○舉行嘉慶二十二年大計山東卓異官十二員不謹官一員有疾官二員年老官七員廣東卓異官十二員不謹官四員罷軟官一員才力不及官一員年老官七員有疾官一員浮躁官

一員。廣西卓異官八員。才力不及官三員。年老官三員。有疾官二員。浮躁官一員。分別議敘處分如例。○前任西寧辦事大臣福克精阿。以失察家人得贓。降六部郎中。○丁亥。

上詣

時應宮拈香。○還宮。○諭內閣。王鼎等奏覆查文安縣風霾情形一摺。前據該府尹等奏。據文安縣稟報。本月初八日。縣屬地方西南大風。自己至申。始而晦黑。繼而紅黃。共有四

時。茲派員前往覆查。是日已刻起西南風。天氣陰黃。午後稍息。酉刻風沙飛颺。黃中帶紅。半時即止。並未晦黑。亦無四時之久。該縣原報聲敘含糊。請交部議處。文安縣知縣胡運隆。於風沙情形。將陰黃敘為晦黑。雖屬錯誤。若將該員議處。恐嗣後州縣官於稟報地方情形。習為粉飾。致啟諱匿之弊。胡運隆著毋庸交部議處。○以山東巡撫陳預不能整頓地方。命來京署兵部左侍郎。尋降三品京堂。

調河南巡撫和舜武為山東巡撫。廣東巡

撫陳若霖為河南巡撫。以署禮部右侍郎李

鴻賓為廣東巡撫。予陝西陣亡已革守備

陳嘉謨祭葬。世職如例。予福建協捕洋匪

被害義民陳鳳黃興祭葬。世職如把總例。

蠲緩直隸清苑滿城安肅定興唐博野望都

容城完雄祁安高陽新城獲鹿井陘行唐靈

壽元氏贊皇新樂定曲陽武強東鹿蠡深澤

正定晉藁城平山阜平樂城無極河間肅寧

任邱獻阜城故城東光交河景吳橋寧津滄

南皮青靜海鹽山慶雲深饒陽安平冀新河

武邑衡水棗強南宮易涞水六十二州縣旱

災。風災新舊地糧旗租。○以祈雨。

三壇齋戒一日。戊子。

上詣

天神壇命儀親王永璇詣

地祇壇成親王永理詣

太歲壇祈雨。○命

皇次子智親王旻寧詣

黑龍潭皇四子綿忻詣

覺生寺祈雨定親王綿恩祭

宣仁廟 幸圓明園 旌表守正捐軀甘肅

會寧縣民袁定妻白氏雲南文山縣民馬明

五妻馬氏 己丑命內閣學士載銓詣密雲

縣

白龍潭祈雨 改鑄湖南宜章營中軍守備

關防從總督慶保請也 庚寅諭內閣本月

初八日酉刻都城風霾之警朕心震惕降旨

於近畿一帶徧行查訪總未得悉風所自起

本日據陳預奏山東海豐濱海地方於四月

初八日申刻東北風大作晝夜無息初九日

海潮驟至漫淹灘地鹽場沿海居民人口房

屋多有損傷等語海豐在京城之東是日申

刻海風暴起瞬息千里至酉刻適至京師是

以沙塵蔽空竟同晝晦該處沿海居民猝被

風災深堪憫惻業經陳預飭令藩司廣慶前

往查勘著和舜武於到任後督飭該藩司迅

速確勘據實奏明妥為撫卹毋使災民失所

用副朕惠愛黎元至意 以雨澤愆期免順

天良鄉固安永清東安通三河武清寶坻寧

河昌平順義密雲懷柔涿房山霸州安大城

保定薊平谷遵化玉田豐潤二十四州縣本

年旗租並緩徵節年地糧旗租 辛卯予故

御前侍衛桑吉斯塔爾祭葬如副都統例賞

銀三百兩治喪 壬辰

上幸靜明園詣

龍神廟拈香 命

皇次子智親王旻寧詣

黑龍潭皇四子綿忻詣

覺生寺謝雨 旌表守正捐軀安徽靈璧縣

民趙廣居妻壽氏 癸巳

上詣

時應宮拈香 還宮 以故雲南浪穹縣江

嘴土巡檢何天泉子夢熊襲職 以得雨報

謝

三壇齋戒一日○甲午

上詣

天神壇命儀親王永璣詣

地祇壇成親王永瑛詣

太歲壇謝雨定親王綿恩詣

宣仁廟拈香○辛酉明園○乙未以左春坊

左庶子惠端右春坊右庶子德寧翰林院侍講恩貴詹事府左中允恒山充日講起居注

官○以翰林院編修熊常鐸為雲南鄉試正

考官王統仁為副考官戶科給事中周鳴鑾

為貴州鄉試正考官刑部主事張志康為副

考官○丙申

上御勤政殿聽政○諭內閣成格奏審擬天主

教人犯一摺此案內王溫新許裕二犯沿習

天主教曾於乾隆四十九年嘉慶四年間先

後改悔乃因見侯奇太家經像故智復萌仍

又習教其罪較侯奇太等初犯者為重著刑

部覆議將該二犯加重定擬具奏○軍機大

臣刑部審擬誣告叛逆一案得旨此案喻庸

鯤因挾雞姦田林不遂被田三錫等毆打之

嫌輒誣控田三錫等為叛逆並將素有微嫌

之錢堯茲等一併牽控拖累無辜至數十人

之多又誣指錢堯茲之父為逆黨以致屍棺

均被開驗險惡已極喻庸鯤著即處斬派侍

郎彭希濂前往監視先將該犯重責三十板

再行正法案內被累之人除已經釋放者外

其現在到案質訊之人俱傳至法場令其環

視以伸眾忿環視後均即予省釋仍將喻庸

鯤傳首直隸元城縣犯事地方梟示儆眾○

諭軍機大臣等朕聞山東滕縣東阿汶上荏

平高唐息縣一帶近有匪徒或五六人或八

九人塗面執械搶奪商旅甚至打傷事主將

車輛徑行趕去實屬目無法紀有淮安營守

備在高唐州被劫受傷報經該州緝拏未獲

至孤單行旅被劫後以報官轉至拖累遂不

呈報地方官並不認真緝捕。但於驛店張貼告示。禁止店家放人早行。而沿途窩鋪卡堡大半傾圮。並無兵役巡查。以致東南孔道竟成畏途。過往車輛。非結幫不敢行走。東省為南北通衢。盜賊如此公行劫奪。大為行旅之害。前據陳預奏。汶上縣近有盜窩。已督同臬司溫承惠。派委幹員馳往查拏。著和舜武到任後認真查辦。責成各地方官實力捕拏。將各案盜犯勒限緝獲。按律嚴懲。以靖地方而安行旅。其有任意廢弛。並縱容捕役誘盜殃民者。立即嚴叅示儆。毋稍姑息。將此諭令知之。○以國子監祭酒善慶為詹事府詹事。通政使司副使齡椿為太僕寺卿。○丁酉。諭內閣。據李振祐奏。上年浙江回空漕船在東境帶貨逗遛月餘。在後各幫以次積壓。致脫空二十餘日。請將江浙回空軍船責成各糧道押尾催趲。毋得半途漫越前行。其江廣軍船漕臣押至黃林莊。即派叅遊大員催趲出口。

等語。上年浙江回空幫船在途逗遛月餘。自係李奕疇於中途漫越先回。僅諭令該弁丁等隨後趲行。該幫船因無人約束。遂致任意遲延。嗣後回空軍船。著該漕督率領各糧道押尾緊催。不得於中途漫越先行。務將各幫船全數及早催出江口。勿誤新運兌開之期。以肅漕政。○旌表守正捐軀江蘇山陽縣民裴廣妻周氏。○是月。新調山東巡撫和舜武奏謝得旨。山東最為難治。官吏疲玩。捕役養賊。民刁健訟。兵弁懈弛。而拽刀手。虎尾鞭。紅鬚子。鹽梟各項匪徒。公然白晝攔搶。以致道路戒嚴。成何世界。尚有待時而動之邪教隱躍其間。每思及此。寢食不安。汝須大加整頓。嚴緝匪徒。盡心竭力。毋負委任。勉之。

大清仁宗受天興運敷化綏猷崇文經武孝恭
勤儉端敏英哲睿皇帝實錄卷之三百四十一

實錄卷之三百四十一

十一

大清仁宗受天興運敷化綏猷崇文經武孝恭
勤儉端敏英哲睿皇帝實錄卷之三百四十二

校修

嘉慶二十三年戊寅五月戊戌朔諭內閣朕

前閱范祖禹唐鑑見其摘取有唐事蹟論列
得失有裨治道因命館臣倣其義例作為明
鑑一書蓋以取鑑前代其善政則因以為法
其秕政則用以為戒亦即殷鑒夏周鑒殷之
意也昨日館臣呈進明鑑五冊於萬歷天啟
閒載入我朝開創之事後加按語頌揚併論
及前明用人不稱其職更為誕妄矣我
祖
宗開基遼瀋其事備載於

實錄

聖訓及

開國方略

豐功

偉烈億禩光昭至明鑑乃係論列有明一代事蹟之書摘取一事借鑑得失非若編年紀月事事臚列今以興朝之

隆業載入勝國卷中於體例殊為背謬如該總裁等豫行請旨朕必將不應編載之故早為

指示乃並不奏明率行纂輯實屬冒昧所有該館總裁曹振鏞戴均元戴聯奎秀寧俱著交部議處總纂官朱珔纂修易禧善張岳崧俱著交部嚴加議處原書著發交該館另行纂輯進呈此數節按語係何人所撰著軍機大臣查明先行具奏○又諭陳預自簡任山東巡撫以來漫無整頓從前和舜武程國信分任藩臬時地方積案漸清京控亦少迨伊二人升任後臬司張五緯不能稱職陳預亦

毫無振作吏治日形疲玩溫承惠接任臬司積案已有四千餘件之多而來京控訴者仍絡繹不絕且滕縣高唐一帶驛路盜賊公然塗面執械搶奪商旅州縣官不認真緝捕但於驛店張貼告示禁止早行昨召見浙江藩司伊什扎木素據奏伊過東省時親見驛店告示沿途劫案頻聞行旅皆有戒心東省地方廢弛至於如此巡撫何所辭咎陳預豈能復勝京堂之任現在吏部因鄆城縣捕役秦

賊上司不行叅劾一案將陳預議以降調無級可降應行革任本應即照部議革職姑念其由刑部司員出身於刑名尚為熟習格外施恩陳預著以刑部郎中降補勉圖自効○己亥諭內閣朕前降旨令纂輯明鑑一書其體例本倣范祖禹唐鑑乃史論一類非編年紀事之書也唐鑑卷帙本簡今所輯明鑑殆倍過之但圖篇帙繁富於不應載者亦按年編入其於體例先未精審以致詞義紕繆大

乖立言之旨。昨已降旨將總裁總纂纂修各官交部分別議處。此書著改派托津章煦英和盧蔭溥和寧充總裁官。另派纂修承辦所有原辦之書無論已進呈未進呈俱著另行編輯改正。務歸簡要。其從前纂辦此書支過一應公費紙張銀兩俱著曹振鏞戴均元戴聯奎秀寧四人賠繳示罰。○給山東海豐霑化利津三縣被水災民並竈丁一月口糧。○庚子。

孝誠仁皇后忌辰遣官祭

景陵○諭軍機大臣等。方受疇奏於初三日由保定起程前赴通永一帶遵旨查勘一切情形。朕聞通州於四月初九日東門內失火。延燒至鼓樓焚燬房屋至千餘間之多。方受疇道經通州即親赴察看。如有被焚無業貧民應行撫卹者奏明酌加撫卹。該督再由彼直至山海關將沿途雨水禾苗地方民情及工程橋道逐一詳查到關後並派妥員出關將

關外百里內外情形一併查明方受疇即行來京詳悉面奏。本日辰時密雨霑濡至午時益覺稠密陰雲普被沐澤必廣。此次各處得雨情形先行據實具奏將此諭令知之。○旌表守正捐軀河南淮寧縣民張華彩妹張氏。○壬寅。

上幸萬壽山○諭內閣本日據富俊奏奉天所屬地方本年二月間雪澤甚優三月雨水稀少。四月初九二十一二等日得雨二三

寸至四五寸不等。附近省城一律普被甘霖。二麥暢茂。大田俱已出土。糧價平減。地方寧謐等語。此皆仰賴

列祖默佑

昭鑒朕本年恭謁

三陵敬展孝思特

錫以康年俾陪都臣庶共享盈寧之福樂伸瞻就之忱至關內田禾情形雖少次於關外然永平遵化府州各屬上年秋收俱總節據方

受疇富蘭誠安等奏報。四月以後自玉田以至臨榆均經得雨。自四寸至深透不等。是今秋蹕路所經之地俱已甘雨應時。禾苗芄茂。秋成可卜。惟近畿數百里內雖連次得雨。尚未十分霑足。乃一二膽大包天之狂徒。輒借災歉為辭。意欲阻止謁

陵大典。現在麥收荒歉之區。不過順天府屬及保定各州縣。昨已降旨。將本年上忙錢糧旗租全行蠲免。積欠糧租一併緩徵。此外直隸

豐收之處甚多。著方受疇查明災歉之區。無庸派辦差務。令豐收各州縣均勻協濟。如此酌盈劑虛。亦不致重勞民力。特此明白宣諭。俾中外臣民咸知朕展謁

三陵上協

天心。下卹民隱。實非遊觀巡幸可比。自此次降旨之後。若再有飾詞諫阻者。則是欲陷朕於不孝。朕惟有敬遵

皇考高宗純皇帝聖訓。律以悖命之罪。將該員

即行正法。不能曲為寬貸也。即面從腹非之徒。朕若查知。亦不姑恕。將此旨通諭中外。知之。給山東樂安縣被水災民一月口糧。○癸卯諭內閣。吏部奏議處纂輯明鑑之總裁。總纂纂修一摺。朕前降旨。命館臣纂輯明鑑一書。其體例原全倣范祖禹唐鑑。乃館臣等意圖卷帙繁富。以為書成奏請議敘地步。遂規倣通鑑輯覽敘次。凡書內

御批之關涉明代者。全行恭載。迨纂至萬曆天

啟年間。又不請旨。輒以興朝之

隆業載入勝國卷中。以致按語措詞乖謬。該總裁等均有應得之咎。此內秀寧係滿洲大員。武不能教訓兵丁。文不能編纂書史。况於國朝事實。尤應加意審慎。乃漫不留心。其咎更重。秀寧著降為頭等侍衛。前往新疆換班戴均元。本有革職留任之案。部議降三級調用。無級可降。著加恩仍改為革職留任。曹振鏞戴聯奎俱著加恩改為降三級留任。編修張

岳崧撰擬按語論明熹宗用人不當已屬失辭又以熊廷弼比方李光弼尤為紕繆著即照部議革職易禧善纂輯明神宗朝事蹟按語頌揚本朝雖乖體例詞句尚無大謬著從寬改為革職留任侍講朱珪此數卷按語皆非其所撰惟覆校時不為改正亦屬疏忽著從寬降為編修以示薄懲○轉刑部右侍郎廉善為左侍郎調兵部右侍郎穆彰阿為刑部右侍郎盛京工部侍郎明興阿為兵部右侍郎以內閣學士同麟為盛京工部侍郎○以工部左侍郎德文為翰林院掌院學士刑部左侍郎廉善教習庶吉士○調鑲白旗漢軍副都統德文為正紅旗滿洲副都統以兵部右侍郎明興阿兼鑲白旗漢軍副都統○命英吉沙爾領隊大臣烏爾額爾回京以頭等侍衛秀寧為英吉沙爾領隊大臣○甲辰諭內閣朕五旬慶辰近支親郡王之在內廷行走者俱曾優賞銀兩明歲朕六旬慶辰更

宜推廣恩施凡近支親王郡王貝勒貝子各均各分別錫賚儀親王成親王慶郡王永璘定親王綿恩著每人賞銀一萬兩綿志綿懃奕紹著每人賞銀三千兩奕綸奕繪奕綺綿懋著每人賞銀二千兩奕緒載錫綿恩著每人賞銀一千兩俱由廣儲司給發用示朕敷恩施慶加惠宗支至意○又諭奕紹等奏查明奉屬出示緣由並錦縣辦差情形一摺前聞盛京辦理差務將軍富俊等出示科派有按畝攤錢之語特派奕紹戴均元前往查辦茲據查明抄錄原發告示進呈內稱朕臨御以來於嘉慶十年舉行謁陵大典至明歲已逾十二年始又舉行一次尤非尋常臨幸別省可比凡在旗民渥被恩施分應一體當差其言甚屬光明正大錦縣知縣張國泰錦州協領愛明阿墊辦差務係循照上次章程辦理並無按畝攤錢之事惟不應設席演劇邀請商民殊為失體奕紹等請

將張國泰愛明阿交部議處著俱改為察議其該管副都統文孚知府德蔭並無不合均無庸察議○又諭長齡等奏查明鎮將不和請旨調補一摺陝安鎮總兵劉管城於本年正月初二日向各營員賀年各營員因初三日係素服之期於初四日前往答謝甚為合禮乃該總兵嗔其來遲輒傳至鎮署嚴加申飭已屬任性又因遊擊趙啟貴等係由新兵鄉勇出身任意斥辱以致趙啟貴等被辱不甘俱告病假各省武職大員由兵丁鄉勇拔擢者甚多劉管城如此肆意欺凌其乖謬更甚劉管城著交部加等議處至趙啟貴等因被上官之辱託病告假並無頂撞咆哮情事未為失禮趙啟貴高聯陞段永福俱著無庸議處○以新授盛京工部侍郎同麟親老命留京為禮部右侍郎調禮部左侍郎多山為盛京工部侍郎轉禮部右侍郎哈寧阿為左侍郎○以刑部右侍郎穆彰阿為武英殿總

裁官○調正黃旗漢軍副都統裕全為正紅旗滿洲副都統以戶部郎中英惠為正黃旗漢軍副都統○調陝西西安鎮總兵官齊懷為陝安鎮總兵官以陝甘督標中軍副將張拱辰為西安鎮總兵官○命撥京倉粟米六千石交順天府於烟郊夏店三河南石槽懷柔一帶分廠減價平糶○乙巳諭內閣蔣攸銑奏籍隸本省遊擊朦混留升參將請旨註銷一摺四川黎雅營遊擊黃玉堂前在都司任內奏准留川係指免推別省遊擊至升補參將例應迴避本省豈得朦混仍留四川該遊擊盤踞省城多年輿論不平黃玉堂著註銷准升參將原案即飭回遊擊本任永不准署省標各缺如再查有劣蹟該督即行據實嚴參○以候補侍郎劉鏞之署兵部左侍郎以翰林院編修邱家煒為廣東鄉試正考官內閣中書魏茂林為副考官翰林院編修邱煌為廣西鄉試正考官兵科給事中倪璣

為副考官翰林院編修張敦頤。為福建鄉試正考官內閣中書陳詩為副考官。○旌表守正捐軀江蘇通州民傅正方妻王氏。○丙午諭內閣慶保等奏湖廣行銷淮引界內有淮鹽艱運維艱之永州寶慶二府請就近改食粵鹽。鄭陽一府請就近改食潞鹽。宜昌一府請就近改食川鹽等語。准鹽行銷地界係百餘年久定之例。近日楚省地方官不能實力緝私。以致鄰鹽浸灌額引缺銷。乃輒議將楚省四府准鹽引地改食鄰鹽。不知私鹽充斥之區。全賴自固藩籬。若退讓一步。必愈致進侵一步。是何異引盜入室。自撤藩籬乎。所奏實屬紕繆。慶保張映漢俱著交部議處。該督撫惟當督飭地方文武員弁實力緝拏。私梟以護引地。如再不認真查辦。仍前疏縱。定行懲處不貸。並知會孫玉庭阿克當阿。遵守原定界址。不得輕改舊章。致滋流弊。○丁未旌表守正被戕吉林民劉起妻王氏。○命再撥

京倉麥五千石。粟米五千石。交大興宛平三縣分廠減價平糶。○戊申。

上辛靜明園詣

龍神廟拈香。○諭軍機大臣等。阮元奏再陳豫防喉咭喇事宜一摺。國家撫馭外夷。具有定規。制尺寸不可稍踰。遵守者懷之以德。干犯者示之以威。喉咭喇在粵貿易。其貨船及護貨兵船停泊處所。久有定例。如該夷人恪守舊章。照前貿易。仍當一例懷柔。若該夷人不遵定制。妄希進口。有違禁令。亦先當剴切曉諭。宣示德威。妥為鎮撫。以杜其覬覦之心。儻竟敢恃其强悍。揚帆直進。擅越界址。則不能不開礮轟擊。使之懾我兵威。總之懷遠之道。當先以理勝。使直常在我。則彼無所藉口。斷不可孟浪從事。先啟兵端。亦不可過示怯弱。使彼無所畏懼也。將此諭令知之。○庚戌遣官祭關帝廟。○予福建出洋淹斃外委謝得高祭

葬世職額外外委李新榮兵丁劉高等七十
一名賞卹如例○辛亥諭內閣工部奏此次
王牒遵於行宮安奉其尖站及宿站內未設行
宮處所仍應照歷屆經由道路修墊所奏甚
屬非是朕於七月二十二日啟蹕恭詣盛京
謁

陵二十八日王大臣等即恭送

王牒前赴盛京相距僅止數日

王牒自應由御道行走其未設行宮處所豫備

綵棚應即搭於御道之旁乃工部率准照歷
屆經由道路另行修墊明係為重開經費地
步而且重勞民力所有承辦此案稿件之工
部司員著交部議處率行陳奏之各堂官著
交部察議○又諭據吳邦慶奏汝寧府知府
缺出請以河工出力留豫候補知府婁青陳
在中二員開單請簡等語汝寧府係請旨簡
放之缺例不准由外省奏補婁青陳在中二
員均由河工出力保奏留豫如有該省沿河

知府缺出尚可奏明請旨汝寧非沿河之缺
該地方要務如緝匪緝私俱非河工人員所
能熟悉何得藉詞請補吳邦慶所奏著不准
行○旌表守正捐軀山東汶上縣民孫保德
妻王氏○癸丑

上還宮○諭軍機大臣等慶保等奏覆查湖北
虧缺實數籌議勒限追補章程一摺湖北各
屬倉庫虧缺無著銀五十五萬八千餘兩於
嘉慶十二年經該督撫奏請分十二限彌補
除已完四十萬一千餘兩外尚有三限未完
銀十五萬六千餘兩嗣又據阮元等查出十
二年以前有各屬原報遺漏及抵交什物朽
壞變為無著銀七萬八千餘兩此項銀兩係
十二年清查以前漏報者仍屬舊虧今續經
查出准其同前三限未完銀十五萬六千餘
兩一併扣至二十五年五月底彌補全完其
十二年以後至二十年分各屬又有挪缺銀
六十六萬餘兩此則全屬新虧該省督撫藩

司自十二年清查之後並不認真截流以致舊虧未完新虧又增似此輾轉相仍伊於胡底該州縣等如此玩愒成風其罪尚有何可原慶保張映漢雖先後將王澍方遵轍樊鍾英三員參辦此六十六萬虧缺之款豈盡伊三人任內之事念其人數衆多雖不將該員等一概革職拏問監追著慶保等即切實查明十二年以後至二十年各州縣所虧銀兩有可著追者儘數實力嚴追不准予限八年扣至二十九年五月賞限四年追繳完款其無著者交慶保等將自十二年奏辦清查之督撫藩司起以至二十年以前接任之督撫藩司止各按在任年月久暫擬開清單分別著賠以示懲儆亦賞限四年統於二十九年五月內全數交清至該省各屬常社等倉十二年清查案內未完三限米穀價銀十二萬一千餘兩仍著照原定限期扣至二十五年五月全數追繳其此次續經查出常社二倉

挪缺穀石未完價銀十三萬九千餘兩即照該督等所請予限八年自二十五年五月起至三十三年五月一律追補全完每年察看秋收情形於軍需動缺穀石買竣後接續採買以歸實貯其節年奏銷案內未完民欠自元年至二十年尚有一百餘萬兩之多其奏明因災展緩者均有奏案可稽此外如查有私收包庇情弊立即嚴拏究懲該督等現在派員確查著限於年內一律查竣據實覈辦不可稍有含混○以夏至祭

地於

方澤自是日始齋戒三日○甲寅諭內閣朕本年祇謁

三陵業經諏吉降旨值初夏雨澤愆期朕心焦廬因令奕紹戴均元於盛京查辦事件之便沿途察看地方情形茲據奏四月二十一二十三等日途次連獲甘霖自錦州迤東經過廣寧縣新民屯承德縣各境俱各得有透雨

又於本月初十一等日。甘霽連綿。尤十分
霑足。春麥現已吐秀。大田亦長發暢茂。可卜
有收等語。此皆仰賴

列祖垂庥

昭鑒朕之微誠。致此渥澤。曷勝欽感。並據奕紹
等查明富俊現辦差務。較嘉慶十年舊定
章程。均有酌減。富俊人本樸實。此次均照舊
章。併無增飾華靡。加派累民之事實。屬可嘉
將此通諭中外知之。○又諭。前據御史李廣

滋奏。盛京辦理差務。張貼告示。有按畝攤錢
抗違治罪之語。蓋平海城二縣各派錢數十
萬串。錦縣則演劇設席。勒派紳衿鋪戶湊交
銀兩。當派奕紹戴均元帶領該御史前往查
辦。昨已據奕紹等查明。錦縣並無勒派之事。
其富俊等原發告示。亦抄錄進呈。與該御史
所奏不符。茲復據查明。蓋平海城二縣俱係
派辦道路。因例須先行墊辦。事竣領價報銷。
是以各向錢店當舖立約借錢。差後歸還。並

無派斂錢文數十萬串。藉肥私橐之事。朕於
嘉慶十年恭謁

祖陵。迄今已越十二年。始再舉行盛典。奉天各
屬士民踐土食毛。沐浴膏澤。欣逢朕臨。涖陪
都灑道清塵。即相率捐輸。亦所樂為。况相沿
舊例。借墊差費。該商民等無不踴躍從事。並
未聞有呈控派累者。乃該御史撫拾浮言。冒
昧陳奏。豈非導小民以長刁抗之風。李廣滋
不勝御史之任。著徹回原衙門。仍以編修用。
嗣後翰林院保舉御史。當遴選才識學品堪
勝言職者。慎重保送。毋得濫舉充數。○舉行
嘉慶二十二年軍政。四川卓異官六員。年老
官二員。有疾官二員。罷軟官一員。浮躁官一
員。才力不及官二員。分別議敘處分。如例。○
丙辰夏至祭

地於

方澤

上親詣行禮。○幸圓明園。○丁巳。以故輔國將

軍永淳子綿鈐降襲奉國將軍○予故理藩院尚書博興祭葬賞銀二百兩治喪○戊午諭內閣御史卿祖培奏武職都司以下各官請照文職一體欽派大臣公同揀選一摺當奏上時朕即以其言為是批交大學士軍機大臣會同兵部議奏茲托津等議覆應如所奏辦理向例文職揀發各官佐雜微員尚奏請欽派大臣揀選武舉於會試後揀選營衛亦由兵部奏派王大臣考驗何獨於武職都司守備轉由兵部堂官自行揀選辦理原不畫一自應一體欽派大臣公同揀選以昭公慎卿祖培此奏毫無私見甚屬可嘉言官陳奏事件總當屏除私念如果出於至公實能有裨國事朕必鑒其悃誠降旨嘉許立予施行若聽囑徇私亦不能曲從所請沽納諛之名誤國家之政也○刑部議覆四川總督蔣攸銑疏報民人楊道虞戕傷服兄楊道雙身死一案得旨此案楊道雙與大功服弟楊道

虞之妻張氏通姦敗露楊道虞將張氏毆責張氏立誓拒絕絕業已寢息後因楊道雙潛至張氏房後簷下站立楊道虞瞥見料其復來續姦即用刀戕傷楊道雙殞命楊道虞刃斃大功服兄如果於撞破姦情之日登時戕斃是謂激於義忿業已隱忍寢息復因在伊妻房後簷下站立用刀戕斃則殺非姦所亦非登時若楊道雙與楊道虞居住遙遠忽於數里外黃夜潛至張氏房後躲匿尚有圖姦形跡可指今楊道雙與楊道虞本係貼鄰焉知非偶由張氏房後經過楊道虞因疑生忿遽行殺害即供詞內是日飯後楊道雙曾與張氏會遇有欲與續舊之語此言是否張氏當時告知同室之人抑係楊道雙身死之後方有此語或張氏意存護夫於事後裝點亦未可定楊道雙被戕後延至半月方因傷身故曾否取有生供事關倫紀必當切實查明以成信讞著蔣攸銑再親提此案犯證覆加研

訛據實具奏○諭軍機大臣等朕聞山東近年以來吏治廢弛州縣官因循疲玩積習牢不可破於上司全無畏憚昨李鴻賓來京召見據奏伊在東審案於應提人證提催不到咨行陳預飭提仍復遲延不解是該州縣於欽差巡撫均無畏懼之心抗玩若此尚復成何吏治和舜武到任後須大加整頓查明州縣中怠玩尤甚者指實奏革數員以警其餘庶可挽回惡習至東省盜風甚熾行旅戒嚴實因各州縣衙役內即有為盜之人所有境內盜賊皆其包庇平日坐地分贓遇案緝拏則潛通信息令其先期遠遁是以盜劫之案十無一獲該撫當嚴查密訪將衙役內身為盜賊及通盜泰盜者緝拏到案盡法懲治庶剷其根株則餘匪知懼可冀盜風日戢也再本年四月海豐一帶猝被風災其塵霾所及數百里吹至京師尚至晝晦數刻則其初起之地激盪海潮淹浸者自必甚重著該撫再

行確查如藩司廣慶前奏撫卹業已周遍則已若尚有隱漏即據實奏請候朕施恩無稍諱飾至祝現等六逆斷不可任其漏網該六逆雖未必全在東省然數年來察看蹤跡在東省潛匿者必居其半昨降旨停緝餘匪該逆等見近日緝捕漸寬自不似前此藏身之固正可密加偵緝以期弋獲該撫不可存欲速之見亦不可心存怠忽將此事竟視同海捕也將此諭令知之○以翰林院侍讀德寧

為湖南鄉試正考官刑部主事馬毓林為副考官翰林院侍講顧元熙為四川鄉試正考官編修顏伯燾為副考官○以河南按察使琦善為江寧布政使太僕寺少卿敦良為河南按察使○己未緩徵山西麥收歉薄之陽曲太原榆次徐溝靜樂五縣本年額賦並帶徵額賦米豆○庚申
孝恭仁皇后忌辰遣官祭
景陵○

上幸靜明園詣

龍神廟拈香○諭內閣據宗人府奏鎮國公

永康守護

東陵三年期滿一摺永康係二十三貝子之孫

自伊祖父守護

東陵已歷多年諸務諳習况其京中府第業經

交官若將其更換來京轉恐不免拮据永康

著加恩毋庸更換令其永遠守護

東陵永錡俟年滿時再行照例具奏○又諭董

教增奏審擬已革守備蔡必達請免其治罪

作為兵丁効力一摺此案已革守備蔡必達

於本管洋面商船兩次被劫既不追捕盜犯

事後又諱匿不報此等怯懦之員豈可復令

留伍食糧蔡必達著即在本汛地面枷號三

箇月滿日發往伊犁以示懲儆嗣後巡洋官

弁有似此玩視捕務者俱照此辦理○給直

隸坐落災地各營兵平糶米石○辛酉諭內

閣健銳營前鋒穆圖杭阿毆傷伊父一案該

管大臣請將該翼長章京等交部議處奏上

時朕當諭令兵部查例具奏茲據該部查明

旗營及各省駐防遇有蔑倫之案該管官例

無處分並查地方蔑倫案件府州縣等亦無

議處定例官員於所屬旗民失誤公事不能

約束訓誡自應加以懲處若旗民私家事務

該管官安能一一查及即謂翼長等有管教

兵丁之責亦斷無慮及其毆辱父母豫為教

戒者該管大臣未能區別公私但以一經叅

處自占地步於事理殊未允協所有穆圖杭

阿該管翼長章京等俱著免其議處嗣後遇

有此等事件均毋庸將該管官奏請交議○

予遇賊不屈被戕甘肅皋蘭縣陰陽學訓術

劉尚傑入祀忠義孝弟祠從陝甘總督長齡

請也○壬戌諭內閣綿課等奏恭修

玉牒告成請將功課最多各員於一等之中予

以格外從優餘俱列為一二等給予議敘一

摺

玉牒篇頁雖繁中多空白之處以字數覈計較之他項書籍功課實少所有提調纂修督催收掌謄錄等官以及供事人等均不准從優俱歸入一等內與二等人員分別議敘嗣後宗支蕃衍如卷帙倍增再行加恩○以玉牒告成總裁莊親王綿課以下賞賚有差○癸亥諭內閣富俊等奏盛京及所屬州縣於四五月間普被甘霖極為深透霑足二麥籽粒堅實田苗暢茂糧價平減地方寧謐等語

此皆仰賴

列祖默佑

昭鑒朕本年恭謁

三陵敬展孝思特

錫以康年俾陪都士庶均沾樂利富俊平素為人樸直毫無欺隱粉飾之詞此實朝野所共信乃御史李廣濬前奏盛京辦理差務張貼告示按畝攤錢科派累民其意不過藉此為詞阻撓謁

陵大典經奕紹戴均元帶同該御史逐一查明所奏俱屬虛誣以該御史陳奏不實降旨徹回原衙門以編修用復據奕紹等奏途次有廣寧民人李齊家呈控鄉約趙魁派夫折錢一案訪明李齊家與李廣滋同族於廣寧途中曾經相見奏交富俊等審辦茲據富俊等向李齊家搜出寄伊子李九韶家信內稱初八日下午晚在新民屯見過御史與御史說明復向李齊家究詰據供伊係李廣滋族姪曾於廣寧途次謁見李廣滋商量遞呈添改處係李廣滋親筆等語李廣滋身為御史膽敢與族人李齊家朋比為奸代為添改呈詞必欲實其前言阻撓大典是何居心謬妄已極著派穆彰阿即日馳往前途傳旨將李廣滋革職鞫問解送刑部交軍機大臣會同刑部嚴審定擬具奏尋奏上得旨改發烏魯木齊効力贖罪○又諭和舜武奏勒限清釐積案並京控案件酌議分提審辦一摺山東訟案

紛繁皆由地方官平日怠於聽斷以致日久延擱愈積愈多亟應上緊清釐著即照所請按起數之多寡分別勒限審結該撫仍隨時查察其因循玩泄之州縣即照易結不結例叅處至京控交審各案錢糧專交藩司親審命案專交臬司親審兼涉錢糧人命者巡撫親提審訊如檄提犯證州縣抗延不解立即指名嚴叅仍遵照十九年諭旨每月將已結若干起未結若干起自行具奏該撫等總當

秉公研鞫亦不可一味欲速草率定案儻審結之後兩造未能輸服又復翻控仍與未結無異如果該撫等辦理認真積案全清朕仍必施恩甄敘以示獎勵○諭軍機大臣等御史王允輝奏近日東省窩賊之家多有冒捐功名勾通州縣吏役相與袒護地方官為吏役蒙蔽或捏飾不報或改盜為竊並訪聞齊河縣有訓導李淳琳被盜之案報縣後被該縣勒留數日典史賠銀了事長山縣孟王莊

腰莊朱博寨等處有一夜連劫之案具報後該縣勒令事主改盜為竊並訪聞新城縣張官莊王姓高苑縣范家村之范秀孫家集之孫瞻汝均係窩主高苑縣捕役張懷德又係總窩請飭查辦等語東省近日盜劫頻聞乃竟有窩盜之家捐納職官與吏役交通庇護受賄分贓亟應嚴行查辦此等奸民在家時即以窩盜為事冒捐職官較之倡優隸卒尤為汙賤若令濫入仕途尚復成何事體著和

舜武即督率臬司溫承惠實力訪查嚴拏重懲勿令漏網其齊河長山諱盜賠贓各案及新城高苑等處窩盜各犯一併查訪明確緝拏到案按律嚴辦不可稍存姑息將此諭令知之○旌表守正捐軀山東新城縣民董二喜妻劉氏單縣民尋尚魁女尋氏○甲子諭內閣長齡奏審明雲騎尉江芝捏名揭控總兵游棟雲一案按律定擬一摺此案江芝以世職撥鎮標差委因弓馬生疏屢經游棟雲

責處本係咎有由取節次派赴臺站當差日久未換執敢挾此微嫌起意填砌重款假捏他人姓名揭告已屬險詐乃於驛遞奏事文報內潛將呈詞裝入直達御前尤為膽大較之尋常匿名告言人罪者情節更重該督將該犯依律問擬絞候將來歸入秋審情實亦必予勾江芝著即行處絞以昭炯戒游棟雲違制坐轎例應革職其私役兵丁及家人僕婦帶領子女觀操皆其罪之輕者游棟雲前

已降旨點革念其曾在軍營著有勞績遽予廢棄亦覺可惜著加恩賞給經制外委交與楊遇春標下差遣委用不准該提督保奏候朕施恩○乙丑

上幸萬壽山詣

廣潤祠拈香○諭內閣溫承惠奏審訊壽光縣民蔣柱呈控伊子被媳董氏謀毒斃命一案大概情形請將指控賄和之縣令解任質審一摺壽光縣知縣陶鈺著解任交該臬司

提同保正張夢龍等一併歸案研訊至此案下毒情形蔣柱與伊妻張氏所供不符而蔣董氏供出同時中毒之蔣小兒妮係屬要證自應提案質對以成信讞乃該臬司飭縣差提蔣小兒妮到案蔣柱復與伊妻張氏闖入司堂撞頭肆鬧實屬刁惡目無法紀將來定案時無論所控虛實所有毆差婦女均照毆差例治罪蔣柱張氏均照鬧堂例治罪雖係婦女不

准收贖嗣後各直省如有婦女毆差鬧堂之案俱著照此辦理○又諭吳璥奏嚴議揚河西岸隄工請築碎石坦坡一摺揚河西岸隄工臨湖隔運風水洞及三元閘對過兩處情形著重著准其包築碎石坦坡以資捍禦該督等即飭令工員照估興修於未經拋築以前先將基址工料驗明工竣後該督等親往驗收如長寬高深丈尺均屬相符准其報銷儘有偷減浮冒等弊即行據實嚴叅懲辦毋

稍姑息。旌表守正捐軀河南光州民阮真
科姪女阮氏。○命再撥京倉麥五千石。粟米
五千石。交順天府分廠接續平糶。○丙寅。諭
內閣。據哈迪爾等奏。此次監驗應試文童騎
射。內有年歲可疑之人。請裁撤不准考試。並
繕單呈覽。一摺。馬步射乃旗人根本。即讀書
應試。亦應兼習馬步射。果有虛報年歲者。自
應不准考試。惟身材長短不同。此內或不免
有身雖高大而實未及歲者。著軍機大臣將
此項裁撤不准考試之人傳齊。並將各該童
生所生之年月。令各該旗註明咨送。詳悉覈
對。如有虛報不准考試。仍將該旗叅領佐領
及原驗之大臣叅奏。儻身雖高。實係年在
十五歲以下者。仍准其考試。

大清仁宗受天興運敷化綏猷崇文經武孝恭
勤儉端敏英哲睿皇帝實錄卷之三百四十二

大清仁宗受天興運敷化綏猷崇文經武孝恭勤儉端敏英哲睿皇帝實錄卷之三百四十三

附錄總裁官歷月請起居注太子太傅武英殿大學士文淵閣領閣事請登轎奉
上諭中州應管理三部事務翰林院掌院學士

學士領學堂光祿監會振錫鑄官太子太保文淵閣大學士李鴻章刑部事務加蓋日黃符元理題日捐起唐溫官太子少保內閣文淵

開提舉閣事攝察欽奉 上諭事件爲據翰林院掌院學士教習原書主題管內務府大臣顧黃旗滿洲都統少軍

統領管理戶部兵庫奉宸苑清漪園等處總理工程處御茶膳房御藥房太醫院恩賞事務軍機二處隨帶三旗庫常和五旗監獄主

次在英和網達讓官水土水係禮部尚書上書房行是武英殿總纂管理國子監事務加六部隨帶加版記錄四次在汪境珍等奉

教修

嘉慶二十三年戊寅六月丁卯朔諭內閣伯

麟奏勦平臨安江外逆匪。拏獲逆首逆目。按律辦理。一摺。此案逆首高老五。係上年臨安江外滋事逆夷高羅衣之堂姪。因查拏逆黨。逃赴藤條江外。膽敢糾衆搶掠土司地方。裹脅漸衆。遂僭稱王號。偽封官職。抗拒官兵。並偷渡江內。窺伺臨安府城。實屬罪大惡極。伯麟派調官兵土鍊督率進勦。連獲勝仗。該逆匪等逃竄出江。潛藏打雀山頂。經伯麟所派東路官兵追探。兜圍貴西道何金密派兵鍊

乘夜抄上山頂都司桂朝陽曹得周知州岳
輝文冒雨領兵黎明齊至賊巢外委冉錫元
首先搶入寨門施放號鎗兵鍊一齊奔入將
高老五生擒並殲除餘逆辦理尚為迅速伯
麟著交部議敘冉錫元首先入寨手受刀傷
殊屬奮勇著以千總即行超補何金桂朝陽
曹得周岳輝文著伯麟分別保奏候朕施恩
其餘在事文武員弁著擇其尤為出力者據
實保奏不可冒濫雙林帶領西路官兵臨期

馳赴無勞足錄著即赴古州鎮新任不必留
於江外李慶雲張正揚失防蠻密渡以致賊
匪渡江且李慶雲猝聞賊至輒闌閉城門尤
涉張皇姑念其戴罪自効尚知奮勉李慶雲
著降為遊擊張正揚著降為把總俱留於滇
省補用臨元鎮總兵員缺著該督即於軍營
出力人員內保奏請旨案內首逆高老五及
得受偽封各賊目均已於軍前正法著名逆
目馬居阿亦經續獲惟馬哈雜在逃現在提

督張鳳業已渡江著即督率兵練務將馬哈雜拏獲續經訊出逆犯一併按名擒捕審明治罪不可稍留餘孽以儆夷衆而靖邊圉○又諭巡視天津漕務御史和精額奏南運河籌備剝船請明定章程一摺運河水勢天津迤北淺阻處多兩次官造剝船本為北運河剝運而設如遇南運河水淺之年亦准臨時酌調原係因時制宜若如該御史所奏將北運河官剝船分給南運河四百隻每年定期運往停泊備用設遇是年水勢暢達豈非徒勞往返殊與運務無益著仍照舊章辦理不必輕議更張和精額所奏毋庸議○戊辰上御勤政殿聽政○諭內閣孫玉庭奏南河物料價值分別酌減一摺前據工部奏年來江南河工順軌安瀾料價漸平請降旨令江南總督河督將各廳柴稻未經減價者及蘇斤磚石夫工等項覈實議減茲據該督等奏除海柴蘇麻杉椿磚灰土方夫匠等項實難議

減外請將上下各廳稽料未經減價者酌減一成已減者免其再減江柴湖蘆雜草亦酌減一成高堰山盱裏河外河外北五廳採辦澗溪石料俱酌減一成其餘各廳仍循舊例著照所請即自本年霜降後為始照所減之價辦理並著工部查覈照現減價值通計一年約可撙節錢糧若干自行具奏○諭軍機大臣等據都察院奏山東泰安縣孀婦徐張氏遣姪徐文現呈控盜傷人命知縣諭令工人承認拒賊誤傷委員刑逼認誣一案已降諭旨交和舜武督同臬司溫承惠秉公審辦矣此案泰安縣監生徐文誥家被羣盜持械入室劫去錢物並點放烏鎗傷斃佃戶柏永柱乃該縣知縣諱盜為竊又懼干處分轉諭工人霍大友頂認因用鐵銃拒賊誤傷柏永柱擬經留養完案謂之官民兩便實屬縱盜殃民大干法紀嗣徐文誥聞知慙城縣捕獲盜犯楊進中等供有同夥十四人攜帶烏鎗

強劫徐姓鎗條王大壯王三壯點放之語赴臬司衙門控訴經臬司委員審訊周委員竟將徐文誥及各工人掌嘴跪鍊七日夜之久逼令徐文誥誣認拒賊誤傷柏永柱身死擬徒定案迨經刑部以傷供不符駁令覆訊李委員又刑逼徐文誥供認放鎗故殺問擬大辟益覺可恨直同唐李來俊臣矣此李委員竟應正法示衆斷不可恕州縣身為命吏戡暴安良是其職任乃竟袒護盜賊誣陷良民置之死地而不顧其情較之盜賊尤為可惡東省地方官如此顛倒妄為何怪賊盜毫無忌憚肆意橫行著和舜武即查明泰安縣知縣傳旨革職周李二委員一併解任督同臬司溫承惠親提嚴審如審明屬實將該知縣委員俱加重定擬具奏其案內各盜犯迅速嚴鞫歸案辦理將此傳諭知之○以正黃旗漢軍副都統英惠為內閣學士兼禮部侍郎銜以故四川松茂道屬大定沙壩土千戶

蘇尚榮孫國映貴州永寧州屬頂營正長官司羅天騏子溥各襲職○己巳上幸萬壽山詣廣潤祠拈香○諭內閣國家造就八旗人材以騎射為根本其考試文藝乃末技耳仰蒙列聖施恩增此一途以廣登進之路即缺此一途亦於八旗人材無損定例旗人報考文場必先試以馬步射方准入闈以示不忘本也承平日久舍勞就逸者多又因科甲人員升遷較速遂各爭趨文事憚於騎射甚至考試文童竟有私減年歲冀免馬射者大乖立法之意昨據哈迪爾景祿奏考驗八旗文童馬步射內有年歲不符者三十八名當派軍機大臣查明具奏茲據奏正藍旗覺羅邁拉松阿佛珠靈阿二名恭查玉牒內開載年歲實係私減捏報邁拉松阿佛珠靈阿不但此次扣除著永遠不准考試文場其該管叅佐領著交部議處考驗不實之

都統英和著交部察議至所奏各旗文童倭興額等二十八名覈對該旗戶冊年歲均屬相符之處尚未覈實不足為憑著交戶部檢齊各該旗報部戶口冊再行逐一確查據實具奏冊內挖補年歲之內務府文童保勛常綿二名亦一併查明具奏其本無戶口冊之王公包衣希彥等六名著該王公自行查明據實具奏○庚午以故鎮國將軍奕桂子載秀降襲輔國將軍○辛未諭內閣孫玉庭等

奏會議江西堵緝鄰私條款開單請旨一摺前因湖廣江西綱鹽滯銷降旨令該督撫鹽政將疏通積滯堵緝鄰私稽查夾帶偷漏事宜會議章程具奏茲據孫玉庭等將江西堵緝鄰私章程開單呈覽朕詳閱單內請將贛縣磨角地方駐緝通判移駐攸鎮由贛州鎮飭營帶兵協同堵緝仍令贛縣縣丞巡查磨角安仁縣藍橋原派武員改駐長塘藍橋一卡改委安仁縣縣丞駐巡並添船一隻分巡

支河新城杉關等處委員輪流巡緝不得株守一處南康府屬青山地方由省按季派委丞倅前往督率該處巡檢認真稽驗各條均係因地制宜俱著照所議辦理其淮界三十里內請照雍正年間舊制每處酌留鄰商一二店以備本地民食其事亦屬可行該督等仍須派員隨時查察不准因積多鹽以杜侵越至江省回空糧船裝載淮揚一帶私鹽最為積弊著照所請於每年空船回江之先在

湖口縣梅家洲及北姑塘分別設卡派委員弁遇有糧船隨查隨放仍令該鹽道親往督查如有違例夾帶多鹽者查拏懲辦總須行之以實若稽察不力或得贓賣放雖更定章程仍難收實效該督等務慎選妥員認真經理以期釐政日有起色○壬申諭內閣戴均元吳璥奏會議徐城外加幫石隄一摺徐州府城濱臨大河全賴石隄保障河底日漸淤高郡城形如釜底大隄加高而不能幫寬且

多寄潮滲水之處形勢危險自應思患豫防著照所議准其將石工外無灘處所於隄內拆去民房幫寬土戤以作後靠其石工外存灘處所間段包砌碎石坦坡俾資捍衛該督等即督率工員覈實辦理工竣親往驗收勿任稍有偷減浮冒以重要工○又諭和舜武奏知府延案押斃人命請旨革職仍懇賞給同知職銜留東緝捕一摺武定府知府謝天樛前在指揮任內緝拏逆犯尚為認真節經賞戴花翎予以即升擢任知府該員前此微勞業已屢次施恩明示獎勵乃該員自到山東以後並未續獲要犯一名而於上司發審案件任意遷延押斃人命豈能少事姑容謝天樛著即革職不准賞給同知職銜若遽令交代回籍轉得遂其安逸謝天樛著留於東省交和舜武差委令其訪拏祝現等六逆如能拏獲一名再行奏明量予恩施○以故四川松茂道屬卓克基長官司色郎納木爾吉

妻雍恕納木湖南慈利縣麻寮所櫻桃隘把總張武繩孫先德靖安隘把總向祚華孫添誠各襲職○癸酉

上幸靜明園詰

龍神廟拈香○諭內閣前據哈迪爾景祿奏考驗八旗馬步射內年歲不符者三十八名朕召見景祿詢以憑何察覈據奏驗其身材高大似非十五歲以下者俱行扣除不准與考朕以考試捏報年歲規避馬射自應照例懲治然但憑目驗並無實在憑據即一概扣除恐其中不無屈抑若查明並非捏報應仍准其考試因派軍機大臣查明具奏嗣據奏正藍旗覺羅邁拉松阿佛珠靈阿二名查對

玉牒內所載年歲不符係屬捏報其餘據各該旗送到戶冊查對惟查出年歲挖補之內務府文童保勛常綿二名餘俱年歲相符朕以尚未覈實不足為憑復交戶部檢齊各旗報

部丁冊再行確查。茲據奏定例八旗壯丁年及十六歲即造入丁冊。此次單開各文童內鑲紅旗滿洲阿敏泰文筠正黃旗包衣維勤德潤於二十一年開報入冊。叢計現年均已逾歲。正黃旗包衣伊薩布冊內註明十四歲計亦逾歲。其內務府文童保勳亦經入冊。皆係捏報。阿敏泰文筠維勤德潤伊薩布保勳均著扣除。永遠不准考試。文場其該管叅佐領著交部議處。考驗之都統副都統內務府

大臣著查明交部察議。此次捏報年歲各文童雖由哈迪爾等查出。然未能叢明多虛少實。嗣後八旗文場考試派出考驗馬步射之大臣如有看出年歲可疑者俱著查明戶部冊載年歲果屬不符再行叅奏。內務府所報丁冊其年歲有載有不載嗣後著一律開載年歲以憑查覈。甲戌都察院奏直隸蠡縣民人崔峯呈遞封口一案得旨此案著方受疇親提人證卷宗秉公審訊定擬具奏原告

崔峯該部照例解往備質至該民人以地畝細故輒敢繕寫封口奏摺在都察院呈遞直達御前實屬膽大定案時無論所控虛實近年刁風甚熾必須從重治罪。○以禮部左侍郎王引之為浙江鄉試正考官翰林院編修李裕堂為副考官工部左侍郎王以銜為江西鄉試正考官內閣中書李彥章為副考官吏部郎中余本敦為湖北鄉試正考官內閣中書劉鴻翔為副考官。○丁丑旌表守正捐

軀廣東歸善縣民謝亞日妻莫氏。○戶部議准陝甘總督長齡疏報靖遠秦安正寧三縣開墾地五頃六十畝有奇照例升科從之。○己卯除湖南澧州水衝田一百四十一頃四十畝有奇額賦。○庚辰

上幸萬壽山。○命刑部尚書吳璥馳往河南署巡撫查勘武陟河工。以戶部尚書盧蔭溥署刑部尚書。壬午諭內閣永璉等奏懇添設內務府官學一摺

東陵八旗官學設自乾隆年間遵行已久內務府官役子弟生齒日繁添設官學亦足以資教育加恩著照所請准其於

景陵

裕陵兩處內務府官園之內各設官學一所即於內務府人員內遴選通曉漢文義諸習騎射者派充教習每月給與薪水紙筆銀三兩在於永濟庫存貯項下動支報銷此外各園居住之官役子弟令其就近歸學訓習該

管大臣等隨時稽查分別勸懲以收實效○又諭慶保等奏習教愚民具結赴官投悔請免治罪並將分投勸諭之員請加鼓勵一摺愚民學習邪教最為風俗人心之害如一二入私自在家焚香誦經地方官原不能逐戶搜查緝拏淨盡若一經傳徒聚眾則蹤跡易露即當立時捕獲按律嚴懲俾知警懼其有舊染汙俗真心改悔赴官投首者自可從寬免罪予以自新如派委多員四出勸諭在委

員等必以招徠衆多為功而其間投悔之民未必悉出於真心不過暫時希圖免罪迨日久故智復萌又或私相傳習仍難收化莠為良之效該省既已先經勸諭所有此次投悔向習天主教之傅大才等四十名口大乘教之王世寶等十一名口牛八教之李材等三百八十九名口均出具切結到官著俱免其治罪失察之文武員弁亦俱寬免處分至從前該省辦理習教人犯案內獎勵各員原因其拏獲教犯多名又有赴案投悔者是以量予甄敘並非獎其勸諭之功嗣後無庸派委多員分投勸諭其此次奏請鼓勵各員概不准行○癸未諭內閣前據潤祥等奏南糧頭進興武頭幫米色攙雜微變當經降旨交刑部審訊據該幫運丁王廷珠等供明承運無錫陽湖二縣漕米受兌之時經領運千總徐文秀驗明米色堅好行抵淮關經總漕盤驗並無微變攙雜因在途鬱蒸微變起釀多次

將氣頭攪在好米之內以致米色攪雜已將該運丁等分別治罪失察之千總孫文秀總運通判陳元齡交部察議茲據李奕疇奏米色微變雖由沿途未加風晾然果水次兌交好米何致遽行微變請將該領運千總革職交刑部歸案審辦經徵之無錫縣知縣韓履寵陽湖縣知縣李廷弼監兌通判陳元齡交部分別議處並自請議處等語漕米未兌以前責在州縣既兌以後責在旗丁此案米色微變攪雜業經刑部訊明係在途蒸鬱起剝所致事在既兌之後自應將該運丁治罪千總通判交議今該漕督乃以米色本未乾潔請將經徵之知縣議處即使其言屬實當受兌盤驗時何以不早行奏奏迨至事後追咎豈足服該縣等之心領運千總孫文秀押運通判陳元齡著仍照前議辦理知縣韓履寵李廷弼均無庸議處李奕疇辦理前後矛盾著交部議處甲申諭內閣御史盧炳濤奏

京控案件請明立限制一摺小民健訟刁風固不可長若一概禁遏使民隱不能上達亦恐覆盆之冤無自而伸息訟之道全在地方大小官吏勤於聽斷果能案無留牘曲直較然則政平訟理上控之風將不禁而自息即如山東前此陳預張五緯因循廢弛京控絡繹不絕自和舜武溫承惠到任後數月以來該省控案寂然是其明驗該御史請將呈詞虛誕者立案不行各省控案僅就呈詞閱看安能遽辨其虛實以定准駁惟審明實係虛誣自應按照定律加等治罪以儆刁頑其屬員許控上司若係案外摭拾計圖挾制者固應嚴禁其本案屈抑亦不能不聽其申訴聽訟總在折中豈可豫存成見總目之為虛誣一概不理凡事在正本清源非更定條例所能遏其末流也○舉行嘉慶二十二年大計山西卓異官十二員不謹官二員浮躁官一員罷軟官一員有疾官三員年老官六員分

別議敘處分如例。旌表守正被戕直隸獻縣民宋大法女宋氏。乙酉舉行嘉慶二十二年軍政福建卓異官七員年老官一員有疾官二員浮躁官三員罷軟官二員才力不及官二員分別議敘處分如例。丙戌上幸靜明園詣

龍神廟拈香。舉行嘉慶二十二年軍政浙江卓異官八員年老官二員罷軟官三員才力不及官一員山西卓異官六員年老官一員有疾官三員才力不及官一員分別議敘處分如例。丁亥諭內閣御史吳杰奏州縣非有緊要公事不得上省稟謁一摺。州縣為守土之官事繁責重若無故赴省稟謁上官不特曠職守且啟營競之風屢經降旨飭禁但恐日久玩生著再申諭嗣後州縣等官應各在本任辦理地方事務非遇緊要公事及奉上司札調概不准赴省干謁其賀節拜壽等事尤干例禁如有藉口缺分苦瘁逗遛

省會希冀調署他缺委員遞署本缺者並著該督撫嚴行查禁以杜夤緣而肅吏治。諭軍機大臣等據御史吳杰奏上年天津地方聞有棍徒向開設當舖之周姓贖取當衣因口角爭鬪糾集多人拆毀鋪門搶奪錢物經該縣查知前往彈壓復將該縣轎子打碎衣服撕破該縣從後門逃脫回署等語棍徒擾害地方亟應嚴拏究辦以儆兇頑庶不法之徒知所畏懼上年天津地方既有棍徒與當舖爭鬪打毀知縣轎子撕破衣服之事料難掩人耳目著嵩年即行密查如果實有其事該縣何以不據實稟明上司查拏懲治輒隱忍不辦將就消弭是何意見該鹽政一面奏明一面傳旨將該縣革職審訊並將滋事棍徒按名拏獲到案不可稍有徇縱將此傳諭知之。以江西道御史譚瑞東為陝西鄉試正考官禮部主事宋其沅為副考官刑部左侍郎帥承瀛為江南鄉試正考官湖廣道御

史盧炳濤為副考官。減免直隸安隆平軍津新河四州縣二十二年積水地畝額賦有差。戊子諭內閣伯麟奏續獲臨安江外緊要賊目及從逆餘匪分別辦理並參奏從前辦理不善臨時畏蕙之鎮將等各一摺。此次逆首高老五本係上年逆夷高羅衣堂姪。因查拏未獲復糾結餘黨渡江滋事。伯麟調派官兵將首逆高老五擒獲。正法勒除餘孽。其從逆著名賊目全行弋獲。審明分別辦理。現已將兵練陸續撤回邊境肅清。總兵李慶雲既疎防賊匪渡江。迨賊眾竄近郡城。又關閉城門。致令民心惶惑。實屬恒怯無能。副將方振奎上年帶領兵練過江。勒捕逆夷。止將首逆高羅衣拏獲。並未向深林密箐之中實力搜擒。以致遺孽復萌。辦理亦屬疎縱。李慶雲方振奎均著即行革職。署臨安府事知州丁錫羣奉檄查拏逸犯。並不認真端緝。著交部嚴加議處。至此次逆匪馬折借等二十三犯。

在獄脫逃。經兩日內全行弋獲。加重辦理。疎防之典史李詩知縣郭輝翰均著免其議處。諭軍機大臣等據吳邦慶奏查勘古樊村沁河漫溢之處。初時水面高於隄頂約計口門寬一百餘丈。連日長水消落。丈餘兩頭隄頂洄出。業已盤頭裹護。口門實寬六十二丈。水深一丈四五尺至一丈八九尺不等。現在酌籌堵閉等語。前吳璫於召見時奏稱沁河缺口。此時汎水長落。靡常。未能即時堵閉。此係吳璫未經親勘懸揣之詞。現在口門寬止六十二丈。兩頭隄頂盤裹已定。自可逐漸進占。堵閉合龍。其情形又與吳邦慶初奏時不同。若不乘此漫水消落之時速為堵合。以沁河全勢趨併缺口。下游民田既受淹浸之害。且沁河正道現已斷流。沁黃交匯處所無沁水擎托。恐黃水盛漲。吸入沁口。乘勢下注。此亦不可不慮。著吳璫馳抵該處。確勘情形。如水勢可以施工。即督率工員趕緊堵築。約計

何時可以合龍一面先行具奏又據葉觀潮奏黃河南岸虞城九堡隄身過水之處竭七晝夜之力現已搶築穩固等語吳璥將沁河工段情形籌畫妥協再前赴九堡地方逐一察看該處搶築柴土圍堰及加鑲跟築土餞各工是否一律堅固足備大汛據實具奏其葉觀潮摺內奏稱該工險要之時幸對岸山東曹河同知沈惇彝防汛通判師志鵬曹河協守備曹萬德不分畛域冒險渡河趕運料

物幫同搶護一節並著吳璥查明如果屬實一併奏請施恩將此各諭令知之四川松茂道屬松岡長官司土婦索郎各色爾滿以病告替以其養子蒼旺郎扣襲職給河南武陟修武二縣被水貧民一月口糧並房屋修費免雲南夷匪滋擾及辦理兵差之建水阿迷蒙自石屏元江文山通海河西甯我寧昆明呈貢晉寧河陽江川宣威霑益南寧陸涼師宗廣西彌勒太和趙雲南姚鎮南楚

雄廣通祿豐安寧恩安會澤尋甸嵩明寶寧武定富民寧洱他郎新平新興四十二廳州縣及邱北縣丞所屬並貴州威寧州額賦有差己丑遣官祭

火神廟諭內閣吏部議駁直隸請員一摺所駁甚是外省指名請揀人員久經飭禁該督請將周德純劉耀林二員發直差委實屬違例至該省候補及大挑知縣共計尚有三十六員其中豈無可以差委之人若謂該員

等才具盡屬平常何以不早行甄別劾叅該督等平時姑容市惠及差委需人又思另揀人員以供驅策而於定例不符及需次壅滯之處均置之不問甚屬非是方受疇姚祖同俱著交部議處以吏部右侍郎周系英署禮部左侍郎署兵部左侍郎劉鑲之兼署刑部左侍郎兵部右侍郎曹師曾署工部左侍郎辛卯諭內閣本日朕恭閱

皇考高宗純皇帝實錄內載乾隆三年十二月

諭農田為生民之本而樹畜尤王政所先周禮太宰以九職任萬民其二曰園圃毓草木可以知所當務矣朕臨御以來軫念民依於勸農教稼之外更令地方有司化導民人自勤樹植以收地力以益民生今尹會一奏豫省一年之內已種樹一百餘萬之多朕思中州接壤畿輔為南北往來之衝並未聞有教民種植滋事繁擾之處安見豫省之法不可倣行於他省耶至於五穀者乃民命之所關吾

君臣受上天牧民之責而於民之所資以生者轉視為緩圖亦逐末而忘其本矣地方有司但知以簿書為事自顧考成幸免叅罰便為稱職而究之牧民之要道缺焉未盡所謂父母斯民者安在乎是在督撫大臣董率州縣官早作夜思視百姓之事如己身之事勤懇懇勸勉化導俾百姓各盡力於南畝野無曠土戶無遊民縱不能如古人之耕九餘三即有成效亦必令有所儲蓄以備不虞則

克盡牧民之本圖矣但小民識見短淺不能慮及久遠必須良有司感之以至誠使官民上下情意流通有言必信奉令承教出於自然行之既久漸臻家給人足之風此等牧令真不愧古之循良該督撫當優獎而薦舉之朕必加以遷擢風示羣吏儻襲取虛文不求實政或且刑驅勢迫使閭閻未受益藏之益而已受繁苛之擾此又國法所不貸者可傳諭各省督撫善體朕心勉力為之以副朕望

欽此仰見我

皇考重農務本愛育蒸黎之至意夫國以民為本民以食為天而為民謀生計敦本俗者良有司之責也近日直省州縣官關心民瘼者甚少即有一二勤於所事者亦不過催科聽訟自顧考成苟倖無過不知國家設立州縣號為司牧以教養斯民舉凡田里樹畜民之所利必為之盡心勸導俾衣食有資足以仰事俯畜而後可以使之遷善而遠罪即如私

梟拽刀手邪教匪徒屢禁不絕原其初皆因迫於飢寒不過藉此罔利以謀朝夕而不知其身已罹於刑辟誠使衣食既贍則亦知重於犯法此在各州縣盡心民事為之興利除弊不以徭役違其農時不以朘削竭其生理使閭閻安樂得以力耕南畝實其倉廩其五土所宜粒食之外凡桑柘果蔬以及蒲魚雞豚咸令廣為藝畜無業之民或遷有無或轉移執事皆可以自食其力久之地無遺利

人無餘力齊民之家各有蓋藏雖未能比戶可封如此而陷於匪僻者蓋亦寡矣此實國家根本之計興道致治之原督撫責任封疆為朝廷宣猷布化當以此課州縣之殿最而不徒斤斤於簿書期會之間以厚民生以正民俗朕實有厚望焉將此通諭知之 壬辰諭內閣本日朕恭閱

皇考高宗純皇帝實錄內載乾隆四年正月兩江總督那蘇圖奏江蘇巡撫許容丁憂回籍

緣由得

旨朕一聞許容之奏即命徐士林前往代伊而徐士林過於固執又復具摺奏辭是使許容不及見父生面者非朕之過乃徐士林之罪也將此旨寄彼令彼觀之欽此仰見我

皇考孝治天下於臣下烏私

矜恤備至因思張師誠前在江蘇巡撫任內以伊父患病先經具摺懇請解任歸省朕已允其所請乃張師誠不候諭旨將印信徑交楊

護護理自行回籍巡撫大員擅離職守不能不褫職示懲但念張師誠究屬愚孝伊本係翰林出身學問尚可張師誠著加恩賞給編修服闋後來京供職再劉鳳誥從前恭纂皇考實錄曾有微勞學問亦可亦著加恩賞給編修來京供職 又諭史致光奏閩省積欠錢糧未完尾數較多請分限追完一摺福建省自嘉慶元年起至二十一年止共積欠地丁銀一百六十三萬一千八十二兩零耗羨

銀一十三萬八千六百六十三兩零歷年既久為數較多念其或係時零貧戶或係鬻產逃亡該撫現在設法清釐若將舊欠與新賦同時徵解全完糧戶勢難兼顧著加恩將元年起至十三年止積欠丁耗銀兩予限一年半十四年起至二十一年止積欠丁耗銀兩予限三年均自奉旨之日起限認真督催於限內全數完解儻逾限不完除將包抗頑戶懲辦外並將經徵督徵不力各員一併叅處

諭軍機大臣等長齡奏審訊東科爾寺呈控前任貴德同知嵇承裕追出番族賠贖錢不行給領一案經該司道等歷次會審復經該督親提研訊實係該廳追繳各役長支工食並非追出贖錢西寧道陳啟文總以臆度之詞再四駁查並以臬司改供徑詳出入人罪稟請叅奏等語此案罪名出入總以贖錢工食分判明晰為斷該督與該司道等研訊再三既稱嵇承裕並無侵扣贖錢確據何以

陳啟文仍復固執已見爭辯不休臬司屠之申應行迴避著長齡再督同藩司程國仁虛衷查訊如案內實有遷就情弊當據實奏明不可迴護若案情毫無疑義陳啟文任性阻撓延案不結著即嚴行叅奏勿稍存調停之見也將此諭令知之○展緩陝西富平臨潼咸陽三原藍田邠長武定邊八州縣積欠額賦○癸巳

上幸萬壽山○諭內閣孫玉庭等奏王平莊民修土埽工程墊用藩庫銀兩請分年攤徵還款一摺王平莊民修土埽工程借帑興修例應攤徵還款惟念碭山等六州縣本有帶徵各年災緩錢糧及挑修河埝等銀若將此項土埽工程所用銀兩勒限一年徵完民力實有未逮著加恩將此次王平莊工程借動江寧藩庫地丁項下銀三萬八千五百餘兩自嘉慶二十四年起在於碭山蕭銅山睢寧邳宿遷六州縣額糧田內分作二年攤徵還款

以紓民力 旌表守正捐軀安徽靈璧縣民
王貴牧妻申氏 甲午

上詔

時應官拈香、還宮、舉行嘉慶二十二年
大計直隸卓異官十七員、不謹官一員、浮躁
官一員、罷軟官一員、才力不及官四員、年老
官三員、有疾官二員、奉天卓異官二員、年老
官一員、有疾官一員、江蘇卓異官十員、浮躁
官一員、罷軟官一員、才力不及官二員、年老

官三員、安徽卓異官八員、才力不及官二員、
年老官七員、有疾官一員、江西卓異官十員、
不謹官一員、浮躁官一員、罷軟官一員、才力
不及官一員、年老官五員、有疾官一員、浙江
卓異官十二員、浮躁官二員、年老官七員、有
疾官一員、湖北卓異官九員、不謹官一員、罷
軟官一員、才力不及官二員、年老官四員、有
疾官二員、湖南卓異官十員、不謹官一員、浮
躁官一員、才力不及官一員、年老官六員、有

疾官一員、河南卓異官十員、不謹官二員、才
力不及官二員、年老官七員、有疾官一員、陝
西卓異官八員、不謹官一員、浮躁官一員、才
力不及官一員、年老官四員、有疾官一員、甘
肅卓異官八員、罷軟官一員、才力不及官一
員、年老官四員、福建卓異官十員、不謹官三
員、浮躁官二員、才力不及官三員、年老官二
員、有疾官一員、四川卓異官十五員、不謹官
二員、浮躁官一員、罷軟官一員、才力不及官

三員、年老官八員、有疾官五員、雲南卓異官
十員、不謹官一員、浮躁官二員、才力不及官
一員、年老官三員、有疾官一員、貴州卓異官
七員、才力不及官一員、年老官四員、有疾官
一員、南河卓異官二員、罷軟官一員、東河卓
異官二員、才力不及官一員、年老官一員、分
別議敘處分如例、以孟秋時享

太廟自是日始齋戒三日、乙未諭內閣據理
藩院奏駁原任巴林公賽尚阿之妻固山格

格呈請進京與例不符等語定例凡在游牧居住之格格等如有呈請進京者十年後方准進京但此內格格等之父母若年近六旬迨十年後方准與格格相見一次為期太遠嗣後格格等之父母如有年逾六旬者著五年後准其進京現在原任巴林公賽尚阿之妻固山格格未進京城已逾三年俟屆五年之期再行進京著為令○又諭和舜武奏東省舊虧各員逾限追繳未清請分別革職監

追一摺前因山東州縣虧缺彙舉特命章煦等徹底查辦經章煦等酌議章程將嘉慶十四年以前舊虧各員按銀數多寡分立限期追補其無缺人員較現任限期酌展一半經大學士等覈議降旨准行茲據該撫查明舊虧各員內除李岡等二十二員已全數完繳劉世培等七員已完繳初限銀兩王旭昇等七員另案叅革監追外其高廷魁等九員追限屆滿或繳不及額或全未完繳實屬延玩

勒休知縣高廷魁李觀瀾俱著革職同已革知縣王朝鳳劉東里汪德潤盧文乾王廷元袁潔張奮一併監追該革員等任所寓所及原籍資產俱著查封備抵嵇承羣等十一員統限未滿並有輟轡款目著上緊清釐勒追宋銘魏思誠二員解過節省銀兩較虧數均有浮多著於限滿後再展限四箇月勒追如逾限不完均照原定章程叅辦○又諭和舜武奏請將報虧各員內解過節省銀兩者查

明司庫檔冊於虧數內劃出作為該員賠項暫免監追仍分別定限追繳等語東省虧空各員有於嘉慶十九年以前解過節省銀兩者較之全數虧缺人員情罪有間著准其查明司庫檔冊照數劃出作為該員賠項暫免監追其數在二萬兩以上者並准其勒限五年一萬兩以上者勒限四年五千兩以上者勒限三年一千兩以上者勒限二年一千兩以下者勒限一年全行完繳現任各員以此

次奉旨之日起限升遷他省及回籍者以接到東省咨會之日起限按限嚴追以清帑項如初限不完現任者革去頂帶候補候選者停其補選在籍各員咨提來東嚴行追繳現在著追各員內如有病故等事完不足數者查明該員子孫曾否出仕接追完解已故人員即咨明原籍在該員子孫名下按限賠繳僅逾統限完不足數仍按其虧額照新例參辦並著落當日在任道府分賠歸款○又諭

李奕疇奏漕船遭風沈湮米石請分限買補交倉一摺浙江台州前後兩幫旗丁姚澄等漕船於本年四月間先後渡黃適當汛水湍急船身散搶撈湮米俱雜泥沙腐爛據該漕督查明該幫素本疲乏若責令照數買賠丁力實有未逮加恩著照所請將台州前後兩幫旗丁姚澄楊永瑞祝宏全三船沈湮虧折米二千四百八十三石零准其自今冬為始分作三年按限買補搭解交倉○戶部議

准調任廣東巡撫陳若霖疏報恩平開平三縣開墾田三頃四十畝有奇照例升科從之

大清仁宗受天興運敷化綏猷崇文經武孝恭勤儉端敏英哲睿皇帝實錄卷之三百四十三

[illegible]

太廟

清實錄
嘉慶二十二年七月

上御勤政殿聽政○諭內閣朕此次恭謁
祖陵駐蹕盛京所有盛京吉林黑龍江等處應
行引見及補行引見之大計軍政卓異文武
官員著交行在吏兵二部就近在盛京帶領

五四九

單具奏候朕酌量開復以示獎勵其餘工部各堂官既於書吏舞弊毫無覺察又失察司員得贓平昔互相推諉怠玩因循曹振鏞等均著交部議處以為近日仕途為巧宦者戒○以內閣侍讀學士明敏為光祿寺卿○庚子以擅行御道毆縛防禦革奉天府府尹貴慶職發往黑龍江効力贖罪以內閣侍讀學士瑞麟為奉天府府尹○除河南睢寧陵二州縣水衝沙壓地六百九十頃有奇額賦○

辛丑諭內閣昨據富俊等奏府尹貴慶擅行御道被修道防禦海昌攔阻輒親自毆縛拴於馬項牽行二十里已降旨將貴慶革職重責仍令富俊等嚴審定擬具奏矣嗣後巡幸經由御道朕未經臨之前理宜清蹕自備用黃車及皇子暨王公大臣官員以至太監人等並裝載官物車庫車輛均有便道可行不准率由御道行走儻有仍前擅行者一經查出著將披甲人及車夫插耳箭一月仍令

戴箭趕車行走滿日拔箭重責如係官人即將該管之大臣官員議處若係私雇人役亦將本主懲辦並著管道大臣隨時認真查察俟豹尾禁軍經過之後方准行走如有不遵約束務即指名奏奏儻有瞻徇朕經過蹕途其轍跡不難立辨除將本人查明懲處外並將管道大臣一併嚴懲不貸言出法隨不可玩視將此通諭知之○又諭每遇行營侍衛之跟役人等因須超前接馬竟有於朕未經

過時由御路馳驅者此等積習甚屬不合若不嚴行禁止日久必致任意踐踏御路及朕經臨轉不平坦著交御前大臣等嗣後凡遇行營嚴行禁止御前乾清門大門侍衛之跟役人等馳馬踐踏御路即有應在前豫備差使由便道緩行有何不可經此次禁止儻仍有在御路行走者即行擒拏插耳箭一月滿日重責示衆仍將該家主一併叅奏議處○諭軍機大臣等本日英和等奏湖南民人李

材旺羅文崧蘇芳達呈控各案已另降諭旨交該撫審辦矣。近來湖南人民赴京呈控之案甚多。該省距京遙遠。地方官遇有民間詞訟。果能聽斷公明。辦理迅速。小民豈肯舍近求遠。跋涉來京控告。乃由曲直不分。延宕不結。及至赴上司衙門控訴。又不即為審理。以致負屈莫伸。紛紛京控。外省案件。若必待京控。特交督撫審辦。安用此民牧為耶。著巴哈布嚴飭所屬大小各官。嗣後凡遇控案。務秉

公審。辦案情果有冤抑。立為伸雪。以清訟源。經此次訓飭之後。儻仍泄沓從事。致京控案件日多。定將該撫懲處不貸。將此諭令知之。○壬寅諭內閣。巡幸駐蹕大營。其白布城門與景運門隆宗門無異。黃布城門與乾清門養心門無異。禁地森嚴。自應肅靜。向不准閒雜伺役人等擅入。近因大臣疲怠。日久玩生。管門官員兵丁並不稽查禁阻。竟有僕役車夫人等擅入者。實屬廢弛。惟思大營內皇子

本有太監詣達。哈哈珠色。拜唐阿。可以隨入伺候。王公本有護衛兵丁。大臣等亦有筆帖式。官人可以差遣。原不准攜帶僕役車夫進內。御前侍衛乾清門侍衛大門侍衛及文武官員本不准帶人私入。嗣後黃布城以外。白布城以內。王公及蒙古王公。祇准帶護衛二人。三品以上大臣。祇准帶筆帖式官人二人。御前乾清門大門侍衛直宿臥具。俱著自行攜帶。總管首領太監行李。即著太監代為負

運。經此次諭飭之後。儻仍有將僕役車夫帶入者。即將所帶之人。插耳箭遊營。並加重責。仍將本主及失察之該管王大臣一併嚴懲。再隨扈護軍統領等於朕進大營後。輒行散去。晚門後亦旋即散歸。直宿之員直至晚間始行進內。是白布城內日間往往無護軍統領在彼稽查。殊屬疏玩。嗣後著常川輪直二人在大營內督率各門章京兵丁認真稽查。俟下鑰時。該班之員直宿。其餘各員始准散

出如查有攜帶私役者立即嚴拏指叅儻章京等不嚴行查察即將該章京叅奏如徇隱不奏或別經查出定將該護軍統領一併重處決不寬貸○以翰林院編修楊殿邦為河南鄉試正考官刑部主事戴宗沅為副考官翰林院編修馬步蟾為山東鄉試正考官李家蕙為副考官編修王炳瀛為山西鄉試正考官袁元善為副考官○休致大學士劉樞之卒予祭葬諡文恪○癸卯諭內閣據博啟

圖奏鑲黃旗護軍烏爾袞泰持刀扎斃伊妻並將鄰居之筆帖式齊喇海扎斃請將該管章京等交部議處並自請察議等語昨因健銳營前鋒穆圖杭阿毆傷伊父一案經該管大臣等奏請將該翼長章京等交部議處朕以該管章京等於所管兵丁如有遺誤公事不能約束者自應議處其在家行兇豈能逐一查察因將該管章京等免其議處並降旨嗣後如遇此等情事毋庸將該管官員奏請

議處博啟圖宜未見此旨耶抑係見而不解耶所請著毋庸議博啟圖濫行陳奏甚屬不曉事體著交部議處○諭軍機大臣等前據長齡奏東科爾寺呈控前任貴德同知嵇承裕追出番族賠繳贓錢不行給領一案經司道等並該督親提審明實係該廳追繳各役長支工食並非追出贓錢當降旨令長齡督同藩司程國仁再行秉公研訊茲據納爾松阿奏廳役姜有功供認剛咱達倉二族番目

各交賠贓小錢四百串完受族番目交過賠贓小錢三百三十串嵇承裕扣留不發諭令該役捏稱各役繳還工食錢文不許說出贓錢又因該喇嘛在廳索錢遂自行交出小錢一百三十串等語並將陳啟文原呈聲敘呈覽此案緊要關鍵總以分別贓錢工食則曲直無難立辨著長齡即督同藩司程國仁秉公覆訊如果實係贓錢該督及屠之申等原審未確即據實奏明更正不可稍存迴護若

係追繳各役工食有據陳啟文固執已見仍遵前旨將陳啟文嚴叅示懲該督即檄調陳啟文來省令其眼同訊問務令無可置辯方足以服其心儻結案之後陳啟文又復控訴朕另派員審出確情則原審之員不能辭咎也將此諭令知之○甲辰

上幸靜明園詣

龍神廟拈香○旌表守正捐軀陝西渭南縣民李元杰妻李氏○丙午

孝懿仁皇后忌辰遣官祭

景陵○丁未刑部奏審擬工部書吏銷算浮冒司員得受餽送一案得旨此案佛慶於二月間先向書吏詢問承辦此項工程有無紙筆飯食其心已不可問該書吏心疑有意需索因先後湊送銀二百兩佛慶均經收受該吏等斂銀餽送豈能自出己資自必婪索舞弊是該吏等浮開估冊佛慶實有以啟之甚屬卑鄙佛慶著照部議發往烏魯木齊効力贖

罪於到配時加枷號一箇月以示懲儆易成章起意餽送掌印司官銀兩並向工頭李揚炳索銀舞弊嗣復挾潘恭常責打書吏之嫌到官捏贓汙鱗尤為狡詐易成章著先於刑部枷號一箇月滿日發往黑龍江充當苦差潘恭常於書吏浮開估冊未能查出弊竇本應交部議處惟該員於堂官看出覈減之後即自知愧勵立提該書吏等重責懲辦尚知振作潘恭常著開復原官加恩免其交部議

處○戊申諭內閣御史喻士藩奏直省城守塘汛營伍廢弛請嚴飭操防一摺直省各府縣城守塘汛原所以詰奸宄而安善良必先募選兵丁足額該管將備勤加訓練俾兵丁等技藝精強方於巡防有裨近來各省塘汛屋宇傾圯兵額短缺即有在汛應差者亦多罷軟無能遇有匪徒經過退縮不前安能望其擒拏盜賊保護行旅著通諭各省督撫提鎮認真整頓平時董率所屬慎選兵丁常川

操練其塘汛緊要地面擇兵丁中技藝精強者駐守巡緝如有疏防懈弛等弊據實叅處務令守望相資以收戢暴安良之效○又諭御史福漳阿奏請嚴繙譯考試一摺考試理應嚴密繙譯考選清文自應鑒拔真材以收實用該御史所奏繙譯房官開送不公應試士子於派出考官後私行囑託此等弊竇實不能保其必無嗣後繙譯房官各衙門務遴選繙譯明通之員咨送不得以清文平常者濫行充數至聽宣時該士子等本不應前往午門窺伺探聽如仍有在午門前與考官交接者即著稽察御史指名叅奏並著步軍統領衙門派員查察以杜弊端○己酉諭內閣阮元奏千總玩誤洋務請旨革職發遣並將緝捕出力之署守備懇恩量加鼓勵一摺署碣石鎮右營守備事右哨千總王上用身充總巡平日既不常川巡緝及聞商船被劫又不迅速追捕以致盜船逃逸實屬畏葸無能

王上用著即革職在犯事地方加枷號一箇月滿日發往新疆充當苦差碣石鎮總兵曾文華平日不能整飭督率並於已故叅將王成傑患病不先行查辦著交部議處署香山協守備鄭位查拏陳阿竈盜船在洋窮追三晝夜首先擡船捕獲盜首實為奮勇出力該署備現經題升龍門協右營都司著兵部查明如已議准免其送部引見若未經議准亦著加恩准其升補並免送部引見○辛亥中

元節

上詣

安佑宮行禮○遣官祭

永陵

福陵

昭陵

昭西陵

孝陵

孝東陵

景陵

泰陵

泰東陵

裕陵○遣官祭

孝淑皇后陵寢○遣官祭

端慧皇太子園寢○浙江巡撫楊馥綠事降從三品京堂以甘肅布政使程國仁為浙江巡撫甘肅按察使屠之申為布政使陝西陝安道方戴豫為甘肅按察使○旌表守正捐

軀山東長清縣民馬泳幅妻周氏○壬子諭內閣長齡奏西寧辦事大臣納爾松阿辦理蒙古番子事務粗心輕率一摺上年拉布楞寺喇嘛與隆務昂賓控爭寺院納爾松阿輒聽拉布楞寺喇嘛之言札致長齡欲撤調撤拉爾兵三四千名將隆務昂賓勦滅實屬冒昧納爾松阿不勝辦事大臣之任著交部議處即來京聽候部議○諭軍機大臣等御史費丙章奏山東兗沂曹一帶莠民帶刀出入

每一夥謂之一捻小捻一二十人大捻三四十人黑夜持械劫掠行旅因吏役受賄包庇無從捕獲小民豫知告官無益有甘受擾害而不報者曹州屬之鉅野縣大田集一帶不下五六捻持械出沒江南之豐縣河南之夏邑安徽之亳州及東省之金鄉城武曹縣鄆城定陶荷澤等處其盜首于大開于二開尤為兇橫于二開已於春間就獲于大開弟兄曾於十九年間因金鄉縣捕役李成三等二十餘人往拏該犯將差役李鼇殺死上年九月間金鄉縣又購線往拏獲其夥黨一名該犯挾仇將眼目姬崇起殺傷殞命等語東省盜劫頻聞曹州尤甚該御史所奏訪有地址姓名亟應嚴拏懲辦現在于二開既已就獲其于大開蹤跡無難向其追究得實著和舜武即訊究于大開實在下落派委員弁拏獲到案訊明按律辦理其包庇之吏役以及成夥捻匪積慣窩家一併訪明飭令縣營會同

緝獲嚴究重懲以戢奸宄將此諭令知之○調英吉沙爾領隊大臣秀寧為西寧辦事大臣賞四等侍衛緒莊二等侍衛為英吉沙爾領隊大臣○癸丑

上幸萬壽山○諭內閣成格奏士民籲留離任知縣據情轉奏一摺直省牧令在官賢否其去留權操自上非士民所當干與若循良之吏聽士民籲請留任設有不職之員將不待上司之叅劾亦聽士民驅之使去耶此風斷不可開況循吏課勞報最必將薦舉升遷彼時該士民亦不能卧轍攀轅強令不赴他任所有太谷縣士民呈請將前任知縣陳履和服闋仍留本任之處著不准行即再三瀆請該撫亦不准復行具奏○命翰林院侍讀潘錫恩提督廣西學政○甲寅諭內閣吳璥奏查明曹河同知沈惇彝等冒險出力情形據實覆奏一摺河工員弁遇有本汛要工冒險出力係屬分所當為本年六月虞城九堡隄

身漫塌並非曹河同知沈惇彝本汛之事乃該同知在對岸聞知立即裝運料物錢糧選同通判師志鵬協備曹萬德冒險渡河幫同搶築得以保護平穩似此奮勉急公不分畛域之員實屬可嘉沈惇彝著先行賞加一級交軍機處記名遇有知府缺出奏請簡放其隨同搶護之通判師志鵬著歸於儘先班內儘先補用協備曹萬德著賞加都司銜以示獎勵○又諭和舜武奏特叅延不清理積案

及提案抗違不解之牧令一摺濱州知州王龍圖任內未結積案至一百十餘起之多疊經該撫嚴催乃飾詞登覆迄未訊結一起疲玩已極王龍圖著即革職發往軍臺効力贖罪惠民縣知縣邱音越於窩盜勒贖重案疊經臬司催提並不獲犯申報實屬抗違邱音越著即革職嗣後州縣官任內積案延不訊結至一百案及四十案以上者即照此例查明叅奏將該員革職發往軍臺其積壓在四

十案以下者奏請革職以懲積玩○刑部議覆陝甘總督長齡疏報民人蘇漢魁與胞兄蘇漢成爭奪鐵鋏致兄閃跌身死依律擬斬立決一案得旨此案蘇漢魁因胞兄蘇漢成將未分公地霸種大麥收割後用驢馱回行至山梁適該犯先手執鐵鋏在彼瞥見即用鐵攔住驢頭令將麥捆馱回地內講理蘇漢成不依捉住鐵鋏扭奪該犯鬆手致蘇漢成閃落崖下跌傷殞命覈其情節該犯係用鐵鋏攔截驢頭並無鬪毆情形蘇漢成死由失跌該犯奪鐵攔手出於無心若照律擬以斬決與有心毆兄致斃之案無所區別蘇漢魁著改為斬監候秋審時入於服制情實餘依議○乙卯命吏部左侍郎熙昌馳往湖南審案○以廣東順德協副將陳鎮邦為碣石鎮總兵官○丁巳

上幸靜明園詣

龍神廟拈香○戊午諭內閣納爾松阿係西

寧辦事大臣陳啟文之曲直與伊無涉乃屢次代為陳奏又擅發驛遞前經革職不足蔽辜納爾松阿著即由彼發往烏魯木齊効力贖罪已未吏部奏外任旗員遇有事故回旗日久逗遛即應嚴議一摺得旨旗員補放外任遇有事故回旗原不准在外日久逗遛是以定例較漢員加嚴但遲一月以上即議降調半年以上即議革職亦未免過重嗣後外任旗員丁憂回籍除正展限期外如起程

遲延半年以上者著降一級調用一年以上者著革職以左春坊左贊善許邦光署日講起居注官辛酉

上詣

安佑宮行禮諭軍機大臣等和舜武奏訪明東平州前捐納直隸州叅革回籍之王奎聚在家窩藏密令幹捕假裝竊賊投至伊家復購獲賊匪孔二審明賊據派員將王奎聚及伊家雇工人陳泳先拏獲從嚴熬審盡法懲

治等語王奎聚會任職官乃喪心無恥竟敢
窩賊肆竊可惡已極著和舜武督同臬司溫
承惠嚴行審訊並究問該犯未經捐官以前
曾否身為盜賊其捐納銀兩是否即係贓錢
令其據實吐供勿任狡飾審明後從重加等
定擬具奏其另摺奏東省兗沂一帶向有拽
刀匪徒曹屬接壤河南有結捻成羣名為紅
碑等語此等匪犯類皆恃衆逞強肆行竊掠
窩匪窩盜擾害閭閻若不嚴拏究辦大加懲
創日久夥黨愈多必至釀成巨案著和舜武
嚴督文武員弁務將成夥匪徒積慣窩家並
包庇之吏役兵丁認真訪緝加重嚴辦切毋
稍涉疏縱以致養癰貽患也將此諭令知之
○免山東章邱鄒平二縣被水村莊積年額
賦○壬戌

上詣

恩慕寺

恩佑寺

壽皇殿行禮○還宮○癸亥
上以詣盛京恭謁
祖陵先期祇告

奉先殿○甲子

上啟鑒命

皇次子智親王旻寧皇四子綿忻隨駕○命莊
親王綿課大學士曹振鏞章煦尚書英和
寧留京辦事○免蹕路經過地方本年額賦
十分之五○是日駐蹕烟郊行宮○乙丑旌

表守正捐軀廣東順德縣民劉體銓妻梁氏
○是日駐蹕白澗行宮○丙寅駐蹕陳新莊
御營○是月山東巡撫和舜武奏抵任後辦
理情形得旨所論俱屬得當但須持之以久
行之以實切勿始勤終怠總以用人為主賢
者進之不肖者黜之此為最要○兩江總督
孫玉庭江南河道總督黎世序奏陳實在用
項情形得旨工歸實用帑不虛糜視國事如
家事以百姓為子孫保衛民生永期鞏固

天不可欺財不可貪明有王法暗有鬼神大小
臣工戒之在心守之在志將此殊諭通諭知
之

大清仁宗受天興運敷化綏猷崇文經武孝恭
勤儉端敏英哲睿皇帝實錄卷之三百四十四

大清仁宗受天興運敷化綏猷崇文經武孝恭
勤儉端敏英哲睿皇帝實錄卷之三百四十五

此係乾隆皇帝御筆所書之文。其文曰：「朕受天興運敷化綏猷崇文經武孝恭勤儉端敏英哲睿皇帝實錄卷之三百四十五」。此係乾隆皇帝御筆所書之文。其文曰：「朕受天興運敷化綏猷崇文經武孝恭勤儉端敏英哲睿皇帝實錄卷之三百四十五」。此係乾隆皇帝御筆所書之文。其文曰：「朕受天興運敷化綏猷崇文經武孝恭勤儉端敏英哲睿皇帝實錄卷之三百四十五」。

嘉慶二十三年戊寅八月丁卯朔祭

教修

先師孔子遣大學士曹振鏞行禮○諭內閣
向例東巡經過廣寧縣親祭

北鎮醫巫閭山儀注內有齋戒一日之文因
思齋戒之禮向不舉於行在是以歷遇恭謁
陵寢行大饗禮皆無齋戒儀節行禮以實不以
文嗣後如遇巡幸致祭

嶽鎮儀注內均毋庸敕入齋戒一日之語以
昭嚴實○又諭朕連日駐蹕陳新莊興隆寺
經過道路多由民田開築此時將屆西成爰

刈禾稼不免有傷農業。且新土浮鬆。亦於行走不使嗣後凡蹕路經臨處。所務循照舊途。修墊堅實。不得取道農田。另開新路。用副朕勤恤民隱至意。○是日。駐蹕興隆寺行宮。○戊辰祭。

大社

大稷遣皇三子綿愷恭代行禮。○是日。駐蹕五里墩御營。○己巳。命定親王綿恩禮部右侍郎同麟工部左侍郎德文恭送。

玉牒尊藏盛京。○諭軍機大臣等。據伯麟保奏。軍營出力人員。已降旨分別施恩矣。此內何金誠端俱係軍機章京。朕於召見時察看其人。均屬中材。此次滇省軍務。不過邊隅小醜。該員等在事出力。賞戴花翎。交部議敘。已足償其勞績。該督請加按察使銜。未免過優。是以未經准行。其王萬清既已賞換花翎。亦無庸再加副將升銜。至土司普承恩等四員。係屬外夷。自行集練打仗出力。殺賊多名。該督

僅請賞戴藍翎。又覺稍輕。不足以示鼓勵。特再加恩。各賞銀一百兩。朕量功甄敘。權衡一秉至公。惟期各當其勞。不肯稍存偏畸也。將此諭令知之。○以擒獲雲南臨安江外滋事土夷首逆。賞按察使廉敬貴西道何金。知府李文杞同知張彪田鄭心一。嵩琨。知州廣裕。提舉牛選。恭將王萬清都司桂朝陽遊擊楊沛守備王廷樑花翎。知縣文達等藍翎。餘升敘有差。○以雲南維西協副將李國棟為臨

元鎮總兵官。○賞蹕路經過直隸地方辦差兵丁一月錢糧。○是日。駐蹕柳新莊行宮。○庚午。

上詣夷齊廟拈香。遣官祭。

文昌帝君廟。○是日。駐蹕夷齊廟行宮。○辛未。諭軍機大臣等。長齡奏甘肅各州縣借糧一項。新舊民欠。累繫嘉慶十六年以後。新欠有無。官虧現飭道府嚴查。至十六年以前。其中民欠固多。而已徵未經具報。已領未曾全

散官銜亦復不少第歷年久遠官吏更易冊檔率已銷燬懇免通查日後發覺一處仍即嚴辦一處等語甘肅借糧一項民欠官虧久多牽混惟念十六年以前歷年較遠官吏更易冊籍無存姑免通查至所稱明年恭逢萬壽慶典天恩浩蕩十六年以後積欠如蒙恩蠲免當督率藩司於本年秋徵時實力稽查一節所奏大屬非是蠲免錢糧恩出自上明歲慶典施恩朕尚未明降諭旨該督何所見而知積欠必應蠲免先為此奏豫行嘗試長齡著傳旨申飭該督仍督率藩司道府州等將十六年以後民欠借糧照常催徵實力稽查如有以完作欠情弊即行據實叅辦毋得藉此朦混將此諭令知之○以辦理滌河及青龍河橋座穩固直隸總督方受疇等加級優敘並賞兵丁銀有差○是日駐蹕天台山行宮○壬申以詹事府詹事善慶太常寺卿韓鼎晉監臨順天鄉試禮部尚書汪廷珍為

正考官吏部右侍郎周系英署刑部左侍郎劉鏞之為副考官○是日駐蹕深河村西御營○癸酉遣官祭

關帝廟○諭內閣方受疇奏道員因公降調懇請捐復留直差委一摺阿霖彭應杰二員朕於差次俱曾屢經召見阿霖前在軍營出力並曾賞戴花翎該二員現以審案錯誤部議降調念其事屬因公尚可加恩錄用不必令其捐復阿霖係一案降三級調用著加恩賞給知府留於直隸補用仍准戴花翎彭應杰係二案降三級調用著以同知通判留於直隸補用○是日駐蹕文殊庵行宮○甲戌諭內閣奕紹等奏昨日直班有一人欲上宮門臺階正在擒拏之際格布舍博啟圖帶同營長護軍徐銀富蘭帶同綠營官兵幫同拏獲訊問姓名高理素有瘋疾等語高理一犯行近宮門自係直班侍衛章京等見其形狀可疑即行拏獲乃摺內敘述格布舍等帶領

官兵同拏試問拏一瘋犯何須如許官兵。明係伊等懼干處分。附名入奏。此等習氣。殊為可惡。此次姑免深究。嗣後凡事俱當務實。不可虛飾。該犯既已行近宮門。其聲音帳房以外直班之護軍及滿漢官兵著格布舍博啟圖富蘭徐銳分別查明。自行責懲。高理一犯著交行在刑部審訊。定擬具奏。○諭軍機大臣等。本日托津等會訊詐差訛索之王三等供詞具奏。王三係指稱內務府管茶水披甲

人。百趙沿途需索使費。自陳新莊興隆寺以至天台山。每站皆然。並供出差局書吏楊老茂估衣鋪李二姓名及所得銀錢數目。該犯既已供認得贓不諱。則沿途差局之應付使費。自係實有其事。百趙係一管茶水之披甲人。王三假託其名。遂能一路訛索。是假冒者尚可得錢。其真籍差務訛索者。想更不知凡幾。著將王三供詞發交方受曉閱看。即提各站辦差書吏逐一研訊。此次大差經過直隸

地方有無指稱各等處太監及王公大臣等向差局需索銀錢之事。今其據實供吐。如有其事。並令將太監當差處所及王公大臣姓名每站各索去銀錢若干。一一供明。該督訊取各供速由驛具奏。將此諭令知之。○蒙古王貝勒貝子公台吉等八人於行營跪迎瞻覲。賞賚有差。○免蹕路經過奉天承德廣寧錦寧遠四州縣本年額賦。○是日駐蹕中前所御營。○乙亥

太宗文皇帝忌辰遣官祭

昭陵。○諭內閣和舜武奏監追之員執行他往請將看守不嚴之知府知縣交部議處等語。高廷魁劉東里俱係虧空案內。奏明監追之員乃敢潛行他往。著直隸總督順天府君各於該革員原籍查拏。獲日交刑部訊供具奏。再解回山東照例監追。至外省於叅革監追人員並不認真看守。任聽外出。實屬官官相護陋習。所有看守不嚴之前署。歷城縣知縣

傅士奎著即革職署濟南府知府嵩岫著降補六部主事以示懲儆○又諭和舜武奏酌改竊賊窩主條例一摺近日東省糾衆夥竊之案甚多且有窩家為之淵藪自應嚴立科條俾奸民知所畏懼嗣後山東一省竊賊除贓數滿貫罪無可加及行竊僅止一二人并窩竊未及三名仍照舊例辦理外其竊賊結夥在三人以上執持繩鞭器械者不分首從贓數次數俱改發雲貴兩廣極邊烟瘴充軍

三人以上徒手行竊者於軍罪上減一等杖一百徒三年若結夥至十人以上雖徒手亦照三人以上執持繩鞭器械之例辦理窩竊三名以上坐地分贓及代變贓物者發近邊充軍五名以上者即發雲貴兩廣極邊烟瘴充軍地保及在官人役有窩賊分贓者悉照捕役秦竊例辦理俟東省盜賊之風稍息再由該撫奏明復歸舊例至近日並有廢員在籍窩賊如王奎聚者尤在情理之外著刑部

將曾任職官及在籍職官窩藏盜賊者另行從重定擬條例具奏尋奏嗣後如有曾任職官及在籍職官窩藏竊盜強盜者按平民窩主本律本例罪應斬決者加擬梟示罪應絞候者加擬絞立決罪應徒流充軍者概行發遣黑龍江當差以示嚴懲從之○是日駐蹕周家村御營○丙子免奉天新民廳本年額賦是日駐蹕沙河所東御營○丁丑

太祖高皇帝忌辰遣官祭

福陵○諭內閣本日沙河所大營朕未啟鑒之先有武備院管理屏風之披甲人吉寧寧開黃布城走入當經太監等捆縛奏聞交軍機大臣內務府大臣會同行在刑部審訊據供伊因睡覺稍遲誤認業已啟鑰恐誤差使匆忙入內收取屏風致被拏獲等語吉寧係管理屏風之人如於未啟駕之前由宮門誤入其罪尚輕乃竟寧啟黃布城而入罪犯甚重皆由該管官平日管誠不嚴所致司帷依凌

阿係專管之員著即革職武備院員外郎鍾桂協同管理著降為本處主事仍罰俸一年武備院卿雙慶著降為四品頂帶拔去花翎罰俸半年哈郎著退出御前侍衛在乾清門行走罰俸半年○是日駐蹕五里河村御營戊寅軍機大臣等會同行在刑部審擬馬甲吉寧擅入黃布城罪名一案得旨此案吉寧於朕未啟鑾之先擅入黃布城內又不由宮門走進寧啟黃布城而入本應照越皇城者絞律治罪念其實因起遲忙亂誤認業經啟鑾恐誤差使罪出無心情有可原吉寧著枷號隨營示衆至盛京時即由彼發往黑龍江○是日駐蹕杏山東御營○己卯駐蹕興隆屯御營庚辰遣官祭黑龍潭昭靈沛澤龍王之神玉泉山惠濟慈佑靈漢龍王之神昆明湖安佑普濟沛澤廣生龍王之神密雲縣白龍潭

昭靈廣濟普澤龍王之神○遣官祭圓明園惠濟祠河神廟○諭軍機大臣等御史馮清聘奏各直省捕務廢弛一摺山東省近日盜劫頻聞和舜武溫承惠雖頗認真查拏然尚未能盡絕直隸通州良鄉劫案則皆在近畿地方此實地方官緝捕懈弛之故該督撫因近有停緝逆犯之旨遂置捕務於不問試思祝現等六逆及其餘逆犯豈竟無一存者自必仍在直隸山東河南三省境內潛藏伏匿著方受疇和舜武陳若霖各將所屬捕務實力整頓密訪祝現等六逆蹤跡務期弋獲各於每次奏事時附片陳奏不可稍涉疏懈將此諭令知之○是日駐蹕金剛屯北御營○辛巳賜扈從王公大臣蒙古王公等食並賞賚有差○是日駐蹕廣寧行宮翼日如之○壬午上詣北鎮廟行禮○諭內閣蒙古王公等所進馬

匹。朕前以此次行營路途較遠。恐官員兵丁所騎馬匹不無疲乏。是以降旨令應騎官馬之官員兵丁。俟此項馬匹解到。將原領馬匹更換。茲據該蒙古王公等稱情願不必更換。全行呈進。請散給官員兵丁等語。所有應行換馬之官員兵丁。著加恩毋庸更換。每人各賞馬一匹。其餘馬匹。著仍交該蒙古王公等領回。○癸未。遣官祭昭忠祠。○諭軍機大臣等。賽沖阿奏審訊扎蘭保所控扎呼岱各款。其私出小票。向入海民人索取銀兩一節。已據扎呼岱供認。本年三月初間。因辦放護票。豫備買補臥票。彌補塌欠。先給入海民人小票。過卡查驗。至秋後回時。每人交銀三兩。是此款業經屬實。所有本年春間。珠倫卡倫放出之小票三百十餘張。交銀須俟秋後。贓銀尚未入手。但彈春散放護票。自十八年至今。已越五年。扎呼岱既有私放小票之事。諒不始於今年。其歷年有無科斂需索情事。必應

徹底根究。曾共斂銀若干。賠墊護票若干。已若干。俱令一一供證明確。至密扎安起地方。既有墾地收糧之事。是否扎呼岱同伊兄扎克通阿。招引漁利。頭道溝等處。護園三座。是否扎呼岱令民人開設裁種。亦應提齊證佐。質對確實。不可任其含混。其扎蘭保事不干己。非挾有私嫌。何以挺身呈控。現經訊出。本年三月。扎蘭保有令伊戚達洪阿。富通阿。向扎呼岱索幫銀一千兩之事。扎呼岱著即革職。扎蘭保著解任。先摘去翎頂。如索幫屬實。無庸奏請。亦即革職。訊取確供。分別定擬。具奏。松寧失於查察。著先行交部議處。將此諭令知之。○旌表逼嫁捐軀貴州永寧州民楊坤喜妻周氏。是日駐蹕常家屯御營。甲申。戶部議准。護理廣西巡撫富綸疏。報小鎮安天保歸順三廳州縣開墾旱田十二頃三十一畝。有奇。水田十四埜一伯。照例升科從之。是日駐蹕蔣家店御營。乙酉。諭內

開善慶等奏場內刊貼曉諭士子敬避及擡寫定式內

高宗純皇帝廟號

宗字誤刻

祖字。訊據順天府承辦書吏冉呈紋供稱係照禮部領取之科場條例繕刻隨查取科場條例實係誤刻。惟查閱場內現發之科場條例並無錯誤等語。書籍內恭遇

列聖廟號皆當敬謹校勘。禮部頒行科場條例

廟號錯誤非尋常疏忽可比。但該書吏場前領取之條例既有錯誤。何以場內現發之本又無錯誤。是否科場條例板片刊有兩分。抑或另有別情。著留京王大臣會同刑部據實確查。如係禮部新修條例刊本錯誤。即將承辦之堂司各官查開職名據實奏。繕寫之書吏交刑部審訊治罪。其刊刻以後歷任未經看出更正之堂司各官亦查明另單具奏。順天府書吏冉呈紋著先交刑部審訊。府丞周

鉞專辦科場事務於該書吏繕刊告示時並未先行恭校。著交部議處。善慶韓鼎晉於入場後即行查明敬謹更正著免其交議。○予雲南陣亡雲騎尉馬文雄。外委沈秀福建陣亡外委謝得高。祭葬世職如例。是日駐蹕黃旗堡御營。○丙戌奉恩將軍霍奇孔武並移居宗室正族長如璋等及朝鮮國使臣韓用龜等跪迎瞻覲。賞盛京居住宗室覺羅及移駐宗室銀幣。是日駐蹕老邊御營。○

丁亥駐蹕大臺御營。○戊子諭內閣朕惟治民之道莫善於禮。乾隆初年

皇考高宗純皇帝曾命臣工萃集歷代禮書並本朝會典將冠婚喪祭一切儀制斟酌損益定為皇朝通禮一書實足為朝野率由之準。特是書刊刻後。弄板內府直省士民鮮得見聞。著武英殿按照省分各印給一部。各該督撫派人祇領照刊流播俾士民共識遵脩用昭法守。諭軍機大臣等據納爾松阿奏出

口祭海會盟之時接據西寧鎮屬白塔營都司稟報蒙古被搶竄進卡內又據貝子喇特納錫第等前後呈報被番賊搶掠及至丹噶爾途次適貝子喇特納錫第台吉多爾濟旺濟爾徒步迎見哀訴搶劫營盤一空至東科爾寺地方據哈拉庫圖爾營千總稟報行至日月山卡外珂珂托洛亥地方遇有番賊十餘名搶去營馬一匹及衣物等件並查得沿海一帶鄰旗蒙古盡被番賊搶劫失散當飭喇嘛察罕諾們汗旗挑派蒙古沿河堵禦並飭循貴文武堵緝賊賊續有蒙古王公十家或親身或差人前來俱因被搶投呈詢以別旗王公據稱現在番賊分股亂搶不知去向等語西寧邊外番族因蒙古孱弱屢有搶掠之事今於會盟之頃該番賊等膽敢糾黨百餘人至數百人四出搶劫各旗蒙古被其擄害竟至不能前赴會盟該番賊等實屬披猖著長齡會同秀寧確查情形具奏一面督飭

清 實 錄 嘉慶二十三年八月

文武員弁速緝賊嚴行懲辦務令知所做畏以靖邊圉將此諭令知之○順天府以宗室鄉試中額請得旨取中八名○是日駐蹕噶布垓御營○己丑
世宗憲皇帝忌辰遣官祭泰陵○
上御行帳閱盛京官員等射○諭內閣昨禮部奏八月二十三日
世宗憲皇帝忌辰在夕月壇齋戒期內應用常服朕惟列聖
列后忌辰例穿素服如值天
地
宗
社大祀齋戒期內自應一律改用常服以昭至敬至
中祀典禮應較

五六七

大祀稍差嗣後恭遇

列聖

列后忌辰如在

中祀齋戒期內惟承祭之遣官及陪祀執事人員改用常服此外王公百官仍穿素服著為令諭軍機大臣等據吳璥奏武陟河內二縣境內沁河兩岸大隄沙土浮鬆歷年風雨淋卸隄身多有卑薄本年沁水盛漲隄頂僅高水面一二三四尺不等並有水與隄平

及漫過隄頂之處必須擇要增培派員逐處履勘除緩辦各工外武陟縣境內應增培隄工一萬四千五百餘丈估需銀三萬九千五百餘兩河內縣境內應增培隄工一萬五千六百餘丈估需銀一萬七千三百餘兩懇請照例借動司庫銀兩先行興修分年徵還等語著陳若霖再行遴員覆加查覈如係必應修築之工所估土方銀數亦無浮冒即據實奏明於今冬明春派員照估興修俾資保障其

借動銀兩分別年限攤徵歸款將此諭令知之欽差尚書署河南巡撫吳璥奏沁河漫口合龍下部議欽知府陳在中等補用議欽有差是日駐蹕蓮花背御營庚寅秋分夕

月於西郊遣禮親王麟趾行禮○

上御行帳閱吉林官員等射諭內閣朕此次巡幸盛京出關後自紅牆交界至廣寧以西橋梁道路尚屬整齊自廣寧以東沿途所辦道路多不堅實橋座架木未能穩固墊土亦薄朕策騎經行間有馬蹄蹕入空隙之處昨日駐蹕蓮花背大營地盤並有沮洳出水處所本日駐蹕上夾河和世泰等奏奏地方官應備席片器具冰塊等物多未辦齊並據富俊等奏奏承辦貽誤知縣福永請旨革職自請分別議處福永著即革職蓮花背營盤係城守尉鍾瑞專辦鍾瑞著交部議處該將軍府尹等督率無方多福瑞麟著交部議處富

俊著交部察議○遣怡親王奕勲往已故科爾沁達爾漢親王羅布藏棍布墓賜奠是日駐蹕上夾河西御營○辛卯

上恭謁

永陵未至碑亭即降輿慟哭步入

啟運門詣

寶城前行禮躬奠哀慟王以下文武大臣官員均隨行禮○諭內閣昨因廣寧以東沿途橋道修治未能妥協供備大營器具亦多缺乏

將承辦各員分別議處此事猶小因思朕祇謁

祖陵攸關鉅典豫年降旨飭辦為時並非匆遽況鑒輅親臨大小文武官員孰不思輸忱効悃踴躍爭先乃以例應供備之事尚泄泄怠忽以致臨時周章則地方官平日之因循疲玩其於民事必更遷延積壓漫不經心吏治之廢弛尚可問乎朕巡幸所及目覩如此各直省諒多類是著通諭督撫將軍提鎮等各

於所屬官員認真策勵務令早作夜思勤於其職事無巨細皆思敏則有功勤能補過力除因循疲玩積習用副朕諄諄訓誡之至意○是日駐蹕夏園行宮翼日如之○壬辰

上恭詣

永陵行大饗禮王以下文武大臣官員均隨行

禮○詣

顯佑宮

關帝廟拈香○閱興京城○御行幄閱吉林

官員等射○癸巳賞扈從大臣官員等加一級○是日駐蹕上夾河西御營○甲午遣官祭賢良祠○諭軍機大臣等本日步軍統領衙門奏河南永城縣監生孫世修呈控該縣知縣派買稽料勒折錢文一案已有旨交陳若霖審辦矣該監生呈內並有金鄉縣教匪侯武列率子侯來聘侯文聘至磋陽集與伊比鄰居住鄉約蘇華章等代為置買房地侯文聘於十八年閒在滑縣從逆被獲就誅侯

來聘於二十二年搬往碭山居住改名侯化南已被山東掣獲正法本縣民人李子盤李耀先樊志仁陳尚樸母化龍蘇華章俱係已故侯武列大徒弟等語孫世修所控侯武列父子習教從逆曾在永城縣碭陽集居住侯武列侯文聘侯來聘雖經先後身故正法其李子盤等俱係侯武列之徒亦應查明嚴辦著陳若霖即查掣李子盤等到案訊明果否曾從侯武列習教有無為匪不法情事按律懲辦其該縣辦料折錢科派閭閻等情一併秉公確訊分別定擬具奏將此諭令知之○又諭秀寧奏查明番子搶掠蒙古情形無關緊要一摺前據納爾松阿奏青海貝子台吉等前後呈報被番賊百餘人至數百人肆行搶掠沿海一帶蒙古王公未來會盟多不知去向等語當經降旨交長齡秀寧會同查辦茲據秀寧奏稱到任後查得蒙古被搶實止番賊二三十名其情形不過如內地之尋常

劫案蒙古一聞番子蹤跡即行逃竄將妻子衣物盡行委棄直同饋遺等語納爾松阿前奏係據蒙古台吉及營員等呈報固不免張大其詞但秀寧甫經到任於蒙古番子情形並未深知亦不過得之該管文武員弁傳述之詞秀寧未經詳察即據以入奏竟似身親目覩歷歷如繪者未免視事太覺輕易殊屬非是著秀寧仍遵前旨將此案確查究竟搶掠番賊共有若干人應如何查拏賊賊安輯蒙古之處悉心籌辦據實具奏將此諭令知之○是日駐蹕蓮花背御營○乙未旌表守正捐軀山西黎城縣民馬三多妻楊氏○免山東章邱鄒平二縣水災本年額賦○是日駐蹕噶布垓御營

大清仁宗受天興運數化綏猷崇文經武孝恭勤儉端敏英哲睿皇帝實錄卷之三百四十五

大清仁宗受天興運敷化綏猷崇文經武孝恭勤儉端敏英哲睿皇帝實錄卷之三百四十六

[illegible]

嘉慶二十三年戊寅九月丙申朔

上恭謁

福陵未至碑亭即降輿慟哭步入

隆恩門詣

寶城前行禮躬奠哀慟王以下文武大臣官員均隨行禮○臨宏毅公額亦都墓賜奠○賞宏毅公額亦都後裔散秩大臣公那蘇巴圖在乾清門行走理藩院尚書和世泰太子少保大理寺少卿成寧副都統銜署正白旗漢軍副都統巴革尚書福慶以郎中用○是日

駐蹕馬關橋御營○丁酉

上恭詣

福陵行大饗禮禮成即恭謁

昭陵未至碑亭即降輿慟哭步入

隆恩門詣

寶城前行禮躬奠哀慟王以下文武大臣官員

均隨行禮○臨武勳王揚古利墓賜奠○諭

內閣綿恩等叅奏本日由馬關橋至瓦子峪

道路泥濘請將富俊等交行在兵部嚴加議

處一摺本日朕恭詣

福陵行大饗禮並恭謁

昭陵典禮攸關尤應豫備整肅昨日午刻雨勢

已止今晨蹕路所經渾潦載途無寸步平整

轍跡縱橫亦漫無管束朕策馬前行泥深幾

於沒踝道旁見有站道官兵及迎鑾百姓並

無畚鍤修治地方文武員弁亦無一人料理

實屬怠玩富俊等督率無方咎無可辭姑念

富俊年老辦理諸務尚屬妥協惟此一事疏

忽免其治罪伊本年七十生辰朕本擬賞御

書扁額福字並優加錫賚現在扁額福字業

已書就仍行賞給其餘概行裁撤仍罰俸一

年以示薄懲和福著降一級補授金州城守

尉多福人本平庸兼管奉天府府尹事務地

方州縣皆其所屬一無調度不勝侍郎之任

著以六部郎中降補瑞麟現任奉天府府尹

地方是其專責其欲視多福尤重姑念伊甫

經到任格外從寬伊前因五臺差務賞戴花

翎著拔去花翎仍罰俸二年本日自馬關橋

至瓦子峪道路俱係承德縣承辦知縣實心

傳著即革職其富俊叅奏派往修墊道路顯

預從事之協領阿爾嵩阿依克唐阿佐領緒

英著各實降一級調用○又諭綿課等奏查

明科場條例先經刊刻錯誤頒發後續行更

正分別定擬一摺禮部頒行科場條例恭載

高宗純皇帝廟號有刊刻錯誤字樣於頒發後

始行校出更正非尋常錯誤可比原校不慎

之郎中孔昭虔著即革職穆克登額戴均元	寶興多山姚文田著交吏部都察院嚴加議	處速行由報具奏多山著即回京候議○調	刑部右侍郎穆彰阿為兵部右侍郎以錦州	副都統文孚為刑部右侍郎兼鑲白旗漢軍	副都統兵部右侍郎明興阿為盛京戶部侍	郎兼管奉天府府尹事通政使司通政使常	起為盛京工部侍郎○以署正白旗漢軍副	都統成寧為正藍旗漢軍副都統調正藍旗	漢軍副都統富祥為盛京副都統以金州城	守尉東明為錦州副都統○以戶部尚書景	安為滿洲繙譯鄉試正考官都察院左副都	御史齊布森為副考官內閣侍讀學士布彥	圖為蒙古考官○予	三陵守衛官員加一級並賞賚如例○旌表守	正捐軀江西樂平縣民程文炳妻朱氏○是	日駐蹕瓦子峪御營○戊戌	上恭詣
-------------------	-------------------	-------------------	-------------------	-------------------	-------------------	-------------------	-------------------	-------------------	-------------------	-------------------	-------------------	-------------------	----------	--------------------	-------------------	-------------	-----

昭陵行大饗禮王以下文武大臣官員均隨行	禮○至盛京詣	太廟尊藏	冊寶前行禮○御崇政殿賜皇子親藩等宴並	賞賚有差○遣官祭	福陵之	壽康太妃	昭陵之	懿靖大貴妃	康惠淑妃並公主園寢其親王貝勒及大臣	等墓以次遣官往奠○遣官祭	長白山	遼陽太子河	巨流河	渾河	北海	松花江諸神○遣官祭	遼太祖陵○
--------------------	--------	------	--------------------	----------	-----	------	-----	-------	-------------------	--------------	-----	-------	-----	----	----	-----------	-------

御製再舉東巡展謁

三陵大禮慶成記曰盛京為大清肇基之始嗣

服瞻依典至重也

三陵巍然在望水源木本紹統

傳心奠獻展禋不可闕也洪惟

太祖高皇帝興京建業遼瀋開疆

太宗文皇帝

受璽承

天肇造區夏景鑠熾昌

豐功俊德備載於

開國方畧自唐虞以來未有若斯之盛者也

世祖章皇帝定鼎燕京撫綏中外

聖祖仁皇帝三謁

珠邱致敬盡禮

世宗憲皇帝在潛奉

命往謁

祖陵是以未舉是典我

皇考高宗純皇帝丙辰

御極癸亥展祀敬誦

聖製盛京賦魏煥

天文幸昭美備仰窺

以祖宗之心為心居其要一言賅衆理

傳奕禩子子孫孫欽承勿替大清景運隆長實

繫於此也甲戌

再莅遂至吉林望祀長白鉅典彌隆

孝思益展矣戊戌

三詣留都九月丁亥

上諭夫以朕之景仰

前型勤懇若是必三至乃得曉然於心凡我子

子孫孫紹登大統者可不體朕志以為志睦

懷遼瀋舊疆再三周歷斬於

祖宗遺緒身親而目覩哉

又諭云我後世子孫誠能遵朕此旨處尊位而

常緬

前勞覽當年原嶽而興思拜舊里

松楸而感愴自必凜然於

天眷之何以久膺懋然於

先澤之何以善繼知守成之難兢兢業業永保
勿墜則我大清累洽重熙之盛洵可綿延於
億萬斯年矣非然者或輕視故都而憚於遠
涉或偶詣

祖陵視同延攬古蹟而漠不動心是則忘本而
泯良設有其人即為國家之不幸實不願我
後嗣之若此也子若孫可不恪奉朕訓而知
儆懼乎

人諭云或我子孫尚知遵朕此旨欲蒞陪京而
其時無識之臣工妄以為人主當端處法宮
綜理庶政不宜輕出闕外此即我朝之亂臣
賊子當律以恃命之罪誅之母赦煌煌

聖訓敬守欽遵曷敢少忽乎癸卯八月

四巡盛京自承德山莊取道柳條邊經由蒙古

部落

特命子臣及二王隨扈奠獻

三陵敬謹襄事長寧寺寶勝寺拜瞻

衣冠弧矢清寧宮

神幔葛燈子臣等跪聆

天語銘泐五中乙卯九月三日

宣諭立子臣為皇太子敬悉癸卯

謁

祖陵時已將子臣之名

默告

列聖子臣承此

隆恩實不忍少懈展謁

三陵之寸衷禮也亦情也爰於嘉慶乙丑秋舉

行謁

陵大禮悉遵

舊章作頌紀事至今又十有二年矣祭不欲疏

疏則怠怠則忘是以再舉東巡以伸積慕攜

皇次子是寧皇四子綿忻同來瞻禮庶幾仰

副我

皇考諄諄

垂訓以盛京為根本重地後世不可不再三周

歷之

聖旨感

天佑而欽

祖功承

先猷而啟後嗣予小子躬承

授璽親聆

訓政兢業守成而致祭

三陵時巡舊國為

傳心之大經大法言念及此奚可不溯此典實

不敢廢此典又何忍闕此典也子若孫稍存

偷安耽逸之心竟闕此典則為大不孝非大

清國之福

天

祖必降災於其身百官士庶若妄言阻止則為

大不忠非大清國之人必應遵

聖訓立置諸法斷不可恕况亂臣賊子豈可容

乎蓋盛京為國家大本

三陵為發祥始基躬親祀事稍抒慙忱誠要務

也彼昏愚無識習情偷安之徒比擬遊觀又以勞民藉口竟不知我朝舊制巡狩之典除道成梁皆出官帑令行禁止絲毫不累百姓屬車所經由之處蠲租賜復禁踏田禾夾路就瞻歡騰鼓舞方遂其望幸之忱全無困苦之態此予屢隨

鑾輅多年耳濡目染躬親閱歷者也敬誦

聖製南巡記云今歲甲辰攜諸皇子以來俾視

予躬之如何無欲扈蹕諸臣及僕役之如何

守法地方大吏之如何奉公民人之如何瞻

覲親近有不如此未可言南巡我

皇考垂訓盛京不可不去南巡必宜遲即不去

亦可禮典重輕大相懸殊豈可相提並論乎

景仰

前猷凜承

庭訓盡此誠敬之微忱分別重輕之典故此心

日久自明矣伏讀

聖製盛京賦融會決洽於深衷奚能述作於楮

墨哉恭依

頌言敬和

元韻稍抒寸誠昭哉嗣服毋忘

先烈期永保我大清萬年景命遂予之深願續

成頌曰戊寅秋仲敬詣瀋陽越十三載再舉

省方深感

帝佑普錫豐穰舊都

建極鞏固金墉八門四塔奧義蘊藏殿閣正寢

制備九重

開創鴻業奕葉繁昌我

考四巡訓言疊沛木本水源

心傳意會盛典昭明

湛恩汪濊夏清冬溫

訓政是賴蕙淨良安靖內綏外邳治保邦席豐

履泰尋繹

恩綸曷敢怠懈

天作皇清開基拓土五部政修八旗勳旅作邑

設營爰居爰處虔謁

祖陵聿瞻庭宇宴齊羣藩幣頒耆老賜復蠲租

溥及比戶感荷

考恩迴超往古才疏德薄兢業承基引長勿替

宵旰縈思秋霜春露悽愴瞻依鳴鑾遵路未

茂時和修祀展禮備歲上儀名王扈衛及高

句麗心孚情洽班聯久隨執豕侑

神清寧閔寢長白發祥式廓遼瀋東壁霞綢懸

幔留枕曉旭瞳眈雲霞淦淦萬福之原陳置

祭品

數訓渺躬跪聆接祚銘泐五中

聖謨虔稟永念率由

臨下有赫衍慶凝祥喬皇烏奕基自

天開

福由仁積仔肩守成御衆推赤故國再巡宮門

重闢敬紹

考言長欽

祖德聚我宗盟畋田宅崇政朝會十亭布筵

禮藏典備六御和鸞記以述志載賡

頌言

聖孝首諭告我君臣欽哉無怠惕若藐躬存誠永慕心堅志懃繩

武受

祐統緒長綿○諭內閣前因京城宗室支派蕃衍盛京風俗淳厚物產豐饒酌量移居以養以教前已按名給餉計歲授租築室畀產俾安生業茲朕再莅陪都體察邇年市值加增恐食指稍多之戶所得餉租尚不敷養贍著

加恩將移駐盛京宗室月食餉銀三兩之戶每年於盛京戶部內倉額徵粟米項下每戶賞給二十二倉石春秋兩季照數給領俾生計益臻寬裕用示朕布惠推恩至意○予扈從王公大臣官員紀錄加級有差○旌表守正捐軀安徽懷寧縣民婦李氏○是日駐蹕盛京舊宮至庚戌皆如之○己亥

上御嘉蔭堂賜扈從王公大臣蒙古王貝勒貝子公額駙台吉及盛京吉林將軍等食並賞

賚有差○諭內閣朕此次巡幸盛京諭令軍機大臣將緣事發往盛京吉林黑龍江三處之官犯查明原犯案由具奏茲據開單呈覽朕詳加披閱凱音布因派查

泰陵工程率意欲上

寶城查勘並妄稱牆身敝裂其心究為慎重起見延福侵用工程銀兩七次免勾減等發往盛京曾在工程處出力良禧代匠役請分料錢係屬辦公錯誤吉綸在步軍統領任內獲咎僅予革職其在山東巡撫任內廢弛亦非止吉綸一人高勳難姦典雇幼童其所姦係先經犯姦之人孟屹瞻收養難民子女為婢妾其時亦不止孟屹瞻一人伊在軍營曾有微勞富廣因懷疑誣指莫氏因姦勒斃其夫莫氏本係再醮之婦王召南與雇工人妻通姦致本夫自斃其妻姦其情節均尚非不可原宥凱音布延福良禧吉綸高勳孟屹瞻富廣王召南俱著施恩釋回旗籍其餘各官犯

情節較重俱不准釋回○又諭朕此次巡幸盛京諭令富俊將緣事發往盛京吉林黑龍江三處之宗室覺羅等原犯案由查明具奏茲據富俊開單呈覽朕詳加披閱恩福因醉後用盤片劃傷頭皮訛賴鄰居姚元寶錢文恒伯在科布多叅贊大臣任內令屬員在蒙古地方挖煤私借鋪戶銀兩隆順在倉監督任內誤揭張景泗改廠挪米敬徵屏翰充當族長失察海康等習教從逆桂芬讀祝錯誤慶傑在熱河副都統任內收受屬員餽送分金綢武布前在吉林收受秀林幫繳官項等銀覈其情節均尚非不可原宥除敬徵屏翰武布慶傑另行降旨加恩外恩福恒伯隆順屏翰桂芬俱著加恩釋放回京伊等家屬並准其一併帶回其餘各犯情罪較重俱不准釋回明歲慶典亦毋庸查辦○又諭朕昨聞富俊查奏發遣盛京等處宗室覺羅犯事案由已降旨施恩將恩福等八人分別釋放錄用

矣恩福於乾隆三十二年因醉後劃傷頭皮訛賴鄰人錢文當時宗人府王公等即以恩福下賤不堪奏請重責四十板發往盛京充當苦差五十餘年未經釋回可見彼時宗室率皆安分自重小有過愆已干譴謫近年來宗室等所犯罪辜如板折官廳槍架不顧行檢等事層見疊出較之恩福案情何啻倍蓰若不嚴加教誡必致風氣愈趨愈下著傳諭管理宗人府王公等務於平日盡心訓迪俾

宗室等父教其子兄誡其弟各知敦品勵行爭自濯磨罔干憲典用副朕教誨成全至意○賞扈從蒙古王貝勒貝子銀有差○免盛京戶部莊頭本年應交倉糧○庚子

上詣

天壇

堂子行禮○御崇政殿皇子及扈從王公大臣官員蒙古王貝勒貝子公額駙台吉盛京文武官員朝鮮國使臣等行慶賀禮○詣

文廟瞻禮○臨克勤郡王岳託墓賜奠○予奉天吉林辦差官員各加一級○賜朝鮮國王李瑢

王李瑢

御製詩章

御書福字並賞齊國王及陪臣如例○命奉天

吉林黑龍江等處除十惡死罪不赦外餘一

應各罪俱減等發落軍流以下等罪免○辛

丑

上御大政殿賜皇子及扈從王公大臣蒙古王

貝勒貝子公額駙台吉盛京文武官員朝鮮

國使臣等宴並賞齊有差○免奉天興京承

德遼陽牛莊蓋州熊岳復州金州岫巖鳳凰

城開原錦州寧遠廣寧義州等十五處旗地

本年應納米豆草束十分之五並二十二年

以前積欠○免奉天內務府莊頭二十二年

以前積欠○壬寅

上詣

地壇行禮○臨直義公費英東墓賜奠○賞直

義公費英東後裔乾清門侍衛公盛貴散秩大臣 癸卯

上詣

清寧宮祭

神賜皇子及扈從王公大臣蒙古王貝勒貝子

公額駙盛京吉林將軍等食胙○命奉天所

屬各學歲考廣額一次六名以上者廣額三

名四五名者廣額二名二三名者廣額一名

○免盛京官員借支俸餉銀四萬兩有奇○

甲辰諭內閣朕再莅盛京舉行謁

陵大典已周詣

三陵大禮慶成至盛京後升殿筵宴以及清寧

宮祀

神還應典禮具備迴鑾之期本定於初九日因

值陰雨昨降旨改於十一日現在雨勢連綿

未止道途益形泥濘若如期啟蹕不特行營

帳殿恐致遲誤且念扈從官兵亦未免過於

勞勩十一日仍暫緩啟鑾朕駐蹕盛京俟天

氣晴朗沿途橋道修理完整再行降旨定期
迴鑾○旌表守正捐軀直隸新安縣民馬添
保女馬氏○乙巳賞卹從兵丁等一月錢糧

○丙午遣官祭

都城隍之神○諭內閣朕現已降旨於本月
十六日自盛京啟鑾著傳諭富俊明興阿瑞
麟將沿途正副橋道督率文武官員多集兵
夫趕緊修治務令一律平坦如途間微有泥
滓朕亦不加深責儻有深泥積淖竟致阻滯

難行必將該將軍等及承辦文武官員一併
從重治罪並派松寧色爾袞於十五日帶領
吉林官兵沿途逐處巡查所有前營行走之
車輛俱令於副道經行不准碾壓御道如御
道見有轍跡惟該二人是問松寧等於車駕
至老邊大營後即向次站如前管約俟至廣
寧之後再照常隨扈○旌表守正捐軀直隸
高陽縣民唐來柱妻魏氏○丁未諭內閣朕
此次再舉東巡祇謁

三陵後駐蹕盛京百禮具備昨因陰雨暫緩迴
鑾日期尚有恭謁

東陵典禮朕心深為篤切已降旨於本月十六
日自盛京啟鑾斷不能再為展緩沿途橋道
著富俊明興阿瑞麟督率承辦各官趕緊修
治此內正副橋座河流深處必須搭造堅固
其兩厓水淺處所接搭餘橋量為收短均無
不可經行道路不特御道應修治平整即副
道亦須將深泥積淖之處修整平實俾車輛
馱載不致陷沒方能順行無阻總責成該將
軍等嚴催妥辦若至啟鑾之期橋座未成致
有貽誤自將軍以下承辦文武大小官員概
行革職仍令戴罪趕辦如剋期竣事再施恩
開復儻仍有玩延即各從重治罪○旌表守
正捐軀江蘇蕭縣民女蔣氏○己酉諭內閣
禮部刊刻科場條例於恭載
高宗純皇帝廟號致有訛誤非尋常疏忽可比
惟

宗字訛作

祖字同為尊崇隆號尚與字義舛謬者有聞吏部等衙門議將穆克登額寶興多山姚文田各降四級調用戴均元任內有革職留任之案議以革任尚可量予施恩戴均元前此辦理河工及在京辦理部務均屬盡心出力著格外加恩改為革職留任穆克登額歷任年久辦事亦尚細心姚文田在內廷行走勤慎且不能常川到署俱著加恩改為降四級留任多山甫任侍郎即不留心公事人亦平庸寶興任禮部侍郎較久且前在上書房授讀全不盡心其咎較重本應照部議降調姑念戴均元等業已施恩該二人亦予從寬多山著降一級調用寶興著降二級調用○諭軍機大臣等從前

皇考高宗純皇帝駐蹕避暑山莊恭遇

萬壽聖節惟隨扈王公大臣等恭遞如意並呈進貢品其在京王公大臣等從無差人至熱

河齋進如意貢件之事本年萬壽慶辰朕駐蹕興隆寺隨扈王公大臣官員即於行宮行禮著留京王大臣傳諭儀親王成親王慶郡王永璘及在京王公大臣等概不許差人至行在呈遞如意貢品其輪赴行在接駕謝恩之人亦不准攜帶如意至彼呈遞將此諭令知之○賞降調盛京工部侍郎多山頭等侍衛為哈密辦事大臣大理寺卿寶興三等侍衛為吐魯番領隊大臣○庚戌諭內閣藍翎侍衛慶善於本月初八日先行起程朕前曾降旨遇朕巡幸嚴禁扈從人等先期起程今慶善膽敢先期起程且聞朕啟鑒改期仍不趕回甚屬膽大皆由該管章京侍衛等平日管轄不嚴所致著將該管章京侍衛等交行在兵部議處並派鄂倫即刻起程沿途詳詢將慶善拏獲傳旨革職解送行營交軍機大臣會同行在刑部嚴審定擬具奏

大清仁宗受天興運敷化綏猷崇文經武孝恭
勤儉端敏英哲睿皇帝實錄卷之三百四十六

大清仁宗受天興運敷化綏猷崇文經武孝恭
勤儉端敏英哲睿皇帝實錄卷之三百四十七

欽此
嘉慶二十三年戊寅九月辛亥
上自盛京迴鑾○是日駐蹕老邊御營○壬子
諭內閣明興阿等奏承德等廳州縣沿河窪
地偶被偏災一摺本年奉天所屬地方雨澤
調勻田禾暢茂惟承德遼陽海城寧海新民
岫巖等廳州縣沿河低窪地畝間被淹浸著
明興阿等即速勘明成災分數據實覈辦再
本月初旬以內盛京又連次大雨恐尚有續
行被淹處所昨朕自盛京啟鑾本日駐蹕黃
旗堡經過承德新民兩廳縣境見沿途禾稼

有業經刈獲者亦有刈獲稍遲浸入水中者兩日因修墊蹕道所用秣糈不可數計自係地方官購自民間但此皆小民日用所需今淹浸地畝難望有收而登場糈料又不無耗費該二處百姓踴躍急公尤堪軫念除本年及二十四年承德縣新民廳地丁錢糧前已降旨蠲免外著加恩將承德縣新民廳二十年應徵地丁錢糧再蠲免半年俾閭閻倍霑渥澤其派出辦差官員兵丁借支俸餉銀

十二萬一千餘兩前經降旨免扣銀四萬一千餘兩連日該官兵沿途當差甚為奮勉著再加恩免扣銀一萬兩其餘七萬兩仍分作十五年扣繳以示體恤富俊明興阿瑞麟三人於數日之間將橋道一律趕辦整齊亦應量予施恩富俊著寬免違例奏留通判常山革職留任處分一摺瑞麟前因瓦子峪道路泥濘拔去花翎罰俸二年著賞還花翎寬免罰俸一年仍罰俸一年明興阿並無處分著

紀錄二次以示獎勵○又諭隨扈人員屢經降旨不准先走前營況侍衛職司宿衛更不得擅離職守即非直班日期亦應每日前赴宮門乃慶善擅自前行數日之久杳無蹤跡此皆該管章京等平日因循疲玩約束不嚴敏政著革去辦事章京降為二等侍衛普瑞著革去侍衛什長降為三等侍衛俱毋庸罰俸嗣後遇有辦事章京侍衛什長缺出該二員永遠不准挑補○諭軍機大臣等朕於本

月十六日由盛京啟鑾現至黃旗堡大營兩日天氣晴朗道途平坦計於二十八日進山海關是日即在文殊庵行宮賞飯所有直隸文武官向准入賞飯之列者著方受疇查明開單於三五日前具奏候朕酌派再十月初五日至興隆寺行宮初六日朕萬壽慶辰即在興隆寺行宮駐蹕一日已有旨派隨駕之呼圖克圖喇嘛等在興隆寺奉經方受疇不必因值慶節又招集僧人等在寺祝誦是日

行在王公百官及直隸文武官在行宮行禮慶賀但准於宮門及牌樓懸掛綵絢此外一切照常不得又添繁文縟節也將此諭令知之伊犂將軍晉昌奏審擬披甲烏木柯依踢傷閒散占巴拉克巴斃命一案得旨此案烏木柯依因占巴拉克巴年老酒醉絆跌將伊詈罵並用火池柴棒向毆該犯用腳踢格致傷左乳斃命依鬪殺律問擬絞候本應歸入緩決惟占巴拉克巴年逾九旬烏木柯依

格毆致斃其命情近侮老著入於明年秋審情實○緩徵山西陽曲太原榆次徐溝靜樂隰孟岢嵐八州縣旱災電災本年額賦○緩徵陝西吳堡縣電災本年額賦並給災民一月口糧○是日駐蹕黃旗堡御營○癸丑都察院奏福建同安縣民蘇添來呈控匪徒糾衆搶劫地方官不為究辦一案得旨此案同安縣民蘇添來所控該縣匪徒葉藝等倚恃族衆糾約多人持械搶劫伊叔蘇王家將蘇

玉登時砍斃自嘉慶十一年控經該縣勘驗詳報迄今十三年之久案懸未結經屍屬控告百餘次總未緝犯究辦該省吏治因循疲玩已極深可痛恨除汪志伊王紹蘭業經褫革外董教增史致光接任以來並不嚴催督緝著傳旨申飭該督等即飭屬將葉藝等各犯迅速拏解親加嚴鞠按律定擬具奏不得再行批委延玩干咎所有十一年九月以後之歷任道府知縣著該督等查明在任月日

按其遲延久暫據實叅奏交部分別議處原告蘇添來該部照例解往備質○以廣東海口協副將丁紹奉為碣石鎮總兵官○旌表守正捐軀河南太康縣民女張氏○是日駐蹕蔣家店御營○甲寅緩徵河南武陟修武孟安陽湯陰內黃臨漳汲新鄉獲嘉濬十一縣水災新舊額賦○展緩廣東高要縣被水地畝帶徵額賦○是日駐蹕常家屯御營○乙卯

上詣

北鎮廟拈香○遣官祭

歷代帝王廟○諭內閣盛京

陵寢宮殿以及繚垣柱板各項工程前於嘉慶十年有旨令盛京將軍會同盛京工部隨時修整並著軍機大臣每閱二年提奏請旨簡派宗室王貝勒貝子公暨大學士六部尚書等數人前赴盛京查看一次又向例每屆五年派京卿一員巡查奉天由盛京五部侍郎

內奏派二員巡查吉林黑龍江因恩派員巡閱原以慎重官守稽查懈怠然定立年限則期可豫知即有弊端不難先期掩飾於事仍無裨益嗣後該三省屆期閱看巡查之例俱著停止奏派朕酌量應行查閱之時特旨派員前往以昭覈實○又諭盛京橋梁道路歷屆俱准其照關內之例一體報銷此次朕再蒞陪都山海關以外蹕路自大臺至興京由興京至盛京均未修治妥協所有此數站橋

道動用錢糧俱不准開銷責令富俊分賠一成多福分賠三成承辦各員分賠六成其大臺以西至山海關外橋梁道路仍加恩准其照關內之例一體報部覈銷○又諭伊冲阿奏匪徒聚眾偷挖鉛砂械鬪拒捕將委拏玩誤各員據實奏一摺熱河承德府屬烟筒山聚有匪徒盜挖鉛砂爭砌械鬪經伊冲阿訪聞派員查拏所辦甚是朕每年駐蹕熱河烟筒山在承德府境內豈可容留匪徒聚集滋事必應嚴行查禁著該都統責成地方官將烟筒山永遠封禁出示曉諭不許奸徒私自開採隨時巡查驅逐如敢聚集多人立即嚴拏從重懲治○此次派委都司陶振邦經歷王恒德經該都統飭緝為首要犯三十餘名僅獲糾挖首犯六名其械鬪及拒捕傷差要犯一名未獲實屬延玩陶振邦王恒德俱著先行革去頂帶勒限責令緝拏如能將要犯拏獲多名再行奏請開復儻敢仍前怠玩

即行革職示懲○緩徵甘肅皋蘭武威西寧大通四縣被旱被雹被水地畝本年額賦○是日駐蹕廣寧行宮○丙辰諭內閣慶善係傅恒元孫世祿之家非不知法度者可比身充侍衛年甫二十二歲初次當差即貪圖安逸不肯騎馬在途雇車乘坐即此一端已應責處革職乃復擅離職守私出四百里外向莊頭索取租銀曠誤至十餘日之久實屬膽大妄為敏政當慶善告知欲赴閭陽驛索取租銀不行阻止轉為之畫策令捏病請假及慶善遣僕告假心知其偽復對眾佯言令其安心養病不可他往實屬巧詐托津等將該二人俱擬發新疆實屬罪所應得著派二阿哥四阿哥及御前大臣軍機大臣看視先將慶善重責六十板即行發往伊犁効力贖罪敏政重責四十板即行發往吉林効力贖罪此次係用內廷發出之板扑責尚屬從輕以家法處治嗣後侍衛內如再有似此違禁私

行者朕必親臨看視用刑部官杖重責決不寬恕其各凜遵毋怠○是日駐蹕金剛屯御營○丁巳諭內閣孫玉庭等奏酌議糧船歸併裝兌以節糜費一摺江蘇東臺縣應運漕糧不過一萬七千餘石乃歷來派裝漕船至七十餘隻米少船多幫丁藉端勒索徒為地方之累著照該督等所請自今冬為始將該縣額徵正耗米一萬五千三百九十餘石改歸興化通州鹽城三所二十八船裝運其以鳳還漕正耗米一千七百餘石即派裝兌之二十八船分裝灑帶計所裝米數與各幫情形相等毫無偏枯此外毋許多派一船致滋弊竇至此項漕米既經歸併裝載原設船隻計有贏餘並著該督等查明除應行拆修者照例變價外其尚堪兌運船隻遇有他幫屆限應造之船即撥歸抵用以節繁費○又諭孫玉庭等奏請定鹽捕通判情銷處分並責令營員一體緝私一摺湖北宜昌府撥貯淮

鹽十萬包設立鹽捕通判領運分銷向止定有缺銷罰扣薪水章程並未明定情銷處分以致日漸懈弛任聽川私浸灌不特宜昌一府銷不足額下游網引悉受其害自應嚴定考成俾有專責著照所請即以每年運鹽十萬包作為十分銷數責成該通判緝私運售如銷不足額按照情銷分數據實叅處分別降革其宜昌上游歸州一帶並著宜昌鎮派弁督兵會同移駐文員實力緝私如上游堵截不力准該通判稟揭查明該文武員弁嚴叅究辦務各行之以實以肅釐政○調正黃旗領侍衛內大臣鄂勒哲依圖為鑲黃旗領侍衛內大臣以兵部尚書和寧為正黃旗領侍衛內大臣○調盛京將軍富俊為吉林將軍以正白旗漢軍都統賽沖阿為盛京將軍調熱河都統伊冲阿為正白旗漢軍都統以吉林將軍松寧為熱河都統○怡親王奕勲薨遣熱河都統松寧往奠茶酒賞銀二千兩

治喪派散秩大臣宗室奕禮照料喪務回京予祭葬諡曰恪○旌表守正捐軀浙江遂安縣民余作熟妻陳氏○是日駐蹕興隆屯御營○戊午諭內閣從前

皇考高宗純皇帝

萬壽慶辰遇在避暑山莊時王公百官皆穿蟒袍四日朕此次萬壽在興隆寺行宮前後皆值行程與

皇考駐蹕山莊不同著傳知扈從王公文武百官十月初五日自五里墩起程時仍穿行衣至興隆寺即換穿蟒袍初六日穿蟒袍一日初七日起程時仍換行衣其兵丁人等行衣各聽其便○又諭董教增等奏商民置造海船免立禁限一摺閩省商民置造海船大小本無限制嗣因洋匪滋事劫坐商船奏明商民造船祇以一丈八尺為準原屬一時權宜之計現在洋面肅清該省商民以船小不能重載難涉風濤多致失業並官運兵糧亦多

積壓茲據該督等查明請復舊章著照所請嗣後商民置造船隻梁頭丈尺照前聽民自便免立禁限仍報官給照驗烙放行其配載米穀亦令查照舊章如數配運毋任積壓○軍機大臣等奏審擬已革侍衛扎蘭保呈控協領扎呼岱一案得旨此案已革協領扎呼岱因承辦護務輒向入海民人散放小票勒索幫銀又私役軍人擅行枷號此二事實係違例妄為扎蘭保因向扎呼岱索詐不遂即挺身具控尤為卑鄙無恥情節俱屬可惡扎呼岱著改為枷號兩箇月俟將本年所放護票查明有無塌欠追賠完竣即帶同妻子發往福建駐防充當披甲扎蘭保現已解京著即在京枷號兩箇月滿日帶同妻子發往廣東駐防充當披甲該二犯本身止准披甲永遠不許升遷其子孫等仍准出仕當差餘依議○旌表守正捐軀山西沁州民牛石柱妻王氏浙江長興縣民錢廣秀妻石氏○是日

駐蹕杏山東御營○己未上御行殿勾到新疆雲南貴州廣西情實罪犯停決新疆斬犯二人絞犯四人雲南斬犯四人絞犯四人貴州斬犯八人絞犯九人廣西斬犯八人絞犯六人餘七十人予勾○旌表守正捐軀山東蘭山縣民郭運方妻張氏○賞廣寧門外普濟堂煮賑小米三百石○是日駐蹕五里河村御營○庚申上御行殿勾到奉天福建廣東情實罪犯停決奉天斬犯七人絞犯十二人福建斬犯三人絞犯二人廣東斬犯三人絞犯十四人餘一百五人予勾○諭內閣朕此次臨幸盛京御前行走之噶勒桑棟羅布布彥溫都爾瑚乾清門行走之諾爾布琳沁錫第俱扈從當差今伊等各回游牧年班若復令來京往返不無跋涉本年年班均著加恩不必來京俟明年七月至熱河接駕隨扈進哨以示朕體恤蒙古臣僕之意○又諭熙昌奏審訊巡檢蔡

觀呈控拏賭被毆懸案不結大概情形一摺
此案巡檢蔡觀因查拏賭犯被衆搶犯毆辱
巡撫巴哈布接稟後即應嚴拏案犯究出確
情據實叅辦乃懸案三載延宕不結實屬因
循疲玩巴哈布不勝巡撫之任著交部嚴加
議處即行來京聽候部議湖南巡撫印務著
翁元圻暫行護理臨湘縣知縣林鳳儀巴陵
縣知縣陳大綱飭拏犯證久未獲解現經熙
昌節次催提仍有未獲之犯均著先行革去
頂帶勒限嚴緝如能迅速獲解再行奏請開
復儻仍前怠忽即行革職以儆玩延○湖廣
總督慶保奏拏獲邪教出力人員同知范正
祥等升用有差○以河南布政使吳邦慶為
湖南巡撫調江寧布政使琦善為河南布政
使以陝西按察使恒敏為江寧布政使河南
南汝光道特通阿為陝西按察使○是日駐
蹕沙河所東御營○辛酉定覆覈朝審人犯
例諭內閣向來直省秋審人犯由各督撫分

別情實緩決刑部再覆加覈議其有原擬未
協經刑部改緩為實者皆例有處分惟朝審
人犯但由刑部分別情實緩決不加覆覈立
法尚未周備著自明年為始朝審人犯經刑
部堂官議後即由該部奏請特派大學士尚
書侍郎數員覆覈其有部擬實緩未協應行
改擬者著派出之員奏明請旨以昭慎重○
又諭前據富俊等奏請撥借羨餘銀三萬兩
交各州縣承辦橋梁道路分年扣還歸款該
地方官辦理差務一切畚鍤掃除不能不資
民力今此項借支銀兩若責令依限清完伊
等廉俸無多安得餘貲歸款甚或再向民間
攤捐灑派不免重累閭閻且恐假手吏胥致
滋擾累所有此次各州縣借領羨餘銀三萬
兩俱著加恩免其繳還以示朕軫懷民隱至
意○是日駐蹕周家村御營○壬戌
孝慈高皇后忌辰遣官祭
福陵○諭內閣伯麟等奏東川府應試生童請

改附省棚考試一摺雲南東川府屬生童向
附曲靖府棚考試茲據伯麟等奏該處道途
險峻兼有江水阻滯應考生童跋涉維艱如
思著照所請准其將東川府屬文武生童改
附省棚仍遵照舊例歲科接連考試以順輿
情其會澤縣每年徵收公件項下應解經費
銀兩即行撥歸昆明縣應用○戶部議准貴
州巡撫朱理疏報湄潭縣開墾地一十六畝
照例升科從之○是日駐蹕中前所御營○

癸亥賜扈從王貝勒公額駙大臣及直隸總
督等食並賞賚有差○是日駐蹕文殊庵行
宮翼日如之○甲子

孝敬憲皇后忌辰遣官祭

泰陵○

上詣

天后宮

海神廟

龍神廟拈香○諭內閣朕前次臨蒞盛京迴

蹕至山海關時曾經內務府大臣縕布等奏
請將太監等車輛馬匹內有疲乏者量予更
換本年進關後和世泰等私行付給衆太監
經朕查出始知其故付給車輛之先並未查
照向例具奏實屬應奏不奏伊等前因隨扈
勤勉特賞加二級茲漸形疏懈和世泰禧恩
那彥寶俱著將前加二級內銷去一級以示
薄懲○又諭和舜武奏特參諱盜不報知縣
一摺署臨邑縣知縣沈棠於盜犯嚇禁事主

之案勘驗後並不通詳迨鄰邑獲犯開解該
員訊供後亦不詳報實屬藐玩沈棠著即革
職仍勒令協緝以示懲儆近來外省州縣官
因盜案例有開參處分輒規避諱匿於事主
具報時多方留難抑令改強為竊以致宵小
等肆無忌憚心計鼠竊之案地方官尚緝拏
究辦至盜劫重情地方官置之不問獲贓既
多且可倖逃法網而被劫之家亦以報竊尚
可邀准若執意報盜則先進官吏之怒率役

多人以履勘為名。百端肆虐。是盜賊之敢於肆行。皆不肖州縣導之使然。此種惡習。各省皆所不免。而山東為尤甚。著和舜武督率溫承惠實力整頓。如有仍前諱匿縱盜殃民者。立即嚴叅究辦。勿稍姑息。○諭軍機大臣等。秀寧叅奏前辦事大臣納爾松阿。暨扎薩克郡王沙克都爾一摺。納爾松阿前在辦事大臣任內。於蒙古越境擅移游牧。不行禁止。率給印票。聽其搬移內地。實屬謬妄。納爾松阿前已發遣烏魯木齊。著於配所枷號一年。以為辦事糊塗者戒。扎薩克郡王沙克都爾達例遷帳內地。復不遵調回牧。著交理藩院議處。台吉索諾木敏珠爾現已回牧。著免其察議。並著長齡秀寧傳諭沙克都爾。蒙古外藩各有一定界址。違例擅入內地。法令綦嚴。該郡王軌敢以風聞黑番搶掠之言。越界移帳。姑念伊係糊塗蒙古。不加深責。僅交理藩院議處。係屬格外天恩。即飭令迅速移回原牧。

地方若再稍有違抗。定行從重治罪。傳諭後。即一面押令出境。毋任遷延。將此諭令知之。○乙丑諭內閣。御史馮清聘奏嚴禁地方官交結紳士一摺。直省地方官有臨民之責。如遇所屬紳士中有橫行鄉曲者。俱當秉公懲辦。自不應交接往來。致招物議。其紳士家居亦宜恪守禮法。引嫌自愛。方合非公不至之義。至王奎聚以廢員窩賊。事出情理之外。與地方官交接紳士無涉。嗣後直省官吏紳衿各宜凜遵法度。慎守廉隅。毋得私相結納。以端士習。而肅官方。○除江蘇寶山縣築塘占廢田二頃八畝。有奇。額賦。○是日駐蹕深河村西御營。

大清仁宗受天興運敷化綏猷崇文經武孝恭
勤儉端敏英哲睿皇帝實錄卷之三百四十七

大清仁宗受天興運敷化綏猷崇文經武孝恭
勤儉端敏英哲睿皇帝實錄卷之三百四十八

教修

嘉慶二十三年戊寅冬十月丙寅朔享

太廟遣成親王永理恭代行禮○遣官祭

永陵

福陵

昭陵

昭西陵

孝陵

孝東陵

景陵

泰陵

泰東陵

裕陵遣官祭

孝淑皇后陵寢○遣官祭

瑞慧皇太子園寢○頒嘉慶二十四年時憲

書河東河道總督葉觀潮等奏報秋汛安

瀾出力員弁下部議敘○命古城領隊大臣

額特布來京賞降調湖南巡撫巴哈布二等

侍衛為古城領隊大臣賞蹕路經過直隸

地方文武官員加一級○是日駐蹕天台山

行宮○丁卯諭軍機大臣等昨據葉紹楨奏

查訊富綸於護巡撫任內奏奏桂平令遲誤

兵米荔浦縣民韋政紀呈控疊搶斃命兩案

摺內聲敘遺漏情由富綸情詞支飾意存挾

制若由伊一人審辦恐不足以服其心當經

降旨交熙昌前赴粵西會同阮元審辦本日

據富綸奏伊於護撫篆後見廣西吏治廢弛

命盜要案延玩不結倉庫亦多虧缺力加整

頓將柳州府楊兆璜荔浦縣呂怡曾楊如松

桂平縣史茶三案節次參奏又審出上思州

民黃惠彰博白縣民杜十二鬱林州武舉黎

開鑽三案於回藩司本任後呈明巡撫請參

復查得庫貯局錢有偷減撓雜情弊詳請巡

撫究辦皆為公起見不料署藩司程卓樑於

參奏史茶一案捏稟總督謂遣員誘稟經總

督參奏及葉紹楨奉旨查辦業經據實稟覆

有署桂林府福寧阿捏稱巡撫諭令將原稟

刪改及遵改稟覆葉紹楨又下札駁詰總緣

臬司以下各員皆先經到任一氣相聯意欲

文致其罪便於消弭重案又河池州州同吳

居敬年老重聽與鹽法道宋鳴琦兒女姻親

詳請調署鎮安府通判等語並將各案稟詳

呈詞及現署藩庫錢樣十文密封進呈此案

富綸參奏桂平令遲誤兵米將程卓樑附參

程卓樑以未將伊歷次稟揭催辦緣由聲敘

謂富綸有意挾嫌及葉紹楨查訊亦以富綸

情詞支飾意存挾制令富綸以伊到粵後力

加整頓臬司以下皆欲藉端文致並有福寧
阿代改稟藁情事彼此各執一詞朕大公至
正毫無成見滿漢臣工從不偏袒該撫藩等
所奏前後各案皆有文卷可憑不難辨其曲
直熙昌等惟當虛衷查察如果富綸原奏錯
誤復輾轉偏執即將富綸奏藩司印篆委
員護理若富綸前奏並無錯誤而葉紹樞程
卓樞有意文致即將葉紹樞等奏巡撫印
篆阮元暫行署理其所呈樣錢實係薄小缺

裂廣西省局所貯錢文不下萬餘串更無難
剖別真偽著熙昌等點查局錢如俱與所呈
樣錢一例則偷減情弊顯然即行據實究辦
若偶有似此錢文或係富綸取自他處則其
藉端挾制亦不問自明熙昌等總當一秉至
公不可稍存偏畸致有屈抑將此諭令知之
○兩江總督孫玉庭等奏報秋汛安瀾出力
員弁下部議敘○福建臺灣鎮總兵官武隆
阿以病乞假允之以浙江平陽協副將慶山

署臺灣鎮總兵官○給江蘇蕭縣被水災民
一月口糧○是日駐蹕夷齊廟行宮○戊辰
戶部議准湖北巡撫張映漢疏報石首縣開
墾地四十二頃九十五畝有奇照例升科從
之○是日駐蹕柳新莊行宮○己巳駐蹕五
里墩御營○庚午

上以萬壽節御興隆寺行宮賜扈從王貝勒公
額駙大臣及直隸總督等食並賞賚有差○
諭內閣吏部議駁慶保等奏留捐升知州與

例不符一摺奏行恕在知縣任內有錢糧盜
案展參處分例不准捐離任分發上年該督
等奏請令其遞捐分發留楚補用曾經降旨
飭駁茲慶保等不將前案聲敘復行請奏殊
屬含混著不准行慶保張映漢俱著交部議
處○賞迎鑒老民銀幣有差○是日駐蹕興
隆寺行宮翼日如之○辛未

萬壽節遣官祭
太廟後殿○遣官祭

福陵	昭陵	昭西陵	孝陵	孝東陵	景陵	泰陵	泰東陵	裕陵○遣官祭	孝淑皇后陵寢○遣官祭	顯佑宮	東嶽廟	城隍廟○	上御興隆寺行宮蘊輝堂皇子及王以下文武大臣官員行慶賀禮○以	萬壽節慶賀禮成賜興隆寺名萬壽興隆寺小泉河名榮輝河開復直隸總督方受疇提督徐錕布政使姚祖同降級處分賞辦差官員
----	----	-----	----	-----	----	----	-----	--------	------------	-----	-----	------	------------------------------	--

加級紀錄有差並賞兵丁半月錢糧再免蹕路經過地方本年額賦十分之二○壬申諭內閣本年朕萬壽慶節在興隆寺行宮受賀三阿哥在京禮宜具行禮賀摺或親交留京王大臣由本報具奏或交總管太監由官報具奏或專差外邊詣達一人齋至行在呈進均無不可乃昨日駐蹕興隆寺本日駐蹕隆福寺俱未見有三阿哥賀摺三阿哥年已二十餘歲心地太不明白大為失禮三阿哥著實罰月銀半年分作十二箇月坐扣其外邊詣達俱著實降一級○是日駐蹕隆福寺行宮 癸酉	上恭謁	昭西陵	孝陵	孝東陵	景陵	裕陵俱未至碑亭即降輿慟哭步入
---	-----	-----	----	-----	----	----------------

隆恩門詣

寶城前行禮躬奠哀慟王以下文武大臣官員

均隨行禮○是日駐蹕桃花寺行宮○甲戌

駐蹕白澗行宮○乙亥

皇后千秋節宮內行禮如儀停止筵宴及在外

公主福晉命婦行禮○諭內閣

永陵

福陵

昭陵總管等向無更換年限守護未免年久著

加恩嗣後俟滿五年奏請更換回京仍在本

任上行走現在總管內如有已滿五年者著

賽冲阿即行奏請更換○賞蹕路經過看守

各行宮弁兵等半月錢糧○緩徵齊齊哈爾

黑龍江墨爾根打牲烏拉四處貧民舊借口

糧○是日駐蹕烟郊行宮○丙子

上還宮以都察院左都御史吳芳培為順天

武鄉試正考官內閣學士毛謨為副考官○

丁丑

上詣

奉先殿

壽皇殿

大高殿行禮○予告太保大學士董誥卒晉贈

太傅入祀賢良祠遣定親王綿恩帶領侍衛

十員往奠茶酒賞銀二千兩治喪予祭葬諡

文恭賞其子淳四品京堂○戊寅

上詣

昭顯廟拈香○御乾清門聽政○諭內閣長

齡奏追繳虧空二限屆滿酌分正雜款項懇

請展限一摺甘省查追虧空在五千兩上下

者准其在任著追現屆二限除已完外尚有

完不及數者本應革職監追但念此內款項

有正雜之分著照所請該省有缺人員正項

未能全完無缺人員正項完不及半者概行

革職監追其有缺人員正項全完而祇欠雜

款無缺人員正項已完一半者均准其於原

定限期外再展限一年勒令照數歸補以清

帑項其另片奏請停止河西州縣捐款一節甘肅河西州縣已有應攤養廉各款再令捐助河東驛站力有不支必致藉詞虧缺從前先福原議本未允協所有河西十九州縣議捐銀兩之處著即停止其東路各驛馬乾車牛等項仍著照舊額辦理無庸議增○又諭御史王松年奏蓄水挑河嚴開利漕一摺湖漕所以濟運東省微山湖水宣濟八閘及邵宿運河應照定制鋪注其江境下游亦當豫計節宣水勢方能充裕茲據該御史奏本年東省逾例鋪水江省運中河一帶水深五尺上下其貓兒窩淤高處所仍有淺阻又各閘並無底板旋放旋洩致形短絀著黎世序督飭工員將貓兒窩淤處擇要挑挖深通屆當鋪水時務令各閘下板擎托毋令直洩以節湖漕又據奏臨清閘外清河縣漫口上下數里淤墊均在四五尺以外著葉觀潮查明先期撈挖毋致明歲重運臨稍有阻滯○諭

軍機大臣等御史王松年奏山東臨清閘外直隸清河縣邵家莊民堰於六月二十九日衝開缺口至七月二十九日全漕出閘後尚未堵築臨清等處民田被淹該督飭委天津道等督率堵築尚未竣工等語清河缺口近在臨清閘外民田運道攸關自衝缺後時逾三月何以尚未堵合著方受疇嚴飭在工各員迅速堵築如承辦之員任意遲延即行據實嚴叅以儆怠玩 又諭長齡等奏查明本年六七兩月青海各旗蒙古呈報被搶均稱番賊數十人至百餘人不等惟貝子喇特納錫第呈報有番賊四百餘人其白塔營都司傳統所報蒙古被搶原呈只稱賊番二三十名哈拉庫圖營千總所稟亦只稱番賊十餘人等語青海各旗蒙古孱弱不能自振一被番族搶劫即張大其詞將賊數以少報多冀可多追贓物此該蒙古等相沿陋習至該處員弁遇有報搶之案又多意存迴護懼干叅

處以多報少以施其化大為小之計該督等不可狃於一偏之見概以營員之言為信任聽番賊糾眾肆掠不加懲創且即以該都司千總所報而論兩案之賊已有五十餘名長齡等摺內但稱嚴飭所屬上緊緝拏並未追獲賊賊仍屬紙上空談著長齡秀寧即督飭文武員弁將案內番賊認真查緝追起真賊審明按律懲辦不可疏縱又諭葉觀潮奏懇將道員謝學崇童槐俱賞加按察使銜等

語向來河防遇有大工道員中堵築出力及搶險受傷者曾施恩賞加按察使銜本年東河雖有搶護險工之勞止係照常保守安瀾該河督何得遽請將道員賞加升銜若南河亦從而效尤凡係河道俱加按察使銜成何體制謝學崇童槐不准加銜業已施恩交部議敘葉觀潮冒昧陳請著傳旨申飭將此諭令知之以詹事府詹事善慶為通政使司通政使前任江寧布政使繼昌為大理寺卿

緩徵河南安陽縣水災新舊額賦 庚辰
上以恭謁

祖陵禮成御太和殿王以下文武大臣官員進表行慶賀禮○諭內閣伯麟等奏建水等州縣疫疾流行監犯病斃多名請免管獄官處分一摺滇省建水等七州縣因時疫傳染病斃監犯五十一名雖瘴癘薰蒸由於天時但軍遣人犯同時疫斃多人殊為可憫該督撫務飭該州縣官督率夫役掃除穢惡散給藥

餌上緊清理人命至重不可稍有怠忽至該管獄官查明並無凌虐情弊俱著免其開叅諭軍機大臣等伯麟等奏緬甸國與普洱府屬邊外土司構釁經該督等指示地方官反覆開導緬夷業將所遣緬目撤回本國並順寧府屬邊外耿馬土司自相內鬩並未侵犯內地邊境亦經妥為區處等語此次緬甸國與土司構釁經該督撫妥為經理既已遵奉札諭畏懼退回自可中外相安其耿馬土

司自相爭鬪雖未侵犯內地土司係中國服屬所有案內肇釁滋事之人仍著伯麟等飭屬緝拏到案審明按律治以應得之罪俾知警畏以靖邊圉 辛巳

上詣

宣仁廟

凝和廟拈香 臨故予告大學士董誥第賜奠 命刑部右侍郎文孚署兵部左侍郎劉鏜之馳往福建審案 命喀什噶爾叅贊大

臣松福伊犁領隊大臣巴彥巴圖塔爾巴哈台領隊大臣富僧德科布多叅贊大臣巴琿阿庫倫幫辦大臣長慶來京賞葉爾羌辦事大臣斌靜副都統銜為喀什噶爾叅贊大臣調烏什辦事大臣成書為葉爾羌辦事大臣古城領隊大臣巴哈布為烏什辦事大臣賞降調盛京戶部侍郎多福三等侍衛為古城領隊大臣三等侍衛布彥泰二等侍衛為伊犁領隊大臣以鑲紅旗蒙古副都統吉勒通

阿為塔爾巴哈台領隊大臣賞內閣侍讀學士富和頭等侍衛為科布多叅贊大臣內閣侍讀學士布彥圖頭等侍衛為庫倫幫辦大臣旌表守正捐軀陝西富平縣民張大謀妻王氏 蠲緩江蘇蕭縣水災額賦有差 緩徵上元江寧句容江浦六合山陽阜寧清河桃源安東鹽城高郵泰東臺江都甘泉儀徵興化寶應銅山沛碭山邳宿遷睢寧丹徒二十六州縣及淮安大河揚州徐州四衛本年及來年額賦給高郵寶應二州縣貧民一月口糧 癸未

上詣

時應宮拈香 甲申諭內閣御史王允輝奏嚴禁順天鄉試冒籍一摺冒籍跨考例禁甚嚴但恐日久玩生又復混淆滋弊茲據該御史奏本科順天鄉試冒捐北監冒入北貝中式者頗多著順天學政及順天府尹嚴行查察順天寄籍生監如有未滿年限及未經呈

明冒考者無論已未中式一經查出立即嚴
參照例斥革以清戶籍○旌表守正捐軀四
川江津縣民袁庭友妻張氏○除浙江瑞安
縣潮衝埧田十七頃三十六畝有奇額賦○
乙酉諭內閣御史黃中模奏請復鹽價舊規
一摺湖廣江西鹽價嘉慶十二年酌議每引
增銀四錢二分其時降旨令該督撫鹽政等
隨時察看或將屆三年或再展三年俟商力
稍裕即行奏減迄今已閱十餘年總未據奏

請減價茲該御史奏請仍復鹽價舊規著兩
江總督兩淮鹽政即行查明湖廣江西兩省
現在行銷准鹽價值酌量奏請裁減以敵私
販而裕民食○又諭御史費丙章奏請除糧
艘積弊一摺糧船水手等倚恃人衆違例裝
載貨物夾帶私鹽甚至沿途糾夥尋鬪必應
嚴辦示懲據該御史奏本年五月間有浙江
溫後幫水手艾三等在山東虎頭灣閘勒索
錢文毆傷運弁幫役之事著漕運總督山東

巡撫嚴飭上緊查拏審明按律治罪至漕委
人數屢經飭令裁減其過閘開纜人夫費用
亦應確數定數又漕船收米時向有飛爬走
攬等弊該御史奏請令旗丁執斛倉書行概
是否行之無弊均著漕運總督會同該督撫
妥議具奏再旗丁串同船戶盜賣官米於剝
船暗造夾艙夾梁著該漕督通飭各運弁嚴
行查出從重究辦其總運官員該省漕糧自
開行以及抵通皆其職守不得藉圖沾潤隱

忍誤公嗣後該督撫務擇廉幹之員專以責
成勿得藉口調劑以肅漕政○諭軍機大臣
等阮元奏審擬鄧學厚傷死服叔鄧希達一
案請將署臬司宋鳴琦署藩司程卓樑護巡
撫富綸均交部嚴加議處已交該部議奏矣
將來議上時富綸程卓樑均有應得之咎現
已將廣西藩司臬司員缺另行簡放葉紹楨
體弱多病廣西巡撫亦另簡放有人計新任
各員到任均需時日著熙昌於抵粵時先行

署理廣西巡撫印務其藩臬二缺會同阮元
遴員奏明暫署可也將此諭令知之○以廣
東布政使趙慎畛為廣西巡撫浙江按察使
魏元煜為廣東布政使廣東雷瓊道左輔為
浙江按察使陝西陝安道張志緒為廣西按
察使大理寺卿繼昌署廣西布政使○丙戌
諭內閣朕恭閱

皇考高宗純皇帝實錄內載乾隆五年六月

諭國家章服之制所以辨等威重名器朕訪聞

原任提督楊凱原任總兵楊謙俱係獲罪革
職之員今在揚州本籍仍戴紅頂花翎出入
衙門似此違越制度不安本分不可不加以
懲儆著將楊凱楊謙交該督撫照例擬罪並
通行各省督撫遇有革職人員妄戴頂帽花
翎藍翎者據實題參等因欽此仰見我
皇考慎重名器至意朕本欲再行宣示以肅朝
章本日適正紅旗滿洲都統儀親王奏奏原
任總管常海係部議降調應補護軍校之員

仍戴三品翎頂請交刑部辦理常海違制僭
用翎頂著交刑部照例治罪朕並聞近日降
調大員內有仍僭用原官頂帶者著該管官
隨時查察如有似此違制僭越者即行據實
叅奏毋稍徇隱將此通諭知之○又諭怡親
王奕勲本年隨扈盛京於逐次召對時朕詢
問伊有幾子據稱祇有三子俱係上年十二
月所生並稱係三母所出迨至奕勲病劇口
授護衛青山寄信奕紹則稱伊前奏明三子

一係上年十二月生其二俱已三歲且此外
尚有子四人女四人因係伊服中所生當時
俱未敢呈報此時祇得據實呈明等語奕勲
病故後經奕紹親往伊家確切查明奕勲實
有子七人女四人除俟下屆恭修

玉牒時俱准其載入外奕勲以宗室親王生子
不報以有作無管理宗人府王公及族長等
竟毫無覺察實屬可笑此次姑免置議再有
此等事必不輕恕又恐宗室內間散之戶或

本無子嗣捏名抱養以無作有冀圖冒領錢糧則所關更鉅著管理宗人府王公通飭各總族長族長務隨時認真稽察嚴杜隱冒用示慎重宗潢之意○又諭御史李遠烈奏官荒入官各項地畝請飭查勘丈報墾升科一摺直隸天津等處馬廠官荒及各抄產入官抵項私典入官各地畝節經降旨交直隸總督查明報墾升科除溫承惠任內勘丈出地二十九百餘頃外其餘日久總未據查明奏辦殊屬延宕著方受疇即派委委員認真查勘所有前項地畝已報墾者速即報部升科未勘報者逐一履勘查照原定章程普行召墾按則升科其各項入官地畝戶部行查未結者即速估變招佃如有奸胥猾吏串通隱占究明按律治罪以杜侵欺而裕國課○又諭宗人府呈進情實人犯宗室景佐供冊景佐因投遞匿名揭帖控告伊弟景倫擬以絞罪雖係照例應得之罪姑念伊係景倫之兄

且到案即行供吐實情著加恩寬免絞罪惟匿名揭帖最為惡習景佐著交宗人府永遠圈禁 丁亥
上御懋勤殿勾到四川情實罪犯停決斬犯四十三人絞犯三十一人餘一百十八人予勾○諭內閣孫玉庭等奏特參捏病規避之知縣請旨革職一摺所參甚是近日州縣官藐視上官任意違抗此風斷不可長桃源縣知縣黃輿因差繁缺苦執敢向藩司琦善面懇調劑經該司指斥即聲言告病聽參黃輿著即革職以為任性乖張者戒○諭軍機大臣等文孚前經派往福建審辦案件降旨令該侍郎在德州候劉鏞之同往茲據翁元圻奏報熙昌在湖南省城病故著文孚於接奉諭旨後即日前往湖南將前交熙昌審辦之陳羅氏呈控羅幃維殺死伊夫及巡檢蔡觀被毆並御史唐鑑參奏知縣顧煥圻三案督同熙昌原帶司員阿勒清阿祁墳秉公審辦具

奏後即帶同該司員迅速前往廣西會同阮元將葉紹楨富綸先行解任趙慎畛未到任以前著阮元暫署巡撫其互相叅揭各款秉公查辦所有前後發交熙昌諭旨及一切文卷阿勒清阿等現俱封固收存文孚到彼逐一檢查明晰遵照次第辦理將此諭令知之○轉吏部右侍郎普恭為左侍郎以正藍旗漢軍副都統成寧為吏部右侍郎○以正白旗滿洲副都統穆彭阿為京營右翼總兵以乾清門侍衛哈朗阿為正白旗護軍統領調正黃旗漢軍副都統英惠為鑲黃旗滿洲副都統以前任塔爾巴哈台領隊大臣富僧德為正黃旗漢軍副都統○贈故吏部左侍郎熙昌都統銜賞銀五百兩治喪予祭葬諡敬慎○除山東海豐霑化利津樂安四縣海潮淹廢地七百五十三頃二十三畝有奇額賦並賑被災貧民緩徵海豐縣被潮較輕地畝新舊額賦緩徵山東聊城莘館陶濰萊陽

臨清武城七州縣及德州東昌二衛水災蟲災新舊額賦並博興壽光二縣舊欠額賦章邱濟寧朝城范莊平恩鄒七州縣舊欠漕糧戊子諭內閣松筠因上年夏令微旱奏阻謁陵大典本應治以重罪因念伊係舊臣元輔曲加寬宥僅革去大學士御前大臣降為二品頂帶補放察哈爾都統本年四五月間雨澤稀少自六月後甘霖疊沛轉歉為豐由畿輔以至興京千餘里間普登上稔蹕路天氣暄和迨恭謁三陵大禮慶成後駐蹕盛京澍雨三日旋即晴霽剋期旋蹕往返七十餘日朕躬康泰諸事吉祥足徵天祖垂佑大禮必應舉行始能獲此嘉應松筠前此輕聽人言妄生浮議可謂耳軟無知伊自乾隆年間宣力中外歷有年所本欲俟一二

年後仍召令還京令伊長子熙昌歿於差次
又無子嗣實屬可憫昨已優加恩卹俟伊靈
柩抵家仍派大員賜奠松筠年老喪子倍覺
可憐松筠著加恩調補正白旗漢軍都統賞
還頭品頂帶花翎所遺察哈爾都統員缺即
著伊冲阿補授伊冲阿俟松寧到任後由彼
速赴新任無庸來京謝恩松筠俟伊冲阿到
任後即行回京供職○又諭本年四月御史
李廣滋奏奉天州縣藉差科派當降旨令

奕紹戴均元前往查辦並帶李廣滋同往以
服其心嗣經奕紹等查明錦縣等處雖有借
墊差費均係照上次辦理商民莫不踴躍從
事李廣滋輕聽浮言冒昧陳奏並於伊族人
李齊家呈控鄉保派夫折錢口雖阻止代為
改削呈詞經革職審明發往烏魯木齊効力
贖罪七月朕自京啟鑾沿途普慶豐登入盛
京境後黃童白叟夾道歡迎愛戴之情千里
如一途次雖有叩關數起所控皆田土細故

並無控告藉差派累者朕復詳加體訪該省
民人值朕臨蒞之年除賦蠲租恩施稠疊其
望幸實出於至誠李廣滋聾瞶之言亦復何
足深責念伊究係言官著加恩釋回原籍○
調兵部右侍郎穆彰阿為工部左侍郎工部
左侍郎德文為兵部右侍郎○賞接駕廢員
施玉瑩等六名官職有差○己丑

上御懋勤殿勾到陝甘湖廣情實罪犯停決陝
甘官犯一人斬犯十二人絞犯七人湖廣斬

犯二十四人絞犯十七人餘八十二人予勾
諭內閣向來秋審人犯凡止語言調戲致
本婦羞忿自盡者照例俱入於情實勾到時
覈其情節多免其勾決本日勾到陝西省秋
審人犯黃冊內沈德一犯用言調戲周孟氏
投繯自盡一案該撫將沈德問擬情實復聲
明該犯家無次丁俟情實一次改緩時再行
查辦等語罪犯定入情實則勾與不勾其權
操之自上豈臣下所當豫揣今該撫於招冊

案尾豫擬改緩字樣殊屬非是除沈德一犯仍免其勾決外朱勲著交部議處○以服闋總兵官蕭福祿為江南狼山鎮總兵官○以偏執証訐出入罪名革廣西布政使富綸職○以按察使程卓樑年老降五品頂帶休致○庚寅諭內閣御史盛唐奏山東省汶上往平高唐一帶時有匪徒晝夜塗面執械劫奪商民該御史入都經由東省目擊沿途各堡鋪豎立竹竿黃旗大書查拏匪類字樣而各鋪房巡夜支更虛無一人等語東省近日盜風甚熾節經降旨交該撫督飭地方官嚴密查拏茲據該御史奏該地方官並不認真緝捕但豎立黃旗虛張聲勢似此有名無實匪徒何所畏忌該省為南北通衢士子商民絡繹道途若令行者皆有戒心成何事體著和舜武即嚴督地方文武官員整飭捕務嚴緝匪徒沿途鋪堡巡役更夫均責令自昏達旦常川巡緝勿得虛文塞責塗飾耳目務期禁暴

詰奸以收實效○又諭成格奏大青山一帶屢有蒙古賊人搶劫之案請飭防範巡查一摺大青山一帶地方係綏遠城將軍歸化城副都統所轄前因屢有搶劫之案經成格會同果勒豐阿等奏明添派滿洲官兵同土默特原派官兵會哨巡緝並籌給盤費銀兩以專責成乃近日該處仍復盜劫頻聞蒙古賊人公然結隊成羣執持烏鎗器械搶奪商民拒傷事主是前次派往官兵等並不認真巡緝虛糜廩給實屬怠玩果勒豐阿額爾起俱著傳旨申飭該將軍副都統即輪流帶兵前往大青山後各要路認真巡查嚴緝賊匪彼此定期更替不准安坐衙署自耽暇逸緝獲賊犯隨時具奏其疏懈之各官兵等查明分別叅處責懲若該將軍等仍前懈怠不認真整飭定行治罪不貸○辛卯諭內閣朕本年臨幸盛京派王大臣等考驗彼處宗室其移居宗室康保步射中箭四枝騎射亦中業經

加恩賞戴花翎但念康保雖賞花翎並無差使仍不足以示鼓勵康保著加恩賞給四等侍衛來京在大門上行走並准將伊一戶眷屬一併移回京城以示朕造就宗室之至意

又諭御史福漳阿奏八旗閒散宗室請飭令習射輪流閱看一摺所奏是閒散宗室並無差使平居未有專業恐易流於蕩逸莫若令其練習弓矢以時校閱並量予獎拔俾志有所向藉可造就人材著管理宗人府王公等通飭八旗閒散宗室自二十歲至四十歲以內者由宗人府每年豫備三百名以一百名備朕親閱二百名派王大臣等閱看擇其優者量予錄用令其周而復始輪流送閱並著宗人府查明如明歲閱射之時能足三百名之數即自明年為始儻未能足數即飭令勤加習學自嘉慶二十五年為始按年閱看俾各勤於本務以副朕訓勵宗室至意○賞順天等省鄉試年老諸生梁廣有等二十三

名舉人副榜有差 旌表守正捐軀山西襄垣縣民武占鼃妻李氏（壬辰命理藩院尚書和世泰正白旗漢軍都統松筠仍在紫禁城內騎馬戶部左侍郎黃鉞兵部左侍郎常福在紫禁城內騎馬）癸巳

上御懋勤殿勾到浙江江西安徽江蘇情實罪犯停決浙江斬犯八人絞犯三人江西斬犯六人絞犯六人安徽斬犯六人絞犯二人江蘇斬犯八人絞犯五人餘八十六人予勾○

嘉慶二十三年十月

五

甲午

上詣

奉先殿

壽皇殿行禮

大清仁宗受天興運敷化綏猷崇文經武孝恭勤儉端敏英哲睿皇帝實錄卷之三百四十八

實錄卷之三百四十八

奉

大清仁宗受天興運敷化綏猷崇文經武孝恭勤儉端敏英哲睿皇帝實錄卷之三百四十九

出修職官等處請假官員等項開列事據奏奉 上諭事付盛慶部事務院院官等處

事已另有旨如明旨未領職官等項開列事據奏奉 上諭事付盛慶部事務院院官等處

開列事據奏奉 上諭事付盛慶部事務院院官等處

軍機處官理等處請假官員等項開列事據奏奉 上諭事付盛慶部事務院院官等處

公等利便請假官員等項開列事據奏奉 上諭事付盛慶部事務院院官等處

奏修

嘉慶二十三年戊寅十一月乙未朔諭內閣

長齡等奏後藏堪布多帶包物一摺本年後藏班禪額爾德呢遣使進貢例外多帶物件一百餘包本應照例扣留該堪布額請自雇腳力隨後行走不敢煩勞驛站念其遠來朝貢姑如所請賞給路票令其由內地行走以免盤詰至該堪布例外多帶包物由藏啟行時該駐藏大臣不先行查禁聽其違例多帶著查明交部議處嗣後西藏堪布進貢來京務令遵照定例除正貢包物外如有例外多

帶貨物聽其自備夫馬所過驛站概不准應付以肅郵傳○諭軍機大臣等阮元等奏暹羅國進貢正船在洋遭風副船先已抵粵一摺暹羅國王因來年朕六旬萬壽慶節遣使備進方物實屬恭順現在副貢船已抵粵省惟正貢船在洋遭風不能趕於年節到京著阮元等令該副貢使暫行在粵休息一面確查正貢使下落如能隨後到粵由該督等酌量派員護送於明年九月到京儻正貢船竟無下落即令副貢使於明年九月內到京將副貢船所載方物一同齎進其正貢船內漂失方物行文該國王令其不必補貢以示懷柔如查明實已漂沒仍奏明量加恩卹○旌表守正被戕江蘇泰州民部蒙啓妻嚴氏○丙申諭內閣果勒豐阿因此次朕臨幸盛京派散秩大臣布都爾瑚納前往廣畧貝勒褚英墳墓賜奠具摺謝恩此乃九月初五日之事果勒豐阿何以遲至兩月之久始行謝恩

昨因歸化城所屬大青山一帶地方緝捕疏懈屢有蒙古賊盜劫奪之案曾將果勒豐阿等申飭茲復於遣奠伊始祖墳墓遲延謝恩果勒豐阿平素諸事不能決斷一味遲延於此可見著傳旨申飭○又諭御史孟晟奏各省試用佐雜請飭禁分駐地方一摺州縣官各有地方之責若令試用佐雜等員分駐集鎮必致干與公事需索鄉民且由上司派往或與州縣官偶有微嫌藉詞捏稟潛相傾軋

不特事權不一抑且弊竇叢生該御史所奏不為無見嗣後各省分發佐雜人員俱飭令常在省城聽候差委遇有派往各州縣差使亦定以限期事竣即行銷差不許藉端逗遛致滋擾累又諭刑部衙門具題吳奇綠誘姦陳氏致陳氏被姦受傷身死一案聲明陳氏年已十三與例載強姦十二歲以下幼女因而致死者有聞將吳奇綠依斬決例量減問擬斬監候陳氏年甫十三去十二歲者一

間吳奇緣誘與行姦致陳氏被姦受傷身死情殊可惡。問擬斬候秋審情實。亦必予勾。吳奇緣著即處斬。戶部議准前任浙江巡撫楊護疏報富陽臨海寧海蘭谿奉化象山樂清七縣開墾地一百四十九頃十五畝有奇。照例升科從之。○蠲緩直隸灤昌黎樂亭清河宣化五州縣水災。電災本年額賦有差。並緩徵舊欠額賦倉糧。及薊盧龍景阜城故城青靜海滄鹽山元城大名南樂清豐龍門新河趙隆平寧晉十八州縣新舊額賦倉糧給宣化清河二縣貧民口糧。○丁酉

上御懋勤殿。勾到河南山東情實罪犯。停決河南斬犯五人。絞犯二十九人。山東斬犯十一人。絞犯七人。餘七十四人予勾。○巡視南城御史清安等奏正藍旗馬甲伊興都生女不報披剃為尼一案。得旨此案著交刑部審訊。伊興都身係旗人生女隱匿不報。輒令披剃為尼。大千例禁。定案後著將伊興都同眷屬

俱改發外省駐防其失察漏報入檔之歷任叅領佐領驍騎校族長著查明年分交部分別嚴加議處。都統副都統著查明交部分別議處。戊戌諭內閣湖口撈存吉蘭泰鹽斤正課早經全完墊解辛工撙節銀兩亦無庸歸還餘存鹽斤現據查明陸運實難銷售所有未完充公銀二萬二千四百七十四兩零俱著加恩豁免即將存鹽賞給貧苦蒙古挑販俾資生計。○命協辦大學士吏部尚書戴

均元為上書房總師傅。○以服闋侍郎王宗誠署禮部右侍郎。○正藍旗蒙古都統睿親王瑞恩因病開缺以鑲黃旗蒙古副都統孟住為正藍旗蒙古都統。吐魯番領隊大臣福蔭為鑲黃旗蒙古副都統。○己亥諭內閣吏部議駁御史尹佩綰奏六部衙門封發公文每日派司員一人專管及州縣等官不即完繳罰俸銀兩酌予處分二款所駁俱是著照部議毋庸更張。惟近來各直省督撫遇有

升調缺出。往往將罰俸處分過多者。違例奏請經部議駁。仍復濫奏。冀邀恩准。嗣後各督撫奏請升調人員。如罰俸案件在五十案以內者。仍准專摺奏請。其罰俸在五十案以外者。概不准奏。請升調。若違例濫請吏部徑行議駁。仍將該督撫叅處。又諭向來索倫等進貢貂皮挑驗及等第者。照例賞賜。其有不及等第者。念其既已足數。酌量減半賞賜。近年來所進貂皮。俱不及等第。聞該索倫等將

上等貂皮帶至京師私售。既多獲價值。仍得減半賞項。殊不足以昭勸懲。此次貂皮足數著免其處分。不及等第者。毋庸減半給賞。此皆將軍特依順保辦理不善。現已調任。著新任將軍松寧到任後。嚴行查察。如有前項私行售賣以下等皮張充數情弊。即行嚴叅治罪。毋稍寬縱。○刑部奏審擬領催富森布冒領紅白銀兩定罪一案。得旨。此案富森布充當領催。因家計貧乏。輒敢捏報紅白事件。四

次冒領官銀五十六兩。實屬貪鄙可惡。若因贓銀業經花用。著落該叅佐領分賠。該犯轉得脫身。事外不足示懲。富森布侵冒贓銀。著仍按數追賠。追不足數。將伊房產什物變價。如實不能完。再行奏明。著落該叅佐領賠繳。富森布再加枷號。兩箇月滿。日發往伊犁充當苦差。○調黑龍江將軍特依順保為烏里雅蘇台將軍。以熱河都統松寧為黑龍江將軍。調察哈爾都統伊冲阿為熱河都統。鑲黃

旗蒙古都統慶溥為察哈爾都統。以禮部尚書穆克登額兼鑲黃旗蒙古都統。○以貴州松桃協副將特松阿為雲南昭通鎮總兵官。○予故烏里雅蘇台將軍喜明祭葬如例。謚勤毅。○貸奉天遼陽廣寧承德海城寧海岫巖六處被水災民一月口糧。○庚子

上詣

雍和宮行禮。○諭內閣。御史馮清聘奏佐貳不得委署正印一摺。分發試用捐納議敘佐貳

等官定例不准委署正印其正印官猝有事故出缺該府並無候補正印人員勢不能不令佐貳官暫行代理但此事可暫而不可久著各督撫飭知各府如所屬州縣驟然出缺一面委佐貳官代理即日具文中報該督撫接到申文立即遴委正印官迅速前往接署不得令佐貳官久占署缺以符體制而肅官方○又諭御史馮清聘奏各省械鬪重案請飭立限速辦一摺各省械鬪之風固因民情兇悍亦由地方官平日不能盡心化導及呈報到官或控經上司提審又復藉詞耽延以致沈冤莫雪積案相仍如福建民人詹絨等呈告葉瑞連聚眾逞兇一案延至十九載不為審理實屬因循疲玩此種惡習亦不獨福建為然直省大吏務各嚴飭所屬振刷精神於地方詞訟事件逐日清釐其恃強糾鬪重案立即嚴拏重懲勿事姑息俾兇頑知所儆懼則善良得以各安本業吏治民生均日有

起色矣將此通諭知之○諭軍機大臣等前據富俊奏籌議開墾屯田並請查明伯都訥圍場荒地備墾當降旨交松寧詳查妥議俟定議後再行會同富俊辦理茲據松寧將議開雙城堡屯田章程開單具奏並以試墾伯都訥圍場地畝經費不敷請俟雙城堡屯田陸續升科後接辦富俊現已調任吉林將軍著將松寧所議章程再交富俊覆加覈議松寧所定銀數是否豐儉合宜屯丁是否即可養贍家口盡力開墾務期國帑不致多糜而於旗民生計亦實有裨益方為經久良策其伯都訥地畝應否酌分緩急次第辦理該將軍議定即行覆奏本日又據松寧等奏站丁藉地當差今因私相典賣若將各站丁地畝普行勘丈每名留給十晌餘俱入官徵租丁力拮据請仍其舊等語此事並著富俊悉心覈計應如何派撥均勻俾各有力當差不致私行典賣妥議章程具奏○正藍旗蒙古都

統孟佳以謝恩愆期降為正黃旗蒙古副都
統以左翼前鋒統領奕額為正藍旗蒙古都
統正黃旗蒙古副都統載銓為左翼前鋒統
領旌表守正被戕山西陵川縣民郝李鎖
妻賈氏免安徽宿靈壁泗三州縣鳳陽長
淮泗州三衛旱災水災本年額賦有差並緩
徵來年額賦及舊欠籽種俸工等項緩徵五
河盱眙天長鳳陽懷遠壽鳳臺潛山蕪湖繁
昌定遠和懷寧桐城當塗無為巢廬江十八
州縣及建陽衛本年額賦並積欠銀米籽種
口糧有差賑宿靈壁泗三州縣災民給靈壁
泗五河盱眙天長鳳陽懷遠七州縣貧民一
月口糧○辛丑
上御懋勤殿勾到直隸山西情實罪犯停決直
隸斬犯七人絞犯十二人山西斬犯七人絞
犯九人餘七十一人予勾○刑部議覆署浙
江巡撫董教增疏報民人陳思美故殺姪女
陳阿貓一案得旨此案陳樂氏因圖分繼產

不遂起意將夫兄之妻吳氏謀毒斃命復因
吳氏之女阿貓聲言伊母身死不明必欲報
讐輒捏造阿貓與工人通姦致被慘傷身死
該犯婦謀斃一命又誣讎致死一命兇狡已
極問擬斬候秋審情實亦必予勾陳樂氏著
即行正法陳思美聽從妻言故殺姪女著絞
監候入於明年秋審情實○調吏部右侍郎
成寧為倉場侍郎兵部右侍郎德文為吏部
右侍郎以鑲黃旗滿洲副都統英惠為兵部
右侍郎○以前任庫爾喀喇烏蘇領隊大臣
佛安為正藍旗漢軍副都統○壬寅諭內閣
方受疇奏特叅棍責致斃兵丁之都司一摺
采育營都司誠齡令兵丁魏祥在署充當廚
役已屬違例乃因魏祥酒醉嚷罵不依法決
罰又自行責打數至四十棍之外以致魏祥
因傷身死實屬任性濫刑誠齡著革職交該
督提同兵丁人等秉公嚴審如該革弁有挾
嫌故勘情事審明照例治罪○緩徵陝西咸

寧縣水災本年額賦（甲辰）遣官祭

先醫之神諭內閣御史程伯鑾奏川省積弊四條請旨查辦一摺刑具例有定式無論平民不應處以非刑即盜賊所犯案情亦各有輕重差等均宜按律科斷如該御史所奏四川州縣造有弮杆釣杆站籠等名目往往濫刑斃命著蔣攸銑查明嚴行飭禁除官定刑具外餘俱押令銷毀不准再用至該省軍功冒濫誠所不免其雷波寧越議敘二案皆

非蔣攸銑任內之事著該督即行確查如該御史所奏川省編造盜弮凱奏戲劇訪係何人所為其所指摘係何員弁若實有未臨前敵安坐省城冒膺甄敘者即據實奏明革退以昭公允州縣衙門聽理詞訟原為閭閻息爭申枉乃川省竟有呈子錢坐堂禮鞋腳錢驕馬錢酒食錢差使錢辛苦錢酬謝錢各項陋規名目其病民尤甚著該督即通飭所屬嚴行禁革並裁汰冗役以杜擾累緝捕盜賊

所以除暴安良若案外拖累平民以供需索大干法紀著該督認真查察如有似此藉案婪索之員立即嚴叅重懲該御史原摺即發交蔣攸銑逐款實力整頓以肅吏治而厚民生又諭御史喻士藩奏漕標試用武弁請照文職分發佐雜人員一體甄汰一摺漕標試用武弁多至二百數十員其中難保無衰庸及不肖之人營謀請託藉差需索等弊據該御史奏請嚴加甄汰著李奕疇於留標武

弁內秉公甄別所留之員以足敷差委為度如有年老衰穢及喜事不謹者分別罷斥澄汰毋稍徇隱以肅漕政○乙巳諭內閣御史特清阿奏八旗兵丁應領紅白賞銀請確查辦理一摺八旗兵丁應領紅白賞銀向憑該佐領等圖結即行給領其中恐查察未周易滋弊混嗣後八旗兵丁遇有紅白事件著於呈報後該佐領即親往查驗或佐領一時未能親至即委驍騎校帶同領催族長確查於

結內註明再行給發仍著步軍統領衙門隨時稽覈以杜捏冒○以光祿寺卿明敘前任喀什噶爾叅贊大臣松福為內閣學士兼禮部侍郎銜○命山西布政使周光裕來京以四品京堂補用以山西按察使邱樹棠為布政使冀寧道趙鴻文為按察使○緩徵甘肅渭源平羅古浪金靖遠隴西安定鹽茶靈靈臺十廳州縣及東樂縣丞沙泥州判所屬電災水災旱災新舊額賦貸舉蘭渭源隴西秦兩當撫彝張掖山丹永昌鎮番安西玉門燉煌十三廳州縣貧民兩月口糧○丙午上御懋勤殿勾到朝審情實罪犯停決斬犯四人絞犯十四人餘六人予勾○諭內閣戶部奏請飭催直隸各州縣交代未結各案一摺直隸省交代未結舊案自二十一年正展限期屆滿降旨飭催之後僅據結報八十餘案尚有經部駁查及延未登覆者共四百餘案續據咨報新案未結者復積至四十餘案似

此新舊遞相積壓必致款目益滋輻輳實屬因循疲玩著方受疇督飭該藩司將以上新舊未結各案逐一查明迅速分案報部以清塵牘至該省現在各任交代並著嚴飭依限清釐毋再延玩干咎○丁未

聖祖仁皇帝忌辰遣官祭

景陵

上詣

壽皇殿行禮 御內閣御史吳杰奏直省委署

缺分派遣差使請飭按次輪班以杜鑽營規避一摺所奏非是各直省署缺派差皆以辦理地方公事缺有繁簡之不同差有難易之迥別自當擇人而任若令按次輪班定為一成不變之例則督撫藩司全無區別必致人與地相違才與事相左其貽誤可勝言乎且在省試用人員原聽該上司因材器使僅署缺派差其權皆操之自下則輪將得缺得差之員先已豫定其中不肖之員更可巧為圖

謀是防弊而愈以滋弊所奏不可行原摺著發還 戊子諭內閣

天壇望燈杆木丈尺雍正年間定例原係九丈嗣於乾隆年間四川總督阿爾泰辦到杆木較長始奏准通高十丈四尺較原立杆木增長一丈四尺現在杆木因年久間有蟲蛀處所理應敬謹更換杆木舊有定制若照增長丈尺恐一時採辦維艱著四川總督湖南巡撫仍查照雍正年間定例委員採辦長九丈

大徑二尺七寸小徑一尺二寸杆木正副六根外戩木十八根即行運京以備更換○以巡緝懈弛革綏遠城將軍果勒豐阿職仍留公爵降歸化城副都統額爾起為驍騎校以青州副都統八十六為綏遠城將軍調密雲副都統西凌阿為青州副都統正紅旗蒙古副都統富清阿為密雲副都統以德州城守尉博慶阿為歸化城副都統鑲藍旗漢軍叅領文泰為正紅旗蒙古副都統○己酉諭內

閣向來修理各項工程俱先派員勘估奏准後再派員承修工竣後又派員驗收原期互相稽覈以昭慎重乃近日承派各員俱存官官相護習氣往往遇事遷就於收工時總以查驗相符一奏了事從未見有叅奏不符者竟成相沿具文如本日英和等奏查驗中一路等座工程聲明各項活計露明處所丈尺做法均屬相符中一路等座工程朕逐加閱看修理尚為完整惟

大高殿後乾元閣朕昨乘馬經過望見閣上琉璃圓頂多有裂損形跡並未見新此係露明處所該查驗大臣等豈得諉為不見乃不將承修之員叅奏殊屬徇隱所有乾元閣琉璃圓頂即著原修之員與英和那彥寶誠安公同賠修見新以示懲勸嗣後派出查驗工程大員務各認真稽考不可彼此瞻徇以昭覈實 又諭御史博通額奏宗室人員請照覺羅之例分別升遷京外各官一摺宗室人員

向不簡用外任原以外官階級小大相維一切庭參跪拜儀節著有定制宗室係屬天潢礙難隨班俛仰若不遵儀注則伊等心存傲慢必將藐視上官或恣意妄為而上官亦不敢糾劾殊於吏治大有關繫該御史所奏升遷外用之處斷不可行至所請京職各官將宗室人員酌加升遷著宗人府吏兵二部會議具奏尋議上得旨宗人府等衙門議駁御史博通額奏請調劑宗室缺一摺所駁甚

是宗室人員朕節經施恩調劑文職額缺已加至一倍有餘並增有文鄉會試繙譯鄉會試俾由科甲出身卿寺春坊均准升用武職則侍衛叅領城守尉總管俱有升階登進之途不為不廣若再議加增勢必多占八旗滿洲人員額缺此疏則彼滯豈足以昭公允從前御史伯依保奏請添設宗室學習行走人員額缺當經議駁因伯依保係滿洲人員年老昏庸姑免置議今博通額身係宗室乃為

此希恩市惠之舉尤屬不合博通額著交宗人府議處又諭御史博通額奏京察嚴行考覈一摺京察為激揚大典三年舉行一次各堂官當推獎賢能澄汰庸劣方合古人三載考績之義其各衙門司員以辦理稿案為正務筆帖式以繙譯文卷為稱職賢否優劣皆當就此區別若鮮衣華服逐日奔走專以趨承堂官為事者最為下流著通諭在京各衙門堂官京察保舉人員務當一秉至公黜

華崇實各按在署辦事實蹟慎選人材以端登進勿參以私意愛憎用副朕澄敘官方至意又諭御史盛唐奏州縣徵納錢糧請嚴禁浮收一摺直省州縣徵收錢糧定額外原不准絲毫浮多至畸零小戶無銀完納例有以錢完交官為易銀傾解之條若因官吏藉此浮收令藩司按照銀價酌定錢數於啟徵之先刊示遍發各州縣張貼不知銀價隨時長落亦且隨地不同事殊格礙難行惟當責

成督撫藩司及本管道府於州縣徵收錢糧時嚴加訪察如有勒折浮收等弊據實叅辦無稍姑息官嚴腹削之罰自民享盈寧之樂矣 旌表守正捐軀河南西平縣民王凌妻李氏

—
—

下

大清仁宗受天興運數化綏猷崇文經武孝恭勤儉端敏英哲睿皇帝實錄卷之三百四十九

大清仁宗受天興運敷化綏猷崇文經武孝恭勤儉端敏英哲睿皇帝實錄卷之三百五十

此後仍由長官發給清起原任太子太傅武英殿學士文淵閣領事稽察欽奉
上諭事件處管理工部事務翰林院掌院學士薩

學加祿寺常加祿寺曹振鏞明教宮太子太保文淵閣大學士管理刑部事務加祿寺戴均元經筵日講起居注官太子少保內大臣文淵閣

閩漢學閩書院錄奉 上諭事件處協辦大學士戶部尚書翰林院掌院學士散原庶吉士曹國裕府大司銀黃旗滿洲都統當年

欽定四庫全書
欽定四庫全書

文光英和昭謙官大夫佐禮部尚書上書房行走武英殿翰林管理圖書監書坊知照隨帶加二級紀錄四次在汪廷珍等奉

較修

嘉慶二十三年戊寅十一月庚戌

上御乾清門聽政 諭內閣兵部奏松筠等違
例調補總管請交部議處一摺松筠平日每
於屬員中有意見好違道干譽本性難移此
次察哈爾鑲藍旗總管缺出輒奏請將革職
留任限緝之羅布桑丹巴調補又請將原品
休致之鄂特歡坐補鑲黃旗總管俱屬違例
羅布桑丹巴著仍回本任鄂特歡仍以原品
休致松筠等含混陳請俱著交部議處 以
詹事府少詹事奎耀為詹事太僕寺卿齡椿

為大理寺卿 戶部議准雲南巡撫李堯棟
疏報陸涼巧家二廳州開墾地二頃二十四
畝有奇照例升科從之 辛亥諭內閣朕恭
閱

皇考高宗純皇帝實錄內載乾隆六年七月欽
奉

諭旨朕惟保天下者求久安長治之規必為根
本切要之計制治未亂保邦未危者必以風
俗人心為本人心正則風俗醇而朝廷清明

國祚久遠我國家受

天景命

皇祖

皇考厚德深仁漸被海宇實皆不世出之君朕
繼承大統早夜孜孜歷觀史冊繼世相承愛
民勤政若是其積累深而涵濡久者蓋不數
觀且內無諛諂之女寵干政之宦官朝無擅
權之貴戚大臣外無擁兵之強藩巨鎮不但
無其人無其事且無幾微之萌蘖宜其教化

興行習俗美盛措天下於泰山之安乃朕澄
心靜觀今日之人心風俗居官者以忠厚正
直為心而身家利祿之念胥泯未能也為士
者以道德文章為念而僥倖冒進之志不萌
未能也民皆家給人足漸臻端良樸愿之風
未能也兵皆有勇知方足備干城腹心之選
未能也朕中夜以思朝乾夕惕若蹈虎尾涉
於春冰惟恐墮成業而失事幾然此非朕一
人所能獨理也內外諸臣當股肱心膂之任

必當以卑變稷契為心屏畏難之見除苟安
之習凡吏治之得失人才之賢否民生之休
戚皆宜熟籌而切慮夫王道雖無近功而未
始無成效惟在正其心術固其本根勿為目
前之計而為久遠之圖我國家無疆惟休實
有厚望易曰安而不忘危治而不忘亂是以
身安而國家可保也我君臣其共勉之等因
欽此

聖訓煌煌仰見我

皇考思深慮遠致治萬年之至意自古國家長享太平未有不加意於人心風俗者而人心之所以正風俗之所以醇則繫乎政教之得失其事隱於無形而及乎自微之著則為國脈之所繫未可視為迂圖也朕紹承丕緒夙夜兢兢仰惟

皇考當日以官常士習民生軍紀數大端

殷殷在抱至今日更何敢謂已治已安不思默化潛移為億萬年圖治求寧之計但天下之

大萬民之衆非一人所能獨理所望內外諸臣各舉其職視國事民事皆如一家一身思日贊襄弼予不逮為君者有持盈保泰之心為臣者亦當有憂盛危明之識朕拔諸儕伍之中任以股肱心膂原欲其以遠大自期將以致君克舜必先許身臯夔矢以實心佐以實政乃合古人進思盡忠退思補過之義若狃於故常因循怠忽但為身家利祿之謀則一事之不理一民之失所其患必有所伏豈

稱朕宵旰勤求之意乎夫朝廷者人心之本封疆者風化之原內外臣工果能精白乃心夙夜匪懈圖其遠者大者而不為苟且便安之計以匡國政以厚民生我國家萬年不拔之基其庶有賴矣將此通諭知之 又諭朕恭閱

皇考高宗純皇帝實錄內載乾隆六年七月欽奉

諭旨外省官員現任之時不許建立生祠例有

明禁或去任之後實有功德在人甘棠留詠彼地官民建祠以志去思者准其留存如郝玉麟盧焯之在閩省居官平常並無出衆名譽而建立生祠書院肖像置牌妄行崇奉似此濫觴之舉何以示旌揚而昭激勸閩省如此恐他省亦復相同著各督撫秉公察覈慎勿瞻徇情面務使羣情允協公道常存庶於人心風俗有所裨益等因欽此仰見我

皇考循名責實至意直省名宦鄉賢必其人實

有嘉言懿行方可俎豆馨香使後人知所則
倣若以碌碌無所表見之人廁名其間則賢
否混淆轉不足以興士民景仰之思即如近
日原任侍郎萬承風內閣學士錢樾皆經禮
部奏准入祀鄉賢伊二人平日居官不過循
分供職並無傑出謀猷祇以官登卿貳本籍
紳士私相推譽遂得崇奉鄉祠但似此濫等
凡居官通顯者身後人人得登祀典豈合古
人表里旌閭之義除既往者無庸追論外嗣

後直省督撫遇有呈請入祀名宦鄉賢者務
覈明其人生前居官政績確有裨於國計民
生臚舉事實方准具題禮部秉公覆覈再行
具奏請旨遵行如僅以人品端方學問優長
空言譽美並無實蹟者該部即行議駁以昭
慎重 又諭連日各王公等會同兵部帶領
護衛引見詢問該部祇據王公等咨送繕寫
綠頭籤會同帶領並不加以查驗定例在京
各旗營揀選升補人員必先咨兵部查覈直

省升調各項人員兵部亦必先行考驗始行
引見何以王公護衛獨無此例殊非覈實之
道嗣後王公等揀選護衛著先咨兵部查覈
並傳到考驗庶會同帶領引見不同具文用
昭慎重名器之義 壬子諭內閣朕每日召
見軍機大臣所諮議者朝廷政治及各省奏
牘應行訓示諭旨召見各部院旗營大臣所
延訪者即係本部院旗營之事都俞吁咈惟
日孜孜從未有舍政務而泛談瑣事者各大

臣俱宜仰體朕意殫心公事方為無忝厥職
乃近日風氣惟軍機大臣承旨書諭及應辦
事件均係公同籌酌章京等不過隨同繕寫
該大臣仍詳加覈正不敢辭勞即內務府大
臣遇事亦係公同辦理該司員等奔走奉行
不能操其長短至各部院事件則無論巨細
均先由書吏擬藁呈送司員閱看然後司員
呈送堂官畫諾具奏是大權移於在下豈非
冠履倒置乎著通諭各衙門堂官身居高位

凡事皆當盡心竭力自出權衡不得譏卸屬員身耽暇逸其有特交會議事件凡與議之王大臣俱限於一二日內齊集公所當面公同商辦不准令司員章京往來傳稟互相推卸朕實代為抱愧嗣後如有不到者即著到班之王大臣指名叅奏毋稍徇隱到班後在官言官毋許口若懸河泛論別事又諭御史吳杰奏題調缺出毋得將違例之員往返奏請徒令署員久占實缺一摺各省州縣題

調缺出該督撫自應迅速揀選合例人員奏請升調如所奏之員經部議駁該督撫另行揀員奏請其未經奉旨允准之前亦未便於數月之內再易生手徒增輟轉交代之煩上年江蘇元和縣出缺該撫以李景嶧奏調奉旨斥駁後又經兩次揀員奏調始行議准是李景嶧署任日久係因續調之員又經議駁之故委署權在上官安能以此責李景嶧以久占署缺之非該御史所奏著毋庸議癸

丑諭內閣御史蔣雲寬奏榆林府知府沈相彬前因拏獲師來明以同知奉旨記名嗣經訊明師來明並無習教從逆情事免其置議與從前徐錕原奏拏獲僧人廣安之把總鄭克儉等先經奉旨升補審虛徹銷之案相同請飭更正等語沈相彬所緝之師來明因直隸獲犯張洛焦供指係入教從逆之犯降旨令朱勲飭緝旋據朱勲奏委員沈相彬立將師來明緝獲朕因其辦理迅速尚屬能事是

以交軍機處記名並非沈相彬自行妄拏邀功亦非朱勲保薦乃係朕之特恩任用續經審虛與奉委承緝之員無涉較之廣安之案情節不同况黜陟權衡言官豈可操縱該御史所奏著毋庸議又諭松筠平日好為違道干譽之事今於察哈爾都統將次卸任復將不合例人員違例奏請調補欲留為去後之思實屬本性難移著照部議降二級留任不准抵銷瑞齡簡任察哈爾副都統原令其

隨事匡正乃一味隨同附和不能勝任著革去副都統回京在散秩大臣上行走仍帶降二級留任不准抵銷以前任古城領隊大臣額特布為太僕寺卿以熱河協領海昇為察哈爾副都統○甲寅諭內閣

天壇望燈杆木中有蟲蛀處所形跡顯露一望可見該奉祀官王顯俊自應遵照定例於兩月前呈報乃具報遲延非尋常疏忽可比吏部議以降三級留任尚屬輕縱王顯俊著降

三級調用不准抵銷如無級可降即行革職穆克登額哈寧阿明志俱著降二級留任韓鼎晉善祿俱著銷去紀錄八次免其降級其從前罰俸一箇月三箇月之處各註於紀錄抵銷桂齡著銷去紀錄四次仍降一級留任其從前罰俸三箇月之處註於紀錄抵銷都察院奏河南民孫為先呈控父冤一案得旨此案孫世修前以派折殃民等情在步軍統領衙門具控降旨交陳若霖親提審訊陳

若霖即與欽差無異自當遵旨親審乃轉委殷知府代訊以致孫世修心懷不服遣子來京復控該撫係刑部司員出身非不能訊案之人乃養尊處優遇事委之屬員陳若霖著交部議處該撫即將此案人證親提覆訊秉公定擬具奏若再委員代辦定將該撫治罪陳預即前車之鑑也慎之步軍統領衙門奏拏獲僧人廣修收藏軍器一案得旨此案僧人廣修於京城廟宇內收藏器械多件本

年四月以後又攜帶器械出入城門數次該管地面及城門官因循怠玩漫無覺察著英和等查明參奏加重懲治其拏獲廣修起出器械之步軍校等著英和酌量獎賞英和那彥寶穆彰阿雖有失察之咎但此案係該衙門自行拏獲功過尚足相抵俱著加恩免其議處乙卯諭內閣朕恭閱

皇考高宗純皇帝實錄內載乾隆六年十月欽奉

諭旨近來臣工辦事率狃於觀望迎合之陋習朕於事之應寬者寬一二事而諸臣遂相率而爭趨於寬朕於事之應嚴者嚴一二事而諸臣遂相率而爭趨於嚴自外觀之似有君令臣共風行草偃之象而究竟諸臣之趨承惟謹者多出於自私自利之念不識大體妄為揣度此乃為功名爵祿得失趨避之計耳其於朕大公至正因物付物之心何曾符合耶九卿督撫皆朕股肱大臣國計民生均有攸賴宜深體朕懷各自省察警惕以襄治理等因欽此仰見我

皇考垂訓深切著明朕今默觀內外臣工其蹈此陋習者仍復不異夫天下事有萬殊而以理裁決一事自有一事之權衡故其事應寬則因而寬之其事應嚴則因而嚴之在朕本無成見即一日之內此事從嚴彼事從寬亦以事理為準並非以一日之喜怒有畸輕畸重於其間也諸臣乃欲就一事之寬嚴揣朕

意之所向相率迎合不亦在乎大臣膺朝廷重寄果能心存至公為國為民即是非意見與朕不相符合守官執法中立不倚朕亦必能鑒其惻怛若揣測朕意以取容悅是皆希恩固寵為身家利祿之計將匡弼奚賴乎茲特通諭內外臣工辦理一切公事寬嚴輕重惟當以斟酌情理為去就不可以揣摩意旨為從違庶事得其平亮工熙績用副朕執中圖治之至意又諭本日禮部奏錢樾應否

准其入祀鄉賢請旨一摺大屬非是直省題請入祀名宦鄉賢昨經降旨飭令覈實辦理萬承風奏准入祀鄉賢在降旨以前自毋庸追論錢樾題請入祀鄉賢該部覈議在奉旨之後應准應駁即當遵照諭旨覈實定議乃該堂官不置可否輒以奏請欽定為詞實屬取巧推諉若應議事件率皆紛紛請旨亦安用該部為耶錢樾係原任之員尚不肯定其臧否若現任者更隨同附和矣天下不治皆

由於此可勝浩歎禮部堂官俱著交部察議
所有錢樾人品政績應否入祀鄉賢仍著該
部覈議具奏 諭軍機大臣等和舜武保奏
候補知府戴嘉穀循聲卓著有守有為堪勝
首府繁缺之任等語山東濟南府知府係例
應揀員調補之缺原以政務殷繁非初任人
員所能勝任若謂東省現任各府內竟無堪
調首府之員則該員等平日俱才不勝職該
撫早應奏明罷斥何得日久姑容今率請以

候補知府即補首府實屬違例所奏不准行
戴嘉穀如果辦事勤慎該撫遇有相當知府
缺出儘先奏補可也將此諭令知之 又諭
朕近日召見出差及來京陞見官員詢及山
東道路情形均奏稱該省近日沿途塘汛俱
有兵役輪直護送行人晝夜巡緝嚴肅宵小
斂戢和舜武辦理甚為認真惟逆犯日久迄
無一獲祝現等六逆蹤跡言者皆以為必在
東省而東省中又以為必在省西三府該撫

當設法訪查務期必獲不得於每次陳奏緝
捕情形僅以空言塞責東省道途寧謐該撫
督率有方本欲加以獎勵因逆犯未獲再觀
後效若能將六逆內緝獲一二名必當施以
重恩該撫不可不勉之又勉也 丙辰諭軍
機大臣等前據成格奏大青山一帶地方係
綏遠城將軍歸化城副都統所轄前因屢有
搶劫之案奏明添派官兵會哨巡緝近日仍
復盜劫頻聞緝捕廢弛已極已咨明果勒豐

阿等將派出之驍騎校等嚴叅請飭副都統
額爾起督飭官兵親往巡查嗣復具奏自八
月至今劫案已有十六起之多當降旨將果
勒豐阿等交部議處議上時將果勒豐阿革
職額爾起降補驍騎校茲據果勒豐阿等奏
成格咨開十四案該將軍等已獲犯十一名
審出四案其王師印在買岱爾村被搶馬匹
石黃在巧爾報村被剝衣服該二村坐落山
前設有廳營塘汛事隸山西撫臣孟學鄰在

高窩亥地方被搶馬匹銀兩係茂明安界內應該旗承緝之案馮隴仲在什八爾台村被搶駝隻一案已飭官兵嚴拏其餘六案俱係滿兵未赴該處以前之案等語所奏與成格原叅互異著松筠由察哈爾馳往綏遠城署理將軍事務將王師印等被搶各案月日及村莊界址查明如果勒豐阿等被叅後捏詞支飾即據實叅奏儻買岱爾等村實設有廳營塘汎應歸地方承緝成格據屬員稟報即

冒昧叅奏亦即將成格指叅至果勒豐阿等所獲賊犯十一名是否在成格十月二十日發摺之前拏獲抑係被叅後所獲並著查明具奏松筠務須一秉大公據實確查不可稍有偏徇其現獲賊犯十一名並著覆加審訊定擬具奏

上以冬至祀

天於

圜丘自是日始齋戒三日 丁巳諭內閣前據

孫玉庭等奏昨南廳屬峯山開外河近溜湧請就峯泰兩山之間添鑿減水滾壩以護閘座當交戴均元吳璥會議具奏茲據奏應照所請辦理峯泰兩山之間鑿建滾水石壩分減盛漲可免奪溜之虞著即照議趕緊興修於來年大汛前蒞工以備宣洩其臨黃壩兩面包砌碎石一節著照戴均元等所議於臨黃一面鑲築護埽用碎石包砌足資抵禦其南面平水無溜處所無庸包砌以歸撙節該督等即覈實辦理無任浮冒工竣報部覈銷又諭額駙揚古利乃開國勲臣故其世世子孫之中均賞一領侍衛內大臣福克津承襲公爵經朕加恩賞給散秩大臣年來察看福克津人尚淳樸當差亦勤著加恩將綿志所出正白旗領侍衛內大臣員缺即著福克津補授以示朕眷念勲舊後嗣至意 諭軍機大臣等朕風聞廣西荔浦縣知縣楊如松於委署縣事後有前任差役搶穀釀命一案

先僅拏獲人犯二名該令續獲正兇並將一千犯證拏獲三十四名其時富綸護理巡撫派委楊景泰趙瞻雲二員到縣提審該委員等挑斥需索將所獲人犯冒為己功富綸偏聽一面之詞率以徇庇同官諱匿重案叅奏革職及知錯誤欲圖代伊開復該令竟以氣忿含冤不食而死其大門張貼對聯有薄官含冤歸地府全家流恨在天涯之語又富綸護撫篆後有桂平縣生員十二名富綸忽委員擅動營兵乘夜鎖拏解省及提到親訊旋即釋放富綸又令州縣每月各解會盜人犯三十名遞省親審如不及十名者即行叅革又劄飭各州縣無論有罪即無罪者亦令解省以致各州縣紛紛解犯桁楊載道殆無虛日拖累不少以上各情著交文孚阮元於到粵西後確加訪查楊如松被叅是否屈抑桂平縣生員十二人係何姓名因何拏解到省又因何釋放至會盜人犯各州縣不必盡有

豈能每處俱限以定數令州縣每月各解三十人不及十名者即行叅革此一節尤為乖謬富綸既經飭行各屬自有文劄可憑其解省各案有無拖累無辜及解不足額之州縣經富綸劾叅之事富綸業經革職文孚等秉公確查如實有其事即傳旨將富綸拏問審訊定擬具奏戊午

上詣

南郊齋宮齋宿己未冬至祀

天於

圜丘

上親詣行禮遣官祭

永陵

福陵

昭陵

昭西陵

孝陵

孝東陵

景陵

泰陵

泰東陵

裕陵 遣官祭

孝淑皇后陵寢 遣官祭

端慧皇太子園寢 停次日朝賀 諭內閣壇

廟祭祀大典朕每訓諭執事人員務於數日前潔齋致謹方可冀免愆尤哈寧阿屢因典禮錯誤獲咎朕時加教誡令其恪恭將事本日恭遇

南郊大祀哈寧阿將進昨誤贊進爵非尋常疏忽可比伊自請革職治罪本屬咎所應得姑念伊平日禮儀尚為嫻熟著革去禮部侍郎護軍統領副都統及一應差使仍格外施恩賞給六品贊禮郎照常充當贊引該員務倍加敬慎勉贖前愆若再有錯誤不能再邀錄用矣又諭賽沖阿奏盛京請添設總管及

增給佐領圖記一摺所奏非是盛京宮殿一應事宜向係將軍兼管內務府大臣總司其事自國初以來相沿已久賽沖阿率請照熱河之例添設總管一員熱河係屬園亭與盛京宮殿規制不同該將軍此奏明係意存推諉所請俱不准行惟既據該將軍奏盛京宮殿事務繁多著添派明興阿協同管理以昭慎重調盛京刑部侍郎恩寧為禮部左侍郎以奉天府府尹瑞麟為盛京刑部侍郎太僕寺卿額特布為奉天府府尹以杭州副都統薩炳阿為將軍調正黃旗蒙古副都統松齡為杭州副都統鑲白旗漢軍副都統文孚為正黃旗滿洲副都統以禮部左侍郎恩寧兼正黃旗蒙古副都統內閣學士明敘兼鑲白旗漢軍副都統正黃旗漢軍副都統富僧德為鑲藍旗護軍統領庚申

上詣壽康宮行禮 諭內閣御史李遠烈奏敬陳管

見一摺直省州縣遇有公事下鄉原應擇清靜廟宇在彼暫寓不得借居富家別業彼此結納致啟夤緣請託等弊其書役濫充保家唆訟串供從中漁利實為地方之害至於相驗人命多帶書役需索酒食嚇詐銀錢均屬大干法紀著通諭各督撫嚴行飭禁如所屬州縣中有與富家子弟結拜師生及認為義子請託公事並縱令書役把持詞訟與夫相驗人命不輕騎減從騷擾閭閻者一經查出

即嚴叅懲辦勿稍姑息以肅綱紀 又諭巡視南城御史清安等奏馬甲穆隆阿控告宗室黃六帶同伊子永二永三在廣渠門外石香爐地方租住民房永二酒醉尋鬧出言污辱婦女等語朕屢經降旨宗室不許自稱姓趙姓黃此案被控宗室永二之父乃仍有黃六之稱實屬荒謬管理宗人府王公總不肯實心教訓諸事怠玩朕實抱愧八旗人等例不准移居城外宗室更不應出城居住廣渠

門外石香爐地方永二家並無墳墓在彼乃租住民房尋毆滋訟著交宗人府會同刑部秉公審訊按律定擬具奏並著宗人府將失察之族長總族長迅速查明叅奏其永二一家即責令該族長總族長於城內覓定房屋勒令即日搬移並查明凡在城外居住之宗室一體勒令移居入城以符定制 軍機大臣等奏遵旨審擬已革西寧道陳啟文固執妄揭一案得旨陳啟文於委審東科爾寺被

搶一案因懷疑輟轉瀆辦迨該督審定奏結復屢次具稟納爾松阿代為瀆奏實屬任性偏執著改發烏魯木齊効力贖罪俟李于沆一案質訊明確後再行發遣 命翰林院侍讀學士朱士彥在上書房行走 辛酉諭內閣阮元等奏請仍以分發知縣王道行署理歸善縣知縣將該員叅罰單送部查覈一摺督撫奏升奏調州縣向例均將該員叅罰案由單隨摺呈覽朕覈其案數多寡分別准駁

茲阮元等請仍以王道行署理歸善縣知縣摺尾聲明將該員叅罰案件另冊送部朕未經閱看何憑覈定若一經降旨允准即與例不符吏部亦以係奉旨准行之事不行奏駁此奏殊屬取巧著吏部將王道行叅罰案件詳加查覈如與例相符即奏明議准儻案數過多與例不符除將王道行議駁外仍將阮元李鴻賓附叅賞八旗兵丁一月錢糧○緩徵湖北天門沔陽二州縣及屯坐各衛水災節年舊欠額賦○壬戌諭內閣吏部奏行查各省事件逾限未覆請旨飭催一摺近來各督撫因循成習於各部院咨查事件任意遷延不行咨覆每年各部院紛紛請旨飭催不獨吏部為然實屬疲玩所有此次吏部單開行催未覆十一案以上之直隸山東江蘇安徽廣東福建湖北閩浙各督撫著該部即查取職名覈其本任遲延案數照例議處嗣後各部院咨查直省事件如有行催未覆逾

十案以上至十一案者即將該督撫奏請交部議處以儆玩延○又諭綿課等奏年滿覺羅學副管麟格請予議敘一摺已依議行矣綿課雖管理宗人府但此事係由伊所管正藍旗覺羅學內呈出伊自應於摺內聲明迴避今竟列銜具奏殊屬非是此皆因該管宗人府之王公等早素將繕摺一事竟委之司員並不留心閱看所致該王貝子公等俱著申飭嗣後諸事務當留心辦理斷不可竟委司員亦毋庸因此事專摺請罪旌表守正捐軀湖北孝感縣民張理妻胡氏

大清仁宗受天興運敷化綏猷崇文經武孝恭
勤儉端敏英哲睿皇帝實錄卷之三百五十

實錄卷之三百五十

十六

大清仁宗受天興運敷化綏猷崇文經武孝恭
勤儉端敏英哲睿皇帝實錄卷之三百五十一

嘉慶二十三年戊寅十二月甲子朔諭內閣
伯麟等奏土司積欠米穀請分攤賠補一摺
龍陵騰越二廳州所屬土司存留備貯米穀
虧缺歲久現在該處土司大半貧乏難以著
追加恩著照所請將龍陵廳屬芒市遮放二
土司共欠米九千七百三十六石零穀一萬
一千六百六十六石零騰越州屬南甸干崖
蓋達隴川四土司共欠米一萬七千七百五
十一石零穀一千五百三十一石零俱免其
追賠其歷任不隨時查辦之該廳州姑念事

越數十年亦著加恩免其叅處所有該土司等虧欠米穀即著落歷任該廳州攤賠均以乾隆三十五年緬甸軍需凱旋後起龍陵廳至嘉慶二十年十月二十八日查報之日止騰越州至嘉慶二十一年三月十六日查報之日止除查出詳報之廳州及在任不及三月各員免賠外其餘歷任正署廳州各按在任月日將所屬土司積欠米穀照米每石銀一兩穀每石銀五錢例價分攤賠補現任滇

省者由該督撫勒限催追升任他省及已回旗籍者即由該督撫咨行現任省分及旗籍著追嗣後該廳州採辦兵糧即照現議章程令該廳州親赴土司地方公平採買嚴禁短價浮收並責成該管知府嚴查虛報情弊以實邊儲○免雲南銅廠民欠工本銀○乙丑以翰林院侍講隆文充日講起居注官○丁卯

上命

皇次子智親王旻寧詣

大高殿祈雪○諭內閣御史盛惇大奏請嚴查養濟院積弊一摺各府州縣設立養濟院原以收養孤貧惠及鰥寡近日該管官視為具文不認真經理如該御史所奏於口糧內扣給胥役使費及捏名冒領等弊恐所不免著通諭順天府暨各督撫嚴飭所屬確查養濟院收養孤貧人數隨時親往驗放口糧出示曉諭俾窮黎均沾實惠勿以朝廷矜恤獨善政中飽姦胥慝壑如查有侵扣捏冒情弊從重懲辦毋稍姑息○旌表守正捐軀四川雅安縣民劉潮元妻鄧氏○戊辰

上詣

大高殿祈雪○諭內閣方受疇奏查出司書串通營書浮領庫銀拏獲審辦一摺張松齡即陳炳和身充司書膽敢串通營書先後冒領庫銀至一千七百餘兩之多實屬藐法作奸著方受疇嚴行審訊從重定擬具奏此案係

姚祖同自行查出著免其議處該犯起意冒領先在錢臻任內錢臻失於覺察著交部議處刻字匠穆成寬因張松齡雕刻鈴記心疑不肯付給據實呈出尚知畏法著姚祖同自行酌量獎賞○刑部奏審擬僧人廣修學習拳勇收藏軍械一案得旨此案僧人廣修於京城重地收藏軍器學習拳勇往來近畿地方攜械傳徒情節可惡著照例先行枷號兩箇月滿日發往黑龍江於到配時再加枷號

兩箇月分給官兵為奴遇赦不赦如有在配脫逃情事拏獲後一面奏聞即將該犯正法餘依議○己巳

孝惠章皇后忌辰遣官祭

孝東陵○諭內閣英和等奏三等侍衛策楞訥爾布呈請在京覓地安葬伊父一摺桑吉斯塔爾久經編入內務府旗籍且給予世職伊遺言囑令伊子策楞訥爾布在京覓地安葬不回四川原籍俾子孫永遠得以就近當差

情殊可憫著准其在京覓地安葬並賞給廣儲司庫銀一百兩為營葬之費以示恩卹庚午諭內閣御史俞士藩奏禁止濫保虧空之員一摺各直省題升調補及大計保薦卓異該督撫原應擇賢能清慎之員登之薦牘若其人本身虧缺倉庫則係應劾之員豈可復加薦舉嗣後各督撫於屬員題調卓薦皆當詳加察覈儻所保之員於交代時查出本身虧缺即當據實叅辦不可稍存迴護若明

知本員身有虧空轉徇情濫舉為之擇缺調劑設法彌縫一經發覺定將該督撫嚴懲不貸又諭常海前因僭用三品翎頂經該旗叅奏交刑部審擬革去護軍校交本旗收管乃該旗並不嚴加管束聽其前往定親王綿恩處求討錢糧經綿恩遣人押回本旗該族長文德憚於防範因常海素有欲行懇恩賞還原職之語即捏稱常海於本月初一日仍戴翎頂欲行叩閣等詞稟明該管章京查辦

以圖卸責經該旗叅奏交刑部訊明常海倚恃年老於犯案到部後忽哭忽笑斜卧公堂近於瘋狂仍妄稱懇恩求還原職並向綿恩申訴求討錢糧實屬過於熱中不安本分常海革去護軍校著同伊家屬一併發往盛京交賽沖阿永遠圈禁派人看管如再滋事即奏明治罪文德稟報不實著罰令同莫即格五兒押帶常海前赴盛京不准耽延如常海途中有自戕脫逃情事即將文德治罪○大

理寺卿甘家斌以徇情請託革職○壬申諭內閣向來科道奏事無論事之應密與否皆係實封進呈本日御史余本敦奏直省審案延玩責令該管上司清釐一摺露封陳奏奏事處官員不行駁回亦即接收轉遞均屬違例余本敦及接收之奏事官員俱著交部議處至直省審案延玩朕早經降旨訓飭不啻至再至三所有該御史請通飭督撫再行查催之處著無庸議○又諭吏部奏酌定部院

行查事件申覆逾限處分章程一摺所議尚輕著將原議十一案至二十案罰俸三箇月者改為罰俸六箇月二十一案至四十案罰俸一年者改為罰俸二年四十一案至六十案降一級留任者改為降二級留任六十一案至八十案降二級留任者改為降四級留任八十一案以上降一級調用者改為降二級調用此次查取遲延各督撫職名即遵照此旨覈議以儆疲玩○又諭阮元等奏請調

補海疆要缺知縣一摺直省督撫奏請升調州縣向例俱將該員叅罰案由單隨摺呈覽茲阮元等請以沈德溥調補海陽縣知縣僅於摺尾聲明將該員叅罰案件冊送部查覈並不開單呈覽實屬違例阮元李鴻賓俱著交部察議其沈德溥調補海陽縣知縣是否合例應准應駁著吏部覈議具奏○癸酉諭軍機大臣等據果勒豐阿奏續獲搶劫鎗斃事主案內之夥犯吉哩克及另案之青衮塔

爾二名。內吉哩克一犯已供認聽從未獲之
納木扎勒等執持器械在扎拉爾地方搶劫
聚和源等四家屬實請斬決梟示青衮塔爾
一犯。極口呼冤請解回該旗嚴行管押等語。
果勒豐阿經成格奏奏之後。連次奏報獲犯
顯係懼干譴責。始飭屬緝拏。藉以自贖。而屬
員等急於見功。恐其中不免有妄拏故勘之
弊。即如現獲之青衮塔爾一犯。到案即極口
呼冤人命至重。豈可不加詳慎。著松筠將吉

哩克青衮塔爾二犯。及果勒豐阿前此所獲
之犯。逐細詳加覆訊。不可稍有冤濫。亦不可
因有此旨。故為開脫。務須秉公鞫訊。如所獲
之犯。賊證確鑿。實係正盜無疑。即按律定擬
具奏。俟奉旨後。遵照辦理。若此內有妄拏無
辜之人。刑逼教供。冀圖塞責者。除將本犯昭
雪外。即將緝審之員。並果勒豐阿額爾起等
據實嚴參。毋稍徇隱。松筠不可存急欲來京
之念。草率定案也。○旌表守正捐軀河南漚

池縣民戴小虎聘妻劉氏。內黃縣民喬典媳
胡氏女喬氏。○甲戌諭內閣。前因果勒豐阿
額爾起任內有盜案十六次。是以將果勒豐
阿革去將軍。罰職任俸三年。額爾起革去副
都統降為驍騎校。茲據松筠查奏果勒豐阿
額爾起任內只有盜案四次等語。著將果勒
豐阿所罰職俸三年之處。加恩寬免。惟本日
果勒豐阿具奏交卸起程清字摺內。於
東陵字樣下將清文額爾吉字樣遺漏。果勒豐

阿仍著罰職任俸一年六箇月。額爾起著加
恩賞給西安防禦。○又諭。松筠奏查明大青
山一帶劫案在本年八月以前者七案。其自
八月初一日該處添設滿洲卡倫官兵以後
陸續報劫者共有九案。內廳營地方失事者
四案。茂明安游牧失事者一案。滿洲官兵承
緝者四案。成格誤將同知詳報到省日期。以
為被劫月日。於奏奏緝捕廢弛摺內。指稱自
八月至今劫案有十六起之多。殊屬疏畧。請

將成格等交部議處等語。成格於地方劫盜案件。接據屬員稟報。並未分別明晰。以致叅奏錯誤。著交部議處。同知格圖。礙額詳報遲延。又於廳營失事四案。聲敘不明。著一併交部議處。其滿洲及土默特官兵承緝四案。現已獲犯十一名。所有前鋒章京舒興阿及坐卡驍騎校等。俱著免其議處。○又諭。刑部查明王仲漢冒賑案內。分受贓銀。問擬遣流各官犯。開單具奏一摺。國家偶遇偏災。不惜鉅萬帑金賑濟災黎。此案呂時雨等身為職官。扶同捏冒。朋分賑銀。惟李毓昌持正不從。竟被王仲漢奸謀毒斃。釀成重案。伏法多人。情節甚重。所有同案發遣之呂時雨溫南峯龔國煥。謝為琳。言廷黃。章為棟六犯。著永遠不准查辦。遇赦不赦。以昭炯戒。○又諭。此次奉天吉林黑龍江等處犯事。僉發各省已到配軍流人犯。除傳習邪教及有閹十惡並歷次赦款內不准援免之情罪較重者。俱毋庸查

辦其情罪較輕之犯。著刑部覈明。准其與未到配各犯一體寬免。○以故喀爾喀扎薩克圖汗扎薩克鎮國公索諾木多爾濟子蘊丹達什襲爵。○乙亥。普免天下民欠錢糧。諭內閣朕自丙辰元旦仰蒙
皇考高宗純皇帝大廷
授璽寅紹
丕基兢兢業業。旰食宵衣。以勤求郅治。所願者四海羣黎家給人足。同臻康樂。敬惟
皇考臨御六十年。普免天下錢糧四次。漕糧三次。
次
湛恩汪濊。淪浹民心。朕嗣位以來。亦思廣施閭惠。大賚寰區。始緣教匪不靖。軍興孔棘。繼以黃河泛溢。屢舉大工。十餘年間。所費帑金數踰十千萬。國家財賦。歲有常經。實有入不敷出之勢。是以嘉慶十四年。朕五旬正慶。雖恩綸載錫。而未能普惠閭閻。比年仰荷
昊蒼垂佑。稂莠蕩除。萬方寧謐。河流順軌。久慶

安瀾以正供所入謹制國用尚可無虞匱乏
朕子惠元元深念損上益下之義俟將來府
藏充盈仍欲覃敷渥澤明歲嘉慶二十四年
為朕六旬正壽宜先蠲除積逋俾小民戶免
追呼共享含哺之樂所有各省節年正耗民
欠及因災緩徵帶徵銀穀著各督撫詳析查
明按照該省所屬之某州某縣實欠在民銀
穀若干速行開單具奏以次降旨豁免並著
先將此旨謄黃宣示城鄉村鎮咸使聞知俾
官吏胥役無從影射侵欺以期膏澤下究用
副朕惠鮮懷保仁壽斯民至意該部即遵諭
行○又諭御史張元模奏請通飭州縣嚴禁
捕役窩盜一摺地方盜竊案件總應嚴查窩
戶以淨根株其窩竊牛馬勒價回贖尤為閭
閻之害者各督撫嚴飭州縣實力整頓遇有
報盜報竊之案嚴比捕役訪查窩頓如有得
規包庇及代窩賊之戶勒贖贓物者一經查
出從嚴懲辦其地方官之廢弛捕務者該管

上司指名嚴參俾知儆惕以戢奸宄而安良
善○又諭御史吳杰奏藩庫銀兩請飭禁支
借一摺直省藩庫封貯銀兩帑項攸關藩司
自應檢覈款宗慎司出納若聽州縣濫行支
借因循日久必致庫項虛懸著各督撫督率
藩司詳查庫貯款目確實報明並嚴禁濫行
支借以杜弊端○又諭蔣攸銛奏邪教案內
永遠枷號之李潮選一犯現仍有習教之人
前往訪尋該犯原犯罪名例應發往回城從
重擬以永遠枷號應請即發回城永遠枷號
以絕根株等語所辦甚是李潮選一犯前因
學習天主教抗不改悔留於犯事地方永遠
枷號原令習教之人觸目警心共知儆戒乃
仍有匪徒前往訪尋實屬習不畏法李潮選
一犯未便再留內地著即發往回城永遠枷
號並通諭各直省督撫凡各項邪教案內永
遠枷號人犯如在本處安分守法別無煽惑
情形照舊留於內地枷號外其有執迷不悟

仍與同教匪徒私相交結往來者一經查出即將該犯照此次李潮選之例一併發往回城永遠枷號○諭軍機大臣等戶部議覆伯麟等奏滇省廠銅不敷定額請收買四川商銅接濟由川買銅回滇須另開山路添買貯銅房庫多糜帑項莫若即令四川本省採辦徑行起運較為便捷該省子廠每年出銅若干如何開採轉運請飭四川總督雲南巡撫會議章程具奏等語滇省每年應運京銅並本省局鑄以及各省採買官銅近年均辦不足額今川省西昌縣新開子廠既產銅豐旺本年已由滇省採買四百萬斤以有餘補不足實於銅務有益惟一切開採發運必須妥議章程方足以資經久蔣攸銛曾任雲南藩司銅廠情形素所深悉著會同伯麟李堯棟悉心籌畫務當不分畛域期於國用有裨如每年能辦足四百萬斤固屬甚善即為數稍減可以行之久遠亦不為無補其應如何派

委官員經理開採及酌定價值由何路發運較為省便之處兩省公同覈計詳細開單定議具奏伯麟等亦不得因川省現有子廠可採不竭力督辦滇銅意存諉卸鄰省之見也將此各諭令知之○以故扎魯特扎薩克貝勒德沁子布木色楞襲爵○以太常寺卿兼鼎晉為大理寺卿○江西布政使袁秉直年老命來京以直隸按察使瑞弼為江西布政使山東濟東道岳齡安為直隸按察使○以貴州古州鎮總兵官雙林為江南提督廣東廣州城守協副將張紹緒為古州鎮總兵官○丙子

上詣

大高殿祈雪○諭內閣向來吏兵二部引見人員俱於次日述旨其有應行謝恩者於再次日具摺謝恩其餘各部院有述旨者有不述旨者即如昨日值年旗帶領總管城守尉各員引見本日並未述旨該總管等即各具摺

謝恩辦理殊未盡一嗣後文武各衙門帶領引見俱著於次日一體述旨其應行謝恩人員於再次日具摺謝恩著為令○丁丑諭內閣托津等奏議駁賽沖阿奏添設盛京圍場官兵一摺所議是盛京圍場本與木蘭歲歲臨幸者不同賽沖阿前奏未免過事鋪張其所請專設協領及關防處官員兵丁等款著照部議不准添設祇准增設卡倫五處合舊卡共十二處坐卡官兵應得鹽菜銀兩照議於羨餘項下如數動支至該將軍摺內所稱荒營字樣太不成話著即行更改○又諭長齡奏甘省下色糧石請酌量變通一摺甘省額徵下色糧石向不估支兵食每歲積存至二十餘萬石糧質輕脆易致霉變各州縣因有通融抵貯之弊據該督奏請量為變通著照所請嗣後該省州縣倉貯下色糧石除搭估馬料外大缺酌留二萬石中缺酌留一萬石小缺酌留五千石以備荒歉之需其餘下

色糧石令該州縣詳明糶賣按照部價以一批二隨時買還上色歲底造冊責成該管道府認真稽查盤驗結報於奏銷時彙冊咨部即以估支兵食以歸實用○又諭刑部議駁御史吳杰條奏各省婦女及年老廢疾之人翻控審虛問擬軍流不准收贖一摺所駁甚是婦女及年老廢疾之人罪至軍流者准予收贖原屬法外施仁定例遵行歷年久遠前因山東壽光縣蔣柱誣控伊媳董氏一案蔣張氏闖入司堂喧鬧特旨不准收贖原係因事示懲以儆刁健乃御史吳杰因此一事即奏請將各省翻控婦女並年老廢疾軍流收贖之例概行停止豈不大乖祥刑之義部議直省婦女及年老廢疾翻控之案審屬虛誣者如因伊夫及尊長被害並痛子情切懷疑具控俱准照律收贖自應如此辦理即聽從主使出頭誣控之案承審官亦應當堂明白曉諭令其供出主使之人按律治罪該犯聽

從出名仍准其收贖若堅不將主使之入供明始不准其收贖俾知據實自首庶明刑之中仍不失欽恤之義也○諭軍機大臣等盛京風俗淳樸滿洲等向皆拴養馬匹當差百餘年來生齒日繁有力養馬者少或遇有官差借雇馬匹乘騎此種習氣斷乎不可馬上技藝係滿洲至要之事儻不自拴馬匹則技藝必漸至生疏將來竟有不能乘馬者著傳諭賽沖阿富俊松寧詳細察看三省情形令

兵丁自行拴馬使滿洲不失舊俗其應如何辦理之處著會同妥議具奏○予故江南提督沈洪祭葬如例○予福建捕賊淹斃把總林天桂祭葬世職兵丁傅日新等十三名賞卹如例○戊寅諭內閣向來各直省督撫題請升調人員有與例不符經吏部議駁者內閣或票擬依議單簽則不准所請該督撫等仍有應得處分或於依議一簽外又加票准其升調該督撫等處分俱著寬免一簽謂之

雙簽經朕閱定或准或否擇用一簽發下施行此項不准升調之員有該督撫復行專摺奏懇奉旨允准者該督撫處分仍可寬免辦理殊未盡一嗣後升調人員吏部議駁經朕降旨依議係內閣曾票雙簽者如果人地相需仍准該督撫據實奏請若本條擬單簽者即不准再行續奏至人地相需於例稍有未符原例准專摺奏請但亦必須將地方如何緊要該員有何實在政蹟其缺必需其人方能勝任據實聲敘候朕裁奪毋得輒以人地相需空言率行陳請以昭覈實○又諭錢臻奏叅昏瞶玩縱匪徒之縣令請旨革審一摺所叅甚是地方劫盜案件該管官隱匿不報尚應嚴叅議處況匪徒結會傳徒豈容稍存諱飾致令養癰貽患此案南康縣知縣徐景於匪徒李祥詰等結會毆搶平時既漫無覺察迨經該道訪問猶稱查無其事實屬有心諱飾徐景著革職拏問交該撫提同案犯嚴

審定擬具奏。並著通諭各直省地方官。遇有習教傳徒之案。如能自行拏獲。審明辦理。其前此失察處分。准該督撫奏明寬免。仍當加以獎勵。儻玩縱隱匿。別經訪聞拏獲。審明後。即將該地方官發往新疆。以示懲儆。○旌表守正捐軀安徽蒙城縣民錢如山姪女錢氏。

大清仁宗受天興運數化綏猷崇文經武孝恭勤儉端敏英哲睿皇帝實錄卷之三百五十一

大清仁宗受天興運數化綏猷崇文經武孝恭勤儉端敏英哲睿皇帝實錄卷之三百五十二

嘉慶二十三年戊寅十二月己卯諭內閣。明年朕六旬正壽。聞各部院衙門。自西直門至圓明園沿途豫備建設經壇。藉申頌祝。在諸大臣情殷愛戴。自可納其悃忱。其順天府屬紳士。並各省候補候選降調人員。以及緣事廢員。從前亦有請建經壇之舉。人多費廣。未免徒事虛糜。朕花甲甫周。惟期惠及臣民。一應綽節繁文。俱從省約。著通行曉諭。如該紳士廢員等有呈請建設經壇者。該督撫及順天府尹早行禁止。不准代為陳奏。俟朕七旬

校修

嘉慶二十三年戊寅十二月己卯諭內閣。明

年朕六旬正壽。聞各部院衙門。自西直門至圓明園沿途豫備建設經壇。藉申頌祝。在諸大臣情殷愛戴。自可納其悃忱。其順天府屬紳士。並各省候補候選降調人員。以及緣事廢員。從前亦有請建經壇之舉。人多費廣。未免徒事虛糜。朕花甲甫周。惟期惠及臣民。一應綽節繁文。俱從省約。著通行曉諭。如該紳士廢員等有呈請建設經壇者。該督撫及順天府尹早行禁止。不准代為陳奏。俟朕七旬

正壽再當俯允所請也○又諭王鼎等奏懲辦把持囤積一摺鋪戶積存米石例有定額今東安縣鋪戶囤積糧食數至六七萬石之多殊干例禁著王鼎等即派任銜蒞前往查辦除各鋪所囤糧食准其每種酌留一百六十石外餘俱押令流通糶賣以平市價其該縣應行買補倉儲亦令照該鋪原買價值公平發價採買不得抑勒剋扣所有恃符阻撓之郭懷春張禮泰李錫章王大志楊廷賜均

著革去監生以示懲儆如再有抗違即行解部治罪○又諭年終由八旗帶領世襲官員引見之時俱將外省咨送世襲官與該旗世襲官一同帶領引見補放此次鑲黃旗漢軍將在京之襲官人員於十四日帶領引見業經補放而今日又將黑龍江將軍咨送承襲雲騎尉人員帶領引見此項引見人員到旗既遲自應與明年年終襲官家譜一同辦理嗣後各省將軍大臣等咨送世襲官內如有

到遲者除著該旗即將襲官人員駁回入於次年辦理外仍將因何遲延之處查明叅奏○以故喀爾喀賽因諾顏貝子巴勒珠爾遜多布子巴勒多爾濟襲爵○庚辰諭內閣和舜武奏遵旨籌議酌撥司庫間款調劑登州營兵食一摺山東登州鎮中右二營地處海濱糧草價貴應須量為調劑著照所請准其於司庫扣存工程市平銀內撥銀四千兩以二千兩給發登州鎮存貯公所每年秋收採辦糧石春間散給兵丁食用陸續扣餉存貯秋間再為採買之需以二千兩發商生息所得息銀分作八年歸還該鎮原借銀二千兩即將交商本銀二千兩一併提還司庫以清帑項○諭軍機大臣等戶部議奏特依順保請裁減黑龍江城官莊壯丁一摺所駁甚是已依議行矣黑龍江城官莊四十座歲交糧石以備兵丁接濟口糧等項之用特依順保率以兵丁疲乏為詞請裁官莊十座計每歲

積省牛具等銀不過一百四十餘兩而少收額糧至二千二百石若各官莊紛紛致尤必致有妨儲備特依順保此奏其中必有慇懃之人著松寧查明黑龍江城所屬官莊實在情形特依順保係受何人欺蒙妄興此議即將特依順保及造議之人一併據實參奏○以墨爾根副都統巴靈阿寧夏副都統常忠荆州左翼副都統德格老病命巴靈阿回京為頭等侍衛常忠德格各回駐防為協領均

賞副都統銜以副都統銜色玉慎為墨爾根副都統荆州協領德星保為寧夏副都統西安協領七克唐阿為荆州左翼副都統○旌表守正捐軀河南南陽縣民張元妻趙氏遂平縣民張中松妻李氏○辛巳

上御乾清門聽政○諭內閣御史盛惇大奏請免正賦十之一二將各省積欠僅免遠年少許餘仍照舊著追一摺明年朕六旬正壽特降旨普免天下積年民欠原以加惠窮黎普

施恩澤俾免追呼此內因災緩帶者居其大半如該御史所奏官虧吏蝕誠不能保其必無然豈能因此反汗屯膏不行惠民之政即如賑卹災民從前亦屢有捏冒侵欺之案詎以此遂疑直省水旱偏災盡成虛妄將救荒之政概行停止乎至請蠲正賦尤非該御史所當言所奏紕繆不可行著通諭各督撫藩司飭查積欠總以本月十二日降旨以前為斷查明實欠在民者開列清單具奏其有官

虧吏蝕以完作欠等弊各嚴加稽覈據實參辦毋稍徇縱務期實惠及民用副朕行慶敷恩至意○又諭富俊奏覈議吉林站丁地畝章程一摺吉林站丁私將地畝典賣若將該丁等自墾地畝普行勘丈每名僅留給十晌餘俱入官徵租丁力必驟形竭蹶著仍照松寧原議循舊辦理至查出典賣與民地一萬三千五百六十三晌五畝著照富俊所議均勻賞給額設站丁八百五十名每名十五晌

九畝零即作為隨缺工食養贍津貼其當差窮苦站丁各按典賣之民種滿十年照該村屯租地寬減二成給該丁納租不准該丁奪地另佃如民抗不交租照例徹地交站丁自種嗣後如再有越界私墾及私相典賣者丁民俱一體治罪地價全行入官以示懲儆○宗人府審擬宗室那斯渾圖出城賃居民房宗室明兆索欠爭鬪一案得旨此案宗室那斯渾圖出城賃居民房宗室明兆因索欠辱罵婦女僅將那斯渾圖問擬杖一百折罰養贍銀一年明兆問擬杖八十折罰養贍銀八箇月均屬輕縱那斯渾圖著改罰養贍銀二年明兆著改罰養贍銀十六箇月以示懲儆前經降旨責令該族長等於城內覓房勒令那斯渾圖家屬搬移著嚴行飭催令將搬移日期迅速報明宗人府存案如再抗違加重治罪○以太僕寺少卿松廷為卿通政使司副使潤德為光祿寺卿○福州副都統慶保

齊齊哈爾副都統烏勒德呢俱年老命留京以叅領用以西安協領瑚松額為福州副都統三姓協領春升保為齊齊哈爾副都統○予原任江蘇江浦縣教諭竇廷樸湖南常德府知府應先烈入祀名宦祠山東故河南道御史年昌裕湖廣道御史林鍾岱山西故候選州同郎廷勛福建故揚州府知府伊秉綬湖南前明殉節生員唐虞一四川故安徽太平縣知縣于炳浙江故左春坊左贊善諸錦入祀鄉賢祠從總督董教增蔣攸銘巡撫陳桂生成格前任巡撫巴哈布陳預等請也○壬午諭內閣禮部等衙門年終彙奏稽察官管廟宇一摺京城內外官管廟宇禮部等衙門每屆年終俱以並無容留來歷不明之人並聲明殿廡亦無私行租賃等事彙奏一次幾成具文各廟宇將空閒房屋租與來京官員人等暫住事所常有所應查者恐有遊方僧道及來歷不明之人濶跡其中各該衙門

務飭派出之員認真稽察留心偵訪。一經查出立即稟明究辦。不可虛應故事。祇以一奏塞責。○癸未諭內閣長齡奏查明甘省已徵未報銀糧草束勒限追繳開單請旨一摺。甘肅各州縣已徵未報銀糧草束。前經降旨交長齡督同藩臬兩司嚴飭該管道府逐一清查。茲據該督查明皋蘭等四十一廳州縣同州判縣丞除虧糧存價及抵墊攤銷並舊虧案內咨追無著各項外。已入清查者未完銀十七萬一千九百八十八兩零。未入清查者實虧銀十六萬三千二百六十三兩零。均係因公挪用。尚無侵盜入己情弊。著照所請將單開一萬兩以上之戴椿齡等十二員。五千兩以上之郭廷光等十一員。五十兩以下之誠忠等五十員。分別在甘離甘現任去任。及在部監追者。俱按限追繳。如逾限不完。定行照例分別治罪。自此查辦之後。若再有隱漏。即將該管道府嚴參著賠以示懲儆。○

增陝甘鎮西迪化二府州鄉試中額一名。從總督長齡請也。○甲申。上御寧壽宮。賜王公大臣蒙古王貝勒貝子公額駙台吉等食。並賞賚有差。○諭內閣。賽沖阿奏管理移居宗室事務侍郎恩寧調補京缺。開單請簡一員。協同管理一摺。已於單內派出瑞麟矣。本日賽沖阿等審擬宗室全勝與弟全倬等開設花會誘賭一案。復有六黃七黃之稱。甚屬荒謬。宗室自稱姓黃。姓趙。屢經朕降旨訓飭。不意盛京亦有此惡習。該管大臣等務隨時諄切教誡。俾令悔改。再全勝等在牛莊居住。是否盛京舊住宗室。向准散處各城。抑係全勝等私行移住。著賽沖阿等查明覆奏。如係私自移居。凡有似此者。俱責令移回盛京附近居住。毋許輒往各城滋生事端。○又諭。賽沖阿等奏審訊宗室全勝等開設花會覆覈定擬。並聲明援赦寬免一摺。甚屬非是。此案宗室全勝與伊弟全倬有六

黃七黃之稱已屬荒謬復敢開局聚賭引誘多人實為不安本分之尤豈能援赦寬貸賽沖阿恩寧均著傳旨申飭所有本案首從各犯俱著照原擬軍流徒杖各罪名分別圈責發落一概不准援免○乙酉

上詣

大高殿行禮○幸北海閱冰拔烏珠穆沁扎薩克親王多爾濟濟克默特納木濟勒阿巴噶郡王喇特納錫第科爾沁貝勒色楞多爾濟等二人喀爾喀扎薩克貝勒忠濟勒車凌等十一人郭爾羅斯扎薩克輔國公恩克托克托瑚蘇尼特輔國公額琳沁克什克騰扎薩克頭等台吉旺楚克喇布坦青海扎薩克輔國公喇特納錫第察哈爾和碩特扎薩克頭等台吉達什沙木丕勒等四人土爾扈特台吉鄂齊爾回部沙雅爾阿奇木伯克諾什咱特等十五人琉球國正副使毛維新等二人於神武門外瞻觀○以禮部尚書穆克登額

戶部右侍郎那彥寶內閣學士明敘充經筵講官○丙戌

上御撫辰殿大幄次賜蒙古王貝勒貝子公額駙台吉及外藩使臣等宴並賞賚有差○緩徵江蘇高郵甘泉二州縣水災額賦及次年新賦○丁亥諭內閣和舜武奏審結積案起數一摺山東巡撫衙門積案一千三百七十四起自和舜武到任後先後審結一千一百二十起臬司衙門積案六千八十餘起溫承

惠到任後審結五千四百餘起該省前此盜風甚熾現在匪徒斂戢行旅安然和舜武溫承惠辦事認真著有成效俱著加恩交部議敘前任巡撫陳預臬司張五緯因循廢弛實難辭咎陳預著降補刑部主事非奉特旨不准保升張五緯現發往軍臺効力期滿之日不准即行奏請釋回候旨辦理以示懲儆○戊子

孝莊文皇后忌辰遣官祭

昭西陵

上詣

慈寧宮

壽康宮行禮○諭內閣本日領侍衛內大臣總

詣達內務府大臣等奏派明年二月初七日

祭

孝淑皇后陵寢隨從二阿哥之散秩大臣詣

達內務府大臣此奏未免過早經朕召見那

彥寶詢問據奏向於正月內奏派因明年恭

值六旬大慶是以改於歲前忌辰具奏此言

甚屬非是明年一歲之中如清明中元冬至

俱有祭

陵典禮豈能概行避忌若欲於忌辰具奏則明

年正月內逢忌辰者共有四日彼時奏派並

不為遲亦何必早至月餘耶從來人君好言

吉祥動輒避忌最非美德明年值朕周甲之

年率土膺歡然中外應行陳奏事件豈必盡

皆美善若似此拘泥挪前移後必致事多積

壓其有關於政治者非細茲特明白宣示內

外大臣明歲凡有應奏事件俱各照常陳奏

或值綵服日期斟酌呈遞亦屬臣下忠敬之

忱萬不可專意粉飾致妨實政轉非所以仰

體朕夙夜孜孜勵精圖治之心也將此通諭

知之○理藩院奏熱河都統伊冲阿奏審明

土默特貝勒挑選部落幼丁充當音樂一案

得旨此案土默特貝勒挑選本部落幼丁派

當蒙古音樂差使明係教演戲班豈能瞞昧

近日蒙古王公漸有此風恭養優伶大改敦

樸舊習殊為忘本遂未從前已故貝勒貢楚

克巴勒桑挑派幼丁四十名終日演唱况家

有戲臺朕聞之熟矣今濟克默特扎布襲職

後又續挑四十名均屬任意妄為伊冲阿糊

塗冒昧議請仍照前任章程不得過四十名

之數理藩院亦率行議准俱屬非是貢楚克

巴勒桑業經身故無庸置議濟克默特扎布

現議罰俸二年亦著免其重科所有兩次挑

取幼丁俱著徹歸各佐領下當差嗣後各蒙古部落挑取幼丁演戲之事著永遠禁止將此旨通諭內扎薩克等知之○以故喀爾喀賽因諾顏輔國公格哩克端多布子桑都克多爾濟襲爵○江寧將軍穆克登布年老命來京調廣州將軍本智為江寧將軍綏遠城將軍八十六為廣州將軍以吉林副都統祿成為綏遠城將軍調西安左翼副都統富登阿為吉林副都統以盛京協領哈興阿為西

安左翼副都統○以歲暮禋祭

太廟自是日始齋戒三日○己丑諭內閣成格奏請以候補知府補授澤州府知府一摺澤州府缺應歸部選韓輝應補升調遺缺不應補告病遺缺該員在晉試用並無緝獲要犯勞績該撫何得藉此為詞違例請補所奏不准行澤州府一缺仍照例歸部銓選○諭軍機大臣等松筠奏遵旨覆審青衮塔爾等實因賊犯吉克密特挾嫌誣指等語青衮塔爾

及住達克策伯克既經松筠審明實係誣扳俱著即行釋放松筠此時已往大青山後一帶查勘一俟勘明即行妥議章程具奏至該處搶劫案內賊犯未經報獲者尚有二十四名松筠不必等候全獲昨已降旨將八十六調補廣州將軍祿成簡放綏遠城將軍八十六接奉諭旨即行來京謝恩再赴新任其綏遠城將軍印務仍著松筠署理祿成已令於新正月初二日由京起程赴任祿成人尚精幹

到任後將未獲各犯交令上緊嚴緝松筠即行來京供職○庚寅諭內閣昨據給事中李振祐參奏都察院此次京察有給事中色成額一員先經列入六法嗣該給事中獨赴公堂辯論干求演習拜跪該堂官剗行吏科改列三等前後反覆視若兒戲等語當交軍機大臣查明具奏茲據奏調查該衙門冊剗等件並詢之色成額及該院經歷等官原冊內色成額先填有疾復經都察院剗知吏科改

入三等屬實至色成額上堂銷假曾演習起跪廳官百昌陶定中親見實未求改三等該給事中下堂後各堂公商剗行吏科改入三等請將都察院堂官分別嚴議議處京察為激揚大典舉劾皆當慎重況都察院職司風憲尤不應稍涉游移此案都察院堂官所定京察冊籍雖未過部但業經公同註考乃輒將六法之員剗行吏科改列供職實屬輕率色成額仍著列入有疾是日在署公同議改

之都察院堂官景祿吳芳培蔣祥墀齊布森俱著交部嚴加議處和桂隨同畫諾著交部議處尋議上得旨景祿等俱著實降一級調用景祿以副都統候補吳芳培以侍郎候補齊布森蔣祥墀以從三品京堂候補和桂降二級留任不准抵銷○又諭廣東潮橋埠鹽與省河同時定價閱今百餘年人工食物較前增昂從前省河鹽價已據該督奏准加增現在潮橋各商疲乏情形更甚據阮元查明

必須量為調劑所有潮橋埠鹽著准其照蔣攸銑前奏覈定成本一律加增以紓商力○辛卯以歲暮禋祭遣官祭

太廟中殿

後殿○以禮部尚書穆克登額署兵部左侍郎劉鑲之為都察院左都御史以正白旗漢軍都統松筠為禮部尚書候補侍郎吳芳培署兵部左侍郎○以前任江寧將軍穆克登布為正藍旗漢軍都統○壬辰禘祭

太廟

上親詣行禮○遣官祭

永陵

福陵

昭陵

昭西陵

孝陵

孝東陵

景陵

泰陵

泰東陵

裕陵 遣官祭

孝淑皇后陵寢 遣官祭

端慧皇太子園寢 遣官祭

太歲之神 朝鮮國正副使鄭晚錫等三人

於午門外瞻觀 癸巳

上御保和殿筵宴朝正外藩巴林科爾沁奈曼
教漢阿巴噶喀喇沁扎魯特喀爾喀土默特

鄂爾多斯烏喇特郭爾羅斯克什克騰蘇尼

特翁牛特阿巴哈納爾烏珠穆沁青海綽羅

斯土爾扈特王貝勒貝子公台吉塔布囊等

及朝鮮琉球國正副使等隨文武大臣依次

就坐諸樂並作

上進酒召左翼巴林親王銜扎薩克郡王索特

納木多爾濟科爾沁扎薩克郡王和碩額駙

索特納木多布齋奈曼扎薩克郡王巴勒楚

克教漢郡王幹薩巴拉科爾沁貝勒鄂勒哲

依圖喀喇沁扎薩克貝勒托恩多土默特扎

薩克貝子固倫額駙瑪呢巴達喇右翼烏珠

穆沁扎薩克親王多爾濟濟克默特納木濟

勒喀喇沁親王銜扎薩克郡王滿珠巴咱爾

喀爾喀扎薩克郡王德木楚克扎布回部郡

王銜貝勒哈迪爾科爾沁貝勒色楞多爾濟

喀爾喀扎薩克貝子凝保多爾濟喀喇沁扎

薩克輔國公理藩院額外侍郎瑪哈巴拉等

至

御座前賜酒成禮 是月四川總督蔣攸銑奏

遵查非刑器具嚴飭一律銷燬惟川省最多

滋事游民川東為尤甚匪徒蹤跡視州縣之

寬嚴為去住稍存姑息則水懦之患甚於火

猛得旨此言洵屬切當今時多蹈此弊實力

整頓寬嚴並用習俗流於姑息必應挽回勉

之 是年旌表孝子安徽等省霍山縣江顯

泗等七名孝婦浙江常山縣魯徐氏一口孝

女湖北等省安化縣陶氏等二口守節合例

宗室秀櫟妻馬佳氏等十三口。滿洲松海妻	王氏等一百二十四口。蒙古齊林扎妻宋氏	等三十八口。漢軍陳慶福妻楊氏等三十九	口內務府雙住妻杜氏等五口。各省駐防李	魁妻張氏等一百八十八口。直隸等省承德	縣陳廷黼妻張氏等八百九十五口。未婚守	志江南等省史思贊聘妻張氏等十四口。百	歲壽民婦安徽等省王徐氏等二十一名口。	五世同堂安徽等省吳爾勤等四十二家。各	給銀建坊如例。(一產三男直隸等省曹希	閔等四家)會計天下民數穀數。直隸等省	通共大小男婦三萬四千八百八十二萬三	十七名口存倉米穀三千五百五十六萬三	千一百四十四石八升七合七勺。
--------------------	--------------------	--------------------	--------------------	--------------------	--------------------	--------------------	--------------------	--------------------	--------------------	--------------------	-------------------	-------------------	----------------

大清仁宗受天興運敷化綏猷崇文經武孝恭	勤儉端敏英哲睿皇帝實錄卷之三百五十二
--------------------	--------------------

大清仁宗受天興運數化綏猷崇文經武孝恭勤儉端敏英哲睿皇帝實錄卷之三百五十三

監修總機官堀尾忠晴太子太傅武英殿大學士文淵閣領閣事稽察欽奉
上諭事件處管理工部事務翰林院掌院學士蘭第

加三級尋常加四級尋常振鐸總教官太子孫休文淵閣大學士管理刑部事務加五級戴均元禮部員外郎起居注官太子孫休文淵閣提舉

閣下諸公欽奉 上諭事仲盛儒林大學士戶部尚書翰林院掌院學士教習廣吉士總管內務府大臣續黃旗滿洲都統步軍統領

理戶部三庫奉宸苑清漪園等處總理工程處御茶膳房御藥房大醫院西洋堂總軍功加級通帶加級庫常加五級紀錄三

英租界總督太子太傅禮部尚書王壽康行及武英殿總管管理園子監事務加六級隨帶二級紀錄四品汪廷珍等奉

敕修

嘉慶二十四年己卯春正月甲午朔

李有銀先生遺墨

上詣

奉先殿行禮○詣

堂子行禮○遣官祭

太廟後殿○御太和殿受朝作樂宣表如儀○

詣

大高殿

壽皇殿行禮○御太和殿賜王公大臣官員蒙

古王貝勒貝子公額駙台吉及外藩使臣等

宴○以

六旬萬壽頒詔天下詔曰朕寅承

寶命統御鴻圖惟夙夜不敢康際春秋之鼎盛

託身元元之上。勤思業業之中。二十四年。蓋

如一日洪惟

昊穹祐順

列聖垂麻席化宇於承平民用和睦應昌期而

篤祐身其康強溯昨錫慶於五旬越今受釐

者十載朕躬膺

懋眷心切悲忱誠百爾以咸勤慮一夫之不獲

卷五

1

肆勞秋獮四方足紀律之師率作春耕百里

最循良之吏。息牧垌於紫塞。甌脫長寧。恬汎

水於黃流尾間直達俾予從欲以治敷民膏

康以生往者藥牙伏於畿南乃者掘堞噓由

海上朕深思宥密益勵旰宵方懼人事之滋

愆乃荷

天心之昭鑒震雷消沴甘澍洗霾甄陶太和簫

勺羣慝暘而暘雨而雨克臻玉燭之調雲非

雲煙非煙敢謂珍符之至幸三靈之丕應偕

萬景以咸亨。爽惟民迪吉康。啟斯世躋仁壽。朕懷用愜。其敢自多。今歲十月。令辰為朕六旬慶節。亦既卻彼珍貢。屏厥繁文。允念爾萬方祝嘏之忱。宜沛朕九宇同仁之惠。先已特開慶榜。茲庸覃錫恩綸。綏萬邦屢豐年。普延祺於有衆。大一統王正月。爰布令於始和。所有應行事宜。開列於後。五嶽四瀆等祀。應遣官致祭。著察例舉行。一。

歷代帝王陵寢

先師孔子闕里應遣官致祭著察例舉行。一。自王以下宗室覺羅十五歲以上者。俱加恩賜。一。滿漢大臣年六十以上者。俱加恩賜。一。內外滿漢文武各官。俱加一級。一。內外大小各官。除各以現在品級已得封贈外。凡升級及改任。著照新銜封贈。一。國子監貢監生。及各官學教習。免坐監期一月。一。各省儒學。以正貢作恩貢。以次貢作歲貢。一。滿漢孝子順孫義夫節婦。該管官細加諮訪。確具事實。奏

交禮部覈實旌表。一。八旗滿洲蒙古漢軍兵丁。及內扎薩克喀爾喀等蒙古。年七十八九十以上者。分別賞賚。至百歲者。題明旌表。一。軍民年七十以上者。許一丁侍養。免其雜派差役。八十以上者。給與絹一匹。綿一斤。米一石。肉十斤。九十以上者。倍之。至百歲者。題明旌表。一。直省有坍沒田地。其虛糧仍相沿追納者。該地方官查明咨部。奏請豁免。一。從前各省偏災地方。所有借給貧民籽種口糧。

牛具等項。查明實係力不能完者。著予豁免。一。各處養濟院所有鰥寡孤獨及殘疾無告之人。有司留心以時養贍。毋致失所。一。各省軍流以下人犯。俱著減等發落。一。各省監禁人犯。著將上年秋朝審緩決。至三次各犯。仍照節次查辦之例。查明所犯情節。分別減等發落。其緩決一二次人犯。內有案情本輕。可與矜原者。亦著該部查明請旨。定奪於戲。凡厥庶民。歸有極。協五福於用。敷暨予一人猷。

同心樂萬年以承敎布告天下咸使聞知○
封皇三子綿愷為惇郡王皇四子綿忻為瑞
親王皇長孫奕緯為貝勒○晉封貝勒綿志
綿勲郡王銜賞三眼花翎貝子奕紹為貝勒
鎮國公綿德輔國公綿懋為貝子○晉封科
爾沁貝勒鄂勒哲依圖郡王銜賞三眼花翎
並免鄂勒哲依圖等處分及應扣銀兩有差
○賞巴林親王銜扎薩克郡王索特納木多
爾濟黃纒○賞大學士托津雙眼花翎紫纒
賞還大學士明亮紫纒晉大學士章煦太子
太保並開復托津等處分有差○乙未
上御乾清宮賜皇子皇孫親藩等宴○御重華
宮茶宴廷臣及內廷翰林以馬遠幽風圖聯
句○丙申
高宗純皇帝忌辰遣官祭
裕陵
上詣
奉先殿

壽皇殿行禮○詣
雍和宮行禮
火神廟拈香○丁酉
上詣
大高殿行禮○幸圓明園○詣
安佑宮行禮○以瑞雪普霑加賞八旗及內務
府三旗兵丁半月錢糧○給直隸清河宣化
二縣上年被水被雹災民一月口糧○緩徵
山東章邱鄒平海豐聊城莘館陶濰臨清武
城九州縣及德州東昌二衛上年水災額賦
○展賑奉天遼陽廣寧承德海城寧海鳳凰
岫巖牛莊小黑山白旗堡巨流河十一處及
錦州撫民同知所屬上年被水旗民○給江
蘇蕭高郵寶應三州縣及徐州衛上年被水
被旱災民一月口糧○展賑安徽宿州上年
被水被旱災民給靈璧泗五河鳳陽四州縣
及長淮鳳陽泗州三衛災民一月口糧○貸
山西隰奇嵐平魯孟陽曲太原榆次徐溝靜

樂九州縣上年被雹災民倉穀緩徵奇嵐年
魯一州縣歷年借欠倉穀○貸河南武陟修
武孟安陽湯陰內黃六縣上年被水災民倉
穀○貸甘肅皋蘭西和靈臺鹽茶武威肅
高臺八廳州縣及肅州州同東樂縣丞所屬
上年被旱災民籽種口糧○戊戌以盛京工
部侍郎常起為吏部右侍郎內閣學士明敏
為盛京工部侍郎○以通政使司通政使善
慶大理寺卿韓鼎晉為都察院左副都御史

○以刑部左侍郎廉善為翰林院掌院學士
○以鎮國公綿齡為鑲白旗漢軍副都統調
正紅旗漢軍副都統松福為正紅旗滿洲副
都統以新授吏部右侍郎常起兼正紅旗漢
軍副都統○己亥以山東布政使廣慶辦理
積案認真賞還二品頂帶仍下部議敘○庚
子

世祖章皇帝忌辰遣官祭

孝陵○諭軍機大臣等長齡奏莊浪土司魯紀

勳岷州土百戶馬乾懇請來京祝嘏朕本年
六旬正壽該土司等既情殷祝嘏著准其前
來照上屆土司朝覲之例給予驛廩惟不必
令該土司到京前有旨准吐魯番回子郡王
邁瑪薩依特哈密回子郡王銜貝勒博錫爾
來熱河祝嘏約於八月初間到熱河長齡先
飭知該土司等俟該回王行抵甘肅時隨同
一路行走亦於八月初間在熱河接駕叩祝
後即由熱河徑回甘省可也將此諭令知之

○辛丑享

太廟命

皇次子智親王○恭代行禮○

上御山高水長賜王貝勒貝子公蒙古王貝勒
貝子公額駙台吉及外藩使臣等宴並賞賚
有差○遣官祭

太歲之神○諭內閣向來齋戒例不祀

神本年孟春

太廟時享派二阿哥恭代行禮初五日二阿哥

入城齋戒二阿哥所即不應舉行祭

神之禮太常寺業經知照掌儀司因掌儀司未經告知司組官仍於初五日祭

神司組官係不知二阿哥於是日齋戒其咎皆在掌儀司所有掌儀司承辦司員著實降一級調用不准抵銷英和蘇楞額和世壽禧恩常福俱著罰俸一年那彥寶係管理二阿哥家務之員著罰俸二年亦俱不准抵銷二阿哥既入城齋戒不先行飭知改期亦屬疏忽

著那彥寶前往傳旨申飭○貴江西等省戊寅科鄉試年老諸生鄭運振等十一名舉人副榜有差○癸卯諭內閣本日據翁元圻奏到上年十一月湖南雨雪情形其糧價及捐監銀數清單俱未粘貼黃面又另摺奏審擬已革守備曾國相盤獲娼婦私留在署一案轉粘貼黃面二摺係同日拜發殊屬輕重失倫翁元圻太不曉事著交部察議嗣後凡遇應用黃摺奏事時其刑名事件俱無庸粘貼

黃面以歸畫一○以吏部左侍郎晉恭充經筵講官○是日立春順天府進上牛春山寶座○乙巳諭內閣國家每逢慶典及年節令辰於太和殿保和殿正大光明殿紫光閣山高水長舉行筵宴皆

列聖定制留貽事關典禮執事臣工理應整齊嚴肅以重朝儀乃近日管宴王大臣及護軍統領等皆不先事詳查竟不演習一任參差錯謬漫無約束實屬怠玩因循即如本年元

旦朕御太和殿筵宴親見殿內所列桌張空設者竟有五六十處成何體制豈不慮外國使臣所竊笑乎此非承辦衙門豫備過多即係與宴人員有應入宴而未到者且是日朕甫經起座即聞殿內人聲嘈雜大乖體制著承辦各衙門再將筵宴事宜妥議章程具奏桌張務與人數相符嗣後如有空設桌張管宴大臣即行查明若係多設罰令該衙門著賠仍將承辦之員參處如係與宴人員無故

不到者即將不到之員指名奏管宴大臣不行查叅。經朕看出。惟管宴大臣是問。執事官員夫役。著該管護軍統領嚴立門禁。先期由各衙門造送名冊。屆期按名放入。昇送桌張者。安設畢。即先令退出門外。俟禮成。朕回宮後。再令該衙門率領人役按名點進。進殿徹桌。如有閒雜之人私行混入者。查係由何門放入。將該班官兵同本人一併交刑部從重治罪。自此次正大光明殿筵宴為始。即

著稽查嚴整。如有仍前疏畧者。定行懲處。不貸。○丙午。

上御奉三無私殿。賜皇子皇孫親藩等宴。○御山高水長。賜王公大臣蒙古王貝勒貝子公額駙台吉及外藩使臣等食翼日如之。○丁未。

上詣

安佑宮行禮。○御正大光明殿。賜朝正外藩等宴。作樂賜酒。如除夕儀。○諭內閣四阿哥前

派果齊斯歡授讀。不能循循善誘。以致四阿哥經書俱不能成誦。亦未能屬對作詩。因降旨將果齊斯歡退出上書房。革去侍郎及一應差使。令往巴里坤換班。改派顧臯授讀。一載以來。四阿哥經書俱能熟習。昨日在同樂園面令和詩。所作律詩尚屬穩妥。皆係顧臯認真教授。著加恩賞加一級。以示獎勵。○又諭。昨因元旦太和殿筵宴。管宴王大臣及護軍統領等漫無約束。以致典禮多有參差。降

旨訓飭。本日正大光明殿筵宴。頗為整肅。從前原派管宴王大臣係儀親王。成親王。肅親王。永錫。綿志。喀迪爾。奕紹。六人。儀親王。成親王。皆朕之兄。每逢筵宴。因帶茶酒往來。升降不能入座。朕心甚為不安。俱著無庸管宴。遇筵宴時。各按班次入座。以示體恤。綿志。喀迪爾。俱因多病。步履稍艱。亦無庸管理。著改派英和。禧恩。那彥寶。哈朗阿。與永錫。奕紹。一同管宴。嗣後凡遇筵宴。一應大小事宜。俱令伊

六人管理其入宴王大臣及執事官員人役各該衙門俱先期報明管宴王大臣以便稽查如有錯誤隨時叅奏其茶酒差使有侍衛班領引帶管宴王大臣俱不必帶領○戊申上詣

大高殿

壽皇殿行禮○還宮○以次辛祈穀於

上帝自是日始齋戒三日○己酉諭內閣朕因奕紹晉封貝勒綿僊綿懋晉封貝子其隨從

扈衛應視昔有加是以恩賞添給茲據宗人府奏請分撥紅白藍甲殊覺漫無分析綿僊雖係成親王之子久經承繼十二阿哥今由鎮國公晉封貝子其應得護軍領催紅藍甲數以及護衛官員必應照例辦給奕紹係定親王綿恩之子綿懋係慶郡王永璘之子統於所尊所有隨從護衛本不應添格外施恩照貝勒貝子應得之數減半賞給其紅白藍甲等項均無庸辦給○庚戌

上詣

南郊齋宮齋宿○辛亥祈穀於

上帝

上親詣行禮○幸圓明園○御山高水長賜王

公大臣蒙古王貝勒貝子公額駙台吉及外

藩使臣等食翼日如之○壬子

上御正大光明殿賜大學士尚書等宴○諭內

閣將攸銘奏請動義倉租息幫貼堰工修費一摺川省地土沃饒歲可三熟水旱之災本

少但倉儲以備不虞總應常歸實貯並以時出陳易新毋令紅朽腐壞致有缺額此項成都府屬十四州縣義倉本係民捐該糧戶因都江堰工分溉本境田畝修防完善即可無慮災荒請將租穀變價以補堰工不敷經費事屬兩益著照所請准其自二十三年為始將成都等十四州縣義田租穀歸入歲修堰工項下動用將每年穀價及幫修堰費由藩司及鹽茶道衙門確估造銷如有餘剩仍存

為備荒之用。以垂永久。○遣戶部右侍郎那
齊寶往奠故吏部左侍郎熙昌祭酒。○癸丑
諭內閣。御史唐鑑奏。請復輪班日講。官員及
繕進經史講義一摺。經書史鑑。皆關治道。人
君日理萬幾。不廢典學。我朝

列聖相承。皆本

聖學以成

聖治。朕仰紹

詒謀孜孜求治。每值幾暇。亦惟披覽經史。學於

古訓。然念帝王之學。在於貫徹天人。明體達
用。以見諸施行。與經生尋章索句者不同。從
前康熙年間。

聖祖仁皇帝曾有翰林輪班入直之

命。旋亦停罷。乾隆初年。

高宗純皇帝命翰林科道輪進經史講義。其後
即有借進講經書隱諷時事。行其詐偽者。

特降旨訓飭。至乾隆十四年。因御史金相之奏。
聖諭以諸臣按日奏御。所稱洞達天人。發明道

與者。殊不概見。行之十餘載。漸成故套。

勅令停止。自後數十年。總未舉行。是以朕嗣位
以來。亦未議及此事。今該御史請復此舉。朕
每日召見臣工。多至十餘起。披覽章奏。動輒
數十件。即使添見翰林四人。多閱講義數篇。
亦斷不以為煩苦。惟朕召見大臣。皆以諮諏
庶政。即京堂各官。近年增有冬季輪班直日
之例。其學識之淺深。心術之邪正。於召見時
亦均可鑒察。至翰林資格本淺。俟升轉至學
士以上。或擢用京堂。改補科道。自可敷奏以
言。如此時遽令撰進講義。輪班入對。其能闡
聖賢之精義。陳古今之治忽者。能有幾人。若
徒撫拾陳言。敷衍入奏。或以頌揚塞責。甚至
妄議時事。豈非徒亂人意乎。朕圖治維殷。然
一切皆求之於實。所謂為政不在多言。顧力
行何如耳。使但博稽古之名。而無裨實政。殊
不如其已也。該御史所奏。著無庸議。○甲寅
諭內閣。御史蔣雲寬奏。申明減等章程一摺。

各省軍流人犯遇有減等恩旨該督撫等自應迅速辦理乃近日外省辦理遲延且有遺漏殊乖矜恤之意此次恩詔內查辦減等著各督撫將軍都統府尹等飭屬查明按限造冊報部並聲明接奉部文日期儻逾定限該部照例查叅仍令各督撫等取具各屬並無遺漏印結報部備查再各省軍流人犯定地發配及到配安置向來均不報部遇有別案牽涉輾轉行查徒延時日嗣後俱著專咨報部年終仍造冊彙報以憑稽覈○又諭陳若霖奏拏獲復興白蓮教匪犯柯老人一摺所辦甚好前因湖北省拏獲復興白蓮教匪犯金文等供出傳教師傅柯老人居住河南安徽一帶地方當經降旨飭拏茲據陳若霖奏訪獲先曾習教之王道等究出該犯在陳州一帶潛匿派員掩捕經該府李振嵩訪明潛匿處所親率丁役將該犯柯老人即王柯及其子王大川王二川迅就擒獲實屬能事李

振嵩著交部議敘以示獎勵其王柯等犯著該撫即派委妥員嚴密解往湖北歸案審擬毋稍疏虞○直隸總督方受疇奏倡捐義倉銀穀官民賞知州張家本等議敘頂帶有差○以江南京口協副將羅光炤為浙江黃巖鎮總兵官○以六旬萬壽免奉天省旗地積欠額賦租銀○乙卯諭內閣孫玉庭奏拏獲大夥私鹽人員酌議獎勵章程一摺梟徒興販私鹽如結夥在數十人以上並執持器械者情勢兇悍委緝之員能奮力拏獲自當加之鼓勵若緝獲肩挑背負之犯以鹽斤數目積算勢必妄邀邀功徒開倖進之門於鹽務殊無裨益此次千總陳韶儀拏獲鄰汛大夥梟匪韓吉俊等二十二名起獲私鹽一萬五千斤並鐵叉刀槍等件尚屬奮勉著照所請准其記名遇缺升用該督等惟當嚴飭承緝文武員弁實力查拏大夥梟匪如獲犯在二三十名以上者方

准奏請鼓勵其零星捕獲計鹽充數者概不准保奏以杜冒濫○又諭伯麟等奏籌辦臨安江外善後事宜條款一摺朕詳加披閱內江外夷民責成土司掌寨嚴密稽查一條夷民村寨良莠不齊惟土司掌寨耳目最近著即責令該土司等督同村寨伙頭招壩等做照保甲之法設立戶口清冊取具連環保結按季呈報州縣官查覈如有窩留匪類將該土司掌寨等分別斥革遷徙以專責成其土

司掌寨帶練會哨一條江外地方遼闊著責令該土司等各帶所管土練於要隘處所及接壤地方往來會哨如有匪徒立即查拏儻有疏懈將該管土司掌寨等嚴加懲處其叛絕各產報撥充公一條新設江內要隘派兵常川防守冒瘴奔馳自應量加獎賞著即將二十二三兩年臨安軍務叛絕各產房屋招變田畝佃種每年租息除完納錢糧外同房屋變價銀兩俱解貯臨安府庫以供賞需仍

將動用收存數目報明督撫司道查覈其砍伐山木以杜藏奸一條夷地山林叢雜易於藏奸應聽夷民樵採以供日用該土司等不得私行禁止仍於農隙時嚴行搜查以絕奸宄至收繳鳥鎗器械一條夷民自備鎗械或用以捕捉牲獸或用以抵禦盜賊若一概收繳淨盡使夷民等防身無具恐亦勢所難行該督等當飭屬查明應收繳者給價收繳不得藉端訛索致滋紛擾又嚴禁夷民私置軍

器一條內稱除民間常用之物一切兇器概行銷燬軍器與兇器有何區別同一刀矛以之禦侮則為軍器以之戕人則為兇器此事總在約束夷民使消其桀傲之氣不徒在查禁器械之末若夷民家收有刀矛即責以違禁之罪轉非綏輯之道該督等應飭屬妥為經理勿涉煩苛其嚴禁土司苛派一條夷地民人亦與編氓無異該土司等科派擾累致令飢寒不免易滋事端嗣後著嚴行誡飭不

准額外誅求。僕有不遵。將該土司等查叅治罪。其嚴禁漢民私入夷地一條。最關緊要。夷民滋事。總由漢奸多方盤剝。並從中簸弄。除舊住各戶。責令土司等嚴行稽查外。此後漢民概不准私入夷地貿易者。亦發給腰牌。勒限回繳。如逾限不回。查拏治罪。其命盜案件。隨時懲辦一條。夷民各有該管地方。其爭奪仇殺案件。地方官原應速為判斷。以杜弊端。如土司等不行稟報。將土司等革究。若稟報之後。州縣官不為審理。即將州縣官叅辦。其廣宣教化。以易夷俗一條。夷俗雖犷悍成風。亦有讀書識字之人。該督等出示勸化。並發給各土司。廣為曉諭。俾知安分畏法。行之日久。自可收移風易俗之效。其土司土舍案件。改歸附近州縣辦理一條。著照所請。納更土司及稿吾卡土把總所屬案件。改歸蒙自縣承辦。左能恩陀落恐瓦渣。四土舍所屬案件。改歸石屏州承辦。溪處土舍所屬案件。改歸

建水縣承辦。一遇命盜案件。該土司土舍一面報明臨安府。一面即就近呈報該管州縣前往查辦。俾免稽遲。其沿江渡口。責成土司掌寨稽查一條。沿江一帶渡口。本係土司地方。著即責令各土司掌寨等派撥土練常川駐劄。如有漢奸匪徒私行越渡。立即拏報究辦。僕有疏漏。查叅重懲。以上各款。朕逐加訓示。該督等惟當行之以實。持之以久。以期綏安夷衆。永靖邊疆。○賑雲南抱母黑鹽二井。被水竈戶。○丙辰。孝聖憲皇后忌辰。遣官祭泰東陵。上詣恩慕寺。恩佑寺行禮。○諭內閣。富俊奏議定添派官兵看守吉林烏拉圍場。輪流坐卡巡查一摺。所議是。即照富俊所奏。除吉林烏拉圍場週圍舊有之卡倫八處外。再添卡倫三處。共為十

一處添派官兵分為兩班輪流巡查由該處領催前鋒內選派六人仍食原餉與原設守卡官員一體輪流當差仍交管理圓場協領管束並派佐領二員作為左右兩翼翼長不時嚴加巡查如拏獲攜帶烏鎗匪徒即照前案發遣○丁巳

上幸萬壽山○諭內閣三載考績為國家激揚大典朕於諸臣中察其奉職恪勤尤為出力者方給予甄敘其有年老而精力尚不至衰

實錄卷一百一十五

十一

績者仍可留任供職本年京察屆期吏部將京外各大員開單具奏朕詳加覈定大學士托津在軍機處夙夜宣勤大學士章煦管理刑部事務尚屬盡心協辦大學士吏部尚書戴均元辦事妥協人亦敢言吏部尚書英和辦事認真緝獲匪犯多名戶部尚書盧蔭溥承旨書諭夙夜慎勤俱著加恩交部議敘協辦大學士雲貴總督伯麟兩次辦理軍務均能迅速藏事山東巡撫和舜武整頓地方清

釐積案日有起色亦俱著加恩交部議敘餘俱著照舊供職○調刑部尚書崇祿為兵部尚書兵部尚書和寧為刑部尚書無庸在軍機大臣上學習行走○以內閣學士那清安兼正白旗漢軍副都統○戊午大學士托津等議奏松筠等奏大青山外界連之蒙古扎薩克一體安設卡倫巡緝章程一四子部落茂明安烏喇特共添設卡倫十處輪住該蒙古

實錄卷一百一十五

十二

官兵巡緝一緝捕不力蒙古員弁分別三限懲處俟數年後一無劫案再停止此例一被劫案件經同知詳報將軍派員帶同事主與乘騎烏拉赴就近該扎薩克印務處守候緝拏賊犯其扎薩克屬下人有能拏送者獎賞富留者從重治罪一山後商旅經行要路准商民捐蓋房間以為官兵住所並設卡倫就近令土默特四位領輪住巡緝其烏蘭布拉克地方非商民經行之路所設官兵裁歸有

房間處駐劄巡緝其房間應令交官經營不許民人居住致匪徒引誘蒙古。沙畢諾爾窩藏搶劫黑徒應交錫勒圖呼圖克圖嚴行查拏儻有窩留及不查緝者該管十家長發遣該管事扎薩克喇嘛斥革。蒙古窮苦無依者令本屬有牲畜台吉章京喇嘛等收養為其牧放牲畜餬口有資庶不盜竊其每年收養若干冊報將軍衙門。商民被劫俱於三五日內呈報其遲逾一兩月致查勘無蹤者即不為准理並訊明除身被盜傷及患病並搶去腳力不能速報外如無故遲延仍加責懲其售賣馬駝等項俱令牙行查詢來歷蒙古黑人令稅口一體嚴查。商民捏報該同知查出情弊即令申報將軍副都統及歸綏道親加提訊果係假捏於舊例杖一百外加枷號一月如係同知諱盜即嚴叅懲辦從之。○己未諭軍機大臣等康紹鏞奏安省民情刁健訟案繁多總以控准提省拖累多人

為得計現經分別審辦等語民間控案如係情節重大者既在巡撫按察司衙門控告自當親提審辦儻祇係尋常細故乃該管道府州縣應行審擬詳結之事若一一由撫司提審不獨鄰證人等無辜被累者多其本管之州縣與親轄之道府豈不竟同虛設耶且易啟小民藐視本官之漸若謂該州縣不能聽斷則早應叅劾罷斥豈可任其貽誤地方此事全在該撫分別輕重實力整頓自能清理

訟源刁風漸息將此諭令知之。朝鮮國王李琮遣使表賀

萬壽冬至元日三大節及歲貢方物命例外豫進本年

萬壽貢物准作下年正貢並賞齋筵宴如例。琉球國中山王尚灝遣使表貢方物賞齋筵宴如例。○辛酉

上詣

大高殿行禮。○還宮。○壬戌

孝儀純皇后忌辰遣官祭

裕陵○以吏部左侍郎王鼎署經筵講官○是月兩江總督孫玉庭等奏編查保甲實力訪緝奸匪飭取連名互保各結得旨言易行難言行符合何患叢脞勉之○浙江巡撫程國仁奏覆查保甲民數丁口得旨良法宜久隨時抽查若限定日期成具文矣

實錄卷之三

二十七

大清仁宗受天興運敷化綏猷崇文經武孝恭勤儉端敏英哲睿皇帝實錄卷之三百五十三

大清仁宗受天興運敷化綏猷崇文經武孝恭勤儉端敏英哲睿皇帝實錄卷之三百五十四

臣等謹將嘉慶二十四年己卯二月癸亥朔旌表守正捐軀直隸長垣縣民張家科妻周氏○甲子以舉行仲春經筵遣官告祭奉先殿傳心殿上御文華殿經筵直講官英和曹振鏞進講中庸故為政在人取人以身講畢上宣御論曰孔子論為政之要在選建賢才而任用之賢才進用則治具畢張綱紀咸舉卿士從庶民從可臻大同之治矣然涵育培植

教修

嘉慶二十四年己卯二月癸亥朔旌表守正

捐軀直隸長垣縣民張家科妻周氏○甲子以舉行仲春經筵遣官告祭

奉先殿

傳心殿

上御文華殿經筵直講官英和曹振鏞進講中庸故為政在人取人以身講畢

上宣御論曰孔子論為政之要在選建賢才而任用之賢才進用則治具畢張綱紀咸舉卿士從庶民從可臻大同之治矣然涵育培植

雖在於自修。而登崇拔擢。則在於教養。其本則在人君一身。心正身修。為臣下之標準。取人之道。必先存形端表正之心。為敷政安民之則。好惡取舍。皆得其宜。上行下效。賢才無不望風樂附。濟濟跼跼。登於廊廟。孰謂堯舜皋夔之盛治。不能見於今日乎。上有聖主。則下有賢臣。惟聖主能用賢臣。能知賢臣。知人則哲。安民則惠。能哲而惠。君道下濟矣。其本總在於人君一身。一身又本於一心。人君一

心一身。咸循正道。則所用之臣。皆是正人。所行之政。皆是正事。士民觀感興起。率由正軌。烏有邪僻怪誕。干名犯義之事哉。所謂君心正而天下莫不歸於正。誠為政之至德要道也。為人君者。豈可不自勉乎。進賢退不肖。為人君之大柄。正己則舉錯得宜。君子進而小人退。上下交泰。知人安民。制治保邦之道。不外乎求諸己也。直講官那彥寶盧蔭溥進講書經慎乃儉德講畢。

上宣御論曰。聖帝明王。必尚儉德。故堯舜茅茨土階。禹卑宮室。不以君位為尊崇。罔哂百姓以從己之欲。故成上治。能懷永圖。皆本於君心尚儉也。暴君昏主。必縱奢侈。竭民脂膏。聚斂財貨。馴至於滿盈傾覆。但知耽一身之逸樂。不卹萬姓之艱辛。縱一時之情欲。不為長久之謀猷。尚儉政日興。損上益下之效也。縱欲國日蹙。損下益上所致也。奢侈之源。皆起於心。不可不謹。儉約之德。不可不修。為政皆

循尺度。燕居專尚樸素。盱食則思窮黎飢餒者多。宵衣則念無衣無褐者衆。推己及人。阜財利用。平均天下。愛育蒼生。身居九重。玉食萬方。惟恐一夫之不獲。常懷庶姓之顛連。收斂身心。時戒放肆。所懷者皆為永遠之良圖。所行者皆為悠久之善則。念莫逞於一時。鑑必法於上古。心堯舜之心。行堯舜之政。儉德常思慎守。操存在於寸心。伊尹告嗣王之言。誠為君之極則也。禮成。

上幸文淵閣。賜講官及聽講諸臣茶。復賜宴於本仁殿。○遣官祭

先醫之神。○乙丑。遣官祭

文昌帝君廟。○諭內閣。和舜武奏查明東省節年民欠銀穀數目。開單具奏。又另片奏稱東省曾經兩次清查。其中正雜倉穀等項。及各屬交代奏參各案。併墊支墊解挪虧各款。均須釐剔分明。分別辦理。如奉旨蠲免後。將已徵未解銀兩。續完司庫者。另行報部撥用。

等語。朕覃敷閭澤。普免天下積欠。原以惠愛黎元。非為官侵吏蝕。開通融弊混之門也。該撫既稱將實在民欠數目查明具奏。又稱交代虧挪各款尚須稽覈。是現在所查數目不盡實欠在民。隱有官虧在內。情事顯然。況所免係民欠。並非官虧。汝等竟欲牽混。不懼國法乎。且閱單內所開節年欠數。嘉慶元年至九年。少者數千。多者不過數萬。自十年以後。由數十萬增至百餘萬。此謂悉屬民欠。誰其

信之。其民借籽種口糧。乃恩詔內自為一條。

應查明另案題。亦不應併計入於積欠之內。種種轆轤不清。此事因朕六旬正壽行慶施惠。九月以後。十月以前。奏到亦不為遲。豈容草率從事。該省現已張貼謄黃。徧行宣示。小民家喻戶曉。當不致影射重徵。所有該省積欠銀穀數目。著和舜武督率藩司廣慶與臬司溫承惠會同查辦。務將實欠在民者。分年分款。覈明確數。奏到之日。再降恩旨。不得以積年官虧牽混融納在內。將來降旨豁免後。如有弊端。惟該撫等是問。恐不能當此重罪也。慎之。○以故怡恪親王奕勲子載坊襲爵。○

上以祭

社稷壇。自是日始齋戒三日。○丙寅。諭內閣。本年朕六旬萬壽慶辰。各直省督撫並將軍提鎮副都統等。情殷祝嘏。均願趨詣闕廷。隨班叩賀。惟是外省文武大員。各有統轄地方之

責。若同時紛紛來京。非所以重職守。特命軍機大臣。將外省大員內有二十三兩年未屆年班。陞見來京者。詳悉查明。茲據閑單進呈。已於單內用硃筆圈出。所有文職督撫內。著派方受疇。孫玉庭。阮元。蔣攸銑。伯麟。程國仁。趙慎畛。其武職之將軍提鎮等。著派成德。扎拉芬。徐錕。各計算程期來京叩祝。此外未經派出各員。俱不得藉稱朕壽登週甲。非五旬可比。再行瀆奏。即奏亦斷不允准。將此通

諭知之。○丁卯祭

先師孔子。遣皇四子瑞親王綿忻行禮。○諭內閣。御史黃中模奏。請禁外省武職濫役兵丁。並攤扣月餉一摺。直省武職衙門。不准私役兵丁。節經降旨飭禁。其各營月支兵餉。為該兵等養贍身家。亦不得藉端攤扣。惟恐日久懈弛。仍蹈故習。著各督撫提鎮等。通飭所屬員弁。申明例禁。如有執將在伍兵丁濫行役使。及藉口營中公用攤扣月餉。以致兵丁

苦累。未能盡心操練者。即行據實查叅。以肅戎政。○又諭本年應行考試之盛京宗室覺羅。現有三十名。較之上屆僅多八名。朕上年前往盛京。業將彼處宗室覺羅馬步騎射文藝考驗。本年著不必考試。俟下屆應考年分人數多時。再行奏請考試。○引見各衙門保送京察一等人員。得旨。此次京察一等。圈出各員。著該堂官再行出具切實考語。交吏部帶領引見。圈出滿洲蒙古中書筆帖式等官。

著歸入理事同知通判內。遇有缺出。與舊記名人員一體帶領引見。漢軍人員。著交部以撫民同知通判分別選用。順天府治中李指南。步軍統領衙門主事海忠。上諭處委署主事明安。著交部照例以應升之缺升用。翰林院侍讀白鎔。詹事府左春坊左中允恒山。左贊善胡敬。俱准其一等。其餘內閣侍讀裕泰等。二百五十四員。俱准其一等。加一級。戶部筆帖式西靈阿。台林。工科筆帖式慶綸。國子

監筆帖式伯慶阿俱著改為二等○諭軍機大臣等御史盛唐奏浙江寧波府鄞慈兩學生員有破靴黨名目請飭整頓士子身列膠庠以來身敦行為重鄞慈兩學生員乃有結黨包訟婪索擾累挾制官長甚至有動衆劫掠棍械傷人情事是不獨有玷士林抑且大為地方之害著程國仁會同李宗昉飭令該府縣及教官據實確查認真化導如有劣跡著名者查明款蹟斥革務令肅滌澆風以正

學校而端士習將此諭令知之○戊辰祭

大社

大稷

上親詣行禮○諭內閣

壇

廟祭祀典禮攸關朕每訓誡太常寺執事人員務當恪恭將事乃屢次愆儀總由伊等不能潔齋致謹遂爾精神恍惚本日恭遇

社稷壇大祀太常寺少卿善祿典儀將望瘞誤

贊望燎非尋常疏忽可比善祿著革職發往盛京責令教習該處贊禮郎三年無過由該將軍奏聞再降諭旨穆克登額明志俱著交部議處桂齡係漢軍人非若漢人全不諳清語者著一併交部議處尋議上得旨穆克登額明志照部議降一級調用桂齡降一級留任○己巳

孝淑皇后忌辰命

皇次子智親王 祭

陵寢○諭內閣歸化城土默特旗呼圖克圖喇嘛人數衆多近年亦多竊盜案件嗣後將該呼圖克圖喇嘛等交綏遠城將軍兼管該呼圖克圖喇嘛等如有應報理藩院事務著呈報將軍轉咨該院如該院有應行呼圖克圖喇嘛等事件亦咨該將軍轉飭○宗人府等衙門會奏審明覺羅舒廉造賣賭具定擬請旨一摺得旨此案舒廉身係覺羅偶犯賭博已有應得之罪乃製造賭具出售獲利至一

年之久。實屬罔知法紀。舒廉毋庸折圈三年。著改為圈禁一年。滿日同伊家屬發往盛京居住。餘依議。○庚午。

上幸圓明園。○諭內閣。向來御前大臣軍機大臣。內務府大臣奏事。不拘時刻。此外各處事件。除實係刻不可緩者。俱於每日早間具奏。過時即不准呈遞。本月初七日。朕為戴銳綿。訖指婚。交欽天監為之配合。年命已時交出。奕紹於午時即行覆奏。殊屬草率。伊並非內廷行走之人。此事有何迫不可待。若謂奕紹已派祭。

陵差使。初八日即須起程前往。欽天監堂官等均可具奏。奕紹殊屬冒昧。著交宗人府察議。○辛未。諭內閣。本年朕六旬萬壽慶辰。前經降旨。將外省文武大員內二十二年以後未經來京者。派出數員。准令來京祝嘏。茲又命軍機大臣。將二十二年以後曾經來京各大員。再行開單進呈。於單內圈出賽沖阿和舜。

武二員。著各計算程期。於九月二十五日前。後到京。隨班叩祝。因有面詢地方事件。是以續行派出。此外未派各員。俱不得援照懇請。再行瀆奏。即奏亦斷不能仰邀允准也。○復引見京察一等圈出人員。得旨。裕泰。李可瓊。黃安。濤。熊常鎔。景福。文明。祥瑛。陳書勲。陳俊千。景昌。桂良。瑞林。程同文。成善。慶恩。戴敦元。陸言。桂凝。寶齡。保亮。汪全。德嵩。英。岳良。昌。熾。松長。文山。王檢。玉彰。俱著交軍機處記名。以道府用。○以工部右侍郎誠安為都察院左都御史。降左都御史兼鑲黃旗蒙古都統穆克登額為工部右侍郎兼鑲藍旗滿洲副都統。以太常寺贊禮郎色克精額為卿。○以鑲白旗蒙古副都統格布舍為鑲黃旗蒙古都統。前任庫倫幫辦大臣長慶為鑲白旗護軍統領。駐藏幫辦大臣珂什克為鑲白旗蒙古副都統。○壬申。宗人府等衙門奏會審副都統侯張秉樞典當歌童一案。得旨。此案張秉。

樞典當歌童。攜赴廣東任所。已有應得之咎。並令歌童出署。歌曲獲利。實屬有玷官箴。張秉樞現已告病回旗。著即革職。其侯爵由該旗另行擬襲。劉二挾嫌訛詐。已得贓銀四百兩。復往恐嚇。並揪扭宗室。實屬不法。劉二著加枷號一箇月。滿日再發附近充軍。○癸酉。孝康章皇后忌辰。遣官祭。

孝陵。○諭內閣。祿成等奏。懇加添存城馬匹一摺。綏遠城駐防兵丁。拴養馬匹。每年出青時。

存城二百匹。以備差操。現因派撥官兵赴大青山後設卡巡緝。存城馬匹。不敷應用。著照所請。准其加添存城馬一百匹。所需馬乾銀兩。由山西藩庫覈明撥給。○引見內務府京察一等人員。得旨。內務府三院等處京察一等記名人員。著各該堂官再行出具切實考語。帶領引見。其記名之筆帖式福祥和昇額。清福吉俊達純。著交吏部記名照例選用。所有一等官員筆帖式達他。俱著准其一等加。

一級。○甲戌。

上幸靜明園。詰。

龍神廟拈香。○遣官祭。

關帝廟。○諭內閣。御史張元模奏。請杜刑曹弊端一摺。各部院辦理公事。原應和衷共濟。況刑部為刑名總匯。各司滿漢官員甚衆。不得專聽掌印主稿之員。徇私自用。務各虛懷商榷。以收集思廣益之效。至現審案件。拖累無辜。尤失慎刑之義。嗣後傳訊人證。務將犯。

供訊確回。明堂官再行發票指傳。不得以影響牽連之詞。遽行傳質。以杜冤濫。其咨題稿件書寫罪名。及稿本接連之處。鈐用印信。以防窆補割截。並提查舊案。往返蓋印封送。該御史所奏。係為防弊起見。亦著照所奏辦理。以昭慎重。○又諭。孫玉庭等奏。查明淮鹽現銷價值。請免裁減一摺。前因御史黃中模奏。請復鹽價舊規。當交該督等詳查情形。奏請酌減。茲據查明。湖廣江西兩省行銷淮鹽價。

值上年曾將十三年所加一分五釐餘息奏請停止。祇留十二年所加四錢二分餘息。以資辦運。現在體察該商等運銷成本。較前增重。若再行議減。必致商力拮据。自係實在情形。著將前議留存四錢二分餘息。仍准其暫免裁減。該鹽政更不得聽商人慫恿。以轉輸不繼為詞。再議加增。妄行瀆奏。即奏亦斷不准行。○乙亥。諭內閣。蔣攸銛奏查明川省並無民欠一摺。川省地廣民稠。從前教匪滋事。

閭閻被其蹂躪。軍興之際。小民亦不無勞費。自蕩平以後。十餘年來。休養涵濡。元氣已復。本年朕以六旬慶辰。覃敷恩澤。普免天下積欠。據該督查明該省錢糧。歷係年清年款。並無積欠可免。蜀民踴躍奉公。輸將恐後。亦由該地方官撫綏化導。督率有方。甚屬可嘉。本年京察。因蔣攸銛到川未久。未予甄敘。伊自調任後。整飭地方。辦理諸務。俱臻妥協。蔣攸銛著施恩賞加一級。其查無積欠之四川省。

恭照乾隆六十年

皇考高宗純皇帝加恩成例。著將明年正賦寬免十分之二。該督即將此旨刊刻宣諭。董率所屬。均勻減免。報部查覈。用副朕闡惠平施。廣敷樂利至意。○丁丑。諭內閣。御史袁銑奏。考試請飭恪遵功令一摺。所奏是。順天鄉試會試。向於午門宣旨。點出各員。例有關防。其不入闈者。自應迴避。即時散去。不許片刻逗遛。至未經考差者。尤不應至彼窺探。接耳交

談。如有此等情形。御史即應參奏。交部審訊。自本科為始。點派考官。密本朕不先發交批本處。於初六日特派乾清門侍衛二員。齋至午門前。交大學士拆封。眼同稽察。御史宣旨唱名。其內廷行走不能前赴午門候旨者。朕於點出後。是日豫行飭知前往聽宣。既宣旨之後。如有不入闈之員。仍在彼逗遛聚談者。即著稽察御史指名參奏。至殿試朝考。應行與考之貢士進士等。例不准在紫禁城內住

宿。其無職事人員。於是日更不應至太和門左右翼門探伺。嗣後並著直班護軍統領及稽察御史嚴行查察。如有違令者。據實糾叅。○又諭御史袁銑奏請禁考試積弊一摺。直省大小考試。俱應杜絕弊端。用副擿才大典。如該御史所奏。外省州縣奉調入廩士子。竟有於中途迎謁結拜師生。夤緣納賄者。實屬大干法紀。著通諭各省督撫嚴行查察。如有州縣調簾。不知防檢。及士子巧於鑽營。交通

舞弊者。一經查出。立即嚴叅重懲。以肅功令。至府縣試考取案首。原不應一概取進。其捐貲辦公之士子。尤不應以考試為獎勵之途。著通諭各省學政。考試文武童生。惟當憑文藝之優劣。以定去取。其府州縣所錄案首。一例公平較閱。不得瞻徇情面。濫行拔取。至士子等捐貲修葺儒學書院。其姓名概不准報知學政。如有府縣官違例干求者。該學政即指名叅奏。以杜倖進而勵士風。○復引見內

務府京察一等圈出人員。得旨堂郎中福寧。會計司郎中恒桂。上駟院郎中恒泰。奉宸苑郎中阿揚。阿廣。儲司員外郎豐盛。額南。苑員外郎常興。圓明園員外郎文祥。俱著交軍機處記名。○旌表守正捐軀山西臨晉縣民許建。由妻徐氏。○戊寅諭內閣。朕恭閱皇考高宗純皇帝實錄。內載乾隆九年正月欽奉

諭旨。朕君臨天下。愛育黎元。厚生正德。時切於寤寐。蓋教養雖為二端。而實則相為表裏。衣食足。乃可興禮義。飢寒迫。則罔顧廉恥。是不能養民。不可以言教。不能教民。仍不得謂之能養。故教即在養之中。養即可收教之效。乃今之司牧者。但知用心於刑名錢穀。求有視百姓為一體。視民事如家事。以實心行實政。經畫有方。勸課有法。使地無遺利。家有蓋藏者。百不得一。朕以教養之責。付之天下督撫。督撫分任之州縣。此古所稱親民之官。果能

視百姓如赤子。察其飢寒恤其困苦。治其田里。安其室家。以父母斯民之誠心。行父母斯民之實政。凡茲小民。具有秉彝。斷無有不中心感激。服教從風者。等因。欽此。煌煌

聖訓。仰見我

皇考化育斯民。圖治萬年之至意。朕紹承

丕緒。夙夜孜孜。無非為斯民謀。久安長治之策。

即左右大臣。思日贊襄。亦惟是勤求民瘼。乃近日外省州縣官。一命甫膺。凡報國濟民之

事。俱不暇及。總總焉先為身家衣食是謀。履任之後。復思剝削民膏。厚殖田產。以為子孫計。讀書致用之謂何。捫心自問。豈不深可愧乎。試思朝廷以百里之地。責以司牧。此四境之內。老弱之顛連。愚頑之梗化。皆州縣官不容已之責。誠能視民如子。察其飢寒。則如痛關一體。憫其匪僻。則如患在一家。必思有以撫恤之。化導之。而後不忝厥職。於心始安。傳曰。如保赤子。心誠求之。雖不中。不遠矣。況食

君之祿。仰事俯畜。久之自能贍足。乃自肥而忍民之瘠。自安而忍民之危。返之於心。何以堪此。著通諭直省督撫。分飭各州縣。方今安民急務。惟以教養為先。必其實心實力。勸課農桑。風諭孝弟。使小民衣食足而不尚華靡。禮義興而恥為詐偽。久之家給人足。比戶可封。一切干名犯義之事。何自而起。蓋一邑之教養得其道。則一邑安。一郡之教養得其道。則一郡安。各省之教養得其道。則天下安。此

封疆大吏與良有司之職也。其交相勸勉。以副朕興道致治。又安兆民之志焉。○又諭禮部議。已故大學士費淳等。入祀名宦。分別准駁一摺。所議是。費淳前在太學士任內。因失察書吏舞弊降職。係屬公過。其在巡撫任內。有利農除暴諸政績。著准其入祠。吳壇前在巡撫任內。雖有興利益民事蹟。惟在侍郎任內。與內監交結。係屬私罪。著不准其入祠。嗣後該部覈議名宦鄉賢。俱應確查其人政事。

實蹟並分別公私過失以定准駁庶名實相符。足昭大公而示傳信。○己卯諭軍機大臣等各省督撫綜理通省錢穀刑名事務殷繁不能不延幕友以資佐理惟其人賢否不齊儻防範稍疏其不肖者乘機舞弊不特該督撫被其牽累且必致誤及國事朕聞孫玉庭署中有浙江紹興平姓幕友竟有倚藉聲勢包攬招搖情事著該督自行密查如尚無顯著劣蹟即驅逐使去儻竟有交結屬員招搖撞騙等事即據實參辦該督斷不可稍存迴護以致累及己身並貽誤公事也○免江浙兩省各縣場寬戶積欠鹽課○庚辰上御勤政殿聽政○遣官祭黑龍潭昭靈沛澤龍王之神玉泉山惠濟慈佑靈護龍王之神昆明湖安佑普濟沛澤廣生龍王之神密雲縣白龍潭昭靈廣濟普澤龍王之神○遣官祭圓明園

惠濟祠

河神廟○命鄉會試應往午門前聽宣考官各員於得旨派出時即行行禮入闈毋稍遲延行禮時毋庸更換朝服○以太常寺卿色克精額為內閣學士兼禮部侍郎銜詹事府詹事奎耀為通政使司通政使光祿寺卿劉彬士為大理寺卿太僕寺卿鮑勲茂為太常寺卿庫爾喀喇烏蘇領隊大臣舒寧為太常寺卿○以哈密幫辦大臣佛佳為庫爾喀喇烏蘇領隊大臣賞大理寺少卿明舒一等待衛為哈密幫辦大臣○辛巳遣官祭昭忠祠○命嗣後鄉會試停止考官上馬宴其金花表裏杯盞等件即於午門前宣賜○添建山東南旺湖臨運單閘從河東河道總督葉觀潮請也○壬午諭內閣前因內閣侍讀學士明舒經本衙門奏留年久降旨令吏部一體開列及升任大理寺少卿召見時詢以有何留辦未完之事則云內閣現在並無承辦要

件察看其人亦甚平庸已改授二等侍衛派往哈密換班矣各衙門繁要之地因辦公起見原准其將熟諳人員暫行奏留但此事務須覈實期於公事有裨仍應酌予限制雖不必定以年月俟接辦有人時該堂官仍隨時奏明將該員歸入原班升轉不致人才久滯轉遇其登進之階軍機章京程同文前經軍機大臣奏留暫停銓選其京察記名道府及截取記名繁缺知府兩單內均著停其開列仍察看隨時具奏○癸未

上幸萬壽山詣

廣潤祠拈香○諭內閣宗室惠章私赴廣東向親戚告貸經宗人府會同刑部擬發黑龍江嚴行管束宗室向無發黑龍江之例雖近來宗室頑鈍無恥不可教訓不知話言者多朕終存議親之念惠章著改發吉林交將軍富俊將伊嚴行圈禁空房不許外出至惠章於解京看守後復敢突身走出不聽攔阻實

屬強橫藐法著宗人府先行重責四十板再行發往其疏於看押之學長海雲著罰獎賞銀三年○直隸總督方受疇等疏報支銷馬駝草豆銀兩得旨此案支銷馬駝草豆銀僅止三百餘兩何難覈算乃事越四年始行題銷即此以觀直隸諸事耽延積壓竟成錮習方受疇主鼎注如淵俱著傳旨申飭仍著該部察覈具奏○旌表守正捐軀山西絳縣民邵全孝妻李氏○甲申諭內閣朕於三月初

七日親祭

先農壇行耕耨禮即由彼啟鑾恭謁東陵是日駐蹕烟郊道路較長朕躬耕後不御觀耕臺即詣具服殿更衣啟行順天府尹仍率領耆老農官等向觀耕臺照常行禮其從耕之三王九卿亦照常成禮凡壇內有執事人員俱無庸送駕其無執事者照例常服在朝陽門外送駕朕駐蹕南苑及由南苑啟行在京王公大臣俱不必接駕送駕俟祇謁

西陵禮成迴鑾。均蟒袍補褂至黃新莊接駕。○
乙酉。諭內閣。朕恭閱

皇考高宗純皇帝實錄。內載乾隆九年五月。欽
奉

諭旨。為治以安民為本。安民以教養為本。人君
總其成於上。而分其任於督撫。督撫總其成
於上。而分其任於州縣。州縣者。民之司命。而
又與民最親者也。身居此官。身履此地。民生
之休戚。民俗之醇疵。難犬彘麻之細。日用飲
食之常。良奸之不一。其類勤惰之各異。其情
必一一洞悉於中。而後加之調劑。州縣所屬
地方。雖廣狹不一。事務亦繁簡不同。然一月
之中。豈無齋戒停刑之日。亦有因公下鄉之
時。果能乘此餘暇。不辭勞瘁。親履田間。與父
老子弟歡然相接。如家人父子。言孝言慈。啟
其固有之良。化其惰窳之習。因而詢問疾苦。
講求利益。審物土之宜。因問閭之便利。所當
興者舉之。害所當除者去之。則教養兼施。善

政莫大於是。用是再頒此旨。通行訓誨。自督
撫以至州縣。皆當身體力行。以奏治效等因。
欽此。仰見我

皇考以教養斯民為亟。

訓飭司牧。至再至三。朕惟治民之道。教養兼資。
人君不能獨理。於是設官分職。布於天下。皆
所以分教養之責者也。朕夙夜孜孜。誠和萬
民。舍此二事。亦無以為羣工勸者。乃身任牧
民之職。日視其民之陷於匪僻。罹於飢寒。而

莫之省。肆行邪教。而不能禁。其獨能安於心
乎。夫知民所疾苦。莫親於州縣。其視民如子。
則民亦必視之如父母。誠能使百里之內。官
民相習。閭閻利弊。無不周知。勸其勤儉。化其
偷惰。俾之衣食足而禮義興。則雖古之循吏。
何以踰此。若但以簿書期會為稱職。甚或祇
顧身家。腴民自殖。一任其民之冥頑顛連。而
視同秦越。則於朕誠求保赤之心。備之遠矣。
此又在督撫體朕此意。善為董率。一省之中。

州縣不下百人。其閒賢不肖亦至不齊。為督撫者不可以愛憎為取舍。其考課殿最。必以實政為先。牧令之中。察其盡心教養者。即獎勵而薦舉之。玩視民瘼者。即叅劾而懲創之。俾中材亦知自奮。久之百爾嚮風。日計不足。月計有餘。民生可底於厚。民俗可底於醇。庶慰朕勤求上治。諄諄訓誡之意焉。將此通諭知之。○丙戌。諭內閣。朕於嘉慶十七年六月間。因大內及御園。向未供奉水府諸神。特命

實錄卷三十四

末

兩江總督百齡。於祀典內所載

天后

惠濟龍神封號

神像。敬謹繕錄摹繪。並將清江浦殿宇規制

繪圖貼說進呈。於御園倣照建蓋。以妥

神靈。隨時瞻禮。為民祈福。迨次年九月。黃河

南岸睢州下汛。忽有漫口之事。朕心方以建

祠展祀。以迓

神庥。豈誠意未孚。不能上邀

鑒佑。當諭在工各員。趕緊堵築。旋以滑縣教匪滋事。密邇睢州。不能不暫停工作。直至十九年大汛後。始再議興工。此一年內。黃河由漫口。經行數百里。澄清後。灌入洪湖。暢出清口。直達尾閘。將一路河身海口。全行刷滌深通。自此以後。睢工既合。閱今數載。軌順瀾安。民生永奠。此實轉禍為福。

神力斡旋。有不可思議者。朕仰承

福庇。歲時展禮。倍切誠恭。茲特敬述

實錄卷三十四

幸

佑助之靈。宣示中外。著將此旨發交南河。勒之貞珉。俾大小工員。同知欽感。虔修祀事。永荷平成。○又諭。御史喻士藩奏。請平錢價。以杜弊端一摺。各直省錢價。消長不齊。勢不能官為定制。該御史請將制錢價。以一千為率。低昂不得過百文。由州縣隨時申報。出示曉諭。實屬窒礙難行。所奏著無庸議。至私鑄盜銷。本干例禁。總當查明私鑄之所。禁絕根源。方足以除奸宄。而杜擾累。著該督撫實力奉

行。毋得視為具文。○諭軍機大臣等。程國仁奏浙省向有民欠未完官為墊解一款。係因州縣奏銷不足分數。自顧考成。以及漕船迫於開兌。兵糧待放孔亟。而花戶催納不前。遂墊解列入有著。仍待徵補歸款。現在民欠豁免。未便仍行補徵。請歸於交代業內。責令藩司徹底確查。分別追補。浙省因公墊解之項。民欠既經豁免。自不能再向徵補。其州縣亦不得因有墊解名目。藉此掩蓋虧空。著該撫

實錄卷一百五十五

五

責成藩司。分任分款。逐細確查。按名追補。儻有借端影射。該撫等務認真妥辦。斷不可以惠民之政。致該省倉庫又增虧空也。將此諭令知之。○丁亥。諭內閣。御史余本敦奏。鄉會試外。簾滋弊。請飭查禁一摺。鄉會試為掄才大典。凡派充內外簾官。均應慎密從事。恪守關防。如該御史所奏。士子於二場入闈時。託素識之提調及外簾各官。點竄頭場原卷。或補點詩題出處。妄思倖獲。實屬大干法紀。恐

此外傳遞代倩諸弊。亦所不免。著知貢舉及外簾監試官。並甄門巡牆各御史。一體嚴密稽查。如有作奸犯科者。立即指名參奏。拏交刑部嚴審治罪。以杜倖進而肅功令。○旌表守正捐軀山西永濟縣民趙廷遼妻段氏。○戊子。春分朝。日於東郊。遣禮親王麟趾行禮。○孝昭仁皇后忌辰。遣官祭景陵。○

實錄卷一百五十五

五

上幸靜明園。詣

龍神廟拈香。○己丑。諭內閣。前降旨。令於正月內。普賞八旗及包衣兵丁半月錢糧。由戶部銀庫內務府廣儲司。均勻撥給。經戶部覈明銀數。剗行銀庫。雖於正月二十五二十六日兩日內。全行放竣。已屬遲緩。其廣儲司應撥還銀庫銀九萬餘兩。戶部於二十二日知照內務府。內務府於二十九日。咨覆戶部。戶部於二月初一日。知照銀庫。乃迄今二十餘

日銀庫尚未定有收銀日期。更覺因循疲玩。惡習不改。皆朕之咎。所有管理三庫堂官及銀庫司員。著交部一體議處。○又諭御史張元模奏。州縣弛捕縱盜。請旨嚴飭甄汰一摺。地方盜竊案件。總應嚴拏懲辦。以靖閭閻。茲據該御史奏直隸定興。新城。涿州。良鄉。固安等處。盜竊牛馬公然屢次勒贖。事主報官反斥為自不小心。民間拏獲賊犯。搜出文票。即係承緝捕役。州縣官置之不問。實出情理之外。又宛平房山交界之牛市莊。竟有回民窩盜數十人。成羣持械。強劫鋪戶銀錢衣物。如不遂意。並即縱火焚燒。畿輔重地。官吏如此。因循疲玩。縱盜殃民。疏縱已極。近日山東省緝捕認真。自係盜賊不能在彼容留。遂相率逸入直隸境內。匪黨窩藏。肆行攘竊。總督府尹所司何事。方受疇王鼎注如淵。俱著傳旨嚴行申飭。該督等即分飭各州縣勒限嚴辦。實力查拏。嚴比捕役。訪緝窩家。隨時報解。按

實錄卷三五

壬

實錄卷三五

壬

律重懲。若捕役縱盜分贓。更宜加等治罪。如有仍前廢弛捕務。闕茸不職者。立即指名嚴叅。毋稍姑息。○又諭昨降旨令軍機大臣等會議盛京吉林黑龍江三省兵丁抬養馬匹章程。朕思大凌河孳生馬匹。自國初以來定制已久。富俊請將大凌河馬羣裁撤。分撥各處。其事斷不可行。此條即行飭駁。著無庸議。其上駟院堂官。亦無庸會議。○旌表守正捐軀安徽青陽縣民陳平樂妻張氏。○辛卯。遣官祭賢良祠。○諭內閣。朕本年六旬萬壽。普錫恩綸。行慶肆宥。所有從前緣事遣戍各大員。特命軍機大臣查明案由。開單具奏。朕詳加披覽。各員獲罪之由。先應分別公私。即私罪內亦有輕重之別。如文寧前在河南巡撫任內家人需索站規。咎止失察。並非入己。哈豐阿因玉努斯案謫遣。承啟因曹綸案謫遣。其咎亦皆係失察。孫應奉支取浮冒公費銀兩。係因粘修衙署。羅聲皋於夷匪投誠。輕於

聽信其咎俱尚可原。且伊二人前在軍營均有微勞。文寧、哈豐阿承啟孫應奉羅聲鼻俱著加恩釋回旗籍。各自閉門思過。不准求討差使。亦不准求人代奏。○以前任太僕寺卿何銳為太僕寺卿。○以廣東肇慶協副將唐文淑為貴州威寧鎮總兵官。○壬辰諭內閣朕本年六旬萬壽。前經降旨普免天下節年民欠銀糧。令各該督撫查明具奏。茲據朱理奏查明黔省並無積欠。亦無緩徵帶徵等款。該省小民踴躍輸將。惟正之供。歷係年清年款。此次未能一體邀免。亦應俾令閭閻均霑。恭照乾隆六十年

實錄卷三十五

五

皇考高宗純皇帝加恩成例。著將貴州省嘉慶二十五年正賦寬免十分之二。該撫即將此旨刊刻宣諭。董率所屬均勻減免。報部查覈。用副朕膏澤平施遠邇一體至意。○又諭朕本年六旬萬壽。普錫恩施。兵部將軍臺劾力各廢員查明開單請旨。朕詳閱案由單內曾

佩蓮因承審張良璧案遲逾匝月未能究出實情。章德溥因失察匪犯田克岐等到配期滿。臺費未完。王立言因審訊牟秀逞草率具稟。其咎均尚可原。曾佩蓮、章德溥、王立言俱著加恩釋回。餘俱不准援減。○命都察院左都御史誠安馳往熱河審案。○旌表守正捐軀安徽懷遠縣民陳啟秀妻劉氏。

實錄卷三十五

五

大清仁宗受天興運敷化綏猷崇文經武孝恭勤儉端敏英哲睿皇帝實錄卷之三百五十四

大清仁宗受天興運敷化綏猷崇文經武孝恭勤儉端敏英哲睿皇帝實錄卷之三百五十五

監修典義題爲揚忠臣官子休傳以爲教孝文淵閣開事博學飲奉
上諭事計經管理典義事翰林院院官子休題爲

緒察欽奉
上諭事件處協辦大學士戶部尚書翰林院掌院學士教習庶吉士總管內務府大臣鑲黃旗滿洲都統步軍統領管理處

卸三庫奉宸苑清瀾園等處總理工程處御茶膳房御藥房太醫院西洋堂事務軍功加三級隨帶加三級尋常加三級乾隆三十八年

和超英講官太子太僕禮部尚書上書房行次武英殿總裁管理國子監事務加六級隨帶加一級紀錄四次臣汪廷珍等奉

救修

嘉慶二十四年己卯三月癸巳朔祭

實錄卷三百五十五

先蠶之神遣妃恭代行禮○甲午諭內閣昨降旨將鄉會試點派考官密本屆期派乾清門侍衛齋至午門前拆封宣旨著自本科會試為始禮部於三月初四日將題本送閣初五日進呈初六日發下即交捧本侍衛齋往至鄉試遇朕巡幸之年著該部豫行計算發報日期扣至八月初六日黎明到閣即早亦必於初五日到閣初六日黎明齋至午門前照新定規制拆封宣讀考官等即刻入闈不

准在內閣先行拆封著為令○又諭御史吳杰奏陳近日南漕積弊一摺江蘇漕務向以丁力疲乏節經調劑津貼該旗丁運費已屬數餘何得復行藉端需索茲據該御史奏稱該省幫丁除各項幫費支足外另向州縣勒索有鋪倉禮米色銀通關費盤驗費各名目每船自數十兩至百餘兩不等旗丁如此需索州縣州縣費將安出不過仍取之於百姓若不嚴行禁止大為地方之害著孫玉庭李

實錄卷三百五十五

奕疇陳桂生據實確查如運丁等果有前項苛索情弊即將該丁嚴拏治罪並將縱容之幫弁總運督運官一併嚴叅重懲勿稍姑息以肅漕政而裕民生○軍機大臣等奏審擬遣犯金玉如添砌賊私翻控一案得旨金玉如所控鄧廷桂匿罪挑缺等情雖訊明屬實其添砌賊私重款均屬虛誣不能末減其罪該犯前已擬發黑龍江充當苦差亦無可復加著於枷號滿日仍即行發遣該犯身係孤

子孀母年逾七旬著該旗挑給錢糧一分俾資養贍餘依議○乙未

上御勤政殿聽政○諭內閣朕本年六旬萬壽普錫恩施宗人府會同刑部將緩決七次及原擬軍流等罪照例圈禁之宗室覺羅查明開單請旨朕詳閱案由單內宗室奕遴因妻郭氏服侍伊父不善烹飪致伊被父責打郭氏又不服管教逞忿故殺郭氏殞命擬絞但究因郭氏違犯教令且已緩決七次宗室瑞

實錄卷三十五

三

賓因與異姓序齒結拜弟兄擬杖折圈覺羅祥連因與姚寶煜戚誼頂名代考並未得受酬謝卷未寫完即被查獲擬軍折圈其情均尚可原奕遴瑞賓祥連俱著准其減等餘俱不准援減○以翰林院侍講學士那彥成為詹事府詹事降調左副都御史蔣祥墀為光祿寺卿○以廣東陽江鎮總兵官沈烜為水師提督○旌表守正捐軀山東鉅野縣民丁玉振妻高氏○丙申諭內閣盛京吉林黑龍

江三省自國初以來本無官拴馬匹上年朕親詣陪都亦未見該處有缺馬情形迨回京後經誠安奏稱伊奉使吉林與賽沖阿松寧會商東三省馬匹短少欲懇請添設官馬以裕差操賽沖阿等未及具摺伊特於召對時面陳其時適有年班到京之將軍德寧阿祿成等或生長其地或蒞官其省經朕詳加詢問並向籍隸東三省之侍衛等逐加體訪或以為應行加設或以為無庸增添其說不一

實錄卷三十五

四

隨降旨令賽沖阿富俊松寧三人酌議嗣據賽沖阿奏請盛京各城添設馬一千匹松寧奏請黑龍江添設馬二千匹富俊奏稱吉林兵丁皆有孳生馬匹打牲為業並無不能騎馬之人朕以三省所議兩歧令富俊再議富俊始有裁撤大凌河馬羣分撥各處之議察富俊之意亦明知大凌河馬羣為不可裁強為此說其意仍主於無庸增設因交軍機大臣與英和松筠和寧會同兵部妥議具奏茲

據托津等十二人會議奏稱東三省添立官馬惟有添至數萬匹庶可布置周妥而經費有常斷難輕議若但抽添三四千匹兵多馬少實屬無益不若仍循其舊朕因明亮和寧俱曾任東三省將軍且歷練營務復加面詢伊二人俱以為添馬事屬難行即戴聯奎曹師曾亦面奏不如仍舊惟松筠單銜奏請盛京添棚馬一千匹吉林添棚馬六百匹黑龍江添棚馬四百匹較賽沖阿等請添馬數更少亦於操練何裨朕辦理庶政執兩用中善鈞從衆所有東三省官拴馬匹一事竟可無庸辦理仍循舊章以安本俗將此明白宣諭賽沖阿富俊松寧知之○又諭御史王允輝奏刑部堂官疊次濫保劣員請旨查議一摺所奏是各衙門保舉司員原當秉公詳慎如該員才具素優保舉後偶有過犯或非原保官所能逆料若余繼生前由刑部司務保升額外主事經御史王家棟糾參當經降旨徹

實錄卷三五五

五

退該堂官均干吏議乃甫閱三年該部復將余繼生保列候補主事今余繼生以舞弊獲罪原保之刑部堂官實難辭咎著交吏部查明議處○又諭御史龔鍾奏請飭禁請封印結索費一摺外任官員請封例由同鄉京官出具印結即間有酬謝係屬交際私情豈能官為限制若有違例請封者一經查出其濫行出結之員定例本有處分亦無庸再立條禁該御史所奏著毋庸議○又諭本日據御史李遠烈條奏四款天主教實為人心風俗之害惟應嚴禁傳徒若將其置典取租房屋概行掣出入官召民認買事屬難行嗣後著嚴行稽查如有借租屋為名被誘習教者一經查出將傳教與入教之人一體嚴行治罪至各衙門年滿及已革書吏定例不准在京逗遛著步軍統領五城隨時嚴查若有潛住京師仍出入衙署干與公事者指拏嚴辦以儆奸胥其五城地方報有竊案自應移會各

實錄卷三五五

六

城通行查緝。若如該御史所奏。令事主隨同坊役親往五城典鋪細查。事涉擾累。殊不可行。至京城夜禁。本應嚴密。著都察院步軍統領衙門分飭司坊營汛官督率兵役認真巡查。盤詰奸宄。不可日久生懈。○又諭御史蔣雲寬奏請禁報缺遲延一摺。各省應行咨部銓選之缺。向無行文報缺期限。如湖南省鄧縣教諭寧遠縣訓導兩缺。遲至一年之久。始行報部。固屬遲延。若如該御史所請。統限一

實錄卷五十五

七

月內咨部為期。亦未免太促。著吏部叢議章程具奏。尋議外省應咨部之缺。由縣府司中院咨部。各予限十日。除程限外。計有五十日之期。惟督撫咨部與具題事件。當有區別。以後督撫具題。准於定限十日外加展十日。以便詳覈從之。○以浙江瑞安協副將顏正剛為廣東陽江鎮總兵官。○阿克蘇辦事大臣同興以賠項未完革職。解京賞三等侍衛伊鏗額二等侍衛為阿克蘇辦事大臣。○丁酉

上詣

大高殿行禮。○還宮。○戊戌。以理藩院左侍郎常英內閣學士汪守和知貢舉。協辦大學士吏部尚書戴均元兵部尚書戴聯奎為會試正考官。禮部左侍郎王引之詹事府詹事那彥威為副考官。○己亥。

上耕耤詣

先農壇行禮。更服至耤田所。

躬耕三推。復加一推。命禮親王麟趾鄭親王烏

實錄卷五十五

八

爾恭阿順承郡王倫柱各五推。吏部右侍郎周系萼戶部右侍郎姚文田署禮部右侍郎王宗誠署兵部右侍郎吳芳培刑部右侍郎彭希濂工部右侍郎陸以蔭都察院左副都御史善慶通政使司通政使奎耀大理寺卿齡椿各九推。畢。順天府府尹率農夫終畝。賞賚農夫耆老如例。○啟鑾恭謁

東陵

西陵。○命莊親王綿課大學士章煦尚書英和

松筠留京辦事○以恭謁

兩陵免蹕路經過地方本年額賦十分之三○

是日駐蹕烟郊行宮○庚子駐蹕白澗行宮

○辛丑以

孝賢純皇后忌辰與清明節大祭相值先期遣

官祭

裕陵○遣官祭

恩代帝王廟○諭內閣御史于德培奏九

卿從耕未及九推一摺所奏甚是本年耕耤

實錄卷三十五

九

朕因祇謁

東陵即於是日啟鑾是以躬耕後不御觀耕臺

然必四推四返禮成始行啟蹕並先期降旨

諭知

壇內有執事人員俱無庸赴朝陽門外送駕

俾令從容成禮乃是日三王仍照常行五推

禮其九卿於王等五推五返後東班即先散

去西班牙系英徘徊觀望又一推一返而散

彭希濂則一推後並未親手扶犁實屬怠玩

三王等雖係循分將事然以視九卿則能知

以典禮為重殊堪嘉獎著各賞加紀錄一次

該九卿等以特派從耕朕偶未親觀觀如此

玩泄若派赴外省專辦一事更不知如何怠

忽不可不嚴行懲創著留京王大臣查明交

吏部都察院嚴加議處一兩報內即行具奏

御史于德培在西班牙監禮御史係屬何員著

加紀錄二次其東班監禮御史係屬何員著

實錄卷三十五

十

留京王大臣查明如同在監禮僅止不行奏

著交部嚴加議處若先行散告並未在彼監禮

著交部嚴加議處○吏部奏議處刑部堂官

濫保劣員一摺得旨此案余繼生以舞弊獲

罪所有從前濫保之刑部堂官本應照部議

降二級調用姑念人數衆多若概予降黜一

時簡用乏人松筠崇祿吳璥秀寧帥承瀛成

格均著加恩改為降三級留任彭希濂本日

復經御史于德培奏從耕並未扶犁成禮

現交部嚴議此案處分著即照部議降二級

調用其嚴議處分俟奏上時再降諭旨○命											
服闋尚書韓蔚以一品銜署刑部右侍郎○											
是日駐蹕隆福寺行宮翼日如之○壬寅											
上恭謁											
昭西陵											
孝陵											
孝東陵											
景陵											
裕陵俱未至碑亭即降輿慟哭步入											
隆恩門詣											
寶城前行禮躬奠哀慟王以下文武大臣官員											
均隨行禮○癸卯清明節											
上恭謁											
裕陵未至碑亭即降輿慟哭步入											
隆恩門詣											
寶城行數土禮畢詣											
隆恩殿行大饗禮禮成詣											
寶城前行禮叩辭奠酒盡哀乃退王以下文武											

清 實 錄 嘉慶二十四年三月

大臣官員均隨行禮○遣官祭											
永陵											
福陵											
昭陵											
昭西陵											
孝陵											
孝東陵○命											
皇次子智親王 晏 祭											
景陵○遣官祭											
泰陵											
泰東陵○遣官祭											
孝淑皇后陵寢○遣官祭											
端慧皇太子園寢○賞守護											
東陵八旗內務府兵丁半月錢糧○免雲南蒙											
自縣屬銅廠民欠工本銀○是日駐蹕桃花											
寺行宮○甲辰諭內閣前據御史于德培奏											
奏九卿從耕俱未九推成禮朕以九卿等特											
派從耕如此玩泄實屬可惡當降旨交留京											

六八七

辦事王大臣查明。交吏部都察院嚴加議處。茲據綿課等奏稱。飭傳禮部鴻臚寺順天府各執事人員。並東班監禮之御史舒英蔣雲寬。西班牙監禮之御史托明。逐加詢問。僉稱東西兩班從耕九卿均係九推九返。周系英因耕牛行遲於八推八返。後見東班先已禮成。自言尚少一推。如何就散。因即補足一推。彭希濂則因耕牛行疾。伊病後步遲。扶犁脫手。二咨亦仍九推九返。禮成方散等語。從耕事關典禮。如果該九卿等俱未成禮而散。則其咎甚重。議上時。朕必將伊等概予罷黜。斷不以人數衆多。稍從寬縱。今查明是日九卿從耕俱已九推。其先後參差不齊。係因耕牛遲速之故。朕向來觀耕時。曾經目覩。周系英見東班禮成。自計推數補足。均毫無不合。惟彭希濂脫犁二次。實屬失儀。業已降二級調用。罰無可加。著與周系英、姚文田、王宗誠、吳芳培、陸以莊、善慶、奎耀、齡椿、均毋庸嚴議。東班

實錄卷三五

十五

實錄卷三五

十四

監禮御史舒英蔣雲寬無可議處。英和自請交議之處。亦毋庸議。至三王等從耕禮成。本係照常之事。前因與九卿相較。是以各賞加紀錄一次。今既同係成禮。其所加紀錄著即撤銷。于德培與托明同在西班牙監禮。見彭希濂扶犁脫手二次。理應會同叅奏。如托明徇情不肯列銜。即應將托明一併叅奏。此事非封章條奏可比。乃一人單銜具奏。並率稱九卿俱未成禮。不顧事之輕重虛實。妄劾多人。其意何居。朕辦理庶政。一秉至公。從無成見。于德培甫經擢任言官。如此多事實屬冒昧浮躁。著將紀錄撤銷。交部議處。托明於彭希濂懲儀之處。並未會叅。亦屬無能。著交部察議。此次議處。察議英和周系英不必與聞。其餘堂官秉公議奏。尋議上。得旨。于德培降一級。以六部主事用。托明降一級留任。不准抵銷。○是日駐蹕盤山行宮。至己酉皆如之。○乙巳。旌表守正捐軀河南淮寧縣民吳振先。

女吳氏。○丙午諭內閣上年盛京途次即有王三等隨營指差索詐當經拏獲懲辦本日據禧恩奏拏獲詐差人犯鄭二因向豐潤縣差局詐錢與吳二分贓不均將吳二扎斃已交行在刑部嚴行審辦矣朕恭詣陪都尚係間越數年舉行一次至祇謁

東陵

西陵則歲以為常乃復有奸徒敢於指差索詐此風甚為可惡著方受疇徐銳通行傳知沿

書錄事官

十五

途文武各員不許設有差局名目如地方官隨營辦公處所再有詐稱某處差來向其家丁吏役索取錢文者立即拘留稟報該督等即將其指稱何處索詐據實奏朕立交行在刑部嚴究查拏治罪儻不行稟報仍前私給錢文別經發覺則與受同科必一律治罪不稍寬貸○又諭本日總兵綽哈納因伊子德亮桃補上虞備用處藍翎侍衛具摺謝恩用黃摺繕寫甚屬非是向來臣工謝恩均用

尋常奏事白摺其黃摺原為尊君之義凡遇

慶節令辰特用之以表誠敬若臣下奏謝私

情豈可漫無區別一體濫用嗣後內外臣工

如有謝恩不在慶節令長期內繕寫黃摺呈

遞者即將該員交部議處○調浙江巡撫程

國仁為山東巡撫河南巡撫陳若霖為浙江

巡撫以河南布政使琦善為巡撫福建按察

使廖奇瑜為河南布政使降調刑部右侍郎

彭希濂為福建按察使○贈故山東巡撫和

書錄事官

十六

舜武總督銜予祭葬○賞直隸總督衛

弁兵等銀幣有差○丁未賜扈從王公大臣

及直隸總督等食並賞賚有差○戊申月食

○諭軍機大臣等王麟等奏藏中僧俗人等

求定達賴喇嘛呼畢勒罕一摺甚屬非是從

前各處呈報呼畢勒罕出世每多附會爭端

漸起弊竇叢生

皇考高宗純皇帝洞燭其情設金奔巴瓶臧名
掣定之制

睿謨深遠。自當萬世遵行。今裏塘所報幼孩。其所述靈異。何足徵信。若遽聽其言。與從前指定一人者何異。王麟等不嚴行駁飭。實為錯誤。著傳旨申飭。此次裏塘幼孩。即作為入瓶籤掣之一。俟續有報者。再得其二。方可將三人之名。一同緘封入瓶。照定制對衆諷經掣籤。著將此旨明白傳諭第穆呼圖克圖。毋許再瀆。若來京求請。即查拏治罪。將此傳諭知之。○已酉。諭內閣。盛京各衙門。二月內具題。

實錄卷三十五

十七

本章據通政司查明。按照例限。均遲逾二十餘日。及一月以上。其本內及批文內填寫日期。亦前後互異。著盛京禮部兵部刑部奉天府。各將該衙門二月內具題之本。因何發交遲延。其填寫日期。何以前後不符。即行查明據實覆奏。至盛京遞本程限定。例無論專差塘遞。俱限八日到京。亦覺為期太迫。著兵部酌量加展。叢議具奏。尋盛京禮部等衙門奏。各部題本。向係五部輪流彙總。委員馳遞。

本內填註畫稿日期。批文填註起程日期。每月初次本章。通題以十五日。止以三十日。送齊。二次本章。通題以三十日。止以下月十五日。送齊。本內日期。與彙總批發日期。向來未能畫一。報聞。○漕運總督李奕疇奏。廬州衛軍丁典出屯田一千十頃。有奇。丁力疲乏。懇請偕項抽贖。收取租籽。以勸辦運從之。○戾戌駐蹕白瀾行宮。○辛亥。諭內閣。德寧阿等奏。請將副將留川補用一摺。定例。副將不准

實錄卷三十五

十八

以本省之人補用。惟余步雲在川。歷有軍功。於地方險要及夷務邊情。均所熟悉。可期得力。該省現任總兵內。如桂涌羅思舉。張志林。皆因人地相宜。以本省之人擢用。專聞。該將軍等此奏。為慎重邊疆起見。余步雲著准其留於川省。於距籍五百里以外。遇有副將缺出。奏請補用。○賞蹕路經過看守各行宮弁兵半月錢糧。○是日。駐蹕烟郊行宮。○壬子。上詣

永慕寺行禮。○諭內閣成格奏鎮標馬廠水草不敷牧放請賞給入官地畝一摺。山西大同鎮及得勝助馬二路營馬舊有牧廠近年長草不能暢茂以致馬匹未能一律騰壯現既查有豐鎮廳所屬迤北龍王保佐領下承安入官地畝三百餘頃水草豐茂堪作牧廠著照所請即將此項地畝賞給大同鎮六營作為馬廠俾資牧放其拒牆堡口外舊廠交地方官另行招墾照例升科。○諭軍機大臣等

實錄卷三十五

九

前聞孫玉庭署中平姓幕友有藉勢包攬招搖情事令該督密查茲據覆奏幕友平鍾瑞頗知謹飭惟近日剔除河漕鹽務積弊因致人言該幕友家有老母屢次辭去等語地方大吏剔除弊端其不便於私者自不能悉泯怨言然亦祇怨在本官何致波及幕友為之造謠平鍾瑞既不理於人口况又因母老欲辭孫玉庭何必仍留之在署致招物議著即驅逐可也將此傳諭知之。○旌表守正被戕

河南確山縣民蔡六妻張氏。○是日駐蹕舊衙門行宮。○癸丑。

上行圍。○禮部以宗室會試中額請得旨取中四名。○是日駐蹕圓河行宮。○甲寅。

上行圍。○諭內閣謝階樹奏文武生員欠考人數衆多請分別辦理一摺。湖南各屬欠考諸生自三次以上至八次者竟有七百七十名之多積習相沿本應概行黜革姑念人數衆多其欠考三次各生著仍照乾隆年間之例

實錄卷三十五

十

暫免革除欠考四次者亦加恩暫免革除均勒限咨催回籍補考至欠考五次以至八次者俱著即行黜革以肅學校該部知道。○又諭前因河南省拏獲湖北復興白蓮教匪犯王柯供出黑龍江遣犯王舉相貌體面教中人常斂銀送往接濟當即降旨令松寧將王舉拏獲嚴訊據供十八十九二十等年伊祖母王王氏在日曾有阮鳳儀等送銀接濟之事將該犯王舉問擬斬決因尚有查訊之處

令松寧將該犯暫行監禁。茲據慶保等奏。向現獲案犯李添振。究出伊於四年曾往黑龍江送銀。見過王舉。有每日禮拜三次。呼為小主之供。王舉一犯。本係邪教後裔。彼時年甫四歲。即有同教匪犯。向其禮拜。呼為小主。此等逆孽。豈可復留。著松寧即將王舉一犯。先於黑龍江斬決。其餘案犯。俟慶保等將全案擬結時。再行辦理。○賞南苑海戶銀一千兩。○是日。駐蹕新衙門行宮。○乙卯。

實錄卷三五五

十一

上詣

惠濟龍王廟拈香。○禮部以會試中額。請得貢滿洲取中八名。蒙古取中二名。漢軍取中四名。直隸取中二十三名。奉天取中二名。山東取中十六名。山西取中十一名。河南取中八名。陝甘取中九名。江蘇取中十九名。安徽取中十四名。浙江取中十九名。江西取中十七名。湖北取中九名。湖南取中八名。福建取中十三名。廣東取中七名。廣西取中六名。四

川取中八名。貴州取中九名。雲南取中十名。○是日。駐蹕黃新莊行宮。○丙辰。諭內閣。嗣後朕恭謁

陵寢。除前引遞酒盃有執事之大臣官員外。惟派出之王公大臣侍衛以及內監。准由

隆恩門隨入

陵寢門。其未經派出之王公大臣官員御前乾清門豹尾槍侍衛及隨侍內監等。均不准入隆恩門。著載入則例遵行。○封奉恩將軍弘善

實錄卷三五五

十一

為輔國將軍。○旌表守正捐軀河南鄧州民

劉伸媳趙氏。○是日。駐蹕半壁店行宮。○丁

巳。駐蹕秋瀾行宮。○戊午。以通政使司副使

辛從彝為光祿寺卿。○旌表守正被戕河南

西華縣民劉三春妻胡氏。○賞守護

西陵八旗內務府兵丁拜唐阿半月錢糧。○是

日。駐蹕梁格莊行宮。○己未。

上恭謁

泰陵。

泰東陵俱未至碑亭即降輿慟哭步入

隆恩門詣

寶城前行禮躬奠哀慟王以下文武大臣官員均隨行禮○至

孝淑皇后陵寢奠酒○是日迴鑾駐蹕秋瀾行

宮○庚申諭內閣國家遇有旬慶大典及鑾輅時巡臣工等例得呈獻詞章前因漫無限制特降旨定以等差自能文之宗室王公以及內而滿漢大臣京堂翰詹科道外而督撫

實錄卷五十五

二十五

凡由科甲出身者准其備進此外概不准呈遞本年朕六旬大慶中外臚歡大小諸臣情殷祝嘏其雍容揄揚以效天保之頌者必更人思獻悃自應量為推廣以達下情除原准備進各員外凡在京滿漢文職三品以上在外督撫學政及科甲出身之藩臬並司員中書等之例得考差者如願呈獻均准其一體備進再前降諭旨令所進詞章不得誇多鬪靡詩文各專一體亦恐限於程式未免盡其

所長如有詞華典贍或二冊四冊者亦聽其

呈進但文體務須正大不得競尚纖巧方合

雅頌之義朕將親覽焉○又諭前據奎耀等

奏盛京具題本章歷來不能依限到京本年

二月內題本既多逾限復與批文內填寫日

期互異當經降旨飭查並令兵部酌展程限

茲據該部覈議奏請將盛京於例定程限八

日外加展二日并將吉林於例定程限外加

展三日黑龍江加展四日仍覺為期太迫著

實錄卷五十五

二十六

兵部再詳查各直省遞本程限比照覈議具

奏尋奏盛京原限八日加展五日吉林原限

十二日加展八日黑龍江原限十八日加展

十二日從之○是日駐蹕半壁店行宮○辛

酉駐蹕黃新莊行宮○是月新授河南巡撫

琦善奏謝得旨清心寡欲正己率屬力矯因

循培植民俗嚴緝匪類密訪逆蹤勉之慎之

毋負朕望

大清仁宗受天興運敷化綏猷崇文經武孝恭勤儉端敏英哲睿皇帝實錄卷之三百五十五

寶錄卷三百五十五

字五

大清仁宗受天興運敷化綏猷崇文經武孝恭
勤儉端敏英哲睿皇帝實錄卷之三百五十六

監修勅數官德田正興起居注官太子太傅武英殿大學士文淵閣閣事侍察欽奉
上諭事務處管理工部事務翰林院掌院學士隨

帶加級存常照服曹汝璜總辦官太子太保文淵閣大學士管理刑部事務四品頂戴均元勳等謹題

舉開書信卷送奉
 下前事件處協辦參事戶部尚書翰林院掌院學士兼管內務府大臣鑲黃旗滿洲都統步軍統領管理

邵三庫奉宸範清園等處總理工程處御茶膳房御藥房長醫院西洋堂事務軍功加五級總帶加級尋常加五級紀錄二次臣 蔣紹

茲據官太子保懋郎尚書上書房行走武英殿總管理園子監事務太監隨帶加二級紀錄四次崔廷珍等奉

較修

嘉慶二十四年己卯夏四月壬戌朔享

太廟遣儀親王永璇恭代行禮○諭軍機大臣

等松寧奏覆訊王舉案內各犯究出二十一

二三年有同教匪犯。三次送到接濟王舉盤

費等語王舉係邪教餘孽在黑龍江監禁王

起順等仍敢斂錢易換金兩數千里為之接

濟其勾連邪慝固結不解必當盡法懲治以

絕根株王起順係河南新野人李廷俊係安

徽阜陽人岳秉逢係太和人均有年貌住址

可查著琦善康紹鏞即派委妥員密速前往

掩捕無令聞風逃逸至劉洪典張潮宋二鉗
子張連山各係教犯家屬曾到黑龍江是否
一同習教並有帶送金銀接濟教匪之事並
著慶保等按名拏獲該督撫等於獲後各親
提嚴審按照發去松寧所訊劉榮先等供詞
逐一訊究務得確情按律定擬具奏將此各
諭令知之 旌表守正捐軀山東鄆城縣民
劉平太母李氏 是日駐蹕潭柘行宮 癸
亥賜卹從王公大臣及直隸總督等食並賞
賚有差 是日駐蹕惠濟龍王廟行宮 甲
子

上還圓明園 乙丑諭內閣張裕慶前在河北
道任內於廣興赴豫時出境遠迎餽送因此
獲罪其同時餽送廣興者亦不止張裕慶一
人嗣因睢工合龍張裕慶在工出力經那彥
寶奏請施恩業經降旨准其捐復員外郎若
謂該員行止不端彼時科道即應據實陳奏
乃事隔數年吏部照例擬選本日即應引見

會同驗看之科道陶澍等忽以該員行止不
端不應銓選刑部職官移會吏部請奏是該
科道等竟欲干與黜陟大權此風斷不可長
所奏著毋庸議張裕慶仍著吏部帶領引見
旌表守正捐軀河南孟縣民郭傑妹郭氏
丙寅旌表守正捐軀奉天廣寧縣民王起
發女王氏 丁卯

上幸靜宜園詣

龍神廟拈香 己巳以禮部尚書松筠為滿

洲繙譯會試正考官禮部右侍郎同麟為副
考官 庚午諭內閣廣慶奏東省革職各員
多有不肯請咨回籍其不安分之輩羣居終
日議論風生或刺探各衙門公事顛倒是非
或因不遂所欲編造歌謠互相傾軋甚至恣
情飲賭無所不為應請旨概行勒限由東省
派員押回原籍等語各省革職人員如有經
手未完事件例得扣留查辦若並無應留之
事則例應給咨回籍此事該督撫儘可自行

辦理何待請旨飭遵現在東省各革員如無扣留待查事件著即給咨勒令回籍僕仍有延不起程者即派員押回原籍毋任逗遛○旌表守正捐軀山西崞縣民張素子妻張氏

辛未

上幸萬壽山詣

廣潤祠拈香 壬申

上御勤政殿聽政 癸酉

上詣

大高殿行禮○還宮○以安徽布政使韓克均為貴州巡撫安徽按察使嵩孚為布政使福建汀漳龍道鄒翰為安徽按察使○以常寧祀

天於

圓丘自是日始齋戒三日 乙亥

上詣

南郊齋宮齋宿○丙子常寧祀

天於

圓丘

上親詣行禮 辛圓明園 丁丑

上幸靜明園詣

龍神廟拈香○幸靜宜園○諭內閣此次宗室繙譯會試只有九人人數太少此皆宗室等平時惟習漢文竟不以繙譯為先務清語騎射乃我滿洲根本宗室等自當加意勤習即漢文繙譯兩端尚當以繙譯為要若清語騎射久荒將來必致有失滿洲舊制著交宗

人府王公等通諭八旗宗室等務當專心力學騎射不可徒習制藝向來宗室等繙譯會試十九名內取中三名十一名內取中二名此次報考僅止九名朕仍加恩取中二名嗣後繙譯會試如足九名額數仍取中二名如不足九名即著停止入場○又諭考試試差人員自此次為始四書題文二篇內著減去一篇添五經題文一篇仍用五言八韻排律詩一首著為令○禮部以滿洲繙譯會試中

額請得旨取中七名。平糶山西臨汾吉潞城壺關孝義寧鄉大同豐鎮五寨高平陽城遼榆社和順沁武鄉忻河曲解夏垣曲絳永和水水河托克托城二十五廳州縣倉穀。是日駐蹕靜宜園至辛巳皆如之。戊寅孝端文皇后忌辰遣官祭。

昭陵諭內閣粵西附近省垣地方盜犯七十餘人一夜連劫六家平時既疏於防範呈報後又未能將首從各犯悉數拏獲富綸前此

札飭該州縣每月拏解匪犯三十名拖累無辜而於近省重案轉不能督率速辦實屬顛倒失倫除阮元駐劄粵東相距較遠部議降一級調用之處著加恩改為降一級留任其葉紹桂等七員均著照部議降調不准抵銷賞會試年老舉人劉榮朝等十四名檢討學正職銜有差。己卯諭內閣刑部查辦朝審及新疆雲南貴州廣西等省緩決三次以上減等人犯開單具奏此內官犯關靈一名

在紫禁城內點放爆竹持刀自將頭顱劃傷妄拏平人冀圖重賞情節甚為可惡著不准其減等永遠監禁嗣後凡遇恩赦俱不准查辦其常犯擬准減單內新疆絞犯劉建吉侯得祿李修仁三名雲南省絞犯余小老一名均不准減等。庚辰

上御演武廳閱健銳營操。諭內閣嗣後皇子完姻公主下嫁及歸寧日期俱著不進立決本其刑名本仍照常呈進。又諭昨日英惠

因監視鑲白旗護軍步射完竣具摺覆奏業已呈遞名牌經朕召見英惠並未來靜宜園宮門祇候本日自行奏請議處向來各部院堂官年在六十以下者均親詣宮門呈遞名牌嗣經降旨准令筆帖式代為呈遞俾諸臣得以遲到時許以節勞動此朕格外施恩用示體恤僅過奏事之日適有事故或患病者原准於摺內註明不遞名牌若名牌已達朕前原所以備召對即應趨赴宮門祇候今英

惠已遞名牌召見不到咎無可逭伊係由副都統派出監射著即革退鑲黃旗滿洲副都統以示懲儆嗣後文武大臣中有奏事已遞名牌無故不到者查明係奏何衙門事件即將何項職任斥革決不寬貸調正白旗蒙古副都統哈朗阿為鑲黃旗滿洲副都統以內閣學士色克精額兼正白旗蒙古副都統辛巳諭內閣董教增等奏海洋被劫舊案文武疏防職名懇免開叅一摺閩省洋面盜匪久經悉數殄平其劫案疏防承緝文武職名共計一千餘件事隔二十餘年此時即輟轉行查官經屢易一切地方情形均無從指證徒勞案牘終於不能覈實所有嘉慶元年至十五年該省海洋被劫各案應叅文武職名著加恩全行寬免毋庸查叅以大學士托津章煦禮部尚書汪廷珍吏部左侍郎王鼎右侍郎周系英戶部右侍郎姚文田刑部左侍郎帥承瀛工部右侍郎陸以莊為殿試

讀卷官 壬午

上還圓明園策試天下貢士費廣吉等二百二十四人於保和殿制曰朕寅承

昊穹眷命

列祖貽庥翼翼兢兢於今二十有四年週撓甲以斟元衍長庚而集祐萬方清晏百穀慶成四瀆安瀾五難來備豫順聿隆於此日謙亨敢懈於初衷靡文盡屏卻九牧之貢珍詢事維殷闢四門而籲俊敬惟制治保邦之道厚

生正德之原去奢崇儉之方肆武詰戎之法洵整飭之當先乃講求之倍切爾多士論秀於鄉用賓於國佇聞謹論式贊嘉猷唐虞授受不外一中嗣是仲虺言建中孔子言用中中者帝王之心法即帝王之治法也其言惟精惟一即孔門明善誠身之說所自出歟詩頌不剛不柔傳稱寬猛相濟蓋言中也乃漢興之始網漏吞舟諸葛治蜀赦不輕下寬嚴不同同歸於治何歟泰之九二備陳保泰之

道其與論語寬信敏公之旨有相合歟司馬
光論人君之德有三其才有五而為道則一
其於中庸達道達德人存政舉之義可相通
歟大學平天下一章專言貨財用人二事何
歟朕際重熙累洽之時深惟長治久安之道
所以肇丕基於永固登郵治於大同其要可
得聞歟昔賢論富教之道曰易田疇薄稅歛
立學校明禮義方今之世農務墾辟而地鮮
遺利賦惟正供而時予蠲除設國學鄉學以

教士宣

聖諭廣訓以教民法基備矣而未能民皆足食
戶盡可封其故安在井田庠序古法既不可
行講約勸農虛文或且滋擾蘇洵田制之議
柳宗元種樹之篇其明鑑也將欲順人情而
收實效其道何由夫民生風俗國家之元氣
也大小臣工於民皆有父母師保之責使徒
從事於簿書案牘而置本務於不圖豈稱識
治體培國脈者乎古之循吏轉凋敝為沃饒

化頑愚以禮讓如召杜文翁之流豈徒恃講
求之有素才畧之過人歟書曰慎乃儉德惟
懷永圖誠以奢儉之間君心敬肆所由分風
俗淳澆所由辨也方今太平久而生齒繁人
情自質而趨文物力雖豐而易匱有如漢詔
所云雕文刻鏤傷農事錦繡纂組害女紅者
習染既久富者僭而踰制貧者濫而為非豈
細故哉朕躬行節儉出於天性時頒訓言冀
挽薄俗乃詔書屢下淳樸未臻將欲嚴法制

以繩之又慮奉行不善適以病民將何以移
風而易俗耶古之卿大夫若楊綰盧懷慎杜
黃裳之徒高節清標聞者感而自化羔羊素
絲風流如在今何必異於古所云也兵可百
年不用不可一日不備整軍經武先王所以
保太平也然有空籍而無勝兵徒滋糜費則
簡閱為要矣漢代訓練之法有都試都肄都
講驅劉卞射諸制其詳若何唐時講武都外
宋有大閱之典其法若何文獻通考載兵有

五練厥目安在我朝以弘矢威天下

家法固敢怠荒侍衛禁軍躬親校閱屢諭掌兵大臣盡心簡練又以時舉行大閱教演陣法每歲行團肄武習勞至直省營伍亦嚴飭將軍督撫提鎮等勾稽較覈其果能選驍銳汰老羸以得實用乎修整犀利變更些窳以精器械乎役使兵丁攤扣糧餉不加懲儆何以肅戎政乎夫圖治所以經邦遂生繼以復性節用以裕民食振武以壯國威凡此四端叅

互考訂則軌跡易遵通變化裁則推行盡利多士學于古訓通知時事拜獻厥有先資遠猷尚期辰告勉殫素蘊毋襲陳言朕將親第焉 癸未諭內閣明刑所以弼教婦女首重名節舊例婦女和姦悔過拒絕復被逼姦將姦夫殺死者均照擅殺罪人律減一等擬以杖流其未經和姦因拒姦擅殺罪人之婦女轉科以絞候於情法本未平允此案李何氏因拒姦殺死周得佶刑部照絞候擬覆大理

寺於會議時簽商議減所議甚是刑部堂官亦即詳酌奏改條例所辦亦是著依議纂入例冊其李何氏一案即照新例辦理至大理寺堂官係何人首先倡議簽商著據實奏明交部議敘不得以公同看出含混具奏 又諭文孚奏覆查柳城縣鄧學厚命案請將阮元交部議處一摺阮元前此審辦鄧學厚毆死鄧希達一案所擬罪名均無錯誤其參奏富綸偏徇及請將程卓樑嚴議不過措詞稍重富綸程卓樑獲咎之處甚多已分別問擬遣戍不必再以詞語小疵責備原奏之人阮元著無庸交部議處 甲申諭內閣國家慎重刑名因有三法司會議之制所有刑部會議各案都察院大理寺堂官均當悉心酌覈其有未協者或改輕為重或改重為輕惟期情法之平合衆論以成一是一若漫無可否一味隨同畫諾亦安用多此會議為耶此次大理寺簽商刑部議覆李何氏拒姦殺死周得

估一案比例平允具見留心參酌齡椿楊惲
曾著各賞加紀錄三次以示獎勵惟是刑名
事關民命各宜虛公詳慎若因有此次甄敘
之旨或有意見長過案挑剔於不應簽改者
亦紛紛執奏亦難辭妄言之咎也又諭御
史盛唐奏請除直省州縣積弊四款所奏俱
是崇儉黜奢為阜財善俗之先務州縣親民
之官自當躬為倡率乃近日膺民社之責者
不以教養為亟率先華其衣服美其飲食且
置良田構大廈以豫為子孫計考其封殖之
由非侵蝕國帑即朘削民膏甚至顛倒訟獄
賄賂公行取非義之財以濟其侈靡吏民相
忌上有苛刻之政下氓愛戴之忱是治民者
適以害民國家奚賴焉著各督撫實力整飭
留心考察所屬中如有恣意驕奢貪婪不法
者立即嚴行叅辦以儆澆風至州縣衙門不
能不設吏役以供驅使而若輩善良者少舞
文弄法視為慣常且官有去留吏無更易盤

踞一方肆行荼毒其新任官員不加查察或
轉向其咨詢利弊無不墮其術中各該督撫
當飭所屬州縣官先自潔己勤民嚴以御下
其有奸胥蠹役惟執法重懲毋使小民重受
其害若聽斷詞訟尤應速審速結以省拖累
近日地方案件竟有遲至十餘年不結者因
循疲玩莫此為甚該督撫職司察吏務遵照
例設循環簿以實稽考其積壓多者即官之
閒茸可知指名叅劾毋稍姑息至徵收錢糧
定制本極嚴密今乃廢格不行一任州縣官
私立規條巧為科斂若非該上司不加禁約
亦何敢任意浮收著各督撫遵照定例嚴行
申禁務令官守廉樸之風自民享清寧之福
久之閭閻之蓋藏日富即里黨之風俗還醇
邪說莠民自可消滅矣將此通諭知之以
故雲南廣通縣回澄關從九品土官楊廷桂
兄朝旺襲職旌表守正被戕直隸藁城縣
民婦鄭部氏 乙酉

上詣

火神廟拈香。還宮。御養心殿召讀卷官入親閱定進呈十卷甲第。丙戌。上御太和殿傳臚。賜一甲陳沆楊九畹。胡達源三人進士及第二甲孫起端等九十九人進士出身。三甲陳嘉謨等一百二十二人同進士出身。幸圓明園。諭內閣本日朕御太和殿傳臚。因前引侍衛行走錯誤。以致中和樂先時起祝。鳴贊鞭官即接唱鳴鞭。其時鴻臚寺官不唱排班及朕升殿中和樂復作樂。止時鳴贊鞭官不再唱鳴鞭。鴻臚寺官即接唱排班。以後禮儀節次均得不至紊亂。該鴻臚寺甚有定見。著松筠據實查明。明早具奏。如係堂官著加恩賞戴花翎。若係唱贊官著賞戴藍翎。俱仍賞加一級。撫卹廣東萬樂會二州縣被風災民。並給房船修費。丁亥。諭軍機大臣等。前因李奕疇分派漕委多員。以致旗丁被累。冗費日多。降旨交孫玉庭密

查具奏。嗣據該督奏稱。李奕疇從前漕委實派有一百餘員。近亦尚有數十員。是否實有。聽信官親長隨關說。藉得贓私情事。必須查訪明確。以便覈辦。緣現赴安徽閱兵。俟回省之後。密切查明。分別參奏。等語。朕當即批令秉公查辦。得有實據。即由驛嚴參具奏。現已事隔月餘。尚未據孫玉庭覆奏。李奕疇如果。有蘊蓋不飭。藉多派漕委。勒索分肥情事。孫玉庭查有實據。即當露章參奏。候朕降旨查辦。若無關說。贓私實據。其濫派漕委。擾累旗丁。亦應奏參議處。著孫玉庭迅速確查具奏。毋稍諱飾。再朕近日風聞。現一犯現在逃往江南海州一帶。潛匿。著該督即遴派妥幹員弁。前往該處嚴密訪查。如有端倪。即行掩捕。毋令聞風他竄。一經就獲。訊明迅速。由驛具奏。將此諭令知之。戊子。命嗣後鳳陽九江兩關監督期滿。俱無庸題請更換。每屆該道出缺時。即以新任道員接管。己丑。

上詔									
黑龍潭祈雨 命									
皇次子智親王 命 詔									
天神壇皇三子悖郡王綿愷 詔									
地祇壇定親王綿恩 詔									
太歲壇祈雨 命 於									
覺生寺設壇祈雨 命直隸總督方受疇於									
省城設壇祈雨 命直隸提督徐錕詣密雲									
縣									
白龍潭祈雨 湖北按察使方體因病乞休									
允之以安襄鄖荆道陳廷桂為按察使 旌									
表守正捐軀安徽阜陽縣民曹大更妻劉氏									
(庚寅)以故鎮國將軍德尊子秀福降襲輔									
國將軍 以前引侍衛導引錯誤革去定親									
王綿恩領侍衛內大臣 命在御前大臣上行									
走以左宗人奕紹為鑲黃旗領侍衛內大臣									
禮部尚書松筠為內大臣 命工部左侍郎									
穆彰阿為閣學士吳其彥教習庶吉士 授									

一甲一名進士陳沆為翰林院修撰二名進									
士楊九畹三名進士胡達源為翰林院編修									
(以山東兗州鎮總兵官馬瑜為江南提督									
福建延平協副將張聯奎為兗州鎮總兵官									
大清仁宗受天興運敷化綏猷崇文經武孝恭									
勤儉端敏英哲睿皇帝實錄卷之三百五十六									

大清仁宗受天興運敷化綏猷崇文經武孝恭勤儉端敏英哲睿皇帝實錄卷之三百五十七

監修總樞官經筵日講起居注官李太傅武英殿學士文淵閣領閣事稽察欽奉
主事事件處管理部事務翰林院掌院學士

詹如以尋常留級。曾林鑄煥。曾太。王傑。大洲。閩大學士。管理刑部事務。加五級。戴均元。題。奏。請。起。居。恩。官。于。子。孫。內。大。臣。請。開。復。

舉閣事稽察欽奉
上諭事係處協辦大學士戶部尚書翰林院掌院學士教習庶吉士總管內務府大臣鍾黃旗滿洲都統步軍統領

理戶部三庫奉宸苑清鑄園等處總理工程處御茶膳房御藥房太醫院西洋事務軍功司副總帶加級尋常加一級紀錄五次

和銓選官奏上條禮部尚書上書奉行武英殿總裁管理圖書監事務六級隨帶六級總錄四次自汪延幹等奉

救修

嘉慶二十四年己卯閏四月壬辰朔諭內閣

三、

孫玉庭叅奏李奕疇濫派漕委多人滋累幫

丁州縣一摺。漕委一項。前經鐵保等奏明節

次刪減迨李奕疇任內逐漸加增派委至一

百四十餘人之多。該漕督曾向孫玉庭言及

漕標候補人多窮苦堪憐不得不概行差委

以資調劑李奕疇多派漕委並以調劑為詞

是明令該漕委等需索旗丁。以致大幫每幫

出銀三百餘兩。小幫每幫出銀二百餘兩。旗

丁費何由出悉皆取之州縣州縣費何由出

悉皆取之糧戶。浮收之弊。日甚一日。漕委之

擾累實啟其端該漕督辦理不善咎無可辭

李奕疇著交部嚴加議處尋議降四級調用。

得旨以吏禮二部郎中用○以廣東巡撫李

鴻賓為漕運總督調安徽巡撫康紹鏞為廣

東巡撫以直隸布政使姚祖同為安徽巡撫

調雲南布政使祝慶承為直隸布政使以廣

東按察使玉輅。為雲南布政使。直隸天津道。

劉寶第為廣東按察使○予廣東出洋淹斃

~~James M. Smith~~

守備張高生祭葬世職如例○癸巳諭內閣

朕於四月二十五日御太和殿傳臚因導引

侍衛烏凌阿廣喜行走錯誤降旨將伊二人

發遣伊犁嗣經朕風聞是日係德麟到遲屈

時改令廣喜代充當派永錫托津戴均元盧

陰溥松筠和世泰六人會同秉公查辦旋據

查明德麟誤班屬實。廣喜曾將代充之處告

知綿恩綿恩未經叅奏章京毓文亦不稟請

查辦永錫等五人奏請將德麟革職綿恩嚴

議毓文議處。又據松筠單銜奏請將德麟革職發遣伊犁。並將鄂勒哲依圖嚴議。朕覈定諸臣咎愆。一秉大公。德麟人本下流。屢次誤差。並服食鴉片烟。卑污下賤。玷辱家聲。久應斥革。惟此次其過止於誤差。不能與烏凌阿之導引錯誤者同罪。若照松筠所議一併發遣伊犁。豈足以昭平允。德麟著革去貝子及二等侍衛。在奏事門外重責四十板。交伊母管押在家。不准出外滋事。著英和派人常川看守。如再行私出。查拏治罪不貸。綿恩既聞。廣喜有代人當差之言。前朕查問烏凌阿廣喜名字時。恐有錯誤。曾詢至再三。彼時即應奏明查辦。乃含糊不舉。推諉重聽。朕每日接談。並無差誤。奏對何獨於此一事耳聾。著交宗人府嚴加議處。鄂勒哲依圖與綿恩同係鑲黃旗領侍衛內大臣。當時即或未知。事後數日。豈毫無所聞。亦徇隱不奏。昨已降旨令廣喜回京。俟詢明廣喜如曾將代充緣由向

其告知。即將鄂勒哲依圖交部嚴加議處。若未經告知著交部議處。毓文令廣喜替代德麟。廣喜發遣後。該管大臣未將德麟奏請該章京始終無一言稟請查辦。是何居心。毓文著一併交部嚴加議處。廣喜本非派充導引之人。鄂勒哲依圖令哈朗阿將行走節次向烏凌阿告知。廣喜原不與聞。後因隨同烏凌阿行走錯誤。其咎尚有可原。廣喜著免其發遣。降一等以藍翎侍衛用。其是日隨同錯誤之乾清門行走大臣侍衛等。前罰俸一年之處。俱著加恩改為半年。德麟所革世職。本不應令伊子承襲。但念伊父福康安從前屢有軍功。經

皇考高宗純皇帝恩封王爵。朕不忍因其子不肖。令其世封中替德麟並無兄弟。所有世爵仍加恩令伊子慶敏承襲。並著查明如係世襲罔替。即襲封貝子。若例應降等著襲封頭等公爵。慶敏現在年未及歲。著食半俸。俟當

差時再行給予全俸○又諭著御前大臣領侍衛內大臣留心嚴查各侍衛如有私食鴉片烟者即行指名叅奏革職若徇隱不奏經朕查出定將該管大臣嚴懲不貸○甲午調雲南按察使廉敬為廣東按察使廣東按察使劉寶第為雲南按察使○乙未諭內閣葉觀潮奏請動項補修運河西岸碎石隄工一摺東省洳河廳屬峰滕二汛運河西岸隄工攸關緯道湖潞前經間段補修歷屆大汛風浪汕刷土戩殘缺碎石坍塌亟應擇要補修所有勘明最要隄工除二十年甫經補修工段外其現估工料例幫價銀五千六百三十一兩零著照所請准其動撥山東司庫銀兩發廳購料趕緊興辦勒限六月內修補完竣覈實驗收報銷○又諭綿恩等叅奏御前侍衛安成平日當差疏懶且食鴉片烟本日考試庶吉士監試又復遲誤等語安成素無出息且食鴉片烟朕已早有所聞本日又復誤

差本應革職惟念安成之父海蘭察軍功甚多伊兄安祿在軍前陣亡今若將伊革職安祿無嗣安成尚未生子竟無應襲公爵之人如停襲公爵致海蘭察功績不彰朕心深為不忍安成著格外施恩免其革職革去御前侍衛副都統賞給三等侍衛在大門上行走安成當力改前非奮勉當差若再行止不端曠誤職守朕亦不能追念海蘭察功績再為寬宥也○正藍旗漢軍都統穆克登布以前

任江寧將軍不能教導官兵降鑲白旗蒙古副都統以烏里雅蘇台將軍持依順保兼正藍旗漢軍都統○丙申

上御勤政殿聽政○諭內閣毓文因派出導引侍衛德麟到導改令廣喜代充嗣廣喜導引錯誤獲罪即應回明綿恩鄂勒哲依圖據實將德麟叅辦乃徇隱不舉咎有應得但先聞廣喜有已經稟明綿恩之言尚屬有因若照部議革職未免與德麟無所區別毓文著革

去續辦事章京降一等以二等侍衛用仍留伯爵及世管佐領其宗人府議奏綿恩處分俟廣喜到京詢問後再降諭旨○引見新科進士得旨一甲三名陳沆楊九畹胡達源業經授職外孫起瑞邵甲名俞誦芬沈鐸彪魏建中王文驥楊峻慕維德韓大信邵正芳周曰炳陸蔭奎徐士芬錢寶琛阮燦輝劉夢蘭吳文鎔李紹昉蔡家玗劉榮熙朱德華方長庚劉宇昌裴鑑楊景曾朱國淳但明倫程灃

周祖培並宜福尚開謨陳兆熊花詠春李昭美謝興曉姜堅德春胡美彥方傳穆徐述度朱瀾盛增葉敏昌周濂鄭瑞玉蔣立誠王雲岫龔文煥郭應辰戴修道朱嶠松峻胡漫王寶華宗室鐵麟何輝綬汪淦趙存洵焦維棧呂夢飛李印萬蔡如蘅王曷俱著改為翰林院庶吉士蔡紹江張其玗李彬然費庚吉周祖植馬洲高容聲沈福清劉潮明誼尹榮組啟寧圖隆阿陳學源趙琇潘一奎宗室訥勒

亨額郭鳴高宗室希哲周彥宗室邵爾端李廷幹翟發宗劉遵和俱著分部學習胡培翬易長華黃世名戴本義鄭瑞麒陶際清李嘉秀李衢陳維垣賈侍舜高履觀伊崇額梁炳王思義梅克芳蔣廷恩俱著以內閣中書用周曾毓吳繩顯徐作霖孫淦酉王天錫俱著以國子監學正學錄用王星榆胡炳錢崇文壽華宋大寅張縉雲方玉璫李耀瑚羅耆勳潘一桂王錦雲林崢嶸孫河徐久道羅升培

蔡鵬南朱希良麥祥龔聯奎李鴻卓黃錫祚馮鎔牛夢錕張維甲余靖李閔龔藻黃天相耿麟謝雲林良弼饒芝富陞額衛龍筠王頤慶善楊燦陳維屏黃徵入錫旂李鐸賀緯王善璧張啟庚托渾布張署貢青選彭三壽席光縉鄧夢鯉賀雲舉王森長孫述庭俱著交吏部籤掣分發各省以知縣即用刑部候補郎中蕭秉瑩著以六部郎中即用工部額外員外郎王世紱候選員外郎賈大夏俱著以

六部員外郎即用餘著歸班銓選○丁酉上詣

覺生寺祈雨○命肅親王永錫為正使禮部左侍郎恩寧為副使持節奉冊寶封皇三子綿愷為多羅惇郡王

制曰乘和敷福春韶廣詒燕之仁逢吉延禧壽祉薦龐鴻之慶舉隆儀於周甲桂邸凝庥沛閭澤於元辰芝函煥采爾皇三子綿愷宅衷醇茂賦質溫恭琅圓橫經勤學肄詩書之訓

彤墀舞綵承顏修定省之儀值祝嘏以稱觥臚歡海澨宜展親而頒爵綏祐天潢茲封爾為多羅惇郡王錫之冊命於戲榮膺茂典用宏慈愛以宣綸寵賁崇階尚勉慎勤而奉職欽哉○命領侍衛內大臣奕紹為正使內閣學士裕恩為副使持節奉冊寶封皇四子綿忻為和碩瑞親王

制曰歲朝介祉新韶數桂邸之榮壽寓開祥佳氣篤璿源之祐逢薄海臚歡之盛澤普宣綸

念過庭遵訓之勤輝增鏤簡爾皇四子綿忻秉質中和宅心醇粹承顏黼座孝恭早著於觴辰育德經帷詩禮克敦乎矩範值稱觥而衍慶載舉隆儀喜舞綵而承恩聿昭茂典茲封爾為和碩瑞親王錫之冊命於戲絨芝賁寵期迪誨以彌虔詒穀凝庥尚禋躬於匪懈欽哉○命領侍衛內大臣和寧為正使內閣學士奕經為副使持節奉冊寶封皇長孫奕緯為多羅貝勒

制曰履端肇慶喜覩椒衍之蕃錫羨延釐眷念穀詒之厚推恩自近沛澤彌長爾皇長孫奕緯夙秉穎姿克遵彝教謀承燕翼孫枝之秀先鍾仁嗣麟振公姓之祥允協曩值昌辰聿啟正見含飴今欣周甲初逢漸詣舞勺爰邀茂典式播洪慈是用封爾為多羅貝勒錫之冊命於戲筮用儀於此日羽已繁夫三英待授職於他年詔載頒夫五色尚懋厥德益遠乃猷○諭內閣前因德麟曠誤差使將其貝

子革退。該據該旗查奏伊子慶敏應降襲頭等鎮國公等語。昨經帶領引見。朕已將慶敏承襲公爵。惟念此爵係德麟之父福康安立有軍功。朕曾於嘉慶二年欽遵。

皇考高宗純皇帝

恩諭將福康安追封王爵。令伊子德麟承襲貝勒。俟德麟出缺。降等承襲貝子一次。俟再出缺。再降襲公爵。嗣因德麟承襲貝勒甚無出息。屢次誤差。獲咎。是以朕將伊降為貝子。朕

意伊若改過自新。奮勉當差。本年朕六旬萬壽。亦必加恩。仍復其貝勒原爵。乃德麟竟不知悔改。仍復曠誤差使。是以將德麟貝子革退。令伊子慶敏承襲公爵。此雖照例辦理。惟緬思朕從前欽奉

皇考高宗純皇帝

恩諭稍有未符。且追念福康安勞績實有不忍。慶敏著格外加恩。仍襲貝子。其未及歲以前賞給半俸。俟當差時再給全俸。將來慶敏出

缺。再行照例降襲一等鎮國公。以副朕仰承

恩諭加惠功臣後裔至意。○戊戌。諭內閣。前因

侍衛廣喜導引錯誤。係代德麟當差。綿恩曾

聞此言。不行詳查。含混覆奏。降旨將綿恩交

宗人府嚴議。嗣松筠復單銜奏請將鄂勒哲

依圖一併嚴議。朕以其事尚未訊問確實。令

俟廣喜到京。交原派之王大臣永錫等問明

奏上。時再降諭。旨。茲據永錫詢問廣喜是日

實曾將代班之處。回明綿恩。並未與鄂勒哲

依圖見面。此事綿恩當奉旨查問時。既聞廣

喜有代班之言。即應確切查明。將誤班之德

麟參奏。乃因年老精神不周。謂廣喜既已錯

誤。何必分別。即不復追詢原委。存將就了事

之見。草率具奏。前據宗人府奏請將綿恩降

三級留任。所議尚輕。綿恩著仍在內廷行走。

留正白旗滿洲都統之任。管理火器營事務。

其餘各項差使。俱著解退。仍罰職任俸一年。

至鄂勒哲依圖現已詢明。廣喜並未向其告

知其事後聞知與否無憑查考著免其議處命鑲黃旗領侍衛內大臣奕紹在御前大臣上學習行走○己亥諭內閣本年庶吉士散館考列三等者俱歸原班銓選內強望泰一員係強克捷之子趙榮一員係趙文哲之孫強克捷前於滑縣殉難趙文哲前於木果木軍營陣亡均係歿於王事朕優恤忠良後嗣特加恩將強望泰趙榮俱用為內閣中書俾得仍列清班該二員其各勤慎供職勉勵

進階○引見丁丑科散館人員得旨修撰吳其濬業經授職其清書二甲庶吉士李鈞漢書二甲庶吉士祁寯藻龍元任徐法績張日畧周貽徽陳肇沈魏皆朱階吉趙柄王植許乃賡陳雲郎葆辰蔡學川潘光藻毛樹棠成世瑄李煌牛鑑吳坦陳功龍璫王兆琛穆馨阿汪琳雷文模俱著授為編修清書三甲庶吉士黃德濂漢書三甲庶吉士德興胡國芳李惺俱著授為檢討彭玉田周炳緒宗室保

瑞閔受昌曾錫恩趙先雅徐培深王鑄亟宜稷裘元俊潘光岳裕泰俱著以部屬用強望泰趙榮俱著以內閣中書用王金策時式數岳鎮東龔裕周如蘭祁墀馮賡颺陳逢年劉冀程俞德淵繩格馬伯樂祥寧董承燾徐璫俱著以知縣即用毛家槐章榮龐大奎俱著歸原班銓選庚子

上幸萬壽山詣

廣潤祠拈香○命

皇次子智親王旻常皇三子惇郡王綿愷定親王綿恩再詣

三壇祈雨○諭內閣程國仁奏查辦東省民欠官虧牽涉情形遵旨分別剔釐一摺東省民欠錢糧前經和舜武開單具奏數至八百六十萬兩以上當降旨以款目混淆飭令該撫會同藩臬兩司另行覈辦茲據程國仁查明奏武克沂曹登萊青八府自嘉慶元年至二十二年實在民欠約計止在二百萬兩內

外此外濟南等府州衛所民欠實數亦不能多於泰武等府。前次和舜武所奏係據藩司廣慶詳報將先後報出官虧六百三十餘萬不行剔除。統入民欠數內以致轆轤不清。藩司為通省錢糧總匯。蠲免積欠。原期實惠及民。廣慶率將官虧列入民欠。至數百萬兩之多。朦混具詳。背謬已極。廣慶著交部嚴加議處。和舜武接據司詳不行查覈。草率具奏。亦有應得之咎。業經病故。著毋庸議。並著程國

仁查明廣慶係據何員稟報。從憑朦詳。據實參辦。○諭軍機大臣等。據程國仁奏酌量東省亟應整飭事宜一摺。內嚴交代以當盤查一條。據稱東省虧空。若再通查。不但無此政體。實亦並非良法。請遇州縣交代如有前任虧缺。但短一款。即揭一款。每發一案。即辦一案。所論甚是。前任虧缺。後任知之最真。若短一款。即揭一款。該管上司於揭報到日。有一案。即叅一案。何難水落石出。但既如此辦理。

則必須執定不移。不可高下其手。若有叅有不叅。有辦有不辦。則人心不服。又開訐告之門矣。至務崇教化以消邪惡一條。札各學教官每月親至鄉堡宣讀。

聖諭廣訓詳悉講解。雖係探本正論。但祇能教導良民。若邪惡頑民。仍須刑以齊之。寬猛相濟。方能易俗移風。未可執一而論也。若搜查積窩。以清盜藪。嚴拏訟棍。以清訟源。此皆東省現在亟應整理事務。其稱整飭吏治。挽回風氣。斷無不可轉移之理。欲使屬員之畏上司。在有以服其心。欲使百姓之畏州縣。在有以達其情。二語可謂切中竅要。但不可託之空言。惟在該撫身體力行。正色率下。果能行之。以實持之。以久吏治民風。定當日有起色也。將此諭令知之。○以直隸按察使岳齡案為山東布政使。湖北安襄鄖荆道祥泰為直隸按察使。○辛丑諭內閣。此案民人成德懷挾呈詞。欲行叩閣。輒於四月十四日乘夜

混入神武門潛進景運門行至內右門外被蘇拉吉壽盤獲交隆宗門護軍校舒敏太等收管吉壽尚屬小心著加恩賞挑內務府馬甲以示獎勵司鑰長塔克申太聞知有人混入禁門起意規避處分商同章京永順將成德徵送出神武門消弭了事實屬糊塗不堪永順聽從徇隱並將搜獲呈詞藏匿厥罪維均塔克申太永順二人先行摘去翎頂俱著交部嚴加議處印務章京八十九事後知情

並不稟明護軍統領參辦著交部議處阿隆阿未據塔克申太等稟知是日直班失於覺察著交部察議神武門該班章京富永阿於成德徵乘夜入門時未能稽查攔阻著交部議處其景運神武二門該班之護軍校護軍俱著交該管大臣查明按名責懲不可疏漏步軍統領衙門原參失察之協尉富桑阿等著交部分別議處成德徵著交刑部按例審辦尋議上得旨此案塔克申太於民人成德

徵潛入禁門疏於防範迨經拏獲復起意彌縫私行釋放僅予革職不足蔽辜著發往烏魯木齊効力贖罪餘依議○江寧副都統懷塔布緣事降調以青州駐防協領哈岱為江寧副都統○壬寅諭內閣紫禁城內各門直班官兵疏懶之習朕所深悉前有擅入景運門欲行呈控之成德徵即係乘該官兵等睡時混入直班護軍等例應每夜輪流坐更即或寢息亦應早起稽查出入乃該官兵等

積習每遇飭禁一事該官員兵丁不過於十日半月之間嚴加察管並將實係當差之人一併阻止事隔數日仍復怠玩任人出入置之不問此等習氣不可不力為整頓著交該前鋒統領護軍統領等晚諭直班官兵務當嚴肅禁門留心稽查出入夜間輪流坐更每晨早起如再疏懈一經查出定行從重治罪

○癸卯

上幸靜明園詣

龍神廟拈香○甲辰諭內閣理藩院奏錫林郭勒盟長瑪哈巴拉等以朕本年巡幸多倫諾爾廟拈香該盟王貝勒貝子公台吉等呈請備進筵宴駝馬等語此乃伊等誠悃甚屬可嘉乾隆十年我

皇考高宗純皇帝巡幸多倫諾爾只准伊等備進筵宴停止進馬此次朕至多倫諾爾出哨時僅日行六十餘里至多倫諾爾拈香畢即回木蘭行圍非乾隆十年

皇考高宗純皇帝臨幸多倫諾爾廟拈香畢即由彼經過張家口近伊等游牧處經行者可比其所請備進筵宴駝馬之處著毋庸議此內有輪應隨圍者准其隨扈餘俱不必前來○以正黃旗漢軍副都統裕恩為右翼前鋒統領丙午旌表守正捐軀江蘇銅山縣民徐萬榮妹徐氏○丁未諭內閣玉努斯之祖父額敏和卓伊斯堪達爾均著有勞績玉努斯著加恩釋回吐魯番交伊母哈里察拘禁

並著該處領隊大臣及該管回王嚴行管束不許出外滋事○以本年鄉試考試應開列試差人員於正大光明殿○以故輔國將軍綿贊孫載桂降襲奉國將軍奉國將軍伊密陽阿子松得降襲奉恩將軍○戊申

上詣

時應宮

昭顯廟拈香○還宮○命肅親王永錫祭宣仁廟○諭內閣松寧等奏審明故殺佐領

復挾恨解屍人犯定擬具奏請旨一摺愛圖保派隨同旗佐領訥依保打牲受其約束即與本管官無異乃逞兇將訥依保毆斃復觸起妬姦夙嫌將屍身支解兇殘已極松寧等乃謂訥依保亦係犯姦之人援引本管官犯罪之例將愛圖保定擬斬梟奏明請旨試思訥依保所犯之罪不過革職而愛圖保支解本官情罪重大此而不即行正法則王命旗牌設之何用松寧何糊塗背謬至於如此之

極著傳旨嚴加申飭愛圖保著即行處斬梟示○以祈雨

三壇齋戒一日○己酉

上詣

天神壇命儀親王永璇詣

地祇壇成親王永理詣

太歲壇祈雨○命

皇次子智親王曼寧詣

黑龍潭皇三子惇郡王綿愷詣

覺生寺皇四子瑞親王綿忻詣昆明湖及玉

泉山

龍神廟祈雨○幸圓明園○庚戌諭軍機大

臣等德寧阿等奏川省土司屯番籲請來京

叩祝一摺朕本年六旬萬壽土司屯番等情

殷祝嘏懇請入覲自應俯如所請惟該土司

等人數衆多未便概令前來嘉慶十四年川

省土司屯番等來京叩祝者共四十一人此

次仍當倣照辦理不得逾四十人之數著德

寧阿將攸銛公同酌派除將上年班甫經來京者停其出派其未經出痘及有事故者照例令頭人恭代屆期派員帶領來京隨班叩祝於九月初十前後到京可也將此諭令知之○刑部尚書吳璥以病乞解任允之以署刑部右侍郎韓對為刑部尚書調吏部左侍郎王鼎為刑部右侍郎轉吏部右侍郎周系英為左侍郎以署兵部左侍郎吳芳培為吏部右侍郎○以都察院左都御史劉鏞之

兼管順天府府尹事○辛亥

上幸萬壽山詣

廣潤祠拈香○諭內閣向來修理工程俱先

派勘估次派承修後派驗收層層稽覈而承

修之員每以原估不敷動輒續估並不具奏

任意增添往往有倍於原估者實開浮冒之

弊嗣後凡修理宮殿園亭以及衙署倉庫等

項工程原派勘估之員務須詳加查勘悉數

估計如有遺漏本處該管人員即逐一指示

令勘估之員一併估入奏准後交承修之員辦理其承修之員不准再有續估若非露明處所拆卸後另有別項情形准承修之員奏明仍交原勘估之員再行勘估奏准交辦不准私增錙銖工竣後一併派員驗收如承修之員未經奏明私行續增工程查出加倍賠交仍治罪不貸○刑部議駁直隸總督方受疇疏報民婦申姚氏謀毒本夫後追悔趕救未死一案得旨此案申姚氏因與王二小通

姦情熱輒聽其勸誘商同謀毒本夫雖後萌悔心奪棄毒麪將伊夫灌救得生然王二小所給信末該犯婦既經攜回下入麪內已有致死其夫之心該督原咨將該犯婦及王二小俱擬減流實屬輕縱刑部駁令更正所辦甚是申姚氏依擬應斬王二小依擬應絞俱著監候秋後處決原擬錯誤之臬司著查明交部議處總督方受疇據詳率咨著交部察議○癸丑諭內閣朕昨閱各衙門具題本章

內戶部議覆直隸省題銷嘉慶十六年春間房山等縣應差馬駝草豆等項銀五十五兩零一本又工部等部議覆雲南省題銷二十三年戊寅恩科鄉試動支經費銀七千五百三兩零一本雲南直隸兩省距京程途遠近不可以數計其請銷銀數又復多寡懸殊乃雲南以二十三年之事即於上年十二月具題直隸以十六年之事遲至上年十二月已逾八年之久始行具題相形之下可見直隸

諸事廢弛因循疲玩未有甚於該省者方受疇等俱著傳旨嚴行申飭其承辦遲延職名著速行查取交部分別議處○甲寅

上幸靜明園詣

龍神廟謝雨○命

皇次子智親王旻寧詣

黑龍潭皇三子惇郡王綿愷詣

覺生寺皇四子瑞親王綿忻詣昆明湖

龍神廟謝雨○戶部議准江西巡撫錢臻疏

報豐城武寧上饒三縣開墾水田一項二十三畝有奇。照例升科從之。○乙卯湖北布政使訥福以病乞解任。允之。以湖南按察使海齡為湖北布政使。四川東道嚴士鏐為湖南按察使。○丙辰諭內閣御史黃中模奏請嚴誣告之禁一摺。近來訐告之風甚熾。架詞拖累。陷害無辜。必應立法嚴懲。著交刑部將誣告人罪者分別所誣輕重。再行加重定擬條例。以遏刁風。再小民來京控告者。動稱必須面見朕躬。始行申訴。堂廉之分甚遠。似此罔識尊卑。其情尤為可惡。並著刑部嚴定科條。即所控得實。亦治以妄越之罪。儆審係虛誣。再加重治罪。奏准後頒發遵行。○又諭御史黃中模奏山東金鄉縣監生胡士鏐被盜控縣經該縣邵自鑄審虛革去監生。又曹縣樊宗智家被盜。控拏盜首。供出夥盜多名。典史鄭嵩不行比緝。轉將呈繳盜贓存留。並縱容捕役勒索。事主京錢八十餘千。旋欲給還。

息事事主之子武生樊鵬飛不允承審官遂誣以刁詐健訟。詳革衣頂等語。州縣官平日不能禁暴安良。迨報有盜案。轉將事主抑勒陵辱。東省盜風日熾。職此之由。程國仁係新任巡撫。無所用其迴護。著將典史鄭嵩先行革職。提同已革監生胡士鏐及已革武生樊鵬飛並拏獲各盜犯親加鞫訊。如承審官實有徇庇縱盜情弊。即行據實嚴叅。○以翰林院編修林則徐為雲南鄉試正考官。吳慈鶴為副考官。編修祝慶蕃為貴州鄉試正考官。吳振棫為副考官。○調河南按察使敦良為湖南按察使。湖南按察使嚴士鏐為河南按察使。○免河南睢工衡工未完攤徵加價銀。

○丁巳

上詣

大高殿行禮。還宮。○命肅親王永錫詣

宣仁廟拈香。○以謝雨

三壇齋戒一日。○戊午

上詣

天神壇命儀親王永璘詣

地祇壇成親王永瑒詣

太歲壇謝雨○諭內閣向來

天神壇所設

神位在

壇北雲龍龕內每逢致祭之時恭設几案距

神位過遠且几案高於龕座於對越之忱似

有未安著大學士會同禮部太常寺詳查妥

議具奏○命外省試差題本仍在內閣折封

禮部宣旨照舊例行○以夏至祭

地於

方澤自是日始齋戒三日○己未

上御乾清門聽政○諭內閣御史喻士藩奏繕

譯會試請照文闈之例一體覆試一摺所奏

甚是國家設立繕譯鄉會試原令旗人嫻習

國書以圖上進今據該御史奏稱應試之人

往往倩人槍替而通曉繕譯者因此牟利轉

終身不願中式此事朕亦頗有風聞近科繕

譯取中之人竟有不能清語者實屬冒濫既

往姑免深究嗣後考試繕譯不但會試應照

文闈例覆試即鄉試亦當一律覆試俱著禮

部奏請於揭曉後定期傳齊中式之人在內

廷覆試屆時欽命試題並派員監察以杜倖

進而覈真才若查出情弊立置重典慎之戒

之勿謂不教而誅也○又諭長齡奏查明民

欠實數之外有州縣因屆奏銷之期慮干經

徵不力處分將民欠銀糧虛報徵完共銀八

萬餘兩前於查辦虧空造入清查冊內現徵

還劃除銀一萬七千餘兩尚未完銀六萬四

千八百一十餘兩等語此項銀糧既實係民

欠自應豁免毋庸再向欠戶徵催其虛報各

員係因規避處分仍照數著落賠交以符原

案○諭軍機大臣等賽冲阿奏宗室喜福同

伊子敦柱先後與李康氏通姦主使李康氏

將嫡妻塔他拉氏毆傷勒斃一案蔑倫傷化

玷辱宗盟。覽奏實堪痛恨。喜福敦柱俱著革去頂帶。交賽冲阿等嚴加審訊。務令供吐實情。此案喜福身係宗室父子聚廬。無恥已極。其妻塔他拉氏。勸以正言。乃逞忿毆傷。至一百二十餘處之多。慘毒異常。復主使李康氏將妻勒斃。似此淫惡之徒。即應問擬絞決。至敦柱先與李康氏通姦。迨李康氏向其告知。伊父令將伊母勒死。乃並無一言阻止。轉以隨你們鬧去之言回答。並幫同移屍裝緘。即與謀斃母命無異。按律罪應凌遲。惟宗室向無凌遲之例。著賽冲阿率同綱武布慶傑傳集移居各宗室。並喜福一同看視。先將敦柱重責一百板。打至血肉潰爛。再將喜福敦柱一同絞決。李康氏下手勒斃塔他拉氏。以邪淫陷害三命。著即行斬決。審明後。賽冲阿等即奏明分別辦理。至綱武布慶傑本有失察之咎。念伊二人管理未久。著免其議處。嗣後當認真稽查。隨時管束。務令諸宗室各知戒

懼。免蹈刑章。將此諭令知之。○庚申諭內閣。程國仁奏查辦廣慶原參冒攤軍需大概情形。一摺。嘉慶十八年。東省辦理軍需。所有正銷副銷銀兩。俱經奏准分別應銷應攤完結。其續攤軍需銀三十三萬五千六百兩一款。乃十九年清查案內。該省籌議彌補章程。奏明虧空各員有墊辦軍需銀兩。經正銷副銷兩次刪除。覈其實用有據者。通省為之捐廉攤抵。亦經奏明遵辦。是正銷副銷兩案。事屬軍需續攤一案。事屬彌補。兩不相涉。廣慶在東省藩司任內。歷次照辦。及暫護撫篆。忽更前議。創為勻攤之說。是使清查案內。勒追各員有抵之款。頓成無著。軍需案內。承辦各員久刪之款。又令找領。實屬顛倒錯謬。廣慶所奏斷不可行。該撫即照原定章程。逐案詳查。覈實辦理。不可稍有牽混。又開考員藉口之門。

大清仁宗受天興運數化綏猷崇文經武孝恭
勤儉端敏英哲睿皇帝實錄卷之三百五十七

實錄卷之三百五十七

七

大清仁宗受天興運數化綏猷崇文經武孝恭
勤儉端敏英哲睿皇帝實錄卷之三百五十八

監修禮部尚書臣等謹將嘉慶二十四年五月辛酉朔夏至祭地於方澤

禮部尚書臣等謹將嘉慶二十四年五月辛酉朔夏至祭地於方澤

禮部尚書臣等謹將嘉慶二十四年五月辛酉朔夏至祭地於方澤

禮部尚書臣等謹將嘉慶二十四年五月辛酉朔夏至祭地於方澤

禮部尚書臣等謹將嘉慶二十四年五月辛酉朔夏至祭地於方澤

地於

嘉慶二十四年己卯五月辛酉朔夏至祭

地於

方澤

上親詣行禮 幸圓明園 ○壬戌命查官員賠

項案由諭內閣朕本年六旬大慶闋澤覃敷

業經降旨蠲免直省積欠銀糧普惠黎元因

念內外大小官員有賠繳官項者或其人已

往而子姓單微或累本因人而攤追無已朕

意欲量為寬免除本身著賠之款無庸查辦

外其本身已故子孫名下著追而子孫無現

任四品以上職官者又本身原係分賠代賠者及其身已故又將分賠代賠之款在伊子孫名下著追者著八旗及各督撫查明案由銀數各歸各款分晰開單並於各名下註明已完若干未完若干有官者歸現任省分查辦無官者歸原旗籍查辦務各詳細查明不可稍有遺漏舛錯具奏到日交戶工二部分別查覈彙齊復奏候朕酌量施恩○賞工部員外郎文弼二等侍衛為和闐幫辦大臣○

癸亥

孝誠仁皇后忌辰遣官祭

景陵 甲子貸浙江海寧石門桐鄉三州縣被電災民籽種○丁卯以翰林院修撰吳其濬為廣東鄉試正考官編修郭尚先為副考官修撰蔣立鏞為廣西鄉試正考官編修楊殿邦為副考官右春坊右庶子何凌漢為福建鄉試正考官翰林院編修王贈芳為副考官旌表守正捐軀河南泌陽縣民袁文法妻

張氏○戊辰

上幸萬壽山○諭內閣向來誤傷親命之案均應照定例問擬凌遲再援引白鵬鶴舊案隨招聲請經刑部覈議奉旨飭遵此案唐義榮用木鐙臺向邢惠擲打不期誤傷伊父唐云全斃命雖與白鵬鶴之案情節相類乃明興阿等不將唐義榮問擬凌遲竟援案改擬斬決殊屬非是著交刑部速議具奏仍交部議處○又諭本日明興阿等奏請升補承德縣

知縣及請撥歲需經費銀兩二摺已各於摺內批示矣向來奉天省奏事之摺除刑名案件外俱用清漢合璧繕寫今明興阿等於此二摺均專寫漢字似此日久相沿必至漸忘舊制明興阿瑞麟俱著傳旨申飭仍交部議處嗣後務當恪遵定例不可率臆更張○調雲南巡撫李堯棟為福建巡撫福建巡撫史致光為雲南巡撫○己巳諭內閣向來各部院衙門設有筆帖式原為繕寫清文該部院

衙門遇有繕寫清文之事應令筆帖式等繕寫若係漢字則應書吏繕寫昨因帶領侍衛引見綠頭牌內有誤寫字樣查係侍衛處書吏李英華代寫殊屬非是已另降諭旨將侍衛處書吏逐出惟思各部院衙門亦有令書吏代寫清文者此等習氣不除則將來筆帖式等必致不能繕寫清文矣著通諭各部院衙門嗣後凡有繕寫清文事件俱著筆帖式繕寫不准令書吏代寫此時各部院衙門如

有代寫清文書吏著即行逐出永遠禁止○諭軍機大臣等御史蔣雲寬奏會匪擱入楚境肆行擾害請飭查辦並陳緝辦會匪事宜四條各一摺粵省添弟會久為閭閻之害查拏不淨近乃蔓延及於湖南永州一帶名為擔子會情義會黨與既眾遂至搶掠劫奪肆行無忌必當認真查拏痛加懲艾該御史所陳緝捕事宜四條亦俱中肯要會匪橫行鄉里多恃兵役為之包庇蓋兵役既已入會則

必代為傳遞信息一聞有訪拏之信或縱之逃逸或導之抗拒是官弁所倚以緝捕者即會匪之耳目爪牙尤當首先翦除無如該管官懼干處分率先隱諱嗣後查拏會匪如有兵役在內經別縣拏獲者定將該管官議處若本管官自行訪獲不存瞻徇將會匪及入會之兵役一併查拏究辦其失察處分即著奏明寬免至獲犯申解費煩一節尤係近日實在情形會匪每破一寨多則百餘人少亦

數十人一經委提差解往返程途食用盤費賠累甚鉅州縣官費無所出遂一意化大為小消弭不辦甚或轉將告發之人坐誣會匪因此益無忌憚欲清弊源自當酌予變通其為首之犯仍由該州縣批差管解赴省聽候審辦餘犯概令遞解或由本州縣發落並停止委提以節冗費至會匪在境日久官弁畏避處分不肯舉發實係外省惡習但該官弁等果能實力查拏為地方除害雖經失察於

前其功過自足相抵嗣後能破獲鉅案准其寬免從前失察處分或本案已緝獲多名偶有一二未獲之犯亦量予寬減俾得專心緝捕無所觀望再會匪結黨橫行黠悍者總在首惡數人其餘畏其欺凌被其逼脅者亦復不少地方官總當嚴拏首犯其但與會匪認識或被脅畏禍勉強聽從或愚魯無知雖經入會並未隨從生事者均准其到官自首訊明量予省釋以免株累著吳邦慶即明白剴切飭知所屬各於境內認真查拏破除積習不可養癰貽患並咨會各提鎮督飭將弁協力同心以收戢暴安良之效拏獲一案即隨時奏明辦理如吳邦慶力不能辦亦即據實奏明不可因循貽誤地方再會匪由廣西蔓延及湖南其州縣官畏難避過情形亦大畧相同並著趙慎畛亦遵照此旨實力查辦○庚午諭內閣昨因侍衛處清文俱令書吏代寫已將該處書吏逐出特降諭旨嚴飭在京各

部院衙門如有代寫清文書吏俱著逐出因思京中各處既有書吏代寫清文則東三省及各省駐防滿營難保無代寫清文書吏此等習氣自應嚴禁著通諭東三省及各省駐防等處將軍都統副都統城守尉等詳查如有此等書吏即行逐出務令旗人學習清文凡有清字俱令自書斷不可令書吏代寫○辛未諭內閣向來提鎮大員服闋假滿病痊到京有徑赴宮門遞摺請安者有由兵部帶領引見者殊屬參差著交兵部查明具奏畫一辦理尋議嗣後遇有提督總兵病痊起用仍照例由督撫驗看具題俟到京日亦照提鎮服闋例呈明臣部其旗員身任綠營者由該旗都統驗看咨明臣部臣部均知照軍機處令該員自行具摺請安候旨簡用至例內帶領引見一條應請刪除以歸畫一如該員等有不候具題給咨到京徑赴宮門遞摺請安者臣部查明參奏從之○又諭御史希寧

奏請清釐戶口一摺八旗生齒日繁近日竟有希圖冒領錢糧抱養民人之子或以戶下人之子為嗣者不可不嚴行清釐著八旗都統副都統發現天良通飭叅佐領等詳加查察不可姑息不可畏難如有抱養等弊責令該族長隨時呈報究辦如扶同徇隱別經發覺定將該族長治罪不貸○熱河都統伊冲阿以目疾乞休允之以都察院左都御史誠安為熱河都統○緩徵山西陽曲長治汾陽

朔趙城隰六州縣上年歉收民欠倉穀○壬申諭內閣昨降旨諭令各衙門將繕寫清字書吏概行驅逐因思定例部院衙門辦理文案清字用筆帖式繕寫漢字用書吏繕寫其專用清字各衙門例無額設書吏自應一概驅逐不准容留至各部院衙門向能兼寫清漢字書吏此時無庸概行驅逐惟令專寫漢字不許再代人兼寫清字著該堂官責成各司員嚴加查察如該書吏仍敢私代筆帖式

繕寫清文該司員即回堂叅辦但治該筆帖式及書吏之罪與該司員無涉儻該司員扶同徇隱經該堂官查出即將該司員一併叅處或該司員據實呈報該堂官徇隱不奏別經發覺定將該堂官懲處其稽查各部院衙門御史並著一體留心查察如有前項情弊即行指名嚴叅以憑究辦○以吏部左侍郎普恭為都察院左都御史倉場侍郎成寧為吏部左侍郎兼正黃旗蒙古副都統詹事府

詹事那彥成為倉場侍郎○調正黃旗蒙古副都統恩寧為鑲白旗滿洲副都統○癸酉遣官祭

關帝廟○諭內閣給事中周鳴鑾奏官虧積弊請飭嚴禁一摺直省州縣責膺民社其刑錢稿案理應親自經理若任聽親友出入衙署招搖撞騙甚或借公帑以盡私情擅挪庫項獎賞叢滋著各督撫隨時稽查除該員家屬至親及延請幕友外其餘親族概不准留

居衙署以省糜費至昏庸之員一命甫膺遂已馳情靡麗一應支銷皆假手於官親長隨幾視官帑為私橐迨至虧空破案即將其貲財籍沒亦不足抵償萬一各督撫應留心甄別查有此等劣員立即叅黜勿令遷延戀棧貽累地方定例佐雜人員不准委署正印乃上司往往為調劑間曹起見將實缺州縣提省羈留委佐雜前往署理彼本為謀食而來安肯無所取償而去本任官因此被累者正

復不少各督撫務督飭藩司嚴行禁止其候補州縣委署實缺並當嚴查交代如有不知慎重倉庫者即停委停補以儆貪庸至各省捐款有為公項無著分攤歸款者勢不能概行裁革若如該給事中所奏幫助貼賠使費等名自不得借詞濫派著查明覈減勿致州縣所領廉俸不敷辦公有所藉口以上各款皆直省大吏應行整頓之事其名認真查禁嚴杜漏卮以清弊源而肅吏治○甲戌

上幸靜明園詣

龍神廟拈香○乙亥諭內閣前據賽沖阿奏因病休致協領安平病已痊愈請送部引見賞給差使當經批示准行昨安平赴部引見明亮與崇祿等兩議具奏摺內均未將該員前曾緣事革職之案聲敘朕以安平祇係因病休致病痊尚堪錄用是以准照明亮所奏仍行帶領引見本日閱看隨摺履歷安平曾於嘉慶五年因署管番役協領任內縱容番役需索鋪戶革職仍留世職當差後復因患病休致該員前曾獲罪黜革嗣又患病殘廢豈能再邀錄用安平著不准引見飭令即回盛京永不敘用賽沖阿甫經補放盛京將軍尚未到任即於途次在朕前保奏安平若非安平巧事蜚緣即係受人慫恿此時姑免深究賽沖阿含混具奏著交部議處○丙子諭內閣御史李遠烈奏請禁各部院衙門繕寫清字稿件私攜出署一摺所奏甚是必應嚴

禁部院衙門一應稿案均應在公署辦理若如該御史所奏筆帖式繕寫清字稿件竟各攜回私寓顯係倩人替代且恐有私行漏洩情弊殊非慎重辦公之道著通諭各部院堂官嚴飭司員隨時稽察如有不能在署繕寫之筆帖式將文稿私攜出署及書吏擅送私寓者立即革職呈堂叅奏以儆情玩○丁丑諭內閣大門侍衛等平素當差甚屬疲玩此內宗室侍衛尤多甚至遇班不到任意借端經年不當差使此等習氣不可不力加整頓著交領侍衛內大臣嗣後侍衛內如有託故不進班宗室侍衛內有指稱獻爵不隨圍者該章京等即指名稟知領侍衛內大臣叅辦如該章京等代為容隱一經查出即將該章京等一併嚴叅○又諭袁秉直前補授通政司叅議謝恩召見步履軟弱退出時幾不能起立朕已覺其衰老連次通政司直日袁秉直均於單內註寫收本該衙門收本差使係

各堂官以次輪流何以直日之期皆係袁秉直收本顯係艱於起跪藉端規避袁秉直著即以原品休致其各堂官瞻顧通融官相護除吳椿現出學差外奎耀張鵬展繼德保昌俱著交部察議○又諭方受疇奏審訊孟變呈控總商任秉衡威逼致斃二命大概情形一摺任秉衡因媳任張氏患病囑令伊母張孟氏領歸調治及病已痊愈張孟氏及其女均願夫家接回完聚乃任秉衡堅執不肯勒寫另娶字據以致張孟氏母女同時自刎任張氏尚有翁媳名分張孟氏則係平人其母女同死實由任秉衡以強凌弱威逼所致方受疇訊明各供即行按律定擬具奏天津縣知縣汪本於此案不能訊出實情有無聽囑情弊著解任歸案審訊尋奏上得旨任秉衡著發往烏魯木齊充當苦差不准援減該犯曾充總商不准呈請贖罪餘依議○戊寅諭內閣刑部查辦吉林黑龍江發遣官犯並

効力贖罪宗室開單具奏內伊寧泰一犯將伊曾祖墳樹砍伐售賣不孝之罪甚重嗣後凡遇恩赦年分永遠不准查辦李德潤余文輝崧秀愛明阿戴國祥李錦榮馬雲龍財神保雙全達哈布十犯均因疏防逆匪進城滋事其罪甚重前於三年期滿降旨再留六年現在配甫及五年八箇月刑部何以一併列入請旨殊屬徇庇堂司各官俱交部分別議處限五日內具奏十犯俱於六年滿後再加

六年期滿後具奏候旨崔起龍杖斃九命情節亦重前降旨再留三年著於三年滿後再加三年期滿後具奏候旨餘俱不准減等○以京畿道御史孔傳綸為湖南鄉試正考官翰林院檢討馮芝為副考官侍講錢林為四川鄉試正考官編修楊希銓為副考官○己卯諭內閣朕恭閱

皇考高宗純皇帝實錄內載乾隆十二年十二月大學士等議覆梅穀成所奏將正一真人

改為正五品秩缺出由該撫咨部襲補照道官例註冊朝覲筵宴均如所奏停止奉

旨允行正一真人係屬方外原不得與朝臣同列嗣後仍照舊例一應朝覲筵宴概行停止○又諭近來宗室中屢有不顧行檢干犯法紀之人疊經訓誡總未悛改推原其故皆因宗室犯事到官向不跪訊遂有所恃而不知畏憚伊等既如此不知自重朕挽除積習亦不能再援議親之典嗣後宗室犯事到案無

論承審者何官俱先將該宗室摘去頂帶與平民一體長跪聽審俟結案時如實係無干仍奏明給還頂帶似此稍示裁抑庶共知戒懼可冀犯法者日少也○又諭張映漢奏教犯王柯赴楚傳教及陳大順等各犯湊銀給與王五保所有失察之地方文武各官業將傳徒人數全行拏獲功過相抵前叅之道府營將可否一併邀免處分至承審此案及派往緝犯之委員可否按其勞績量加鼓勵等

語傳習邪教之犯行蹤詭秘惟恐人知該管之地方文武官偶失覺察尚非無因果能留心密訪隨時緝獲懲辦定案時朕戮其功過尚足相抵必予寬免處分其有將著名要犯拏獲者不特免過尚當加之獎擢若事前漫無覺察破案時又迴護處分私自消弭則其咎不止議處仍當加重治罪所有此案失察王柯赴楚傳教及陳大順等各犯湊銀給與王五保之地方文武各員業將案犯全行拏獲其前參之道府營將俱著加恩免其議處至承審緝犯各委員著慶保張映漢秉公查明擇其尤為出力者保奏一二員候朕施恩○又諭松寧等奏遵旨將黑龍江善獵三十名裁減一半請將派往習圍官兵仍照例派往一招前歲朕因每年黑龍江派善獵三十名前往隨圍路途遙遠未免勞費曾經降旨裁減一半祇令十五名隨圍茲據松寧等奏稱每歲善獵隨圍均係自備資斧等語如祇

裁減人數復令自備資斧前來仍不免糜費嗣後著再減五名每次只選十名其選派之善獵併著施恩與習圍之官兵等一體賞給馳驛進哨隨圍○旌表守正捐軀河南尉氏縣民徐景和女省姐○庚辰上幸萬壽山○命嗣後引見及射布靶滿漢官員祖父兄弟係一二品大員無論原任現任均於籤內註明○更定繙譯鄉會試覆試繙古今文一篇例○旌表守正捐軀山西聞喜縣民溫起江妻李氏女藕姐溫六科妻孫氏○辛巳諭內閣給事中周鳴鑾奏請清釐書吏代寫清字契源一摺各部院衙門設立筆帖式原以承辦清文因不能繙譯者多斯啟書吏倩代之弊著各堂官嚴加考察不必如該給事中所奏於補缺時面試著於學習期滿時當堂面試清字一篇其通曉繙譯者方准保留不能者概不准留其實缺筆帖式屆三年考試之期俱當遵例赴考不准臨期告

病及藉詞留署其實係患病出差者病痊差滿仍行補考以杜規避○又諭御史黃中模奏請嚴藩司胥吏舞弊一摺藩司為通省錢糧總匯一應支解收發俱由書吏經手承辦自應嚴立關防以杜勾串若任其世業相傳表裏為奸與州縣官及州縣書吏往來交通遇事需索勢必致高下其手百弊叢生著通飭各省藩司遇有書役缺出務當慎重點充不准私相授受查有通同舞弊者立即嚴加懲辦毋稍姑息○諭軍機大臣等御史程伯鑾奏湖北已東縣一帶借巡查私鹽名目勒指下水船隻者自己東以下如八幅亭小新灘清灘平山壩紅花套以及宜昌屬之白楊等地方計程僅二百餘里設立鹽卡七處之多每處巡船約十餘隻巡役約數十人下水船到必令掛號先索掛號錢始行查驗其有女眷船隻往往計口索錢謂之免驗錢行旅等因有奉旨緝私黃旗不敢與較不得不

多與錢物懇其放行謂之驗放錢沿河兵弁亦助勢分肥等語湖北行鹽口岸設卡巡私原為緝拏梟販止應於要隘地面認真巡邏豈容紛紛設立私卡致胥役等藉端需索擾累商旅著慶保等即查明該御史所奏之八幅亭等處鹽卡是否官應設立抑係私行添設如有私設者即令裁撤其官設鹽卡務飭該管文武官嚴督兵役人等實力查緝私梟其行旅船隻概不許藉端需索查有掛號免驗等項名目立即嚴辦示懲勿稍徇縱將此諭令知之○壬午諭內閣前據富俊等奏吉林園禁宗室喜齡私行出入買賣生子又復潛往楊樹河子地方現已拏獲請交宗人府議罪一摺當經批交莊親王等秉公嚴議不過以喜齡屢次滋事必應酌量加重辦理使知儆懼本日宗人府議奏竟請將喜齡勒斃太覺失當因令軍機大臣詢問管理宗人府王公等究係何人首倡此議據奏成親王先

因例無明文曾向韓對詢問刑律應作何辦理韓對答以刑律內載違犯在配脫逃若逃後無別項重情祇應照本罪改發成親王以宗室與常犯不同喜齡由圈禁處所乘閒外出比之在配脫逃者情節較重比之監犯越獄者情節尚輕向莊親王綿課等公同酌商尚為慎重起見所見甚是嗣綿課以該衙門舊例宗室脫逃者拏獲即行勒斃近年始訊明分別辦理議請將喜齡仍照舊例辦理成親王等四人亦以其言為然遂公同具奏近日宗室中不知自愛犯法者多朕訓誡懲創原欲其畏法悛改若以朕為有意從嚴妄自揣度概從苛刻則大相刺謬矣此案喜齡於圈禁後不遵約束買妾私置他處生有子嗣其乘閒出入已非一次即此次私赴楊樹河子地方亦因索討欠債並非脫逃遠遁覈其罪犯總不至死喜齡著交富俊看視重責四十板加以鎖錮永遠圈禁已足蔽辜綿課首

倡勒斃之議殊屬粗暴著交都察院嚴加議處肅親王等隨同附和著交都察院議處成親王初見甚是後亦扶同著交都察院察議○又諭賽沖阿等奏遵旨審明宗室喜福主使李康氏勒斃嫡妻一摺此案前據賽沖阿等審訊大概供情具奏朕即將各犯罪名一指示令賽沖阿等於覆審後奏明分別辦理今該將軍等覆訊供情無異自應遵旨一面具奏一面即將各犯分別正法乃猶奏請訓示遵行且係差人齎奏不由驛遞設各犯內有聞風自盡者豈不倖逃顯戮該將軍等何糊塗不知事體輕重若此賽沖阿明興阿書敏瑞麟俱著傳旨嚴行申飭仍交部議處此旨著由四百里發往該將軍等接奉時即刻將喜福敦柱李康氏遵照前旨分別處決又諭孫玉庭等奏參縱容幫丁索費指勒米結之運弁並違例濫給之知縣請分別革職解任究辦一摺各幫船兌運本有例給銀

米前因丁力疲乏准令酌給津貼已屬格外優施乃江蘇太倉後等幫運丁在崑山縣需索幫費每船洋銀九百餘圓至一千餘圓之多蘇州後等幫運丁在新陽縣需索幫費每船洋銀六百餘圓至一千餘圓之多仍稱未滿其欲將通關米結指勒留難實屬任意索詐毫無忌憚該運弁等不行禁止轉將米結交丁赴縣喧鬧顯係通同一氣上下分肥若不嚴行懲辦漕弊何由肅清所有該幫米石著飭令糧道斌良督押各運弁迅速馳運抵通沿途嚴查攬和等弊交兌後著倉場侍郎即傳旨將運弁胡泉高峯雲圭復一楊經士柯鵬翥錢佐六員先行革職同頭伍人等一併鎖拏解往江蘇交該督等嚴審定擬具奏其崑山縣知縣李珏著解任同降調知縣馮秉泰一併歸案質訊李奕疇前在漕運總督任內漫無約束以致該弁丁等肆意索擾李奕疇不勝郎中之任著以主事降補○吏部

奏御史余本敦叅裕豐倉監督玩視倉庫違旨嚴議一摺得旨各倉監督不兼本衙門差使原令其專心在彼稽查時加防範猶恐花戶等乘間舞弊若啟閉時俱不親身到倉輒將封條交花戶等自行封貼實屬曠職善麟魯成名部議降四級調用尚不足以示懲俱著即行革職○旌表守正捐軀山東館陶縣民李二妻丁氏○癸未

孝恭仁皇后忌辰遣官祭

景陵○甲申諭內閣朕前命纂辦石渠寶笈續編以南書房翰林英和黃鉞姚文田三人董其事復於翰林中選派吳其彥等八人隨同編輯書成時英和自請捐貲繕錄陳設本十分並因伊所管事務較繁奏明不能自行校對仍責成吳其彥等八人分冊詳校各於卷後註明何人恭校以免推諉嗣於裝潢進呈後將乙部一分陳設御園以備披覽朕於幾餘不時檢閱藉以遣暇此內吳其彥張麟吳

信中所校各冊訛誤尚少其餘字畫脫落偏旁錯誤經朕逐條發出者每冊多有惟龍汝言所校已積至百餘處均發交南書房隨時更正從未加以譴責昨閱至第二十函第一冊內恭載

高宗純皇帝廟號帝字脫落非尋常錯誤可比不可不加以懲處英和雖未能自校亦難辭咎著罰尚書俸三年龍汝言精神不周辦事粗疏無庸交部議處著即革職回籍○又諭

御史喻士藩奏請修直隸營房一摺各省營汛墩房所以巡緝盜賊保護行旅據該御史奏直隸境內有房有兵者不過十之一二餘多牆垣傾圮汛兵無所棲止著方受疇迅即飭屬勘估趕緊修葺務須一律完整以重巡防○乙酉諭內閣本月二十四日恭修

地壇

皇祇室內

高宗純皇帝神牌托座行告祭禮據監禮御史

永明額等奏奏終獻時恭詣

列聖神位前獻爵贊引次序錯誤成親王及太常寺堂官俱各自請治罪告祭典禮重大理應敬謹將事乃於昭穆先後次序有紊其咎甚重成親王自乾隆年間觀禮

壇

廟數十年來屢充分獻陪祭差使一應禮儀久經熟諳於心縱使贊引錯誤自當即時指正乃率依導引行禮舛錯按其咎辜本應革去

王爵交宗人府治罪但念此次初獻亞獻俱未錯誤至終獻先西後東應獻

配位四案經松筠向前阻止成親王尚不自覺為開始悟係因年衰體弱起跪更番步履遲鈍以致精神昏惰尚為可原且朕與成親王自幼最蒙

皇考鍾愛同受

厚恩況友于心合此時實不忍遽褫其爵實朕

姑息之處成親王既身獲重懲且年老多病

難以管理事務所有各項差使者全行革退不必在內廷行走或在城在園均於邸第閉門思過亦無庸隨班上朝仍罰親王半俸十年照郡王食俸至十年後方准開復其子綿懃著革去內大臣隨班上朝在家侍父太常寺堂官於告祭大典派禮儀生疏之員承充贊引殊屬疏懈著交部嚴加議處贊禮郎清安泰著即革職鎖拏交刑部治罪○又諭戶部議駁御史唐鑑奏請行銷淮鹽之江西吉

安湖南衡州等府改行粵鹽一摺鹽引行銷地界定例已久上年慶保等奏酌改湖廣行銷鹽引章程經戶部議駁曾降旨將該督等議處今該御史復為此奏顯係受人慫恿輕議更張唐鑑不勝御史之任著以六部員外郎用○又諭董教增等奏審明抗糧奪犯首從各犯分別定擬一摺此案林彌高斂錢抗糧復糾衆奪犯煽惑鄉民抗官喧鬧實屬大干法紀董教增等於審明後即將該犯正法

所辦甚是並著查明該犯之妻發遣別省駐防該犯之子發遣新疆以示懲儆○以肅親王永錫為宗人府宗令鄭親王烏爾恭阿為左宗正貝勒奕紹為右宗正貝勒永珠為左宗人調正藍旗滿洲都統英和為鑲黃旗滿洲都統正黃旗漢軍都統和世泰為正藍旗滿洲都統以都察院左都御史普恭兼正黃旗漢軍都統○丙戌

上幸靜明園詣

龍神廟拈香○賞福建等省戊寅科鄉試年老諸生陳望恩等六名舉人副榜有差○丁亥諭內閣御史李遠烈奏請定各衙門筆帖式勸懲一摺各部院衙門設立筆帖式原令其常川進署繕譯稿案不得以奔走趨承為事若勤於繕譯者無由表見而善於趨承者反得上考豈足以示勸懲著該堂官等留心查察務令該筆帖式等常川進署專心繕譯遇考數時即以進署之勤惰繕譯之能否定

其殿最庶人人知勸不甘習於怠惰其各司直宿之筆帖式仍嚴飭遵照舊例輪班直宿毋許曠誤○命刑部查明逆回孜牙墩案內緣坐家屬其原發熱河者著改發黑龍江原發密雲者著改發吉林交該將軍分別安插○戊子諭內閣清安泰於告祭大典贊引錯誤部議照大不敬律擬以斬決實屬罪所應得姑念其補授贊禮郎未久儀節生疏一時昏迷舛錯著改為斬監候入於朝審情實辦

理○己丑諭內閣刑部等衙門題安徽省絞犯僧人允祥一本允祥之名適與故怡賢親王相同雖例無迴避明文然究不應如此書寫已於簽內將允祥之名改為雲祥發下矣嗣後內外問刑衙門遇有犯人與王公及一品大臣同名者俱著隨時酌改○庚寅

上幸萬壽山詣

廣潤祠拈香○諭內閣理藩院議駁蘊端多爾濟奏請於汗山肯特依汗山設巡查兵丁

緝捕一摺所駁甚是蘊端多爾濟近來辦事甚屬高興庫倫辦事大臣於所屬俄囉斯交界事務是其專責並無統理喀爾喀四部落之責汗山肯特依汗山係喀爾喀部落地方如應添設巡查兵丁何以喀爾喀四部落盟長等未經公同奏請此事與蘊端多爾濟何涉遽爾入奏殊屬好事妄為蘊端多爾濟著退出御前侍衛在乾清門行走伊前所請本年七月赴熱河隨朕進哨併來京祝嘏俱不

准行伊此時如已起程行至何處接奉此旨即由彼處回任如仍瀆奏必從重治罪○是月山東巡撫程國仁奏設法嚴緝習教從逆匪犯得旨有天良之大臣永不忘十八年之變喪盡天良之輩早已付之雲烟之外二語畢該朕看爾等所行耳

大臣等本日刑部等衙門議覆祿成等奏續獲劫案逸犯布音圖等審明定擬一摺已依議行矣布音圖等係搶劫案內逸賊既經訪明潛匿處所該將軍等自應酌派能事官弁帶兵前往緝拏無難就地弋獲乃祿成親帶佐領官兵星夜馳往四面兜圍始將布音圖額篋彥丕勒捕獲該將軍坐鎮一方體統攸關以尋常逃賊二名致將軍親率師徒兜圍擒捕殊覺輕重失倫嗣後該將軍遇事當分別重輕斟酌辦理固不可偷安以啟廢弛亦不可輕舉以損威重也將此諭令知之○以刑部右侍郎王鼎為浙江鄉試正考官翰林院編修伍長華為副考官國子監祭酒張鱗為江西鄉試正考官翰林院編修吳傑為副考官右春坊右庶子吳信中為湖北鄉試正考官內閣中書邊廷英為副考官○丙申上幸靜明園詣龍神廟拈香○丁酉命刑部右侍郎文孚馳

往江南查看河工○己亥

上御勤政殿聽政○諭內閣董教增奏叅縱兵擾民之都司請革職審辦一摺都司鄒至賢疊次縱兵索詐並鎖禁平民得贓釋放藐法已極鄒至賢著即革職拏問交該督嚴訊獲贓確數先將該革員貲產查抄按律定擬具奏○又諭錢臻奏緝拏會匪辦理妥速之道廳等懇請鼓勵等語各省地方官拏獲緊要重犯該督撫奏請鼓勵朕必量予恩施此案南康縣匪徒李祥誥等拜盟結會乃地方官分應緝拏之事若遽加甄敘各省似此者皆援以為請未免失之冒濫該撫所請將張溶等分別獎勵之處俱不准行○以詹事府少詹事福申為詹事○旌表守正捐軀河南宜陽縣民王拴子妻賈氏四川江津縣民程樽妻段氏○壬寅刑部奏黑龍江將軍松寧違例將發遣廢員王保澄奏請贖罪一摺得旨王保澄係不准減等之犯松寧等前奏請贖

罪不將該犯緣事情節詳細聲敘並違例令於回籍後措繳贖銀實屬朦混王保澄不准贖罪松寧春升保俱著交部議處○癸卯諭內閣御史張元模奏請嚴拏匪類一摺除莠所以安良四民各守本業莫不以無事為福若任劣衿土棍勾通吏役嚇詐取財必致富者蕩其生產貧者虐及肌膚其為害不可勝言著直省督撫各飭所屬州縣嚴行查察如有前項匪徒令紳士耆民合詞舉報立即查拏究治按律懲辦地方官耳目既周則一切教匪逆犯自必無地容身以期詰奸刑暴綏靖閭閻又諭御史張元模奏請整飭書院一摺直省各府州縣設立書院延師訓課原令其講明正學造就人才與學校互相表裏若如該御史所奏各處書院多由本省大吏推薦親友以充院長祇圖索取束脩並不親身到院甚至屋宇坍塌棲止無所殊失教育人材之意著通諭各督撫於所屬書院飭令

隨時修葺務延經明行修之士講習討論毋得濫竽充數致成曠廢○又諭吳邦慶奏商民互毆傷斃多人查拏審辦一摺此案湘潭縣居民與江西客民因口角細故輒聚眾互毆傷斃人命至八九名之多摺內所敘起釁情節殊未明晰著該撫即親提犯證究明為首之人並查拏未獲各犯嚴審確情定擬具奏署湘潭縣知縣毛夢蘭於赴鄉相驗之先該處民人已互相鬪毆乃不即時查拏究辦以致釀成重案實屬溺職毛夢蘭著即革職留於地方協緝至御史石承藻汪進士二人於該縣勘驗後旋赴縣署會面難保無從中請託情弊俱著解任傳至省城質問如查有弊端即奏明革職嚴訊○又諭長齡奏審明匿名揭告回民叛逆重犯請旨辦理一摺撒拉爾回子自乾隆四十六年懲辦後極為安靜該犯楊啟才屢犯偷竊輒挾回民馬包福成等斥辱之嫌捏寫撒拉爾回子謀叛告示

錫刻泥印蓋用其上粘貼營門計圖傾陷奸惡已極該督已將正犯拏獲並起出泥印當堂默寫字跡相符案無疑義此等不法匪徒何待請旨致稽顯戮楊啟才著即處斬傳首撒拉爾回子地方梟示並曉諭該回民等造言誣陷之人業已立正典刑俾各釋疑懼共安耕鑿○命

皇次子智親王旻寧帶領御前侍衛百順蘇爾慎及乾清門侍衛四員往奠故科爾沁貝勒御前大臣鄂勒哲依圖茶酒賞銀五百兩治喪以其姪台吉濟克默特為嗣降襲貝子調禮部尚書松筠為兵部尚書兵部尚書崇祿為禮部尚書禮部左侍郎恩寧為吏部左侍郎以都察院左副都御史和桂為禮部左侍郎以鑲黃旗領侍衛內大臣奕紹為御前大臣兵部尚書松筠為御前大臣兼鑲黃旗領侍衛內大臣正藍旗蒙古都統奕顯為內大臣正黃旗蒙古副都統成寧為正白旗

蒙古都統兵部右侍郎英惠兼正黃旗蒙古副都統○旌卹遇賊被戕雲南稿吾卡土目龍定國妻傅氏等三口如例○甲辰

上幸萬壽山○諭內閣前據巡視南城御史清安等奏拏獲孟二等斂錢聚眾復興鼓鉞會一案當交刑部審訊茲據該部審擬具奏孟二與王孝各約村民演打勝鼓花鉞趕赴廟會且備本年萬壽應差本不在禁例王孝因賒欠張五喫食錢文被其將鼓鉞措留自赴指揮衙門控告該巡城御史祇應將所控錢債秉公判斷乃以該村民自控到官之事輒稱查拏斂錢結會等犯張皇入奏致民人幼孩多遭拖累其屬不成事體案內首先教演之孟二王孝及聽從分邀幼孩之關八田大著照刑部所擬再減一等折責發落其無干之民人幼孩等俱著即時省釋所起鼓鉞給還諭以本年萬壽無須豫備應差不必演習其該城御史著都察院堂官傳到諭知五城

勤飭捕務原令其訪查逋犯乃日久無獲轉
摠拾細事飾詞搪塞以見其留心緝捕殊屬
無恥將該御史等傳旨申飭○予福建出洋
淹斃外委李捷高祭葬世職如陣亡例○緩
徵山東萊陽海陽二縣被雹村莊本年及上
年帶徵額賦並給萊陽縣災民一月口糧○
乙巳旌表守正捐軀河南南陽縣民周理女
周氏○丙午諭內閣右翼監督經徵二十三
年稅務前據普恭於任滿時奏明計少收正
額銀二千六百九十餘兩經戶部覈明按照
向例令前任監督哈寧阿及普恭二人照一
年在任月日勻攤賠繳現既查明哈寧阿任
內所收稅銀尚屬有盈無絀普恭接任後始
行缺額所有短收稅銀二千六百九十一兩
零全行著落普恭賠繳嗣後崇文門及左右
兩翼監督經徵銀兩均著一手辦理如有出
差及降革事故仍著照常經理俟一年任滿
令其自行覈解若有病故及身罹重譴去任

者著接任之員於接收交代時將前任所收
銀數報明戶部遇有前任未經缺額後任始
行虧短者即著落後任賠繳○命本年各省
情實罪犯停止勾決○丁未諭內閣伯麟等
奏南掌國王遣使進貢並呈懇頒賜勅印據
情代奏一摺南掌國自內附以來乾隆五十
九年曾經
頒給勅印嗣因該國王召溫猛懷懦不振流徙
越南經越南國王將
勅印恭繳念其流離不加聲責該國事聽其以
召蛇榮代辦現據召蛇榮之子召蟒塔度腊
虔修職貢願懇再頒勅印著加恩俯允所請
再行頒給以示懷柔○以司經局洗馬陳官
俊為陝西鄉試正考官翰林院編修易禧善
為副考官工部右侍郎陸以莊為江南鄉試
正考官翰林院編修廖鴻藻為副考官○戊
申諭軍機大臣等本日召見周系英據奏湖
南湘潭縣城外向來江西客民在彼貿易者

十居七八。本地居民不過十之二三。各馬頭挑夫。江西人尤多。平日恃衆強橫。最喜滋事。此次與本地居民互毆。原因聽戲而起。江西客民將本地民人闖入公所廟內毆斃無數。浮尸蔽江。當時知縣會營前往查拏。比至公所廟門關閉不放。再三叫門。僅將知縣營官放進。知縣見有許多人被捆。並有將手掌釘在牆壁者。再四開導。始交帶回。知縣將帶回之人悉行釋放。各馬頭挑夫聚集多人。欲行肆鬧。巡撫聞知。始派臬司會同副將帶兵前往彈壓等語。此案前據吳邦慶所奏爭鬪情形。本未明晰。現據周系英面奏該商民爭毆及毆斃人數。與該撫前奏情節不符。著吳邦慶即行身臨其境。不可畏難。將糾鬪實在情形並毆斃人數。確切查明。如果情勢兇橫。將首先聚衆肆橫之人逐一查拏。從嚴懲辦。首犯即行正法。斷不可存化大為小之見。姑息了事。益釀刁風。將此諭令知之。○己酉改雲

南開化府同知為安平同知。知澂江府司獄。為安平同知司獄。裁麗江府經歷。增設文山縣分防縣丞。從總督伯麟等請也。庚戌。

上幸靜明園。詰

龍神廟拈香。○辛亥。諭軍機大臣等。昨據慶保奏。湘潭縣江西客民及本地民人互毆一案。已飭嚴拏首從各犯。因現駐荊州防汛。俟察看水勢情形。再行前往等語。湖南商民互毆之案。前據吳邦慶具奏。聲敘殊未明晰。本

日據御史蔣雲寬奏。稱案內現在就獲十九名。均係本地民人。其客民內並未獲兇手一名。並風聞江西客民將本地居民闖門痛毆。傷人甚多。經別處客民相救放出。嗣後彼此持械糾約報復。尋鬪不已。江西客民復將附近之長沙益陽等處。江西腳夫強悍者。邀去一二百名。幫鬪其勢洶洶。以致關城罷市者數日。本地民人之被毆斃命者。因屍首無著。赴縣喊稟者。有七八十起。並聞江西會館中。

有將油鍋煮人棄屍江內及將手腳釘在牆壁之事等語昨據侍郎周系英面奏其情節亦與該御史所聞相仿此案疊起口角乃至毆斃多命並復輾轉糾鬪實屬目無法紀不可不嚴行懲創吳邦慶軟弱恐誤聽屬員之言將就完案著慶保即由荊州迅速馳驛前往會同吳邦慶將案內緊要人犯按名拿獲嚴訊確情究竟被毆斃命者共有若干人如查明江西客民實有用油鍋煮人及將手足

釘壁之事則為首之犯即應斬決梟示或此內有斃人一家三命以上者則當問擬凌遲慶保查明大概情形先行由驛具奏再將全案從嚴定擬不可存化大為小之見稍涉寬縱將此諭令慶保並張映漢知之○以兵部右侍郎曹師曾署刑部右侍郎旌表守正捐軀江西萬載縣民汪麟生聘妻龍氏守正被戕浮梁縣民女姚氏山東掖縣民高世仲妻車氏士子調福建巡撫李堯棟為湖南

巡撫湖南巡撫吳邦慶為福建巡撫○癸丑遣官祭

火神廟旌表守正捐軀山西臨晉縣民王思讓妻林氏乙卯

上幸萬壽山諭軍機大臣等敦良奏交卸河南藩篆即日起程前赴湖南臬司新任一摺湖南省湘潭縣民與江西客民互相糾鬪一案慘斃多命事關重大昨已有旨令慶保馳往審辦敦良接奉此旨著即馳驛兼程赴任

隨同慶保等將案內人犯確切嚴訊務得實情勿稍枉縱將此傳諭知之○丙辰裁廣東潮州府稅課大使增設豐順縣留隍司巡檢移饒平縣黃岡司巡檢駐柘林大埔縣大產司巡檢駐白猴從總督阮元等請也丁巳上御勤政殿聽政諭軍機大臣等據御史尹佩茶奏稱直隸滄州地方常有盜賊在山東江南河南及本省鄰近州縣往來搶劫或偷竊牛馬令事主出錢贖回其住宅皆係高屋

大慶不露形跡與該州捕役李二黑聯為一氣該州馬村柴村殷村三處最多而馬村同民為尤甚知州竇景燕信李二黑之言常於鄰境緝賊而本境轉不緝拏請飭查辦等語滄州素為盜賊淵藪兼有捕役為之包庇鄰境均受其擾害著方受疇即飭知竇景燕將馬村等處積賊密行訪查該賊匪與捕役李二黑如何交通訪明立即按名掩捕照律治罪不可漏洩風聲致令逃逸將此諭令知之

以大理寺卿齡椿為都察院左副都御史賞熱河被水兵丁房屋修費○戊午

上詣

時應宮

昭顯廟拈香還宮以孟秋時享

太廟自是日始齋戒三日己未諭內閣前據刑部奏書吏誤抄諭旨一案派軍機大臣審訊據抄寫事件之張光裕等供出各王公及內務府大臣前鋒統領護軍統領等每日俱

派有聽事之人探聽事件啟知本管王公大臣除內務府大臣及所派筆帖式等已另降諭旨懲處外宗室王公內有兼職任者所管之事本屬無多前鋒統領等職任亦簡並不若內務府大臣事務繁劇尚有須隨時通知者本不應派有聽事之人即或派人亦祇應專聽本管公事不應令其將召見起數人名及外衙門之事隨時探聽附稟其無職任之王公等並無應辦事件如布蘭泰之患病家

居更屬閒散乃亦每日派人探聽公事尤屬無謂不知其意何居不可不分別示懲肅親王永錫莊親王綿課儀親王成親王貝勒永珠公綿齡奕顯祿義均兼職任慶郡王永璘雖無職任係在內廷行走及前鋒統領載餘護軍統領博啟圖蘇沖阿長慶副都統舒明阿俱著交軍機大臣會同宗人府兵部嚴議具奏其無職任之禮親王麟趾睿親王端恩豫親王裕興克勤郡王尚格順承郡王倫柱

貝勒永錫永鑒綿譽奕繪奕綺貝子奕緒載錫祥瑞公布蘭泰俱著加等嚴議具奏其所派之護衛護軍等係由本管差遣著毋庸議又諭內務府大臣所派聽事筆帖式祇令其接送本衙門公事伊等輒探聽外衙門之事隨時附稟以圖見好實屬多事而各大臣亦不阻止任其隨口混行告知各王公門上細作殊屬不稱職任內務府大臣俱著交軍機大臣會同吏部嚴議筆帖式椿齡長盛九十一嘉樂毓寬璋寶文震嘉惠明山苑副祥綬俱著革職交軍機大臣會同刑部嚴訊尋議內務府大臣各降二級留任得旨英和等依議其革職之聽事筆帖式椿齡等十人俱開復原官交內務府大臣查明同未經供出之聽事筆帖式等一律停升三年又諭朕間行在每日早晚兩起召見大臣官員皆有人按名抄寫並寄回京城輾轉傳抄嗣後著永行禁止如仍有照前抄寫者即行查拏若

寄至京城著留京王大臣查拏均著叅奏革職發往伊犁戶部議准調任廣東巡撫李鴻賓疏報恩平縣開墾田九十九畝有奇照例升科從之庚申除湖北黃梅縣坍沒地四十六頃九十一畝有奇額賦是月湖廣總督慶保等覆奏官設鹽卡相符仍密查私設得旨有官卡必有私設影射圖利勢所不免總在隨時查察不可懈怠新任雲南巡撫史致光奏謝得旨滇省係汝舊治民風較閩省為淳然近來亦頗滋事總在吏治修明上行下效勉之

大清仁宗受天興運敷化綏猷崇文經武孝恭勤儉端敏英哲睿皇帝實錄卷之三百五十九

大清仁宗受天興運敷化綏猷崇文經武孝恭勤儉端敏英哲睿皇帝實錄卷之三百六十

[illegible]

敕修

嘉慶二十四年己卯秋七月辛酉朔享

寶錄卷三百六十六

太廟

上親詣行禮○幸圓明園○諭內閣本日孟秋
時享

太廟朕恭詣行禮明志充當典儀於甫唱飲福受昨時明志即越唱徹饌實屬錯誤明志著革去太常寺少卿降為贊禮郎仍革去頂帶惟於齋戒祭祀之日准其戴用並罰俸三年以示薄懲明志係由贊禮郎出身當差最久不似資淺之員須該堂官等隨時教演所有

太常寺堂官崇祿等此次俱著免其議處嗣後當共加敬慎如再有錯誤不能寬貸○士戍諭內閣朝廷設官分職各有職守分內之事尚且自顧不暇何必旁求他務大廷日行政事自有內閣傳宣布告天下原不祕密必欲先知差人偵探其心不可問矣至於日日召見內外大小臣工乃我朝之善政良法永遠奉行切勿急忽若前明專任中涓宰相皆不識面淪胥以亡可不戒乎孰意近來惡習

實錄卷三百六

二

竟將按日召見人名先後次序各處報知以為趨奉鑽營之本其心益不可問矣有職守者藉口探聽本任差務而別衙門之事皆推卸於附稟事後遁辭其誰欺乎尤可異者毫無職任閒散王公日日差人偵探政事分旗結伴又假手吏胥非但心不可問而且形跡可疑此內布蘭泰殘廢在家亦差人偵探實屬奇怪至極之事矣若再不力加整頓必致政出多門壞法亂紀朝綱委靡不能救藥揣

實錄卷三百六

三

摩迎合苟蠅營成何政體乎朕兄儀親王年已七十有四精力漸衰所管之處甚多恐有貽誤是以差人探聽况素常並非喜於探聽事務朕自知之總因年長之故其情可原朕不忍勞煩長兄有失頤養祇留內廷行走以昭恩眷平日不必入直惟典禮朝賀筵宴迎送等事再進來行走所有各項職任全行開缺另派人管理成親王前已獲咎此次同儀親王俱著寬免以示友于議親王之至意其餘所有有職任之肅親王永錫等各折罰王貝勒公倖六年不兼職任之禮親王麟趾等各折罰王貝勒貝子公倖十二年載銓等依議所有各家聽事人等本應全行斥革此次姑從寬免自今日始王公大臣再有探聽召見起數及任外公事者本人革職探聽之人發往伊犁朕言不再各宜凜遵特諭○又諭伯麟等奏拏獲爭鬪毆斃多名首從各犯審明定擬一摺此案袁文儒等以爭鬪起釁糾

衆聚鬪毆斃及落水淹斃者共有六十餘命之多滇省風氣素淳今亦有此糾鬪之案不可不嚴辦示懲袁文儒糾衆謀毆手斃三命情殊兇惡著即依議斬決谷小羊袁文耀許卓毛恩兆毛秉良五犯各斃二命鬪情亦兇死非一家罪應絞候本年降旨停勾將來勾到時亦必勾決谷小羊等五犯俱著即行處絞餘俱照所擬辦理○調正白旗漢軍都統松筠為正紅旗滿洲都統以鄭親王烏爾恭阿為正白旗漢軍都統○甲子諭內閣國家神武開基清語騎射乃滿洲舊俗根本重務必當萬年無忘是以巡幸盛京最為鉅典我皇考高宗純皇帝曾因親詣盛京垂諭後嗣當瞻懷遼瀋舊疆再三周歷或無識臣工妄以為不宜當律以悖命之罪誅之無赦其次即木蘭秋獮肆武習勞亦必當恪遵成憲永守勿怠

皇考聖製避暑山莊後序追述聖祖仁皇帝始建山莊所以詰戎綏遐崇樸愛物之義世宗憲皇帝聖訓後世子孫當習武木蘭無忘家法並申諭以敬告後人若後人而忘予此言則與國休戚相關之大臣以及骨鯁忠直之言官執予此言以諫之可也煌煌聖訓昭垂奕禩上年朕東巡祇謁三陵松筠因畿輔小旱上章阻止此奏若出於他人朕必律以悖命之罪即予正法因松筠身為首輔且素有忠悃中外之人皆可諒其無他故祇以降謫示懲曲從寬典木蘭秋獮皇考慮及後嗣之不能式循尚有望於忠諫設有從而阻止者亦不可不嚴示罰懲茲特明降諭旨嗣後每歲舉行獮典或偶值天時水旱朕心自有權衡如此次降旨啟鑒屆期適遇大雨橋座被衝即降旨改期並非因人奏

諸儻有無識之徒敢於朕前建言阻止者必將其人立予革職發往伊犁以為阻撓大典委靡不振者戒朕言不再凜之勿忽○又諭昨因各王公大臣派人探聽分外公事業經降旨分別示懲其派出聽事人等本身並無差使紛紛擅入禁門總由門禁不嚴所致所有景運門隆宗門後左門後右門及圓明園大宮門東西如意門清茶房膳房乾肉庫各門應如何嚴密稽察之處著軍機大臣會同前鋒護軍統領管理圓明園大臣妥議章程具奏尋議仍照嘉慶十六年舊議章程遵行從之○以福建道御史龔鏗為河南鄉試正考官翰林院編修劉斯崐為副考官侍講學士彭邦疇為山東鄉試正考官編修宮煥為副考官編修陳鴻為山西鄉試正考官檢討戚人鏡為副考官○乙丑諭內閣昨因嚴禁奏事門外探事惡習雖經降旨通行飭禁若不定立章程恐日久仍前任意探聽妄為傳

宣王大臣等如於奏事之日各帶一人在門外靜候豫備該王大臣召見尚可若無故交頭接耳議論官事殊屬非是著交御前大臣於每早未散之前由乾清門侍衛內著派二人宮內在乾清門階前圓明園在奏事門外留心稽查儻有任意探聽官事傳說召見大臣人數者即行查拏告知御前大臣詢明據實參奏○又諭定例附近場竈地方貧難小民老幼殘疾及婦女孤獨者准其挑賣零鹽原為體恤貧民之意其非產鹽處所不在此例若以少壯民人及並非產鹽處所紛紛售賣即與私鹽無異其匪棍梟徒勾雇貧民分拆零售甚至擔上插牌書寫奉旨字樣尤屬送刁不可不嚴行飭禁嗣後附近場竈處所例准挑賣之人仍准其挑賣每日亦祇准一次不准更番出入其餘著概行禁止如有擔上書寫奉旨字樣者立即查拏除治其販私之罪仍將擅寫奉旨加等治罪以儆刁頑

丙寅諭內閣步軍統領衙門五城有緝捕之責。因未獲逆犯日久稽誅降旨飭令認真偵緝該衙門官弁兵役等惟應密訪確查以期拏獲真正要犯翦除遺孽乃弋獲無期輒將不必查拏之人撫求充數具摺奏聞以見其勤於訪緝藉此塞責即如前此南城御史秦拏獲擊打鼓鉞村民一案已屬無謂本日刑部奏訊明步軍統領衙門盤獲湖南生員鄭國貞欲行呈遞萬年頌一案更覺無謂該生因朕六旬萬壽妄希恩澤擬就頌論疏表未諳款式進京欲先求同鄉京官閱看若不違例再行呈遞乃甫至廣寧門外店內即被盤獲拘解生員呈遞封章例應科罪此非封章可比況尚未呈遞則係無罪之人七月以後此等獻詞賦之人恐益衆多若該官兵等遽行搜索拘禁豈不太涉紛擾嗣後步軍統領衙門五城惟當各飭所屬密訪逆犯早期緝獲以正刑誅不得妄拏平民徒滋擾累○戊

長旌表守正捐軀直隸河間縣民劉義妻高氏○賞修墊蹕路橋道滿洲綠營兵丁一月錢糧民夫每名銀二兩○己巳移山東汶上縣縣丞駐馬村集並鑄給印從巡撫程國仁請也○庚午

孝懿仁皇后忌辰遣官祭

景陵○諭內閣方受疇等奏蘭溝白河等處橋座因盛漲未消難以剋期竣工一摺本年秋雨連綿山水異漲各處搭造橋工已成復銜

者業經數次現在蘭溝白河橋座十二日啟鑿以前不能剋期竣工即再展三四日恐亦未克趕辦齊全著改於二十日啟鑿駐蹕避暑山莊本年回部及哈薩克等於八月初旬來至熱河祝嘏屆時尚有應行宴賚禮儀其木蘭獮典雖係重大切要但往返程途數計日期已屬不敷此次著停止進哨二阿哥四阿哥奕緯阿哥俱毋庸隨往熱河八月二十六日自熱河啟蹕九月初三日迴蹕圓明園

○以前任廣東水師提督童鎮陞為江南提督○予故江南提督馬瑜祭葬如例○辛未刑部議覆調任雲南巡撫李堯棟疏報民人劉得深強姦室女呂氏一案得旨此案劉得深強姦室女呂氏已成致該氏羞忿自盡實屬淫惡事犯在上年六月本年又值停勾未便令該犯久稽顯戮劉得深依議應斬著即行處決餘依議○緩徵山東海豐縣被潮地方本年及上年額賦○壬申諭軍機大臣等

見有骸骨甚多令人用筐盛載移棄江中今據該撫奏江西人糾鬪之時實有以紅帶為記之事該撫親赴江西公所驗得捆縛人之空屋牆壁及地埕並無血跡堂屋及涼亭石欄見有血痕訊據住持僧福申供係是日衆人宰豬煮食有血濺污至壁上有手掌血跡係江西人頭顱被傷用手擦血抹壁所致勘辨並無釘痕其江西公所曾於夜間有多人執持火把肩挑水桶數擔傾入江內因慮有情弊當雇人伏水撈摸撈得骨殖數塊驗係畜骨並非人骨並據僧福申供是夜公所赴江邊挑水恐被本地人攔毆是以多人執火將廚下污水挑出換回淨水並無別情該撫所查亦皆與傳聞不符又周系英續奏傳聞江西公所於糾鬪之日先有妖僧畫符數百道環列於廳屋地上先縛湖南人倒懸於屋梁之上砍落其首頸血徧灑符紙令所糾之人各懷符一道仍將餘血沖入酒內共飲始

行毆鬪事後此僧旋即逃逸以上各情節吳邦慶摺內均未敘及著慶保督率敦良即據實確查案內因毆斃命者究竟共有若干人即或棄屍江內打撈無蹤亦必有屍親鄰右人等可以根訊壁上血痕是否釘掌遺跡煎人油鍋是否現存廟內鍋之大小若何江中撈摸之骨是人是畜該縣曾否有令人移棄骸骨之事均無難驗訊明確所傳妖僧果否實有其人該督提到案內人證逐一研訊孰真孰偽均須水落石出不可一字含混此案釁起嘲笑積成仇隙互相毆鬪或係江西客民強橫本地居民受虧因而造播謠言遂不免張大其詞其地方官慮干處分又存化大為小之見兩造所言均有不實該督務當秉公持平據實查辦不可稍有絲毫偏倚以成信讞而服衆心至該處商賈輻輳挑夫入衆素好逞兇糾鬪該督於此案審明後並著妥議章程嚴行約束以靖地方將此諭令知之

○旌表守正捐軀安徽六安州民余東山媳許氏雲南南寧縣民呂維壁女呂氏○癸酉諭內閣朕屢經降旨訓飭內外衙門力除因循疲玩於應辦事件隨時清理不可稍有積壓乃近日各衙門仍未能全行振作即如昨日順天府具題嘉慶十四年繙譯會試場內供應錢糧一本為數本屬無多即戶部兩次駁減亦不難計日覈辦乃遲至十年之久方再具題實屬不成事體該府尹等著傳旨嚴行申飭此本內部駁二次該衙門各於何年月日接到均未聲敘亦屬有意含混嗣後凡經各部駁查覆題之本俱著將於何年月日接到部文之處聲明以憑查覈其有遺漏者著該部即行查叅○又諭朱勲奏審明知縣短價易銀並棍徒擾害一摺此案趙廣珠屢次擾害良民復挾不准充當行頭之嫌咆哮公堂起意糾衆罷市把持挾制情殊兇惡趙廣珠著在犯事地方枷號半年滿日再發極

邊足四千里充軍解任保定縣知縣張學潮著交部議處餘俱照所擬完結○又諭朱勲奏審辦逆倫重犯一摺此案張徐氏因顧倫常翁媳通姦致伊夫殺死伊翁罪陷惡逆此等淫亂之婦審明後亦應即正刑誅張徐氏毋庸再交部議著即處斬餘俱照所擬完結○旌表守正捐軀河南寶豐縣民劉炳女劉氏○甲戌

上幸萬壽山○諭軍機大臣等張映漢奏審訊

王起洪控告陳孔彰等勾串伊子王文斗謀

逆大畧供情一摺此案王起洪所控結黨謀

逆之陳孔彰程玉寧王國松王文斗等已據該撫密委文武官弁悉數拏獲並查明各家所住房屋間數細搜均無收藏器械旗幟及不法字據提訊陳孔彰等實係莊農度日並無結盟謀逆情事僉供王起洪因逼姦伊媳程氏不從程玉寧係伊媳之祖陳孔彰王國松等係屢次從中理卞勸處之人因此一併

被控王起洪誣告人叛逆罪本應死茲復訊出該犯在家幾倫傷化行同禽獸因不遂所欲輒捏造謀為不軌重情陷害多人此等淫惡兇狡之徒豈可復留於人世該撫一俟王起洪解到即親提陳孔彰等與之當面質對如供證確實即將王起洪一犯先行斬決在於本境梟首示衆再將審擬全案供情照例具奏將此諭令知之○以甘肅鞏秦階道德奎為河南按察使○乙亥中元節

上詣

安佑宮行禮○遣官祭

永陵

福陵

昭陵

昭西陵

孝陵

孝東陵

景陵

泰陵

泰東陵

裕陵○遣官祭

孝淑皇后陵寢○遣官祭

端慧皇太子園寢○丁丑旌表守正捐軀直

隸河間縣民馬德成女馬氏四川安岳縣民

蕭世光妻漆氏○戊寅

上幸靜明園○旌表守正捐軀直隸永清縣民

王五妻王氏○賑直隸密雲灤平二縣被水

災民並給房屋修費○己卯

上詣

安佑宮行禮○諭內閣李鴻賓奏漕標分發員

弁過多請將掣發武舉捐發備弁暫停一年

等語所奏甚是漕標分發員弁原備隨幫差

委今留標之員多至二百數十人而催重押

空等差至多不過百餘人即已數用若再每

年分發數十人益形壅滯閒居日久易啟夤

緣一經差派必多需索大為漕務之累著該

部即將漕衛掣發武舉並捐發備弁停止一

年如仍形壅滯再停一年均無不可俟人缺

疏通後該漕督再行奏請發往○庚辰

上以秋獮木蘭自圓明園啟鑒○命肅親王永

錫大學士曹振鏞章煦尚書英和和寧留京

辦事○兵部右侍郎英惠以管道懶惰降三

等侍衛調理藩院左侍郎常英為兵部右侍

郎轉理藩院右侍郎博啟圖為左侍郎以內

閣學士裕恩為理藩院右侍郎○以禮部左

侍郎和桂兼正黃旗蒙古副都統○免蹕路

經過由京至古北口地方本年額賦十分之

四由古北口至熱河十分之五○是日駐蹕

南石槽行宮○辛巳諭內閣朕昨日啟蹕由

圓明園至清河一帶京營地面道路泥濘難

行據英和自請同翼尉等一併嚴議連日陰

雨積水一時宣洩不及情有可原惟該處道

路伊等平日並不留心修治僅於臨時除墊

難免辦理不善之咎翼尉奎亮富僧額委協

尉額勒錦步軍校伊勒通阿俱著罰俸二年
英和著罰俸一年均免其交部嚴議其由大
東門至清河道路著於本年冬間察勘高阜
處所另行修墊○又諭管道大臣英惠已革
去侍郎副都統降為三等侍衛若僅將管道
官員降級兵丁等重責不足示懲除虎槍長
富寧外將烏鎗護軍校崇興守備馮成貴兵
丁等一併革退各回旗籍以示懲儆○是日
駐蹕懷柔縣行宮至甲申皆如之○壬午諭

實錄卷三六〇

十八

軍機大臣等那彥寶奏永定河北岸二工南
岸四工漫溢情形一摺前因永定河水勢盛
漲特派那彥寶前往查看茲於二十日午刻
北二南四兩工同時漫溢著派吳璥那彥寶
分投籌辦各將水勢情形口門丈尺及水歸
下游淹浸何處先行查明各自具摺奏陳其
所需工料銀兩亦各自約計數目先行奏明
由部庫撥給以便籌備料物定期興工將此
諭令知之○癸未諭內閣前因傅瑞祥一案

誤抄諭旨究出該王公等各派有護衛探聽
公事當降硃諭將該王公等分別罰懲嗣於
召見廷臣時詢及俱奏稱各王公等派人聽
事相沿已久並非始自近年其最後襲職之
王公貝勒貝子等多係年幼之人該護衛沿
習探聽向其稟知伊等並不解係不應為之
事且前此各護衛姓名俱由薩敏供出其薩
敏有未經指實者或知而不言者或竟不認
識者該王公等俱俸免罰懲亦未為平允所

實錄卷三六〇

十九

有原折罰俸十二年之禮親王麟趾等著加
恩改罰王貝勒貝子公半俸六年原折罰俸
六年之肅親王永錫等著加恩改罰王貝勒
公半俸三年儀親王成親王於此事前已加
恩寬免罰懲慶郡王永璘原折罰郡王俸六
年著加恩寬免四年改罰半俸二年○甲申
諭軍機大臣等本日據英和奏永定河漫水
下注由宛平縣屬之高立莊蘆城村東流已
至南苑西紅門黃村門牆外尚未灌入苑內

現已派員防守並行知順天府府尹派員查看等語永定河漫水下注所淹全係順天府屬地方英和已派員往查豈劉鏞之等尚未聞知乃並未陳奏本日劉鏞之因署理三庫具摺謝恩亦未附片奏及實屬怠玩劉鏞之前次兼管順天府尹朕啟鑒後因未奏緝捕情形獲咎降黜茲復加恩用為左都御史仍令兼管府尹於所屬地方被水不迅速查勘具奏其因循疲玩習氣仍未悛改著傳旨嚴

憲集卷三十三

二十

行申飭該府尹等接奉諭旨即著汪如淵前往被水處所詳加履勘水面寬有若干深約若干下游淹浸係何地方一面將水勢情形據實奏聞一面查明被水村莊應行撫卹之處奏請施恩將此諭令知之○旌表守正捐軀江蘇丹徒縣民蔣從松妻張氏○乙酉諭內閣禧恩奏參貽誤要工之府縣請交部嚴議一摺署清河道保定府知府沈華旭棄瑕錄用仍不奮勉即著革職密雲縣知縣平和

著革職此二員交吏部存記永不敘用○又諭永定河道李逢亨經理河務是其專責本年永定河漫口雖由水勢異漲該道不多備料物以致搶護不及咎無可辭李逢亨著即革職交吳璥等飭令專辦南四工漫口如能堵築迅速工竣後奏明再行酌量施恩○諭軍機大臣等據那彥寶奏永定河北上頭工水勢漫溢側注口門約三百餘丈已掣動大溜七分等語前因永定河北二南四兩工同

憲集卷三十三

二十一

時漫溢降旨令吳璥那彥寶分往籌辦現在北岸上頭工漫口三百餘丈該工地處上游既已掣動大溜河不兩行北二工漫口自己匪歸一處其南四工漫口諒必水淺掛淤此時吳璥不必前往南四工所有北上頭工漫口即交吳璥那彥寶二人會同辦理務同心共濟妥協籌商以期迅速歲功李逢亨業已革職其南四工漫口易於堵築著吳璥等即飭知該革員令其前往專辦此處工程以贖

前愆。如果愧奮出力。工竣後再行酌量施恩。
○又諭英和奏永定河水勢漸長。由三岔口頭工洩出。將南苑西紅門外迤南牆垣衝壞八丈餘。水入南苑。有高米店等村難民數百名逃奔海子。現今移赴西紅門內。暫為存身。備給口食等語。現已有旨。派韓鼎晉奎耀汪如淵前往籌辦。撫卹著即由廣儲司撥銀一萬兩。交伊三人帶往妥為辦理。至南苑牆垣被水衝潰。溢入苑內。圍河及南衙門兩處地勢較低。恐不免有浸灌情形。英和不能親往。著傳諭長中。逐加查勘。隨時報明具奏。其進苑之水。經由何處流出。一併查明覆奏。○又諭據劉鏞之等奏永定河漫水下注。大興宛平兩縣所屬求賢高米店等村。同時被淹。村民男婦盡赴南苑土堆避水。逃生等語。永定河漫水下注。被淹村莊小民。蕩析離居。情殊可憫。亟應設法撫卹。現已有旨。由廣儲司撥銀一萬兩。著韓鼎晉奎耀汪如淵。即帶銀前

平糶事宜

三

赴南苑內外被水地方。或散給口食。或折給銀錢。並於附近高阜處所。搭蓋棚廠。曉諭現在南苑避水貧民。以苑內係屬禁地。今已搭有棚廠。可供伊等棲止。令其遷移就食。務各盡心撫卹。勿令失所。為要。將此諭令知之。○以刑部右侍郎廉善署戶部右侍郎。○以辦理白河橋工。妥速。戶部左侍郎禧恩下部議敘。在工出力員弁。升擢有差。賞兵丁半月錢糧。○是日駐蹕密雲縣行宮。○丙戌。以光祿寺卿潤德為大理寺卿。○是日駐蹕羅家橋行宮。○丁亥。諭內閣御史李遠烈奏秋讞屆期。請申門禁。以防探聽。一摺。秋審招冊及朝審人犯。九卿科道。於天安門朝房內會同覆覈。其中有改重為輕。改輕為重者。彼此簽商。原係公同定議之事。有何人必欲先知。從而探聽。即使探聽得知。亦何關於獎罰。至東西長安門在官人役。例得出入。亦與內廷禁門迥別。該御史所奏。甚屬無謂。著毋庸議。○諭

平糶事宜

三

軍機大臣等據英和長申奏永定河漫水溢入南苑情形並現在籌辦避災難民事宜劉鏐之韓鼎晉等奏派員查勘被水村莊及領銀籌辦撫卹各一摺現在漫水浸入南苑草甸熟地水勢漫溢寬至六七里深至三四尺著英和俟漫水稍消遠派善於乘騎員弁赴該二處行宮詳加履勘情形據實具奏至苑內避災難民一千數百餘名英和等於未經接奉諭旨之前已派員於高阜處所搭蓋席

實錄卷五十五

五

棚散給口食所辦甚是甚合朕心著韓鼎晉奎耀即在苑內將給發廣儲司銀兩專辦該處難民撫卹事宜長申亦即在彼會同韓鼎晉等妥協料理如查明園河南衙門行宮有被水情形長申自往辦理行宮事務韓鼎晉奎耀俟將各難民撫卹安全移出苑外再回本衙門辦事此次北頭工漫口三百餘丈下游被災之區必不止數十村莊汪如淵係順天府尹不必會辦南苑撫卹事宜著即

親往下游被水地方督率同知何貞甯雲鵬等周歷查勘漫水流及何處即查至何處將被災輕重情形詳細勘明應如何賑卹之處會同劉鏐之據實具奏不可稍有隱漏以副朕軫念災黎至意將此諭令知之○免直隸灤平縣被水地方本年額賦十分之五○是日駐蹕要亭行宮○戊子以辦理潮河橋工妥速直隸提督徐錕下部議敘在工員弁升擢有差賞兵丁半月錢糧○是日駐蹕兩間

實錄卷五十五

五

房行宮○己丑諭內閣朕昨經由古北口一帶地方乘馬目擊被水村莊情形較重深堪矜惻前已降旨加倍撫卹外省疲玩性成動輒累月經年若俟保定藩庫撥銀到日再行散放轉乎溝壑者益衆矣著派內閣侍讀學士嵩安率同灤平縣知縣先領行在廣儲司庫銀三千兩即日前往被水各村莊按依灤平縣原報戶口清冊遵照前降諭旨分別大小口先行散給俾災黎早沾實惠用副朕恩

膏速逮至意其房間修費地方官續行放給
所有動用廣儲司銀兩由熱河道庫撥還俟
藩庫解到時再歸道庫之款其該縣原報簿
冊即著照錄一分先報行在軍機處以備查
覈○又諭給事中周鳴鑾奏永定河同知擅
離職守致有漫工並請令防汛員弁照黃河
之例於霜降後具報安瀾一摺著吳璥那彥
寶即傳訊石景山同知馬金陞因何於七月
十三日先行回署並詢問在工員弁人等如
果屬實即將馬金陞革職仍責令在工効力
至永定河向於白露節奏報安瀾北河情形
與黃河不同若改至霜降未免過遲著改於
秋分後奏報安瀾○又諭慶祥奏審明豐次
發塚開棺人犯請旨辦理一摺此案遣犯朱
子平起意為首糾約趙曾保等連挖五塚較
之從前僧淡然連挖三塚者情尤兇慘慶祥
既知有淡然一案審明即應將該犯處決何
待請旨辦理朱子平趙曾保俱著即處絞餘

實錄卷三十一

三十一

著照所擬完結○旌表守正捐軀直隸長垣
縣民劉國興媳宋氏河南睢州民孟玉章妻
蔡氏○是日駐蹕常山峪行宮

實錄卷三十一

三十一

大清仁宗受天興運敷化綏猷崇文經武孝恭
勤儉端敏英哲睿皇帝實錄卷之三百六十

大清仁宗受天興運數化綏猷崇文經武孝恭勤儉端敏英哲睿皇帝實錄卷之三百六十一

纂修官 禮部尚書 李鴻藻 吏部尚書 王鼎 戶部尚書 呂志恒 刑部尚書 王德榜 工部尚書 王 兵部尚書 王 禮部尚書 王 吏部尚書 王 戶部尚書 王 刑部尚書 王 工部尚書 王 兵部尚書 王

纂修官 禮部尚書 李鴻藻 吏部尚書 王鼎 戶部尚書 呂志恒 刑部尚書 王德榜 工部尚書 王 兵部尚書 王 禮部尚書 王 吏部尚書 王 戶部尚書 王 刑部尚書 王 工部尚書 王 兵部尚書 王

纂修官 禮部尚書 李鴻藻 吏部尚書 王鼎 戶部尚書 呂志恒 刑部尚書 王德榜 工部尚書 王 兵部尚書 王 禮部尚書 王 吏部尚書 王 戶部尚書 王 刑部尚書 王 工部尚書 王 兵部尚書 王

纂修官 禮部尚書 李鴻藻 吏部尚書 王鼎 戶部尚書 呂志恒 刑部尚書 王德榜 工部尚書 王 兵部尚書 王 禮部尚書 王 吏部尚書 王 戶部尚書 王 刑部尚書 王 工部尚書 王 兵部尚書 王

纂修官 禮部尚書 李鴻藻 吏部尚書 王鼎 戶部尚書 呂志恒 刑部尚書 王德榜 工部尚書 王 兵部尚書 王 禮部尚書 王 吏部尚書 王 戶部尚書 王 刑部尚書 王 工部尚書 王 兵部尚書 王

欽修

嘉慶二十四年乙卯八月庚寅朔諭內閣今

嘉慶二十四年

上

日馬雖失足朕躬尚安蘇爾慎當即將馬牽住甚為合宜著加恩賞給都統阿那保百順博多歡三員俱係試馬之人若不稍治其罪伊等心轉不安阿那保係為首試馬之人著革去都統加恩作為副都統阿那保百順博多歡俱著罰俸一年阿勒精阿僅止安馬毋庸議處此馬平時尚好但腿微軟今因泥濘失足著作為內殿馬○以鑲紅旗蒙古副都統蘇爾慎為鑲藍旗蒙古都統降鑲藍旗蒙

古都統阿那保為鑲紅旗蒙古副都統○是日駐蹕喀喇河屯行宮○辛卯上至熱河詣

永佑寺行禮○諭軍機大臣等據葉觀潮奏黃河異漲考城舊南隄普律平漫刷有溝槽多處正在搶辦聞河水忽落五尺餘寸隄頂洶露溺查至下北蘭陽交界遙望南岸現有漫口掣動大溜約在蘭儀廳境內河中上下並無船隻往來南岸文報七日未通等語本年

黃河盛漲較之往年多至丈餘現在東河南

上

岸既有漫口掣動大溜看來情形較重著吳璥即帶同張裕慶並於發往差委之滿洲司員內酌帶一員一併馳驛前往東河漫口處所會同葉觀潮琦善相機籌堵其永定河漫口本係方受疇該管地方著那彥寶即會同該督妥協籌辦張裕慶於河務素為熟悉著吳璥酌量如北河緊要將該員留於北河另帶滿漢司員各一人前往若東河情形較重

仍帶張裕慶前往東河以期得力。總以公事為重。不可稍存私見也。將此諭令知之。○賞熱河接駕兵丁及看守避暑山莊弁兵。一月錢糧。蹕路經過看守各行官弁兵。半月錢糧。賞熱河及額魯特兵丁半月錢糧。○是日駐蹕避暑山莊。至甲寅。皆如之。○壬辰。秋分夕。月於西郊。遣皇三子惇郡王綿愷行禮。○遣官祭黑龍潭。

昭靈沛澤龍王之神玉泉山

書集卷五十一

三

惠濟慈佑靈瀘龍王之神昆明湖

安佑普濟沛澤廣生龍王之神密雲縣白龍潭

昭靈廣濟普澤龍王之神○遣官祭圓明園

惠濟祠

河神廟○諭內閣。朕本年六旬慶辰。各王公大臣官員等。呈進膳品。沿襲舊儀。但人數過多。亦應予以限制。茲特先期降旨。王公大臣內儀親王。成親王。慶郡王永璘。定親王綿恩。

肅親王永錫五人。綿恩。奕綸。奕緒。奕繪。奕綺。載錫六人。住京之御前行走蒙古王公進京祝嘏之御前行走蒙古王公御前大臣軍機大臣內務府大臣南書房翰林俱准其分日呈進。此外各部院尚書侍郎都統副都統御前侍衛乾清門侍衛批本奏事官員等俱不准呈進。其外省來京祝嘏者直隸總督方受疇向年進膳仍准其備進。其餘將軍督撫鹽政關差各員概不准呈進。如有瀆請者亦斷不能仰邀允准。將來七旬八旬九旬萬壽俱照此為例。○癸巳。遣官祭

書集卷五十一

四

文昌帝君廟○以故杜爾伯特扎薩克鎮國公鄂勒哲依鄂羅什瑚子諾爾布襲爵○以都察院左副都御史善慶為工部右侍郎○以鑲藍旗滿洲副都統穆克登額為正白旗蒙古都統調鑲藍旗漢軍副都統奕經為鑲藍旗滿洲副都統以頭等侍衛烏爾卿額為鑲藍旗漢軍副都統○河東河道總督葉觀

潮以疏防漫口革職以漕運總督李鴻賓為河東河道總督正白旗蒙古都統成寧為漕運總督○旌表守正捐軀江西永豐縣民聶普照妻朱氏○甲午

上御如意洲賜扈從王公大臣蒙古王貝勒貝子公額駙台吉等食賞賚有差○乙未以禮部左侍郎和桂內閣學士吳其彥監臨順天鄉試工部尚書茹綬為正考官吏部左侍郎恩寧工部左侍郎王以銜為副考官○以禮

部尚書汪廷珍署吏部尚書兵部尚書戴聯奎署工部尚書禮部左侍郎和桂署吏部左侍郎戶部右侍郎姚文田署工部左侍郎○旌表守正捐軀山東陽穀縣監生潘旺山媳張氏○命直隸大興宛平二縣被水地方設廠養賑派都察院副都御史齡椿等十二員督同給放○丙申諭內閣扎拉芬等奏旗營製造火藥轟燒官兵請將失防各員分別革懲並自請議處一摺福州水師營配造火藥

因天氣暑熱石臼擊出火星立時轟發燒斃兵丁工匠多名監造及該管各官猝不及防與遺失火種者不同其情尚有可原驍騎校施德安著免其革職協領烏爾袞佐領李國富張廷樞俱著免其議處扎拉芬瑚松額自請交議亦著一併寬免所有燒斃兵丁七名工匠一名受傷續斃兵丁七名俱著照例賞卹○諭軍機大臣等據琦善奏蘭陽汎十堡水溢埕頂夾塘灌滿八堡大隄登時過水隄

身坐墊於二十四日奪溜成河又據另片奏正在拜摺聞據報陳留汎七八堡交界處所隄頂過水二處隄身墊塌各十餘丈中牟上汎八堡迤下漫水塌隄約三十丈均未致掣溜等語蘭陽漫口既已掣動大溜與昨日琦善所奏情形迥不相同著吳璥李鴻賓接奉諭旨迅即馳驛速赴蘭陽漫口處所查看情形口門共有若干丈尺現在大溜全歸此處最為緊要大工即專交伊二人在彼商辦堵

築事宜。其祥符六堡及陳留中牟三處漫塌隄工。俱交琦善搶辦。琦善本於河務素未諳習。昨已寬免議處。此次自請嚴議之處。仍著加恩寬免。該撫惟當倍加奮勉。將三處漫工迅速堵合。尚可以功抵過。此係交伊專辦之事。若不能經理妥善。不能再邀寬貸也。至北岸考城舊南隄漫水之處。著吳璥等即飭知葉觀潮。令其專司堵築。効力贖罪。一經堵合。葉觀潮即趕赴南岸。聽候吳璥等差委。其被水地方。應行撫卹各事宜。琦善即督率藩司認真妥辦。勿令災黎失所。將此諭令知之。○丁酉祭

先師孔子命

皇次子智親王行禮。○諭內閣太常寺祀典攸關。一切禮儀。俱應恪恭將事。該寺屢以愆儀獲咎。朕疊加懲處。猶復曲予恩施。乃仍不知敬畏。此次致祭。夕月壇派三阿哥行禮。致祭時既無導引官。

盥洗處又未設盆具。數帛官亦未數帛。種種愆儀。遣官行禮。

神位式憑靈爽無異。該寺於內廷阿哥派往行禮。尚且如此怠玩。廢弛已極。所有導引及豫備盟具。數帛各官。著即查明交部嚴加議處。該堂官俱著交部議處。再本日崇祿等。僅將遲誤盟具司員。奏請交部治罪。其導引數帛各員錯誤之處。俱未查叅。著留京王大臣傳到該堂官等。詢問係何人主見。曲為袒庇。

查明據實叅奏。○又諭崇祿等奏請暫停宗室繙譯鄉試一摺。本年宗室繙譯鄉試。兵部考試騎射者八名。現報患病者七名。僅餘一名應考。殊屬不成事體。本科著停止考試。嗣後總俟足二十名之數。方准奏請入闈。不足二十名之數。仍行停止。○諭軍機大臣等。據葉觀潮奏。查明南岸儀封上汎三堡大隄。現有漫口一百一十餘丈。中間水深四丈餘尺。掣溜約五六分。蘭陽汎八堡大隄。水由東首。

小土壩漫入灌滿內塘。大隄刷成缺口七十餘丈。掣溜約三四分。中間水深三丈餘尺。距儀封上汛三堡僅二十餘里。又據另片奏。下北廳蘭陽汛十一堡東隄頭舊埽三段。接連迤上各舊埽五段。先後蟄塌匯及隄身。情形極為險要。幸隄北灘地尚高。高無刷通跌塘之患。等語。儀封蘭陽大隄。刷成缺口二處。均已掣溜。自來河不兩行。計兩處口門。總須歸於一處。著吳璥李鴻賓接奉此旨。立即馳驛

奏

九

星夜兼程趕赴蘭儀工次。詳加履勘。大溜究竟歸注何處。口門約寬若干丈尺。奪溜實有幾分。其舊河尚存正溜幾分。並祥符陳留中牟三處漫隄過水情形。一併繪圖貼說。先行由驛具奏。其祥符陳留中牟三處漫口。昨已交琦善在彼搶辦。著吳璥等即飭知葉觀潮。前往南岸。幫同琦善將漫隄迅速堵築。現在永定河工次。已不乏人。東河派來之張協鼎王世臣二員。即飭令就近前赴考城及下北

廳搶護北岸漫口。葉觀潮俟將祥符等處漫工堵合。仍赴北岸查勘。張協鼎等所辦工程。俱已穩固。再趕赴蘭儀工次。聽候吳璥等差委可也。將此諭令知之。○命直隸固安永清東安霸州四縣。被水地方設廠煮賑。○戊戌祭

大社

大稷。遣肅親王永錫恭代行禮。○

太宗文皇帝忌辰。遣官祭

奏

長

昭陵。○諭內閣。昨因禮部具奏。宗室繙譯鄉試投考人員八名。將屆考期。報病者七人。僅餘一人。當經降旨。嗣後應繙譯鄉試之宗室等。如人數足二十名。方准考試。若不足二十名。不准考試。顯因本年滿洲繙譯鄉試中式後。新增覆試。該宗室等恐覆試森嚴。是以僅餘一人應試。伊等素不好學。及至應試。倩人代繙。殊不成事。此次姑免深究。著宗人府曉諭各宗室等。凡科場舞弊。其罪甚重。嗣後務須

學有成就。再行投考。儻平素並不勤學。希圖
舞弊。僥倖。經朕查出。惟繩之以法。即宗室亦
不能輕宥也。○諭軍機大臣等。河南蘭儀廳
汛。現有漫口掣溜。業將葉觀潮。疏革。河東河
道總督。簡放李鴻賓。飭令星夜趕赴黃河南
岸。會同吳璥。籌辦堵築。李鴻賓遠在豫省。所
有東境運河漕船回空。以及徽山湖蓄水各
事宜。該河督俱不能兼顧。著程國仁暫行兼
辦。山東運河事務。將催趲回空收蓄湖潴。妥
協經理。仍按照河督向例。將回空出境日期。
湖水收蓄尺寸。隨時具奏。再豫省被水難民
甚衆。開歸二府。與東省曹單接壤。恐災民就
食來東。或被本地匪徒煽惑。該撫往來省西
當督率所屬密行稽查。妥為安撫。不可疏懈。
將此諭令知之。○乙亥。遣官祭
關帝廟。○諭內閣。本年孟秋時享
太廟。朕親詣行禮。明志以唱贊錯誤。獲咎。昨派
三阿哥致祭。

夕月壇導引等官遲誤失儀。本日據二阿哥
奏致祭
文廟。贊引官又復舛誤。太常寺堂司各官。於
典禮重務。屢次愆儀。實屬有乖職守。此次贊
引錯誤之贊禮郎持重。著交部嚴加議處。太
常寺各堂官。著再交部議處。○免直隸固安
永清。東安。三縣水災。本年額賦。並折給口糧
有差。○庚子
太祖高皇帝忌辰。遣官祭
福陵。○辛丑。諭內閣。永錫等奏查明太常寺堂
官查叅錯誤一摺。遣官行禮。向派樂部漢官
導引。此次三阿哥致祭
夕月壇。色克精額等既以樂部漢員未能熟
諳儀節。主令裁撤。又未派有滿員代引。實屬
錯誤。崇祿於數帛聲音。未能聽真。遺漏叅奏。
亦屬咎無可辭。崇祿。色克精額。舒寧。哈寧阿。
俱著再交部議處。其朱繼綬。劉祚仁。二員到
班伺候。該堂官不令導引。並非誤差。著無庸

議○又諭那彥成等奏役力疲乏懇恩調劑一摺大通橋車戶承運漕糧所領腳價應扣出津貼各倉箇兒錢以為橋壩公用本年連次大雨道路泥濘該車戶等添備車輛修墊道路所領運腳不敷辦公係屬實在情形加恩著照所請准其將本年應扣津貼各倉箇兒錢計銀二千六百兩暫免坐扣以紓役力○又諭阮元奏潮橋鹽商續有積欠請酌疏積引一摺粵東潮橋各疲埠逐年正課銀兩均係現商代納其鹽引並未領運拆銷以致應輸捐雜各款遞有積欠除節次展期完繳外自嘉慶十六年起又積欠銀二十三萬餘兩據該督查明該商等本薄力疲新舊不能兼顧懇請設法調劑著照所請准其將二十三年正引展至二十五年秋季起分作六年帶銷先將積引一千零八十程於一年內趕緊拆運統限至二十五年夏季隨同二十四年正引帶運全完其積欠隨引價雜捐輸水

脚等銀二十三萬八千餘兩亦著於限內隨運隨解以清款項而紓商力如逾限再有拖欠即將各商治罪並將運同運司嚴叅以儆惰玩○諭軍機大臣等孫玉庭等奏節交白露河湖各工修防平穩一摺本年黃水異漲長河隄埽各工處處著重該督等此次奏報南河上游既已奪溜旁趨江境隄埽各工自必一律平穩惟蘭儀漫口下注全黃灌入洪澤湖前此湖水已經長逾定誌若再驟添盛漲堰埭臨湖各工在在堪虞著孫玉庭黎世序留心察看先事豫籌其湖口東清禦黃兩壩亟應大加拆展俾清水暢出減洩盛漲既以保護高堰兼可刷滌河身暢達尾閘至清口以上黃河必有斷流停淤之病俟應行抽溝之時該河督相機先期辦理以便黃河歸復故道順軌東流將此諭令知之○壬寅上詣永佑寺行禮○癸卯諭內閣御史張元模奏刑

部分送招冊日期。請議添數日。一摺。刑部辦理各省招冊。於秋朝審前十日。咨送九卿科道等衙門。原議日期已足。數覆勘。茲據該御史奏。刑部咨文於十日前送到。其分送招冊不能盡符十日之限。著刑部遵照原定限期。務將咨文招冊一併趕早分送。俾各衙門得以悉心校勘。以昭慎重。○予告大學士威勤伯勒保卒。贈一等候。遣皇四子瑞親王綿忻。帶領侍衛十員。往奠茶酒。賜祭葬。謚文襄。○命撥北倉米十萬石。分運直隸被水州縣備賑。○甲辰月食。○

上詣

永佑寺行禮。○御卷阿勝境。賜扈從王公大臣。蒙古王貝勒員子。公額駙。台吉。及回部郡王。伯克。甘肅土司等食。至丁未皆如之。○諭軍機大臣等。兵燹奏請調南河將備弁兵幫辦漫口。並加挑下游引河一摺。東河蘭儀漫工。委用需人。已有旨令孫玉庭等將叅將盧順

遊擊張兆二員。派令迅赴工次。並揀派熟悉。檣埽之守備千把十數員。兵丁四百名。交盧順等帶往矣。至下游引河。自應挑挖深通。但江省河身綿長五六百里。若普令下游一律挑濬深通。焉得如許經費。已有旨令孫玉庭等酌勘情形。凡河身淤墊高仰處所。悉令深挑。其餘或閒段抽濬酌量辦理。吳璥惟當將豫省大工事宜盡心妥辦。將來合龍時。河流奔騰下注。自能收以水攻沙之益。不可以全河大局專責之下游也。○乙巳。遣官祭昭忠祠。○丙午。諭軍機大臣等。據琦善會同葉觀潮奏。下南廳祥符上汛六堡。隄北灘面東西共有溝槽八道。東首三道業經堵築。西首上游五道亦經堵築。二道其餘三道尚未斷流。又上南廳中年上汛八堡。大隄刷寬四十餘丈。大溜未掣。惟東西兩面串水溝槽較多。又黃沁衛糧等廳。仍存長水一丈一二尺。高於隄頂處所。仍屬可危。現在分投築埝還隄。以

禦績漲等語。黃水盛漲之年。漫溢亦所時有。從前乾隆年間。及嘉慶年間。屢次漫工。總不過刷開口門一處。本年東河南北兩岸。竟漫口有七八處之多。雖掣溜者止有二處。而過水者比比皆然。是否水勢浩濶。無工處所。人力難施。抑係有工段落。工料不備。防護不力。所致。葉觀潮身任河督。若於有工處所。不能先事籌備。屢屢疏虞。則其玩誤之罪。尚非革職足以蔽辜。著吳璥等會同詳勘兩岸口門。究共有幾處。坐落之所有工。現已堵閉幾處。尚存溝槽幾處。某處溢出之水。所淹係何州縣。確切查明。繪圖貼說。如實係防守不力。即將葉觀潮及廳汛員弁。據實嚴叅。葉觀潮曾為吳璥屬員。不可稍存迴護。其各處口門。或應先儘緊要工段。合力搶辦。或應伊三人分投堵築。吳璥等當悉心籌畫。相機妥辦。朕亦不為遙制。將此諭令知之。○丁未。上御萬樹園大幄次。賜扈從王。公。大臣蒙古王。

貝勒貝子。公。額駙。台吉等食。○都察院奏。浙江烏程縣民凌娘呈遞封章一案。得旨。此案浙江民人凌娘。擅遞封章。條陳各款。其意總係與伊戚吳汝英勾通。冀圖開礦牟利。其餘慎重印信行文。及搜檢夾帶禁止淫詞等款。均係本有例禁之事。撫拾敘入。著交刑部逐款訊問。治以應得之罪。○戊申。諭內閣。阮元奏。請調海疆要缺。知縣一摺。從化縣知縣趙俊。正署各任內。叅罰案件至一百二十餘件之多。潮陽縣一缺。除該員之外。何至即無可調之人。該督違例奏調。著傳旨申飭。趙俊不准調補潮陽縣。並著吏部查明督撫違例奏調州縣叅罰在一百案以上者。應得處分。將阮元照例議處。○又諭。董教增奏。偷運米石。被揭潛逃之署守備請革去世職。嚴拏究辦一摺。池佐清於署守備任內。違禁偷帶米石出洋。迨經委員摘取鈴記。復敢負罪潛逃。玩法已極。池佐清著先行革去雲騎尉世職。迅

速嚴拏務獲究辦其該管鎮將既查知池佐清偷帶米石委員摘取鈐記乃不嚴行管押延至兩旬任其逃匿非尋常疏縱可比無庸交部嚴議代理黃巖鎮事中營遊擊陳琴右營遊擊張君昌俱著即革職交該督嚴審如訊有知情同謀情事即行按例治罪○諭軍機大臣等本日成寧奏接授漕督印務一摺成寧曾任巡撫於外任事宜尚為熟諳但伊前在山西巡撫任內即好為華侈致屬員加意供應因此降黜嗣棄瑕錄用昨以漕運總督一時簡用乏人將成寧補授並賞用頭品頂帶成寧當倍加感激勤慎辦公於操守一事尤應力自檢束現在漕務正當剔除積弊大加整頓之時伊年逾七十所謂及其老也戒之在得不可因係頭品頂帶妄自尊大又復好尚華靡再蹈前轍儻有簠簋不飭之事經朕聞知惟有執法嚴懲不能以其年屆桑榆稍從寬貸也將此諭令知之○乙酉諭軍

機大臣等據葉觀潮奏黃沁廳武陟汛縷隄九堡於初六日河水陡長兼之沁水匯注水高隄頂二三尺縷隄九堡子堰隨築隨塌該處向無埽工隄身已刷寬一百餘丈幸距正河一千七百餘丈僅係灘水漫缺並未分溜其漫隄處所東首及南面黃河進水溝槽五道西首沁河進水溝槽二道趕將通黃溝槽堵斷三道餘仍漏夜趨堵可無掣溜之虞等語前此黃水盛漲黃河南岸漫隄除蘭儀兩處掣溜外其餘過水溝槽甚多茲因沁水匯注武陟汛縷隄九堡又復漫缺該處地當北岸上游現雖不致掣溜若一成漫口河北地方又被淹浸且下注衛河有阻運道吳墩等現在籌辦蘭儀漫口其北岸武陟汛縷隄漫工著即飭知葉觀潮專責成伊趕緊搶辦務期堵築穩固不致又成口門俟工程完竣可保無虞葉觀潮再赴南岸將過水漫隄各小口以次堵合葉觀潮務當奮勉辦理以贖咎

愆此時且暫免治罪。其蘭儀大漫口。吳璥李鴻賓現在俱可到工。著遵照前旨會同琦善妥辦。並通籌全局。次第經理。無負委任。將此諭令知之。○順天府以宗室鄉試中額請得旨取中八名。○改河南汝寧營所屬商城汛守備。隸光州營。鑄給關防。從巡撫琦善請也。

○壬子。

世宗憲皇帝忌辰。遣官祭

泰陵。

上詣

永佑寺行禮。○癸丑。諭內閣。孫玉庭奏織造延隆進京祝嘏。循例請委司庫代理等語。向來江寧織造。每逢督運進京。適值總督防汛。關務即交司庫代理。司庫職分微小。代理關務殊與體制未協。嗣後如遇該織造進京。總督不在省城。著將織造關防及龍江關務俱交江寧藩司就近代辦。此次即著恒敏兼署。○兵部奏議處哈密辦事大臣多山。可否仍留

効力一摺。得旨。本年回部王貝子及土司等前來祝嘏。俱由內地驛站行走。多山獨令博錫爾由草地行走。辦理舛錯。事關外藩朝覲。非尋常錯誤可比。多山著實降四級。回京以六部主事用。○諭軍機大臣等。吳璥奏行抵衛輝。因漫水阻隔。現在覓道趕赴工次。並請調江南淮海道張文浩及丁憂道員嚴煥。赴豫襄辦大工。各一摺。衛輝府屬境內。因黃沁漫水溢注。處處隔水。吳璥現在另覓道路前進。計此旨到時。自己繞道渡至南岸。著即將南岸祥符中牟陳留等處漫隄小口。逐一查勘。即趕赴蘭儀大工。詳加相度。維時李鴻賓自亦馳抵工次。即會同籌商。繪圖貼說。迅速由驛具奏。以慰廑注。至請調道員張文浩等赴豫辦工。張文浩係現任道員。豫省大工緊要。已降旨令孫玉庭等飭知該員。並帶領丞倅佐雜各數員。速赴工次。以資委用。至嚴煥一員。現在丁憂回籍。雖要工需人。亦何至少

此一員。即不能集事。此端一開。恐丁憂人員。藉口奪情。殊與禮制有違。所奏不准行。將此諭令知之。○又諭陳若霖奏嘉興府知府鍾崇儼患病解任調理。另片聲明嘉興府地衝政繁。漕務緊急。恐初任人員不能諳悉。請於通省知府中揀員奏調。即以簡放之員補授。所遺之缺等語。向來省會首府員缺緊要。應於通省知府內揀員調補。今嘉興府係應請旨簡放之缺。若亦揀員調補。轉將簡放之員補授遺缺。此端一開。各省緊要之缺。皆以此為辭。未免紛更成例。所請不准行。嘉興府知府員缺。已有旨簡放。如果新任之員。試看一二年才不勝任。該撫奏請改補簡缺。或揀員與之對調。均無不可。將此諭令知之。○命嗣後盛京戶部官莊六品官缺出。三陵衙門筆帖式。准一體揀選。○賞鑲白旗蒙古叅領福珠隆阿頭等侍衛。為哈密辦事大臣。○旌表守正被戕山西孟縣生員趙凡受。

妻周氏。廣東歸善縣民傅亞長女傅氏。守正捐軀直隸朝陽縣民杜希傳母韓氏。安徽阜陽縣民張全節媳申氏。○甲寅上詣永佑寺行禮。○賑河南濱河各州縣被水災民。○乙卯。上自避暑山莊迴鑾。○詣文廟瞻禮。城隍廟拈香。○諭內閣。劉鏞之等奏賑廠卿員酌商變通事宜。並潤德等奏籌辦粥廠情形。各一摺。大興縣屬岳家務佃子等村。俱因水深阻隔。被災老幼婦女。不能赴廠領賑。該卿員督令地保趕緊搭橋。並飭齋持門牌給領賑米。劉鏞之等酌籌折色散放。河流漫溢。水勢汪洋。非有限岸者可比。安能逐處造搭橋梁。自應酌量水勢大小。或紮筏過渡。或將錢米設法運送。著該府尹等即查明水深道阻各村莊。分飭委員齋帶賑銀前往。按照奏

定章程。分別五口以上四口以下折色放給。所有派辦賑廠各鄉員一體督查。凡有情形似此者。均做照辦理。務令實惠均周。用副朕惠愛羣黎至意。○又諭程國仁奏參臬司溫承惠日益橫恣事。多窒礙一摺。溫承惠在山東臬司任內。自以曾任督撫大員。不肯甘居人下。威福自擅。設立發審專局。調派現任州縣久住省城。造言生事。樹立黨援。又令犯罪之人。四出緝捕。所至嚇詐。頗滋物議。種種恣

書來本言室

宣

意妄為。以致巡撫諸事棘手。本月黃河北岸隄工漫溢。曹縣適當頂衝。程國仁正值入闈。以溫承惠曾辦河工。委令前往查辦。溫承惠荅以此係藩司之事。若委伊往辦。即刻告病。其情形尤為跋扈。溫承惠前任直隸總督。身罹重罪。經朕棄瑕錄用。內由郎中。外擢臬司。一聞黃河漫口。不待巡撫差委。即當自請前往。勉圖自効。稍贖前愆。乃負氣推諉。即此一事。斷難輕恕。且其年已衰老。即罷斥亦無足

惜。溫承惠著即革職。飭令回籍。並不准來京逗遛。○諭軍機大臣等。吳璥奏本年黃河水勢異漲。為從來所未有。入豫境後。訪問輿論相同。俟到工後。查明各漫口。有工無工。遵旨據實參奏等語。本年黃河水勢。雖較向年為大。若謂漫隄缺口。盡係無工處所。其誰信之。吳璥到工後。查明南北兩岸大小各漫口。何處有工。何處無工。其有工處漫口。葉觀潮總司河務各處疏防。皆伊之咎。至廳汛員弁。係

書來本言室

宣

屬何人。如何防護不力。俱逐一查明。指名奏。嚴行懲辦。如吳璥稍有迴護瞻徇。經朕查出。必將吳璥懲處不貸。但不可因有此旨。刻意搜求。將無工之處。亦作為有工。致有屈抑。其琦善奏南岸陳留汛七八堡缺口二處。業已掛淤。祥符下汛六堡缺口二處。亦堵築斷流。祥符上汛六堡中牟上汛八堡兩處漫隄。溝槽均已一律堵閉。惟蘭陽汛漫口溜勢漸移。口門已有八分。其餘溜二分。由儀封漫口

東注。水漸平緩。勢須歸併蘭陽一處。是現在口門。又以蘭陽為最要。著吳璥渡至南岸。將已經堵合各小口。逐一履勘。應如何加幫。後戲鑲築防風之處。均分飭妥辦。以期保護無虞。吳璥即馳赴蘭陽工次。計時李鴻賓亦應趕到。伊三人即會同將蘭陽大漫口。籌商辦理。將此諭令知之。○調江西按察使童槐。為山東按察使。以福建鹽法道孫爾準。為江西按察使。○是日。駐蹕喀喇河屯行宮。○丙辰。

平定縣志

文

駐蹕常山峪行宮。○丁巳。遣官祭賢良祠。○是日。駐蹕巴克什營行宮。○戊午。上至古北口。御黃幄。閱提標弁兵陣操技勇。賞賚有差。○是日。駐蹕要亭行宮。○己未。陝甘總督長齡奏審擬千總金天桂詐贓漁利一案。得旨。此案金天桂以現任千總。輒敢捏詞向蒙古郡王詐得贓銀數千兩。辭官漁利。實屬藐法。金天桂著即處絞。○諭軍機大臣等。據李鴻賓等奏察看蘭陽汎八堡漫口。先經

塌寬七十丈。儀封三堡分溜較多。自初八九日儀封水勢見消。側注蘭陽漫口。溜勢日見泓湧。現已掣溜九分。僅餘一分分注儀封。勢甚微弱。蘭陽隄身愈向東塌。現在水面寬一百八十餘丈。深三丈四五尺至四丈不等。儀封口門仍寬一百一十餘丈。現在水深一丈餘。盡寬五十餘丈。將來溜勢自全歸蘭陽等語。黃河南岸各處缺口。或已掛淤。或已堵合。現在大溜全歸蘭陽。自來河不兩行。蘭陽已成口門。其儀封分溜。不日自當斷流。計此旨到時。吳璥已趕赴蘭陽工次。著即會同籌商大局。即日興工進占。吳璥琦善專在蘭陽督辦大工。李鴻賓即赴儀封。將該處缺口迅速堵合。工竣仍回至蘭陽。與吳璥等會辦。其進占丈尺水勢情形。每隔十日奏報一次。吳璥等務趁此霜清水落之時。督率在工人員。奮勉趕辦。必須於明年桃汎以前黃水未漲之前。先堵築合龍。不可遷延。其北岸武陟漫口。前

經降旨專責成葉觀潮在彼辦理。但葉觀潮係革職之員。不能奏事。著臬司德奎速赴武陟會同葉觀潮辦理。德奎到工後。先將沁水漫溢情形。現在如何搶堵。約計何時可以堵合。繪圖貼說。詳細具奏。該處沁水一日不能斷流。衛河水勢日增。運道不能疏通。著卽剋期搶辦。愈速愈好。一經堵築穩固。德奎卽迅速具奏。以慰廑注。彼時葉觀潮卽赴南岸。聽候吳璥等差委。効力贖罪。德奎自行回省任事可也。將此各諭令知之。○以湖廣總督慶保兼署湖南巡撫。○以湖廣督標中軍副將王福為湖北鄖陽鎮總兵官。○是日駐蹕密雲縣行宮。

實錄卷一百一十五

五

大清仁宗受天興運數化綏猷崇文經武孝恭勤儉端敏英哲睿皇帝實錄卷之三百六十一

實錄卷一百一十五

五

大清仁宗受天興運數化綏猷崇文經武孝恭勤儉端敏英哲睿皇帝實錄卷之三百六十二

監修總裁官禮部尚書臣等奉 上諭旨著禮部尚書臣等纂修

奉 上諭旨著禮部尚書臣等纂修

奉 上諭旨著禮部尚書臣等纂修

奉 上諭旨著禮部尚書臣等纂修

奉 上諭旨著禮部尚書臣等纂修

校修

嘉慶二十四年己卯九月庚申朔遣官祭

歷代帝王廟○諭內閣伯麟等奏捐升知府

之州牧熟悉銅務請留滇補用一摺知州王

栻既捐升知府自應歸部銓選乃該督等輒

以該員熟悉銅務虛詞奏請留滇並聲明試

看一年後遇有知府缺出奏請補用明係因

該員選缺需時特為題補得缺地步此端一

開若各省紛紛效尤將捐升人員率藉審案

辦工為詞奏留本省補用適開便捷之門所

奏著不准行○又諭御史盧炳濤奏河工動

撥銀兩請由工部覈議會同戶部撥款一摺

所奏甚屬迂謬河工每年應領歲修銀兩俱

有定額先期請撥豫備工料須俟事竣報銷

工部方能分別准駁當該省奏請之時工部

本無可覈議至遇有要工承辦大員約計工

需請撥帑項若先交工部覈議該部並未身

親目覩其需用銀款或多或少應准應駁憑

何定議徒然遷延時日轉致有誤要工該御

史太不曉事原摺著擲還○諭軍機大臣等

據御史盧炳濤奏風聞上年糧船回空之時

有杭二幫押空千總李朝均行至黃河地方

查驗水手住宿艙內有一人帶貨二百石恐

船頭太重過閘冒險飭令搬運中艙該水手

抗頑遠颺該弁將其貨物搬挪聲言稟究該

水手等乘夜糾集多人執持刀械蜂擁該弁

坐船行兇拚命千總李朝均從艙底船窗逃

出即將皮箱砍破搶去鈐記衣服而散次日

稟知總運等官並不飭拏究辦等語水手恃

衆抗頑逞兇滋事。實屬藐法。著成寧嚴飭查拏。按律懲辦。此係上年李奕疇任內之事。該漕督無所用其迴護。務秉公嚴究。不可任聽屬員隱諱消弭。致長刁風。○又諭程國仁奏辦理臨清閘口蓄汶敵衛情形。並籌築運河民堰漫口各一摺。臨清閘外衛水現尚高於汶水一尺。該撫已督率道廳等將胡家灣漫口堵合。並將汶河減水閘閉合一二處。蓄高汶水。藉以敵衛。已連次降旨。令豫省將沁河缺口迅速堵築。沁水一經斷流。則衛河必立見消落。再將汶水蓄高。臨清閘板即可啟放。該撫會同成寧相機妥辦。務令回空糧船得以及早南下。不致有誤。明年新運。此為至要。其運河民堰缺口六處。除易堵四處外。德州夏津兩處缺口較大。即飭令各委員上緊搶堵。俾糧船經過不致掣溜阻淺。將此諭令知之。○又諭據吳璥奏查看武陟北岸九堡漫口情形。黃河進水溝槽五道業經葉觀潮等

實錄卷一百三

三

搶築俱已堵閉。斷流惟原村民堰所漫沁水。由方陵草亭折向馬營壩口門下注。現擬於秦家廠迤南王家溝地方抽挖溝槽百餘丈。導引沁水仍由故道匯入黃河。即於迤下灘面較窄之處。趕築柴土壩一道。將方陵草亭下注之水截住。則馬營壩即可斷流。等語。沁河本係入黃之水。今旁溢下注衛河。以致運道梗阻。亟應堵合缺口。使復故道。著德奎會同葉觀潮。即按照吳璥所奏。引沁入黃。築壩攔截。辦法迅速妥辦。沁河缺口早一日斷流。則臨清閘板可早一日啟放。以便回空糧船及時南下。該集司等務督率員弁兵夫。晝夜搶築。愈速愈好。將此傳諭知之。○又諭孫玉庭等奏洪湖水勢異漲。保護堰行長隄。分途宣洩情形。並籌挑江境河身各一摺。洪澤湖水勢自豫省黃河漫水下注。計日增長。又值淮水陡漲。同時匯注。汪洋浩瀚。已經分路宣洩。水勢仍未平減。現值西風司令。堰行隄工

實錄卷一百三

四

實形危險。該督等務當相機調度。並嚴飭在
工員弁晝夜防護。務保萬全。此為至要。至江
境河身自清口以上至豫省。工段綿長。原不
能普律挑挖。該督等即勘明高仰灣曲處所。
照十八年辦理成案。或應挑濬。或應開段抽
溝。將來豫省大工合龍。開放引河時。務期一
律暢順。豫籌妥辦可也。將此諭令知之。○旌
表守正捐軀山東朝城縣民潘成妻趙氏。○
是日。駐蹕南石槽行宮。○辛酉。

實錄卷三六二

五

上御汜漣暉殿。賜扈從王公大臣蒙古王貝勒
貝子公及直隸總督等食。○賞看守湯山行
宮弁兵半月錢糧。○是日。駐蹕湯山行宮。○
壬戌。

上還圓明園。○詣

安佑宮行禮。○諭內閣吳邦慶奏審訊江西商
民與湘潭縣土民互毆一案。正在查辦。聞七
月二十七日。接到侍郎周系英書信一函。不
敢壅於上聞等語。此案現飭秉公審辦。周系

英何以率行致書本省巡撫。著即明白回奏。
○癸亥。諭內閣。本年朕六旬正慶。前據禮部
奏王公百官例於慶節前後穿蟒袍補褂一
月。朕嘗恭閱。

聖祖仁皇帝六旬萬壽盛典。其時祇穿蟒袍補
褂二十日。此次王公百官著自十月初一日
至二十日。亦穿蟒袍補褂二十日。其初一日
以前王公大臣輪應進膳者。是日進膳之員。
著穿蟒袍補褂。餘俱常服。其直日各衙門著

實錄卷三六二

六

於十月初一日起。至初十日止。推班十日。○
又諭據周系英奏稱。因六月間見此案原奏。
與伊鄉人傳述情形迥異。是以致書告知。實
屬冒昧。自請議處等語。直省地方事務。經朕
飭交該督撫查辦。是非曲直。一秉大公。斷不
任其稍有枉縱。若在京大員。於本省案件。輒
致書督撫。思欲庇其鄉閭。豈不漸同明代黨
援陋習。此風斷不可長。周系英私致信函。把
持公務。著交都察院嚴加議處。○甲子。諭內

閣御史保盛條奏一摺所奏俱是地安門外
關帝廟歲時致祭廟外柵欄日久朽缺何以
竟任全行撤去以致往來雜沓漫無禁約著
工部會同步軍統領衙門即派員勘估興修
以肅觀瞻嗣後如再有私行拆動木柵者即
查拏治罪其京城內外各巷口柵欄例有保
固年限著步軍統領五城分段查驗如有保
固限內坍塌損者著落原修之員賠補至京師
戶口門牌原應隨時稽查更正覈實辦理恐
日久生懈並著該管各衙門嚴飭所屬認真
查辦毋得因循疏玩視為具文○命太常寺
少卿桂齡為奉天府府丞兼提督學政內閣
學士吳其彥提督順天學政戶部右侍郎姚
文田提督江蘇學政左春坊左贊善胡敬提
督安徽學政署禮部右侍郎王宗誠提督江
西學政內閣學士汪守和提督浙江學政都
察院左副都御史韓鼎晉提督福建學政大
理寺少卿楊懌曾提督湖北學政左春坊左

實錄卷五十五

七

中允許邦光提督湖南學政光祿寺少卿盧
浙提督河南學政通政使司叅議李振祐提
督山東學政翰林院侍講陳官俊提督山西
學政侍講學士德寧提督陝甘學政編修聶
銑敏提督四川學政侍講顧元熙提督廣東
學政編修熊常鐸提督廣西學政楊殿邦提
督雲南學政袁元善提督貴州學政○乙丑
諭軍機大臣等河南蘭儀漫口即日歸併一
處興辦大工築壩挑河所用人工衆多難保
無奸宄之徒為匪生事更或有在逃逆犯混
跡其中秋冬風高物燥料垛雲集亦應防範
周密著琦善即飭調南陽鎮呢瑪善酌帶兵
四五百名前赴工次駐劄巡邏彈壓毋得稍
有疏懈將此諭令知之○以刑部右侍郎王
鼎署戶部右侍郎○丙寅諭內閣都察院議
處周系英以本省案件致書巡撫請照因事
囑託例革職所議甚是江西客民與湘潭土
民互毆一集周系英屢次在朕前面奏當經

實錄卷五十五

八

降旨令吳邦慶秉公查辦。並恐所奏情形尚有不盡。曾令軍機大臣向伊詳悉詢問。據其所言。飭交本省據實嚴查。周系英如謂吳邦慶初次奏到之摺。與伊所聞情節不符。不妨具摺再行陳奏。案關地方公務。非伊一家私事。朕亦不加深責。乃輒向本省巡撫私致書。誣實屬糊塗之至。本應照例即行罷斥。姑念其素日人尚樸實。學問亦可。周系英著革去侍郎。加恩以編修用。○調兵部左侍郎顧德

實錄卷三六二

元

慶為吏部左侍郎。以署禮部右侍郎王宗誠為兵部左侍郎。仍署禮部右侍郎。○調江西按察使孫爾準為福建按察使。以雲南糧儲道誠端為江西按察使。○丁卯。

上幸靜明園。詣

龍神廟拈香。○幸靜宜園。○遣官祭

都城隍之神。○諭內閣。御史張元模奏請禁回民充當捕役。承差一摺。所奏非是。回民隸居各省。分業四民。久與編氓無異。其有習為

盜竊。或身充捕役。通盜誘賊者。如該御史所奏王明等四犯。一經破案。自當案律懲辦。以戢奸宄。若因此即禁止回民。不令在官充當差捕。試思小民良莠不齊。各直省民人以盜賊犯案者。何地蔑有。豈獨於回民加以厲禁耶。該御史所奏實屬一偏之見。難以施行。著無庸議。○諭軍機大臣等。李堯棟調任湖南。計吏致光到滇後。即可交卸起程。前赴新任。湖南近日訟獄繁多。民情刁悍。李堯棟接任

實錄卷三六二

十

後。當振作精神。加意整頓。其湘潭縣土民與江西客民互毆一案。現派慶保督同敦良審辦。此案江西客民與湖南土民互有殺傷。兩省仕宦在京者不少。江西不聞別有議論。惟籍隸湖南人員。自侍郎周系英至御史蔣雲寬。先後屢經陳奏。皆極言江西客民强悍情形。似湖南民人被其欺凌。負屈不平者。已疊降諭旨。令慶保務須秉公判斷。李堯棟到任。如此案未經審結。即會同慶保秉公審辦。若

已經慶保審擬具奏。李堯棟仍留心察訪慶保等。於審辦此案。是否確實。平允。湖南民人有無怨懟之詞。於一兩月後查明據實具奏。務須公平持論。不可稍有偏袒。將此諭令知之。○旌表守正捐軀江蘇陽湖縣民王紹紳妻陸氏。○緩徵山東曹縣水災本年及上年額賦漕糧。並給災民口糧及房屋修費有差。○是日駐蹕靜宜園。至己巳皆如之。○己巳諭內閣。禮部每年具題。

實錄卷一百一十五

五

皇后千秋。應行禮儀一本。均夾單聲明在外。之公主福晉命婦等。是否進內行禮。請旨。內閣票擬。照例行禮。筵宴及照例行禮。停止。筵宴雙簽。歷屆均係停止。筵宴。嗣後著禮部無庸每年夾單聲請。內閣祇擬照例行禮。停止。筵宴單簽。進呈。惟遇。

皇后正壽之年。禮部照嘉慶二十年之例。仍將公主福晉命婦等。是否進內行禮之處。夾單聲請。候旨遵行。○庚午。

上幸靜明園詰

龍神廟拈香。○還圓明園。○以兵部右侍郎曹師曾。知武舉吏部右侍郎吳芳培。為武會試正考官。翰林院侍讀學士方振。為副考官。○減免直隸隆平寧晉新河任四縣積水地畝本年額賦。○辛未。以翰林院侍讀德遐白。鎔右春坊右贊善廖鴻荃。署日講起居注官。○貸奉天承德遼陽開原鐵嶺牛莊海城廣寧小黑山白旗堡巨流河金州十一處及錦

實錄卷一百一十五

五

州撫民同知所屬被水旗民一月口糧。○壬申。

上御勤政殿聽政。○諭軍機大臣等。朕本年六旬大慶。普免天下節年民欠銀兩。各直省均已查明陸續奏到。惟安徽一省。前據姚祖同奏。稱到任後查明前藩司開報積欠數目過多。恐不肖州縣藉端影射。月餘以來。分別指駁。其玩誤尤甚者。不能不指叅以除痼習等語。此次蠲除夙逋。係自嘉慶元年以來。朕大

賚寰區第一恩旨。原期普惠羣黎。共臻樂利。姚祖同向於錢糧出納稽覈認真。朕所素知。是以擢任巡撫。但糾察弊端。總在於現任各員內詳加查訪。如有以完作欠。侵欺入己者。自當嚴叅懲辦。若虧挪在前。其人已改。輒轉搜剔。不過此時於積欠數內。共計減除若干。將來分別著追。帑項仍歸無著。該撫當仰體朕意。不可以行慶施惠之事。轉致過於苛刻。著即將該省積欠數目。分晰查明。於年內奏

實錄卷三六二

三

到。以便降旨施恩。將此諭令知之。○以奉宸苑卿恒齡為內閣學士。兼禮部侍郎銜。大理寺卿潤德為都察院左副都御史。候補三品京堂海齡為光祿寺卿。○調正黃旗漢軍副都統裕恩為正黃旗滿洲副都統。以工部右侍郎善慶兼正黃旗漢軍副都統。駐藏大臣玉麟為鑲白旗漢軍副都統。○癸酉。上幸萬壽山。○御閱武樓。閱火器營操。○諭軍機大臣等。吳璥等奏黃河北岸王家溝地方

實錄卷三六二

四

溜勢驟向北趨。刷通沁溝。匯注九堡馬營壩口門一摺。黃河南岸蘭儀漫口。尚未歸注一處。今北岸王家溝地方。又復將河脣高崖刷塌。蓋灘北注。刷成溝槽。直通沁溝。匯注九堡馬營壩口門。已塌寬一百六七十丈。掣溜五分有餘。前派葉觀潮專辦北岸武陟漫口。乃甫將溝槽五道堵合。王家溝又復刷通。實屬辦理不善。若不嚴行懲治。何以示儆。著吳璥等。即將葉觀潮先在北岸工次枷號。北岸工竣。再移至南岸工次枷號。俾通工人員皆知儆畏。俟大工合龍。再發往伊犁効力贖罪。該革員誤工糜帑。此時姑免籍沒。著伊自矢天良。先竭力措交銀兩。以助工需。現在北岸漫口。雖已掣溜五分餘。正河尚有溜三四分。著吳璥李鴻賓。即在北岸上緊設法搶堵。能使北岸不成大工。則南岸漫口。尚易於為力。吳璥等務勉力辦理。不可稍懈。琦善此時先回南岸。集料鳩工。察看蘭儀二處漫口。現

已歸併何處督辦盤築裹頭各事宜。俟北岸工竣。吳璥等再赴南岸會同辦理可也。將此諭令知之。○命右宗正奕紹兵部尚書松筠均退出御前大臣。以松筠為盛京將軍。調理藩院尚書和世泰為兵部尚書。以盛京將軍賽冲阿為理藩院尚書。兼鑲黃旗領侍衛內大臣。正紅旗滿洲都統。御前大臣。○命鑲白旗蒙古都統索特納木多布齋在御前大臣上學習行走。○甲戌。

實錄卷五十五

五

上御同樂園。賜王公大臣蒙古王貝勒貝子。公額駙台吉等食。至己卯皆如之。○諭內閣。御史程伯璽奏。請飭禁學政收受陋規一摺。貴州學政按試。向有紅案銀兩名。日前經飭禁。並酌增養廉貼補考費。茲該御史奏。四川近日又有院費名目。並稱各直省所在有之。請旨飭禁。直省學政養廉優厚。足敷辦公。豈可復於新進士子收受陋規。致開教官等需索之漸。著再行通諭各學政。務當潔己奉公。如

有前項陋規名目。概行裁革。並飭所屬教官一體恪遵。以恤寒畯而端學校。○以鑲白旗蒙古都統索特納木多布齋為鑲黃旗領侍衛內大臣。右宗正奕紹為內大臣。○乙亥。諭軍機大臣等。吳璥等奏。馬營壩漫口洩跌寬深業已掣溜成河。現在籌議堵築各事宜。一摺。馬營壩漫口居北岸上游。遠在蘭儀之上。此時已掣溜成河。正河僅有微溜。則蘭儀兩處漫口。即日必當斷流。自應將原派蘭儀料

實錄卷五十五

五

物。飭令承辦各員迅速購買。即行運貯北岸。並添派北岸廳員購料趕運。以便剋期興工。吳璥李鴻賓著即駐劄北岸。一面催辦料物。一面勘立壩基。上緊盤護裹頭。併委員勘估引河。通籌大工全局。督率趕辦。期於桃汛前堵築合龍。其南岸蘭陽儀封口門。河已斷流。易於堵合。著琦善酌帶明白工員一二人前往。先堵蘭陽口門。次堵儀封口門。俟兩處缺口堵築堅實。該撫一面向奏。一面仍至北岸

會同吳璥等辦理。李鴻賓等自請交部議處。無謂之至。馬營壩漫口之時。李鴻賓尚未到任。琦善亦本不諳河務。俱著無庸交議。其另片所奏豫省辦理大工。現不乏員。差委吳璥等。即督率各工員奮勉趕辦。葉觀潮債賴覆轍。豈可復行委用。仍遵前旨。枷號工次。俾各河員觸目警心。共知儆懼。大工現既改歸北岸。南陽相拒寫遠。其工次巡邏彈壓。著就近令河北鎮馬濟勝酌帶兵四五百名來工巡

實錄卷三六二

五

防。南陽鎮兇瑪善及所帶兵。即飭停止。將此諭令知之。○丙子。以禮部尚書崇祿為滿洲繙譯鄉試正考官。刑部右侍郎文孚為副考官。內閣侍讀學士長旺為蒙古考官。○緩徵河南安陽湯陰臨漳內黃四縣被水村莊本年及上年額賦漕糧。並河工加價銀。○戊寅。諭內閣。朱勲奏鄉試咨文中額名數繕寫錯誤。據實檢舉一摺。本年陝甘鄉試。寧夏府屬照例另編字號。應取中二名。因知照內簾咨

文將二字誤寫一字。以致少中一名。所有繕寫錯誤之書吏。著審明照例治罪。朱勲未經看出。著交部議處。○又諭錢臻奏提解命案延玩各員。據實參辦一摺。此案吳位庭被毆斃命。正兇在逃。該縣等不即將人證拘齊解審。該管知府既不提訊。又不將遲延之員揭參。以致命案延擱十年之久。實屬玩愒。前任贛州府現任吉安府知府王樸。現任贛州府知府吳鼎臣。俱著即行革職。其歷任各縣府

實錄卷三六二

六

交部分別議處。錢臻到任業經三載。參辦亦屬遲延。著一併交部議處。○又諭御史蔣雲寬奏請禁市僧盤剝八旗兵丁一摺。旗人賒買食物布匹。事所恒有。及關領錢糧之時。安能禁鋪戶人等不向索取。該御史奏請敕交步軍統領衙門訪查拏究。無此政體。所奏著毋庸議。○己卯。

上御勤政殿。南掌國使臣以竜鮓嗎等二人。暹羅國使臣啣窩汶巡爾霞。握不突等三人。土

司穆珥宣慰司丹紫江楚等六人於階下瞻
觀命隨往同樂園賜食○賞伊犁協領扎克
桑阿頭等侍衛為塔爾巴哈台領隊大臣○
庚辰

上御同樂園賜王公大臣蒙古王貝勒貝子公
額駙及外藩使臣四川土司等食至甲申皆
如之○以兩淮鹽政阿克當阿為總管內務
府大臣○調寧夏將軍祥保為福州將軍以
鑲黃旗蒙古都統格布舍為寧夏將軍福州

實錄卷三十一

五

將軍扎拉芬為鑲黃旗蒙古都統○辛巳諭
內閣禮部奏請定考試滿洲蒙古繙譯舉人
中額一摺此次繙譯鄉試應考人數滿洲九
十九名蒙古七名較上屆應考人數減至倍
蓰顯係畏懼覆試森嚴不敢應試繙譯乃滿
洲分所應習從前考試人數不下四五百人
是以取中額數亦多此次朕酌定人數滿洲
取中七名蒙古取中一名嗣後滿洲蒙古務
須勤習舊業並於分所應習技藝勉力習學

儻仍不奮勉下屆考試人數仍不增添朕必
將繙譯鄉試科停止○命禮部左侍郎王引
之教習庶吉士○壬午欽差戶部侍郎那彥
寶奏報永定河上頭工合龍得旨嘉獎下部
議敘賞道員任銜蕙都司鄧殿魁花翎都司
謝成等藍翎餘升擢有差○調鑲白旗漢軍
都統永錫為鑲紅旗滿洲都統正藍旗蒙古
都統奕額為鑲白旗漢軍都統以鑲白旗蒙
古副都統穆克登布為正藍旗蒙古都統總
管內務府大臣阿克當阿兼鑲白旗蒙古副
都統○展賑直隸固安永清東安三縣被水
災民○癸未諭內閣前據密雲副都統富清
阿奏奏佐領福英因保送馬甲音德布被駁
輒於公所出言頂撞請旨革職失察之協領
岱明阿請交部議處當經降旨令將福英岱
明阿音得布解京交軍機大臣審訊茲據訊
明具奏該佐領保送之音得布在百日期內
並無不准挑甲之例富清阿任內曾挑過常

實錄卷三十一

六

慶六十五二名與音德布情事相同是該佐領保送並無不合且保送共有十二人挑與不挑仍聽該副都統酌定富清阿執行訶斥將名牌擲地福英拾牌剖辨祇於詞色不平並無非禮干犯之言乃率行參奏革職實屬任性富清阿不勝密雲副都統之任著交部議處即來京聽候部議○又諭董教增奏參緝捕不力各員一摺此案林孫來係奉旨發遣之犯經林光為帶同逃匿迅將林光為緝獲到案林孫來年甫十二安能遠遁乃承緝之文武員弁日久無獲實屬怠玩署福清縣沙縣知縣陳士榮署長福營參將候補遊擊林連撫標中軍參將蔡萬齡署福州府海防同知閩縣知縣言尚焜俱著先行摘去頂帶勒限兩箇月嚴緝如限內獲犯准其奏請開復若逾限無獲即將該員等一併參奏革職以示懲儆○以

六旬萬壽開復内外文武一二品大臣降革留

實錄卷三百五

五

實錄卷三百五

五

上詣

恩慕寺

恩佑寺行禮○還宮○朝鮮國使臣李魯益等

三人越南國使臣阮春晴等三人於西安門

外瞻觀○諭內閣富俊等奏同知虧缺庫項

接任同知虛出通關協領等說合諱飾請分

別革職解任前任將軍未曾查辦並請飭令

明白回奏一摺內務府員外郎施蒙額前在

伯都訥同知任內虧缺庫銀一萬餘兩大千

法紀施蒙額著革職拏問交刑部審訊奏明
解往吉林歸案辦理該革員家產著步軍統
領等嚴密查封備抵至接任同知富寧阿虛
出通關咎有應得例無籍沒家產之條著無
庸查封如已查抄即行給還富寧阿著革職
審訊定案時照例治其虛出通關之罪協領
富爾松阿著解任交該將軍等提同告病協
領富成及丁胥鋪戶人等審明分別定擬具
奏松寧前在吉林任內未經查明叅辦著即
明白回奏○又諭李鴻賓等奏道員因漫工
憂懼恍惚健忘請徹回閒缺另賜簡放等語
河北道趙麟於河務本不諳練本年北岸武
陟隄工漫溢葉觀潮已褫革枷號伊係該管
道員咎無可逭現在憂懼成疾即留工亦無
所用趙麟著即革職飭令回籍所遺河北道
員缺著張協鼎署理如果始終奮勉俟大工
合龍該河督等據實保奏再行實授○丙戌
孝慈高皇后忌辰遣官祭

實錄卷三十三

三

福陵○以蹕路經壇整齊嚴肅賞管道兵丁半
月錢糧○免湖北漢川天門沔陽三州縣應
追花利銀○丁亥諭內閣據山東臬司童槐
奏參溫承惠積壓多案濫禁無辜並令罪犯
充當捕役四出滋擾各款溫承惠前任直隸
總督身受厚恩十八年逆匪滋事漫無覺察
其罪甚重經朕棄瑕錄用復擢任臬司乃不
知感奮於歷任交代積案並伊本任內交審
及招解提審批發各案積有一千餘起之多
以無辜牽連羈押者共有一千三百餘人已
屬因循疲玩復將通盜得贓之犯人李治擅
行釋放點充捕役帶領四十餘人四出滋擾
實屬辜恩膽大任性妄為前經革職實不足
蔽辜溫承惠著發往伊犁効力贖罪李治一
犯著程國仁即行拏回仍治其通盜得贓之
罪該犯所帶四十餘人如查有擾累妄拏情
事審明按名治罪其未結及復行翻控各案
督飭臬司速行秉公審辦羈禁各犯分別應

實錄卷三十三

五

訊應釋上緊清釐以省拖累○緩徵山西保德州歉收地方本年額賦○賞廣寧門外普濟堂煮賑小米三百石○

上以孟冬時享

太廟自是日始齋戒三日○戊子

孝敬憲皇后忌辰遣官祭

泰陵○以

六旬萬壽命寬免王貝勒貝子公等降罰處分賞已革禮親王昭棟豫親王裕豐四品頂帶

實錄卷三十三

三

○以禮部堂官於旬慶服色未經照例聲請降尚書崇祿汪廷珍為左侍郎左侍郎和桂王引之右侍郎同麟署右侍郎王宗誠以正三品京堂補用以工部右侍郎穆克登額戶部左侍郎黃鉞為禮部尚書內閣學士那清安為禮部右侍郎○轉戶部右侍郎姚文田為左侍郎調刑部右侍郎王鼎為戶部右侍郎以福建巡撫吳邦慶為刑部右侍郎轉兵部右侍郎曹師曾為左侍郎內閣學士吳其

彥為兵部右侍郎降調禮部左侍郎和桂為大理寺卿○降鑲紅旗漢軍都統崇祿為正黃旗蒙古副都統以正黃旗蒙古副都統孟住為鑲紅旗漢軍都統喀什噶爾參贊大臣斌靜為正黃旗蒙古副都統乾清門頭等侍衛阿彥托克托為鑲藍旗蒙古副都統○調貴州巡撫韓克均為福建巡撫以貴州布政使毓岱為巡撫按察使富信為布政使安徽寧太道程贊寧為貴州按察使○給安徽毫蒙城太和鳳臺懷遠鳳陽靈璧五河八州縣被水災民一月口糧○己丑諭內閣朱錫爵係罰項繳完罪應發遣之人不應進獻頌冊禮部不行查明一律接收殊屬冒昧所有前任禮部堂官崇祿汪廷珍和桂王引之同麟王宗誠俱著罰俸一年朱錫爵冊頁著即擲還○以

實錄卷三十三

三

六旬萬壽賞已革侍郎鮑桂星編修已革巡撫張師誠以中允贊善用已革尚書初彭齡巡

主

清實錄
嘉慶二十四年十月

七八五

泰陵

泰東陵

裕陵遣官祭

孝淑皇后陵寢遣官祭

端慧皇太子園寢

上以萬壽節御寧壽宮賜皇子皇孫及王以下文武大臣蒙古王公外藩使臣四川土司等食至乙未皆如之○頒嘉慶二十五年時憲書○越南國王阮福映暹羅國王鄭佛南掌

國王召蟒塔度腊各遣使表賀

萬壽並進貢方物均賞賚筵宴如例○辛卯命工部右侍郎陸以莊教習庶吉士○命降調兵部左侍郎王宗誠仍以三品卿銜提督江西學政○壬辰諭內閣吳璥等奏籌堵沁河民隄並估挑引渠一摺武陟縣沁河原村民隄先經漫溢現在馬營壩黃河漫口業已勘定壩基剋期進占必須將舊沁河先行挑挖引渠導令歸黃並將原村民隄缺口趕緊豫

行堵合所需稽料因興辦大工須於遠處購運又期限緊迫著照所請梳耨每斤給價銀三釐豫麻每斤給價銀三分五釐挑河土方每方給銀三錢其加築壩戩等工仍照例價覈給所有挑河堵口估需銀兩准其先於司庫捐監項下及糧道庫漕鹽項下動撥工竣覈實報銷仍照例分年攤徵歸款其天師廟應築挑壩蓋壩並補還大堤所需幫價亦著照原村一律辦理○諭軍機大臣等吳璥等奏馬營壩大工現已勘定壩基盤頭裹護並擬築挑壩及勘估引河頭分投辦理一摺馬營壩一帶土性沙鬆吳璥等相度情形就溝口稍為收進擇定東西壩基較為穩妥且於引河頭得勢將來開放可期順暢著即照此辦理現在壩基已定各省撥餉亦陸續解到日內天氣晴和水土不至凝凍亟當趁此興工一面挑築引河一面進占大壩其舊沁河挑挖引渠導令歸黃更當及早興辦此時正

河內已築攔黃大壩。蘭儀缺口業經乾涸。無庸琦善親往辦理。著即前往督辦原村沁河漫口各工。俟引沁歸黃。該撫再赴馬營壩會辦大工。將此諭令知之。○以

六旬萬壽。賞紫禁城內直班護軍校護軍銀幣有差。○癸巳諭內閣。昨據吳璥等奏。將馬營壩漫工勘定壩基。及引沁入黃分繪二圖呈覽。當即發下。本日向軍機處查取。交那彥寶閱看。據軍機大臣覆奏。係章京程同文攜回

寓所。當降旨。令將程同文革職。旋據自行查明。程同文並未攜去。係直宿章京何增元。強違奏。因聞程同文有欲繪南北岸河圖之言。誤行回稟。原圖奏到時。戴均元曾囑章京張允垂。令將大壩口門及引河頭等處丈尺。照錄一紙。以備查考。張允垂誤行會意。輒攜回寓所。照樣摹繪。此事與程同文無涉。著即將張允垂革職。以示懲儆。嗣後滿漢章京等辦理公事。總當在官言官。毋得攜回私寓致干

嚴懲。戴均元雖曾告知該章京照錄口門丈尺。並未令其將圖持回。著改為交部議處。托津盧蔭溥文孚失於查察。著改為交部察議。直宿章京何增元等未經詳查。率以程同文攜回寓所之言。回堂覆奏。亦有不合。何增元強違奏。俱著交部察議。○甲午

上詣

壽皇殿行禮。○諭內閣。江寧織造延隆係二阿哥側室福晉之兄。此次來京。有致送二阿哥

及奕緯阿哥禮物。不過綢緞筆墨數件。尚無金玉華靡之物。惟是二阿哥側室福晉兄弟甚多。延豐係屬長兄。致送些微禮物。尚可若皆紛紛致送。未免繁瑣。延隆人本粗率。其所開禮單。多有不合之處。延豐現放兩淮鹽政。江寧織造同在一省。亦不相宜。延隆著降為內務府主事。其禮物二分。俱著擲還。嗣後不准致送。○乙未

萬壽節遣官祭

太廟後殿○遣官祭	福陵	昭陵	昭西陵	孝陵	孝東陵	景陵	泰陵	泰東陵	裕陵○遣官祭	孝淑皇后陵寢○遣官祭	顯佑宮	東嶽廟	城隍廟○	上詣	奉先殿行禮○御太和殿王以下文武大臣官員蒙古王公外藩使臣四川土司等行慶賀禮作樂宣表如儀○御乾清宮賜
----------	----	----	-----	----	-----	----	----	-----	--------	------------	-----	-----	------	----	--

皇后及皇子皇孫宴○丙申	上詣	大高殿行禮○幸圓明園○御同樂園賜皇子皇孫及王以下文武大臣蒙古王公外藩使臣四川土司等食至戌戌皆如之命大學士戴均元戶部右侍郎那彥寶馳往河南查看河工並命那彥寶留駐馬營壩督辦大工○丁酉	上御正大光明殿賜皇子皇孫及王以下文武大臣蒙古王公外藩使臣四川土司等宴並賞賚有差○諭軍機大臣等吳璥等奏武陟大工現已盤護壩基估挑上段引河並趕辦導沁歸黃等工一摺吳璥等現在趕築壩臺大壩工程已有端緒惟開挖引河關繫全河大局必當一律暢順若少有高仰之處壅遏堪虞據稱蘭儀漫口以下河身淤墊較厚且有灘與隄平者雖估計挑費較重然總須設法挑令寬平將來啟放引河方能順流下注
-------------	----	--	---

現已諭令那彥寶留駐武陟與吳璥等會辦大工所有挑挖引河事宜著即專交李鴻賓前往確勘妥辦將來引河通暢是伊之功如有阻遏是伊之過至另摺所奏豫省南北兩岸各漫口因本年黃水異漲普律平漫高過隄頂各缺口均在無工處所自屬實在情形葉觀潮業已革職枷號仍發伊犁其攤賠漫工例價銀兩於應賠二成外再加賠一成著即照所議辦理其餘疎防文武各員弁照例

分別叅處可也將此諭令知之○以江南江寧城守協副將王占鰲為徐州鎮總兵官○戊戌

上御山高水長賜皇子皇孫及王以下文武大臣蒙古王貝勒額駙外藩使臣四川土司等食○己亥

皇后千秋節宮內行禮如儀停止筵宴及在外公主福晉命婦行禮○庚子諭內閣吳璥等奏從前歷屆大工均有投効之例或認辦工

役或交納捐貲此次武陟大工請援照成例准令各省投効人員赴工捐輸交納豫省藩庫除准分發四省三河外其連界之山西陝西安徽湖北浙江等省並准分發自道員至佐雜分別授職等語現在武陟大工需費浩繁著照所請准令各省人員投効其如何按捐輸之多寡分別授職及分發之處仍著吳璥等查照上屆成例妥議具奏○以兵部尚書戴聯奎署吏部尚書○以刑部左侍郎帥

承瀛為順天武鄉試正考官翰林院侍讀學士方振為副考官○辛丑

上詣

安佑宮行禮○諭內閣董教增奏遵查閩省官墊民欠各款分別辦理一摺福建省額徵錢糧歷年徵收不足者該州縣等迴護處分臨時挪墊輾轉交代現將該省積欠銀糧全行豁免不能再向民間徵納該州縣等催徵不力本有應得處分第念官非一任事閱多年

且墊解完公尚與侵蝕入已者不同著照該督所請將墊解未補銀一十二萬一千七百餘兩米一萬八千八百餘石按照追賠例限加嚴勒追其存留項內時憲書工價等八款銀三萬八千九百餘兩亦於未經聲明民欠各員名下一律追賠至進士牌坊等五款銀八萬二千九百餘兩併驛站銀一千九百餘兩未經徵完是否報部有案著戶部查明具奏再降諭旨尋奏稱此項銀兩業由州縣官

將徵存之銀墊解起運以致存留之項尚欠在民該督已請勒追應一併著落賠補毋庸再向民間徵收得旨如所議行（壬寅）

上詣

大高殿

壽皇殿行禮○還宮○諭內閣朕本年六旬萬壽曾經降旨不許建設經壇嗣臣工等再三籲懇由圓明園至西直門分段設壇諷經藉伸其祝釐之悃不得已姑允所請各衙門並

於道旁添設黠綴屏蔽間以音樂因而都人士女車馬游觀幾至填街塞巷朕殊不以為喜乃昨據都察院具奏有陝西革生楊鍾岳陳遞奏章謂京師西北山內有伏藏之賊覬覦皇會欲乘機萌動人以皇會為可欣可樂彼以皇會為可憂可懼此等狂惑之詞固人

人知其誕妄然使彼得以藉口亦緣諸臣踵事增華有以啟之都察院於初四日接收此呈即初五六兩日未能具奏初七日何以仍不奏聞延至十一日具奏仍係綠衣期內亦與初七何異實屬遲延都察院堂官俱著交部議處本日朕由御園進宮天氣晴和諸凡順遂各衙門所辦經壇業已建設多日成事不說所有經壇十三處著每處仍賞銀一千兩由廣儲司給領將來朕七旬萬壽時著軍機大臣存記前一年提奏不准各衙門復行懇請建設經壇以杜繁文而崇實意○癸卯命刑部右侍郎文孚左侍郎帥承瀛馳往山

東審案○甲辰試中式武舉何明德等四十
三人於太和殿前○乙巳諭軍機大臣等本
年豫省武陟興辦大工節據吳璥等奏請撥
解工需銀九百六十萬兩連次奏報止於勘
定壩基尚未興工進占昨又據奏請暫開投
効事例亦經允其所請合計給發工銀幾及
千萬又有投効人員捐貲儘足敷大工之用
將來如有贏餘工竣仍當覈實奏繳不准再
請分毫慎之朕聞向來興舉大工每於工次
搭蓋館舍並開廛列肆玉器鐘表綉緞皮衣
無物不備市僧人等趨之若鶩且有倡妓優
伶爭投覓利其所取給者悉皆工員揮霍之
貲而工員財賄無非由侵漁帑項而得此種
惡習歷次皆有惟十九年昨工較為謹約此
次吳璥等務當嚴禁浮靡將所發帑項實歸
工用不特吳璥那彥寶李鴻賓琦善四人應
一塵不染所有在工文武員弁俱當嚴行約
束勿以國家重大工程為伊等漁利行樂之

地如有違背小者枷示大者正法法在必行
朕言不再戴均元現在赴工查勘如有前項
陋習伊回京時自必據實奏聞即戴均元回
京以後此數月內朕或再派員前赴工次或
令人改裝易服密往察訪一經查出弊端不
但將工員等從重治罪吳璥等恐亦不能當
此重咎也此時工需銀兩計已陸續到工吳
璥等著即剋期興工進占定於明年桃汛前
合龍如屆期不能歲事亦必將吳璥等治罪
不貸將此諭令辦工大小官吏知之○丁未
上詣
時應宮
昭顯廟拈香○御紫光閣閱中式武舉馬步
射○諭內閣李鴻賓奏不勝河督重任請另
賜簡放一摺李鴻賓由京員出身於河務本
不諳習但既自揣不勝河督之任則於簡放
時即當據實陳明茲已視事兩月忽奏請辭
職顯係因吳璥等辦工遲緩恐將來一同獲

咎。豫為諉謝地步。伊既不諳河工。即留任河督。亦屬無益。李鴻賓著革去河東河道總督。給予郎中銜。留於河南專司大工錢糧。伊曾任大員。僮工需內有冒濫支應之處。准其直揭部科。如果慎司出納。辦理覈實。工竣時交吏部帶領引見。候朕施恩。若不認真稽覈。定行治罪不貸。○又諭葉觀潮前因疏防漫口革職。枷號工次已足。示懲。現在李鴻賓降調。一時簡用乏人。葉觀潮平日尚諳河務。加恩

著即疏枷補授河東河道總督。毋庸給予頂帶。如能奮勉出力。速歲大工。再酌量賞給降等頂帶。僮不愧奮。則發遣不足蔽辜。必當從重治罪。○諭軍機大臣等。吳璥由驛遞到奏摺。朕以必係奏報開工日期。及披閱所奏。乃稱現在立限趨挑。引河仍以料物未能應手。為詞欲緩。至出月方始擇吉進占。太覺疲玩。朕宵旰焦勞。無一日不以大工為念。即本月初六日慶節正辰。猶與軍機大臣等籌議。

河工情形。期於桃汛前合龍。乃吳璥等歷次奏報。總以購料惟艱。遷延觀望。夫興工以購料為急。原在大吏認真督催。有延玩者。即當嚴叅示懲。吳璥雖屬年老。然以欽差駐工。督辦已不得諉之呼應。不靈。琦善係本省巡撫。通省官員皆其所屬。尤應上緊嚴催。迅速購運。乃亦任聽所屬延緩。毫無振作。伊前此疏防漫口。本應革職。朕特予寬貸。不加譴責。何竟不知感奮。吳璥琦善俱著先行拔去花翎。

帶罪圖功。如果知愧知奮。迅速歲工。再當量予恩施。僮再延玩。必當立予嚴譴。不稍寬貸。現在給發工需銀兩。幾及千萬。儘足敷大工之用。不准絲毫再行瀆請。吳璥等接奉此旨。務令月內擇吉興工。進占。趁此天氣晴和。人力易於趨辦。若延至出月。一遇冰雪。又將藉口耽延。總之桃汛以前。必須合龍。吳璥等擇定日期。先行具奏。以後進占情形。仍遵前旨。進占至一百丈。繪圖具奏。一次二百丈。再繪

圖具奏一次二百丈後每得數十丈即具奏一次庶可按期計算合龍吳璥等當奮勉督辦不可再涉因循有員委任將此諭令知之○除江蘇寶山縣築塘占廢地一項六十二畝有奇額賦○戊申

上御箭亭閱中式武舉技勇○御乾清宮引見中式武舉親定甲乙○諭內閣朕本日閱試中式武舉弓石內張元英郭建章二名俱不能開弓且昨日馬步射亦屬平常俱著罰停

殿試一科其原圍監射大臣綿課戴聯奎穆克登額曹師曾及覆試大臣永錫英和和寧文字俱著交部議處○諭軍機大臣等此次馬營壩漫口奪溜下注橫截山東運河由大清河入海直隸境內亦因水勢漫入長垣老隄以致東明長垣開州均有被淹處所馬營壩大工未合龍以前非特漫浸民田不能涸出播種明年新運北來東省運道尤關緊要近日吳璥等在工辦理延緩甚屬疲玩其意

似聞朕欲派戴均元那彥寶前往遂有意遷延觀望昨已降旨將吳璥琦善二人拔去花翎以示薄懲再那彥寶前在衡工時聲名平常所領帑項不能全歸實用其時工次奢侈揮霍開糜列肆玩好聲色無所不有方受疇曾任河南巡撫諒亦備知現亦有旨申飭那彥寶諭令此次務持清慎覈實辦工豫省與直隸接壤著方受疇密選誠實精細之人改裝易服前往工次察訪伊等此次因何遽延時日不肯興工在工大小官員能否勤慎辦工抑或侵漁帑項仍似前次任意奢靡以致商賈雲集視為利途方受疇當密之又密不可稍露風聲一俟探聞真確過奏事之便據實直陳不可代為隱諱將此密諭知之○己酉

上御太和殿傳臚賜殿試武舉一甲秦鍾英武進士及第二甲楊錄之等五名武進士出身三甲陳大魁等三十五名同武進士出身○

諭內閣昨日酉刻文穎館不戒於火當經二阿哥三阿哥及王大臣等督率官員兵丁上緊撲救刻即止熄辦理迅速維時諸王大臣官員趕至西華門外甚多經內廷直宿大臣因時至夜分門禁宜嚴未經放進所辦亦是旋奉旨將西華門鎖鑰是以諸王大臣等未能進內一同撲救均毋庸議除阿哥等無庸給予議敘外所有在內救火之禮親王麟趾鄭親王烏爾恭阿肅親王永錫莊親王綿課定親王綿恩永鑒奕紹奕額永玉托津英和和世泰常福常英廉善穆彰阿博啟圖阿克當阿色克精額索特納木多布齋賽冲阿托恩多福克津哈迪爾載銓裕恩百順安福蘇冲阿富僧德舒明阿福泰阿那保巴彥巴圖富永阿彥托克杜那蘇巴圖盛福瑞盛吉祥保盛桂博克順阿勒精阿博多歡桂翰容照俱著加恩交部議敘內務府護軍統領德隆堂郎中福寧俱著賞戴花翎並賞加二級大

緞各一匹步軍統領衙門員外郎海忠主事訥蘇鏗額委署主事興昌鳴謙寶和筆帖式奎凝景昌重豫刑部委署主事普年內務府筆帖式萬保協尉秋前保委協尉田寶副尉愛興阿步軍校博清阿鳳林保珠林泰常通雅清阿捕盜官哈凌阿俱著以應升之缺儘先升用並各賞加二級海忠秋前保田寶愛興阿博清阿鳳林保珠林泰常通雅清阿哈凌阿俱賞戴花翎並賞給大緞各一匹訥蘇鏗額興昌鳴謙寶和奎凝景昌重豫普年萬保俱賞戴藍翎並賞給小卷緞各一匹護軍祥玉著賞給藍翎長火班校尉吉陞著賞給頂子達其救火出力之太監等俱由內給賞以示獎勵○又諭本日朕御太和殿內安設火盆過多後面三槽隔扇俱開又遇風吹火星滿地經御前大臣侍衛等紛紛踣滅並不禦寒竟為開銷地步徒費無益此皆內務府大臣漫不經心所致嗣後每遇保和殿筵宴

太和殿受賀筵宴及御太和殿俱在地平二層兩角安設炭火二盆盆內炭火用灰掩蓋兩邊隔扇俱不准開僅開中隔扇每遇看祝版中和殿太和殿勿庸安設火盆兩邊隔扇亦不准開永著為例並著內務府大臣一人每次查看如有違例多安火盆不掩兩邊隔扇者司官革責本日查看之內務府大臣即時降級不貸○庚戌諭內閣本月二十日朕御太和殿專為武殿試傳臚其應行謝恩人

員尚係附於是日行禮乃臚唱時一甲一名武進士徐開業一甲三名武進士梅萬清均未到班當經都察院鴻臚寺參奏交兵部查詢據稱徐開業梅萬清寓居西城是夜先至西華門因門未開啟繞至東華門以致遲誤等語各武進士分住東西城是夜多有由闕門進內者一甲二名秦鍾英等均未遲誤何以徐開業梅萬清二人獨未到班所言殊不足信事關典禮非尋常失誤可比本應全行

斥革念其究係草茅新進徐開業著革去一甲一名並頭等侍衛梅萬清著革去一甲三名並二等侍衛施恩俱仍留武進士再罰停明年殿試一科俟下屆武會試時再同新中式武舉一體殿試其本科一甲一名武進士即以秦鍾英拔補授為頭等侍衛一應宴齋兵部照例給予一甲二名三名均無庸再補○又諭吳邦慶奏承差自京回省呈出周汝楨帶寄同鄉給事中石承藻進士汪燦書信

一封不敢壅於上聞謹將原信呈覽等語吳邦慶所辦甚為公正周汝楨係周系英之子輒敢私寄信函內外交通干與訟事甚屬藐玩周汝楨著查明有何頂帶即行斥革周系英並著解任即日押赴刑部交軍機大臣會同刑部堂官審訊○又諭本月十九日文穎館不戒於火當派軍機大臣會同刑部提集在館供事人等訊問係因該館前堂中閣舊設煤爐灰磚酥脫火燄透出板壁延燒書櫃

內廢紙而起煤爐之設雖非始於近日然失火延燒實由廚役李海元不慎所致李海元著交刑部治罪至該館總裁曹振鏞戴聯奎不能督率提調官先事豫防均有疎忽之咎著交部分別議處收掌官例應在館直宿是夜該班之文路並未在館無庸交部嚴議著即革職示懲其治河方畧一書該館另行咨取例案即在翰林院衙門纂輯錄文類館燒燬房間此時暫停修造交內務府大臣將

牆垣葺整歸併咸安宮等處管理○又諭御史佟濟奏請嚴查倉庫以杜牽混一摺各直省倉庫不容稍有虧缺侵盜挪移罪名迥異總應覈實辦理但如該御史所奏初叅時即指定為侵為挪該督撫未經查審安能豫為擬議惟在各督撫平日嚴查所屬州縣不准擅動公項遇有虧缺查係侵盜治以侵盜之罪查係挪移擬以挪移之條秉公覈辦自無避重就輕庇護屬員之弊矣○諭軍機大臣

等本日御史袁銑奏興築大工暫開投効各弊端並欽差駐工糜帑營私等情此摺著發給吳璥那彥寶閱看此次馬營壩大工尚未擇吉興辦投効亦尚未議定章程該御史已有此奏其摺內所稱虛報浮開供應餽送侵帑冒銷等弊向來亦實有此事朕所素知此次吳璥等當各矢天良慎之又慎有則改之無則加勉不可再招物議如有仍前各弊朕必能知之科道等亦必據實入奏彼時勿自

貽後悔也將此諭令知之○予福建出洋緝捕遭風淹斃外委饒成瑛王慶雲把總張文耀歐得龍等祭葬世職如陣亡例額外委施兆龍兵丁周興寶等一百五十二名水手洪天壽等二十三名漂沒無著兵丁周武畧等十六名卹賞如例○辛亥諭內閣二阿哥長女著追封為和碩格格該衙門照例辦理○又諭本月十九日文穎館不戒於火王公大臣官員等前來撲救西華門偏吉柵欄該

班官兵一概不准放進甚至將救火激桶一併阻止太不曉事禁城失火定例大小官員俱應進內撲救即謂時屆昏暮稽察閒雜人等不令溷入若王公大臣官員兵丁則一望而知何得概行禁阻至激桶為救火所必需俱令阻於門外是何肺腸豈欲延燒乎尤屬糊塗悖亂矣嗣後當權其輕重雖不可漫無稽察亦不可一概攔阻再是夜關門過早總須火熄方准關門著為定例至紫禁城內所貯激桶分隸各處儻有急需均應調齊備用亦不准劃分地址致東西不能越界並著該管大臣查明紫禁城內額設激桶若干如不敷用奏明酌量增添以昭慎重○又諭周汝楨係副榜貢生不知讀書安分乃因湘潭土民客民互毆一案致信在籍給事中石永藻等干與公事總由周系英前曾寄信吳邦慶以致伊子效尤其失於約束咎無可辭周系英著即革職周汝楨著交軍機大臣會同刑

部定擬具奏尋奏上得旨周汝楨著照部議杖六十徒一年周系英輕聽浮言於召對時屢次面陳又復致書本省巡撫以致伊子效尤因而獲罪周系英業經革職不准在京逗留著即勒令回籍安分家居閉門思過如到籍後再有干與公事之處定行治罪不貸○又諭紫禁城內直班前鋒護軍統領專司門禁各門官員兵丁皆聽其約束十九日蘇沖阿直班既已奉旨開西華門必應在西華門明白曉諭將應放進者放進應阻止者阻止何至守柵官兵等自出主意漫無區別將王公大臣官員用刀背混打一概攔阻但知空手撲救不以本任為念太不曉事蘇沖阿著撤回議敘仍交部議處嗣後儻有急要該班之護軍統領當親在禁門稽查出入不得輕離職守以專責成尋議上得旨蘇沖阿革去護軍統領副都統仍留侯爵賞給頭等侍衛在大門上行走○壬子旌表守正捐軀安徽

泗州民郭泳年妻邱氏○緩徵甘肅狄道靜寧威寧夏四州縣水災電災本年及上年額賦○癸丑諭內閣朱勲奏渭南縣知縣徐潤因委赴華州查勘被水村莊乘馬踰溪墮入潭內經差役撈救出潭半日始甦次日仍親往設法疏導並將居民妥為安撫可否量加鼓勵等語徐潤前在軍營著有勞績此次查辦水災復能不辭勞瘁甚屬勤奮著加恩賞換花翎即以同知直隸州知州儘先補用○

又諭慶保奏叅縱妻責兵之都司請旨革職一摺此案兵丁查得勝等本不應將穢褻紙扇攜入官署都司張安和時值公出其妻不候其歸即令馬兵劉代宗將查得勝陸紹楚各責十棍並未逾制濫刑該都司之咎止於平日不能約束妻室若因此遽行革職恐啟兵丁藐視本官之漸張安和著降等以守備用千總陳國連因張安和向其呵斥將鈴記置放徑赴永州申訴亦與無故擅離汛地者

不同著降等以把總用○諭軍機大臣等吳璥等奏馬營壩大工需料甚多現籌採辦碎石於大壩上水拋做坦坡包護壩根兼可節省稽料一摺吳璥到工日久前次奏報請於十一月興工此次則於興工日期全未提及惟請照南河碎石護埽之法委員採辦碎石運工據稱近日南河每遇險工埽段頻墊一拋碎石立臻穩定擬於大壩每進一占即於上水跟拋碎石包護壩根使溜勢不能直搜

埽底又稱恐碎石間有淌入口門致滋窒礙須於口門三十丈隨埽跟拋豈非自相矛盾此事在南河曾於何年何月何處工段行之有效此次豫省大工是否必應依照辦理著戴均元那彥寶二人秉公再行熟籌妥議若實應如此辦理可保穩固即迅速會同由驛覆奏若無庸用石切勿迴護亦迅速單銜具奏仍遵前旨剋日興工不可任意延緩至另片奏蘭陽儀封等處補還大隄需用土料過

多請分別鑲做柴壩估築越堰並於舊有園隄處所估築格隄毋庸補還缺口隄身所需稽麻土方照奏定例加二價給發俱著照所議辦理統俟工竣覈明分別賠銷攤徵歸款將此諭令知之○又諭慶保奏現回長沙審訊湘潭縣商民互毆一案犯供旋認旋翻王調松等所供情形及被殺幼孩年貌服色俱有互異等語此案江西客民與湖南土民因此事勢同仇敵非尋常計訟之案可比慶保

係滿洲大員江西湖南兩無偏袒惟當嚴究虛實以成信讞至王調松鄧士湖等於殺人祭符一節旋認旋翻又焉知非聞知周系葵現已降黜頓思翻案總不可稍存成見該督即會同李堯棟虛衷研鞠務使兩造之心俱已折服方可定案不致再有翻控也至周系英前因致書吳邦慶降調昨又因失察伊子周汝楨致書石承藻等革職即日飭令回籍伊到籍後如不知安分仍有把持干與情事

李堯棟即行據實嚴叅勿稍瞻徇將此諭令知之○吏部奏查明欽差那彥寶請帶赴工次道員係例應終養之員一摺得旨原任河東道河洲係例應終養之員前那彥寶奏請帶往河工並未聲明實屬朦混現在武陟大工調派多員豈獨缺少河洲一人河洲著即飭令回旗終養那彥寶著傳旨申飭○以巴里坤領隊大臣果齊斯歡為鑲黃旗漢軍副都統正紅旗滿洲副都統松福兼正藍旗護

軍統領○給陝西潼關華陰朝邑大荔五廳州縣被水被雹災民一月口糧貸給籽種房屋修費並緩徵本年額賦及榆林懷遠二縣額賦○乙卯諭軍機大臣等程國仁奏籌辦明年重運經行事宜一摺本年黃流穿運回空幫船現經設法輓過張秋缺口催趨南下尚可不誤歸次至明春重運北來該撫既稱東坡尚有九年糧船輓渡舊道較之正河輓緯工費倍省西坡本年辦有成效來年亦

仍可冀順行無論東西兩坡該撫總當豫籌萬全不但糧艘乃天庾正供斷不可令其阻滯即銅鉛船隻鼓鑄攸關亦須跟接前進其商船民船來往流通亦不可使有停阻之患程國仁此時不可豫存明年春間大工定可合龍之見務將運道一一籌備周妥即或武陟漫口遲至夏間歲工各船隻行入東境總可暢行無阻方不致臨事周章也將此諭令知之○緩徵江蘇上元江寧句容高淳六合

鹽城高郵泰東臺江都甘泉興化寶應長洲吳常熟華亭奉賢婁金山上海武進陽湖無錫金匱江陰宜興荆溪丹徒丹陽金壇溧陽山陽桃源安東銅山豐沛蕭陽山邳宿遷睢寧海沐陽四十五州縣淮安大河徐州三衛水災旱災本年及上年額賦漕糧○丙辰諭內閣朕閱宮史恭載乾隆二十六年九月內皇考高宗純皇帝諭九月初四日三更後壽安宮遮陽席片失火外面護軍巡更看見急喚

開門始將首領太監等驚醒詎伊等竟不開門自行撲救幸是席片燒燬易於撲滅儻火勢稍大不能救時始行開門豈不遲誤伊等不但失火有罪其不開門之罪更大在伊等或以宮禁嚴密不敢擅行開門為辭此時進內救火人等斷無敢行偷竊啓不畏死之理嗣後凡宮內園庭儻遇此等意外之事該總管等即行開門放外邊人等進內撲救如不即行開門必將該總管等從重治罪欽此仰

見我

皇考思深慮遠

睿照如神其時首領太監等俱分別發遣及罰當折磨差使本月十九日文穎館不戒於火朕當即傳旨令開西華門放人撲救並未令其攔阻乃該護軍等竟敢違背旨意或稱阿哥或稱中堂不准開門率將進內之王公大臣官員兵丁概行禁止甚至伊等該管之前鋒護軍統領等在柵外露面令其認識仍不

放進實屬悖謬是以降旨將是日直班之蘇
沖阿革去護軍統領副都統以示懲儆茲特
再行曉諭前鋒護軍營官員兵丁職司門禁
關繫綦重該管統領等平日當詳加教訓凡
事有經權時有緩急應查禁者嚴行查禁應
放行者即刻放行不得任意張皇有乖職守
亦不得因有此旨概從疏懈○又諭御史王
家相條陳豫省賑務一摺本年直隸河南山
東安徽等省均有賑卹事宜秋間近畿一帶

辦理粥廠朕特派卿員分往督放親身周歷
窮黎均得沾實惠至外省急玩成風委員查
賑往往視為具文並不親歷村莊逐戶挨查
一任胥吏虛開丁口侵冒賑銀如該御史所
稱託名使費開銷供應等弊皆所不免甚至
如山陽冒賑之王仲漢謀毒同僚釀成巨案
尤出情理之外此次凡辦理賑務省分各督
撫務當仰體朕視民如傷之意雖不惜鉅萬
帑金仍恐救困拯危未能周徧若再任墨吏

奸胥從中染指是直奪食於飢民之口苟有
人心何忍出此其各實力稽察革除積弊確
查戶口多設賑廠并嚴禁調驗剋減浮聞及
冊費名目俾恩澤下究以恤民艱而崇實政
○又諭御史年惇儒奏請杜書吏占缺一摺
直省州縣書吏充當經承者例有年限惟貼
寫則無報滿日期如該御史所奏近來往往
以貼寫代辦經承占缺多年不行更換實滋
盤踞舞弊之漸嗣後各該管官務嚴行查察

如有貼寫代辦經承者即照經承著役之例
年滿更換不准復充以杜巧偽○旌表守正
捐軀四川彭山縣民婦徐陳氏○丁巳諭內
閣御史蔣雲寬條陳河工積習一摺所奏俱
是國家興辦大工不惜鉅萬帑金以衛民生
一切工料均應覈實如該御史所奏麻料攬
雜沙土楷塚外實中空實難保其必無著吳
璣等即責成李鴻賓並由京帶往司員等認
真查驗如有前項弊端即行嚴參懲辦再朕

聞本年豫省除被水之區俱屬豐收產料甚多不過距工較遠運費增多前已准其量加例價吳璥等務飭廣為購運勿使工用缺乏如有贏餘亦可留備歲修不致虛糜其堆料廠座並嚴飭文武員弁晝夜巡查防範火燭勿稍疏懈至在工人數衆多一切需用什物不能不資商賈販運該御史奏稱工所玩好充牣甚至元狐紫貂熊掌鹿尾無物不有河員等隨意購置為鑽營饋送之資亦係從前

奏書

書

陋習琦善係本省巡撫著嚴行查禁此次工所除尋常衣服食物外如有珍奇玩飾閑塵列肆者立即驅逐毋准停留該御史又稱向來河工事竣所保人員多係親舊甚至有身未赴工名列薦贖者殊不足以服人心此次務當覈實辦理將來大工合龍保奏人員不得稍有瞻徇冒濫其投効人員內如有曾經奉旨永不敘用者著即行駁回不許留工委用僅有朦混保奏者一經查出特將本員

黜退仍必將吳璥等治罪不貸該御史又稱在工各員領有帑金任意挪移捐升希冀工竣照新銜議敘實開巧捷之門著明定章程凡辦工出力人員祇准照現在官職奏懇恩施不得以捐升階級請議敘以杜倖進○又諭御史俞肯堂奏偏隅被水勘不成災之區請飭地方官勸諭紳民豫籌疏濬蓄洩之方以工代賑一摺本年河南黃河漫溢下游被水之區甚廣業已蠲賑頻施俾災黎不至

奏書

書

失所惟勘不成災各鄉村為例賑所不及者全在地方官妥為安撫如該御史所奏疏濬積水修治溝洫濬淤築陂各事宜不但有裨田廬兼可使窮民工作著該督撫轉飭各州縣因地制宜勸諭紳民捐貲妥辦保衛桑梓以敦任卹而佐善施○命停止纂輯治河方略○旌表守正捐軀山東陽穀縣民女李氏

○戊午

上詣

奉先殿

壽皇殿行禮○諭軍機大臣等程國仁奏勘明黃流入海情形一摺並繪圖貼說馬營壩漫口奪溜穿運東趨現據勘明匯入大清河由青城一帶歸利津牡蠣口入海者約有六分由大清河溢出分流入徒駭河之需化久山口入海者約有四分黃河全勢東注大清河不能容納是以分支洩入徒駭河兩道趨海其勢不能使之合而為一圖內所繪惠民縣

黃河志卷五

李

哨馬口濱州姬家溝等處兩岸均有黃水漫溢所有惠民霑化濱州利津蒲臺等州縣被淹村莊諒必不少其迤上之荷澤濮州范縣等州縣及附河沿海各屬間亦同被淹浸著程國仁即速查明將應行撫卹之處奏請恩施現在正值冬令水落之時大清河南北兩岸已不免漫溢明年春水方生合龍以前水勢自必增長該撫當豫為籌及黃水經過之處附近民堰隄岸卑薄處所分飭各州縣勸

諭居民早為籌備毋使河流縱橫旁溢多淹田畝以衛民生將此諭令知之○戶部議准陝甘總督長齡疏報烏魯木齊蘆草溝塔西河頭屯三所開墾地九頃三十畝有奇照例升科從之○蠲緩山東章邱鄒平長山臨邑德汶上定陶鉅野蘭山郯城莊平華館陶恩臨清夏津武城濟寧金鄉嘉祥魚臺朝城新城齊河禹城單二十六州縣及德州濟寧東昌臨清四衛水災電災本年及上年額賦

黃河志卷五

李

大清仁宗受天興運敷化綏猷崇文經武孝恭勤儉端敏英哲睿皇帝實錄卷之三百六十三

大清仁宗受天興運敷化綏猷崇文經武孝恭勤儉端敏英哲睿皇帝實錄卷之三百六十四

纂修官 禮部尚書 臣 孫毓汶 等 奉 聖 訓 謹 將 臣 等 纂 修 實 錄 卷 之 三 百 六 十 四

纂修官 禮部尚書 臣 孫毓汶 等 奉 聖 訓 謹 將 臣 等 纂 修 實 錄 卷 之 三 百 六 十 四

纂修官 禮部尚書 臣 孫毓汶 等 奉 聖 訓 謹 將 臣 等 纂 修 實 錄 卷 之 三 百 六 十 四

纂修官 禮部尚書 臣 孫毓汶 等 奉 聖 訓 謹 將 臣 等 纂 修 實 錄 卷 之 三 百 六 十 四

纂修官 禮部尚書 臣 孫毓汶 等 奉 聖 訓 謹 將 臣 等 纂 修 實 錄 卷 之 三 百 六 十 四

校

嘉慶二十四年己卯十一月己未朔諭內閣

禮部議駁御史保福奏請添繙譯鄉會試謄錄一摺所駁甚是繙譯試卷與漢文試卷不同筆跡本難認識且謄寫點畫稍訛即於文理有礙乾隆年間曾經奉

旨祇須彌封無庸另行謄錄著為令此時若仍用八旗領催入場充當謄錄該領催等不盡通文義徒滋訛錯亦於防弊無益現在繙譯鄉會試已照文闈一律覆試自可鑒別真才其添設謄錄一事仍不准行○又諭斌靜等

奏請留減等廢員辦公一摺所奏非是賈炳係由遣罪減等仍應杖徒之人如喀什噶爾一時乏人差委暫留該廢員辦公候人接替尚屬可行不能因再留二年即將其杖徒之罪寬免著晉昌迅速派人前往喀什噶爾接辦所派之人到日即飭令賈炳回籍定地充徒○諭軍機大臣等戴均元等奏馳抵武陟查看壩工引河及購運料物情形一摺本年馬營壩漫口自奪溜以來已一月有餘兩壩運貯稽料僅有一千餘垛是大工辦理遲緩竟由購料稽延所致吳璥等因屢經降旨飭催始奏於十月二十七日開工現在所購料物不過十分之一即使儘數動用進占至五六十丈時料物不能接濟勢必停工以待所關匪細吳璥係欽差駐工其購料乃巡撫專責現在撥發帑項已將及千萬陸續到工無虞缺乏朕於來往河南大臣官員時常詢問僉稱該省本年未經被水地方秋成俱十分

豐稔。是產料不為不多。雖距工較遠。總當設法趕緊購運。歷來興辦大工。原不盡在附近地方採辦料物。豫省本係產料之區。尚謂轉運艱難。豈鄰省購運轉能捷於本省耶。琦善本有疏防之咎。今督辦料物。又如此延緩。著先革去頂帶。暫留河南巡撫之任。戴罪圖功。即嚴飭所屬於鄰近府州。廣為購買。無分晝夜。轉運赴工。如再有貽誤。吳璥等即行嚴參。定將該撫革職治罪。不稍寬貸。吳璥等一面督催挑挖引河。一面剋期進占。務期明年桃汛以前合龍。全歲大工。不可遲延。將此諭令知之。○賞順天等省鄉試年老諸生熊清泰等二十二名舉。合副榜有差。○庚申。上御乾清門聽政。○諭內閣。本日刑部議覆順天府審擬盜犯辛五請即處決一摺。初六日恭遇冬至。南郊大祀。明日即應齋戒。此等立決重犯。自應暫行停待。著刑部查明。

大祀齋戒前期如有停止立決重犯之例。此次辦理錯誤。該堂官等即自行奏請議處。若向無此例。嗣後每屆

南郊

北郊大祀之期。前五日後五日。凡在京立決重犯俱停止具奏。著為令。所有辛五一犯著於十二日辦理。○諭軍機大臣等。陳若霖奏查明各州縣墊解民欠銀米分限攤賠一摺。浙江省民欠地漕銀米。有先經州縣墊解於奏

銷案內報完。現屆普免積欠之後。自不能再向花戶催徵。此在從前經徵之員規避處分。挪款墊解。以欠作完。本有應得之咎。但念事閱多年。官非一任。且墊解完公。究與侵虧入己者有別。著免其治罪。所有自嘉慶元年起至二十二年止。無著民欠銀及米穀折價銀共九十五萬四千八十五兩零。著即照該撫所請。在通省現任各州縣分限十年按數攤賠歸款。該撫當責成各該知府飭屬屏除浮

費節省濟公自二十五年正月為始每年應補銀九萬五千四百八十兩零按季批解司庫該撫仍按年將提解歸補實數具奏一次毋任延宕嗣後嚴飭各州縣儘徵儘解覈實開叅毋得輾轉流交日久滋弊將此諭令知之○命裁養鷹處養狗處拜唐阿缺各一半○以光祿寺卿海齡詹事府詹事杜堦為內閣學士兼禮部侍郎銜○辛酉諭軍機大臣等前派文孚帥承瀛前往山東原為審辦徐文

誥控案其蘭山趙宗裕等控案不過就便交令審訊帥承瀛一人足敷辦理文孚接奉此旨即日帶司員一二人馳赴張秋查看明年重運北來由該處行走究以東坡西坡孰為順利先行具奏一面前往河南察勘引河高仰之處現在辦理情形若何所挑工段已有幾成如有草率怠玩之員即行指名叅辦順詣馬營壩工次點查運貯料物實有若干垛琦善等督辦是否認真抑或仍前遲緩據實

秉公具奏文孚仍在工次暫駐二十餘日專催料物飭令晝夜趲運不准片刻耽延如有延玩者即行嚴叅切勿迴護約計催集料物可以接濟工需不致停工以待文孚一面奏聞再行回京覆命文孚駐工之日即留心察訪此次工所有無奢靡習氣珍奇什物大小官員是否俱能實力辦公回京之日據實面奏將此諭令知之○

上以冬至祀

天於

圓丘自是日始齋戒三日○壬戌諭軍機大臣等本日據戴均元等覆奏籌議採辦碎石拋護壩根一摺此事當行則行當止則止戴均元等應據實直陳乃游移其詞先稱南河搶辦險工往往以此著效至堵合漫口建築大壩從未拋填碎石伊三人均未經議辦及此又稱此次壩基土性沙鬆拋護碎石亦係有備無患之道現在儘力採辦擬於壩尾淺水

處約拋若干丈即收護掃若干丈之益等語。看來伊等於此事仍屬依違兩可漫無定見。戴均元吳璥那彥寶均著傳旨申飭堵築大工以挑挖引河趕購稽料為最要之務至此項碎石係為豫防壩身壅塌之用俟臨時相機拋護此時且可置為緩圖吳璥等仍遵奉歷降諭旨令琦善趕緊籌運料物一俟料物應手即剋期進占又本日御史李瑩奏嚴禁包辦引河積弊一摺大工挑挖引河以備合

龍時啟放必須一律深通溜勢方可建瓴直注著吳璥等嚴飭承挑各員認真辦理嚴禁包工夫頭從中偷減挑成時該大臣等親往驗收如有情弊據實嚴參毋稍徇庇將此諭令知之○蠲緩直隸通武清大興宛平霸保定大城雄安高陽新安長垣東明開安肅青靜海灤平趙寧晉藺寧河文安灤清苑容城博野蠡河間獻交河天津滄鹽山元城大名清豐南樂鉅鹿冀新河衡水隆平四十三州

縣暨津軍同知所屬水災本年額賦及舊欠糧租倉穀並賑通武清霸保定大城固安永清東安雄安高陽新安長垣東明開十五州縣旗民○癸亥

上詣

南郊齋宮齋宿○甲子冬至祀

天於

圓丘

上親詣行禮○遣官祭

永陵

福陵

昭陵

昭西陵

孝陵

孝東陵

景陵

泰陵

泰東陵

裕陵○遣官祭

孝淑皇后陵寢○遣官祭

端慧皇太子園寢○遣官祭

先醫之神○停次日朝賀○以

南郊大祀執事人員恪恭將事賞還內閣學士色克精額二品頂帶贊禮郎哈寧阿四品頂帶並花翎明志藍翎侍衛仍兼贊禮郎行走○以都察院左副都御史齡椿為盛京工部侍郎工部左侍郎穆彰阿戶部右侍郎王鼎

署刑部右侍郎○命塔爾巴哈台叅贊大臣貢楚克扎布烏魯木齊領隊大臣多慶庫車辦事大臣來靈喀喇沙爾辦事大臣祥啟回京賞已革陝甘總督先福三等侍衛為塔爾巴哈台叅贊大臣以二等侍衛玉芳為烏魯木齊領隊大臣賞內閣侍讀學士嵩崇二等侍衛為庫車辦事大臣盛京工部侍郎明敏副都統銜為喀喇沙爾辦事大臣○乙丑命刑部尚書韓蔚在紫禁城內騎馬都察院左

都御史劉鏞之仍在紫禁城內騎馬○丙寅上詣

雍和宮行禮

宣仁廟

凝和廟

火神廟拈香○命駐藏幫辦大臣珂什克回京賞內閣侍讀學士靈海二等侍衛為駐藏幫辦大臣○戶部議准浙江巡撫陳若霖疏報富陽寧波定海寧海象山常山瑞安開壟

沙地蕩田一百八十七頃四十三畝有奇照例升科從之○丁卯除江蘇長洲縣捐置義塚地四十一畝有奇額賦○戊辰諭內閣初九日吏部議敘救火之王大臣一本過於優厚十九日紫禁城內直班之莊親王綿課托津常英瑞盛色克精額阿勒精阿不遵諭旨開門遲而關門早豈可邀恩甄敘六人俱著撤回議敘是夜幸未延燒若致蔓延朕必仰承

皇考不開門之罪更大之旨重懲不恕其禮親王麟趾等議以給予紀錄八次英和等加二級俱屬逾分王公等各賞給尚書紀錄四次大臣等各賞加一級會議此本之堂官俱著交部察議司官俱著交部議處此旨通諭京中大小衙門知之○又諭御史喻士藩奏祭祀禮成恭徹祭品嚴禁夫役混雜一摺所奏甚是

壇

廟大祀典禮綦重朕行禮以前執事之人尚知共矢恪恭至祭畢後各夫役等輒藉捧徹器品為名喧譁雜沓殊不足以昭敬慎嗣後太常寺堂司各官於祭祀禮成後不准先行散去即在彼督率夫役恭徹祭品祭器如有閒雜人等混入喧譁者立即查拏究辦以昭嚴肅○又諭御史喻士藩奏請飭禁駐防兵丁指餉借債關糧折價一摺各省駐防兵丁計月給餉按季支糧俾得養贍身家專心操練

乃近來漸染外省侈靡習氣如該御史所奏竟有任情揮霍豫指月餉抵償債負并將季糧先向糧員借支折色者陋習相沿殊於生計有礙著各該將軍副都統等隨時查察訓誡所轄兵丁勿許奢華妄費以時操演騎射如有指餉借債關糧折價等弊嚴行禁止庶生計日裕亦營規整肅矣○又諭御史尹佩荃奏請禁河工報銷使費一摺河工需用工料價值均經奏定果能實用實銷何慮書吏

從中駁斥若如該御史所奏辦工之時先扣存銀兩工竣解交工部以為書吏使費報銷時冀免挑駁實屬大干法紀現在興辦馬營壩大工著駐工各大員嚴行查察務令帑項咸歸實用不准豫扣使費以為將來彌縫地步並著工部堂官認真稽覈秉公銷算不得任意挑斥如查出書吏等有需索陋規情弊即行嚴究重懲以除積蠹○又諭朕每歲閱看宗室及左右翼前鋒營八旗護軍營圓明

園八旗官兵等步射共二十二處人數較多是以自二月起陸續閱畢即接閱隨園人員步射因思二月初間天氣尚寒官兵等因朕閱射製辦衣服不無浮費且近年官兵步射亦覺熟練若自二月二十日以後閱射天氣漸暖該官兵等製備衣服亦無需多費於生計不無裨益嗣後著將該二十二處人員作為兩班於明年令宗室左翼前鋒營左翼護軍營四旗官兵豫備步射後年令右翼前鋒

營右翼護軍營四旗圓明園八旗官兵豫備步射其派出閱射之王大臣等將應看之官兵亦照此分看此內宗室等與各營官兵不同人數較少除豫備朕閱射之一百名外其王大臣閱看人員著裁去一百名祇閱一百名明年朕即於二月二十日以後起閱看步射○諭軍機大臣等方受疇奏本月初八日由省前赴正定大名查閱營伍並督同道府妥辦開東長三州縣賑務等語前經降旨令

方受疇派人赴豫密訪工次情形現在方受疇親往正定大名一帶密迺武陟著該督即遣派委員改裝易服前赴馬營壩密行察訪此次大工辦理遲延究竟有何棘手之處所領帑項是否均歸實用有無似前次衡工奢侈濫費之事駐工各大員孰為實心任事竭力辦公孰為自圖逸樂恣意養安方受疇曾任河南巡撫該省屬員內如素知識實可信之員並可就近諮訪務得確情據實密奏不

可稍有隱諱再此次大工所用稽料約需二萬垛昨據吳璥等奏請令直隸協濟料一千垛朕因該督曾經面奏與豫省接壤州縣亦被淹浸難於購料未允吳璥等所請但近日體察豫省辦料情形其近工二三百里以內者俱已採買無遺此時已在距工四五百里以外購辦車運頗艱若歲內料垛不齊則桃汛前合龍之期恐致遲誤方受疇現赴省南除大名府屬災區外其廣平順德產料處所

有水陸運道可通者。該督再悉心籌畫。亦不必拘定一千垛之數。計可協濟若干垛。亦稍收集腋之助也。將此諭令知之。○又諭御史黃大名條陳粵東積弊一摺。據稱粵東有三合會名目。即從前之添弟會。招黨呼羣。多在廣州府屬之清遠從化韶州府屬之英德及廣西之梧州。北流遷江百色等處。且有入會之在官人役。豫為通信。包庇擾害閭閻。著該督隨地隨時留心察訪。並飭屬認真緝拏。從嚴懲辦。以靖地方。該御史又稱粵東承辦戰船員弁。向有剋扣工料價銀成數之弊。因此戰船不能堅固。出洋弁兵。益加膽怯。嗣後該督於此等船隻。務須親行查驗。嚴禁剋扣。有弊即叅。以期有備無患。該御史又稱粵省夷船帶來鴉片烟泥。一至海口。輒有餽送海關監督家人銀兩。每歲約十餘萬。或二三十萬不等。名曰私稅。鴉片流毒。為害甚鉅。而私稅之風。尤不可長。若有私稅阿爾邦阿及前任

祥紹必有入己之項。不可因係常福之子。稍存迴護。著該督嚴行查察。如有前項情弊。據實嚴叅。毋稍徇隱。該御史又稱粵東向多停柩不葬。溺女不舉之家。此等惡俗。均為人心風俗之害。該督當通飭各州縣實力勸化。出示嚴禁。以挽積風。至所稱粵東會試舉人應得水腳銀兩。輒為藩司書吏剋扣無餘。又稱學政衙門有勒索新科舉人填寫親供費用。及勒取新進文章門禮等弊。會試水腳銀兩。乃朝廷嘉惠士林德意。如有蠹吏侵欺。即行嚴辦。示懲。至親供規費。新進門禮。種種需索。殊非體恤寒畯之道。並著該督確查。如有此項陋規。嚴行飭禁。儻該學政教官以及書吏人等陽奉陰違。即行嚴叅究辦。以祛積弊。將此諭令知之。○以雲南督標中軍副將文祿為普洱鎮總兵官。○己巳晉封三等伯大學士明亮為三等侯。○撥江南太湖營千總一員移駐徐州豐沅添豐沅額外外委一員。豐

汎原設經制外委移駐趙莊集原設把總移駐蟠龍集夏鎮外委移駐雙溝集添馬良集經制外委一員楊家集經制外委一員裁提標中左前後城守五營並太湖福山江陰靖江楊舍孟和六營步軍二十名馬兵守兵各五十名添設趙莊集馬步守兵三十九名蟠龍集馬步守兵三十名雙溝集馬步守兵三十名馬良集馬步守兵三十名楊家集馬步守兵三十名從兩江總督孫玉庭請也○庚

午諭內閣帥承瀛奏覆審徐文誥家被盜一案所訊盜犯王大壯王三壯拒捕放鎗傷斃工人柏泳柱各情節與按察使童槐原訊無異童槐於審訊此案秉公辦理不避嫌怨著交部議敘程國仁前於按察使任內審轉錯誤著交部嚴加議處其初審原臬因疑妄斷之前任泰安縣升任知州汪汝弼革職發往烏魯木齊承委覆訊草率之候補知縣周承寬前任濟南府登萊青道胡祖福俱著即行

革職吏部知道部駁後委審仍照原擬頂詳之前署濟南府知府候補道錢俊著交部嚴加議處奉委訊供率將事主掌責之候補知州李國前經革去頂帶著不准開復交部嚴加議處餘著刑部速議具奏○戶部議覆尚書吳璥奏改投効章程一摺得旨部駁甚是河工投効歷經辦有成案並非始於此次吳璥等前既援例奏請令投効人員赴工捐輸嗣因御史條陳遂奏請歸部辦理實屬有心推諉此次武陟大工投効仍著吳璥等於部議條款奏定行知後照歷屆章程在外收捐俟合龍後再行歸部辦理餘依議○旌表守正捐軀山東汶上縣民張自書妻張氏○給山東濮范利津壽張東阿東平陽穀霑化蒲臺濱惠民十一州縣被水災民一月口糧及房屋修費並蠲緩本年額賦及河澤肥城聊城三縣額賦有差○辛未

聖祖仁皇帝忌辰遣官祭

景陵

上詣

壽皇殿行禮○壬申諭內閣朕本年六旬萬壽普免天下歷年正耗民欠及緩徵帶徵銀穀節經各督撫查明具奏以次降旨豁免內惟四川貴州二省並無絲毫蒂欠特加恩寬免該二省明年正賦十分之二以示嘉獎計所蠲各省積逋全數共銀二千一百二十九萬六千八百餘兩米穀四百四萬五千二百餘石此皆國家惟正之供朕以大慶普惠羣黎原係特沛之恩若小民等心冀七旬八旬九旬每屆十年必有蠲除遂不踴躍輸將州縣官更從中影射以完作欠則大違尊君親上之義即如此次各省積欠銀穀數至二千五百萬之多而江蘇安徽山東三省居其過半皆由該三省官疲民玩積習較之他省為尤甚嗣後各省督撫應隨時訓飭地方官催徵各宜盡職並曉諭小民應輸正賦及時完納

其情徵州縣責成督徵之員層層稽察如有捏報侵挪者據實嚴參其江蘇安徽山東三省更當整飭吏治化導民風漸除積習用副朕仁壽斯民至意○又諭御史陳鴻奏請清釐驛站積弊一摺所奏是直省驛站夫馬車輛各有定額由京奉差人員部頒勘合其應用夫馬俱按官職大小填註數目乃外省由驛差員竟不填註牌票於定例外多用車馬至數倍十數倍並有夾帶客貨者不特疲勞驛騎且派用民車擾累閭閻不可不嚴行查禁著各督撫嚴飭有驛州縣一應差務俱遵照定例支應其本省差員亦照部頒勘合式樣填註夫馬數目如有額外需索者報明該督撫據實劾參至上司家眷幕友尤不應擅用官驛夫馬並著通飭嚴禁僮僕倚勢騷擾州縣濫行供應一經查出定行嚴懲不貸○諭軍機大臣等戴均元等奏查勘估挑引河並嚴催趕緊興辦各摺馬營壩漫口前於十月

二十七日興工堵築。朕朝夕盼望。馳奏進占情形。夜不成寐。乃本日報到。吳璥等所奏。祇係籌挑引河。催解餉銀。進占事宜。並無一字奏及。其摺係初十日由工次拜發。距興工之期已十三日。何至尚無丈尺可報。吳璥等遷延觀望。實屬疲玩極矣。吳璥那彥寶。葉觀潮。琦善著傳旨嚴行申飭。此時寰宇乂安。惟此河工一事。關繫國計民生者甚鉅。朕宵旰焦勞。無時或釋。吳璥等奈何不知仰體朕意。上緊趲辦。至挑挖引河集料進占。原可同時並舉。吳璥等屢奏。皆云於明年桃汛前合龍。即應按日排算。方可剋期無誤。今興工後已虛拋半月之久。節候已屆隆冬。屈指桃汛以前。為時有幾。豈不坐誤事機。伊等每云一氣呵成。亦復談何容易。且亦必須呵而後成。豈空言坐待。即能集事耶。此次大工。朕定於桃汛前歲事。屆時儘有遲誤。吳璥那彥寶。琦善三人皆當治罪。葉觀潮本係棄瑕錄用。尤當從

重治罪。吳璥等不可不勉之。又勉一面催辦。稽料一面挑挖引河。即行趕緊進占。按期奏報。勿再遲延。至下段引河內儀封三堡。長五六里。應挑深二丈七八尺。底寬二十六七丈。及積淤稍薄者五十餘里。應挑深二丈內外。此一役著專派按察使德奎駐工督辦。其挑挖土方。辦有若干。成由該集司自行隨時具奏。限於兩月內挑竣。不准踰期。其上中兩段及下段之睢寧迤下。俱著吳璥等立定期限。督催趕辦。總期合龍時開放。一律通暢。速歲大工。將此諭令知之。○甲戌。諭內閣御史俞肯堂奏。蠲緩恩旨。請飭禁吏胥捺攔。謄黃一摺。各直省奏到偏災。應緩應徵。一經奉有恩旨。即當謄黃宣布。俾小民及早周知。若吏胥得以任意捺攔。則影射朦徵。諸弊由此而起。本年直隸河南山東安徽江蘇等省。均有加恩蠲緩地方。著各該督撫嚴飭被災各州縣迅速宣貼謄黃。務令城鄉市集共見共聞。該

地方官仍隨時親歷稽查。庶隱漏侵欺之弊。易於發覺。實惠得以下究。用副朕軫卹窮黎至意。○乙亥。諭內閣。前派曹振鏞。移克登額。查估正陽門城樓應修工程。本日據曹振鏞等奏。正陽門大樓等處。雖有虧舊處所。大段情形尚屬穩固。時屆寒凍。難以施工。明歲南北方嚮亦屬不宜。請暫緩興修等語。所奏甚是。向來欽派查估大臣。總不過據原報情形迎合見好。附會覆奏。以便徇私冒銷。其方嚮應否修造。並不講求。殊失辦方協紀之義。嗣後凡有勘估工程。著欽派大臣帶領欽天監官一員。同往相度方嚮。如果合宜。將應修情形覈實勘估。若方嚮不宜。即工程緊要。亦據實奏明。暫緩興修。摺內俱將欽天監官員銜名聲敘。以昭詳慎。勿得稍有遷就。○丙子。上幸瀛臺閱冰技。○緩徵安徽太湖望江阜陽盱眙天長壽宿定遠桐城潛山十州縣。及屯坐各衛水災。早災本年及上年額賦。賑毫蒙

城太和懷遠鳳陽靈璧鳳臺五河泗九州縣及屯坐各衛災民。並給泗毫蒙城太和盱眙天長六州縣勘不成災地方貧民一月口糧。○丁丑。諭內閣。御史李瑩奏。請禁八旗官學積弊一摺。所奏是國家建立官學。設有滿洲蒙古漢人教習。分別訓課。原以培養人材。兼資教育。乃近來視為具文。漸形廢弛。如該御史所奏各學官學生。並不常川入學肄業。該教習等亦祇於查學之期。始行到學。虛開功課。至報滿時。如無成效。輒以通融塞責。陋習相沿。殊失設學本意。著通諭查學大臣及國子監堂官。不時前赴各學稽查。毋許豫示日期。如教習內查有曠功不到者。即行指名叅處。其官學生不入學肄業。及到學而不遵約束者。亦即嚴行戒飭。教習報滿若無成效。仍令留學。不准通融。捏報務使師道克端。生徒嚮學。用收興賢育材之效。○諭軍機大臣等。據給事中王允輝奏。十八年黑龍江凱旋官

兵攜帶幼孩共四百八十八名。幼女十七口。惟查出王玉等九名。解送原籍。交親屬認領。近聞從前查辦時。該弁兵利其服役。或希圖售賣。逼令自認。並無親屬不願回籍者甚多。嗣於二十三年。有滑縣民人張均劉之瑤。傅學曾等。前往認領劉之瑤。又與其同鄉張氏之子名扁頭者。相遇。曾託伊寄信家屬。又有劉學曾在黑龍江城內。與其親甥撞遇。赴刑司認領。以言語參差不准給領。又有永順紙房周文獻。賈作養子。改名周繼善。及得勝弓鋪買作奴僕者。皆查辦以後之事。可見前此辦理不實不盡等語。前此吉林黑龍江凱旋官兵攜帶幼孩。交該將軍等查明有家可歸者。俱解交原籍。令親屬認領。現在黑龍江官兵所帶幼孩。又屢有續往認領者。則前此查辦不實可知。吉林亦事同一律。著富俊松寧再行確查。並曉諭該官兵等所帶幼孩。現多長成。如有記憶鄉里及親屬姓名。願回原

籍者。俱令報出。照十九年成案一體解送回籍。俾令完聚。如有抑勒隱匿者。查出照例治罪。勿得仍前草率。致多遺漏。將此諭令知之。○戊寅。諭軍機大臣等。朕聞盛京近年賭風甚熾。往往開場設局。招集多人。羣小狎居。習於匪僻。大為風俗之害。從前富俊在將軍任內。查禁頗嚴。稍為斂戢。及賽沖阿接任。一味和平。該賭匪等。又復肆無忌憚。松筠素性寬緩。當力加振作。訪有聚賭場局。即行嚴拏。究辦。使兵民等咸知戒懼。不敢為非。正所以保其身家。不獨賭博一事。凡事皆當留心約束。不可一味姑息也。將此諭令知之。○命裁黏竿處拜唐阿缺三十六員。○撫卹琉球國遭風難夷如例。○己卯。除江蘇元和縣捐置義冢地一十二畝。有奇。額賦。○庚辰。上幸瀛臺閱冰技。○刑部尚書韓蔚因病乞假。先之。以戶部尚書盧蔭溥署刑部尚書。○以江南河標中軍副將塔青阿為江西九江鎮

總兵官。○辛巳命直省各將軍督撫等嗣後凡回賞如意俱無庸奏謝。○壬午諭內閣國家優待臣工王貝勒等例在紫禁城內騎馬滿漢大臣年老者恩賞在紫禁城內騎馬原以曲示體恤節其趨步之勞近聞滿洲大臣中有年老艱於上馬者漢大臣中有本不諳乘騎者雖蒙恩賞僅令人牽馬隨行嚴冬風雪依然徒步蹣跚深堪憐憫現在儀親王年逾七旬成親王將屆七旬均係朕兄定親王綿恩雖係朕姪亦年逾七十均著加恩即令肩輿入直慶郡王永璘俟年至六十亦准肩輿入直其例應禁城騎馬之王貝勒等及曾經賞馬之文武大臣滿洲人員年至六十五歲以上漢員年至六十歲以上者俱准其肩輿入直至應下馬處下輿朕厚恤臣工若此次降旨之後應乘輿者仍徒步行走牽馬後隨則是不知朕恩其矯情之過難以寬恕其精力強健尚能策騎者亦不能因有此旨概

坐肩輿以耽安逸。○又諭成格奏晉省缺額丁銀請捐廉歸款一摺奇嵐保德二州地本苦寒罕通貿易現在寄籍者陸續還歸即土著亦多遷徙以致丁銀缺額攤賠滋累該撫奏請在通省養廉內每年照數攤捐殊可不必國家惠愛黎元既知小民濟苦情形豈尚計及錙銖徵收缺額之賦所有奇嵐州缺額銀一千五百八兩零保德州缺額銀七百一十七兩零著即加恩按年豁免以示朕勤恤民瘼至意。○又諭御史喻士藩奏請嚴飭交審案件不得偏聽委員審斷一摺直省京控之案一經降旨交該督撫審辦即與欽差無異自應提案親鞫即或案犯衆多不能不委員集訊亦當詳辦曲直自持主見豈可偏聽委員致有屈抑嗣後各該督撫遇有交審案件務當一秉大公持平聽斷實則執法嚴究虛則按律坐誣以息告訐而清訟源。○又諭御史蔣雲寬條奏慎重河防一摺所奏俱是

各省沿河設立廳汛員弁原應駐居隄所常川保護若僅於大汛時駐工防守平日任其偷閒遠離汛地則兵夫等無所統束亦必相率走避一切防範之具盡成具文著各該河督嚴飭各員弁無論是否汛期均督率兵夫巡邏隄岸如有擅離汛署者指名嚴叅以重職守其河營兵丁例有定額平日應責令學習椿埽並填補溝壩堆土植柳等事以習勞苦若空缺不補一遇險工不敷差委現募民夫應役豈不坐致貽誤著該河督嚴行查察均令挑補足額以裕巡防至沿河工段平時雖分界址遇搶險時皆當不分畛域併力防護僕值溜勢改趨本汛官力難兼顧其上下汛官即應督率兵夫幫運料物彼此互相策應方能不失機宜若旁觀推卸致誤要工查明一併叅處示懲該御史又稱各處兵夫築隄有即在隄腳下刨挖取土者修隄取土應在十五丈以外本有定例若近隄刨挖日久

隄身單薄何以抵禦洪流並著該河督嚴申禁令責成廳營員弁認真稽查有犯必懲以固隄防而重修守○福建漳州鎮總兵官馬建紀因病休致以興化城守協副將蘇勒芳阿為漳州鎮總兵官○免浙江仁和錢塘海寧餘杭臨安嘉興秀水海鹽石門桐鄉歸安烏程長興德清武康安吉孝豐十七州縣及嘉湖衛水災本年額賦並緩帶徵銀米○癸未

上詣

壽康宮行禮○以候補三品京堂王引之為通政使司通政使○甲申賞八旗兵丁一月錢糧○乙酉上幸瀛臺閱冰技○丙戌緩徵廣東歸善博羅增城三縣水災本年及上年額賦並給房屋修費賞卹淹斃人口銀○除江蘇川沙廳義冢地三十八畝額賦○丁亥吏部奏查明坐選原缺知州袁輝並未回籍起復鑽營保舉

例應革職欽差侍郎那彥寶率行保奏應降
 調一摺得旨袁輝著照部議革職那彥寶率
 行保奏本應照部議降三級調用但伊現在
 武陟督辦大工一時未便更易著加恩改為
 降三級留任那彥寶如能迅將大工堵築合
 龍仍當量予恩施儻不知愧奮未能剋期歲
 事則降調不足蔽辜定行治罪不貸○戊子
 調江西按察使誠端為甘肅按察使以內閣
 侍讀學士程祖洛為江西按察使○以烏魯
 木齊都統慶祥為伊犁參贊大臣前任塔爾
 巴哈台參贊大臣貢楚克扎布為烏魯木齊
 都統

實錄卷一百一十五
 聖

大清仁宗受天興運敷化綏猷崇文經武孝恭
 勤儉端敏英哲睿皇帝實錄卷之三百六十四

實錄卷一百一十五
 聖

奏外省巨盜通逃。往往有在京城捕獲者。亦緣地大人衆。防檢難周。遂多乘閒洩跡。著步軍統領衙門。及五城御史。分派兵役。各按地面。嚴密稽查。其內城空閒地面。徑路旁通。為堆撥柵欄所不能阻者。並著步軍統領衙門查明。設法禁禦。以重巡邏。○以候補三品京堂同麟。為都察院左副都御史。詹事府少詹事李宗昉。為詹事。候補三品京堂齊布森。為光祿寺卿。○賞山東等省鄉試年老諸生曹

虎稽等十二名。舉人副榜有差。○給河南延津。滑二縣。被水災民一月口糧。蠲緩本年額賦。河工加價等銀。並緩徵汲縣被水村莊額賦。○辛卯諭內閣。御史朱鴻奏。請嚴諱訟唆。訟之禁。以清訟源。一摺。所奏甚是。地方命盜案件。一經呈報到官。速為緝拏。審理自然。獄訟日稀。乃近日地方官。因循敷衍。積習相沿。平時不能整飭。遇有報案。輒先計規避。本身處分。置小民冤苦於不問。多方諱飾。如該御

史所奏。或開脫縱匿。改供賄和。或宕延拖斃。事後消弭。及承審逾限。又改填日月。種種弊端。皆所不免。從前乾隆年間。直隸省盜犯馬十一案。因延玩日久。

皇考高宗純皇帝。特加嚴懲。將該省大吏。分別罷譴。近來各省命盜等案。有拖延至數年十餘年之久者。較馬十之案。為尤甚。特降旨通行飭諭。嗣後各督撫。務當嚴督所屬。凡有司牧之責者。各宜勤恤民隱。遇事秉公速辦。勿

再存化大為小。化有為無之見。扶同掩飾。以啟上控之端。至訟棍教唆。把持情本可惡。然亦由地方官詳案先多虛捏。聽斷又不公明。使彼得以操其短長。果能廉平公正。剔弊釐奸。境內訪有訟棍。立即執法嚴懲。亦何慮其挾私反噬乎。夫政平訟理者。治化之原。各督撫當以此為先務。告誡羣僚。同心策勵。則吏治清而民風自淑矣。○又諭。前降旨諭令在紫禁城內騎馬之王。貝勒。滿漢大臣。除精力

強健尚能乘騎者聽其自便外如年老不能據鞍或本不諳乘騎俱分別年歲准其肩輿入直此乃朕優待臣工曲加體恤恩意並諭以若仍前徒步則是故為矯情其過難恕乃自降旨以來風聞仍有徒步行走者是以朕引年惠下之恩毫不知感其心難問其意何居此次姑不明言其人著再行申諭嗣後若仍似此矯情立異不遵訓諭經朕聞知必指名以斥其非另降諭旨彼時毋悔○癸巳

上詣

雍和宮行禮

火神廟拈香○甲午

孝惠章皇后忌辰遣官祭

孝東陵○予江西故河南懷慶府知府杜琮山

西故廩生議敘主簿銜靳第八祀鄉賢祠從

巡撫錢臻成格等請也○乙未諭內閣御史

陳繼義奏請飭邊缺人員不得逗遛省城一

摺所奏是國家設官分職各有攸司苗疆海

疆烟瘴各缺設立專員以資彈壓並定有俸滿推升之例自應常川駐守以重地方如該御史所奏邊缺人員或逗遛省城或附居府城非藉為鑽營即自耽安逸如四川松茂道不駐茂州廣東瓊州同知不駐崖州殊非覈實之道著將攸銛阮元查明該員應行駐劄之處飭令各回本任此外雲南貴州四川湖南廣東廣西各邊缺如有似此不赴本任者俱著該督撫嚴行查察不許私離職守以杜趨避而重邊防○諭軍機大臣等慶保奏湘潭土民互毆一案現審情形一摺據稱五月初七日本地人嘲笑戲班被江西客民毆打經典史將受傷之本地人許一等四名交公所調養初八日江西客民復將本地人劉一元等十五人捉進同許一等一併捆縛等語江西客民毆打湖南土民該典史既將傷重土民許一等交給公所調養何以次日江西人復將土民劉一元等一同捉進捆縛此十

九人曾否被江西人戕害。究竟作何下落。摺內並未敘明其殺人祭符。及釘人煮人燒人各謠言。現據訊係已革府書梁金堂。保正唐日新造播。其意因何而起。該二犯到案。是否供認有無確憑。此案客民土民互鬪互控。謠言四播。湖南紳士。袒其同鄉。周系英。平素鯁直。以二品大員。因此革職。回籍。慶保等所訊供情。若確。伊自然閉門思咎。若稍有不確。周系英訪得憑據。豈肯甘心。又李堯棟另摺內

稱。地方官辦理此案。於江西客民驗看情形。既多不實。一任地保書役。從中串捏。而於本地民人之挾仇故殺。失察私埋多命。至今始行究出。不免有化大為小。情事等語。所云挾仇故殺。私埋多命。各情。慶保摺內並無一字提及。即此以觀。慶保李堯棟會審此案。尚有意見不符之處。豈足以成信讞。慶保李堯棟務各屏除成見。和衷訊辦。不可稍有偏執。若既經擬結。將來復有翻控。經朕查出。恐伊二

人不能當其咎也。將此諭令知之。○丙申上幸瀛臺。閱冰技。○丁酉。諭內閣。成寧奏。議覆前任御史費丙章條陳。漕務積弊各款。漕運事務繁重。惟在該漕督實心整頓。剔釐弊端。如各省幫船水手。繻夫。恃眾滋事。漕委員弁需索開費。地方胥吏。朋比分肥。及丁舵人等盜賣米石等事。該漕督安能一一目覩。惟在嚴飭各糧道運弁等。實力查禁。有犯必懲。自能漸戢刁風。其各州縣交兌漕糧。執斛執槩。

向有舊章。著仍循其舊。無庸另議。更張。至各幫所派總運。丞倅。原以稽察通幫事宜。必須遴委賢員。方足以資約束。嗣後著秉公派委。如有怠玩職守。以致弁丁人等滋事舞弊者。查明一併叅處。以專責成。該漕督即將議定章程。飭屬實力奉行。勿得視為具文。有空言而無實效也。○又諭。御史張元模奏。請秉公挑養育兵一摺。八旗生齒日繁。挑補養育兵丁。原以調劑旗人生計。該御史奏稱。近聞揀

批時往往聽情徇庇。究無告者。轉致向隅。祇係空言。並無指實。定例各旗挑缺時。均有查旗御史。公同閱看。嗣後均令按期到班。如有揀選不公者。即著指名奏。勿稍徇隱。○又諭。御史張元模奏。請飭禁州縣縱役截拏商旅舟車一摺。通衢州縣。遇有緊要差務。官設車船不敷。不能不偶資民力。若私設廠店勒索賣放。例有明禁。該御史所奏良鄉縣於寶店開設車票局。新安縣雄縣新城縣各設立船廠。縱令胥役需索錢文。是否實有其事。著直隸總督查明。如有前項情弊。即行嚴禁。以杜擾累。而安行旅。○又諭。御史李瑩奏。請嚴禁新選州縣違例借債一摺。州縣官將文憑私押借債。本有例禁。若到任後挪移公帑。以償宿逋。該管上司一經查出。立即叅揭。不難逐案懲辦。若如該御史所奏。於州縣官在京候選得缺。及赴任時。先令步軍統領。順天府。五城暨督撫藩司訪察。拏究候選官員私

借債目。步軍統領等。焉能周知。因此逐日派人訪查。不特紛擾難堪。且亦無此政體。所奏不可行。著無庸議。○又諭。御史李瑩奏。請禁諱盜縱盜積弊一摺。民間呈報盜案。地方官一經勘明。即應通行詳報。勒限緝捕。以期除暴安良。乃近日州縣官迴護處分。諱盜為竊。竟成錮習。甚至如山東徐文誥家被盜一案。不究放鎗傷人之巨盜。轉將事主問擬重罪。使非平反得實。竟成冤獄。此風若不亟行挽正。則為盜賊者。明知地方官甘心諱匿。必至肆無忌憚。壞法殃民。何所不至。著通諭各督撫。嚴行飭禁。嗣後所屬州縣。如有諱盜不報。或故勘事主。縱容捕役需索抑勒者。立即嚴叅懲辦。毋稍姑息。以杜奸宄。而靖閭閻。○命刑部左侍郎廉善。馳往山東曹州府審案。並命帥承瀛會審。○以吏部左侍郎恩寧署刑部左侍郎。○緩徵山東齊東海豐章邱鄒平鄆城博興東平茌平博平聊城十州縣水災

新舊額賦漕糧有差並給齊東災民一月口糧○戊戌諭內閣張聖愉條奏修武備除盜賊理獄訟一摺各直省設立營伍兵丁馬匹原應綜覈名實毋使缺額散餉之日地方文官眼同散放例有明文若各營存留空糧名額冒領餉銀以肥私橐名實不符於武備所關匪細著各該督撫提鎮覈實嚴查毋令再有空糧名目並責令該地方文員遵照定例眼同按名散放餉銀如有短少虛冒情弊即

行稟揭該管上司將該將備等嚴參治罪以肅戎政至緝捕盜賊應先除窩頓之家如該御史所奏直隸山東安徽等省捕役包庇賊窩按月分贖甚至不肖典史亦從中染指盜賊復何所畏忌著直隸山東安徽各督撫飭屬嚴查訪明積窩蠹役先行剷除以戢奸宄而安良善該御史又稱各省上控案件該上司往往仍批交本府本縣俾得設法迴護甚至陵虐反坐種種情弊均所不免嗣後各省

督撫遇有控告重大之案務當親提訊問或另委廉明之吏秉公審斷勿許仍交原辦之員縱令掩蓋彌縫使民隱得以通庶評訟之風可冀日靖矣御史為朝廷言官所言是朕必立見施行既奉明旨必應實力奉行若置之不辨即以違旨治罪不恕○命工部左侍郎穆彰阿署翰林院掌院學士○己亥諭內閣繼昌奏審辦夥劫放火盜案請將據實檢舉之署知縣免其附參一摺此案署永福

縣知縣林光棟先據屍親蘇友生呈報失火燒斃七命勘驗通詳嗣因編查保甲訪獲丐匪蔣老滿究出馬添材等夥劫放火燒斃事主實情即自行檢舉隨同審正毫無諱飾甚為可嘉林光棟著寬免失察處分仍加恩無論何項知縣缺出即行奏補以示獎勵餘俱著照所議完結各省州縣官遇有盜案如能似此毫不迴護據實更正者非但免其處分仍當予以恩施慎勿相率諱匿自蹈重咎○

庚子諭內閣。據綿課等奏。本年除夕。祭太廟。阿哥獻帛。可否暫戴三眼花翎。請旨一摺。朕為阿哥時。恭祭京城

壇。

廟暨謁盛京。

三陵。均曾獻帛獻爵。並未戴翎。去歲阿哥等隨

往盛京恭謁。

三陵。獻帛時。亦未戴翎。今綿課等因阿哥等獻帛。奏請戴翎。甚屬糊塗。所請不准。行綿課綿

恩。著交宗人府察議。伊二人不必管理。

太廟演禮等事。著冰肅親王永錫。鄭親王烏爾

恭阿。管理。○又諭。王鼎等奏。查獲違例囤積

店戶。請勒令平糶一摺。涿州馬頭村南北二

店。囤貯糧食。至二萬三千餘石之多。該店戶

違例居奇。實於民食有礙。著照所議。即飭該

州關傳各國戶。除未逾例限者。聽其隨時出

糶外。其逾限各戶。勒令於明年二月初間。酌

覈市價。量減二成。即在該二店設廠糶賣。由

各國戶自行經手承買之人。分別男婦。不得過三斗。該店戶如能辦理妥協。從寬免罪。若仍復欺詐。樊混。即行按律懲辦。○以故奈曼扎薩克郡王巴勒楚克子阿旺都瓦第扎布襲爵。○以刑部右侍郎吳邦慶在湖南巡撫任內。於湘潭縣商民互鬪一案。不即親往查辦。案懸多日。降通政使司通政使。調吏部右侍郎吳芳培為刑部右侍郎。以通政使司通政使王引之為吏部右侍郎。○旌表逼嫁捐

軀安徽建德縣民汪德全妻舒氏。○免直隸

固安永清東安三縣水災旗租。○免湖南鳳

凰乾州永綏古丈坪保靖麻陽瀘溪七廳縣

旱災額賦。○辛丑。

上詣

大高殿行禮。○幸北海。閱冰技。○諭內閣。姚祖

同奏。安徽省有短交倉庫正雜款項之員。現

任者。請先行停其升調。候補試用者。先停其

署事。補缺等語。州縣虧缺倉庫錢糧。本有應

得之罪予限完繳已屬寬典若仍准其升調署補或賸削民膏以補虧項既於吏治有妨或挪移完解舊虧雖補新虧又增仍與未完無異此不獨安徽一省宜然著通諭各省督撫嗣後凡查有虧空之員現任者俱停其升調候補試用者俱停其署事補缺仍隨時咨部以備查考毋得稍有徇隱○又諭姚祖同奏查明候補試用虧空各員初限屆滿分別覈辦一摺安徽省候補試用應追虧空各員

立限完繳原議章程虧欠五千兩以下者屆限不完參革監追查封備抵現據該撫查明除限滿全數完交者二十員及未完各員內尚有應行分別覈辦六員外其試用知縣劉雲祇虧銀三百兩改教知縣蘇嘉善祇虧銀五百兩降調知縣周之桂未完銀二千兩已有繳抵之項若照原議章程概予參革監追籍沒未免與虧缺數多者無所區別著照所請將劉雲蘇嘉善周之桂三員均先行革去

頂帶停其選補署事應引見回籍者悉行扣留俟全數完交後分別開復辦理○諭軍機大臣等據御史袁銑奏湖北江夏漢陽兩縣均設有班房其漢陽班房名曰東廊西廊凡遇傳質人證先交飯店縣役索詐不遂勾通門丁捉押東廊西廊非予重資不能釋放派管此處門丁一歲可獲數千金江夏班房名曰自新所又有上班房下班房東班房西班房等處各班房之外又有所謂關廳者百姓

名之曰枉死城係曾經拐帶發覺者有罪名之劉么監守遇有戶婚田土細故其族鄰鄉保之屬無論紳士平民一經牽連傳喚到省即於此處押禁有財力者猶得行賄釋放無財力者或數月數年不得脫往往以鐵索聯拴數人綴以猴兒重石百般困辱甚或械其手足昏夜叫呼酷刑惡氣與飢病交迫瘐死其中者相繼不絕迨押斃之後則令縣役倒提年月書立保狀總以在保病斃為詞彌縫

銷案以致小民含冤。無路控告等語。州縣官聽理詞訟。原應勤於審斷。隨到隨結。其案內牽連人證。祇須取保備質。私設班館。例有明禁。著慶保張映漢。即行確查該二縣。如有前項班房。關廳名目。立即嚴禁。其丁役等。如有濫押索詐等弊。查明按律治罪。並通飭各屬。遇有控案。速為審理。不得違例押禁。無辜若陽奉陰違。即行嚴叅。示懲。將此諭令知之。○壬寅。以故二等子蔭德布子雙喜一等男范

樹廷子正容。各襲爵。○予閩浙交界出洋勦賊淹斃兵丁陳日生等十九名。出洋緝捕淹斃兵丁林太全等三名。卹賞如例。○癸卯。諭內閣。御史沈學廉奏。請申門禁一摺。午門為禁城重地。值鑾輿出入之期。執事人員。本有例准由該處乘馬者。然如該御史所奏。僕從家人。乘馬馳驟。雜沓喧譁。未免漫無約束。著傳諭護軍統領等。嗣後凡遇鑾駕出入午門。俱飭知該管官校。先期留心查察。詢明有差

使者。准其將所乘之馬。牽至門外。其無差使者。不准一概混入。以昭嚴肅。○又諭。御史沈學廉奏。各省解京飯食等銀。請覈實交收。以杜弊混一摺。直省解京飯食等項銀兩。原為各部院大小衙門辦公經費。例應解員親赴投批。按期交納。若如該御史所奏。各省委員管解到京。每有銀號從中包攬。勾通書吏。瓜分使費。甚有挪用抵換情弊。及各衙門出票查催。仍復延不交納。殊非慎重辦公之道。著

通行飭禁。嗣後委員解銀到京。不准由銀號代交。務各遵照定例。親赴該衙門投批。如有書吏壓攔文批。勒索使費等弊。該解員即行據實呈明。以憑究辦。○諭軍機大臣等。吳璥奏。西壩上水邊埽。隨鑲隨墊。埽前水勢已深。至五丈。現趕辦挑水壩。仍由西壩進占。自初一日至初十日止。除搶鑲大壩十四丈。邊埽二十四丈外。又續進占二十一丈。連前共得八十一丈。尚有未得二百四十六丈等語。覽

奏實深焦急。大壩進占十日。又得二十一丈。按日計算。則未得之二百四十餘丈。須至四月中旬。彼時桃汛已過。水勢漲盛。又將如何施工。現在雖因邊埽陡墊。埽前水勢驟深。進占較難。然總須趕緊搶辦。步步追壓。堅實。後占一經穩固。即迅速接進。前占務於明年桃汛以前堵築合龍。不准稍有遲緩。至另摺奏請續撥工需銀一百六十萬兩。現有兩淮商捐銀二百萬兩。除撥給豫省明年歲修銀三

十萬兩外。尚存一百七十萬兩。已由四百里諭知延豐。令將此項全行撥解武陟工次。限於明年正月內解齊。較之所請又多發銀十萬兩。吳璣等當思國家經費有常。直省一應俸餉賑恤何事。可以缺乏。豈能專供河工之用。此次馬營大工。已籌撥銀一千一百餘萬兩。儘此動用。實已足敷辦理。如有餘剩。仍奏明歸款。此後不准絲毫續請。即再行續奏。亦斷不能復邀俞允也。將此諭令知之。○甲辰

諭內閣。本日八旗王大臣等。以頒賜八旗通志謝恩。八旗通志所載。要不出教養二字。滿洲蒙古漢軍。皆係國初時隨來。是以八旗子弟。性本淳厚。茲因日久。漸染流俗。習尚浮華。不知學習技藝。此皆各該都統副都統平日不善教養。挑缺時。只論家口。挑取並不教訓。令其勤習技藝。嗣後八旗都統等。務將八旗子弟。善為訓導。俾其勤習技藝。復歸淳厚。庶不負朕教養旗僕之至意。○以故三等侯勒

保子英惠襲爵。○以甘肅永固協副將達凌阿。為巴里坤總兵官。○蠲緩甘肅宜禾縣霜災本年額賦有差。並貸災民口糧。○乙巳。上御乾清門聽政。○諭內閣。御史黃玉衡條陳直省積弊一摺。書吏舞弊。點詐百出。如該御史所奏。於衙門左近。設立私館。傳遞消息。粵省現有外馬放光。收光渡期等項。名目各省。恐亦不免。著各督撫嚴行查察。一經訪獲。從重究辦。以肅關防。其衙門差役。例有定額。不

准濫設若多一名即多一舞弊之人該御史所奏粵省擇食種松等弊大足為害閭閻至會匪承充差役潛通信息尤當實力查拏無任日久滋蔓貽患地方又各衙門刑錢幕友勢不能缺然或上下勾結挾制本官交通書吏則必應嚴行懲創各督撫務實力稽查遇有作奸犯科者究明重辦勿稍姑容至州縣官家丁長隨但取數用而止濫薦濫收最為惡習此輩盜權通賄何所不為並著嚴行飭

禁凡膺民牧者各宜潔己自愛拒卻情面以期慎守官方勉為良吏○諭軍機大臣等松筠奏覈查災戶情形懇於新正展賑一摺各直省閒過水旱隨時加恩撫卹復諭令該將軍督撫等查明次年青黃不接之時應否接濟該將軍督撫各據地方情形將應如何懇恩之處具摺覈奏統於新正降旨分別施恩松筠曾任軍機大臣並各省總督諒所素悉茲據該將軍奏稱盛京等處旗民被災八九

分各戶可否於新正量加展賑以資接濟出自天恩等語該將軍既不將必應接濟之處切實聲明又不將展賑幾月之處酌擬奏請朕豈能懸為臆度降旨施恩松筠辦事實屬顛預著傳旨申飭所有奉天承德等州縣被災戶口著該將軍再行確覈將應如何接濟之處據實覆奏再降諭旨將此諭令知之○又諭本日據義州城守尉福桑阿呈遞靈芝一本並奏片一件詢係福桑阿獲有靈芝松

筠查照本草所載名目繕寫奏片交伊呈遞芝草本常生習見之物未足為瑞其奏片發交南書房閱看內所引爾雅茵芝誤作菌芝釋曰誤作擇曰土氣和誤作上氣和所論各種芝草氣味凡平字皆誤作乎字松筠不加詳察即以入奏特為指示俾知盛世不尚祥瑞其率意稱引尤可不必也將此諭令知之○以故三等男克什布子連祥襲爵○緩徵江蘇山陽阜寧清河高郵泰東臺江都甘泉

興化九州縣水災本年及上年額賦新舊漕糧○緩徵湖北漢川沔陽潛江天門江陵公安松滋漢陽八州縣及屯坐各衛水災本年及上年額賦漕糧○丙午諭內閣御史程伯鑒奏請嚴禁河工投効冒濫一摺河工投効本因工用浩繁一時權宜姑允吳璥等所請至分別流品久有定例總以保結官出具身家清白印結為憑此次武陟投効人員赴工投効者著該省大吏詳加察驗在京具呈者

著該部詳加查驗責成出結官切實結報如有隱匿朦混者一經查出即行叅處照例懲辦以杜倖進○又諭正白旗滿洲進呈世職名單將東明錯寫作興京副都統興京本未設有副都統非尋常書寫錯誤可比承辦之印務章京慶莊著實降一級調用綿恩旗務雖熟現已年老精神不能周到穆彰阿管項雖多於此事未能留心檢校俱著改調事簡旗分仍各罰職任俸一年西拉布人本軟弱

又復年老著即以原品休致○諭軍機大臣等董教增奏閩省廈門洋船請仍販運茶葉一摺所奏甚屬非是前此閩浙等省販粵茶葉多由海道運往經將攸鈞以洋面遼闊漫無稽查恐有違禁夾帶等弊奏請仍照舊例改由內河行走業經明降諭旨通行飭禁自諭禁之後洋面日見肅清海口無從偷漏即黠夷如嘆咭喇不能串通奸商私相售買亦皆遵奉禁令虔受約束為法甚善必應永遠

遵行今董教增忽請准廈門洋船仍販茶葉則與由海販粵何異明係受奸商慫恿冒昧陳請董教增著傳旨申飭所奏不准行將此諭令知之○命嗣後年終八旗帶領世職人員引見時外省駐防應襲世職人員內如有擬正之員年未及歲祇將擬陪人員咨送來京者仍照例歸入京中世職一同帶領引見其年終未及到京續由該處補送者該旗即將家譜綠頭牌進呈奏請承襲不必帶領引

見○以戶部右侍郎王鼎署刑部左侍郎○調鑲紅旗滿洲都統肅親王永錫為正白旗滿洲都統鑲白旗漢軍都統奕顯為鑲紅旗滿洲都統正白旗滿洲都統定親王綿恩為鑲白旗漢軍都統正白旗蒙古副都統安福為正白旗滿洲副都統以內閣學士海齡兼正白旗蒙古副都統調正紅旗蒙古副都統文泰為正白旗滿洲副都統正白旗滿洲副都統穆彰阿為正紅旗蒙古副都統○丁未

旌表守正捐軀山西交城縣民李得名妻魏氏○戊申諭內閣禮部奏行文錯誤檢舉更正一摺近來禮部辦理事務屢有舛錯本年朕六旬萬壽九月二十七日應穿常服不掛朝珠本有成例該部並不查明聲請當降旨將該堂司各官分別降調示懲此後自當遇事小心倍加詳慎乃本月二十五日係齋戒期內該部業經奏明執事陪祀人員應穿常服掛朝珠無執事人員穿常服不掛朝珠及

司員行文知照各衙門仍照忌辰常例繕寫可見該衙門辦事司員率多玩忽此次業據自行檢舉仍著將承辦司員及該堂官等交部分別議處嗣後該堂官等務訓誡各司恪勤供職甄別怠惰毋得再蹈愆咎致干嚴懲○又諭御史蔣雲寬奏請飭查湖南省各廳州縣代完民欠一摺本年朕六旬大慶普免天下民欠銀糧據各直省陸續查明具奏其中間有官墊民欠者亦各隨摺聲明分別清

釐湖南省前據吳邦慶奏明各屬正耗錢糧歷係年清年款惟武陵澧州二處有被水緩徵正耗銀一千一百餘兩業經降旨加恩全行豁免該撫原奏並未敘有官墊民欠之款自係歷年照額徵解本無積欠豈能降旨飭查轉令該州縣藉詞捏報入開虧缺之門況普免積欠恩旨業已遍貼謄黃家喻戶曉該省州縣安能再向百姓催徵該省百姓亦孰甘受追呼之擾國家惠愛黎元蠲免積逋原

係殊恩曠典。各省情形不同。若此省必援彼省之例。於本無之款。復請旨飭查。亦豈有此政體耶。該御史所奏。著毋庸議。○又諭。阿勒楚喀副都統色爾袞。係黑龍江人。因伊母年老。不能迎養。屢次請假前往省視。黑龍江副都統穆騰額。係吉林人。伊母年亦衰老。若將該二員對調。均得就近侍養。著加恩將色爾袞調補黑龍江副都統。其所遺阿勒楚喀副都統員缺。即著穆騰額調補。○諭軍機大臣

等。孫玉庭等奏。遵旨編查保甲。年終彙奏一摺。直省州縣編查保甲。藉以弭盜詰奸。最為良法美意。然總在實力奉行。稽查嚴密。方於政治有裨。若但以歲底彙奏一次塞責。日久仍屬具文。江蘇地方遼闊。濱臨江海。居民良莠不齊。尤應留心察覈。從前東省拏獲袁武魁。袁景傑等。據供有祝現劉第五二逆。前往海州沐陽一帶之語。若係該犯等信口妄供。何不指稱二逆現藏直隸河南等處。而確指

為前往海沭。若謂挾仇誣扳。則前後查明。並無與袁武魁等素有仇隙之人。海沭一帶。向為私梟出沒之所。本係逋逃淵藪。是祝劉二逆在彼潛匿。亦不可謂全無影響。該督等不可以事隔數年。遂存大意。仍當飭屬隨時訪查。且不獨海州沐陽為然。其各府州所屬州縣。凡烟戶稠密。五方錯雜之處。皆當加倍留心。使姦宄無所託足。庶除莠安良。可收保甲之實效也。將此諭令知之。○己酉

上御寧壽宮。賜王公大臣蒙古王貝勒貝子。公額駙等。食並賞賚有差。○是日庚辰年立春。順天府進土牛春山寶座。○庚戌

上詣

大高殿行禮。○幸瀛臺。閱冰技。蘇尼特扎薩克郡王刺特納錫第喀爾喀扎薩克郡王楚克蘇木扎布等四人。杜爾伯特扎薩克郡王曼達爾等二人。阿魯科爾沁扎薩克貝勒丹津巴勒桑等二人。阿巴哈納爾扎薩克貝勒瑪

哈巴拉烏珠穆沁扎薩克貝勒圖克濟扎布等三人喀喇沁輔國公薩納西哩等三人土默特輔國公濟魯布青海扎薩克輔國公琳沁旺舒克伊克明安扎薩克輔國公呢瑪藏布阿巴噶扎薩克頭等台吉索諾木多布沁鄂爾多斯扎薩克頭等台吉色楞德濟特察哈爾土爾扈特三等台吉巴圖孟克等三人察哈爾和碩特四等台吉巴彥濟爾噶等二人喀什噶爾四品伯克體巴爾迪等三人和蘭五品伯克莫羅托克塔葉爾羌六品伯克薩木薩克等七人暹羅國使臣呖雅唆滑里巡段呵以臘車突等四人於神武門外瞻觀

○辛亥

上御撫辰殿大幄次賜蒙古王貝勒貝子公額駙台吉及回部郡王伯克外藩使臣等宴並賞賚有差○諭內閣前經降旨各處應修工程均令欽派勘估大臣帶領欽天監官前往相度方向應否修造奏明分別辦理惟是欽

天監官員本屬無多若各處歲修工程逐一派往該衙門素本清苦恐資斧不無賠累因思每年修造宜忌皆有一定方向協紀辨方所載本極詳明著欽天監按照書內將次年宜修造係何方向不宜修造係何方向詳細臚列奏明刊刻印本於每年頒發時憲書時一併發給各該處有應修工程查明書內本年方向不宜即暫入緩修無庸具奏嗣後欽天監官員停止派往以歸簡易其明年宜修不宜修方向該監即詳查刊刻補行頒給俾各祇遵○又諭本日召見盛京副都統富祥詢及該處演圍情形據稱每值演圍派兵一千名隨往向例圍畢每兵一名交鹿一隻鹿尾兩箇兵丁等恐交不敷額雇覓礮手數百人用鎗打逸出鹿隻賣給兵丁交納此項礮手均由將軍衙門發給印票隨往以備鎗打圍外逸獸如有虎熊亦用鎗打等語行圍一事原為滿洲操演技藝而設東三省滿洲騎

射本屬優長向以打牲為業今吉林黑龍江兵丁行圍仍於馬上射獸盛京兵丁竟致雇覓礮手用鎗擊打殺虎亦不用槍刺只用鳥鎗其技藝迴遜於前已可概見前以用鳥鎗擊虎曾蒙

皇考高宗純皇帝慮及滿洲等舊業廢弛特降諭旨訓示朕亦曾降旨飭禁今日久懈生不惟用鎗擊獸甚至殺虎亦雇覓礮手施放鳥鎗若不嚴禁日後不惟馬上技藝廢弛並恐該

兵丁等既不能施放鳥鎗亦不能執用長槍則滿洲之技藝失矣况兵丁等雇覓礮手即屬私弊若由將軍衙門發給印票豈非該將軍大臣等通同作弊耶松筠甫經到任富祥亦係初次行圍此弊非始於伊等任內無庸治罪即著交松筠徹底查明任聽兵丁等雇覓礮手給票之事始自何任將軍明年行圍時著嚴行禁止務令派出行圍兵丁等親自打牲以期技藝精熟酌議章程具奏○壬子

諭內閣吏部奏捐復人員照例分別准駁請旨一摺申啟堂曾崑圖蔣濟川俱著准其捐復胡兆蘭准其改捐內閣中書其林紹光一員部擬不准捐復所駁甚是向來各省道員內用應補郎中知府內用應補員外郎今林紹光係由知府甄別降調之員何得援照內用員外郎之例呈請改捐嗣後凡降調道員呈請改捐郎中降調知府呈請改捐員外郎者吏部毋庸奏請俱照此例批駁○命截山

東泰安等三十八州縣漕米麥豆十萬三千六百石有奇留於本省備賑○給直隸大興宛平二縣被水災民口糧有差○癸丑

孝莊文皇后忌辰遣官祭

昭西陵

上詣

慈寧宮

壽康宮行禮○諭內閣朱勲等奏派兵會哨番目獻賊交贓蒙古地方寧謐一摺甘省循化

貴德兩廳邊外野番肆劫蒙古牲畜搶掠行旅怙惡不悛本年經長齡等奏徹防河官兵改復會哨章程現據派出文武各員帶領官兵土兵追捕搶劫回巢番賊殲斃八名並帶同熟番頭目番僧通丁等追獲活賊十一名該野番頭目畏懼自將番賊縛獻交出原搶蒙古人口並牲畜四十餘隻頂經設誓不敢再出滋事該省初次辦理會哨事宜尚屬認真加恩著照所請將此次隨往出力之五品

翎頂番目尖木贊賞加四品頂帶番目什朶洛賞給六品頂帶番僧扎木洛碩根敦什加布俱賞給蘇拉喇嘛職銜通丁馬進祿沈木酒苗進福俱賞給九品頂帶所用經費銀兩准其咨部覈銷嗣後該督等於每年派兵會哨時均飭令實力巡查勿得日久生懈○調正黃旗漢軍副都統富僧德為盛京副都統盛京副都統富祥為正黃旗漢軍副都統以鑲黃旗蒙古副都統巴彥巴圖兼鑲藍旗護

軍統領○免雲南銅廠民欠工本銀○以歲暮裕祭

太廟自是日始齋戒三日○甲寅江南道御史佟濟奏叅國子監堂官齋戒不到一摺得旨御史佟濟秉公持正所叅甚是著賞加一級敏登額張麟奕溥音德布俱著交部迅速嚴加議處尋議上得旨國子監堂官於

太廟裕祭大典齋戒不到非尋常懈怠可比除司業奕溥先行呈報扣除免議外祭酒敏登

額張麟司業音德布俱著實降一級調用○

免西寧口外番族積欠馬貢銀○乙卯以歲

暮裕祭遣官祭

太廟中殿

後殿○諭軍機大臣等松筠奏感激謝恩一摺

松筠向好令子弟探聽城內事件一一寄知即如日前伊子熙慶來京代遞謝恩摺朕令

軍機大臣傳旨詢問松筠近體係朕垂念老臣之意熙慶於家信內順便稟知松筠原不

必因此奏謝乃臚寫繁詞專摺謝恩殊覺無謂嗣後松筠惟當於應奏公事具摺陳奏不許令熙慶將京城事務瑣瑣寄聞接奉此次諭旨亦毋庸自陳感悚具摺覆奏將此諭令知之○以頭等侍衛精欽保為黑龍江副都統○丙辰禋祭

太廟

上親詣行禮○遣官祭

永陵

實錄卷五十五

五

福陵

昭陵

昭西陵

孝陵

孝東陵

景陵

泰陵

泰東陵

裕陵○遣官祭

孝淑皇后陵寢○遣官祭

端慧皇太子園寢○遣官祭

太歲之神○朝鮮國使臣洪義臣等三人於

午門外瞻覲○丁巳

上御保和殿筵宴朝正外藩科爾沁蘇尼特浩

齊特阿巴噶喀喇沁阿巴哈納爾烏珠穆沁

土默特巴林鄂爾羅斯翁牛特敖漢喀爾喀

杜爾伯特青海伊克明安土爾扈特和碩特

喀什噶爾和闐葉爾羌王貝勒貝子公額駙

實錄卷一百五

五

台吉等及朝鮮暹羅國正副使等隨文武大

臣依次就坐諸樂並作

上進酒召左翼科爾沁達爾漢扎薩克親王布

彥溫都爾瑚蘇尼特扎薩克郡王喇特納錫

第浩齊特扎薩克郡王貢楚克棟羅布阿巴

噶扎薩克郡王瑪呢巴達喇喀喇沁扎薩克

貝勒托恩多阿巴哈納爾扎薩克貝勒瑪哈

巴拉烏珠穆沁扎薩克貝勒圖克濟扎布土

默特扎薩克貝子固倫額駙瑪呢巴達喇巴

林貝子阿勒坦桑右翼喀爾喀土謝圖汗扎薩克親王車登多爾濟杜爾伯特扎薩克郡王曼達爾同部郡王銜貝勒哈迪爾青海扎薩克輔國公琳沁旺舒克伊克明安扎薩克輔國公呢瑪藏布至

御座前賜酒成禮○是年旌表孝子直隸等省

李清泰等八名孝女蒙古鄂爾霍努特氏一

口江蘇等省薛氏等二口守節合例宗室秀

樑妻馬佳氏等十二口滿洲札保妻鄂諾特

實錄卷三百五

妻

氏等一百九口蒙古七十三妻趙佳氏等三

十口漢軍楊文鈺妻董氏等三十二口內務

府披甲天福妻張氏等七口各省駐防張釗

妻周氏等二百八十一口直隸等省劉立功

妻金氏等一十二口夫亡殉節順天等省

朱學宗妻周氏等二十五口未婚守志滿洲

八十五聘妻蘇阿特氏等三口直隸等省焦

太和聘妻崔氏等五十六口百歲壽民婦江

蘇等省李智等五十名口五世同堂江蘇等

省孟致義等五十八家九世同居陝西省張蔡家各給銀建坊如例○一產三男直隸等省李恭等五家○會計天下民數穀數直隸等省通共大小男婦三萬一百二十六萬五百四十五名口存倉米穀三十六百七十七萬三千五百五十四石四升四合五勺

實錄卷三百五

奏

大清仁宗受天興運敷化綏猷崇文經武孝恭勤儉端敏英哲睿皇帝實錄卷之三百六十五

大清仁宗受天興運敷化綏猷崇文經武孝恭勤儉端敏英哲睿皇帝實錄卷之三百六十六

嘉慶二十五年庚辰春正月戊午朔
上詣
奉先殿行禮○詣
堂子行禮○遣官祭
太廟後殿○詣
大高殿
壽皇殿行禮○展賑奉天開原遼陽廣寧鐵嶺
承德海城金州牛莊小黑山白旗堡巨流河
十一處及錦州撫民同知所屬上年被水災
民○展賑直隸大興宛平固安永清東安長

秋修

嘉慶二十五年庚辰春正月戊午朔

上詣

奉先殿行禮○詣

堂子行禮○遣官祭

太廟後殿○詣

大高殿

壽皇殿行禮○展賑奉天開原遼陽廣寧鐵嶺

承德海城金州牛莊小黑山白旗堡巨流河

十一處及錦州撫民同知所屬上年被水災

民○展賑直隸大興宛平固安永清東安長

垣安新安雄關東明通武清霸保定大城高

陽十七州縣上年被水災民並貸籽種口糧

緩徵糧租倉穀及安肅青靜海灤平趙寧晉

薊寧河文安灤清苑容城博野蠡河間獻交

河天津滄鹽山元城大名清豐南樂鉅鹿藁

新河衡水隆平二十九州縣及津軍同知所

屬災民糧租倉穀○給江蘇沛睢寧二縣上

年被水被旱災民口糧○展賑安徽毫蒙城

太和懷遠鳳陽鳳臺靈璧泗五河九州縣上

年被水災民給鳳陽懷遠靈璧泗盱眙天長

六州縣及鳳陽長淮泗州三衛軍民口糧○

緩徵山東章邱鄒平長山新城德莊平臨清

夏津武城金鄉曹臨邑單定陶蘭山郟城館

陶恩鉅野濟寧魚臺朝城二十二州縣及海

豐竈地德州濟寧東昌臨清四衛上年被水

軍民新舊額賦○貸山西保德州上年被水

災民倉穀○展賑河南新鄉獲嘉封邱延津

滑武陟原武陽武滎澤九縣上年被水災民

貸蘭陽儀封杞睢柘城鹿邑考城祥符陳留
通許尉氏中牟淮寧西華太康安陽湯陰臨
漳內黃扶溝鄭寧陵汲輝濟淇洛陽偃師莘
二十九州縣災民籽種口糧倉穀○貸陝西
留壩畧陽潼關華陰朝邑大荔榆林懷遠
九廳州縣上年被水被雹災民籽種口糧○
貸甘肅成鎮原徽秦泰安西寧平涼寧夏伏
羌靜寧涇靈臺寧朔平羅階狄道十六州縣
及莊浪縣丞所屬上年被水被雹災民籽種

實錄卷三六六

三

口糧○以上辛祈穀於

上帝自是日始齋戒三日○己未諭內閣元旦
令節萬壽慶辰王大臣等呈遞如意藉伸頌
祝從前俱有等差近來呈遞者太多不可不
示以限制自本年萬壽暨明歲元旦為始親
王郡王貝勒無論內廷外廷行走俱准呈遞
貝子公惟內廷行走者准其呈遞軍機大臣
南書房翰林內務府大臣無論品級俱准呈
遞上書房行走各員俱不准呈遞大學士尚

書領侍衛內大臣俱准呈遞都統在內廷行
走者方准呈遞侍郎副都統俱不准呈遞御
前侍衛一品者准其呈遞乾清門侍衛概不
准呈遞年班來京文武大員亦准一品者方
准呈遞著通行曉諭其各恪遵毋違○又諭
前據永錫等奏上年除夕保和殿筵宴閒
雜人等衆多副都統康修擅將跟役帶入管
轄之護軍統領等到班遲延請分別懲處所
辦甚是本日據兵部將該員等分別議以革
職及革職留任此案副都統康修將跟役帶
至保和殿階下始向索朝珠是該跟役擅入
禁門伊不得該為不知其咎最重康修著革
去副都統施恩仍留公中佐領飭令回旗當
差至管轄丹墀之護軍統領係於筵宴數日
前派出理應先衆人而來後衆人而散方能
稽查周密乃是日長慶色彥巴圖直俟朕升
殿時始行到班佩刀侍立其時班聯已肅尚
何所用其管轄長慶並於朕起座後即行散

去實屬懶惰可惡長慶著革去護軍統領副都統降為二等侍衛另降清字諭旨派往新疆換班巴彥巴圖爾放護軍統領甫經數日於差使尚未諳習著革去護軍統領副都統降為二等侍衛退出乾清門在大門上當差其管門之護軍統領安福烏爾卿額及是日派出管轄之章京等均著照部議革職留任嗣後凡派出管轄之護軍統領等均著於朕升殿前四刻先行到班認真稽察閒雜人等

不准一名放入俟禮成後仍察看執事各官役全行退出方准散去勿得仍前玩忽干咎○諭軍機大臣等前因盛京官兵演圓皆係雇人幫放烏鎗降旨訓飭吉林黑龍江人等向以打牲為業技藝較優茲因年久打牲者漸少官兵等或有竟不拴馬者遇有差使雇借乘騎此風若不禁止則日久於一切行圓馬上技藝必致生疏總之官兵等演習技藝欲致熟練必須人各有馬差使既不致遺誤

且行圓亦自勇健著寄諭吉林黑龍江將軍等轉飭該管官員務各令兵丁熟練馬上技藝遵習舊業俾各有勇勉之○調鑲黃旗蒙古副都統福泰為鑲紅旗滿洲副都統兼鑲藍旗護軍統領○以內閣學士恒齡兼鑲黃旗蒙古副都統兼州城守尉富桑阿為鑲黃旗副都統正藍旗蒙古副都統阿隆阿兼鑲白旗護軍統領○命葉爾羌辦事大臣成書回

京○以二等侍衛長慶為葉爾羌辦事大臣○庚申

高宗純皇帝忌辰遣官祭

裕陵○

上詣

南郊齋宮齋宿○辛酉祈穀於

上帝

上親詣行禮○諭內閣朕本日恭祀

祈年殿仰瞻左右

配位

六聖相承

峻德豐功。洵皆百世不祧。惟

神案位次三昭三穆之下。

殿內餘地似未能寬展。著大學士。軍機大臣會

同禮部。太常寺。擇日前詣

園丘

祈年殿二處。敬謹相度情形。諏吉具奏。○壬戌

上御太和殿受朝。作樂宣表如儀。○御乾清宮

實錄卷三六六

七

賜皇子皇孫親藩等宴。○癸亥

上御重華宮。茶宴廷臣。及內廷翰林。以周甲延

禧之寶聯句。○甲子。

世祖章皇帝忌辰。遣官祭

孝陵。○

上詣

雍和宮行禮

大神廟拈香。○丙寅。命嗣後午門前迎送各

官。禮部查明應用服色。先期知照。○丁卯。享

太廟。遣定親王綿恩恭代行禮。○

上詣

大高殿行禮。○幸圓明園。○詣

安佑宮行禮。○遣官祭

太歲之神。○戊辰

上御山高水長。賜王公大臣。蒙古王。貝勒。貝子。

公。額駙。台吉。及回部郡王。外藩使臣等宴。並

賞賚有差。○己巳。諭內閣。延豐奏。商鹽加斤

限滿。懇恩再予展限一摺。兩淮綱引。前於嘉

實錄卷三六六

八

慶十年間。因場窰被水。商力拮据。每引准其

加鹽十斤。以補虧折。限以三年停止。節次限

滿。經該鹽政奏請展限。現又年限屆滿。應於

己卯綱停止。第念上年夏秋缺雨。蕩草歉收。

鹽價增昂。據該鹽政查明係屬實在情形。著

加恩准其將淮南淮北綱食每引加鹽十斤。

再予展限三年。自己卯綱起。扣至辛巳綱停

止。以資調劑。○刑部奏。審擬吉林逃回違犯

色勒佈一案。得旨。此案色勒佈。原充正陽門

門甲十八年因疏防逆匪入城發遣吉林茲在配脫逃來京被獲經刑部提案問擬絞決所擬是但念此案蒼震門及東華門西華門其地較之正陽門遞加切近所有疎防各官兵並無一人正法色勒佈原犯罪名本較該三門官兵為輕著從寬免其處絞即行發往伊犁遇赦不赦若再敢脫逃無論何處拿獲即行正法○又奏審擬陝西革生楊鍾岳呈遞黃策一案得旨此案楊鍾岳先於二十三

年在步軍統領衙門呈請設壇祈雨並以西山藏有賊匪等詞寫入呈內經刑部審訊擬以革去生員遞籍杖徒迨上年遇赦釋回尚不知悛改復以生生數內占有盜賊來侵擒縛封侯之語即潛行來京適見西直門外慶典點綴輒妄指京畿西北山內藏有盜賊擬請設礮安營書寫黃策在都察院呈遞不但希冀開復生員並思加封侯爵誕妄已極刑部依妄布邪言為首例擬以斬決姑念該犯

係誤信占書添砌邪言上書干進並未各處張貼傳播惑人楊鍾岳著免其駢首改為絞決即行正法○緩徵兩淮富安安豐梁垛東臺何垛丁溪草堰劉莊伍佑新興廟灣十一場上年水災旱災折價銀○庚午上御山高水長賜皇子皇孫親藩及蒙古王貝勒貝子公額駙台吉等食○辛未

上御奉三無私殿賜皇子皇孫親藩等宴○御山高水長賜皇子皇孫及王公大臣蒙古王

實錄卷三十五

十

貝勒貝子公額駙台吉回部郡王外藩使臣等食翼日如之○壬申

上詔

安佑宮行禮○御正大光明殿賜朝正外藩等宴作樂賜酒如除夕儀○諭內閣國家於年老臣工每宜格外矜憐以安壽考然若遽令賦閒伊等自以精力尚未至積唐不免心存戀闕莫如節其奔走之勞俾宣力之餘無妨頤養庶於公私兩有裨益現在大學士明亮

年已八十有六。尚書和寧。年已八旬。蘇楞額景安俱將近八旬。尚能管理部旗諸務。明亮和寧景安三人著於本管部旗直日之期。照常來園。其餘加班奏事引見之日。俱不必來園。各在本衙門辦事。蘇楞額兼管內務府事務。著於本管部旗及內務府直日之期。照常進內。其餘一應奏事引見之日。俱無庸進內。用示朕優養耆年至意。○癸酉

上御正大光明殿。賜大學士尚書等宴。○御山

高水長。賜皇子皇孫親藩及蒙古王貝勒貝子公額駙台吉等食。○甲戌。正藍旗蒙古副都統阿隆阿緣事降頭等侍衛。以伊犁領隊大臣阿勒罕保為正藍旗蒙古副都統。鑲黃旗蒙古副都統阿彥托克托兼鑲白旗護軍統領。○乙亥。調直隸宣化鎮總兵官音登額為福建臺灣鎮總兵官。以直隸督標副將舒凌阿為宣化鎮總兵官。○丙子。上御山高水長。賜皇子皇孫及王公大臣蒙古

王貝勒貝子公額駙台吉。回部郡王外藩使臣等食。○丁丑。諭內閣。御史朱鴻奏。籌杜書吏舞弊。請嚴職守。以振因循。一摺。所奏是國。家庶政。統於各部院。而分隸諸司。一切條例。勒有成書。各司員學古入官。如果悉心考究。則臨事自有據依。至書吏不過書寫文卷。以供趨走。乃積弊相承。奸胥猾吏。以舞文弄法。為長技。皆由司員等不舉其職。遇事茫然。轉聽命於書吏。遂使冠履倒置。授之以柄。若輩得以高下其手。百弊叢生。著通諭各部院司員。務當振作精神。殫竭心力。以曠官尸位為可恥。平日例案熟悉於心。則書吏之奸。可以一覽而覺。且當官正直無私。即有蠹吏。何難執法嚴懲。其部院各堂官。尤應秉公考察。加意勸懲。擇司員之賢明者。畀以事權。優其拔擢。於庸劣者。嚴加甄別。庶上下相維。人稱其職。而事得其理矣。○諭軍機大臣等。據御史王家相奏。近日江省寶蘇局所鑄官錢。銅少

鉛多而以官銅偷鑄小樣錢。每錢一千不及四斤。民間號為局私自蘇松至浙江。江西。流通寢廣。以致銀價日貴。官民商賈胥受其累。其私鑄藏匿之地。則於局內深窵地窖。上蓋煤炭掩人耳目。其搬運之時。則於每日兩次放水。買嘴水夫。隨身帶出。其私售之人。則附近寶蘇局之錢店。接受窩藏。輾轉流布。一年之中。惟應解兵餉。不得不鑄官錢。此外盡鑄小錢。其火工飯食。仍開銷公項銀兩。若藩司

實錄卷一百一十五

十一

到局。則藏匿新鑄之小錢。而以舊存備解兵餉之官錢。磨新樣混寶蘇局監督協理各委員得受陋規。每開一卯。監督得陋規三百兩。協理得陋規二百兩。以致鑪頭益無忌憚。歷任藩司未必全無見聞。特以因循姑息。流弊愈深。等語。錢局鼓鑄圖法攸關。豈容官局鑄私。致商民胥受其累。陳桂生接奉此旨。即日親赴寶蘇局嚴密查驗。該局有無私窵地窖。並搜查有無私鑄小錢。一經查出。獎實。即將

該藩司及監督協理各委員據實嚴參。並究明得受陋規起自何年。務須大破情面。秉公查辦。不可稍涉瞻徇。一面將錢局事宜認真整頓。遴選廉能素著之員赴局監理。按卯鼓鑄。將新鑄錢文照例當堂稱兌。驗收貯庫。如有偷減工料者。立即嚴懲。以除積弊。將此諭令知之。○已卯諭內閣。向來護送外國貢使來京之文武官員。及委解銅鉛木植之運官。皆由該部帶領引見。應遞摺請訓者。於迷旨

實錄卷一百一十五

十一

後再行請訓。因思文職知府以上。武職總兵來京者。例准遞摺請訓。嗣後此項護送官。及解員除文職同知以下。武職副將以下。仍由該部帶領引見外。其文職知府以上。及武職總兵。俱令於事竣時自行遞摺請訓。不必先行引見。以省繁文。其道府內有升補後未經東護送暹羅國貢使來京之廉州府知府何天衢。即著毋庸引見。飭令該員自行遞摺請

訓○以郎中銜李鴻賓署理山東運河事務
賞安徽等省己卯科鄉試年老諸生曹有
源等五名副榜○庚辰

孝聖憲皇后忌辰遣官祭

泰東陵

上詣

恩慕寺

恩佑寺行禮○辛巳

上幸萬壽山○欽差刑部尚書吳璥奏工費不

敷請稽料每斤再加價銀一釐土每方再加

價銀一錢攤徵歸款從之○壬午以翰林院

侍讀顧毓署日講起居注官○癸未諭軍機

大臣等程國仁奏匿名揭帖指控鹽運使福

泰懇飭交欽差侍郎廉善等密查一摺所奏

顯係推諉程國仁係山東巡撫運司乃其所

屬該撫既素以福泰為人難信見此揭帖近

在同城何難訪明劣蹟據實奏奏況揭帖內

開列之李師綱徐奴張七世錦素夫雙喜喬

福等皆具有姓名一經察訪自可水落石出
乃不自行查辦率請飭交欽差試思欽差到
省並無應審之案若但安居館舍密訪此事
外間豈不知之必將深藏固匿何能訪出實
情且廉善等二人亦豈能久駐省垣耶此案
著即交程國仁確查一面訪察福泰款蹟一
面查拏匿名揭帖之人按律懲辦如果福泰
款蹟屬實該撫即行由驛奏彼時廉善等
如尚在東省再明降諭旨交令前往審訊若

業已回京仍交該撫審辦原揭帖二紙著即

發還該撫拏獲書寫之人以便比對筆蹟將

此諭令知之○朝鮮國王李瑢遣使表賀

萬壽冬至元旦三大節及歲貢方物賞賚筵宴

如例○暹羅國王鄭佛遣使表貢方物賞賚

筵宴如例○旌表守正捐軀江蘇青浦縣民

朱三觀妻顧氏丹徒縣民朱廣周妻睦氏○

甲申

上詣

大高殿行禮○還宮○命嗣後遣官祭昭忠賢良等祠○內閣票發無庸加行禮二字○旌表守正捐軀雲南阿迷州民婦王年氏○乙酉諭內閣○本日軍機大臣會同刑部議覆程國仁奏整飭地方章程一摺所議准駁俱是已依議行矣近來州縣諱盜之弊各省多有亦不獨山東一省為然州縣官諱強為竊其意原欲規避處分暫圖掩飾目前殊不知地方遇有盜案即據實詳報緝拏至四叅限滿無獲始應降調限內緝獲仍准開復若有心諱飾或被人控告或經上司查叅必立加嚴譴黜革之後即呈請捐復亦必斥駁永不敘用是欲避重以就輕轉致含輟而就重豈非自貽伊戚乎即如逆犯祝現等現飭各省嚴拏曾屢降諭旨地方官果能緝獲即在所管境內藏匿數載例應嚴議彼時朕必加恩寬免且仍優予升擢若既經拏獲因在境藏匿日久懼干處分私行縱放則一經發覺必照故

縱大逆律治罪豈能稍從末減報盜與諱盜事雖較此為輕其情正復相等特明白曉諭俾直省各州縣知罪有公私故罰有輕重網紀所在絲毫不能寬假權其利害力破諱匿之習實力除暴詰奸庶盜風漸息閭閻共慶安堵矣將此通諭知之○諭軍機大臣等肅靜等奏霍罕遣遞信字請添阿克薩哈爾管理買賣事務痛切駁斥一摺所辦甚是喀什噶爾呼岱達向由阿奇木伯克選派霍罕伯克從不干與乃愛瑪爾承襲後前次即請設海子伯克抽收稅務業經松筠等嚴行駁斥嗣復更換名目先將博塔占私作為阿克薩哈爾茲又欲令托克托和卓接替管理實屬貪利妄行瀆請自應嚴詞駁斥肅靜等既將博塔占托克托和卓遣還霍罕地方著嚴飭各卡倫不准縱令再來內地如該伯克或再飾詞呈請仍當嚴行駁回務令遵守舊章不得稍有紊越以靖邊圉將此諭令知之○以

刑部尚書和寧工部尚書茹茶吏部左侍郎
恩寧署經筵講官○以頭等侍衛德通為英
吉沙爾領隊大臣○

上以祭

社稷壇自是日始齋戒三日○丙戌

孝儀純皇后忌辰遣官祭

裕陵○旌表守正被戕福建寧德縣民胡桔媳

賴氏○是月兩江總督孫玉度奏酌減漕委

員弁一摺得旨只須得人則治不在數目多

少有弊即叅

十一

大清仁宗受天興運敷化綏猷崇文經武孝恭
勤儉端敏英哲睿皇帝實錄卷之三百六十六

實錄卷之三百六十六

子

大清仁宗受天興運敷化綏猷崇文經武孝恭勤儉端敏英哲睿皇帝實錄卷之三百六十七

恭奉 上諭事 仰 禮部知道欽此

恭奉 上諭事 仰 禮部知道欽此

恭奉 上諭事 仰 禮部知道欽此

恭奉 上諭事 仰 禮部知道欽此

恭奉 上諭事 仰 禮部知道欽此

恭奉 上諭事 仰 禮部知道欽此

嘉慶二十五年庚辰二月丁亥朔祭

實錄卷之三百六十七

先師孔子

上親詣行禮○詣

雍和宮行禮○戊子祭

大社

大稷

上親詣行禮○諭內閣御史龔鏗奏請清查糧

戶賦額一摺國家惟正之供則壤成賦自應

糧隨地轉若如該御史所奏江蘇省有貧民

地無一廛每歲納糧銀數兩至數十兩不等

有地祇數畝每歲納糧田銀十餘畝至數十

畝不等者皆因業戶從前售賣時未將糧銀

全數過戶以致輻輳不清著江蘇巡撫嚴飭

各州縣調查遠年糧冊秉公考覈現在執業

之戶有地若干頃畝按照則例應納糧若干

其貧民無著虛糧一概推收勿任隱混該管

上司仍嚴行稽察不得任聽官吏藉端索詐

致滋擾累○又諭富俊奏吉林官兵習獵者

多用烏鎗亦佩帶弓箭等語滿洲行獵舊制

專用弓箭雖閒用烏鎗並非置弓箭於不用

今該處官兵用烏鎗者甚多可見佩帶弓箭

捕牲者甚屬寥寥若不實力整飭相沿日久

必致不習弓箭廢棄滿洲本業矣富俊已遵

前旨徧行曉諭嗣後當會同各該城副都統

留心稽查各該營官兵等勤加訓練步射馬

射務使咸成勁旅以期經久毋怠○己丑以

舉行仲春經筵遣官告祭

奉先殿

上詔

傳心殿行禮

御文華殿經筵直講官穆克登額黃鉞進講大學知止而后有定。定而后能靜。靜而后能安。講畢。

上宣御論曰。道在一身。而能周乎天下國家者。大人之學也。明德新民止於至善。方為有本之學也。知其所止。能真知灼見。至當不易之理事機之來。應之以正。克去己私。復於天理。

心如止水。湛然澄潔。知止之功用備矣。功用既備。而後心之所應。不倚不偏。志之所向。無欺無隱。養心公正。立志清明。公正清明。純一不已。化去物欲。致中和之極。則常確然而有定矣。志既定。又在隨時頤養。遇事琢磨。在安居無事之日。修涵育操存之道。言必顧行。念守口如瓶之戒。思不出位。體深藏若虛之言。即遇意外之變。自有一定之理。所謂猝然臨之而不驚。無故加之而不怒。淵衷定見。臻於

沖漠。絕乎紛擾。常泰然而能靜矣。心既靜。然後能包括羣動。揆度事理。無不暇裕。周詳各臻其極矣。天行至健。天心至靜。靜為動之體。動為靜之用。法天行政。常坦然而能安。從此循序漸進。修齊治平之全體大用。由近及遠。胥歸至善矣。直講官穆彰阿。王鼎。進講書經在知人。在安民。講畢。

上宣御論曰。安民為致治之要。知人為安民之本。人君一身臨萬民。一心用百官。欲令官無曠而民得所。唐虞之世已見其難。三代而下更不易矣。人君代天圖治。豈能獨理。所賴內外百官。寅亮天工。分司其事。職任既繁。任使倍衆。欲使人人稱職。是誠難矣。知其心術。見其德業。舍其所短。用其所長。去取之間。務期至當。不以小膏掩大德。不以微過治重咎。必使才稱其職。德稱其位。為人君能哲而惠。則所知皆正人。所用盡賢臣。豈患民不安乎。既為人君。孰不願天下入安。兆民樂業。所以不

能如願之故。由於不能知人。不能用人也。得賢才則治。任僉士則亂。彼賢才固吾所用。而僉士豈自薦乎。亦吾所用也。勿責彼之不肖。惟自怨己之不明耳。若知其公忠清直。勤慎廉明。必應久任。觀成始終保全。咸有一德。所謂任賢勿貳也。若知其巧言令色。尸祿保位。必應立加譴責。驅斥遐方。永絕仕路。所謂去邪勿疑也。百官庶績其凝。萬民安常處順。知人誠安民之要。在人君之鑒別去取。皆得其當。知之一字難矣哉。禮成。

上幸文淵閣。賜講官及聽講諸臣茶。復賜宴於本仁殿。○遣官祭

文昌帝君廟。○緩徵山西保德州。本年額賦。○庚寅。

上幸圓明園。○諭軍機大臣等。據朱勲奏。西寧道維昂詳揭青海辦事大臣秀寧任意高興。有礙地方八款。並將原揭咨送軍機處呈覽。此案著即派長齡前往審辦。該督於途次接

奉諭旨。即日馳往西寧。將秀寧傳旨解任。一面將維昂所揭各款。逐一秉公查辦。如揭內所稱派委筆帖式富隆阿出口會勘阿勒塔布拉克牧地。拆毀雙阿博卡堡。派兵驅逐番帳四款。秀寧所辦是否任意舛謬。有無貽患地方。均各確切查明。據實覆奏。至所揭秀寧違例坐轎。縱容轎夫聚賭。及聽戲宴會。攜妾同赴會場各款。更難掩人耳目。該督到彼後。無難一訪而知。又候補府經歷胡彬在該大

臣署中辦理事件。有無倚勢招搖。秀寧委用該經歷。有無交通過付婪索賄私。並著詳細察訪。一經審有實據。著即將秀寧革職定罪。不准請交部議。該督一面具奏。一面將秀寧帶至蘭州聽候諭旨。前長齡於西寧辦事大臣出缺時。曾奏請將秀寧果齊斯歡二人內簡調。此案特交該督查辦。不可以前經保奏稍涉迴護。自蹈愆尤。現已有旨令朱勲仍留蘭州暫署督篆。該督俟審案完竣後。再回省

城接印可也。將此諭令知之。○賞喀什噶爾幫辦大臣素納頭等侍衛。為西寧辦事大臣。三等侍衛色布徵額。二等侍衛。為喀什噶爾幫辦大臣。○辛卯。諭軍機大臣等。據延豐奏淮南各口岸鄰私浸灌。場竈透漏。以致累年銷絀引滯。課懸本攔。楚岸則有四川巫山大寧一帶鹽埠口岸越境侵銷。一由水路入宜昌荊州等處。一由陸路入房縣竹谿等處。其陝西之商南平利一帶私販。由漢中順流而下。至襄陽德安等處分售。名曰潞私。河南自南陽之李官橋各鋪販至穀城等處售賣。名曰豫私。湖南衡州府屬之常寧。耒陽安化各縣。毘連廣東。永州府屬之江華。永明。零陵。東安。各縣。毘連廣西。俱由各該商埠越界浸灌。江西口岸則有閩浙粵東私鹽處處可通。粵私陸路由興國縣入吉安府屬之萬安等處。水路由贛縣入下游之吉安臨江等府。閩私一由崇安縣經過江西之鉛山弋陽入饒州

府屬。一由光澤縣入江西新城縣境。赴建昌撫州等府銷售。浙私一由廣信府屬之貴溪入饒州府屬之安仁等縣。一由徽州府屬之祁門建德等縣入江西之饒州府屬浮梁德興等處。至安慶池州太平江寧為淮南綱食口岸。又為場鹽偷漏船戶夾帶沿途偷賣。侵占引額。請飭各該督撫實力緝私。又疏銷引鹽為鹽道專責。向來各省因考覈過嚴慮干處分不免有多開輪售捏報分數之弊等語。近年楚西各口岸私梟充斥。官引滯銷。國課既多虛懸。商力亦虞支絀。現據該鹽政查明私鹽浸灌處所。著該督撫等各飭所屬文武地方官。無分畛域。實力偵緝。務將巨梟窩園隨時隨地嚴拏懲辦。不得互相諉卸。或僅將尋常小販緝拏數案藉以塞責。總期私梟斂戢。俾官引得以暢銷。以裕國課。至各該鹽道疏銷綱引。是其專責。按照分數以定考成。並著該督撫覈實稽查。務令各鹽道將銷售輪

鹽實數。按李據實開報。不得以開輪未售之鹽入數作銷。以杜規避。將此各諭令知之。○又諭。松筠遵旨覆奏。查看盛京官兵演團情形。一招。據稱盛京官兵每次皆行二十餘團。官兵等恐應交鹿尾不符原額。因於興京等城閒散滿洲內。挑選數百名。隨帶於團外幫放鳥鎗。自係該處官兵技藝平常。始藉閒散之力。打牲嗣後行團。若將閒散裁汰。則所獲牲獸必少。著傳諭松筠將盛京官兵等妥為訓練。務期人各精銳。將技藝平常者漸次革退。於餘丁內。挑選技藝優長者充補。則行團自可得力。然必令用箭射獸。不准施放鳥鎗。如遇熊虎。著仍照舊例。專用長槍。儼地勢險峻。再用鳥鎗。斷不可雇覓民人放鎗打獸。○壬辰。遣官祭黑龍潭。

昭靈沛澤龍王之神。玉泉山

惠濟慈佑靈護龍王之神。昆明湖

安佑普濟沛澤廣生龍王之神。密雲縣白龍潭

○遣官祭圓明園。○惠濟祠。○河神廟。○旌表守正捐軀雲南定遠縣民侯德周女侯氏。○癸巳。孝淑皇后忌辰。遣官祭陵寢。○諭內閣。禮部向例。凡祭祀齋戒期內。如遇忌辰。有執事及陪祀人員。俱常服掛朝珠。無執事不陪祀人員。常服不掛朝珠。嗣後大祀典禮。無論親祭遣官。遇忌辰在齋戒期內者。俱照向例行。至中祀之典。朕親詣行禮者。亦照向例行。其遣官致祭者。有執事及陪祀人員。著常服掛朝珠。無執事不陪祀人員。仍俱穿素服。著為令。○旌表守正被戕湖南寧鄉縣民周先才妻張氏。○甲午。春分。朝日於東郊。命皇次子智親王恭代行禮。○遣官祭

先醫之神。○諭內閣。給事中周鳴鑾奏。請除拖欠錢糧積弊一摺。直省地丁錢糧。皆國家惟正之供。不容稍有侵欺拖欠。上年朕六旬大慶。普免天下積欠銀穀數至二千五百萬之多。原係特沛之恩。將以藏富於民。欲使閭閻益臻充實。並非為貪官汙吏。開欺隱之門。今該給事中奏稱。官吏侵漁動至盈千累萬。小民妄希蠲緩。不肯踴躍輸將。總由該管官不能查察督催。以致逋欠積久愈多。此弊實有。總在上司不肯認真查覈。一味姑容。取悅下僚之故。著通諭直省督撫。各嚴飭所屬州縣。將應徵錢糧。按限徵收。隨時報解。督徵各上司認真稽查。層層考覈。儻有侵匿拖延。立即嚴行揭參。按律究辦。並曉諭小民。及時輸納正供。不得妄冀蠲除。藉端抗欠。使官皆奉法。朕削無聞。自民樂趨公。輸將恐後矣。○乙未遣官祭

關帝廟。○諭軍機大臣等。山東吏治民風積

久敝壞。而近日尤甚。朕聞該省詞訟之繁。始由於官吏之不辦事。今又變而為不敢辦事。欲結一案。而輒慮翻控。欲用一刑。而輒慮反噬。鞠案之時。有倚老逞刁者。有婦女肆潑者。有當堂憤起者。有抗不畫供者。地方官平日全無恩信。及民臨事又多畏蒞。以致莠民日益得志。良懦甘受欺陵。州縣若此。地方何由得治。統轄州縣者知府。其案為州縣不能結者。即應由各該管知府直隸州辦理。乃山東

實錄卷三六七

下

遇案動輒提省。更或各府州因其事難辦。具稟請提。冀圖卸責。及提至省城。則盡委之於首府。稽壓拖累。百弊叢生。在首府舍己芸人。日不暇給。而省外各府。食祿而怠於事。豈不竟同虛設。入東省盜賊充斥。捕役悉與勾連。往往劫取牛馬。定價勒贖。是直明目張膽。毫無忌憚。捕務廢弛。若此。小民何以寧居。又東省倉庫當清釐之後。全在杜截新虧。惟於交代時認真盤查。有虧即參。庶州縣共知畏懼。

乃該省交代有三四任以致十餘任轆轤不清者該管上司一味徇隱舊虧未補新虧又續更復何所底止著程國仁大破情面實力整頓督率知府以及州縣殫心盡職剖決詞訟務秉公正其刁徒訟棍按律懲治捕役有勾通盜賊者盡法嚴辦州縣應徵錢糧各令隨時報解嚴查交代杜絕續虧庶諸弊漸除地方日有起色再朕聞山東有罷病知府二人其一廷錫已據程國仁劾奏其一熊方受

實錄卷一百一十五

辛

步履艱難且聞其買妓作妾所用家人多係優伶終日沈昏廢弛公事程國仁係屬漢人於廷錫滿員則加以糾劾熊方受漢員則意存袒護其將何以使僚屬心服耶著即行查明據實奏奏又前據該撫奏有匿名揭帖控告福泰者當經降旨交該撫查辦何以尚未覆奏著即確查款跡遵旨由驛速奏將此諭令知之○命刑部右侍郎文孚由河南馳往甘肅審案○丙申

清 實 錄 嘉慶二十五年二月

上幸靜明園詣

龍神廟拈香○遣官祭昭忠祠○諭內閣朕前聞豫省承挑引河工員有情急輕生者降旨令吳璥等確查具奏茲據吳璥等奏稱候補把總樊印雖下汛外委劉振山均承辦挑工因雨雪積水格外多費工銀不能開銷限期已迫工難報竣俱情急自縊等語樊印劉振山均因河工緊急恐貽誤賠累以致輕生覈其情節尚係為公捐軀殊堪憫惻著加恩

實錄卷一百一十五

辛

各卹賞銀一百兩交該故員家屬承領并查明該二員之子如讀書學文各賞給文生員一名若已係生員即賞給舉人准其一體會試如家素習武樊印之子著即賞給把總劉振山之子著即賞給外委吳璥等即將此旨宣示各工員俾知朕矜恤勞不遺微不至意○丁酉

孝康章皇后忌辰遣官祭

孝陵○戊戌諭內閣甘肅西寧道衙門所辦案

八五五

件。多有與蒙古番子交涉事務。乾隆六十年曾奉

高宗純皇帝諭旨。將該道專用滿洲蒙古人員。著為令。後經那彥成以龍萬育奏調。遂相沿兼用漢員。嗣後西寧道一缺。仍遵照

成憲專用滿洲蒙古人員。不用漢員。○緩徵江蘇鹽城縣水災本年額賦。○士寅諭內閣。成格奏。審辦逆倫重犯一摺。此案王步雲因胞弟王步義酗酒滋事。不服勸誡。肆言詈罵。起

意勒斃。向王步義之子王承彩相商。王承彩

王

聽從幫同。揪按該撫於審明後。業經恭請王命。將王承彩凌遲處死。將王步雲依律擬絞。監候覈其情節。王步雲起意致死伊弟。若與他人同謀。則故殺期親弟妹罪止絞候。今該犯與子謀父。既斃其弟。復陷其姪。以凌遲重罪。情殊兇惡。王步雲著即行絞決。嗣後遇有案情似此者。俱照此辦理。○旌表捐修考棚江隄湖北盛利縣民游大綱樂善好施湖南

寧遠縣貢生王萬倫。○癸卯月食。○大學士章煦以疾致仕。命賞給全俸。○命協辦大學士戴均元為文淵閣大學士。晉太子太保。管理刑部事。調刑部尚書吳璥為吏部尚書。協辦大學士。○甲辰。

上幸萬壽山。詣

廣潤祠拈香。○乙巳。諭軍機大臣等。慶溥等奏請調發臺効力廢員。協同司員辦事一摺。所奏殊屬冒昧。該處從前雖有奏請廢員文

實錄卷三六七

六

綬辦事之案。但張五緯豈文綬之比。文綬後由廢員起用。尚歷任總督。張五緯年老多病。素食鴉片烟。前在山東臬司任內。即因廢弛公務。積案繁多。褫職發往軍臺。此等劣員。安能襄辦公務。明係出自鑽營。慶溥等為其所愚。妄行陳請。慶溥海昇俱著傳旨申飭。所奏不准行。如該處公事必須派人協理。著另行遴選具奏。將此諭令知之。○丁未。

上御勤政殿聽政。○遣官祭

歷代帝王廟。○諭內閣。朕自嘉慶三年奉
皇考高宗純皇帝敕旨。臨雍講學。一時圓橋觀
聽。稱盛典焉。迄今已閱二十餘年。未經舉行。
明年仲春上丁。朕親祭

先師。再舉臨雍講學之禮。一應儀節。悉照嘉
慶三年之例。所有應行豫備事宜。著各該衙
門先期敬謹辦理。至上屆初舉臨雍典禮。大
小臣工等。曾進獻頌冊。此次係再舉上儀。內
廷行走諸臣。經筵講官。暨衍聖公。仍照前進

實錄卷五十一

五

冊。餘俱無庸呈進。○以故科爾沁貝子錫第
子阿舒噶喀爾喀貝子濟里克喇什弟蘊丹
蓋。嚕布各襲爵。○以太常寺少卿哈寧阿。為
內閣學士。兼禮部侍郎銜。○戊申。

上御閱武樓。閱八旗火器營操。○諭內閣。御史
沈學廉奏。請除州縣延壓控案積弊。以清獄
訟一摺。所奏是。牧令為親民之官。案無大小。
總先由州縣衙門控理。地方官果能聽斷勤
敏。曲直為之立判。自必日起有功。案無留牘。

若於民事漠不關心。日耽娛樂。則闔茸廢弛。
積壓日多。地方狡健之徒。因而別生枝節。案
外牽連。無辜良民受其拖累。吏役更從中詐
索。百弊叢生。皆由於此。該督撫統轄通省。勢
不能於尋常控案。一一親提。務各嚴察州縣
將自理詞訟。按照循環簿。逐一考查。如有積
壓過多者。即行糾參。其案外株連之人。飭令
立予開釋。重懲誣扳。使刁健之徒。知所敬畏。
至案犯到官。其有應得罪名者。自當照例監

實錄卷五十一

五

禁。若無論案情輕重。任令胥役私押私拷。甚
至日久拖斃。其為酷虐。豈可勝言。著各督撫
嚴申禁令。有犯必懲。以昭欽恤。其書役誣良
累民。詐贓釀命等案。該管官本有失察處分。
不能遽改。成例。概從寬免。但失察之咎。輕諱
飾之罪重。若州縣官懼干吏議。多方迴護。委
審之員。復代為捏飾。則是以公罪而入於私
罪。欲避重就輕者。轉致避輕就重。嗣後著該
督撫詳加區別。於失察書役詐贓釀命之案。

如該管官有授意故縱捏供規避者仍據實嚴叅其止係失於覺察自行查拏究辦者定案時准其於摺內聲明量予寬減所期吏治肅清獄訟衰息共登上理焉○己酉清明節

上詣

安佑宮行禮○遣官祭

永陵

福陵

昭陵

實錄卷三百五

光

昭西陵

孝陵

孝東陵

景陵

泰陵

泰東陵

裕陵○命

皇次子智親王

祭

孝淑皇后陵寢○遣官祭

端慧皇太子園寢○庚戌諭內閣向來鄉會試屆期禮部於奏派搜檢王大臣後復奏派近信王大臣會同搜檢其所開銜名即係奏派搜檢王大臣單內未經派出之人名實不符竟係具文嗣後鄉會試著禮部即於奏派搜檢王大臣時聲請多派數員其近信王大臣毋庸另行奏派著為令○又諭昨奕綸誤差退出乾清門成親王率同綿懃來園碰頭並自請處分又英綬釋放回京賞給上虞備

實錄卷三百五

辛

用處拜唐阿英惠具摺謝恩均屬非是前經降旨惟祖孫父子遇有加恩事件准其具摺謝恩餘俱不准陳謝奕綸係成親王之孫但業經出嗣即已有閒英綬係英惠之弟似此紛紛請罪謝恩未免煩瑣嗣後王大臣之子孫或邀恩遷擢或緣事獲咎伊祖父俱准陳謝其餘一概不准陳謝○封湖北武昌府八分山

龍神為宣潤敷化之神春秋致祭從總督慶

保請也○壬子

孝昭仁皇后忌辰遣官祭

景陵○

上幸靜明園詣

龍神廟拈香○諭內閣錢臻奏。拿獲在逃十年之兇犯審明定擬一摺。此案盧林泰闖毆殺人罪應絞候。該犯在逃業已十年。現經拏獲審明實係正兇。豈可復任稽誅。盧林泰著即處絞。○癸丑遣官祭賢良祠。○諭軍機大

實錄卷三十一

辛

臣等福建澎湖協水師副將前經該省以張保題升。張保係由海盜投誠之人。澎湖孤懸海外地方險要。副將統轄舟師。責任綦重。張保在彼究屬非宜。國家立賢無方。如桂淖羅思舉。皆由鄉勇出身。用至總兵。均能稱職。該二員本係良民。由軍功洊擢。所屬將弁兵丁。無不翕服。若張保係盜賊出身。從前聚眾至一萬七千餘人之多。戕害生靈無算。恐其舊性未馴。且朕聞該員常食鴉片烟。不知禮節。

諸多任性所屬舟師亦不能約束。時有賭博姦淫詭詐逼嚇之事。若在任日久。恐所屬備弁心懷不服。別生枝節。著董教增接奉此旨。即密行訪查。張保在任有何恣縱劣蹟。即他無確據。其服食鴉片烟。已屬有玷官箴。一面以商辦公事為名。先將該員調至省城。再行具摺劾參。將此諭令知之。○乙卯。

上臨慶郡王永璘第視疾。○還宮。○以故奉恩

將軍錫春子全齡襲職。○旌表守正捐軀江

實錄卷三十一

壬

蘇新陽縣民平通觀姪女平氏。○是月。兩廣總督阮元奏。覆廣東積弊得旨覽奏。俱悉。時刻留心查拏盜匪。嚴禁鴉片。其餘諸事。有獎即參。

之胥役斤革嚴懲並將糧戶一併懲處以免
拖延其民間典當地畝未經過糧者因應徵
錢糧仍係原業戶收同交納遂不免有豫支
侵用情事並有年限已滿匿不投稅過糧者
並著地方官一體清釐以杜影混至按地徵
糧相安已久該御史所稱糧地不符請飭各
直省按某里某段逐一清查其事紛擾難行
著毋庸議○辛酉命刑部右侍郎廉善左侍
郎帥承瀛由山東馳往江蘇審案○旌表守

奉天李士元

下

正被戕山東昌邑縣民元采妻郭氏○壬戌
以禮部右侍郎那清安內閣學士杜堦知貢
舉戶部尚書盧蔭溥禮部尚書黃鉞為會試
正考官刑部右侍郎吳芳培工部右侍郎善
慶為副考官○以江南太湖營副將雲天彪
為廣東陽江鎮總兵官○癸亥

上御勤政殿聽政○祭

先農之神遣定親王綿恩行禮○以廣西梧
州協副將周長崇為右江鎮總兵官○甲子

上啟鑒恭謁

東陵○命肅親王永錫大學士曹振鏞尚書英
和和寧留京辦事○諭內閣本日兵部奏遺
失行在印信一案著交留京王大臣會同刑
部即行鎖拏兵部看庫之夫役人等嚴行審
訊一經得有端倪即查明該當月滿漢司員
革職鎖拏嚴訊迅速具奏兵部堂官未能先
事豫防均有應得之咎明亮舊有勲績現已
年老不能常川到署著交部議處戴聯奎常

奉天李士元

下

福曹師曾常英先行摘去頂帶俱著交部嚴
加議處五日內具奏松筠和世泰普恭吳其
彥俱俟究出何年月日遺失係何人任內失
察再行交部嚴加議處尋議上得旨此案兵
部遺失行在印信若係該堂官等早經查出
自行檢舉部議上時朕必量予恩施乃平日
漫不經心至請領印信時始行查出並不知
何時失去該堂官等實屬疏懈毫無覺察吏
部等衙門分別議以降調革職固屬咎所應

得姑念明亮舊有勲績現已年老不能常川到署著加恩改為降五級留任無庸管理部旗事務仍留內大臣職任戴聯奎著加恩以從三品翰林京堂補用曹師曾常英著加恩以四品京堂補用常福著加恩賞給四品頂帶管理圓明園○免蹕路經過地方本年額賦十分之三○是日駐蹕湯山行宮○乙丑上詣明長陵景陵泰陵奠酒○諭內閣前明諸帝陵寢曾奉

實錄卷三六八

五

皇考高宗純皇帝特諭重修並親臨永樂陵閱視酌奠朕仰紹前謨於嘉慶九年亦曾躬往中奠並飭諭地方官嚴禁樵蘇時加修葺本日朕鑾輅經臨再往致祀因念明弘治宣德二陵俱列祀典即與永樂陵一同躬臨奠醑並閱視櫟楠牆垣規制煥然松楸亦屬蔥鬱皆由我朝列聖德侔天地優待勝國實為從古所未有我萬世子孫允當恪遵

成憲祀事時修以副祇守前徽恩禮前朝之至意○調巴里坤總兵官達凌阿為陝西西安鎮總兵官西安鎮總兵官張拱辰為巴里坤總兵官○是日駐蹕工部廠御營○丙寅

上詣

惠澤龍王廟拈香○是日駐蹕湯山行宮○

丁卯

孝賢純皇后忌辰遣官祭

實錄卷三六八

五

裕陵○諭內閣朕弟慶郡王永璘幼齡時仰蒙皇考高宗純皇帝鍾愛每逢

巡省必蒙

考命同朕及成親王隨扈共荷

恩慈因伊幼年讀書資性稍次騎射亦未甚嫻

習仍邀

眷愛封為貝勒朕親政後晉封為郡王因其材質中平亦未令管理事務至今二十餘年府第優閒安分守己謹慎小心甚屬可嘉今春

患病命皇子連次看視二月二十九日朕親往視疾本日據英和等奏伊病勢沉重幾至不起朕心深為感動慶郡王永璘著加恩晉封為慶親王以示優眷並著載銓即日馳往面宣恩旨或伊聞而忻慰從此病勢漸瘳朕所深望焉○是日駐蹕三家店行宮○戊辰戶部議駁綏遠城將軍祿成等奏沙拉穆楞地畝請由喇嘛自行交收一摺得旨部駁甚是歸化城沙拉穆楞地畝節經該將軍等奏

奏奉 諭旨

奉

明折收銀兩由歸化城同知徵解分給蒙古喇嘛作為香火養贍之資嗣該撫請照吉林開墾地畝由喇嘛自行收取經戶部咨駁有案此次該將軍等復稱該喇嘛情願自行交收不必官為經理是啟私相盜賣之弊且恐招集多人滋生事端所奏不准行祿成成格博卿阿俱著交部察議○調都察院左都御史劉鏞之為兵部尚書仍管理順天府府尹事以禮部左侍郎汪廷珍為都察院左都御

史候補三品京堂王宗誠為禮部左侍郎仍留江西學政任內務府大臣阿克當阿通政使司通政使吳邦慶為兵部左侍郎內閣學士哈寧阿為兵部右侍郎兼鑲紅旗滿洲副都統○以頭等侍衛蘇沖阿為鑲紅旗漢軍副都統○是日駐蹕大新莊行宮○己巳祭先蠶之神遣妃恭代行禮○諭內閣朕弟慶親王永璘秉性素醇持躬謹飭幼齡時仰蒙皇考鍾愛封為貝勒朕親政後誼篤宗親晉封

奏奉 諭旨

奉

郡王自本年正月偶嬰微疾特命皇子連次看視二月間聞病勢沉重朕復親往臨視面宣溫諭昨因病日危篤晉封為親王當派載銓馳往宣旨方冀聞而欣慰從此沈疴漸起茲於本日申刻據英和等奏到慶親王於十三日卯刻薨逝覽奏深為痛悼前因伊病勢加劇豫派英和阿克當阿經理其事並諭英和等察看病勢或至不起俟其彌留之際向伊傳述諭旨一切身後事宜均係官為經理

昨英和等已傳宣恩意想慶親王聞之自可
藉慰泉下矣現值朕祇謁

永陵未能即日親往賜奠著二阿哥四阿哥於十四日前往奠醊二阿哥先行代朕致奠畢再同四阿哥自行酌酒行三叩禮十五日著三阿哥奕緯阿哥前往行禮致奠阿哥等於到府門時俱服用青袍褂帽摘纓出門即易常服戴纓帽慶親王長子綿懋於百日孝滿著即襲封慶郡王次子綿悌綿性百日孝滿

即賞給四品頂帶至初祭大祭奉移儀節俟奏到之時再行遣官致祭所有一切喪儀典禮著各該衙門即行察例具奏尋謚曰僖○又諭昨據曹振鏞等奏審訊改教知縣傅師瞿之子傅鏞所控方受疇家人石七供詞當交軍機大臣傳旨令方受疇明白回奏本日據該督覆奏向來因公出省所帶卷宗行奪需用各州縣號車裝運此項車輛係州縣自行捐備向不給價及已革知府沈華旭延至

卷之五

木

1

實錄卷三百六十八

九

蓮池書院掌教遇有刑名疑難事件。間向詢問屬實。至伊家人石七。有無得受。傅師翟門包銀兩。請勅部嚴究。並自請議處等語。直隸總督因公出省。本有沿途應辦事件。方受疇需用各州縣號車更換。尚無不合。其家人石七。是否得受門包。尚在未定。即使審訊屬實。亦自有失察之咎。惟已革知府沈華旭。本係永不敘用之人。該督即應早行飭令回籍。乃任其逗遛省垣。延至書院教課。並與商擁刑名干與公事。其咎在是。方受疇著交部議處。尋議上得旨。此案已革知府沈華旭。以革職永不敘用之人。即應立時回籍。無恥鄙夫。仍逗遛省垣。干與公事。並訊明前在保定府任內收受屬員節禮賀禮。又囑令首縣通信各屬。致送節禮。授意求索。實屬卑污。沈華旭著加枷號兩箇月。滿日發往烏魯木齊。不許干與公事。永遠不准釋回。以為鑽營奔競者戒。石七以總督家人。屢次私索門包。著加枷號

兩箇月滿日發往邊遠充軍傳鏞所控各款亦有不實之處且伊父傳師瞿年已八十並不知其來京具控乃輒挾伊父改教之嫌自行訐告情殊刁詐若僅革去監生擬以杖責不足蔽辜傳鏞著發往近邊充軍方受矜於家人得受門包雖無縱容情事究未能先事覺察著交部嚴加議處清苑縣知縣辛文泓說無致送節禮之事惟因該革府沈華旭授意即札致各屬餽送規禮亦有不合著交部

實錄卷百六

十

照例議處餘依議○是日駐蹕靜翳山行宮

○庚午諭內閣朕每年祇謁

東陵俱派慶親王永璘隨扈間遇駐蹕盤山朕拜廟時慶親王必常隨從或遇賞飯亦必與賚予此次朕祇謁

東陵再莅田盤慶親王遽經薨逝撫今思昔愴然於懷若仍照常駐蹕五日於心益覺悽愴著改於二十日自盤山啟蹕迴鑾二十二日進城即親臨慶親王府賜奠所有執事人員

俱穿青袍褂帽摘纓禮畢後是日朕駐蹕雍和宮無庸設儀仗作樂隨扈之王公大臣官員等仍俱服行衣在京諸王大臣官員無庸至朝陽門外接駕亦不必至

雍和宮請安二十三日迴蹕圓明園仍設儀仗作樂王大臣等照常接駕所有隨扈王公大臣官員仍俱服行衣○是日駐蹕白澗行宮○辛未駐蹕隆福寺行宮○壬申

上恭謁

實錄卷百六

十一

昭西陵

孝陵

孝東陵

景陵

裕陵俱未至碑亭即降輿慟哭步入

隆恩門詣

寶城前行禮躬奠哀慟王以下文武大臣官員均隨行禮○旌表守正捐軀甘肅皋蘭縣民楊生蓮妻唐氏○是日迴鑾駐蹕桃花寺行

宮○癸酉山東巡撫程國仁因病解任調江西巡撫錢臻為山東巡撫以江西布政使璋弼為巡撫四川按察使韓文綺為江西布政使四川永寧道章凱為按察使○緩徵山東濮范壽張東阿東平陽穀利津霑化蒲臺濱惠民齊東聊城肥城海豐章邱鄒平濟陽鄆城博興茌平博平二十二州縣及東昌衛東平所場竈地畝水災本年額賦展賑濮范利津壽張東阿東平陽穀霑化八州縣災民並貸齊東惠民蒲臺濱四州縣災民口糧○是日駐蹕盤山行宮至乙亥皆如之○乙亥貸甘肅皋蘭河隴西岷鹽茶清水禮平羅華亭九廳州縣及王子莊州同所屬貧民籽種口糧○丙子諭軍機大臣等據吳璥等奏馬營壩大工於十三日寅時合龍後正在加鑲追壓至十五日卯時東壩上邊埽陡墜串水壩下翻花甚大尚須趕緊加壓方能斷流穩固又奏自初五日開放引河後據蘭儀廳稟稱

於十二日戌刻大河分溜圍注隄身適值大風溜勢擁高將儀封三堡以下無工處所坐墊隄身三十餘丈掣動大溜新河掛淤斷流等語馬營壩大工雖已合龍壩下仍有漏水翻花之處未能穩固吳璥等應即督飭在工人員晝夜趕壓堅實再行馳報現在南岸儀封三堡以下隄身又坐墊三十餘丈掣動大溜亟應趕緊盤築裹頭免致汕刷日寬吳璥那彥寶在北岸督辦壩工尚未歲事自應先其所急仍駐北岸經理完妥葉觀潮琦善均有河務之責既未能豫為防範致南岸隄身又復坐墊掣溜咎實難辭葉觀潮現無頂帶琦善即行摘去頂帶飭令伊二人戴罪圖功現在南岸已刷開口門掣動大溜葉觀潮琦善自行酌量一人即日馳往南岸一面督率員弁趕緊盤築裹頭勿令刷塌日寬一面購料鳩工趕行堵築現屆桃汛期內水勢漸增即當迅速興辦務於四月以內堵合完工勿

稍稽遲。本日已降旨令該鹽政關差等將商捐各款銀兩迅速撥解儀封工次備用。先行給辦工料。將來工竣即著落葉觀潮琦善二人分賠。不准開銷。其北岸合龍後。如料物尚有盈餘。即趕運南岸以濟要需。至南岸漫口。上年八月據葉觀潮奏。係在儀封三堡。茲據奏。此次漫口係在儀封三堡以下。是否即係上年補築新隄。軌添以下二字。冀圖含混。避就著吳璥那彥寶查明。此次儀封漫口如係

實錄卷一百一十五

五

上年補築新隄。將承辦此段工程各員弁即行革職。如號工次並查明彼時督辦大員據實指名參奏。勿稍迴護。所有疏防之該管廳員汛備並著查明嚴參革職。其餘協防員弁亦一併先行革去頂帶。再此次漫口必因引河未能通暢。以致下壅上漬。並著查明儀封三堡以下係何段引河挑挖未能如式。將承辦各員據實參奏。以便懲辦。文孚德奎二係何人所辦。查明速奏。將此諭令知之。○是

日駐蹕白潤行宮。○丁丑諭內閣。成格奏審明達都實非正犯。並先將吉克密特等解回審辦。一摺。此案前經祿成等擎獲形跡可疑之達都。請照夥衆搶劫為首擬以絞候。因達都並無確供。當降旨交成格親提研鞠。茲據該撫咨提犯卷審。係吉克密特挾嫌誣扳。達都實非達起。另有其人。業經質訊明確。自應將吉克密特等解回綏遠城歸案辦理。該將軍等前請將達都擬絞監候。罪關縲首實屬

實錄卷一百一十五

五

草率定讞。祿成博卿阿俱著交部議處。○加河神顯佑通濟昭靈効順廣利安民金龍四大王惠孚封號。靈佑裏濟黃大王顯惠封號。助順永寧侯朱大王佑安封號。從欽差協辦大學士尚書吳璥等請也。○吳璥等奏報馬營壩大工合龍得旨嘉獎。加吳璥太子少保。以戶部右侍郎那彥寶為鑲藍旗漢軍都統。河南布政使廉奇瑜下部議敘。在工出力人員升用有差。○禮部以宗室會試中額請得

旨取中四名○調戶部左侍郎禧恩為右侍郎刑部右侍郎文孚為戶部左侍郎以內閣學士海齡為刑部右侍郎○調正紅旗蒙古副都統穆彰阿為正藍旗滿洲副都統以二等侍衛巴彥巴圖為正紅旗蒙古副都統鑲藍旗漢軍副都統英惠兼鑲黃旗護軍統領○賞蹕路經過看守各行宮弁兵半月錢糧○免江蘇阜寧縣淤灘酒廢地七百八十一頃有奇地價○是日駐蹕烟郊行宮○戊寅

實錄卷三六八

十六

上臨故慶親王永璘第賜奠○詣

雍和宮行禮○調京營右翼總兵穆彰阿為左

翼總兵○是日駐蹕

雍和宮○己卯

上還圓明園○禮部以會試中額請得旨滿洲取中八名蒙古取中二名漢軍取中四名直隸取中二十三名奉天取中二名山東取中十七名山西取中十二名河南取中十一名陝甘取中十一名江蘇取中二十一名安徽

取中十四名浙江取中二十四名江西取中十七名湖北取中十一名湖南取中八名福建取中十一名廣東取中八名廣西取中七名四川取中九名雲南取中十一名貴州取中十名○調刑部右侍郎吳芳培為兵部左侍郎兵部左侍郎吳邦慶為刑部右侍郎○以正藍旗護軍統領松福為京營右翼總兵○庚辰諭內閣慶親王於二十九日奉移著英和等於二十八日豫備辭靈酒飯桌張著

實錄卷三六八

十七

派二阿哥前往於西戌之間代朕奠酒二十日奉移之時著二阿哥奠酒行禮發引後步送一班即騎馬先至安定門候出城時仍步送一班再回書房○辛巳諭內閣特依順保等遵旨會奏將烏里雅蘇台科布多卡倫侍衛內應留應裁數目擬議一摺自津齊里克至和訥邁拉瑚二十三十卡倫與哈薩克俄囉斯地界相距較近且與杜爾伯特烏梁海游牧毗連竊盜案件既關緊要現在駐卡侍

衛六員著仍留該處巡察。僕坐卡之侍衛六員出有事故。即由該處佐領內揀派更換。其駐城換班之侍衛三員。即著裁汰。遇便飭令回京。○壬午

上幸靜明園詣

龍神廟拈香。○諭軍機大臣等。據御史林則徐奏。向開河工料販每當新料將收。豫行壟買。潛運口岸附近之處。私行堆積。以待高價出售。上年豫省料販賣料每斤自制錢十二

實錄卷三十八

六

至十七八文不等。計其獲利不啻倍蓰等語。現在豫省南岸復有漫工。正需料緊急之時。豈容奸商蠹役牟利居奇。著琦善即遴委妥員於沿河一帶細加察訪。如有潛行囤積高擡價值者。一經查出。仍照其收買成本發給價值。違工備用。儻敢串通胥役把持。即治以居奇囤積之罪。以杜積弊。而濟要需。將此諭令知之。○癸未。旌表守正捐軀江蘇沭陽縣民王太女王氏王桂妻李氏。○甲申。諭內閣

松筠等奏。承祭不到。並緣事被控之宗室請革職。圖禁一摺。盛京奉恩將軍安平阿奉派承祭。

福陵因其父病未能親往。自應回明。將軍乃私向備班之福松阿囑令代替。且其父卧病已久。並非垂危不起。顯係藉詞推諉。又失察家人訛詐平民。俱屬溺職。安平阿著革去奉恩將軍。即在伊家園禁。交遼陽城守尉嚴加管束。○又諭豫省南岸儀封三堡復刷成漫口。

實錄卷三十八

七

續塌至一百三十餘丈。吳璥等於北岸合龍後。遲延十餘日。並不趕赴南岸迅速籌辦。均難辭咎。吳璥著革去太子少保銜。以協辦大學士吏部尚書署理河東河道總督那彥寶革去都統。降補內閣學士。署理河南巡撫。均撤回。議敘葉觀潮著革去河道總督。留於工次効力贖罪。琦善著革去巡撫。賞給主事銜。隨同吳璥等辦理大工。俟合龍後回京。以刑部主事用。○調正黃旗蒙古都統綿志為鑲

藍旗漢軍都統以鑲紅旗蒙古副都統阿那保為正黃旗蒙古都統奉宸苑卿博克順為鑲紅旗蒙古副都統○旌表守正捐軀陝西藍屋縣民張晉山妻王氏

實錄卷三百六十八

壬

大清仁宗受天興運敷化綏猷崇文經武孝恭勤儉端敏英哲睿皇帝實錄卷之三百六十八

大清仁宗受天興運敷化綏猷崇文經武孝恭勤儉端敏英哲睿皇帝實錄卷之三百六十九

恭錄 嘉慶二十五年庚辰夏四月丙戌朔享太廟遣皇四子瑞親王綿忻恭代行禮○湖南布政使翁元圻年老命留京以四品京堂候補以浙江按察使左輔為湖南布政司山西河東道葉汝芝為浙江按察使○免陝西陽平關水衝營田三十六畝有奇額賦○戊子

嘉慶二十五年庚辰夏四月丙戌朔享

實錄卷三百六十九

壬

上詣大高殿行禮還宮○戶部議准閩浙總督署福建巡撫董教增疏報閩縣開墾田二十六畝有奇照例升科從之○以常雩祀

大高殿行禮還宮○戶部議准閩浙總督署福建巡撫董教增疏報閩縣開墾田二十六畝有奇照例升科從之○以常雩祀

天於

圓丘自是日始齋戒三日。○己丑諭內閣御史陳鴻奏嚴禁殿廷考試閱卷之弊一摺據稱近日庶吉士散館貢士覆試朝考每於試竣後向素識之大員分送詩片冀圖暗中關照請飭各大臣毋許收閱詩片儻有私行送閱者立即叅辦等語所奏是每逢考試私送詩片朕所素知此即係營求囑託自應嚴行禁止覆試朝考散館在邇儻有私送詩片之人

立即指名叅辦以杜鑽營至該御史奏請於散館等試勅下閱卷大臣分卷之後各人分定甲乙將所閱之卷統候欽定等第名次所奏大失體制朕派校閱試卷諸臣皆係可信之人惟在大臣秉公持正自能絕奔競之私若其人稍有瞻顧朕亦祇能就其擬取名卷親加披閱焉能徧覽不錄之卷於杜弊仍屬無益况朕日理萬幾宵旰弗遑衆所共知若如該御史所奏諸大臣皆不可信防之不已

勢必將鄉會試取中數百卷皆待朕親閱有是理乎似此妄議紛更所奏斷不可行著無庸議 庚寅

上詣

南郊齋宮齋宿。○辛卯常雩祀

天於

圓丘

上親詣行禮。○辛圓明園。○壬辰諭內閣御史黃大名奏推廣武陟大工投効事例請做照

南河土方續增事例辦理一摺國家經費有常偶開捐例亦祇因辦理漫工為民拯災捍患從無解撥內用之事現在豫省儀封南岸復有漫口籌辦堵築需費浩繁該御史所奏尚屬可行著該部查照從前南河土方事例覈議具奏。○諭軍機大臣等吳璥等奏查勘儀封漫口情形並勘明南北兩岸隄工添估工段各一摺儀封三堡漫口現據查明由毛垆寨地方舊隄無工處所先行坐墊並將新

埵接塌除舊隄三十餘丈。計塌去新埵一百十二丈。尚存未塌五百八十八丈。其為非三堡舊口門。似尚可信。並據稱儀封漫口。現在大汎將臨。時日已迫。萬難施工。自係實在情形。惟其疏防。應汎各員。除蘭儀同知周存義。已經革職。枷示外。署儀封經歷耿喬年。署儀封汎把總姚珩。革職不足蔽辜。著即枷號。工次以示懲儆。將此諭令知之。○癸巳。

上幸萬壽山。○諭內閣。吳璥年老不能耐勞。河督事務較繁。精力恐難周到。河東河道總督著張文浩。以道銜署理。專駐豫省。籌辦大工。及黃河隄岸各事宜。其山東運河事務。仍著李鴻賓署理。分任其事。吳璥俟張文浩到任。將豫省應辦工程。籌畫周妥交代後。即馳驛前往江南。查勘高堰水勢工程情形。回京供職。以正黃旗領侍衛內大臣和寧為內大臣。伊犁將軍晉昌為正黃旗領侍衛內大臣。伊犁參贊大臣慶祥為將軍。○甲午。

上臨曹八里莊。故慶親王暫安處賜奠。並賞其子綿悌綿性三品頂帶。○諭內閣。兵部遺失行印一案。自三月初八日。派綿課等會同刑部堂官審訊。迄今一月有餘。並未訊有端倪。即周恩綬私換割付一節。據稱係盜用空白。亦與行印無涉。另為一事。所有審訊之王大臣及刑部堂官各司員等。殊屬懈玩。綿課著罰職任俸半年。曹振鏞英和。刑部堂官俱著罰俸半年。各衙門所派承審此案之司員等。俱著罰俸一年。以示懲儆。綿課曹振鏞英和三人。自初十日始。每日必應赴部。早去晚散。不可懈怠。上緊嚴究。務得確情。若再遲延。嚴譴立降。○以刑部尚書和寧為滿洲繙譯會試正考官。吏部右侍郎常起為副考官。○陝西延綏鎮總兵官韋陀保因病乞休。允之。以貴州平遠協副將和倫為延綏鎮總兵官。乙未。諭內閣。朕恭閱

皇考高宗純皇帝實錄。內載乾隆二十年正月。

欽奉

諭旨昨於幾暇恭讀

皇考世宗憲皇帝上諭有江西撫臣謝旻以原任學道高鎮崇祀名宦降

旨訓飭並詢問江西通省紳士應否崇祀令其據實陳奏因憶近時大臣中曾有祖父得祀鄉賢者即尚書王安國左都御史楊錫綬之父其同時題請部駁者曰徐景京則其子固非身列顯要者也可見該撫之所請原在可駁可准之列而部臣之所議即寓高下其手之心嗣後子孫現任九卿者其祖父概不得題請入祠其身後鄉評允當者聽著為令等因欽此仰見我

皇祖

皇考於崇祀名宦鄉賢一事加意慎重以勵名教而肅典章前年直省曾將萬承風錢樾二人題請入祀鄉賢朕以伊二人不過循分供職並無傑出謀猷當經飭令禮部分別准駁

覈實辦理景仰

前謨若合符節誠以崇德尚賢原以風勵衆庶必其人無忝公論方能矜式里閭有光俎豆其事殊有關係嗣後各直省凡題請入祀名宦鄉賢者該督撫務當確切查覈不得以名實不符者濫等陳奏部臣尤應秉公覈議不可稍涉瞻徇庶揚清激濁公議昭然其有裨於世道人心者非淺也將此再通諭知之○諭軍機大臣等吳璥等奏通籌儀封漫口辨

理情形一摺現在已交四月中旬距大汛之期不遠河水日近增長壩工難於進占且大雨時行引河亦不能挑挖徒然虛糜帑項此時自應停止興工即照吳璥等所議於七八月閒估挑引河霜降後開工堵築計年內當可蒞事惟該處口門現已塌至一百七十餘丈西邊雖已裹住東邊仍隨裹隨塌若不趕緊裹護盤頭必致愈塌愈寬著吳璥等即相機設法督飭員弁兵夫將口門東西趕緊裹

護再赴江南會同孫玉庭黎世序察看洪湖水勢情形將此諭令知之○丙申

上幸靜明園 幸靜宜園○以太常寺卿舒寧為內閣學士兼禮部侍郎銜○是日駐蹕靜宜園至庚子皆如之○丁酉諭內閣馬濟勝奏工次巡查事竣帶領官兵回營一摺馬營壩興辦大工前派馬濟勝帶領官兵赴工巡查彈壓在工人夫至六七十萬之多料廠共有二十餘處時閱數月管束甚為安靜馬濟

勝著加恩賞加一級其儀封堵築漫口屆時著派南陽鎮總兵呢瑪善酌帶官兵前往巡防 又諭錢臻奏鄰省行銷鹽引請釐定額數以免侵越影射一摺江西鹽務疊經整頓官引漸見暢銷而私煎私運仍未能盡絕據該撫奏稱粵鹽浙鹽私煎私運侵入該省之弊總因粵鹽於正額之外又有融銷借銷代銷搭銷等項名目浙鹽亦有溢銷餘引名目江省不知應銷定額無憑稽察以致奸商私

販串通影射易滋透越嗣後著兩廣總督浙江鹽政各將該省行銷江西引鹽數目及粵省應設子店官鍋詳悉覈定額數知照江省該省即按額稽查俾得實力緝私以肅鹺政

己亥

上御演武廳閱健銳營操○以前任山東巡撫程國仁為刑部右侍郎調安徽巡撫姚祖同為河南巡撫以刑部右侍郎吳邦慶為安徽巡撫 旌表守正被戕山東荷澤縣民趙

泳安女隱姐○辛丑

上還圓明園○緩徵山東荷澤臨清夏津武城恩濟寧德清平堂邑魚臺齊東汶上海豐平陰十四州縣德州臨清二衛水災新舊額賦並貸給金鄉海豐臨清夏津武城恩濟寧魚臺荷澤九州縣籽種口糧有差 壬寅

孝端文皇后忌辰遣官祭

昭陵 諭內閣本年三月初七日兵部查知行印被竊初八日在湯山具奏實屬奇事必應

立時嚴訊刻不容緩當即降旨交綿課等會同刑部堂官審訊乃綿課等因循怠玩疲情性成遲至數日始將兵部吏役等傳齊到案此數日內該部司員以及吏役人等業經串就供詞衆口如一而承審之堂司各官又不及時認真推鞠即如鮑幹於初七日請行印時乍知失印並無張慌情狀轉以車駕司行印搪抵並將同進庫之任安太指為紀三此等情節於到案時即應究出乃延宕月餘始

行訊有此供豈非故縱致令苟延乎况既得此供仍不加緊嚴訊轉稱鮑幹氣體虛弱未便刑求藉詞展緩綿課等於派審此案因循疲玩推委遷延實屬咎無可辭本日因日久未能審出實據奏請議處冀圖另派他人脫然事外此等伎倆豈能逃朕洞鑑乎綿課等毋庸交吏部都察院議處綿課英和和寧韓對俱著先行拔去花翎曹振鏞和寧韓對俱著降為二品頂帶英和素日辦事較勝於彼

姑留頂帶俟五月再降恩寧王鼎海齡俱著降為三品頂帶所有派審司員等俱著摘去頂帶仍責令上緊研鞠此案經伊等集訊多日犯供屢改輾轉游移斷不能另行派人審辦將來即將伊等全行斥革仍必令將此案究出實情方能卸責著再限至五月初五日綿課等三人每日赴刑部衙門會同該堂官督率司員等將各犯證晝夜熬訊自降旨之日為始綿課等及刑部堂官俱不准來園奏

事吏部引見人員著托津帶領刑部應奏事件著司員送園交戴均元具奏綿課英和和寧所管旗務俱交該旗副都統來園具奏步軍統領衙門應奏事件著左右翼總兵具奏內務府引見奏事該總管大臣尚有數人英和亦不准來園如初五日以前或究出正賊或起獲行印奏上時必當立予開復儻仍不能訊出實據朕於初六日再降旨治伊等之罪凜之慎之○癸卯諭內閣本日慶保奏參

均州知州胡大典違例給示擾害商民摺內聲敘請將該員革職勒令交出門丁蔡升。又陳若霖奏參泰順縣知縣林軒開玩視命案解證遲延摺內聲敘該革員門丁孫安避匿不到知情徇縱。二事相同。門丁為奴隸下賤。控案中一經干涉即應立時解審。如到案少遲該上司迅速查拏。何至縱令遠颺。若州縣官於督撫行提丁役皆敢抗不中解。必俟督撫奏參始能提案審訊。則屬員藐視上官。全

無畏懼其風斷不可長。嗣後直省督撫於所屬州縣無論官親幕友門丁胥役如有被人指控者。即行提訊。稍有遷延。立即派人入署鎖拏。按律懲辦。若訊係被誣。不妨再為省釋。其摺奏內均毋庸聲敘。以昭體制。諭軍機大臣等。御史葉繼雯奏沁黃交匯之處形勢尤要。應豫籌捍禦。以護隄防一摺。所奏甚是。沁河入黃。其勢迅而且猛。該處地形又係南高北卑。北岸隄防尤為緊要。聞武陟大工合

龍之後。沁水仍復甚旺。轉瞬大汛。經臨沁黃二水。自必日漸加增。隄工處處著重。上年蘭儀漫口時。吳璥等專在南岸辦工。並未慮及上游北岸。以致武陟猝成鉅工。現在北岸大工甫竣。其隄堰卑薄。河身淤墊。處所必應先事豫防。著那彥寶、張文浩即遴派曉暢河務形勢之員。速赴沁黃交匯之處。悉心查勘。或應加培隄堰。或應疏濬支流。奏明先期辦理。將來伏秋兩汛。沁黃長發之時。再專派幹員

加意防護。保守萬全。那彥寶、姚祖同到任時。將此旨詳細告知。令其一體欽遵辦理。將此諭令知之。○禮部以滿洲繡譯會試中額請得旨。取中四名。○緩徵直隸大興宛平固安永清東安新安開東明長垣武清霸保定大城安高陽雄青靜海寧晉元城大名南樂清豐南皮滄隆平二十六州縣水災。本年額賦並吳橋東光二縣新舊額賦。緩徵河南汲輝淇濬四縣水災新舊額賦。漕糧並加價

銀甲辰

上幸萬壽山詣

廣潤祠拈香。賞會試年老舉人熊清泰等七名編修檢討學正職銜有差。乙巳。

上御勤政殿聽政。諭內閣兵部遺失行印一案審訊日久尚未究出正犯。昨據綿課等推鞠該衙門平日直宿請印情形。奏稱該部當月司員夜間並不直宿。間有一二人在署過夜。亦係一早回家。其堂印及庫門鑰匙。晝則

由該班之莫即戈掌管。夜則歸當月科直宿書吏收存。作弊甚易。又查出該部庫後圍牆有新堵門形。係該部早隸黃勇興於上年九月十一日因娶子媳。開啟直通街外。本年三月初七日堵砌。黃勇興旋於四月初一日病故。等語。各衙門當月司員在署直宿。庫門印鑰。即其官守。乃並不自行監管。全委之吏役人等聽其取攜。自便。啟閉隨時至官廨為辦事公所。門戶牆垣。關防緊要。乃以卑隸賤役。

輒敢穿穴圍牆。自開門徑其娶媳之花轎嫁裝。竟穿衙門而走。而堂司官竟毫無見聞。全同木偶。實屬溺職。即此二事。可見該衙門廢弛已極。所有當月司員。係每日更換。俟審明失印日期。再將是日直宿司員從重懲處。其平日任聽官吏懈玩。漫無覺察之各堂官。實屬咎無可逭。戴聯奎等雖經降調不足蔽辜。仍交部嚴加議處。松筠和世泰俱著交部嚴加議處。普恭於三月初三日署任。雖僅數日。

亦著交部議處。各員之罪限五日內具奏。早隸黃勇興私開牆門。本應從重治罪。業經身故。倖免於法。其開門之日失察之該管司務著查明即行革職。自上年九月初三日起至本年三月初七日止。該部當月司員。不自行收管印鑰。怠惰玩公。積習甚為可惡。俱著永遠停升。其有記名應升及加級紀錄議敘之處。一併徹銷。以示懲儆。尋議上得旨。兵部庫後圍牆該衙門早役輒敢私開門徑直通街。

外娶媳花轎任意行走自上年九月至本年三月新任堂官始行堵閑該部堂司各官漫無覺察廢弛已極除司務二員業經革職外吏部議將各該堂官照溺職例革職實屬咎所應得但念其過究與私罪有間尚不至全行罷斥松筠著革去盛京將軍降補山海關副都統仍帶革職留任俟新任將軍松寧到任交卸後即赴山海關本任不准來京謝恩和世泰著革去官銜紫禁城內騎馬御前侍

衛兵部尚書正藍旗滿洲都統留總管內務府大臣之任管理茶膳房清漪園等處事務仍帶革職留任普恭署任僅止數日著改為降三級留任戴聯奎常福曹師曾常英前已降調俱著改為革職留任命都察院左副都御史潤德太僕寺卿何銳馳往熱河審案以太常寺卿鮑勳茂為通政使司通政使以大學士托津兵部尚書劉鐸之工部尚書茹業都察院左都御史汪廷珍吏部左侍

郎顧德慶禮部右侍郎湯金釗工部左侍郎王以銜右侍郎陸以莊為殿試讀卷官旌表守正捐軀雲南大關廳民婦王吳氏女王氏丙午策試天下貢士陳繼昌等二百四十六人於太和殿制曰朕寅承大寶撫御寰區二十有五年孜孜汲汲罔敢一日暇逸仰荷

吳緯薦祐

列聖貽庥函夏乂寧民人樂業冀與內外臣工早作夜思由小康而躋上理洪惟帝王治道之原學校教人之法儆羣僚以勵翼奠德水以安流所為斟酌元闡繹以保萬世丕丕基者爰廣咨諏用資啟沃爾多士其敬聽之道莫高於唐虞法莫備於成周典謨官禮萬世之圭臬也臯陶之謨曰知人安民而其文何以有詳略三公之職曰經邦論道而其官何以獨不傳人心道心授受之要而荀卿何以引為道經樂德樂語教習之規而賓公何獨傳

其遺法璣衡為測天之器而渾天周髀何以殊塗同歸什一為取民之常而鄉遂都鄙何以因地異制以至虞五服周九服虞十二州周九州虞服十二章周九章虞五載巡守周十二年巡守禮樂虞分為二周合為一兵刑虞合為一周分為二變通損益其道安在若夫虞書五篇約之以一欽周禮六官統之以為民極古帝王所以握萬化之原而端出治之本者不更有心法在乎辟雍之名見於詩

禮鄭氏箋注何以不同或以辟雍為文王樂名其說何本蔡邕袁準其論何以互異漢以明堂靈臺辟雍為三雍何故釋奠釋菜視學合語其典若何漢代園橋觀聽稱制臨決其時講論於白虎觀者誰氏東漢魏周養老為老更者何人北面乞言所對何辭唐七學三館宋六學三舍明六堂積分其法若何我朝辟雍肇建聿舉上儀石鼓石經燦然昭列諸生沐浴教澤有能通經述古揚扆而言之者

歟書曰無教逸欲有邦又曰天工人其代之明乎居官行政不可以不勤也為吏者苟能厲廉隅循法度其亦可矣然或怠玩因循燕燕居息以廢弛為安靜以顛頊為老成獄訟積而不問職事情而不修國家安賴有是官為至若曹參之治齊寬而簡諸葛亮之治蜀嚴而詳而二人皆以賢相稱龔黃之治民以慈仁張趙之治民以明敏而四人皆以賢守著為道不同同歸於治其故若何惴惴之吏

可以寧人而緩急或不足恃武健之才易以集事而所弛或至踰閭量才器使其道何若朕宵旰屬精率作興事內而曹司外而守令實繁有徒惟賴為大吏者躬親倡導以熙庶績而或徒以旅進旅退謹身寡過為事豈所謂靖共匪懈者乎江淮河濟古稱四瀆何以河之為患獨甚於今爾雅河出崑崙言河源者漢張騫唐薛元鼎元都實孰得其真周定王時河始南徙迄今遷變凡幾古謂河不兩

行禹何以播之為九漢武帝之塞宣房王景之治汴渠其事若何賈讓三策其議若何潘季馴之治河主於束清刷黃其切實可施行者安在方今河道所關至鉅北決則處穿運而轉漕或礙南溢則恐入淮而高堰可虞自桃汛以至秋汛自克豫以至徐揚司事者晝夜巡防培築之法疏濬之宜壩堰之宣洩薪料之儲備在在宜慎朕不惜巨萬帑金為生民圖安宅欲使績底平成民無墊隘萬世永

賴計將安出凡此者法古以立治興學以作人廉法而庶政和清晏而百川理爾多士學古入官先資拜獻今日陳之為讜論異日施之則為嘉猷毋泛毋隱毋襲陳言朕將親第焉論內閣上年御史佟濟參奏國子監堂官齋戒不到降旨將祭酒敏登額等均實降一級調用本日敏登額張麟二人因補官召見同稱是日係於亥時到署齋戒已在御史查齋之後其言是否屬實姑不深究齋戒所

以致潔明敬理宜夙夜在公非僅夜間入署齋宿即為蠲潔也嗣後凡應行齋戒人員俱著晝夜住宿公所不准潛回私宅其派出查齋之員於日間稽查一次夜間稽查一次如有不到者即行指名參奏以儆曠怠旌表守正被戕四川華陽縣民李光炳妻王氏丁未諭內閣文孚等奏審訊秀寧雖昂互相參揭各款分別定擬一摺文孚長齡俱係滿洲大員查辦此案毫無迴護秀寧之處實屬

公正可嘉秀寧驅逐番帳於原奏兵數外多調兵三百餘名又在署演戲宴會均有應得之咎且以武職官員違例坐轎其咎尤重其所參雖昂四款現在審屬全虛是秀寧因被雖昂詳揭在先輒肆口反噬更為謬妄秀寧著即照所擬發往伊犁効力贖罪至秀寧之妾陳氏在署自縊若雖昂所揭款內有汚伊名節之處以致氣忿輕生自應坐雖昂以威逼之罪今雖昂詳揭秀寧其妾因有燒香一

事致累伊主捐軀明志。非惟昂意計所及料。惟伊本因挾忿攻訐其所揭各款。雖有得實之處。其餘均已自認。偏見懷疑。誤行揭報。文孚等擬以發遣軍臺所辦。甚是。但念其前在軍營著有微勞。雖昂著從寬免其發往軍臺。業已革職。即行飭令回籍。慶廉等應行察議。議處之處。交吏兵二部分別覈議。餘俱照所擬完結。又諭本日據瑞弼奏查起把總郭定元劄付封固。進呈御覽。朕詳閱劄付印信。

實係兵部堂印。並非行在印信。其年月墨筆字跡。係用印在前。書寫在後。是周恩綬前供以空白劄付私行填寫。換給情節。並無捏飾。與遺失行印一事。毫無關涉。著刑部即將周恩綬串通沈文元等私換劄付案內各犯。按律分別定擬罪名。另案具奏。其遺失行印一案。仍即上緊推鞠。務得確情。毋再玩延。尋議上得旨。此案周恩綬私行換給把總郭定元之劄付。雖係檢獲空白印劄。但該犯先曾向

鮑幹商浼盜用印信。因其謀未遂。始行改圖。周恩綬著加枷號一月。滿日照擬發遣。諭軍機大臣等。文孚等奏遵查秀寧奏駁法禮哈咨商動用青海蒙古烏拉一案。溯查乾隆四十五年舊案。陝甘總督及西寧辦事大臣衙門均無動用青海蒙古烏拉明文。此次喀爾喀四部落盟長等湊備銀兩奉派瑪呢巴達喇前往西藏迎接哲布尊丹巴呼畢勒罕。本不應再用烏拉法禮哈及隨帶司員等已

由西寧縣動用銀六千餘兩。置備長行駝馬口糧鍋帳等物。亦不應復動用烏拉。其上年理藩院移文條指該呼畢勒罕自熱河旋回時。由邊外行走。始令照例辦給烏拉票張。前已有旨。因該呼畢勒罕年甫七歲。不令前來熱河。是此項烏拉更無可動用之處。今據青海台吉恭藏等呈控瑪呢巴達喇護衛索諾木等在柴達木地方硬拏烏拉。訛索銀兩。自應究明懲辦。文孚現已回京。著長齡於法禮

略回至西寧時即由省前往提集索諾木等與該台吉等質對如係該護衛及隨帶司員筆帖式領催等藉端影射訛詐勒索即審明按律治罪如法禮哈有知情縱容情事將法禮哈據實嚴叅若該副都統祇係失察並無染指亦於定案時一併聲敘附叅將此諭令知之 戊申引見己卯科散館人員得旨此次散館之修撰陳沆編修楊九畹胡達源業經授職其清書二甲之庶吉士姜堅韓大信

漢書二甲庶吉士周祖培邵正笏周曰炳吳文鎔徐士芬沈鐸彪錢寶琛阮燦輝鄭瑞玉但明倫慕維德巫宜福李紹昉王雲岫蔣立誠楊峻魏建中李昭美程灃吳敬恒德春俱著授為編修三甲庶吉士蔡如蘅宗室鐵麟何輝綬朱嶠汪淦俱著授為檢討朱國淳胡美彥方長庚尚開模劉榮熙盛思本葉敏昌陸蔭奎戴修道俞誦芬劉夢蘭孫起端李印萬蔡家珩松峻俱著以部屬用裴鑑楊景曾

花詠春俱著以內閣中書用朱德華廖鴻苞周濂呂夢飛焦維域謝興曉王文驥郭應辰朱瀾劉宇昌俱著以知縣即用王寶華強上林俱著歸原班銓選 以正黃旗領侍衛內大臣晉昌為宗人府右宗人兼總管內務府大臣 以協辦大學士雲貴總督伯麟為兵部尚書兼正紅旗漢軍都統調正紅旗漢軍都統景安為正藍旗滿洲都統正白旗漢軍都統烏爾恭阿為鑲紅旗滿洲都統以山海

關副都統富蘭為正白旗漢軍都統 調湖廣總督慶保為雲貴總督以湖北巡撫張映漢為湖廣總督調貴州巡撫毓岱為湖北巡撫以福建布政使明山為貴州巡撫福建按察使孫爾準為布政使浙江杭嘉湖道舒靈阿為福建按察使 調黑龍江將軍松寧為盛京將軍以鑲紅旗滿洲都統奕顯為黑龍江將軍 旌表守正被戕內務府鑲黃旗閒散丁十妻得氏 己酉

上還宮 御乾清宮召讀卷官入親閱定進呈
十卷甲第 賑河南儀封蘭陽杞睢柘城五
廳州縣被水災民 庚戌

上御太和殿傳臚賜一甲陳繼昌許乃普陳鑒
三人進士及第二甲龔文輝等一百人進士
出身三甲勞逢源等一百四十三人同進士
出身 幸圓明園 辛亥諭內閣兵部遺失
行印一案三月初八日兵部於湯山具奏其
時朕即以行印專為隨營攜帶鈐用而設必

係上年秋圍途間遺失或被盜竊當即傳旨
令將行在上年曾經隨圍之兵部書役莫即
戈他庫爾什等押解回京交留京王大臣會
同刑部審訊綿課等查訊月餘總稱行印確
於上年九月初三日驗明貯庫其遺失係在
入庫以後因而忽指為偷竊舞弊忽指為藏
匿陷害疑竇百端供詞日變愈遠愈幻合正
文而旁求實可謂多才多藝矣迄未究出實
情經朕嚴旨綿課等及派審司員分別降革

頂帶飭令晝夜推鞠始據訊明行印確於上
年八月二十八日在巴克什營地方遺失看
印之捷報處書吏於失印後用備匣加封頂
充並賄囑兵部堂書鮑幹含混接收當月之
司官並未開匣驗視入庫後鮑幹復裝點在
庫被竊情形以圖抵卸衆供脛合厯厯如繪
現據綿課等呈遞各供先請將松筠裕恩及
兵部堂官分別嚴議議處察議司員分別革
職議處此案兵部當月司員何炳彝慶祿二

人於行印交到時並未開看乃初次到案即
合詞堅執開匣點驗並捏稱慶祿以手彈印
錚錚有聲何炳彝戲言並非石頭何須彈試
以實其辭且慶祿於訊供時復稱如果收時
匣中無印願以頭顱作抵抗言中辯在伊二
人祇圖規避未經點驗處分造作謊言以致
承審之王大臣等俱信以為實專在入庫以
後追尋被竊情由而於收印以前形跡轉以
為無須再問是此案拖延日久全為伊二人

所誤其情甚為可惡何炳彝慶祿俱著革職何炳彝發往吉林慶祿發往烏魯木齊効力贖罪慶祿又有願以頭顱作抵之言直同光棍訛賴尤為可惡著先行枷號一月滿日即行起解以示懲儆捷報處郎中五福喜輪直晚班典守行印乃假手書吏致有疏虞並於書吏抵充舞弊毫無聞見送印之筆帖式中敏並不點驗交代致被欺朦均著照所議革職其輪應早班之郎中恒泰在園失察遺失

印信著交部議處至各部院行在印信向係管帶印鑰之堂官自行存貯此次松筠率委之捷報處司員而該司員又委之書吏以致遺失松筠之咎甚重松筠著革去山海關副都統以該旗公中佐領用有缺補授無缺在旗候補裕恩上年署理行在兵部侍郎咎亦難辭著退出乾清門革去侍郎前鋒統領副都統仍留鎮國將軍隨旗上朝和世泰戴聯奎常福曹師曾常英前已分別降調此次著

免其議處普恭亦著免其察議其交審此案之綿課等現已審出實情綿課英和俱著賞還花翎和寧韓對著賞還頂帶花翎曹振鏞恩寧王鼎海齡俱著開復原品頂帶刑部及各衙門派審司員俱著給還頂帶兵部行在印信著交禮部即行補鑄將印文印式較舊印量為改易以示區別應用銀兩及鑄造工費著松筠裕恩二人賠繳所有案內舞弊捏供之書吏人等仍交綿課等會同刑部按律

分別定擬具奏尋議上得旨此案書吏俞輝庭因在帳房睡熟以致行印被竊若彼時即行稟報其罪本不甚重乃輒以備匣加封抵充復賄贖堂書鮑幹朦混接收實屬狡詐鮑幹受賄扶同隱飾又裝點在庫被竊情形詭譎多端尤為可惡俞輝庭著加枷號一月滿日發往伊犁給種地兵丁為奴鮑幹著加枷號兩月滿日改發黑龍江給兵丁為奴餘俱照擬完結書吏王振綱首先供明行印另有

備匣一分從此究出實情著審案之王大臣等公賞給銀十兩並交兵部存記俟王振綱役滿之日咨送吏部以應得之職儘先選用
以內閣學士那彥寶為理藩院右侍郎兼鑲藍旗蒙古副都統以喀喇沁貝勒托恩多為右翼前鋒統領內閣學士舒寧兼鑲黃旗蒙古副都統調鑲藍旗蒙古副都統穆通阿為正黃旗滿洲副都統鑲黃旗蒙古副都統富桑阿為山海關副都統 壬子諭內閣

朕每屆巡幸啟蹕內閣學士請寶著總管太監先將寶匣當同該學士啟視再行局封交令祇領迴鑾時亦著該學士將寶匣當同總管太監啟視局封再行交進以昭慎重 又諭兵部行印審明係上年八月二十八日在巴克什營遺失維時松筠管帶行在兵部印鑰其行印本應收存松筠帳房用印時令司員等赴帳房請用乃松筠率委司員收管司員又委之書吏以致遺失樊混事閱半年情

無知覺是此案實因松筠耄而智昏怠氣所招其咎最重故罰亦如之裕恩署理行在兵部侍郎失察在途失印罰應次之至和世泰戴聯奎普恭常福曹師曾常英失印一事均與之無涉其咎在失察當月司員不行開驗印匣半年以來毫無知覺又失察周恩綬私換劄付黃裕崑私啟署牆合衙中相率聚賭其咎亦重但較失印為輕其罰自應寬減各衙門頒給印信典守綦重部院堂官初到任

時例應瞻拜聞有兼拜行印者有不拜行印者向不畫一嗣後凡設有行印衙門每遇堂官到任皆令將行印與堂印一併捧至大堂啟積陳設於上一同瞻拜其行印回署時並令該衙門堂官一人驗收以昭信守 癸丑上幸靜明園詰

龍神廟拈香 諭內閣孫玉庭參奏玩縱私梟之將弁請旨革職一摺此案十總趙起鳳武舉沈定元奉派帶兵一百六十名截擊私

梟船隻乃於梟船駛過時推令商人督丁往捕轉自退入河灣實屬畏葸著俱斥革交該督提同日兵縣快嚴行審訊審明照臨陣退縮例定擬具奏叅將那朗阿派委無能員弁縱放私梟並不親身督捕著即革職仍責令緝捕自効以示懲儆○諭軍機大臣等本日據松筠奏遵旨前往老邊柳河溝一帶查勘積水酌派委員設法疏通辦理等語盛京為陪都重地國初即設有疊道近因老邊柳河溝一帶地勢低窪山水匯注道路衝刷殘缺一遇霖潦甚至車馬難通文報阻滯上年特降旨令松筠於今春前往相度籌辦今松筠業已降調松寧到任後著即親往履勘督率各委員相度形勢應如何開濬溝渠疏消積水並修墊道路復還康莊舊觀俾行旅往來不受沮洳之患此事務期一勞永逸不可草率從事籌議妥協即奏明興辦可也將此諭令知之○以候補從三品京堂戴聯奎為太

常寺卿○甲寅諭軍機大臣等據御史劉斯喟奏上年豫省馬營壩未經漫口之前南岸蘭陽地方先有漫溢處所其時署開歸道之下南河同知王仲澐係專轄之員應有疏防處分該省巡撫及欽差大臣並未附叅本年大工合龍又復保奏出力賞戴花翎現在儀封漫口開歸道謝學崇業已議處王仲澐與謝學崇事同一律何以前此不行叅處請飭河臣覈實確查又據奏河防隄岸有工處所定限保固責成較重至無工處所例無議處明文防守之員往往顧此舍彼於經修要地懼干吏議稍加搶護至無工處所則漫不經心一遇黃流衝突輒以該處並無隄埝人力難施巧為脫卸規避並請嚴定章程等語河道經理隄防責無旁貸王仲澐前署開歸道上年蘭陽先有漫口是其專轄何以未經叅處本年北岸合龍即使著有微勞亦不應再行保奏著姚祖同於到任後即秉公確查如

果王仲漑疏防在先吳璥等不將該員叅處轉於北岸合龍時濫行保奏即將王仲漑據實嚴叅並將吳璥等一併叅奏不可稍涉瞻徇如該員不應叅處亦必將如何例應免議之處詳晰覆奏毋許含混至河防隄岸有工處所失事罪名綦重無工處所處分較輕近來遇有漫口總稱係在無工之處以圖避重就輕或以衝決為漫溢冀免罪名此事務須覈實辦理令各河員共知儆惕如查有以有

工作無工以決口作漫溢巧為脫卸者定行加重治罪不稍寬貸將此諭令知之○乙卯諭軍機大臣等據錢臻奏報接印任事日期摺內聲明遵旨不敢奏請陛見籲求訓誨俾識遵循等語山東毗連畿輔為京師門戶政務殷繁現在運河通暢湖水充盈漕糧銅鉛船隻行走順利該撫不過飭屬催趲即可無誤惟吏治廢弛民情刁健近年以來積弊已深亟須大加整頓力挽積風朕聞東省官場

全不以公務為重專以賭博飲宴為事因循玩愒不畏上官其民風之刁健甚至有當堂鞠訊之時輒敢挺身起立聲言此處不能審理另赴他處控告者地方官畏其兇橫不敢拏究因而相率效尤京控上控案益增多錢臻任事後惟當於此二事加意振作如屬官有敢於玩誤公事不聽約束者立即嚴叅懲辦其地方訟棍通飭嚴拏如有藐抗官長當堂無狀者立即拏回先行責懲再行審訊總

之吏治民風不可稍有偏縱不可使官不愛民貽害閭里亦不可使民不畏官益長刁風至省西一帶向為邪教流染之區近雖斂戢仍當隨時查察有犯必懲勿稍疏懈以上各款朕擇要指示該撫務殫心竭力遵循妥辦以副委任將此諭令知之○命工部左侍郎穆彰阿右侍郎陸以莊教習庶吉士○授一甲一名進士陳繼昌為翰林院修撰二名進士許乃普三名進士陳鑾為翰林院編修○

慶祿何炳彝亦分別枷號發遣。是此案各犯含小過而就重罰實皆其所自取。因思輦轂之下尚有如此情弊其直省地方官迴護規避久成結習牢不可破如盜案則匿不申詳邪教則巧為消弭視己之功名過重以致顛倒朝廷之政事良心何在迨至釀成巨案其罪又豈止於降黜豈非避重就輕必致避輕就重乎嗣後內外大小官員務各痛改迴護過失規避處分積習遇有失誤屬員即時據實稟報大吏即時據實奏陳。凡係無心之過朕無不量從寬宥者若安心掩飾則是以無心之失轉為有意之欺一經發覺執法嚴懲斷難寬貸過以公私而判故罰有輕重之殊不可不辨之於早也將此通諭知之。又諭御史李肄頌奏請飭定監印章程一摺各衙門頒給印信鈐蓋本章案牘原應慎重典守嚴密關防舊例當月之員輪流管理有加派監印者有設簿稽察者各部院事有繁簡官

有多寡辦理不能盡一著各堂官自行酌議將一切請收啟閉及監看鈐用定立章程傳知所屬一體遵循務使簡而易守以肅防檢而專責成。諭軍機大臣等據御史蔣雲寬奏馬營壩於三月初五日開放引河至十二日黃水始入江境如此流行遲緩其為挑濬不深已可概見且挑挖之土即傾積兩旁河灘迨開放後淌入河內依然淤塞是以北岸雖經合龍南岸隨即漫溢今將堵築南岸引河抽溝工程不可不豫為計慮等語所奏甚是此次馬營壩漫口堵合旋有儀封漫溢之事自係引河流水不暢所致事屬既往姑不深究即日堵築南岸儀封漫口所有引河工程必須挑挖深通使溜勢建瓴而下別無旁出之虞方為盡善其挑出河身之土亦必離河邊四五丈外卸棄庶不致復行淌入河內又形淤塞南岸土性堅實北岸土性沙鬆人所共知此次堵合北岸之後因引河不暢尚

且將南岸堅實之處。掣通漫溢。將來南岸堵合。北岸沙鬆之處。更為可慮。著吳璥等先事豫籌。並諄切告。知張文浩等。將估挑引河工段。並出土丈尺。計議周妥。務使萬全無弊。一勞永逸。是為至要。將此諭令知之。○禮部奏補鑄兵部行在印信。請於清漢篆文正中添清字楷書。兵部行在之印。以示區別。從之。○命鑲黃旗領侍衛內大臣索特納木多布齋為御前大臣。正黃旗領侍衛內大臣晉昌在御前大臣上學習行走。○丁巳。刑部奏審明賊犯孫升行強毆傷事主一案。得旨。此案賊犯孫升獨竊十案。此次因事主周氏拉衣喊捕。輒敢攔傷周氏手腕。並以如敢喊嚷用刀殺死之言嚇禁圖脫。覈其情節。雖不至與臨時行強拒捕刃傷者同罪。而嚇禁事主。攔傷手腕。已有護賊格鬪之情。且近在輦轂之下。刑部原擬未免輕縱。著另行詳查例案。覈擬具奏。尋議發往黑龍江。給索倫達呼爾為奴。

再加松號三箇月。滿日發遣。從之。○戊午。景陵。○諭內閣。朕風聞每次行營。請寶之內閣學士將寶請出。或前或後。並不隨行。殊屬非是。嗣後請寶之內閣學士等著由啟營處。將寶自行請出。沿途親隨行走。直至駐營。明白交進。若仍不親隨行走。著總理行營王大臣等指名嚴叅治罪。○又諭。每遇朕行營派出稽查尖營之王大臣等。並不先往查看。隨朕行走。迨相距尖營一二里。始行前往。及朕至尖營。帶刀站立。並不進黃城查看。亦非慎重之道。嗣後稽查尖營之王大臣。務須先至該處。將蒙古包帳房逐一詳細查看。再於門外豫備差事。至稽查陳設之王大臣等。嗣後亦當逐件查察。每站俟朕啟行後。將陳設交明。該地方官僅有缺少。據實具奏。○己未。引見新科進士。得旨。一甲三名陳繼昌。許乃普。陳鑒業。經授職外。龔文煒。何桂馨。王德寬。周作

樺田嵩年羅士著賈克慎劉俊德許應藻吳式敏金光杰吳其泰徐廣縉金更生許有翰張星煥張日章梁芳涵唐惇培陸炯趙光吳家懋劉師陸馮登府陸沅侯桐俞焜邵曰誠章沅萬轅吳慶祺徐汝鑾章德成張擴廷吳繼昌龔昌齡陳輝甲陳增印陳榮雙費開綬朱一貫鄂木順額馮贊勲金石聲莫樹椿程煥采周景胡鑑張曾劉耀椿邢福山李泰交潘文輅明訓周兆錦官思晉朱材哲葛天樸來學醇張兆衡劉之蕩張萬年劉蔭崇馬疏李重輪周錡文蔚劉萬程袁文祥戴謙李祥宗室桂森陳銳尚連城張德鳳許汝恪俱著改為翰林院庶吉士詹汝諧方用儀陳啟伯胡希周何文綺熊佩之朱燮鼎李璋煜蔡子璧周學光侯親賢孔傳鉞許融戴咸寧楊際春周濤錢相方濤於燦文宗室瑞麟保宗室成朗劉誼侯承誥李本芳郭文匯趙光烈陳震東鮑崇蘭張森何其興盧毓嵩陳修鼎張

東德呂溶寇寧重謙任樹森范承祖董瀛山恒春陳允澤德喜英魁林士俊程儀鳳宗室慶全俱著分部學習盧樹張祥河夏勲保善圖經阿劉恩慶吳光鎬俱著以內閣中書用謝玉珩杜紹祁楊廷亮程式金陳之璣沈道寬宋應文梁昌和黃崑馬維璜李增福勞達源劉本夔區拔熙董應魁孔昭信鄧夢舟丁文釗汪百祿閻忻徐宗幹褚裕仁毛有猷方功鉞董長榮馮文燦龍經門楊國翰郭象升趙亨鈴趙塘黃金聲陳人採韓鳳修韋天寶胡鈞何萼聯李霖澤謝長年王簡黎靖金澂朱華羅宜誥陳汝衡呂延慶楊振綱保淳慶辰淡春臺張健翹俱著交吏部掣籤分發各省以知縣即用候補主事楊簣著以六部主事即行選用餘著歸班銓選○實授羅鳳山為閩粵南澳鎮總兵官○庚申除奉天岫巖廳水衝沙壓地一項五十九畝有奇額賦○辛酉

上幸萬壽山○諭內閣京師為輦轂重地內外城緝捕官弁兵役視外省府州縣為密乃盜竊之案轉多且有在他處犯案潛來京師避匿者蓋緣都城五方雲集戶密人稠易於遁跡又王公百官來往街衢朝暮絡繹小民習慣見聞其畏懼之心漸弛轉不如一郡一邑簡而易制則因地制宜欲使奸宄斂戢不能不量從重典如外省漳泉械鬪四川囑匪河南搶匪從嚴懲辦皆設有專條載在刑律嗣後京城盜竊之案除常犯仍照舊例擬外其有拒捕嚇禁圍脫傷人及疊竊多次情節較異者著刑部俱加重問擬用以詰奸禁暴緣靖京畿○戶部議准署陝甘總督朱勲疏報靖遠中衛二縣開墾田四頃二十六畝有奇照例升科從之○壬戌諭軍機大臣等本日福珠隆阿等奏巴里坤書識丁蔚文赴哈密呈控該營剋扣兵餉等款已明降諭旨交貢楚克扎布審辦矣據控范建志在任之日動

用庫貯駝價等項銀一萬有零營中亦虧八九千金之數榮玉材接署總兵印務中軍遊擊王道梅懇請同至烏魯木齊面求慶祥劉芬允於提屬鎮屬官員俸銀幫墊銀八千兩其不敷之數令王道梅賠補王道梅不自行賠交又於兵丁餉銀內剋扣以致各兵丁家屬老幼婦女將中營衙門圍繞該遊擊轉將各兵丁責打除名等情巴里坤為新疆重地該鎮營通同貪劣糜費公帑罔恤兵艱實屬大干法紀著貢楚克扎布徹底嚴究將歷年廢弛營務苦累兵丁之處據實查辦署總兵榮玉材不行揭叅轉為面求慶祥等消弭慶祥等亦即通融徇隱除劉芬業經身故外該都統訊得確情將王道梅等按律定擬並著將慶祥附摺叅奏不可因新授將軍稍有瞻徇朕用人授職是是非非從不迴護汝豈不知其虧項仍著落王道梅及范建志家屬分別賠繳將此諭令知之○調廣西按察使張

志緒為四川按察使四川按察使章凱為廣西按察使○調貴州提督蔡鼎為烏魯木齊提督以廣東南韶連鎮總兵官多隆武為貴州提督○癸亥

上詣

火神廟拈香○還宮○諭內閣李堯棟奏審擬販私聚眾拒捕毆傷官役各犯一摺此案張百桂等各自販私經委員帶領商役捕拏起獲鹽簍張百桂輒敢起意糾約候細傑等多人持械赴店搶取迨經追捕復敢拒捕毆傷官役五人實屬目無法紀該撫將起意為首之張百桂擬以斬決聽糾同往拒傷商役之候細傑擬以斬候本屬照例辦理但罪應斬決之張百桂業經在監病斃倖逃顯戮其為從拒捕罪應斬候之候細傑一犯將來秋審時亦必予勾候細傑著即行正法以昭炯戒餘俱照所擬分別完結併著刑部存記嗣後凡遇鹽梟拒捕及強盜夥劫之案其罪應

斬決之首犯已故從犯內有罪應斬候者仍照本律問擬擇其情重者一名請旨即行正法若本案仍有斬決之犯不在此例○以廣西鎮安協副將傅廷標為廣東南韶連鎮總兵官○旌表守正捐軀安徽五河縣民陳俊妻劉氏○以夏至祭

地於

方澤自是日始齋戒三日○甲子諭內閣御史楊騰達奏請禁州縣濫行採買及民間私用

小錢一摺直省州縣倉儲穀石如因賑卹散放缺額准其詳明買補以足原數乃地方官往往藉買補為名派買折價賒削民膏以肥己橐大為閭閻之害著各督撫嚴行查察如有不行詳明私自採買及詳少買多擅在本境勒派折收者立即嚴叅究辦以儆貪墨至民間行使小錢湖廣江浙等省為甚其獎由於銅船沿途盜賣銅斤且山水與區易藏私鑄並著各該省督撫實力稽查遇有銅船過

境派員催令趨行無使逗遛致有私售之暇其有具報沈溺者並確加查覈是否實係遭風失事有無以少報多情弊儻查有捏飾立將運員嚴叅懲辦並於各州縣隱僻地方嚴查私鑄局場一經拏獲按律重懲則其源既絕自其流漸息矣○諭軍機大臣等御史劉斯喟奏上年三月內護山東巡撫廣慶叅奏城武縣書吏侵蝕錢糧一案奉旨將運河道洪範解任降調知府吳塔扣留交該撫審辦

又七月內孫玉庭奏署鹽道洪暲審訊訟案刑責生員一案奉旨將洪暲解任交該督審辦此二案延擱至今未見該督撫審明奏結等語直省案件至將道府解任候訊實則即應叅奏開缺虛亦即應奏令回任該督撫等奉旨交審必當迅速辦理乃山東江南兩案延擱日久累月經年尚未奏結實屬因循懈弛孫玉庭係原交審辦之員錢臻係接任巡撫著各將前案上緊研訊明確分別定擬

具奏毋得再有玩延將此各諭令知之○乙丑諭內閣前經降旨將兵部當月司員查明自上年九月初三日起至本年三月初七日止曾經輪直者俱著永遠停升並將記名應升及加級紀錄議敘之處一併撤銷其時遺失行印一案尚未究出在途被竊實情嗣經訊明該部行印係於上年八月在巴克什營帳房被竊隨園之郎中五福喜恒泰筆帖式中敏責有攸歸業經分別降革接收行印之

當月司員何炳彝慶祿未經開匣點驗轉造作誑供幾致案情舛誤特加枷號發遣以嚴其罰至其餘在部當月司員於失印一事俱無干涉惟沿習懈怠不在署直宿於閤署吏役聚賭及卑役私開垣門茫無覺察是其咎愆然亦尚不至永遠停升除各該員記名應升及加級紀錄議敘仍俱撤銷外其實缺人員著加恩改為停升半年候補人員俱著全行開復照常補用○丙寅夏至祭

地於
方澤

上親詣行禮○幸國明園○丁卯諭內閣嗣後
派出隨園之步軍統領衙門協尉綠營都司
以上官員內務府七司三院官員等俱不准
在朕前射布靶著派出之王大臣等監射○
戊辰

上御勤政殿聽政○命

皇次子智親王 祭

關帝廟○諭內閣御史余本敦奏請除衙臺
積弊一摺直省州縣訟案繁滋多由書役播
弄所致如該御史所奏大則納賄招搖小亦
舞文延擱即命盜重案且敢滅傷改供串囑
誣攀州縣倚為爪牙擅行威福甚至有攜帶
多金遠迎新任豫為結納者此等積習深為
民害著各督撫嚴行查察凡奸胥蠹役或經
訪聞或經告發審明俱從重治罪俾知儆懼
若州縣官瞻徇庇縱並將該州縣據實嚴參

以清訟源而肅吏治○都察院奏山東平原
縣監生王進祥以串誣審實礙官難結等情
具控得旨此案王進祥以縣役裁傷串誣等
情連次赴京呈控發交該省業經審明乃因
迴護知縣處分懸案數年不結如果屬實是
但知官官相護不顧民怨因伸吏治豈復可
問著錢臻即親提人證卷宗秉公查訊如案
情確切即行據實平反並將迴護徇庇之員
指名參革以儆玩縱○諭軍機大臣等朕以

山東吏治廢弛民風刁健特調錢臻為巡撫
俾資整頓該撫仰承委任自必力加振作期
於壁壘一新但一人之耳目心思豈能事事
周到必須藩臬兩司相助為理方能日起有
功朕聞藩司岳齡安人太老實無能臬司童
槐辦理刑名事件亦未能妥協該省積弊已
深若兩司皆不得人恐玩習驟難改革特密
諭錢臻留心體察該司等如實不勝任不可
迴護或應即行徹退或可量為更調即據實

密奏候朕裁度。若該司等竟有別項劣蹟。著即據實劾參。勿稍徇隱。將此密諭知之。○以太僕寺少卿者寧為內閣學士。兼禮部侍郎銜。太常寺少卿明志為卿。○己巳。諭軍機大臣等。據錢臻奏。酌議京控案件原告脫逃。先將被告分別辦理章程一摺。東省訟獄繁多。其弊端在於訟棍之把持。錢臻莅任伊始。欲杜訟風。僅就原告脫逃者酌議章程。尚未能得其要領。近日東省訟棍盤踞各州縣。其勢

與南省包漕之刁生劣監同一伎倆。大意專為從中牟利。每遇民間有一訟案。必先就彼商謀。而該訟棍利欲薰心。不顧理之是非。事之大小。即為代作呈詞。架輕為重。造無為有。所謂圖准不圖審。但取一時聳聽。而案之究竟如何。且置為後圖。迨至人證提集。勢將水落石出。則又教原告避匿。以暫緩其誣罔之罪。是原告之臨審脫逃。亦訟棍唆使之使然。該撫當明查暗訪。先將此等訟棍拏獲數起。審

明案據加重治罪。所謂伐惡木者必絕其本。杜濁流者必塞其源。斯得止訟之道。至原告脫逃。定例兩月不到案聽審者。即將被證概行釋放。所告之事。不與審理。該撫此奏。因原告逃匿日久。欲先就被告審擬。分別完結。俟拏獲原告再治以杖八十之罪。無論原告不到被告不肯甘心輸服。即使審明斷結。將來兩造皆得藉此為詞。再行翻控。更添葛藤。而訟棍益譁張為幻變。詐百出。豈非仍滋訟端

乎。在原告赴公候鞠。原不在鎖押監禁之例。然亦當派人看管。何得聽其來去自由。即如東省近日刁風往往於公堂審訊之時。輒敢挺身起立。聲言此處不能審斷。再赴他處控告。該承審之員亦竟聽其憤然而去。尚復成何體制。此等惡習。該撫當董率所屬。痛加整頓。嗣後京控上控之案。原告一經解到。即派人嚴行看守。如有脫逃者。拏獲到案。雖所控屬實。亦治以脫逃之罪。並先將看守疏縱之

差役從重治罪其當堂不服審訊挺身起立者承審官立即拏回先行懲治以儆刁風似此扼要辦理秉公持正僚屬同心不患訟風不日漸止息也將此諭令知之○庚午諭內閣本日據阿克當阿代慶郡王綿懋轉奏伊府中有毗廬帽門口四座太平缸五十四件銅路燈三十六對皆非臣下應用之物現在分別改造呈繳國家設立制度辨別等威一名一器不容稍有僭越慶親王永璘府第本

為和珅舊宅此等違制之物皆係當日和珅私置及永璘接住以後不知奏明更改相沿至二十年之久設當永璘在日查出亦有應得之咎今伊子綿懋甫經襲爵即知據實呈報所辦甚是所有毗廬帽門口該府業已自行拆改其交出之太平缸銅路燈著內務府大臣另行擇地安設並通諭親王郡王貝勒貝子及各大臣等會典內王公百官一應府第器具俱有定則以昭限制如和珅之驕盈

僭妄必至身罹重罰後嗣陵夷各王公大臣等均當引以為戒凡邸第服物務恪遵定憲敬慎自持寧失之不及不可稍有僭踰庶幾久膺爵祿永保令名也○又諭綿護安成自退出乾清門差使仍俱懶惰隨扈前引等差亦不見該員等充當此二人係朕素識之人是以知其懶惰若朕不識面之侍衛似此者正復不少著領侍衛內大臣等嚴加詳查所

有三旗侍衛如有差使懶惰者指名嚴叅治罪○戶部議准調任江西巡撫錢臻疏報廣豐縣開墾田二頃四十六畝有奇照例升科從之

大清仁宗受天興運數化綏猷崇文經武孝恭勤儉端敏英哲睿皇帝實錄卷之三百七十

大清仁宗受天興運敷化綏猷崇文經武孝恭勤儉端敏英哲睿皇帝實錄卷之三百七十一

[illegible]

上幸靜明園詣

龍神廟拈香○諭內閣。御史邱煌奏請禁科道遇缺奏事一摺。所奏非是。朝廷設立言官。遇有應奏事件。原許不時入告。如其言果是。即奏章一上。朕必獎勵優加。儻摭拾浮言。雖累牘不休。亦不能遽邀識拔。每次引見。給事中朕所簡用之人。非但不論開列之先後。實不計條陳之多寡也。若如該御史所奏。遇有給事中缺出。未經引見之先。即不准御史呈

遞封章是將使言官瞻顧傍徨相率緘默且又稱實係機密重務仍許入告設言官奏事專為圖謀進階將必有以緊要事件故意延擱俟有科缺始行呈奏者又將何以辨其真偽耶總之言官奏事其心當為公而不為私轉不必豫存避嫌之見如該御史摺內聲明現有漢給事中一缺業已呈明扣除引見是又近於取巧殊可不必也○予福建出洋捕盜淹斃外委邱峻賞卹如例○壬申諭內閣

富俊奏雙城堡三屯應增各條款雙城堡中左右三屯移駐屯丁三千戶兼有眷口幫丁已成繁庶所有前議未備之處自應增定章程以利耕屯而安生聚著照所請每屯添濬井一口仍按前估銀一千八百兩准其在羨餘項下動用支給其三屯屯丁所有戶婚錢債及爭鬭訟事即著各該佐領呈報協領訊辦如有人命盜案報解阿勒楚喀副都統衙門驗訊轉咨該將軍覈辦雙城堡協領處准

其添設無品級筆帖式二員委官二員三屯佐領每處各添設無品級筆帖式一員委官一員以資辦公差委即各於甲兵內挑選補放仍食本身錢糧筆帖式於錢糧外照例支給米石其五屯所設之總屯達差務較繁著各賞戴金頂每人月給工食銀一兩遇閏增給亦於羨餘項下動支報銷至三屯領催甲兵紅白賞銀若由將軍衙門給發文移來往未免稽遲著准其豫支銀三百兩存貯協領

公所隨時呈報給發年終造冊彙銷每年俱補足三百兩之數備貯該協領仍每季將實存之數結報以憑查覈○又諭富俊於吉林開墾屯田一事銳意辦理今雙城堡所墾地畝已有成效盛京閒散旗丁視為樂土紛紛呈請願往耕種其續行籌議條款亦俱周妥洵屬實心任事富俊著交部議敘○刑部議奏山東民人武泳清京控一案得旨此案武泳清前因誣告康基田發遣黑龍江遇赦減

徒釋回乃不知悔改復因訛詐不遂以虧帑報劫勾匪戕官重情誣控多人部議照誣告叛逆未決律擬以斬候固屬照例辦理但該犯於訛詐葛恒太時輒先寫書信自稱武老泳視黑龍江為故土不怕告虛反坐字樣其刁健橫肆尤出情理之外武泳清著改為絞立決以儆刁風○都察院奏山東惠民縣民婦蔡桑氏呈控女命含冤捏詳埋貞一案得旨此案蔡桑氏所控女命含冤事已六年在

巡撫衙門歷控至二十一次無論虛實均應早為審明斷結乃一味拖延該省吏治疲玩已極著交錢臻親提人證卷宗秉公嚴審迅速定擬具奏○戶部議准兩浙鹽政廣泰疏報黃巖場開墾沙漲塗地六頃二十二畝照例升科從之○癸酉諭內閣戶部題銷恩賞直隸兵丁錢糧一本嘉慶十二年恭奉

皇考高宗純皇帝實錄

聖訓前赴盛京尊藏禮成朕普錫恩施內有賞

給沿途護送兵丁半月錢糧一款乃遲至本年始行題銷計已越十三年之久外省於應行報銷事件任意耽延因循疲玩相習成風而直隸為尤甚屢經降旨訓飭恬不知改非明定處分不足示儆著吏兵二部酌議嗣後各省題銷事件遲延在三年以內者免議其有越三年以上者分別議以罰俸六年以上者分別議以降調九年以上者即行革職酌定條款奏准後通飭各省一體遵行尋議上

得旨吏兵二部會議題銷遲延處分條款內遲延三年以上者著改為罰俸一年四年以上者改為罰俸二年五年以上者改為罰俸三年其六年以上者均照所議分別降革吏兵二部一律辦理至題銷冊籍舛錯經部駁查准其分別扣除程限吏兵二部亦一律辦理以歸畫一○又諭前據御史余本敦奏請禁吏役攜眷在署居住當經降旨令各部院衙門酌議章程具奏各該衙門已有陸續奏

上者本日詹事府所議較為詳明著各衙門俱照此章程令該管廳官將在署居住之吏役等查明本人姓名年貌及親丁男女若干名口登記冊檔按卯查點遇有增減名口隨時更正至該役之親戚人等只准日間往來不准在署留宿婚喪等事不許出入署門違者查出革役嚴懲並著該堂官再添派司員一人專司查察按月更替如此月內有約束不嚴情弊即將該司員叅處以專責成○乙

亥諭內閣方受疇奏審擬匿名誣告逆情重犯一摺此案楊林即楊玉林本係行竊賊犯因與王明德等挾有微嫌輒敢誣造謀逆重情書寫匿名揭帖以圖陷害情節甚屬可惡該督照誣告叛逆未決例擬以斬監候著改為絞立決即行正法以儆刁風○諭軍機大臣等據御史邱煌奏貴州大定府屬平遠州有本地莠民及狎苗等招集四川囑匪廣西會匪亡命數百人歃血拜盟剋期滋事去歲

十一月間有伊村人因酒後漏洩其事該犯等知勢不可遏遂鼓譟劫掠合城驚擾十二月初一二等日閉城戒嚴旋經地方官捕獲黨匪數人女口數人其首夥數百人逃逸未獲請飭查辦等語披閱之際實深詫異匪徒聚眾結盟謀為不法事關重大據該御史所奏業已鼓譟劫掠以致城門戒嚴其言似非無因彼時伯麟正在黔省兼署撫篆地方官曾否稟報何以自上年十二月至今將及半

載未據伯麟將查辦情形具奏是否該省尚在查拏究辦抑竟係該地方官扶同消弭著即由驛先行明白回奏不得稍存諱飾益干重咎如伯麟存化大為小之見含混覆奏將來別經查出必當加以重懲此時明山甫經簡放貴州巡撫此案仍交伯麟查辦如已由黔起程來京於何處接奉此旨即行折回黔省速飭地方官將案內要犯嚴拏務獲審明按律定擬具奏如犯未全獲新任總督慶保

行抵黔省移交接辦。伯麟再行回京可也。將此諭令知之。○旌表守正捐軀河南信陽州民梅占元媳李氏。○丙子諭軍機大臣等錢臻奏酌擬整飭章程一摺。據稱東省積習民不畏官。官轉畏民。畏民之弊更甚於不愛民。究其致弊之由。皆緣上司不能正本清源。以致官愈怯而民愈驕。此時欲加整飭。先在辨上下定民志。使民不敢犯上等語。所奏俱是。地方官之於百姓猶父母之於子。子非生而忤逆。因父母不善訓誨。日漸縱恣。使然為地。方官者果能周恤民隱。聽斷勤明。官知愛民。民亦知畏官。則大順之象成。若冠履倒置。則其象為逆。該撫此時力加整頓。總在使官能展其猷為。民無可施其挾制。挽其逆者而使之順。而其要尤在於嚴拏訟棍。蓋民之敢於告訐。頻仍皆訟棍唆之使然。使訟棍斂戢。則民氣自靖矣。至所稱擬請嗣後東省京控戶婚田土之案。及雖係重案在本省控告未經

投審者。無庸奏咨。斟酌駁斥一節。則事屬難行。民人赴京具控之案。情重者奏請交辦。情輕者咨回本省。乃各省之通例。若不行奏咨。一概駁回。將行之山東一省乎。抑行之各省皆然乎。況來京具控之案。豈必盡屬虛誣。若真有含冤負屈者。悉皆壅於上聞。是因噎廢食也。如謂東省民情刁健。京控之案。或奏或咨。俟案犯解回本省。審明實係虛妄。較之常例。再加重治罪。以儆刁風。可也。將此諭令知之。○又諭據錢臻奏已平長清縣教諭李訓上年八月經程國仁等以該員任性乖謬。妄肆稟訴。參奏革職。尚未定讞。本月初三日在押脫逃。赴巡撫衙門投遞紅票。及手摺刻本。指控前署濟南府錢俊等。並將程國仁。辛從益。痛加詆斥。正在繕摺具奏。聞復接該參員續稟。諷以大義。減親等語。此案自上年八月降旨交程國仁審辦。乃延宕至今。迄未審結。以至該革員又向新任巡撫處控告。錢臻例

應迴避。現在吳璥、那彥寶同在清江。該處堰盱各工及湖河宣防事宜。孫玉庭、黎世序均已籌備周妥。吳璥等到彼。不過再加周覽。無須久住會商。著接奉此旨。即前赴山東。將李訓所控情節。秉公審訊。按律定擬具奏。李訓所遞紅稟手摺刻本。俱著發交閱看。再山東運司福泰前被匿名揭告一案。已據程國仁究出匿名揭帖正犯係鹽經歷郭廷輝。乃日久尚未擬結。吳璥、那彥寶行抵山東。如錢臻

已將全案審明具奏。則已。若尚未定讞。著吳璥等一併將匿名許告實情。並所控福泰各款逐一研訊明確。分別定擬具奏。再行回京覆命可也。將此諭令知之。○丁丑。

上幸萬壽山。○諭內閣吏部奏開復中書沈欽霖可否開復進士出身抑作為舉人中書一摺。所奏非是。沈欽霖前因簡放湖南試差。失察家人滋事革職。嗣留會典館効力。賞給舉人。又因會典告成。加恩開復中書。該員係由

舉人賞還原官。何得妄冀開復進士。該部當據呈斥駁。不應代為奏請。英和等俱交都察院察議。沈欽霖著作為舉人中書。嗣後如有似此者。俱不准具奏。○諭軍機大臣等。據張文浩姚祖同奏。會籌防護大汛事宜。一摺。上年黃水異漲。豫省南北兩岸河隄漫缺。頻仍始而南岸。繼而北岸。迨北岸之馬營壩將次堵合。而南岸之儀封三堡。又復刷塌。河防潰壞。未有甚於此者。皆由前任河督等玩愒因循。徇私於惜費之見。平日不加意修培。以致臨時無從措手。今張文浩姚祖同會籌全局。凡所稱著名險要之區。有應先事防護者。務當設法修守。並多備料物。斷不可靳惜小費。致誤事機。即無工處。所一經大汛漲發。亦難保不臨時生險。總當處處派員。無分晴雨晝夜。時刻小心防守。以保萬全。至河工防險。以備錢為最要。遇有搶險之時。縱庫貯銀兩有餘。一時不能濟急。惟錢文充裕。則人夫一呼而

集土料均可應手而至。一經搶護平穩。其所省實多矣。該署河督等。當於潁河州縣豫發銀款。令其多換錢文。實貯實存。有缺即補。免致臨時拮据。再本年秋間興辦大工。估挑引河。其出土遠近。尤關緊要。務於定例丈尺之外。加遠運送。雖夫價不無加增。亦當酌量情形。奏明加給。不可但圖節省。又致坍塌河內。壅遏川流。伊二人惟當同心協力。計議周妥。是為至要。將此諭令知之。○戊寅。

孝恭仁皇后忌辰遣官祭

景陵。○諭內閣。嵩孚奏鄉愚習教改悔自行投首。懇請免罪一摺。安徽亳州阜陽太和蒙城等州縣民人朱妮孜等。從前被誘習教。因教首王三保等擎獲正法。咸知畏懼。陸續赴官具結改悔。所有朱妮孜等男婦二百二十名。俱著免其治罪。仍令各該州縣另記冊檔。於牌甲內按戶註明。隨時稽查。如該民人等將來有因他事犯案者。各照所犯本律問擬。

若故智復萌。再私行習教。一經發覺。著加倍從重治罪。○諭軍機大臣等。本日刑部議駁盛京刑部題已革驍騎校溫程與民人劉二標子等共毆宗室喜受身死。不應以劉二標子依同謀共毆傷重律擬絞監候。溫程擬流一本。所駁甚是。此案溫程開店聚賭。劉二標子係其雇工。喜受向溫程索討賭欠起釁。溫程首先喝令將喜受攢毆。且溫程所毆之傷亦重於劉二標子。何得援同謀共毆人致死。

以後下手傷重者。當其重罪律。以劉二標子擬抵。轉將溫程擬流。况溫程充當驍騎校。喜受初發往盛京時。曾派令看管平素共賭。熟識已久。無論喜受曾否身繫黃帶。溫程並非不知其為宗室。乃毆之至死。應照宗室覺羅而毆之死者。斬監候。本律辦理。更不得援照尋常關毆例問擬。瑞麟於此案所擬罪名。實屬顛倒錯謬。著松寧即提此案人證。另行審訊。定擬具奏。並將瑞麟附參。再喜受發往盛

京曾否前經犯有別案飭交園禁何以往來賭博聞毆聽其自便亦著該將軍查明如係看管之員疏縱亦於摺內一併參處再近來瑞麟所辦刑名事件多不妥協是否年老精力衰積著松寧確加查看如衰病廢弛不能勝任即行據實陳奏不可稍有瞻徇將此諭令知之○旌表守正被戕四川廣安州民李潮瀧妻楊氏守正捐軀貴州歸化廳民陳英女引娣己卯諭內閣錢臻奏審擬郭庭輝

匿名指訐福泰款跡一摺此案郭庭輝身為職官輒敢挾上司薄待之嫌編造匿名揭帖乘夜張貼以圖傾陷實屬險惡郭庭輝著即行處絞至劉祥一犯原係福泰長隨乃因被斥遂捏造福泰款跡多端向郭庭輝告述以致郭庭輝得以逞其奸謀其居心尤為兇狡僅擬杖流不足蔽辜劉祥著用重枷在山東省城枷號三箇月示衆滿日發往黑龍江給披甲人為奴以為長隨誣陷本官者戒餘俱

照所擬完結○庚辰諭軍機大臣等吳璥等奏查勘洪湖水勢工程及運河隄岸會籌宣洩事宜一摺上年豫省北岸馬營壩漫口黃流下注不及江境本年北岸堵築合龍而南岸儀封又奪溜南趨全黃水勢匯注洪湖雖湖面寬闊每年夏秋之間淮水漲發尚形盛滿今又納全黃之水自必倍常浩瀚該督等現與吳璥那彥寶會籌將束清禦黃各壩拆展寬深並將吳城七堡於啟放四十丈外再

加展寬以八十丈為度又於桃源高家灣地方啟放洩水溝六十丈就此時汎水未大自足宣洩轉瞬伏秋兩汎經臨為日方長該督等總當慎之又慎刻刻留心事事周防萬不可恃為有備無患稍存自滿之見其山圩兩壩三河及蔣家壩等處得守且守若能停止減洩保護下河田廬固屬甚善然亦不可拘執設遇湖心湧漲則又當以保衛高堰為重其緩急機宜該督等隨時相度亦不能豫存

成見務期保護萬全。是為至要。此後湖水偶有增長。宣防悉臻平穩。不必頻頻入奏。若值盛漲之時。或又須拓展閘壩。分籌歸江歸海之路。該督等分別輕重。再行具奏可也。將此諭令知之。○又諭本日御史程伯鑾奏。東省控案繁多。請嚴誣告之罪。一摺。昨經降旨。飭諭錢臻。凡東省京控之案。或奏或咨。俟審明實係虛誣。即將原告加重治罪。今該御史復為此奏。無庸另行置議。近年東省積弊。其始

由於大吏廢弛。不能整飭吏治。以致屬員不畏上司。其漸成於牧令縱恣。不能鎮服民心。以致百姓不畏官長。今欲挽其積風。或專意叅劾州縣。或一味威制小民。皆非正本清源之道。蓋直省州縣。其人材大約相等。豈必出仕山東者。悉皆貪劣。即刁健頑民。亦隨在皆有。豈必籍隸東省者。概乏善良。朕推求其致弊之源。實緣東省奸胥蠹役。盤踞已深。上則蒙蔽官長。下則播弄鄉愚。即地方訟棍。非與

若輩勾通。藉其指引庇護。亦不敢肆行無忌。遇有一案發覺。官掛彈章。民罹法網。而若輩安然如故。父兄親族。私相授受。牢不可破。及更易新官。以學製之才。安能絕其根深蒂固之勢。又復畏首畏尾。以致積漸而不可返。則欲剔除弊源。非嚴懲奸蠹。總無由致息。訟寧民之效。特傳諭錢臻。嗣後該省州縣官。有因案劾叅者。必將奸胥蠹役。從中欺蒙引誘。挾制勾串之弊。切實追究。重則立寘典刑。輕則

分別發遣。使地方官得以自振。不為其所牽制。而刁民無所倚恃。良民亦免為欺陵。堅持定見。行之以實。庶可起官吏畏葸之風。而清小民健訟之源矣。將此諭令知之。○調鑲藍旗漢軍副都統烏爾卿額為西安右翼副都統。以刑部郎中海昌為鑲藍旗漢軍副都統。○辛巳。諭內閣。議敘人員。定例不准用超等字樣。此次豫省大工。辦理並未周妥。吳璥等乃率將其次出力人員。分別超等特等。造冊

咨送吏部議敘實屬違例所有冊開超等者著改為一等特等者改為二等其吳璣那彥寶部議降一級調用之處著加恩改為降一級留任。壬午。

上幸靜明園詣

龍神廟拈香。○癸未諭內閣兵部奏駁擬發軍臺贖罪廢員尚有未完追賠銀兩請飭完繳一摺所駁甚是福建已革同知徐汝瀾緣事擬發軍臺前經該督奏請贖罪茲據兵部

行查戶工二部該革員尚有未完追賠各項銀七千七百餘兩定例不准援贖乃該督等並不查明率行詳請具奏實屬違例董教增明山葉世倬俱著交部議處徐汝瀾著仍飭令前赴戍所其未完銀兩即行飭催呈繳俟全數完結再行具奏嗣後凡有擬發軍臺効力廢員在外呈請贖罪者該督撫務遵例查明如有賠項先行追繳全完方准奏請勿得含混干咎。○旌表守正捐軀浙江麗水縣民

高順金妻吳氏。○甲申諭軍機大臣等本日據都察院奏山東德州革生辛邁遷遣子控告該州漕書等勒折侵吞現被冤押閹牢一案已明降諭旨交錢臻審辦矣此案辛邁遷自十九年在該省糧道衙門控告延至二十三年未經審辦轉將伊族鄰人等拏獲十八人鎖押班房嚇詐錢二百餘千迨該生赴京控訴發回山東審訊遂將其衣頂斥革嚴押閹牢自上年九月至今又閱八月之久仍未

審結國家設立囹圄羈押人犯即情罪重大者亦祇照例監禁若如所控東省所設閹牢並無窗戶只有一洞可通飲食大小便溺俱在其中似此慘酷實出情理之外著錢臻接奉此旨即先派員查驗濟南府所設閹牢是否屬實如果有其地究明起自何時歷來所押人犯亦必不止辛邁遷一人即飭令速行拆毀將違例濫押各員據實嚴參再首府有此恐省外各府州縣亦有效尤私設者並著

一體嚴查如有私設之處全行拆毀究明設立之員一併嚴叅近日東省京控之案據都察院奏較前日漸稀少自因該撫下車伊始均赴巡撫衙門呈控是以京控漸稀錢臻務當振刷精神於上控事件即刻提案自行親鞫虛衷聽斷於官民兩持其平不可豫存成見稍有偏徇如官吏貪劣屬實即據實嚴叅勿稍姑息如矜民逞刁妄控即執法嚴懲以儆頑愚似此秉公審辦數案使閭省官民皆知新任巡撫公明剛斷咸生敬畏則遠近傳誦遇有屈抑俱赴本省控理其京控之風不過自息錢臻於整頓地方即可得有把握從此振積立懦吏治民風均當大有起色將此諭令知之○是月安徽巡撫吳邦慶奏查看渦河水勢平減亳州民隄請歸於民捐民修得旨依議辦理既係民修何必驗收即有草率之處令其趕緊補造該府州賠修無此辦法勿令吏役經管方妥自衛桑梓必能妥協

加之以官吏又生枝節矣

大清仁宗受天興運敷化綏猷崇文經武孝恭勤儉端敏英哲睿皇帝實錄卷之三百七十一

[illegible]

嘉慶二十五年庚辰六月乙酉朔○丙戌賞

清實錄
嘉慶二十五年六月

為無關緊要。一經大溜奔趨，遂至措手不及。該河督等當通飭防汛各員弁，隨時隨處周遍巡查，務保萬全。將此諭令知之。○戊子，兵部議駁前任黑龍江將軍松寧等奏請於庫貯備用銀內借給兵丁買立馬匹，分年扣還一摺，得旨：部駁甚是。松寧等原奏本不周妥。黑龍江兵丁現有一萬二千八百餘名，僅立馬四千餘匹，不過三分之一。此內孰為應立馬者，孰為不應立馬者？且借給官銀買馬於

餉銀內扣還朕思該兵丁所得餉銀均有定額今扣去一半而所立之馬又無馬乾該兵丁自行餵養力有不支勢必疲瘦倒斃其餉銀仍須坐扣是馬匹未能增多徒令兵丁先受扣餉之累又添餵馬之費其事格礙難行著仍循其舊無庸辦理○諭軍機大臣等朕聞近日沙河所中後所一帶盜風甚熾居民多於屋上搭蓋窩鋪瞭望各備鎗械防夜因本年四月間突來大盜一夥用車輛拉載器械羣盜執持遵入街內將當舖搶劫一空是以附近居民均有戒心該省文武衙門各有報案著松寧等即飭查地方官具報後曾經捕獲本案正犯幾人並訊問原報事主被劫時聽聞盜夥有無蒙古語音抑係民人語音一面先行覆奏一面嚴飭文武官員不可因循疲玩務將案內首夥盜犯迅速緝拏全行弋獲按律嚴辦俾宵小斂戢以肅捕務而安閭閻○庚寅

上幸靜明園詣

龍神廟拈香○貸江蘇阜寧鹽城二縣上年被水災民籽種口糧○辛卯諭內閣朕每次巡幸隨帶御寶俱安度寢宮次日啟蹕之先始行捧出交請寶之內閣學士祇領恭齋前行各衙門隨帶行印該堂官自應親司收貯上年兵部行印因松筠未經存貯帳房以致中途遺失嗣後行在各衙門所帶印信俱著在管帶印鑰之堂官帳房內晝夜存貯次日啟行時該衙門官役親往領取齋押行走不准先一日齋赴前營以昭慎重違者重處不赦○直隸總督方受疇奏摺獲因姦致死一家二命先犯審明定擬一摺得旨此案張公謹冒姦趙韓氏已成因被識破喊拒輒將該氏立時毆斃聞其幼女舉姐啼哭復憶及蕭洛煥舊嫌將舉姐擲溺井內以圖陷害淫惡已極且在逃年餘始經緝獲張公謹無庸再交部議著即處斬梟示○旌表守正捐軀河

南西華縣民馬成隴妻蘇氏江蘇邳州監生韓瑞光婢彩雲○除熱河行宮附近荒地二十六畝有奇額賦○壬辰諭內閣前據吳璥等奏徐州道員缺緊要請以嚴烺補授當經降旨准行本日吏部奏稱嚴烺現在回籍守制服滿應歸部銓選吳璥等違例豫請補授應照例降三級調用等語嚴烺服闋尚在半年以後現在擬補徐州道未能到任其缺仍須委員署理於防守大汛無益所有徐州道

員缺著孫玉庭等另行揀員奏補嚴烺服闋後該部仍照例銓選吳璥等違例奏請本應照部議降調姑念一時簡用乏人吳璥那彥寶黎世序俱著加恩改為降三級留任孫玉庭任內本帶革職留任此案著加恩仍改為革職留任○又諭那彥寶奏審訊已革教諭李訓控案該革員仍戴頂帽不服審問當堂挺立大肆咆哮現將該革員除去頂帽鎖鑰收禁等語此案自上年八月據程國仁叅奏

當即降旨將李訓革職交該撫審辦乃數月未經審結已屬遲延又不將該革員摘去頂帶嚴行管押任其公然戴頂出入自由此與未經革職者何異是該革員之敢於當堂咆哮不服審訊皆程國仁因循軟弱縱之使然屬員既不畏上司小民復不畏官長壞法亂紀端有由開程國仁豈能復勝侍郎之任著以六部郎中降補以為大員不遵法度市惠沽名者戒○又諭瑞弼奏審擬謀殺姦夫誤

殺繼母重犯援引白鵬鶴舊案聲請減等所辦非是此案汪聘三因汪以政與伊繼母余氏通姦欲殺汪以政洩忿適是夜汪余氏與鄰婦閉門閒談該犯誤認汪以政在房姦宿謊言火起余氏開門出看致被該犯誤行砍斃余氏與鄰婦閒談同係婦女聲音該犯何遽不能辨識即或一時忿起誤聽當余氏被砍倒地後其弟汪正增汪正坎見母被殺拉住哭喊該犯復用刀連將二弟割傷豈仍得

謂之出於無心。覈其情節。與白鵬鶴逞擲土
坯誤傷母命者不同。汪聘三著仍按律凌遲
處死。汪以政與汪余氏姦淫。釀成逆倫重案。
僅擬杖流不足蔽辜。著即照該撫所擬。改發
黑龍江給披甲人為奴。○又諭直省京控案
件。因部院大臣各有應辦事務。不能常川派
往審理。特降旨。交該督撫審訊。其派交之督
撫。即與欽差無異。自當遵旨親提審斷。本日
據都察院奏。安徽民婦陶王氏呈控。伊子被

誣擬抵一案。前經奉旨交姚祖同親提嚴審。
乃該撫並不遵旨親訊。仍發原審之府州縣
覆審。各該員迴護前詳。抑勒故勘。以致該氏
心懷不服。復行來京控訴。姚祖同著交部議
處。所有陶王氏控案。著交吳邦慶親提人證。
卷宗秉公嚴審。按律定擬具奏。吳邦慶即係
欽差。如承審官實有勒供串誣情弊。即行嚴
叅懲辦。原告陶王氏。該部照例解往備質。嗣
後凡有特旨交審之案。該督撫不親提訊斷。

仍發原審府州縣官審辦者。俱照此一例議
處。○以江西布政使韓文綺為刑部右侍郎。
賞右春坊右中允張師誠。四品頂帶。為江西
布政使。○癸巳旌表守正捐軀直隸灤州民
戚倫妻任氏。○甲午諭內閣。向來在京發遣
官犯。俱於奉旨之日。即時押令起程。乃外省
發遣官犯。往往藉交代未清為詞。經年累月
任其逗遛。啟其刁詐。實屬延玩。著通諭直省
文武大員。嗣後發遣官犯。於奉到諭旨之日。

即勒令起解。不許片刻停留。如有交代未清
事件。該管上司另行覈辦。其官員革職者。奉
旨之日。即行摘去頂帶。拏問者。奉旨之日。即
令上鎖收禁。均照定例遵行。儻有仍前市恩
寬縱者。一經查出。即行革職不赦。○調
江西布政使張師誠為安徽布政使。安徽布
政使嵩孚為江西布政使。○安徽按察使鄒
瀚年老。命來京另候簡用。調河南按察使德
奎為安徽按察使。賞候補主事琦善。四品頂

帶為河南按察使○旌表守正捐軀廣東曲江縣民傅登科妻吳氏○乙未諭內閣前據都察院奏山東革生辛邁違遣子控告該州漕書等勒折侵吞現被冤押閹牢其閹牢並無窗戶只有一洞可通飲食溲溺俱在其中因其事涉酷虐當經降旨交錢臻嚴查究辦茲據錢臻查明東省並無設立閹牢之事該撫親提辛邁還訊問據供現在店房居住並未鎖押因候審日久心悶如牢遂編造閹牢

名目具控等語辛邁還因候訊日久乃敢以毫無影響之事架詞聳聽實屬刁詐可惡著錢臻即將本案秉公訊明仍將該革生捏造閹牢名目逞刁上控之處聲明加重定擬具奏至各直省承審控案理應迅速斷結以期息訟寧民無如因循疲玩相習成風累月經年不為審理以致如辛邁還之候審日久遂造言誣控節外生枝著通諭直省大吏無論控案大小均當隨到隨結毋許任意拖延徒

滋羈累蓋明慎用刑而不留獄乃聽訟之要言能使案無留牘則無情之詞自不過而漸息也 追封故郡王銜貝勒綿恩為郡王命皇次子智親王旻寧往奠茶酒賞銀一千兩治喪 旌表守正捐軀江蘇桃源縣民李學妻翟氏 丙申諭內閣京師為輦轂重地理宜嚴肅整齊使宵小絕跡近日步軍統領衙門屢報有捕獲飛簷走壁拒捕傷人盜賊之案於緝捕尚屬認真惟捕獲之後其審訊之責

全在刑部必推鞠精詳方能摘奸發伏俾物無遁情乃刑部於交審人犯因循懈怠漫不經心祇於就案完案其盜賊來歷蹤跡及本案之外有無隱匿不法重情均未能細加究詰著嚴諭刑部嗣後凡京城內拏獲盜賊匪徒除本係大興宛平土著民人外其由外府州縣及各省潛來者均須逐細盤詰究明因何來京作何生理其平日曾否另有行兇為匪避罪逃匿及聽人指使勾串等情反復研

鞠務得實在根由不得僅就本案草率問擬完結以詰奸宄而肅刑章○又諭長齡秦審擬撲毆工人誤傷繼母重犯援案聲請減等一摺此案張得喜因工人白冰判子未與伊繼母楊氏燒炕斥說其非白冰判子不服頂撞該犯氣忿順拾木棒撲毆不期楊氏伸手攔勸該犯收手不及以致誤傷楊氏殞命與白鵬鶴遙擲土坯誤傷母命舊案情節相等張得喜著改為斬立決○丁酉

上幸萬壽山○己亥命太常寺卿戴聯奎提督浙江學政○調廣東陽江鎮總兵官雲天彪為江南蘇松鎮總兵官以京口協副將雷鳳山為陽江鎮總兵官○庚子諭內閣錢臻等奏武定府知府王果審訊生員張銳鏃與書役劉永利等結訟一案因該生所控錢糧數目不符並不詳請斥革輒令穿戴綠衣綠帽塗面鎖項鳴鑼遊街殊屬任性乖謬請旨將王果革職等語地方官聽斷訟案如生員犯

法有應懲辦者即當詳請斥革按律治以應得之罪若似此肆意欺陵辱及學校設衆心不服成何事體王果著即革職暫在省垣羈禁該撫即親提張銳鏃一案秉公審訊如張銳鏃所犯罪名在軍流以上王果業經革職毋庸再議儻張銳鏃罪不止於軍流抑或竟係無罪則王果不僅革職仍應奏明治罪以示懲儆○諭軍機大臣等昨吳璥由山東回京覆命朕於召見時詢及東省吏治民風及

控案繁多情形據奏山東民情悍而不刁近日訟獄雖繁地方官果能聽斷公明速審速結不難轉移風氣惟該省所可隱慮者曹州府屬向為邪教淵藪伏而未動者尚多其次則沂州府屬兩處匪徒如拔刀手金鐘罩虎尾鞭所在皆有連歲收成豐稔現在地方寧謐無事設遇荒歉之年不能不思患豫防等語東省曹沂兩府民情强悍邪教伏匿由來已久是以新設曹州鎮以資彈壓但該鎮標

額兵僅止七百名尚不足以壯聲威且所募之兵多係本地民人恐投充入伍者即有匪徒涸跡其中著錢臻與該總兵體察情形詳慎斟酌如兵力尚單或應添設若干名不妨據實奏明候旨飭辦其所添之兵應如何設法挑選嚴取保結勿令邪教匪徒冒濫應募密籌妥協次第辦理此時不可稍事張皇轉使匪徒等心生疑懼別滋事端至該二府地方官務當隨時密諭令其留心訪察平日辦

理案件遇有强悍應除去者除之愚蒙可化導者化之使邪惡之風桀驁之氣逐漸消除期於弭患未然尤為至要將此諭令知之○壬寅諭內閣定例追封王等概不予諡綿懃係追封郡王禮部本不應將撰擬碑文建立碑亭之處率行具奏嗣後凡追封王等該部均無庸請諡立碑○癸卯

上幸靜明園詣

龍神廟拈香○諭內閣御史岳安奏八旗放

給兵米均不免花戶從中舞弊惟鑲黃旗漢軍領米不經手花戶兵丁可沾實惠等語八旗每季放給兵米例應該旗員率同兵丁人等到倉掣廠自行領出分給兵丁原不應任聽花戶高下其手致有從中賤削之弊既據該御史奏稱鑲黃旗漢軍辦理妥協著各旗即查照鑲黃旗漢軍章程每放米之期均到倉掣廠自行領給毋令花戶染指以杜弊端又諭朕風聞慶親王府內尚有外諳達二

員一名碩羅一名僧克依皇子始有諳達慶親王於乾隆年間封王分府後尚可設有諳達迨至嘉慶年間仍有諳達則於例不符所有慶親王府諳達碩羅僧克依二名即行裁汰併著該管大臣驗看該員等如能當差即著仍在原充差使上行走如已年老不能當差即以原品休致或竟行革退具奏請旨辦理仍著宗人府查明近支王公府內如尚設有諳達者俱照此裁汰永著為令○甲辰

上御勤政殿聽政○以內閣學士者寧兼鑲白旗蒙古副都統○乙巳諭內閣御史沈學廉奏稽查化導邪教一摺邪匪傳執其初原在斂錢迨煽惑既多徒黨勾結地方官一經捕治小則拒捕大則戕官甚至蔓延滋事其患皆由於州縣官平時漫不加察或既經訪聞又規避處分因循不辦以致釀成事端譬如一人之身居常慎攝使元氣充足則疾疹自消迨邪癘已侵雖療以藥石而所傷已多小

民良莠不齊安能保無一二邪愚是在治民之吏平日宣揚教化明白曉諭使愚民不為匪僻所誘若訪有奸民則當立時拏究按法懲治齊之以刑除一莠民可安千百良善化民成俗之要不外乎此至該御史奏發遣教犯到配後應嚴行管束乃候位南主柯案內出口送銀之事皆由內地究出該管官兵實屬疏縱等語所奏甚是發遣黑龍江新疆等處教犯原責成該將軍都統等分派官兵嚴

密稽察何至匪黨私行出口餽送金銀盈千累百毫無見聞嗣後該將軍等務當飭屬留心查察如有內地奸民潛通信息往來餽送者即行報明拏究若經他處發覺或究有知情故縱情弊定將該管官兵嚴行治罪決不寬貸○諭伊犁將軍慶祥伊犁疆域遼闊準噶爾部落久占據其地因其內亂降而復叛戕害大臣我

皇考承

先志昭大猷五年之間兩勦並集闢二萬里之新疆設官建邑養民屯田沙磧化作膏腴荒服直同腹地五十餘年安恬生聚回部永懷德化深感

聖恩朕守治法曷敢稍易今授汝鉅任勉矢忠誠勿作小聰明須存大見識馭外夷各部落宜恩威並用切忌優柔訓士卒諸營汛在紀律嚴明毋令懈惰撫黎民如保赤子察罪犯務盡實心明刑弼教除莠安良寬不至於姑

息嚴勿流為殘刻致中和綏遠服恪守

皇考之鴻規繼汝先父之舊業欽哉勿忽汝其勉旃○丙午諭內閣瑞齡奏本月十六日進班直宿見有羣羊在宮門鹿角以內牧放當向查問據稱係膳房之羊由大宮門外西角門趕入請旨飭禁等語宮門之前理應嚴肅即膳房羊隻亦不應在彼牧放著內務府大臣確查是否果係膳房之羊抑或藉名影射據實奏奏再宮門鹿角以內向來御馬在彼

散放恐其中有冒混闖入者著上駟院官員隨時查察如無黃絡首者即行驅逐朕聞鹿角之上竟有人坐卧樹林內亦有席地而坐茶酒聚談併有肩挑背負者自今日始著該班之內務府大臣御前乾清門侍衛隨時查訪如有此類即行鎖拏立刻具奏並著嚴諭宮門前直班官兵禁衛森嚴稽查宜密自今日始不准濫放行人官員侍衛及太監方准行走亦不准帶領跟役該管官員督令朝夕

巡邏毋得日久生懈○又諭伯麟等奏審明求換護道榜文之龍燕海等分別定擬一摺此案龍燕海等學習大乘教已干例禁復敢進京求換榜文欲倚恃官為給發更得傳徒斂錢肆行無忌該督等擬以枷責遷徙雲南為民所議過輕龍燕海杜一清袁志禮三犯著發往回疆龍幅海王道才二犯著發往黑龍江均交該將軍大臣等嚴加管束儻該犯等膽敢在配脫逃獲日即行正法餘俱照所

擬完結○丁未命

皇次子智親王旻寧祭

火神廟○諭內閣松寧奏審明己革驍騎校溫程喝令毆斃宗室喜受一案另行定擬並附參原審各員一摺此案溫程明知喜受身係宗室喝令攢毆致斃瑞麟等將溫程擬以流罪而以共毆之劉二標子擬抵經刑部議駁當降旨交松寧另行審擬具奏茲據松寧奏將喝令主使之溫程照毆斃宗室律擬以

斬候聽從下手之劉二標子照為從律擬以杖流並餘犯各罪名均屬允當俱著照所擬辦理瑞麟年老無能前錯擬罪名係伊主稿其咎較重著交部嚴加議處即行來京聽候部議松筠額特布會銜具題俱著交部議處限五日內具奏承審之司員著該部查取職名嚴加議處喜受係屢經犯事之人該管族長紹昌不嚴行看管縱令私出釀命著交宗人府嚴加議處刑部議駁此案甚是著刑部

堂官查明主稿司員姓名具奏加恩賞加一級以示鼓勵刑部堂官俱著加恩寬免罰俸二年尋議上得旨瑞麟前在浙江布政使任內因年老調京嗣蘭放奉天府尹值朕臨蒞盛京伊承辦差務尚為奮勉擢用盛京刑部侍郎乃兩年以來瑞麟所辦刑名事務錯誤甚多不但此次溫程毆斃宗室喜受一案所擬罪名顛倒舛謬即如具奏文凌自縊一案不查取文凌家信究明原委又失察筆帖式

相圖等侵分贓罰鹿茸價值種種昏憤不勝侍郎之任著以六部員外郎降補額特布於錯擬溫程罪名率同畫題亦著以六部員外郎降補松筠自前歲奏阻朕巡幸盛京恭謁祖陵喪心病狂乖謬已極伊從此即福薄災生彼時未將伊嚴譴降授察哈爾都統到任後即為所屬協領請賞花翎一味市恩邀譽現今諸臣為其所惑者頗多併有稱伊為師者嗣復簡用御前大臣兵部尚書又於行在遺

失印信其在盛京將軍任內中前所沙河所盜賊肆行全無整頓文凌相圖之案亦漫無覺察此案復率爾會銜具題種種辜恩怠職不能再邀寬貸投閒置散實不為過松筠著以本旗驍騎校降補○又諭昨據瑞齡奏本月十六日進班直宿見有羊隻在宮門前鹿角以內牧放稱係膳房之羊請旨飭禁當交內務府大臣查明係膳房太監私畜羊隻藉名牧放除將該太監等治罪外此係十六日

之事瑞齡於二十二日始行具奏。交軍機大臣詢問。據稱因患病數日。具奏遲延。自請交部議處等語。瑞齡此奏並無不合。若因其奏稍遲。將伊議處。轉似杜其上聞。緘口結舌之惡習。益牢不可破矣。著加恩免其議處。昨因此事降旨申嚴門禁。原因宮門禁地。閒雜員販人等往來出入。坐卧聚談。觀瞻不肅。必應禁止。驅逐。繼思各部院朝房。俱在鹿角以內。須人住宿。看管。其部院堂司各官。因公來園

飲食居處。皆在其中。均不能無隨從之人。近日各處直班官兵。於門禁一事。非失之太寬。即失之太嚴。若因有前旨一概禁阻。亦屬窒礙難行。其各朝房內。應留廝役若干名。或給予腰牌。以憑識別。及王公大臣官員。應分別差等各帶跟役若干人。著軍機大臣管理圓明園王大臣管理圓明園內務府大臣會同妥議章程具奏。尋議酌擬每一衙門朝房酌留看守人役二名。茶役二名。其設有飯房者

每處酌留廝役四名。水夫六名。不得有踰此數。不及此數者。聽令各該處開具花名。由管理圓明園內務府大臣發給腰牌。如有更換人役。隨時報明換給。其內閣住宿供事紙匠及各衙門書吏。由本衙門給與印票。以憑查驗。至王公大臣官員因公來園跟隨廝役。亦應分別等差。定以限制。查王公等所帶護衛。本有頂帶。准進鹿角以內。應准其照常隨從。其各部院衙門大臣官員。一品至三品者。准

帶跟役三人。四品至六品者。准帶跟役二人。七品以下者。准帶跟役一人。如此明定章程。該管官兵亦易於稽考。恭候命下。臣等轉行各衙門一體遵照。並飭知直班官兵認真稽察。如有閒人混入者。立即查拏。稟知管圓明園王大臣究辦。儻直班官兵稽查疏懈。該管大臣嚴參懲處。以儆怠玩。從之。○又諭御史佟濟奏請飭刑部稽察犯人親友出入衙署一摺。所奏甚是。刑部綜理訟獄。關防自應周

密若如該御史所奏人犯到部門早禁卒互為照應於未經定案以前任聽親友往來看視通信串供諸弊皆由此而起著刑部嚴飭提牢司獄等輪流分往南北兩監嚴密稽查凡未經定案人犯概不准親屬往來通信其初二十六放入家眷之例亦係為爰書既定之後而設未定案之前亦著飭禁該部司務仍遵照舊例在大門內公所辦事不准移入堂後以便稽查門早禁止聞人其各直省問刑衙門並著刑部行文一體嚴禁串供等弊以慎刑法○以故杜爾伯特扎薩克汗齊旺喇布坦子拉瑪扎布襲職○以湖北布政使承光為盛京刑部侍郎江蘇按察使麟祥為湖北布政使廣西左江道明安泰為江蘇按察使○戊申諭內閣本日慶親王永璘之子綿懋綿悌綿性百日釋服詣宮門謝恩朕召見綿懋等三人憶及慶親王心甚惻然綿悌年甫十齡詢以清語俱畧能奏對所肄漢書

現讀至下論語察其資性尚為聰穎著加恩在上書房伴讀該衙門即於編檢內遴選授讀之員帶領引見七月初四日與綿悌同入上書房再慶親王第五女本日進內謝恩甚屬端莊朕膝下現無公主頗覺寂寞著留於宮內交皇后撫養亦著於是日進內將來遣嫁時一切事宜官為辦理以示朕篤念懿親至意○旌表守正捐軀山東鄒縣民陳燦妻范氏○乙酉諭內閣鴻臚寺奏本年巡幸熱河經過沿途地方文武各官請旨於幾十里以內接送一摺此奏竟成具文嗣後恭謁東陵西陵及巡幸熱河在直隸境內者俱著無庸奏請如遇巡幸出直隸境外者該衙門再行奏明請旨○又諭韓克均奏審明械鬪案內正犯劉啟運監斃一摺此案福建已革舉人劉啟運係械鬪案內正犯脫逃後不敢回籍潛

行來京冒取同鄉官印結赴部投卷欲行會試經禮部查出該犯咨革原案解送刑部遞回閩省歸案質審該撫提集證佐始得審出實情所有查出此案之禮部司員尚屬留心著禮部堂官查明該司員姓名具奏加恩賞加一級以示鼓勵禮部堂官俱著加恩寬免罰俸二年○又諭姚祖同奏查明同知王仲濬於署開歸道任內疏防蘭儀漫口雖經題參不應復邀保奏一摺所查甚為明晰下南

河同知王仲濬既於護道任內有疏防漫口之咎其調赴馬營壩後辦理稽料引河雖經著有微勞功過僅足相抵且祥符上汛下汛等處漫口隄工皆其同知本任所管地方尤屬無可諉卸是護道任內疏防雖照例題參而本任內缺口多處未經參辦豈可濫邀保奏王仲濬著即革去藍翎如任內另有議敘之處一併徹銷暫留下南河同知之任以觀後效吳璥那彥寶濫行保奏著交部察議

葉觀潮琦善遺漏附參著交部議處○又諭給事中葉繼雯奏擬絞犯婦情有可原刑部不應列入秋審情實一摺所奏甚屬非是此案保杜氏因伊翁保三雄利資縱伊與保緒文暨賈生俊先後通姦該氏恐妬姦生隙告知伊翁移避致伊翁被保緒文踢斃該給事中以保三雄之死非杜氏意料所及發商刑部改緩刑部援引歷辦服制成案礙難改緩咨覆刑名案件遇有倫紀攸關者刑部執法

定擬例應擬實至情節不同將來勾決時其權衡出自上裁若如該給事中所奏服制之案此類甚多若俱擬緩決不但有紊成例朕亦無可免勾之案矣葉繼雯不勝御史之任著以吏禮兵工四部員外郎補用○旌表守正捐軀甘肅張掖縣民姚印妻李氏○庚戌上幸萬壽山○諭內閣據慶溥奏請將牛羊牧場總管齊巴克多爾濟兼管之達哩岡愛牧場添設總管一摺察哈爾牛羊牧場總管向

係兼管達哩岡愛牧場事務事閱多年並無遺誤茲據該總管齊巴克多爾濟以達哩岡愛牧場相距較遠辦事不便巡察難周呈報顯係推諉慶溥即應飭駁乃遽行奏請添設三品銜總管甚屬冒昧所奏不准外慶溥著交部議處尋議上得旨慶溥擅改舊章率請添設總管大員實屬冒昧著照部議降一級調用○賞候補主事盛泰西品頂帶為奉天府府尹○戶部議准陝甘總督長齡疏報靖

遠伏羌二縣開墾田十一頃六十九畝有奇照例升科從之○辛亥諭內閣錢臻奏請暫設局員審理控案一摺東省控案繁多巡撫親提審訊亦不能無幫同問供之員著准其暫設專局將京控各案由該撫親提人證到省督同局員秉公審訊即令臬司童槐總司局務所派局員祇准於候補道府丞倅州縣中遴委不得調用現任人員致荒本務○又諭各省京控案件由都察院察閱案情分別

奏咨其事之是非曲直未經質審原不能據一面之詞遽行判斷嗣後各衙門接收呈詞除尋常微細案件由該衙門自行咨交督撫辦理外其有案關重大應行具奏者但將本案原委摘敘明晰奏聞請旨不得遽加斷語抑揚其詞致外省有所遷就以啟畸重畸輕之弊又諭前據方受疇奏李長幅等冒充儀親王府護衛捏造諭帖赴河間縣求免派差等情一案當將原奏令軍機大臣交儀親

王閱看旋據儀親王將李長幅等獲奏交刑部審訊據李長幅供稱伊女係貝勒綿志之妾伊冒充護衛赴河間縣詐求免差綿志實不知情事後逃回向綿志懇求庇護經綿志斥言不能相救等語除本案俟人犯解齊由刑部審明另行定擬具奏外宗室王公等納妾向俱於該管包衣莊頭家挑選綿志私買民人之女為妾事前並未稟知儀親王直至生子後始行稟明已屬不合李長幅因在綿

志處往來輒敢冒寫儀親王諭帖擅戴翎頂假冒職官回籍詐騙及逃走回京向綿志懇請綿志又不即時回明儀親王究辦遷延多日經朕將方受疇原奏令儀親王閱看儀親王始知有此事綿志種種錯謬實屬咎無可辭綿志著革去郡王職銜仍留貝勒革退鑲藍旗漢軍都統署正紅旗漢軍都統並拔去花翎仍罰貝勒俸四年作八年扣繳以示懲儆其宗室王公等有買民人之女為妾者已

往不究此後概行禁止如有違者應作何懲處之處著宗人府定議具奏尋議嗣後親王至奉恩輔國公有私買民女為妾者一經查出即行革爵再包衣叅領佐領本有稽察包衣人丁戶口之責該員等應隨時稽察如王公內生有子女並請封側福晉側夫人側室等事均責成該員等將所生子女之生母其母家旗分佐領姓氏三代開寫清冊鈐用關防圖記限三日內呈報臣衙門辦理儻王公

有私買民女為妾及生有子女捏報包衣女子所生等事該員等豫行查出呈報者免議如未查出或竟附和捏報一經發覺即將該員等照例交部嚴加議處從之○諭軍機大臣等御史曾垂紳奏請查辦江西銷鹽分數一摺據稱鹽道胡稷性耽安逸並不認真緝私閒至各府巡查並未親歷要隘確勘透私情弊以致梟徒肆出私販日多又建昌撫州一帶水販歇業概食閩私該道所過城鄉市

集明知並無官鹽亦不細加訪察招募水販私販充斥官引滯銷該道連年詳報暢銷恐有虛捏通融牽算等語著孫玉庭延豐即將該鹽道胡稷連年所報暢銷是否引課相符有無通融虛捏情弊詳晰確查據實具奏如該道於緝私督銷諸務因循怠惰並不認真辦理不勝鹽道之任即行據實奏參毋稍瞻徇○以正黃旗領侍衛內大臣晉昌兼鑲藍旗漢軍都統○貸熱河被水官兵修理房屋

銀 壬子

上詣

時應宮

昭顯廟拈香 還宮 旌表守正被戕江蘇

邳州民段文知女段氏 以孟秋時享

太廟自是日始齋戒三日 癸丑命翰林院檢

討賊人鏡在上書房行走 甲寅轉禮部右

侍郎那清安為左侍郎以大理寺卿和桂為

禮部右侍郎 以正黃旗蒙古副都統崇祿

為正白旗蒙古都統調正白旗蒙古都統穆

克登額為正白旗漢軍都統正白旗漢軍都

統富蘭為察哈爾都統降察哈爾都統慶溥

為正黃旗蒙古副都統

大清仁宗受天興運敷化綏猷崇文經武孝恭
勤儉端敏英哲睿皇帝實錄卷之三百七十二

卑污謬妄行同無賴該犯年已老邁毋庸發

聘妻金氏○丁巳○

內閣朕本日恭閱

奉

而已尚能奮勇殺賊乎此即應如所奏亦無

不可但積習日久實未嘗經歷此等事件且人數衆多著加恩將擬絞之護軍校努爾瑚訥長玉護軍福森保等十六人俱行寬免發往拉林阿勒楚喀此係朕格外恩施嗣後各宜勤慎當差嚴為守衛儻仍前怠玩偷安必從重治罪決不寬貸將此旨著八旗護軍統領書於木牌凡進班之處俱行懸掛等因欽此又奉

諭協和門進班委護軍校都爾瓦奪取僧人腰

刀當即擒獲實屬奮勇可嘉著加恩補放副護軍叅領賞銀一百兩幫獲之護軍貴保賞銀五十兩其餘人等各賞銀三十兩又奉旨於紫禁城四門各派東三省章京二人看守仰見我

皇考睿慮深遠嚴飭禁衛之至意朕於十八年辦理逆匪突犯禁門一案於直班官兵等分別懲治並議添東三省官兵申嚴門禁各事宜悉與

聖諭默相符合惟十八年逆匪之變較之瘋僧闖入禁門更為重大是日禁門直班官兵刑部分別擬以重辟本應即行正法因人數衆多改從寬典當時未免姑息著交刑部存記凡此案疏防禁門各犯無論遇何恩赦俱不准查辦即摺內除某人等不議之語亦不准敘及如有在配脫逃者拏獲奏聞即行正法並著前鋒統領護軍統領等查明現在紫禁城四門章京護軍校護軍每日每門必須派有東三省官兵數人在內當差不准缺誤其乾隆二十三年恭錄

諭旨木牌現在各門仍否一律懸掛如有遺脫者著即補繕恭懸並將十八年朕申嚴門禁各諭旨另書木牌凡禁城進班之處一併懸掛俾直班官兵等觸目警心共嚴宿衛○又諭賈允升奏各省京控案件請降旨不准發還一摺所奏非是各省民人赴都察院呈控案件向來有奏聞者有咨回者有駁斥者嘉

慶四年朕降旨不准駁斥以防壅閉係指案情重大者而言。若如賈允升所奏無論案情大小不准駁斥即不准發還則一切戶婚田土錢債細事一經京控悉皆奏咨辦理亦於政體非宜。國家設官分職大小相維若以部院衙門理及瑣屑之務則直省地方官所司何事。且近來訟風日熾使奸民臆計赴京控訴必當一概准理豈不益長刁風倍增訟獄拖累株連流弊更大。賈允升所請不准發還控案之處著毋庸議。惟都察院向有一兩月彙奏咨案之例嗣後凡發還案件亦著存記檔冊摘敘案情一兩月彙奏一次即可防掩重為輕之弊。其近京旗民控告細事劃交五城司坊審斷者仍照舊例辦理毋庸彙奏。○又諭長齡奏審擬借用蒙古烏拉之副都統及索借銀兩之筆帖式等分別議處。杜革一摺所擬尚輕。法禮哈派赴西藏迎接哲布尊丹巴呼畢勒罕例不應動用蒙古烏拉乃因

駝馬倒斃聽從屬員慫恿向青海蒙古台吉等借用烏拉以致隨帶之筆帖式通丁護衛等乘機借貸銀兩雖回日如數措還該台吉等業已具控在前未經收回即與勒索無異。護衛策敦丹已索諾木均著照所議革退鞭責。筆帖式富蓉伊仲泰毋庸交議均著即革職。副都統法禮哈違例擅用蒙古烏拉又失察隨帶筆帖式索借銀兩年老無能著於庫倫回京日降為四品頂帶休致。瑪呢巴達喇

著照例議處。○己未諭內閣據成親王奏綿懃之第五子奕繁於本月初一日病故查奕繁亦有未經命名之子其不行呈報係綿懃主意特自行檢舉請交宗人府治其失察之罪等語。綿懃所生二子不報知成親王伊子奕繁生子向伊告知伊又不令報知成親王如綿懃尚在自當治以應得之罪今伊已身故著毋庸議。成親王先未知悉所有自請交議之處著予寬免。奕繁之子即由成親王自

行命名照例呈報成親王府第一月之內查出匿報孫曾三人前歲怡親王奕勲身故後亦曾查出匿報子女多名以此類推各王公家所生子女未經報出者恐尚不少宗室枝葉繁衍最為盛事該王公等匿不呈報不知是何意見該族長總族長等耳目切近又何至全同聾瞶毫無見聞著通諭宗室王公等凡生有子女俱各遵例即行呈報管理宗人府王公及各族長等亦隨時稽察如有匿不呈報者該族長一經查出立即補報宗人府並將該王公指名叅處以示懲儆○以禮部右侍郎和桂兼鑲黃旗漢軍副都統○庚申上幸靜明園詣龍神廟拈香○諭內閣直省藩臬出缺例應由驛具奏此次陝西臬司特通阿病故徐炘護理巡撫西安省城大員僅伊一人更應由驛速奏請旨簡放以重職守乃差人齎遞徐炘太不曉事著交部察議○又諭刑部具題

河南靈寶縣役焦登科踢斃荆墨兒一案朕詳加披閱荆墨兒瘋病復發赤身持棍跑入縣堂擊鼓跳舞焦登科衛萬林二人同係直堂卑役若不行攔阻或被闖入署內毆傷本官應得守衛不嚴之罪該役等向前攔阻因被荆墨兒持棍亂毆一同捕禦焦登科舉腳向踢適傷荆墨兒心坎右乳傷重殞命焦登科與荆墨兒素不認識並非有心致死照共毆下手傷重律擬以絞候似覺過重著刑部詳查律例或量為輕減另行叢議具奏○以江蘇蘇松糧道斌良為陝西按察使○旌表守正捐軀陝西鄠縣民沈大元妻劉氏○辛酉旌表守正被戕江西靖安縣民周春桂媳楊氏○壬戌上御勤政殿勾到上年四川情實罪犯停決斬犯三十六人絞犯二十三人餘七十五人予勾○癸亥諭內閣御史朱鴻泰杜構訟之弊以息刁風一摺所奏甚是民間訟牘繁多最

為閭閻之害。而無情之詞紛紛赴訴。則全由於訟棍為主謀。此等刁惡之徒。陷人取利。造作虛詞。捏砌重款。具控者聽其指使。冒昧呈遞。迨審出虛妄。誣告反生之罪。皆惟控訴之人是問。而彼得置身事外。至被誣之人。一經牽涉。業已陷身失業。即幸而審明昭雪。而其家已破。因此傷身殞命者。更不知凡幾。在訟棍反局外旁觀。自鳴得意。種種鬼蜮情形。實堪痛恨。著通諭直省審理詞訟各衙門。凡遇駕詞控訴之案。必究其何人慫恿。何人招引。何人為之主謀。何人為之關說。一經訊出。立即嚴拏重懲。勿使倖免。再地方官於接收呈詞時。先訊其呈詞是否。自作自寫。如供認寫作。出自己手。或覈對筆跡。或摘詞中文義。令其當堂解說。其不能解說者。即向根究。訟師姓名。斷不准妄稱。路過賣卜賣醫之人。代為書寫。勒令供明。立拏訟師到案。將造謀誣控各情節。嚴究得實。一切重罪。悉以訟師當

之。其被誘具控之人。轉可量從寬減。如此探源究詰。使刁徒斂戢。庶訟獄日稀。而良善得以安堵矣。○旌表守正捐軀山東蘭山縣民李郭妻宋氏。○甲子。

孝懿仁皇后忌辰遣官祭

景陵。○諭軍機大臣等。儀封大工霜降後。即須興辦所需料礮。必須豫購齊全。著張文浩姚祖同先行覈定價值。本月中旬。新料一經登場。即派員分投購買。運赴工次。務令儲備充裕。吳璥等到工。即可源源應手。萬不可稍事延緩。或籌備不足。致令臨時停工。待料至大工合龍。全在引河通暢。總須於興工一月之前。先行挑挖。方可不誤。著張文浩等迅速估明。工段派定員弁。於八月初間。即責令分段興挑。時日從容。辦理不至草率。其引河內所出之土。並令加遠運送。萬勿仍前堆積河干。以致坍塌。入河復形淤墊。該署河督等接奉諭旨。即先將此二事豫籌妥辦。以便吳璥等

到彼剋日興工迅速藏事也。將此諭令知之。
○給河南儀封祀。唯虎邑蘭陽柘城六廳州縣被淹災民口糧有差。○乙丑。

上幸萬壽山詣

廣潤祠拈香。○旌表守正被戕直隸肅寧縣

民趙林之妻韓氏。○丙寅。

上御勤政殿勾到上年廣東福建浙江情實罪犯停決廣東斬犯五人。絞犯十二人。福建斬犯三人。絞犯一人。浙江斬犯八人。絞犯二人。餘九十人予勾。○諭內閣向來恭值

壇

廟大祀王公大臣官員及太常寺執事各官滿洲人員內有二十七箇月服制者。是否俱不應恭與其滿漢各員有期年服制者。亦皆恭與與否。著禮部太常寺詳查舊例。若何新例。若何分晰開單具奏。尋奏上得旨。王公大臣官員滿洲人員內有二十七箇月服制者。朝會祭祀之禮仍一概不與。惟太常寺官員熟

諳禮儀者本屬無多。若照新例二十七箇月服制之內。概不與祭。恐致不敷當差。著仍依舊例。百日後照常供奉祭祀。至御前乾清門大臣侍衛等有二十七箇月服制者。百日後恭值

郊壇大祀祭前一日。著仍穿蟒袍補服。隨至齋宮護衛直宿。祭日著穿常服。各在上馬處祇候。禮成後再一體扈從。其滿漢各員有期服及大功以下者。不與祭。日期俱仍照舊例行。

○旌表守正捐軀河南葉縣民婦黃氏。山東兗縣民張大貴妻劉氏。○丁卯。

上御勤政殿聽政。○以詹事府詹事李宗昉為內閣學士。兼禮部侍郎銜。詹事福申為大理寺卿。○戊辰。

上幸靜明園詣

龍神廟拈香。○諭內閣朕本日恭閱

皇考高宗純皇帝實錄。內載乾隆二十三年十一月奉

上諭孫灝奏請停止明年巡幸索約勒濟一摺朕初閱其詞以為無知罔識事體繼思所關於本朝家法及我滿洲風俗人心者甚大不得不明切宣諭者我

皇祖聖祖仁皇帝臨御六十一年惟恐八旗之衆承平日久耽於安樂不知以講武習勞為務是以省方校獵歲頒舉行我

皇考世宗憲皇帝十三年中朕與和親王等日聆

庭訓每諄諄以

皇祖之定制貽謀永當效法朕臨御以來思紹前徽罔敢少懈豈少御園別館足供覽繇必親御鞍馬時勤弓矢轉以此為自娛

聖祖仁皇帝有天下雖太平武備斷不可廢如滿洲身歷行間隨園行獵素習勤苦故能服勞若漢人則不能矣雖由風土不同亦由平日好自安逸所致之諭凜然悚惕豈敢一日忘之孫灝以上書房行走之員識見舛謬害

事如此若侍諸皇子教讀耳濡目染豈獨貽誤養正之功且身為言官妄肆簧鼓著以三品京堂改用等因欽此仰見我

皇考恪守

前型不忘根本之至意其時因孫灝係副都御史本有言責

聖意不加嚴譴但示薄懲若前歲朕恭詣陪都祇謁

祖陵鉅典攸關較之巡幸索約勒濟其重大更

為若何乃松筠謬逞臆見妄言諫阻其罪浮於孫灝又奚啻倍蓰乎我朝

家法相承

睿謨深遠陪京為

王跡肇基之地必當再三周歷勤思

開創艱難而騎射為國家根本重務秋獵歲舉講武習勞即藉以倡率戎行不忘舊俗朕欽承

彛訓每誦

遺編軌深儆惕

成憲昭垂所當萬年遵守勿替者也諸臣若存
偷安之心微言示意經朕覺察立置於法決
不輕恕慎之戒之○己巳中元節

上詣

安佑宮行禮○遣官祭

永陵

福陵

昭陵

昭西陵

孝陵

孝東陵

景陵

泰陵

泰東陵

裕陵○遣官祭

孝淑皇后陵寢○遣官祭

端慧皇太子園寢○諭內閣向例各省重運

漕船抵通於七月十五日前後即全數回空
嗣因沿途阻滯抵通較遲不能如期歸次迄
今已三十餘年未符定制本年南糧重運北
來行走遙遠甫屆七月中旬即已全數回空
從此歸次日早冬免冬開年年可復舊規此
皆上年飭令各督撫嚴催交兌押令依限開
行該漕督等沿途催趲認真且本年各幫米
色俱皆乾圓潔淨倉場侍郎等剋期驗收毫
無留滯是以漕政大有起色著傳諭有漕省

分各督撫及漕運總督一切交兌催趲事宜
均照此次辦理不可稍生懈怠除督運各員
前經施恩外那彥成莫晉及坐糧廳司員玉
英沈蘭生俱著加恩交部議敘那彥成從前
曾戴雙眼花翎著加恩賞戴單眼花翎以示
獎勵○又諭昨日軍機大臣會同南書房翰
林繕寫御製詩三集樣本進呈朕以從前進
呈二集時曾經賞賚當亦加恩分賞朝珠蟒
袍乃幾暇檢閱甫及四冊錯誤疊疊有將宮

殿字樣訛寫偏旁者有將臣工名字書寫顛倒者已有二十餘處之多向來御製詩文集軍機大臣與南書房翰林會同請刊軍機大臣事務殷繁從不與校對之役其校勘訛誤乃南書房翰林專任其事此次英和因所管事務較多未能校閱黃鉞僅校十分之五吳信中則自稱曾經校對三次今錯誤不一而足皆由辦事不肯實心是以如此疏畧又本日禮部奏纂辦通禮條例摺內將綺春園誤

寫綺春園穆克登額等供職外延於御園之名或可諉為不知黃鉞繕寫御製詩章於題咏綺春園篇什素所習見乃摺內訛字未經看出亦屬疏忽黃鉞著罰俸半年吳信中著罰俸一年以示薄懲○又諭御史佟濟泰請嚴禁督撫勒令屬員告病一摺所奏是各省督撫表率屬吏舉劾皆當一秉至公使人知所勸懲若如該御史所奏督撫授意屬員勒令告病外示寬容使其暫行離任至該省員

再出服官貽誤地方均所不計豈實心任事之道嗣後各督撫於所屬文武職官有劣跡顯著及才不勝任者著俱據實劾參甄別或改教降補或用京職分別覈辦除實係患病之員仍照例取結奏咨外其餘概不許勒令告病以杜虛偽其現在告病之江蘇試用同知聯璧著該旗於到京日驗明是否屬實據實具奏○又諭御史李肄頌奏請飭各州縣緝捕本境盜賊一摺直省州縣本境遇有盜

賊原應上緊緝拏有犯必獲乃近日京城內外所獲賊犯多有自外州縣避罪潛逃者自係捕務廢弛所致著刑部五城步軍統領順天府各衙門嗣後捕有盜竊等犯籍隸外州縣者均嚴訊其曾否犯案如先在原籍犯事地方官縱令漏網即查明案情將該地方官分別參處以示懲儆○又諭御史李肄頌奏請嚴禁已革已滿書吏暗中盤踞一摺各部院衙門書吏已革者不准復充已滿者不准

逗遛立法本為周密。若如該御史所奏各衙門奸胥猾吏。仍於暗中盤踞。恐不免有舞文玩法之弊。著步軍統領。五城順天府一體訪查。如有已革已滿書吏把持公事者。立即嚴拏究辦。其各衙門書吏缺出。並著遵照定例。按限遞充。毋令奸徒身後辦事。以除積蠹。○又諭成格奏擬遣官犯具稟妄訴。意存挾制。請旨嚴懲一摺。向來京中遇有問擬發遣官犯。刑部於奉旨之日。即送交兵部起解。乃外省遣犯奉到部文後。往往任其逗遛。該犯因得架詞翻控。藉延時日。此案已革叅將佈彥圖。因縱放私鹽。擬發新疆。呈請留養。及帶子赴戍。均與例不符。一經斥駁。即逞刁妄。按計圖挾制。復經該撫審明。毫無屈抑。佈彥圖實屬刁詐。著加責四十板。即日起解。發往伊犁充當苦差。以示懲儆。嗣後各省擬遣人犯。俱於奉旨之日。即行起解。不准片刻停留。

大清仁宗受天興運數化綏猷崇文經武孝恭勤儉端敏英哲睿皇帝實錄卷之三百七十三

大清仁宗受天興運敷化綏猷崇文經武孝恭勤儉端敏英哲睿皇帝實錄卷之三百七十四

監修總纂官是書諸臣任官各著其職文宗顯皇帝實錄纂修官是書諸臣任官各著其職

纂修官是書諸臣任官各著其職文宗顯皇帝實錄纂修官是書諸臣任官各著其職

纂修官是書諸臣任官各著其職文宗顯皇帝實錄纂修官是書諸臣任官各著其職

纂修官是書諸臣任官各著其職文宗顯皇帝實錄纂修官是書諸臣任官各著其職

纂修官是書諸臣任官各著其職文宗顯皇帝實錄纂修官是書諸臣任官各著其職

秋修

嘉慶二十五年庚辰七月庚午

上御勤政殿勾到上年湖廣陝甘情實罪犯停決湖廣斬犯十二人絞犯十三人陝甘斬犯十四人絞犯十人餘一百一人予勾○諭內閣向遇巡幸之日特派王大臣留京辦事其責任與在京軍機大臣相同凡有交辦事件亦與特交軍機大臣者無異軍機大臣每日承旨書諭及交辦事件均係立即辦理從無敢遷延時日者本年三月兵部遺失行印一案自初八日交留京王大臣等審辦無如疲

懈成性互相推諉竟遲至十五日始將案犯集訊以致各犯從容串供情偽百出實屬因循疲玩怠惰極矣著自此次為始留京王大臣等除尋常事件仍照舊辦理外如有特旨交辦之事接到諭旨立即會同查辦不准片刻稽遲倘有仍前延玩者經朕查出定行從重懲治不稍寬貸此旨著留京王大臣日日恭誦不可稍忽○江西巡撫瑞弼奏親屬通姦謀殺本夫審明定擬一案得旨此案黃開

俚與胞兄黃觀俚之妻謝氏通姦復聽從與謝氏通姦之大功堂兄黃炳俚共將黃觀俚謀死實屬淫惡蔑倫均無庸再交部議黃開俚著即凌遲處死黃炳俚著即處斬黃謝氏著即處絞餘俱照所擬完結○以廣東高州鎮總兵官馬應國為廣西提督○予故廣西提督馬元祭葬如例○辛未上詣安佑宮行禮○以廣西潯州協副將李廷揚為

廣東高州鎮總兵官。壬申。

上以秋獮木蘭自圓明園啟鑾命

皇次子智親王。皇四子瑞親王綿忻皇孫

貝勒奕緯隨駕。命肅親王永錫大學士曹

振鏞協辦大學士尚書伯麟尚書英和留京

辦事。免蹕路經過地方本年額賦十分之

三。是日駐蹕南石槽行宮。癸酉。賞密雲

縣接駕兵丁半月錢糧。是日駐蹕密雲縣

行宮。甲戌。諭內閣本日據方受疇奏稱深

州地方秋禾多有雙穗至十一穗者。摘取二

十莖進呈。朕敬憶

皇考高宗純皇帝實錄內載乾隆年間河南省

曾經奏進雙穗四穗嘉禾。

聖諭以為凡土壤肥沃之處又值雨膏霑足其

發生芄勃則一本數穗亦事所恒有不必侈

言嘉祥惟以未經成熟之禾遽行摘取轉使

數莖嘉穀置之無用殊為可惜。仰見我

皇考貴粟重農不尚符瑞之至意。本年雨暘時

若直省年穀順成多登上稔朕心深為忭慰
國家以豐年為瑞何必以雙歧合穎調為美
談且此所進二十莖亦未免虛耗物力嗣後
各直省遇有瑞麥嘉禾但當據實奏聞不可
稍加粉飾概無庸摘取進呈用副朕崇本務
實仰紹

前徽之意。又諭定例匿名揭告本管官所告
得實仍照律擬絞監候此案西隆阿商同幅
忠阿寫就無名書札夾入公文由驛投遞揭

告本管官挪移俸餉等款呈內既不出名即
係匿名揭告定案時自當按律問擬絞候富
俊等因其札內有瑯春三旗兵丁呈訴字樣
且該犯等到案供明有微末兵丁不敢列名
之語遂將該犯等減等擬流實屬錯誤刑部
必應執法議駁乃率行照覆此例一開使奸
狡之徒知匿名告言人罪到案後但以不敢
列名虛詞誑供即可援引此案將縲首重罪
從輕擬遣必更肆其請張毫無畏忌豈不益

長刁風大乖明罰勅法之義西潞阿幅忠阿	二犯著仍按律定擬絞監候入於明年秋審	情實其擬罪錯誤之富俊富登阿俱著交部	議處率覆之刑部堂官俱著交部察議○是	日駐蹕要亭行宮○乙亥駐蹕兩間房行宮	丙子	上御行殿勾到上年江西安徽江蘇情實罪犯	停決江西斬犯九人絞犯七人安徽斬犯六	人絞犯二人江蘇斬犯十人絞犯七人餘八	十七人予勾○是日駐蹕常山峪行宮○丁	丑駐蹕喀喇河屯行宮○戊寅	上至熱河	聖躬不豫詣	城隍廟拈香○詣	永佑寺行禮○以詹事府少詹事奎照為詹事	賞熱河綠營兵丁及看守避暑山莊弁兵	一月錢糧看守口外各行宮弁兵半月錢糧	乙卯
-------------------	-------------------	-------------------	-------------------	-------------------	----	--------------------	-------------------	-------------------	-------------------	--------------	------	-------	---------	--------------------	------------------	-------------------	----

上不豫	皇次子智親王星子皇四子瑞親王綿忻朝夕	侍側	上仍治事如常○以詹事府少詹事朱士彥為	內閣學士兼禮部侍郎銜翰林院侍讀學士	顧臯為詹事府詹事○嚮夕	上疾大漸召御前大臣賽冲阿索特那木多布	齋軍機大臣托津戴均元盧蔭溥文孚總管	內務府大臣禧恩和世泰公啟鐫匣宣示	御書嘉慶四年四月初十日卯初立皇太子	寧○戊刻	上崩於避暑山莊行殿寢宮○遺詔曰朕仰蒙	皇考高宗純皇帝授璽嗣位親承	訓政三年惟以敬	天法	祖勤政愛民為保邦制治之大經履位以來嚴	恭寅畏惟日孜孜思	天立君以為民以養以教責在一人親政之初
-----	--------------------	----	--------------------	-------------------	-------------	--------------------	-------------------	------------------	-------------------	------	--------------------	---------------	---------	----	--------------------	----------	--------------------

值川陝楚邪匪未靖。訓勵統兵大員。整飭戎行。籌筆四載。逋寇以次殲除。嗣是海宇乂安。閭閻樂業。朕懷保惠。鮮與民休息。乃十八年。復有奸民作惡。闖入禁門。逆黨勾連。曹滑蔓延三省。幸賴

上天祐順。渠魁捕戮。餘孽殄夷。為期曾不再月。中外肅清。朕深思邪教之害民。屢申訓諭。以肅吏治。以正人心。整綱飭紀。期於政清而俗厚。蓋未嘗一日釋諸懷也。黃河自古為中國

患。先是雲梯關下海口墊淤。下壅上決。屢有漫溢之警。朕不惜帑金。隄防疏濬。俾復故道。奏安瀾者越六七年。上年秋霖異漲。豫河南北漫口數處。而武陟橫流。穿運入海。為害最重。今春督治甫告成功。而南岸儀封復潰。飭諭河臣於秋後興築。業已程工撥帑。計今冬可期。歲事朕軫念民生。惟懼一夫失所。遇四方水旱之災。蠲租發粟。隨奏輒下。上年朕六旬正慶。薄海臣民。臚歡獻祝。愛戴出於至誠。

朕思速以實惠。詔蠲免積欠銀穀。凡二千餘萬。以期家給人足。共登熙皞。今歲自春徂夏。以及於秋。暘雨應時。各省皆報豐登。朕心豫悅。孟秋中旬。恪遵

彝訓。將舉木蘭彌典。先駐蹕避暑山莊。朕體素壯。未嘗疾病。雖年逾六旬。登陟川原。不覺其勞。此次蹕途。偶感暍暑。昨仍策馬度廣仁嶺。迨抵山莊。覺痰氣上壅。至夕益甚。恐弗克瘳。朕仰遵

列聖家法。曾於嘉慶四年四月初十日卯初。豫立皇太子。親書密緘。鐫置祕匱。十八年禁門之役。賊踰宮垣。皇太子手發火鎗。連斃二賊。餘黨驚墜。禁籞獲安。厥功甚鉅。因建儲之命。未宣先封。智親王以獎殊庸。今疾彌留。神器至重。允宜傳付。乃命御前大臣軍機大臣內務府大臣。公啟密緘。皇太子仁孝智勇。必能欽承付託。其即皇帝位。以嗣大統。為君之道。在知人在安民。朕嘗論之詳矣。然而行

之實難其深思而力持之登進賢良愛養黎庶以保我國家億萬年丕丕基記曰孝者善繼人之志善述人之事可不勉哉朕貴為天子年逾周甲獲福亦云孔厚惟我後嗣克承予志使天下永享太平之福則朕之願慰矣朕受璽後二兄一弟同予侍養今春慶親王先逝自茲存者惟儀親王成親王遂不獲相見其二王一應罰俸處分著概予寬免書戴虞舜陟方古天子終於狩所蓋有之矣況灤陽行宮為每歲臨幸之地我

祖

考神御在焉予復何憾喪服仍依舊制二十七日而除布告天下咸使聞知○八月乙巳奉移

梓宮至京奉安乾清宮○是歲十月甲辰恭上

尊諡曰

受天興運敷化綏猷崇文經武孝恭勤儉端敏英哲睿皇帝

廟號

仁宗○道光元年三月癸酉午時葬

昌陵

上在位二十五年

聖壽六十有一

上受

天明命協

帝重華

天亶聰明

帝傳精一承

手付太平之後徵

躬備多福之原懿鑠哉生民以來未有之嘉會

也敬惟廿五年中經緯萬端端緒際兩大垂千

百王之模範撫數萬里之版圖奠億兆人之

家室凡典章法度禮樂政刑無不出之以誠

將之以敬靈承有自故中錫無疆揆厥由來

儲位兆於

題春佳識符平建號潛孚默契在

誕聖之先有不可思議者若夫虹流電繞鑄寶篆於天地一家雲爛星輝題瑤函於帝王統系隨

鸞輅則賡歌際盛遊龍井而

詩教得聞蘋香汧之侍側承

恩毓慶宮之那居養正蓋

保命於嘉樂而

毓德於初基者厚矣

皇天眷顧祚我

聖躬自

穹宇升香越大廷

授璽上儀茂舉景貺畢臻猶且凜謙抑之懷效

期頤之祝特申

舜讓未荷

堯俞迺

勅下所司靈臺之時憲同刊圓府之寶文並鑄

垂為定制用以示萬年

尊養之崇洵為古今所創見中庸言虞帝之為

聖人為天子歸本於大德而申之以受命之可必然則

上之受命受之於

天受之於

列聖受之於

高宗純皇帝至於能繼志能述事能觀光揚烈

實惟大德有以必之稽諸在昔唐宋內禪事

非得已均無足稱即姚姁似三統相承以天

下為公亦非繼體之正惟

天佑於一德溯大撓甲子至

御極丙辰四千四百九十有二年苞符翕應以

蒼華於昌期而成此超圖溢牒之盛軌故受

命若斯之隆也夫受命以德德之大莫重於

事

天粵若春

祈夏

雩

圓丘

方澤齋居必恪祀事必誠時或徹儀衛以告虔製祝辭而將惻所以承荃宰迓蕃釐也而其通幽合莫之理悉備於

南

北郊二記中一則曰極精微再則曰極元妙探本窮源與祭法祭統祭義之文相表裏至右壇之步禱岱宗之感應水府之崇封一念欽承萬靈拱衛何莫非皇之敬德所推而暨焉者哉奉若者合

天聿修者念

祖當夫一堂聚順三載承歡入則捧觴出則掖輦臚歡讓善情深而文明逮親政後勒畢陌之豐碑弁

史歲之首簡踵全韻以紀盛述嗣統以揚徽總六十年之

聖德神功悉加闡繹昭告來茲是惟

聖人能知

聖人亦惟

聖人能言

聖人其同揆而合符者文德即世德也由是而懷締構慎丕基憬草昧之經綸瞻尊藏之弓劍晨興雒誦則

五朝之舞訓彰焉秋駕再勤則

三陵之精爽格焉松山書事有伐崇遏密之文焉風土聯吟有涉渭過澗之詠焉近以迓在天陟降左右之春遠以追

開國艱難風化之自加以推恩錫類敬宗收族

教之以國語騎射恪承先澤而唐魏之淳風可復也安之以田園廬舍移駐陪都而幽岐之舊俗可觀也設魏科復章服以榮之而菁莪棫樸之化葛藟行葦之恩遍諸同姓也書云克明俊德以親九族斯之謂歟為政以德而懋德以勤則未明求衣秉燭視事樞臣日接庶尹旁咨指示周詳唯疲玩因循是戒省方設教若臺懷之為民祈福津浚之遵海宣風攬轡御臚雍容和順固無日不與天下相

見也。又如上塞秋獮。為萬世

家法。習勞肄武。歲以為常。而其大要見諸木蘭記。木蘭雜詠。圖跋與夫勤政。歲勤政。論勤政。殿記者。詳哉其言之矣。况乎典美。助農心殷。濟衆。藉勤吉亥。

社報有秋。布閭於春。韶行糜於歲晚。與夫民穀之數。賜雨之宜。收穫之多寡。市糶之貴賤。遐陬僻壤。靡不周知。而且謹正供之入。力絕溢征。杜邪慝之萌。首懲游惰。其或偏災偶告。

宵旰時塵。賜賑賜蠲。動以億計。而

六旬正慶。普免積逋。至二千一百二十九萬有奇。固宜登春臺。遊壽宇者。熙熙然。皞皞然。翹首企足。以臺萊頌也。則善政之德在養民者。又如此。是故參天兩地。至敬也。報本追遠。至孝也。朝乾夕惕。至健也。惠鮮懷保。至仁也大矣。媿矣。德至矣。蔑以加矣。然且崇節儉。明黜陟。慎河防。勅國憲。宣文教。詰戎兵。蓋性敦樸。素事絕鋪張。當席豫而履豐。恒戒奢而示儉。

珠池養布特哈。則愛及羸蛤之微。玉石委棄。爾美則念及馬馱之乏。上膳卻萬方之品。兼金定九牧之程。匪特入貢之異物。胥捐言利之小人。不用也。屬車所至。供億無煩。鄉閭靡力役之征。陛柅鮮雕鑿之飾。欣逢

聖節。曲順民情。心固樂其雍熙。事且防其浮靡。至於特頒

明訓。毋許再陳。則保泰持盈

聖心之所見者遠矣。此商書慎儉之德也。萬幾

初理。魁柄獨操。首罪擅專。力除壅蔽。絕交通之朋黨。斥偵探之吏胥。於是乎百僚有箴諫。官有論實。心行政有諭除。莠安良有詔。讀臯陶之謨。恐旌別或爽也。誌戒石之銘。恐脂膏或竭也。進賢以才為急。而有才無德者抑之。察吏以廉為先。而矯廉曲謹者辨之。取人不拘一格。而流品必不可淆。聽言不滯一偏。而

讒詔莫逃於察。盡竭心力以報天恩。甄別賢愚。以肅吏治。此周官丕式之德也。

懷襄之警。自古而然。往者波臣。溢軌。蹇。受下
捷。雖數千萬帑。金無少靳。其乘勢利導。則因
東壩之勢。而衡樓之大工。以合。因六塘之改
而雲梯之故道。以修。因毛城之廢。而虎山之
新壩。以築。因儀封之漫。而武陟之巨浸。以消
事機之順。荒度之勤也。而三冬氣暖。人力能
施。九派流疏。神靈疊見。又其精誠之所為。昭
格也。此明德之媲美於禹功者也。刑獄者。民命
之所繫。故兼綜庶政。恒以此事為兢兢。當爰
書奏上。每予平反。有疑。則勅覆。小民之以冤
抑聞者。馳大吏往治之。即至秋讞已成。猶持
開一面之網。而於問刑之吏。深文防其羅織。
訟牒。傲其稽留。戒案牘之抑揚。禁桁楊之增
設。提撕詰誥。至再至三。
特製慎刑論。慎刑續論。務期無枉無縱。協於咸
中。若行慶而沛雞竿。額澤而清犴獄。則又如
天之量。所煦妪而覆燾之也。此寬德之洽於
民心者也。

幾餘典學。日有緝熙經史。而外紀事本末。名臣
言行錄。諸書時加
乙覽
天章之富文二集。詩三集。聲之以味餘之全集。
而振之以餘集。
帝琴播詠。皇極敷言。雲漢為昭。日星並壽。其嘉
惠藝林者。則
御經筵。幸翰苑。
臨雍特講。釋奠。頒行續文穎之簡編。編輯
熙朝之雅頌。編明鑑。以垂法戒。彙唐文。以示楷
模。慶榜四開。召試再舉。駐防之籍。許與科名。
名臣之鄉。增其學額。一時四方俊乂。鼓吹笙
簧。以期仰副
右文之治。而人才蔚起。士習敦龐。樂育徧乎苗
疆。肄業來於海外。所以崇正學。飭儒修
化之成。
德之訖也。承平日久。生齒日繁。閒值小醜跳梁。
自作不靖。譬之鳥有鳴鴉。獸有狻猊。魚有鯨。

鯢蟲有螟螣

天並育而生兵不得已而用如五溪之苗三省之逆窮洋之逋寇畿甸之莠民西蜀徼外之夷南詔江濱之裸

威弧所指悉就蕩平雖遲速異宜險夷殊勢而雲旗害礮迅雷疾雨之共效聲靈者實可見聖武布昭

天心助順也讀十二辰兵事之詩繹數百言邪教之說武有七德一身兼之矣抑又聞之無

遠弗居者德也旌節門之綽楔化被索倫則內地之沐

德教者可知矣

賜耆老之詩章歡騰土目則近畿之被

德澤者可想矣是以蒙古諸部世為臣僕朝鮮

琉球暹羅南掌緬甸諸國職貢時修即嘆咭

喇窮島細民願切就瞻未嫺儀節猶復容以

大度予以便蕃而阮福映之陳力於先請命

於後者其忱悃更足多焉則

德威之所由致也懋哉懋哉貫道原宣誼譽幹洪運召元符天人之應既彰而帝王之德備矣且夫欽崇天道者夙夜不敢康顧畏民岩者滿盈不自啟古哲后遇災省疚居安思危卒之功加當時慶流後裔以是知聖人之德未有不恪恭震動以出之者直省旱潦之不時隄防之偶潰潢池之自外生成實由文武恬嬉不能仰體

德意以宣化承流耳乃

聖德淵冲引為己責下罪己之詔則修省常懷也著守成之論則愆忘是凜也望雨而省愆苦旱而成賦則桑林請禱之心也河決而籲神風霾而納諫則松楸疇咨之意也雖有休徵不言符瑞雖遇令節俾減禮儀惕勵憂勤二十五年如一日以視易訓自強書陳無逸其勗悲有深焉者

聖德所由隆亦諸福所由備用能數天介祉匝宇均禧申命用休曷有既極然猶不自暇逸

必仰遵

成憲如惠藩封周覽川原

勤民整駕以致甫

臨蹕殿遽

陟鼎湖昔曾鞏謂宋仁宗宜弟之行積之以誠

心民皆有父之尊有母之親故棄羣臣之日

人人感動歎歎路哭巷祭莫有知其所繇然

者嗚乎盛哉

天之高也

地之厚也

祖

宗之巍巍蕩蕩也皆

德所訢合以熙鴻號於無窮者也止敬止孝止

慈止信而體元者仁曰恭曰從曰聰曰明而

作聖者睿則惟我


仁宗睿皇帝有以兼之繼自今布在方策

佑啟雲初世世萬子孫也洪庥康第祿服教畏

神以膺此綿延之祚也非

聖人之大德其孰能垂裕若此哉

大清仁宗受天興運敷化綏猷崇文經武孝恭
勤儉端敏英哲睿皇帝實錄卷之三百七十四



統一書號:11018·1355—32

定 價: 44.00 元